

Holy Bible

Aionian Edition®

हरियाणवी बाइबिल
Haryanvi Bible

AionianBible.org
The world's first Holy Bible untranslation
100% free to copy and print
also known as " The Purple Bible "

Holy Bible Aionian Edition ®

हरियाणवी बाइबिल

Haryanvi Bible

CC Attribution ShareAlike 4.0, 2018-2024

Source text: eBible.org

Source version: 7/12/2024

Source copyright: CC Attribution ShareAlike 4.0

The Love Fellowship, 2021

Formatted by Speedata Publisher 4.19.18 (Pro) on 7/19/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern public domain translation in every language

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

हरियाणवी at AionianBible.org/Preface

The *Holy Bible Aionian Edition* ® is the world's first Bible *un-translation!* What is an *un-translation?* Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aīdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aīdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is *eternal*! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to *eternal* life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

History

हरियाणवी at AionianBible.org/History

- 04/15/85 - Aionian Bible conceived as B. and J. pray.
- 12/18/13 - Aionian Bible announced as J. and J. pray.
- 06/21/15 - Aionian Bible birthed as G. and J. pray.
- 01/11/16 - AionianBible.org domain registered.
- 06/21/16 - 30 translations available in 12 languages.
- 12/07/16 - Nainoia Inc established as non-profit corporation.
- 01/01/17 - Creative Commons Attribution No Derivatives 4.0 license added.
- 01/16/17 - Aionian Bible Google Play Store App published.
- 07/01/17 - 'The Purple Bible' nickname begins.
- 07/30/17 - 42 translations now available in 22 languages.
- 02/01/18 - Holy Bible Aionian Edition® trademark registered.
- 03/06/18 - Aionian Bibles available in print at Amazon.com.
- 10/20/18 - 70 translations now available in 33 languages.
- 11/17/18 - 104 translations now available in 57 languages.
- 03/24/19 - 135 translations now available in 67 languages.
- 10/28/19 - Aionian Bible nursed as J. and J. pray.
- 10/31/19 - 174 translations now available in 74 languages.
- 02/22/20 - Aionian Bibles available in print at Lulu.com.
- 05/25/20 - Illustrations by Gustave Doré, La Grande Bible de Tours, Felix Just.
- 08/29/20 - Aionian Bibles now available in ePub format.
- 12/01/20 - Right to left and Hindic languages now available in PDF format.
- 03/31/21 - 214 translations now available in 99 languages.
- 11/17/21 - Aionian Bible Branded Leather Bible Covers now available.
- 12/20/21 - Social media presence on Facebook, Twitter, LinkedIn, YouTube, etc.
- 01/01/22 - 216 translations now available in 99 languages.
- 01/09/22 - StudyPack resources for Bible translation study.
- 02/14/22 - Strong's Concordance from Open Scriptures and STEPBible.
- 02/14/23 - Aionian Bible published on the TOR Network.
- 12/04/23 - Eleēsē added to the Aionian Glossary.
- 02/04/24 - 352 translations now available in 135 languages.
- 05/01/24 - 371 translations now available in 151 languages.

Table of Contents

NEW TESTAMENT

मत्ती	11
मरकुस	36
लूका	52
यूहन्ना	78
प्रेरितों के काम	99
रेमियों	125
1 कुरिन्थियों	138
2 कुरिन्थियों	151
गलातियों	159
इफिसियों	164
फिलिप्पियों	169
कुलुसियों	172
1 थिस्सलुनीकियों	175
2 थिस्सलुनीकियों	178
1 तीमुथियुस	180
2 तीमुथियुस	184
तीतुस	187
फिलेमोन	189
इब्रानियों	190
याकूब	200
1 पतरस	203
2 पतरस	207
1 यूहन्ना	210
2 यूहन्ना	213
3 यूहन्ना	214
यहूदा	215
प्रकाशित वाक्य	217

APPENDIX

Reader's Guide


Glossary

Maps

Destiny

Illustrations, Doré

NEW TESTAMENT



फेर यीशु नै कह्हा, “हे पिता इन्हनै माफ कर, क्यूंकि ये नहीं जाणदे के ये के करै सै।”

अर उननै पर्ची गेर कै उसके लत्ते बांड लिए।

लूका 23:34

मत्ती

1 ये यीशु मसीह के पूर्वजां के नाम सै। वो राजा दाऊद का वंशज था, अर राजा दाऊद अब्राहम का वंशज था। 2 अब्राहम का बेटा इसहाक था, अर इसहाक का बेटा याकूब था, फेर याकूब तै यहूदा अर उसके भाईयाँ का जन्म होया। 3 यहूदा के बेटे फिरिस अर जोरह थे। (फिरिस अर जोरह की माँ का नाम तामार था।) फिरिस का बेटा हिसोन था। हिसोन का बेटा एराम था, 4 एराम का बेटा अम्मीनादाब था। अम्मीनादाब तै नहशोन, अर नहशोन तै सलमोन का जन्म होया, 5 सलमोन का बेटा बोआज था। (बोआज की माँ का नाम राहाब था।) बोआज अर रुत तै ओबेद का जन्म होया, अर ओबेद का बेटा पिरी था। 6 अर यिशै का बेटा राजा दाऊद था। (राजा सुलैमान दाऊद का बेटा था।) जो उस बिरबानी तै जन्मा था जो पैहले उरिय्याह की घरआठी थी, 7 सुलैमान का बेटा रहबाम था। अर रहबाम का बेटा अबिय्याह था। अर अबिय्याह तै आसा का जन्म होया। 8 आसा का बेटा यहोशाफात था। फेर यहोशाफात तै योराम अर योराम तै उज्जियाह का जन्म होया। 9 उज्जियाह का बेटा योताम था अर योताम, आहाज का। फेर आहाज तै हिजकिय्याह का जन्म होया। 10 हिजकिय्याह तै मनशिशह का जन्म होया। मनशिशह का बेटा आमोन था, अर आमोन तै योशिय्याह का जन्म होया। 11 फेर इसाएल के माणसां नै कैदी बणाकै बेबीलोन देश ले जाण के बखत योशिय्याह तै यकुन्न्याह, अर उसके भाईयाँ का जन्म होया। 12 बेबीलोन देश म्ह पोहचाये जाये पाच्छे यकुन्न्याह तै शालतियेल का जन्म होया, फेर शालतियेल तै जरुब्बाबिल का जन्म होया। 13 जरुब्बाबिल तै अबीहूद का जन्म होया, अबीहूद तै एलयाकीम का अर एलयाकीम तै अजोर का जन्म होया। 14 अजोर का बेटा सदोक था। सदोक तै अखीम अर अखीम तै इलीहूद का जन्म होया। 15 इलीहूद का बेटा इलियाजार था। अर इलियाजार मत्तान का। मत्तान का बेटा याकूब था। 16 अर याकूब तै यूसुफ का जन्म होया, जो मरियम का धणी था। अर मरियम तै यीशु जो मसीह कुहावै सै, पैदा होया। 17 इस तरियां अब्राहम तै दाऊद तक चौदहा पीढ़ी होई, अर दाऊद तै लेकै इसाएलियाँ नै कैदी बणाकै बेबीलोन देश म्ह भेज्जे जाण तक चौदहा पीढ़ी, अर इसाएलियाँ कैदी बणाकै बेबीलोन देश म्ह भेज्जे जाण के बखत तै मसीह तक चौदहा पीढ़ी और होई। 18 यीशु मसीह का जन्म इस तरियां होया, कै जिब उसकी माँ मरियम की सगाई यूसुफ कै गैल होग्यी, तो उनका व्याह होण तै पैहल्याए बेरा पाठ्या के वा पवित्र आत्मा की शक्ति तै गर्भवती सै। 19 पर उसका धणी यूसुफ जो एक धर्मी माणस था, उसनै बदनाम न्ही करणा चाहवै था, इस खात्तर उस ताहीं चुपके तै छोड़ण का विचार करया। 20 जिब वो इन बातां नै सोच्चै ए था तो परमेसवर का सुर्गदूत उसनै सपनै म्ह आकै कहण लाग्या, “हे यूसुफ! दाऊद के वंशज, तू अपणी घरआठी मरियम नै अपणे उरै ल्याण तै ना डैर, क्यूँकै जो उसकी कोख म्ह सै, वो पवित्र आत्मा की ओड़ तै सै।

21 वो बेटा जाम्बैगी अर तू उसका नाम यीशु धरिये, क्यूँकै वो अपणे माणसां का उनकै पापां तै उद्धार करैगा।” 22 यो सारा इस खात्तर होया के जो वचन प्रभु नै यशायाह नबी कै जरिये कहव्या था, वो पूरा हो 23 देक्खो एक कुँवारी गर्भवती होगी अर एक छोरा जप्येगी, अर उसका नाम इम्मानुएल धरया जावैगा, जिसका मतलब सै “परमेसवर म्हरै गैल सै।” 24 फेर यूसुफ नींद तै जाग कै परमेसवर कै सुर्गदूत के हुकम कै मुताबिक मरियम नै अपणी घरआठी बणाकै अपणे याड़ ले आया। 25 अर जिब ताहीं उसनै छोरा ना जण्या जिब तक यूसुफ उसके धोरै न्ही गया अर उसनै बाल्क का नाम यीशु धरया।

2 हेरोदेस राजा जिब यहूदिया परदेस पै राज करण लाग्या था, तो उस परदेस के बैतलहम नगर म्ह यीशु का जन्म होया। तो थोड़े बखत बाद कई विद्वान जो तारां का ज्ञान राक्खै थे, पूरब तै यरुशलेम नगर म्ह आये। 2 वो आकै बुझङ्गण लाग्ये, यहूदियाँ का राजा जिसका जन्म होया सै, वो कित्त सै? हमनै पूरब दिशा म्ह उसका तारा देख्या सै, जो उसके जन्म के बरें म्ह बतावै सै, इस करकै हम उसकी आराधना करण आये सां। 3 यो सुणकै हेरोदेस राजा अर उसके गैल यरुशलेम नगर के सारे लोग चिन्ता करण लाग्ये। 4 फेर उसनै माणसां के सारे प्रधान याजकां अर शस्त्रियाँ ताहीं कठु करकै उनतै बुझङ्ग्या, के पवित्र ग्रन्थ के कहवै सै? “मसीह का जन्म कित्त होणा चाहिये?” 5 उननै उस ताहीं कहव्या, “यहूदिया परदेस के बैतलहम नगर म्ह,” क्यूँकै नवियाँ कै जरिये योए पवित्र ग्रन्थ म्ह लिख्या गया सै: 6 “हे बैतलहम नगर, तू जो यहूदा कै परदेस म्ह सै, तू किसे भी ढाळ तै यहूदा कै अधिकारियां म्ह सारा तै छोट्टा कोन्या। क्यूँकै तेरे म्ह तै एक राजा लिकड़ैगा, जो मेरी प्रजा इसाएल की रुखाठी करैगा।” 7 हेरोदेस जाणणा चाहवै था के उस बाल्क की उम्र कितनी सै, इस करकै उसनै तारां का ज्ञान राक्खण आठा ताहीं लुट्क्मा बुलाकै उनतै बुझङ्ग्या के तारा ठीक किस बखत दिख्या था। 8 अर राजा नै यो कहकै उन ताहीं बैतलहम नगर भेज्जा, “जाओ, उस बाल्क कै बरें म्ह ठीक-ठाक बेरा पाड़ो, अर जिब वो मिल ज्या तो मन्नै खबर द्यो, ताकै मै भी आणकै उसकी आराधना करूँ।” 9 वे राजा की बात सुणकै चले गए, अर जो तारा उननै पूरब दिशा म्ह देख्या था, वो उनकै आगै-आगै चाल्या। अर जड़े बाल्क था, उस घर कै उप्पर जाकै रुक ग्या। 10 उस तारे नै देखेकै वे घणे आनन्दित होए, जो उस घर के उप्पर रुक ग्या था। 11 उननै उस घर म्ह जाकै उस बाल्क ताहीं उसकी माँ मरियम कै गैल देख्या, अर छोकै बाल्क की आराधना करी, अर अपणा-अपणा झोळा खोल कै उस ताहीं सोन्ना, लोबान, अर गन्धरस की भेट चढ़ाई। 12 फेर सपनै म्ह परमेसवर नै या चेतावनी दी कै हेरोदेस राजा कै धोरै फेर ना जाइयो, वे राजा ताहीं बिना बताये दुसरे राह तै अपणे देश म्ह चले ग्ये। 13 विद्वानां कै चले जाणकै बाद परमेसवर कै एक सुर्गदूत नै सपनै म्ह आकै यूसुफ तै कहव्या, “उठ! उस बाल्क नै अर उसकी माँ नै लेकै मिस देश म्ह भाग ज्या। अर जिब ताहीं मै तेरे तै ना कहूँ, जिब ताहीं ओड़ै रहिये। क्यूँकै हेरोदेस राजा इस

बालक नै टोटकै उस ताहीं उसनै मरवाणा चाहवै सै।” 14 फेर वो रात नै ए उठकै बालक अर उसकी माँ नै लेकै मिस्ड देश नै चाल पड़ा। 15 अर हेरोदेस राजा कै मरण तक ओड़ए रहा। ताके वो वचन जो प्रभु नै होशे नबी कै जरिये कहा था वो पूरा हो “मनै अपणे बेटै ताहीं मिस्ड देश तै बुलाया।” 16 जिब हेरोदेस राजा नै यो देखा, कै विद्वान् नै उसकै गैल धोक्खा करया सै, फेर वो छो म्ह भरया। उसनै सैनिकां ताहीं भेजकै विद्वान् कै जरिये ठीक-ठाक बताये होड़ बखत कै मुताबिक बैतलहम नगर अर उसकै लोवै-धोवै की जगहांया के सारे छोरणां ताहीं जो दो साल के या उसतै छोड़े थे, वे सब मरवा दिए। 17 फेर जो वचन यिर्मयाह नबी कै जरिये कहा ग्या था, वो पूरा होया, 18 “रामाह नगर म्ह एक रोण की आवाज सुण्ड इड़े, रोण अर घणाए बिलाप। राहेल अपणे बालकां कै खात्तर रोवै थी, अर चुप न्ही होणा चाहवै थी, क्यूँके वे इब मरगे थे।” 19 हेरोदेस राजा कै मरण कै पाच्छै, परमेसवर का सुर्गदूत मिस्ड देश म्ह यूसुफ तै सपनै म्ह बोल्या, 20 “उठ, बालक अर उसकी माँ नै लेकै इसाएल कै देश म्ह चल्या ज्या, क्यूँके हेरोदेस राजा अर उसके माणस जो बालक नै मारणा चाहै थे, वे मर लिये सै।” 21 यूसुफ नींद तै जाज्ञा, अर बालक अर उसकी माँ नै गेल्या लेकै इसाएल देश म्ह बोहड़ आया। 22 पर या सुणकै कै अरखिलाउस अपणे पिता हेरोदेस राजा कै जगहां यहूदिया परदेस पै राज करै सै, ओड़े जाण तै डरया। फेर सपनै म्ह परमेसवर की ओड़े तै चेतावनी पाकै गलील परदेस म्ह चल्या गया। 23 अर नासरत नाम कै नगर म्ह जा बस्या, ताके वो वचन पूरा हो, जो नवियाँ कै जरिये यीशु के बारें कहा गया था: “वो नासरी कुहावैगा।”

3 उन दिनां म्ह यूहन्ना बपतिस्मा देण आळा आकै यहूदिया परदेस के जंगल-बियाबान म्ह यो प्रचार करण लाग्या: 2 “पाप करणा छोड़ द्यो, क्यूँके सुर्ग का राज्य धोरै आ लिया सै।” 3 यो वोए सै, जिसका जिक्र यशायाह नबी कै जरिये करया गया: “जंगल-बियाबान म्ह तै ए कोए रुक्का देवै सै, के प्रभु का राह तैयार करो अर उसकी सङ्क रुद्धी करो।” 4 यूहन्ना ऊँट के रुए के लत्ते पहरणीया अर अपणी कड़ म्ह चमड़े की पेट्टी-बँधे रहवै था। उसका खाणापान टिड्हियाँ अर शहद था। 5 फेर यरुशलेम नगर अर सारे यहूदिया परदेस अर यरदन नदी कै लोवै-धोवै की सारी जगहां के माणस उसकै धोरै आ ग्ये। 6 उन सारया नै अपणे-अपणे पापां नै मानकै यरदन नदी म्ह उसतै बपतिस्मा लिया। 7 जिब उसनै घणे सारे फरीसीयाँ अर सदूकियाँ ताहीं अपणे धोरै बपतिस्मा लेण खात्तर आन्दे देखा, तो बोल्या, “हे साँप के सप्पोनो जिसे माणसों, थम नरक की सजा तै किस ढाल बचोगे? (questioned) 8 इस खात्तर जै थमनै सच म्ह पाप करणा छोड़ दिया सै तो यो दिखाण खात्तर भले काम तो करो। 9 अर अपणे-अपणे मन म्ह न्यू मतना सोच्चो के म्हारा पिता अब्राहम सै। क्यूँके मै थमनै कहूँ सूं के परमेसवर इन पत्थरां तै अब्राहम कै खात्तर ऊलाद पैदा कर सकै सै। 10 इब कुहाड़ा दरखतां की जड़ पै धरया सै, इस करकै जो-जो दरखत बढ़िया फल न्ही ल्यांदा, वो काट्या अर आग म्ह झोक्या जावैगा। इसका मतलब यो सै

परमेसवर उन सारया नै दण्ड देवैगा जो पाप करणा न्ही छोड़ते। 11 “मै तो थमनै पाणी तै, पापां ताहीं छोड़ण का बपतिस्मा देऊ सूं पर जो मेरै पाच्छै आवैगा, वो मेरै तै भी शक्तिशाली सै। मै उसकी जूती ठाण जोग्या भी कोनी। वो थमनै पवित्र आत्मा अर आग तै बपतिस्मा देवैगा। 12 उसका लाज उसकै हाथ म्ह सै, अर वो अपणा खलिहाण आच्छी तरियां साफ करैगा, अर अपणे नाज नै अपणे कोठार (गोदाम) म्ह कट्ठा करैगा, पर भुरंगी ताहीं उस आग म्ह जलावैगा जो कदे बुझै कोनी।” 13 उस बखत यीशु गलील परदेस तै यरदन नदी कै कन्ठारे यूहन्ना कै धोरै उसतै बपतिस्मा लेण आया। 14 पर या कहकै यूहन्ना उसनै रोककण लाग्या, “कै मन्नै तो तेरे हाथ तै बपतिस्मा लेण की जरूरत सै, अर तू मेरै धोरै आया सै?” 15 यीशु नै उसतै जवाब दिया, “कै इब तो योए होण दे, क्यूँ कै हमनै इस्से तरियां तै सारी धार्मिकता पूरी करणा ठीक सै।” फेर उसनै उसकी बात मान ली। 16 अर यीशु बपतिस्मा लेकै जिब पाणी तै उपर आया, अर अकास खुलग्या, अर उसनै परमेसवर की पवित्र आत्मा ताहीं कबूतर की तरियां उतरते अर अपणे उपर आन्दे देख्या। 17 अर देक्खो, परमेसवर सुर्ग म्ह तै बोल्या, “कै यो मेरा प्यारा बेट्टा सै, जिसतै मै भोत घणा राज्जी सूं।”

4 बपतिस्मे के बाद पवित्र आत्मा यीशु नै जंगल-बियाबान म्ह लेग्या, ताके शैतान उस ताहीं परखै। 2 वो चालीस दिन अर चालीस रात, बिना खाए पिए रहा, फेर उसनै भूख लाग्यी। 3 फेर शैतान नै धोरै आणकै उसतै कहा, “जै तू परमेसवर का बेट्टा सै, तो कहकै साबित करदे, के ये पत्थर रोट्टी बण जावै, ताके तू इन्हनै खा सकै।” 4 यीशु नै जवाब दिया: “पवित्र ग्रन्थ म्ह लिख्या सै, ‘माणस सिर्फ रोट्टी तै ए न्ही, पर परमेसवर के हरेक वचन तै जो उसनै मान्नै सै, जिन्दा रहेगा।’” 5 फेर शैतान उसनै पवित्र नगर यरुशलेम म्ह लेग्या अर मन्दर की चोट्टी पै खड्या कर दिया। 6 अर उसतै बोल्या, “जै तू परमेसवर का बेट्टा सै, तो अपणे-आपनै तलै गेर कै साबित कर। क्यूँके पवित्र ग्रन्थ म्ह लिख्या सै: वो तेरे बाबत अपणे सुर्गदूतां नै हुक्म देगा, अर वे तन्है हाथूं हाथ उठा लेवैंगे कदे इसा ना हो के तेरे पायां म्ह पत्थर तै ठेस लागै।” 7 यीशु नै उसतै कहा, “यो भी पवित्र ग्रन्थ म्ह लिख्या सै, के ‘तू अपणे प्रभु परमेसवर नै ना परखै।’” 8 फेर शैतान उसनै घणे ऊँच्चे पाहाड़ पै लेग्या अर सारी दुनिया का राजपाट अर उसकी शानों-शोकत दिखाकै, 9 उसतै बोल्या, “जै तू झुक्कै मेरी भगति करै, तो मै सारा किमे तन्है दे दियुँगा।” 10 फेर यीशु उसतै बोल्या, “हे शैतान दूर हो ज्या, पवित्र ग्रन्थ म्ह लिख्या सै: तू प्रभु अपणे परमेसवर की भगति कर, अर सिर्फ उस्से की सेवा करया कर।” 11 फेर शैतान उसकै धोरै तै चल्या ग्या, अर देख्ये, सुर्गदूत आणकै उसकी सेवा करण लाग्ये। 12 जिब उसनै न्यू सुण्या के यूहन्ना कैदी बण लिया सै, तो वो यहूदिया परदेस तै लिंकड़ै के गलील परदेस म्ह चल्या ग्या। 13 अर फेर वो गलील परदेस के नासरत नगर नै छोड़कै कफरनहूम नगर म्ह, जो गलील समुन्द्र कै किनारे था, कफरनहूम उस क्षेत्र म्ह गलील के समुन्द्री तट पै था, जड़े जबूलून अर

नप्ताली के गोत्र के माणस रहवै थे। 14 ताके जो यशायाह नबी के जरिये कहा गया था, वो पूरा हो 15 “जबूलून अर नप्ताली जात्ति के परदेस, गलील समुन्दर कै किनारे यरदन नदी के पार, गलील परदेस म्ह रहण आळे गैर यूदी माणस” 16 “जो माणस अन्धकार म्ह जीण लागरे थे, उननै तेज चान्दणा देख्या। वे उस जगहां म्ह जीण लागरे थे, जित्त हर घड़ी मौत का खतरा था, उनपै चान्दणा चमक्या।” 17 उस बखत तै यीशु नै प्रचार करणा अर कहणा शुरु करया, “पाप करणा छोड़ द्यो, क्यूँके सुर्ग का राज्य धोरै आया सै।” 18 गलील परदेस म्ह गलील समुन्दर कै किनारे धूमदे होए उसनै दो भाईयां ताहीं शमैन जो पतरस्कु कुहावै सै, अर उसके भाई अन्द्रियास ताहीं समुन्दर म्ह जाळ गेरते देख्या, क्यूँके वे मछवारे थे। 19 यीशु नै उनतै कह्या, “मेरै पाच्छे आओ, मै थमनै माणसां ताहीं कठें करण आळे बणाऊँगा ताके वो मेरे चेल्लें बणे।” 20 वे जिब्बे जाळां नै छोड़कै उसके चेल्लें बणण खात्तर उसके पाच्छे हो लिये। 21 ओड़ तै आगै चालकै, यीशु नै दो और भाईयाँ ताहीं यानी जब्दी के बेटे याकूब अर उसकै भाई यूहन्ना ताहीं देख्या। वे अपणे पिता जब्दी कै गैल किस्ती पै अपणे जाळां ताहीं ठीक करै थे। यीशु नै उन ताहीं भी बुला लिया। 22 वे जिब्बे किस्ती अर अपणे पिता नै छोड़कै उसके चेल्लें बणण खात्तर उसके पाच्छे हो लिये। 23 यीशु सारे गलील परदेस म्ह फिरता होया उनकै आराधनालयां म्ह उपदेश सुणान्दा, अर राज्य का सुसमाचार सुणान्दा अर माणसां की होके ढाळ की बीमारी अर कमजोरियां नै दूर करदा रह्या। 24 अर सारे सीरिया परदेस म्ह उसका यश फैलाया, अर माणस सारे बिमारां नै, जो कई ढाळ की बिमारियाँ अर दुखां तै जकड़े होए थे, जिन म्ह भुंडी आत्मा थी, अर मिर्द्दी आळे अर लकवे के रोगी नै उसकै धोरै ल्याए उसनै उन ताहीं ठीक करया। 25 अर गलील परदेस, दिकापुलिस नगर, यरुशलेम नगर, यूदीया परदेस अर यरदन नदी कै पार तै भोड़ की भोड़ उसकै पाच्छे हो ली

5 यीशु उस भीड़ नै देखकै पहाड़ पै चला ग्या, अर जब बैठन्या तो उसके चेल्लें उसकै धोरै आए। 2 अर वो अपणी ऊँच्ची आवाज म्ह उननै या शिक्षा देण लाग्या: 3 “धन्य सै वे, जो या जाणे सै के उननै परमेसवर की जस्तरत सै, क्यूँके सुर्ग का राज्य उननै का सै। 4 धन्य सै वे, जो शोक करै सै, क्यूँके वे परमेसवर तै शांति पावैंगे। 5 धन्य सै वे, जो नप्र सै, क्यूँके वे परमेसवर के जरिये धरती के हकदर होंगे। 6 धन्य सै वे, जो धार्मिकता का जीवन जीण खात्तर भूखे अर तिसाए सै, क्यूँके वे परमेसवर के जरिये छिकाए जावैंगे। 7 धन्य सै वे, जो दया करण आळे सै, क्यूँके परमेसवर भी उनपै दया करैगा। 8 धन्य सै वे, जिनके मन शुद्ध सै, क्यूँके वे परमेसवर नै देखैंगे। 9 धन्य सै वे, जो मेल कराण आळे सै, क्यूँके वे परमेसवर के बेट्टा-बेट्टी कुहावैंगे। 10 धन्य सै वे, जो धार्मिकता के कारण सताए जावै सै, क्यूँके सुर्ग का राज्य उन्हे का सै।” 11 “धन्य सौं थम, जिब माणस मेरै कारण थारी बुराई करै सतावै अर झूठ बोल-बोलकै थारे बिरोध म्ह सारी तरियां की बुरी बात फैलावै,

क्यूँके थम मेरे चेल्लें सौं। 12 फेर खुश अर मग्न होइयो, क्यूँके थारे खात्तर सुर्ग म्ह बड़डा ईनम सै। इस करकै के उननै उन नवियां ताहीं भी इस्से ढाळ सताया था, जो थारे तै भी भोत पैहल्या थे।” 13 “थम धरती पै लोगां खात्तर नून की तरियां सौं, पर जै नून का सुवाद जान्दा रहवै, तो वो किस चीज तै नमकिन करया जावैगा? फेर वो किसे काम का न्ही, सिफ़ इसकै के बाहर फेक्या ज्या अर माणसां के पैरां तळै चिकल्या ज्या।” 14 “थम दुनिया के लोगां खात्तर चाँदणा की तरियां सौं। जो नगर पहाड़ पै बस रह्या सै वो लुट्क न्ही सकदा। 15 अर माणस दीवा जाळा कै बरतन कै तळै न्ही पर टांडी पै धरै सै, फेर उसतै धर के सारे माणसां ताहीं चान्दणा ज्या सै। 16 उस्से तरियां थारा चान्दणा माणसां के स्यामी चमकै के वे थारे भले कामां नै देखकै थारे पिता की, जो सुर्ग म्ह सै बड़ाई करै।” 17 “या ना समझो, के मै मूसा के नियम-कायदा या नवियां के लेख नै मिटाण आया सूं, मिटाण न्ही, पर पूरा करण आया सूं। 18 क्यूँके मै थमनै सच कहूँ सूं, के जब ताहीं धरती अर अकास सै, जद ताहीं नियम-कायदा म्ह लिखी हरेक छोट्टी तै छोट्टी बात पूरी होए बिना न्ही रहवैगी। 19 इस करकै जो कोए इन छोट्टै तै छोट्टै हुकम म्ह तै किसे एक नै भी न्ही मानता, अर दुसरे माणसां नै भी उसाए सिखावै, वो सुर्ग के राज्य म्ह सारा तै छोट्टा कुहावैगा, पर जो कोए उन सारे हुकमां पै चाल्लैगा अर उननै सिखावैगा, वोए सुर्ग राज्य म्ह महान कुहावैगा। 20 क्यूँके मै थमनै कहूँ सूं, के जै थारा आत्मिक जीवन शास्त्रियाँ अर फरीसियाँ कै आत्मिक जीवन तै बढ़कै न्ही हो, तो थम सुर्ग के राज्य म्ह कदे बड़ न्ही पाओगों” 21 “थमनै सुण्या होगा, के थारे पूर्वजां तै कह्या, गया था के ‘खून ना करियो’, अर ‘जो कोए खून करैगा वो कचेहड़ी म्ह दण्ड के लायक होगा।’ 22 पर मै थमनै या कहूँ सूं के जो कोए अपणे भाई पै गुस्सा करैगा, वो कचेहड़ी म्ह दण्ड के लायक होगा, अर जो कोए अपणे भाई नै निकम्मा कहवैगा वो बड़ी सभा म्ह दण्ड के लायक होगा, अर जो कोए कहवै ‘अरै बेकूफ’ वो नरक की आग के दण्ड के लायक होगा।” (Geenna g1067) 23 “इस करकै जै तू अपणा चढ़ावा मन्दर म्ह वेदी पै चढ़ावै, अर ओड़े तू याद करै, के तेरे भाई के मन म्ह तेरे खात्तर किमे बिरोध सै, 24 तो तू अपणा चढ़ावा ओड़े वेदी कै धोरै छोड़दे, अर ज्याकै अपणे भाई तै मेल-मिलाप कर अर फेर आकै अपणा चढ़ावा चढ़ा।” 25 “जिब तक तू अपणे बैरी के गेल्या राह म्ह सै, तो उसतै जिब्बे मेल-मिलाप करले, कदे इसा ना हो के बैरी तन्नै न्यायाधीश के हवालै, अर न्यायाधीश तन्नै सिपाही के हवालै करदे, अर तू जेल म्ह गेर दिया जावै। 26 मै तन्नै सच कहूँ सूं के जिब ताहीं तू पाई-पाई न्ही भरदे जद ताहीं जेल तै छुटण न्ही पावैगा।” 27 “थमनै परमेसवर का हुकम सुण्या होगा के कह्या गया था, ‘जारी ना करियो।’ 28 पर मै थमनै न्यू कहूँ सूं के जो कोए किसे बिरबान्नी पै भुंडी निगांह गेरे वो अपणे मन म्ह उसतै जारी करग्या। 29 जै तेरी सोळी आँख तेरे तै पाप करवावै सै, तो उसनै लिकाड के फेंक दे, क्यूँके तेरे खात्तर योए ठीक सै के तेरे अंगा म्ह तै एक नाश हो ज्या अर तेरी सारी

देह नरक म्ह ना गेरी जावै। (Geenna g1067) 30 जै तेरा सोळा हाथ तेरे तै पाप करवावै सै, तो उसनै काट के फेंक दे, क्यूँके तेरे खात्तर योए आच्छा सै के तेरे बाककी अंगा म्ह तै एक नाश हो जावै अर तेरी सारी देह नरक म्ह न्ही गेरी जावै।” (Geenna g1067) 31 “यो भी कह्हा गया था, ‘जो कोए अपणी घरआली नै तलाक देणा चाहवै, तो उसनै तलाकनामा दे।’ 32 पर मै थमनै यो कहूँ सूँ के जो कोए अपणी घरआली नै जारी कै सिवा किसे और कारण तै तलाक दे, तो वो उसतै जारी करवावै सै। अर जो कोए उस छोट्ठी होई तै ब्याह करै, वो जारी कै सै।” 33 “फेर थमनै सुण्या होगा के थारे पूर्वजां तै कह्हा गया था, ‘झूँठी कसम ना खाईयों, पर प्रभु के खात्तर अपणी कसम नै पूरी करियो।’ 34 पर मै थमनै या कहूँ सूँ के कदे कसम ना खाईयों, ना तो सुर्ग की, क्यूँके वो परमेसवर का सिंहासन सै। 35 ना धरती की, क्यूँके वा उसकै पैरां की पिढ्ठी सै, ना यस्तलेम नगर की, क्यूँके वो महाराजा का नगर सै। 36 अपणे सिर की भी कसम ना खाईयों क्यूँके तू एक बाल नै भी ना तो धोळा, अर ना काळा कर सकै सै। 37 पर थारी बात ‘हाँ’ की हाँ, या ‘ना’ की ना हो, क्यूँके जो किमे इसतै घणा होवै सै वो शैतान की ओड तै होवै सै।” 38 “थमनै नियम-कायदा म्ह सुण्या होगा के कह्हा था, आँख कै बदले आँख, अर दाँत कै बदले दाँत। 39 पर मै थमनै कहूँ सूँ के बुरे माणस तै झङ्गाडा मोल ना लियो, पर जो कोए तेरे सोळे गाल पै थप्पड़ मारै उस कान्ही दुसरा भी फेर दे। 40 जै कोए तेरे पै दाब देकै तेरा कुड़ता लेणा चाहवै, तो उसनै अंगोच्छा भी दे दे। 41 जै कोए अधिकारी तन्नै एक कोस मुफ्त म्ह ले जावै, तो उसकै गेल्या दो कोस चल्या ज्या। 42 जो कोए तेरे तै माँगै, उसनै दे, अर जो कोए तेरे तै उधार लेणा चाहवै, उसतै मुँह ना मोड।” 43 “थमनै नियम-कायदा म्ह सुण्या होगा के कह्हा गया था, अपणे पड़ोसी तै प्यार राखिये, अर अपणे बैरी तै बैर। 44 पर मै थमनै कहूँ सूँ के अपणे बैरियाँ तै प्यार राख्खों अर अपणे सतावण आळे के खात्तर प्रार्थना करो, 45 जिसतै थम अपणे सुर्गीय पिता की सिध्द ऊलाद मान्ने जाओगे। क्यूँके वो भले अर बुरे लोगगां पै अपणा सूरज उगाया करै सै, अर धर्मी अर अधर्मी लोगगां पै मिह बरसावै सै। 46 क्यूँके जै थम अपणे प्यार करण आळा तै ए प्यार करो सों, तो कौण सा बड़ा काम करो सों? के चुंगी लेण आळे भी इसाए न्ही करदे? 47 जै थम अपणे भाईयाँ नै ए नमस्कार करो, तो कौणसा बड़डा काम करो सों? के गैर यहूदी भी इसाए न्ही करदे? 48 इस करकै जस्ती सै के थम भी सिध्द बणो, जिसा थारा सुर्गीय पिता सिध्द सै।”

6 “चौकक्स रहो! थम माणसां नै दिखाण कै खात्तर धर्म के काम ना करो, न्ही तो अपणे सुर्गीय पिता तै कुछ भी इनाम न्ही पाओगे।” 2 “इस करकै जिब तू दान करै, तो अपणे आगै ढिंडोरा ना पिटवाईये, जिसा कपटी, आराधनालयाँ अर गढियाँ म्ह करै सै, ताके माणस उनकी बड़ाई करै। मै थारे ताहीं साच्ची कहूँ सूँ के उननै अपणा इनाम माणसां की बड़ाई के रूप म्ह पा लिया। 3 पर जिब तू दान करै, तो उसका किसे और नै बेरा न्ही पाटणा चाहिए। 4 ताके तेरा दान छिप्या रहवै, अर जिब

तेरा पिता जो गुप्त म्ह देक्खै सै, तन्नै इनाम देवैगा।” 5 “जिब तू प्रार्थना करै, तो कपटियाँ के तरियां ना हो, क्यूँके माणसां नै दिखाण खात्तर आराधनालयाँ म्ह अर सङ्कां कै मोड़ां पै खडे होकै प्रार्थना करणा उननै आच्छा लागै सै। मै थमनै साच्ची कहूँ सूँ के उननै अपणा इनाम माणसां की बड़ाई के रूप म्ह पा लिया। 6 पर जिब तू प्रार्थना करै, तो अपणी कोठडी म्ह जा, अर किवाड़ बन्द करकै अपणे पिता तै, जो गुप्त म्ह सै उसतै प्रार्थना कर। जद तेरा पिता, जो तेरे लुह्क कै करे होए काम्मां नै देक्खै सै, तो तन्नै उनका इनाम देवैगा। 7 प्रार्थना करदे बखत दुसरी जात्तां की तरियां बडबडाइये ना, क्यूँके वे समझै सै के उनकै एक बात के बार-बार बोल्लण तै उनकी सुणी जावैगी। 8 इस करकै थम उनकी तरियां ना बणो, क्यूँके थारा पिता थारे माँगण तै पैहल्याए जाणै सै के थारी कै-के जस्तर तै सै। 9 इस करकै थम इस तरियां तै प्रार्थना करया करो ‘हे म्हारे पिता, तू जो सुर्ग म्ह सै, तेरा नाम पवित्र मान्या जावै।’ 10 ‘तेरा राज्य आवै। तेरी इच्छा जिसी सुर्ग म्ह पूरी होवै सै, उसी धरती पै भी हो।’ 11 ‘म्हारे दिन भर की रोटी आज हमनै दे।’ 12 ‘अर जिस तरियां तू भी म्हारे हमनै अपणे कस्तुरवारां ताहीं माफ करया सै, उससे तरियां तू भी म्हारे कसूरा नै माफ करदे।’ 13 ‘अर म्हारे ताहीं परखै ना, पर बुराई तै बचा, (क्यूँके राज्य, वीरता अर महिमा सदा तेरे ए सै।’ आमीन।) 14 “इस करकै जै थम माणसां के कसूर माफ करोगे, तो थारा सुर्गीय पिता भी थमनै माफ करेगा। 15 अर जै थम माणसां के कसूरां नै माफ न्ही करोगे, तो थारा पिता भी थारे कसूर माफ न्ही करैगा।” 16 “जिब थम ब्रत करो, तो कपटियाँ की तरियां थारे मुँह पै उदासी छाई ना रहवै, क्यूँके वे अपणा मुँह बणाई राक्खै सै, ताके माणस उननै ब्रती जाणै। मै थमनै साच्ची कहूँ सूँ के वे अपणा इनाम माणसां की बड़ाई के रूप म्ह पा चुके। 17 पर जिब तू ब्रत करै तो अपणे सिर पै तेल लगा अर मुँह धो, 18 ताके माणस न्ही पर तेरा पिता तन्नै ब्रती जाणै। तेरा पिता जो तेरे उस गुप्त म्ह करे होए ब्रत नै देक्खै सै, तो तन्नै उनका इनाम देगा।” 19 “अपणे खात्तर धरती पै धन कठ्ठा ना करो, जडै कीडा अर काई नाश करै सै, अर जडै चोर सेंध लगावै अर चोरै सै। 20 पर अपणे खात्तर सुर्ग म्ह धन कठ्ठा करो, जडै ना तो कीडा अर ना काई नाश करै सै, अर जडै चोर सेंध लगावै अर ना चोरै सै। 21 क्यूँके जडै तेरा धन सै उडै तेरा मन भी लाग्या रहवैगा।” 22 “देह का दीवा आँख सै इस करकै जै तेरी नजर सही सै तो तेरी सारी देह भी चाँदणे म्ह सै। 23 पर जै तेरी नजर खराब सै तो तेरी सारी देह भी अन्धेरे म्ह सै, इस कारण जो तू सोच्चै सै के मै चाँदणे म्ह सूँ, पर वो अन्धेरा हो, तो सोचकै देख वो अन्धेरा कितना बड़डा होगा।” 24 “कोए माणस दो मालिकां की सेवा एक बखत पै न्ही कर सकदा, क्यूँके वो एक तै बैर अर दुसरे तै प्यार राख्खैगा, या एक तै मिल्या रहवैगा अर दुसरे नै छोट्टा जाणैगा। थम परमेसवर अर धन दोनुआ की सेवा न्ही कर सकदे। 25 “इस करकै मै थमनै कहूँ सूँ के अपणे जीवन के खात्तर या चिंता ना करियो के हम के खावांगे अर के पीवांगे, अर ना अपणी देह के खात्तर के पैहरांगे। के जीवन खाणे तै, के

देह लत्यां तै बढ़कै कोन्या? 26 अकास के पंछियाँ नै देक्खों! वे ना बोवै सै, ना काटै सै, अर ना कुठले (गोदाम) म्ह कठुा करै सै, फेर भी थारा सुर्गीय पिता उन ताहीं खुवावै सै। के थम पंछियाँ तै घणे कीमती कोनी? 27 थारे म्ह कौण सै, जो चिंता करकै अपणी उम्र म्ह एक पल भी बढा सकै सै?” 28 “अर लत्यां के खात्तर क्यूँ चिंता करो सौ? जंगली फूल्ला पै ध्यान करो के वे किस तरियां बढ़ै सै, वे ना तो मेहनत करै सै, ना लत्ते बणावै सै। 29 तोभी मै थारे तै कहूँ सूं के राजा सुलैमान भी, अपणे सरे शानों-शोकत म्ह उन म्ह तै किसे के समान लत्ते पैहे होए कोनी था। 30 इस करकै जिब परमेसवर मैदान की धास नै इसी सुन्दरता देवै सै, जो आज सै अर काल बाड़ म्ह झोक्की जावैयी, तो हे विश्वास म्ह कमजोर माणसों, वो थारी चिन्ता क्यूँ न्ही करैगा?” 31 “इस करकै थम चिंता करकै न्यू ना कहियो के हम के खावांगे, या के पीवांगे, या के पैहरांगे? 32 क्यूँकि गैर यहूदी इन सारी चिज्जां की टोह म्ह रहवै सै, पर थारा सुर्गीय पिता जाणै सै के थमनै इन सारी चिज्जां की जरूरत सै, इस करकै चिन्ता ना करो। 33 इस करकै पैहल्या थम परमेसवर के राज्य की खोज करो अर पवित्र जीवन जिओ, तो ये सारी चीज भी थमनै अपणे-आप मिल ज्यागीं। 34 इस करकै काल की चिंता ना करो, क्यूँकि काल का दिन अपणी चिंता आप कर लेवैगा, आज कै खात्तर आज का ए दुख भतेरा सै।”

7 “दुसरयां पै दोष ना लाओ न्ही तो लोग थारे पै भी दोष लगावैंगे।

2 क्यूँकि जिस तरियां थम दुसरयां पै दोष लगावैगा, जिस तरियां तै थम दुसरयां का न्याय करो सौ, उस्से तरियां थारा भी न्याय करया जावैगा।” 3 “तू क्यूँ अपणे भाई की आँख कै तिन्कै जिसी छोट्टी सी बुराई नै देक्खै सै, अर अपणी आँख म्ह लठ जिसी बड़ी बुराई तत्त्वै कोनी दिख्खीदी?” 4 जिब तेरी-ए आँख म्ह लठ सै, तो तू अपणे भाई तै किस तरियां कहवै सै, “ल्या मै तेरी आँख तै तिन्का लिकाड़ द्यु।” 5 इस करकै हे कपटी, पैहल्या अपणे जीवन की बड़ी बुराई नै दूर कर फेर तू अपणे भाई नै आच्छी दाऊँ बुराई तै बचा सकैगा। 6 “उन माणसां ताहीं परमेसवर का वचन ना सुणाओ जो उस ताहीं सुणणा न्ही चाहन्दे। जै तू इसा करै सै तो पवित्र चीज कुत्याँ कै आगै अर मोत्ती सूअरां के आगै फैक्कण की ढाळ होगा, इसा न्ही हो के वे उननै पैरै तळै चिकलै अर उल्टके थमनै पाडले।” 7 “परमेसवर तै माँग्गो, तो वो थमनै देवैगा, टोक्कोंगे तौ थम पाओगे, खटखटाओ, तो थारे खात्तर खोल्या जावैगा। 8 क्यूँकि जो कोए माँग्गे सै, उसनै मिलै सै, अर जो टोहैं सै, वो पावै सै, अर जो खटखटावै सै, उसकै खात्तर खोल्या जावैगा।” 9 “थारे म्ह तै इसा कौण माणस सै, के जै उसका बेटा रोट्टी माँग्गे, तो वो उसनै पत्थर देवै? 10 या मच्छी माँग्गे, तो उसनै साँप देवै? 11 इस करकै जिब थम बुरे होकै, अपणे बालकां नै आच्छी चीज देणा जाणो सौं, तो थारा सुर्गीय पिता अपणे माँगण आला नै आच्छी चीज क्यूँ न्ही देवैगा? 12 इस कारण जो किमे थम चाहो सौं के माणस थारे गेल्या करै, थम भी उनके गेल्या उसाए

करो, क्यूँकि नियम-कायदे अर नवियाँ की शिक्षा याए सै।” 13 “थम परमेसवर के राज्य म्ह भीड़े फाटक तै ए दाखल हो सको सौं, क्यूँकि चौड़ा सै वो फाटक अर सीधा सै वो रास्ता जो नाश नै पोहच्यै सै, अर घणेए सै जो उस म्ह दाखल होवै सै। 14 क्यूँकि भीड़ा सै वो फाटक अर मुश्किल सै वो राह जो अनन्त जीवन की ओड़ पुच्छावै सै, अर भोट थोड़े सै वे लोग जो उसनै पावै सै।” 15 “झुँठे नवियाँ तै चौकक्स रहो, जो भेड़ुंके के बेष म्ह थारे धोरै आवै सै, पर भित्तर तै वे पाडण आले भेड़िये सै। 16 उनके काम्पां तै ए थम उन ताहीं पिच्छाण ल्योगे। के माणस झाड़ियाँ तै अंगरू, या झाड़ बोझड़े तै अंजीर तोड़े सै? 17 इस तरियां हरेक आच्छा दरखत आच्छा फल ल्यावै सै अर निकम्मा दरखत बुरा फल ल्यावै सै। 18 आच्छा दरखत बुरा फल न्ही ल्या सकदा, अर ना निकम्मा दरखत आच्छा फल ल्या सकै सै। 19 जो-जो दरखत आच्छा फल न्ही ल्यान्दा, वो काट्या अर आग म्ह गेरया ज्या सै, उस्से तरियां झुँठे नवियाँ कै गैल भी इसाए होवैगा। 20 झुँठे नवियाँ नै उनके काम्पां तै थम उन ताहीं पिच्छाण ल्योगे।” 21 “जो मरै तै, हे प्रभु! हे प्रभु!” कहवै सै, उन म्ह तै हर एक सुर्ग के राज्य म्ह दाखल न्ही होगा, पर वोए दाखल होगा जो मेरै सुर्गीय पिता की मर्जी पै चाल्लै सै। 22 न्याय के दिन घणखेरे-ए माणस मेरै तै कहवैगे, “हे प्रभु, हे प्रभु, के हमनै तेरे नाम तै भविष्यवाणी न्ही करी, के हमनै तेरे नाम तै ओपरी आत्मायाँ ताहीं न्ही लिकाड्या, अर तेरे नाम तै घणेए अचम्भे के काम न्ही करें?” 23 फेर मै उनतै खुलैकै कह दियुँगा, मन्नै थारे ताहीं कदे न्ही अपणाया। हे भुन्डे काम करण आलो, मेरै धोरै तै चले जाओ।” 24 “इस करकै जो कोए मेरी इन बात्तां नै सुणकै उननै मान्नै सै, वो उस अकलमंद माणस की ढाळ होगा जिसनै अपणे घर की नीम चट्टान पै धरी। 25 अर मिह बरसया, बाढ़ आयी, आँधी आई, अर उस घर तै टकराई, फेर भी वो कोनी गिरया, क्यूँकि उसकी नीम चट्टान पै धरी गयी थी। 26 पर जो कोए मेरी ये बात सुणी सै अर उनपै न्ही चाल्दा, वो उस बेकूफ माणस की ढाळ सै, जिसनै अपणे घर की नीम बाल्डूरेत पै धरी। 27 अर मिह बरसया, बाढ़ आयी, आँधी चाल्ली, अर उस घर तै टकराई अर पड़कै उसका सत्यानाश होग्या।” 28 जिब यीशु नै ये बात कह ली, तो इसा होया के भीड़ उसके उपदेश तै हैरान होगी, 29 क्यूँकि वो उन ताहीं शास्त्रियाँ की तरियां न्ही पर अधिकार कै गैल उननै उपदेश देवै था।

8 जिब यीशु उस पहाड़ तै उतरा, तो एक बड़ी भीड़ उसके पाच्छै हो ली। 2 अर, एक कोढ़ी नै धोरै आकै उस ताहीं नमस्कार करया अर कह्या, “हे प्रभु, जै तू चाहवै, तो मन्नै ठीक कर सकै सै।” 3 यीशु नै हाथ बढ़ाकै उस ताहीं छुआ, अर कह्या, “मै चाहूँ सूं के तू इस बीमारी तै ठीक हो ज्या।” अर वो जिब्बे कोढ़ तै ठीक होग्या। 4 यीशु नै उसतै कह्या, “देख किसे तै ना कहिये, पर जाकै अपणे-आपनै याजक ताहीं दिखा अर अपणे कोढ़ तै ठीक होण कै बारै म्ह जो कुछ मूसा नबी नै जो पवित्र ग्रन्थ म्ह चढ़ावा बताया सै उसनै चढ़ा, के माणसां खात्तर या गवाही हो, के तू ठीक होग्या सै।” 5 जिब यीशु कफरनहूम नगर म्ह आया तो एक

सूबेदार नै धोरै आकै उसतै बिनती करी, 6 “हे प्रभु, मेरा नौकरकर लकवे के रोग तै घणा दुखी होरया सै।” 7 यीशु नै उस ताहीं कह्या, “मै आकै उसनै ठीक करूँगा।” 8 सूबेदार नै जवाब दिया, “हे प्रभु, मै इस लायक कोनी के तू मेरे घरां आवै, पर सिर्फ मूँह तै कह दे तो मेरा नौकरकर ठीक हो ज्यागा। 9 क्यूँकि मै जाणु सूँ के मै भी किसी के आदेशां का पालन करूँ सूँ, अर सिपाही मेरै आदेशां का पालन करै सै। जिब मै एक तै कहूँ सूँ जा, तो वो जावै सै, अर दुसरे तै कहूँ आ, तो वो आवै सै, अर अपणे नौकरकर तै कहूँ सूँ यो कर, तो वो करै सै।” 10 यो सुणकै यीशु कै अचम्भा होया, अर जो लोग उसकै पाच्छे आवै थे उनतै कह्या, “मै थमनै साच्ची कहूँ सूँ के मन्नै इसाएल देश मृ भी इसा बिश्वास न्ही देख्या, जिसा इस सूबेदार का सै। 11 अर मै थमनै कहूँ सूँ के पूरब अर पछ्याम तै घणेए गैर यहूदी आवैंगे अर भोज मृ अब्राहम अर इस्हाहक अर याकूब के गेल्या सुर्ग के राज्य मृ बैठेंगे। 12 पर राज्य की ऊलाद (यहूदी लोग) बाहर अन्धेरे मृ गेर दिये जावैंगे उड़े रोणा अर दाँत पिसणा होगा।” 13 जिब यीशु नै सूबेदार तै कह्या, “घर चला जा, जिसा तेरा बिश्वास सै, उसाए तेरे खात्तर होगा।” अर उसका नौकरकर उस्से बखत ठीक होया।

14 यीशु जिब पतरस के घरां आया, तो उसनै उसकी सास्सू ताहीं बुखार मृ पड्या देख्या। 15 उसनै उसका हाथ पकड्या अर उसका बुखार उतर ग्या, अर वा उठकै उसकी सेवा-पाणी करण लाग्गी। 16 जिब सँझ होई फेर माणस उसके धोरै घणेए माणसां नै ल्याए जिन मृ ओपरी आत्मा थी अर यीशु नै उन आत्मायाँ ताहीं अपणे वचन तै लिकाइ दिया, अर सारे बिमारां ताहीं ठीक कर दिया। 17 ताके जो वचन यशायाह नबी के जरिये कह्या गया था वो पूरा हो “उसनै खुद ए म्हारी कमजोरी ले ली अर म्हारी बीमारी उठा ली।” 18 यीशु नै जिब अपणे चौगरदू एक भीड़ देक्खी तो अपणे चेल्यां ताहीं गलील समुन्दर के परली ओड़ जाण का हुकम दिया। 19 यीशु अर उसके चेल्ले किस्ती की ओड़ जाण लागे थे, तो एक शस्त्री नै धोरै आकै उसतै कह्या, “हे गुरु, जड़े किते तू जावैगा, मै तेरे पाच्छे हो ल्यूँगा, क्यूँकि मै तेरा चेल्ला बणणा चाहूँ सूँ।” 20 यीशु नै उसतै कह्या, “लोमधियां की घुरखाण अर अकास के पंछियाँ के बसरे हो सै, पर मुझ माणस के बेट्टे खात्तर सिर छिपाण की भी जगहां कोनी सै।” 21 एक और चेल्लै नै उसतै कह्या, “हे प्रभु, पैहले मनै घर जाणदे, मै अपणे पिता के मरण कै बाद उस ताहीं दफना के आऊँगा, फेर तेरा चेल्ला बणुगाँ।” 22 यीशु नै उसतै कह्या, “तू मेरै पाच्छे हो ले, अर मेरा चेल्ला बण जा अर जो आत्मिक रूप तै मर चुके सै, उननै मुर्दे दफणाण दे।” 23 जिब यीशु किस्ती पै चढ्या, तो उसके चेल्ले उसकै पाच्छे हो लिए। 24 अर देक्खो, समुन्दर मृ एक इसा बड़ा अन्धोड़ उठ्या के किस्ती झाल्लां तै ढक्ण लाग्गी, अर वो सोण लाग रह्या था। 25 फेर चेल्यां नै धोरै आकै उस ताहीं जगाया अर कह्या, “हे प्रभु, हमनै बचा, हम डूबके मरण आळे सां।” 26 यीशु नै उनतै कह्या, “हे बिश्वास मृ कमजोर माणसों, क्यूँ डरो सौं?” फेर उसनै उठकै आँधी अर पाणी ताहीं धमकाया, अर सब शान्त होया। 27 अर वे अचम्भा करकै कहण

लाग्ये, “यो किसा माणस सै के आँधी अर पाणी भी उसका हुकम मान्नै सै।” 28 जिब यीशु गलील समुन्दर कै परली ओड़ गदरेनियां के देश मृ पुँच्छा, तो दो माणस जिन मृ ओपरी आत्मा थी किन्निस्तान मृ तै लिकड़कै उसनै मिले। वे इतने डरावणे थे के कोए उस रासते तै जा न्ही सकै था। 29 दोनु माणसां नै किल्की मारकै कह्या, “हे परमेसवर के बेटे, म्हारा तेरे तै के काम? के तू बखत तै पैहल्या हमनै दुख देण आड़े आया सै?” 30 उनतै थोड़ी सी दूर पै घणेए सूरां का टोल चरै था। 31 ओपरी आत्मायाँ नै उसतै या कहकै बिनती करी के, “जै तू हमनै लिकाड़ै सै, तो सूरां के टोल मृ भेजदे।” 32 उसनै उन ताहीं कह्या, “जाओ!” अर वे ज्या के सूरां मृ बैठ्या अर देक्खो, सारा टोल ढाल वै तै झापटकै पाणी मृ ज्या पड्या, अर डूब मरया। 33 उनके पाली भाज्ये, अर नगर मृ जाकै ये सारी बात अर जिन मृ ओपरी आत्मा थी उनका सारा हाल कह सुणाया। 34 फेर सारे नगर के माणस यीशु तै फेटण नै लिकड़ाए, अर उस ताहीं देख के बिनती करी के म्हारी सीमा तै बाहर चल्या ज्या।

9 फेर यीशु किस्ती मृ चढ़कै उस पार गया, अर बोहड़कै अपणे नगर

मृ आया। 2 अर देक्खो, कई माणस लकवे के एक मरीज नै खाट पै लिटा के उसकै धोरै ल्याए। यीशु नै उनका बिश्वास देखकै, उस लकवे के मरीज तै कह्या, “हे बेटे, धीर बाँध, मनै तेरे पाप माफ कर दिये।” 3 इसपै कई शास्त्रियाँ नै सोच्या, “यो तो परमेसवर की बुराई करै सै” 4 यीशु नै उनके मन की बात जाणकै कह्या, “थम माणस अपणे-अपणे मन मृ बुरा विचार क्यूँ आँग देओ सौं? 5 आसान के सै? यो कहणा, ‘तेरे पाप माफ होए’, या यो कहणा, ‘उठ अर हाँड़-फिर’।” 6 पर इस करकै के थम जाण ल्यो के मुझ माणस के बेट्टे नै धरती पै पाप माफ करण का हक सै।” फेर उसनै लकवे के मरीज तै कह्या, “उठ, अपणे बिस्तर ठाकै, अपणे घरां चल्या जा।” 7 वो उठकै अपणे घरां चल्या गया। 8 माणस यो देखकै डरो अर परमेसवर की बडाई करण लाग्ये जिसनै माणस ताहीं इसा हक दिया सै। 9 ओड़े तै आगै बढ़ के यीशु नै मत्ती नाम के एक आदमी ताहीं चुंगी की चौकी पै बेठ्या देख्या, अर उसतै कह्या, “मेरा चेल्ला बणण खात्तर मेरै पाच्छे हो ले।” अर वो उठकै उसकै पाच्छे हो लिया। 10 जिब वो अर उसकै चेल्ले मत्ती के घर मृ खाण खाण खात्तर बेट्टे तो भोत-से चुंगी लेण आळे अर जिननै लोग आपी कहवै सै वे आकै उनकै गेल्या खाण खाण बेट्टे। 11 या देखकै फरीसियाँ नै उसकै चेल्यां ताहीं कह्या, “थारा गुरु चुंगी लेण आळे अर आपी माणसां गेल्या क्यूँ खावै-पीवै सै?” 12 या सुणकै यीशु नै उनतै कह्या, “वैद आच्छे-बिच्छ्यां खात्तर कोनी पर बिमारां खात्तर जरूरी सै। 13 इस करकै थम जाओ अर समझ ल्यो के पवित्र ग्रन्थ के इस वचन का मतलब के सै: ‘मै बलिदान न्ही पर दया चाहूँ सूँ।’ क्यूँकि जो अपणे-आपनै धर्मी कहवै मै उननै न्ही, पर जो अपणे-आपनै पापी कहवै सै उननै बुलाण आया सूँ।” 14 फेर बपतिस्मा देण आळे यूहन्ना के चेल्यां नै धोरै आणकै कह्या, “के कारण सै के हम अर फरीसी इतने ब्रत करा

सां, पर तेरे चेल्लें ब्रत न्हीं करदे?” 15 यीशु नै उनतै कह्या, “के बराटी, जिब ताहीं बन्दड़ा उसके गेल्या सै, शोक मना सकै सै? पर वे दिन आवैंगे जिब बन्दड़ा उनतै न्यारा करया जावैगा, उस बखत वे ब्रत करैंगे!” 16 “नये लत्यां की थेग्ली पुराणे लत्यां पै कोए न्हीं लगान्दा, क्यूँकि वा थेम्ली लत्ते तै और भी लत्ता खुसका दे सै, अर वो और भी धणा पाट ज्या सै। 17 अर माणस नया अंगूर का रस पुराणी मशक म्ह न्हीं भरदे, क्यूँकि इसा करण तै मशक पाट ज्या सै, अर अंगूर का रस खिंड ज्या सै, अर मशक फूट ज्या सै, पर नया अंगूर का रस नई मशकां म्ह भरा जावै सै तब वे दोनु बचे रहवै सै।” 18 वो उनतै ये बात कहण ए लागरया था, के जिब्बे आराधनालयाँ कै सरदारां म्ह तै एक याईर नाम के आदमी नै आकै उस ताहीं नमस्कार करया अर कह्या, “मेरी बेटी इब्बे मरी सै, पर तू चाल के अपणा हाथ उसपै धरै, तो वा जिन्दा हो ज्यागी।” 19 यीशु उठकै अपणे चेल्यां समेत उसके पाच्छै हो लिया। 20 अर देक्खो, एक बिरबान्नी नै जिसकै बारहां साल तै लहू बहण की बीमारी थी, पाच्छै तै आकै उसकै लत्ते के कोणे ताहीं छू लिया। 21 क्यूँकि वा अपणे मन म्ह कहवै थी, “जै मै उसकै लत्ते नै छू ल्यूँगी तो ठीक हो जाऊँगी।” 22 यीशु नै घूमकै उस ताहीं देख्या अर कह्या, “बेटी थीरज राख, तेरे बिश्वास नै तेरे ताहीं ठीक करया सै।” अर वा बिरबान्नी उस्से बखत ठीक होगी। 23 जिब यीशु याईर कै घर म्ह पुँत्व्या अर बाँसली बजाण आळे अर भीड़ नै रोला मचाओ देख्या, 24 फेर कह्या, “हट जाओ, छोरी मरी कोनी, पर सोवै सै।” इसपै वे उसका मजाक उडाण लाग्ये। 25 पर जिब भीड़ लिकाड़ दी, तो उसनै भित्तर ज्या के उस छोरी का हाथ पकड्या, अर वा जी उठी। 26 अर इस बात का जिक्र सारे देश म्ह फैलग्या। 27 जिब यीशु ओड़ै तै आगै बढ़ा, तो दो आन्धे उसकै पाच्छै या कहन्दे होए चाल्ले, “हे दाऊद की ऊलाद, म्हारै पै दया कर।” 28 जिब वो घर म्ह पुँत्व्या, तो वे आन्धे उसकै धोरै आये, अर यीशु नै उनतै कह्या, “के थमनै बिश्वास सै के मै थमनै चंगा कर सकू सू?” उननै उसतै कह्या, “हाँ प्रभु!” 29 फेर उसनै उनकी आँखां कै हाथ लगाकै कह्या, “थारे बिश्वास के मुताबिक थम चंगे होजाओ।” 30 अर वे जिब्बे देक्खण लाग्ये। यीशु नै उनतै समझां के कह्या, “सावधान, किसे ताहीं या बात ना बताइयो, के मन्नै थारे खात्तर के करया सै।” 31 पर उननै मिलकै सारे देश म्ह उसका नाम फैला दिया। 32 जिब वे दोनु आन्धे बारपै जाण लागरे थे, तो देक्खो, कई माणस एक गूँगे नै उसके धोरै ल्याए जिसम्ह ओपरी आत्मा थी, जो उसनै बोल्लण कोनी देवै थी। 33 अर जिब यीशु नै ओपरी आत्मा लिकाड़ दी, तो गँगा बोलण लाग्या। इसपै भीड़ नै अचम्भा करकै कह्या, “इसाएल म्ह इसा कदे न्हीं देख्या गया।” 34 पर फरीसियाँ नै कह्या, “ओपरी आत्मायाँ के सरदार इस ताहीं शक्ति देवै सै, इस करकै यो ओपरी आत्मायाँ नै लिकाड़ सै।” 35 यीशु अर उसके चेल्ले सारे नगरां अर गाम्मां म्ह फिरता होया अर उनकै आराधनालयाँ म्ह उपदेश सुणान्दा, अर परमेस्वर के राज्य का सुसमाचार सुणादा, अर हरेक ढाल की बीमारी अर कमजोरियाँ नै दूर

करदा रह्या। 36 जिब उसनै भीड़ देखी तो उसनै माणसां पै तरस आया, क्यूँकि वे उन भेड्या की तरियां थे, जिनका कोए पाली ना हो, वे बेचैन अर भटके होए से थे। 37 फेर उसनै अपणे चेल्यां तै कह्या, “पके होए खेत्तां की तरियां लोग तो भोत सै जो परमेस्वर के वचन नै सुणणा चाहवै सै, पर फसल काटृण आळे की तरियां लोग कम सै जो जाकै परमेस्वर का वचन सुणावै। 38 इस करकै खेत के मालिलक यानी परमेस्वर तै बिनती करो, के वो और लोगां नै भेजौ, ताके परमेस्वर का वचन भोत सरे लोगां ताहीं सुणावै।”

10 फेर यीशु नै अपणे बारहां चेल्यां ताहीं धोरै बुलाकै, उन ताहीं ओपरी आत्मायाँ पै हक दिया के उननै लिकाड़ अर सारी ढाल की बिमारियाँ अर सारी ढाल की कमजोरियाँ नै ठीक करै। 2 इन बारहां प्रेरितां के नाम ये सै: पैहल्या शमौन, जो पतरस कुहावै सै, अर उसका भाई अन्द्रियास, जब्दी का बेटा याकूब, अर उसका भाई यूहन्ना, 3 फिलिप्पुस, अर बरतुल्मै, थोमा, अर चुगी लेण आळा मत्ती, हलफई का बेटा याकूब, अर तदै, 4 शमौन जेलोतेस, अर यहूदा इस्करियोती जिसनै वो पकड्वा भी दिया। 5 इन बारहां चेल्यां ताहीं यीशु नै यो हुकम देकै भेज्या: “गैर यहूदी लोगां कान्ही ना ज्याइयो, अर सामरियाँ के किसे नगर म्ह दाखल ना होइये। 6 पर इसाएल के कुण्बे की ए खुई होड़ी भेड़ान के धोरै जाईये। 7 अर चालते-चालते यो प्रचार करो: सुर्ग का राज्य धोरै आ ग्या। 8 बिमारां नै ठीक करो, मरै होए नै जीवाओ, कोढ़ियाँ नै शुद्ध करो, ओपरी आत्मायाँ नै लिकाड़। थमनै मुफ्त लिया सै मुफ्त द्यो।” 9 “अपणे अंगोच्छां म्ह ना तो सोन्ना, ना चाँदी, अर ना ताम्बे के सिक्के राखियो। 10 रास्ते खात्तर ना झोली लियो, ना दो कुड़ते, ना जूते अर ना लाट्ठी लियो, क्यूँके मजदूर नै उसका खाणा मिलणा चाहिय। 11 जिस किसे नगर या गाम म्ह जाओ, तो बेरा पाड़ो के कुण लायक सै। अर जिब ताहीं उड़ै तै ना लिकाड़, उस्से के गेल्या रहों। 12 घर म्ह बढ़ते आणी उसनै आशीर्वाद दिए। 13 जै उस घर के माणस लायक होंगे तो थारा आशीर्वाद उनपै पुहँवगा, पर जै वे लायक ना हों तो थारा आशीर्वाद थारे धोरै उल्टा ए आ ज्यागा। 14 जो कोए थमनै न्हीं अपणावै अर थारी बात ना सुणै, उस घर या उस नगर तै लिकाड़ आणी अपणे पैरां की धूल झाड़ लियो। 15 मै थमनै सच्ची कहूँ सूँ के न्याय के दिन उस नगर की हालत तै सदोम अर अमोरा के नगर की हालत घणी सहण जोगी होवैगी।” 16 “देक्खो, मै थमनै भेड़ान की तरियां भेड़ियाँ के बिचाल्ये भेज्जू सूँ, इस करकै साँपां की तरियां अकलमंद अर कबूतरां की तरियां भोले बणो। 17 पर माणसां तै चौककस रहों, क्यूँकि वे थमनै बड़े आराधनालयाँ म्ह सौपैंगे, अर अपणी सभा म्ह थारे कोडे मारैंगे। 18 थम मेरे खात्तर राज्यपालों अर राज्यां के स्याही अर गैर यहूदी लोगां म्ह भेज्जे जाओगें। ताके थम मेरे बारें म्ह गवाही दे सको 19 जिब वे थमनै पकड्वावैंगे तो या फिक्र ना करियो के हम किस तरियां तै या के कहवागें, क्यूँकि जो किमे थारे ताहीं कहणा होगा, वो उस्से बखत थारे ताहीं बता दिया जावैगा। 20 क्यूँकि बोलण आळे थम न्हीं सौं, पर थारे

सुर्गीय पिता का आत्मा थारे मह बोल्लै सै। 21 भाई, भाई नै अर पिता बेटै नै, मारण खात्तर सौंप देंगे, अर बाल्क अपणे माँ बाप के बिरोध मह खड़े होकै उन ताहीं मरवा देवैगें। 22 मेरै नाम के कारण सरे माणस थारे तै बैर करैंगे, पर जो अन्त ताहीं धीरज धरैगा उस्से का उद्धार होगा। 23 जिब वे थमनै नगर मह सतावै, तो दुसरे मह भाग ज्याइयो। मै थमनै सच कहूँ सूँ, थम इसाएल के सरे नगरां मह न्हीं धूम सकोंगे के मै माणस का बेट्ठा आ जाऊँगा।” 24 “चेल्ला अपणे गुरु तै बड़ा न्हीं होंदा, अर ना नौककर अपणे मालिलक तै। 25 चेल्लै का गुरु के, अर नौककर का मालिलक के बराबर होणा ए भोत सै। जिब उननै घर के मालिलक तै शैतान कह्वा तो उसके घरआळां नै के कुछ न्हीं कहवैगें।” 26 “इस करकै माणसां तै ना डरो, क्यूँके कुछ ढक्का कोनी, जो उजागर न्हीं करया जावैगा, अर ना कुछ लुहक्या सै जिसका बेरा न्हीं पटै। 27 जो मै थारे तै अन्धेरे मह कहूँ सूँ, उसनै थम चौंदणे मह कहो, अर जो कान्नो-कान सुणो सौं, उसनै छातां पै चढ़ के प्रचार करो। 28 जो देह नै घात करै सै, पर आत्मा नै घात न्हीं कर सकदे, उनतै ना डरियो, पर उस परमेसवर तै डरो जो आत्मा अर देह दोनुआ नै नरक मह गेरकै नाश कर सके सै। (Geenna g1067) 29 छोट्टी चिड़ियाँ दो पिस्या की बिकै सै, जो ना कै बराबर सै तोभी जै वो धरती पै पड़कै मरै सै तो पिता परमेसवर नै उसका भी बेरा सै क्यूँकि पिता परमेसवर सब कुछ जाणण आला सै। 30 थारे सिर के बाल भी सारे गिणे होड़े सै। 31 इस करकै डरो मतना, थम धणी गैरैयाँ (एक छोट्टी चिड़ियाँ) तै बढ़कै सो।” 32 “जो कोए माणसां कै स्याम्ही मन्नै मान लेवैगा, उसनै मै भी अपणे सुर्गीय पिता के स्याम्ही मान ल्यूँगा। 33 पर जो माणसां कै स्याम्ही मेरै बारे मह इन्कार करैगा, उसनै मै भी अपणे सुर्गीय पिता के स्याम्ही इन्कार करूँगा।” 34 “यो ना समझो के मै धरती पै माणसां का मिलाप करवाण आया सूँ, मै मिलाप करवाण न्हीं, पर न्यारे करण आया सूँ। 35 मै तो आया सूँ, ताके माणस नै उसके पिता तै, अर बेट्टी नै उसकी माँ तै, अर बहू नै उसकी सास तै न्यारा कर द्यु।” 36 “माणस के बैरी उसके घर के ए लोग होंगे।” 37 “जो अपणे माँ-बाप नै मेरै तै धणा प्यारा मान्नै सै, वो मेरा चेल्ला बणण कै लायक कोनी, अर जो बेट्ठा या बेट्टी नै मेरै तै धणा प्यारा मान्नै सै, वो मेरै लायक कोनी। 38 अर जो अपणा दुखां का कूस लेकै मेरै पाच्छे न्हीं चाल्लै वो मेरै लायक कोनी। 39 जो अपणी जान बचावै सै, वो उसनै खोवैगा, अर जो मेरै कारण अपणी जान खोवैगा, वो उसनै पावैगा।” 40 “जो थमनै अपणावै सै, वो मन्नै अपणावै सै, अर जो मन्नै अपणावै सै, वो उस परमेसवर नै अपणावै सै, जिसनै मेरे ताहीं भेज्या सै। 41 जो नवियाँ नै नबी जाण के अपणावै, वो नवियाँ के जिसा फल पावैगा, जिसा नबी नै मिलै सै, अर जो धर्मी नै धर्मी जाण के अपणावै, वो धर्मी के जिसा फल पावैगा। 42 जो कोए मेरे इन चेल्यां मह तै एक नै भी मेरा चेल्यां जाण के सिर्फ एक कटोरा ठंडा पाणी पियावैगा, मै थमनै सच कहूँ सूँ, वो किसे तरियां भी अपणा फल न्हीं खोवैगा।”

11 अपणे बारहां चेल्यां ताहीं इस तरियां समझाण कै बाद यीशु ओड़ै तै चाल पड़या, अर गलील परदेस के नगरां मह उपदेश अर प्रचार करदा धूमता रह्या। 2 यूहन्ना नै जेळ मह मसीह के काम्मां की खबर सुणी अर अपणे चेल्यां ताहीं यीशु तै न्यू बुद्धज्ञ भेज्या, 3 अर उसतै कह्वा, “के आण आला वो मसीहा जिसका बादा परमेसवर नै करया था, तू ए सै, या हम किसे और की बाट देक्खां?” 4 यीशु नै जवाब दिया, “जो कुछ थम सुणो सो अर देक्खो सो, यो सारा जाकै यूहन्ना ताहीं कह द्यो, 5 के आर्थे देक्खैं सै अर लंगड़े चाल्लै-फिरै सै, कोढ़ी ठीक करे जावै सै अर बहरे सुणी सै, मुर्दे जिन्दे करे जावै सै, अर कंगालां ताहीं सुसमाचार सुणाया जावै सै। 6 अर धन्य सै वे, जो मेरै पै शक न्हीं करते, अर बिश्वास करणा न्हीं छोड़ते।” 7 जिब यूहन्ना के चेल्लै ओड़ै तै जाण लागरे थे तो यीशु भीड़ मह माणसां तै यूहन्ना कै बारै मह कहण लागया, “थम जंगल-बियाबान मह के देखण गये थे? के हवा मह हाल्दे होए सरकंड्या नै? 8 तो फेर थम के देखण गये थे? के सुधरे लते पहरे होड़ माणस ताहीं? देक्खो, जो सुधरे लते पहरे सै, वे राजधां मह रहवैं सै। 9 तो फेर क्यातै गये थे? के किसे नबी नै देखण ताहीं? हाँ, मै थमनै कहूँ सूँ, बल्के नबी तै भी बड़े नै।” 10 यूहन्ना वोए सै जिसकै बारै मह पवित्र ग्रन्थ मह लिख्या सै: के “देख, मै अपणे दूत ताहीं तेरे आगै भेज्जू सूँ जो तेरे आगै तेरा रास्ता त्यार करैगा।” 11 मै थमनै कहूँ सूँ के जो विबानियाँ तै जाणे सै, उन मह तै यूहन्ना बपतिस्मा देणआले तै बड़डा कोए न्हीं होया, पर जो सुर्ग कै राज्य मह छोट्टे तै भी छोट्ठा सै वो उसतै बड़डा सै। 12 यूहन्ना बपतिस्मा देण आले के दिनां तै इब ताहीं सुर्ग का राज्य बलपूर्वक बढ़ण लाग रहया सै, अर बिरोधी लोग उसनै रोकण की कोशिश करण लागरे सै। 13 यूहन्ना कै आण तक सारे नबी अर मूसा के नियम-कायदा मह, सुर्ग कै राज्य की भविष्यवाणी करी गई। 14 जै थम सच मह भविष्यवाणीयाँ पै बिश्वास करो सौं, तो सुणो यूहन्ना ए वो एलियाह सै जो दोबारा आण आला था। 15 जिसके कान हों, वो ध्यान तै सुण ले। 16 “मै आज की पीढ़ी के माणसां की बराबरी किसतै करूँ? वे उन बालकां की ढाळ सै, जो बजारां मह बेट्ठे होए एक-दुसरे तै रुक्के मारकै शिकायत करै सै:” 17 “हमनै थारे खात्तर बाँसली बजाई, अर थम कोनी नाच्ये, हमनै बिलाप करया, अर थमनै छात्ती कोनी पिट्टी।” 18 “इस्से तरियां यूहन्ना बपतिस्मा देण आला ना रोट्टी खाया करदा अर ना अंगूर का रस पिया करदा, अर थम कहो सो, ‘उस मह ओपरी आत्मा सै।’” 19 मुझ माणस के बेटे का खाण-पान और माणसां की तरियां साद्धा ए सै, लखाओ, थमनै मेरे ताहीं पेट्टू अर पियकंड माणस, चुंगी लेणिये का अर पापियाँ का साथी घोषित कर दिया। पर ज्ञान अपणे काम्मां मह सच्चा ठहराया गया सै।” 20 फेर यीशु उन नगरां ताहीं उल्लाणा देण लाग्या, जिन मह उसनै घणे सामर्थ के काम करे थे, क्यूँके उननै पाप करणा न्हीं छोड़या अर ना ए परमेसवर के राह पै चाल्लै। 21 “धिक्कार सै थारे पै खुराजिन नगर के माणसों! धिक्कार सै थारे पै बैतसैदा नगर के माणसों! जो सामर्थ के काम थारे मह करे गये,

जै वे सूर अर सैदा नगरां म्ह करे जान्दे, तो टाट ओढ़ कै, अर राख म्ह बैठकै वे कदे के पाप करणा छोड़ देन्दे। 22 पर मै थमनै कहूँ सूं के न्याय कै दिन थारी हालत तै सूर अर सैदा नगरां की हालत घणी सहण जोगी होवैगी। 23 हे कफरनहूम नगर के माणसें, थम के सोच्चों सें, के थम सुर्ग ताहीं ऊँच्चे करे जाओगें? थम तो अधोलोक तक नीच्ये जाओगें, जो सामर्थ के काम थारे म्ह करे गये सै, जै सदोम नगर म्ह करे जान्दे, तो वो आज ताहीं बंया रहन्दा। (Hades g86) 24 पर मै थमनै कहूँ सूं के न्याय के दिन तेरी हालत तै सदोम नगर की हालत घणी सहण जोगी होवैगी।” 25 उस्से बखत यीशु नै कह्या, “हे पिता, सुर्ग अर धरती के प्रभु, मै तेरा शुक्रियादा करूँ सूं के तन्है इन बातां ताहीं ज्ञानियां अर समझदार माणसां तै ल्कोए राख्या, अर बाल्कां ताहीं दिखा दिया सै। 26 हाँ, हे पिता, क्यूँके तन्है यो ए भाया।” 27 “मेरे पिता नै मेरै ताहीं सब कुछ सौप्या सै, अर कोए बेटै ताहीं कोनी जाणदा, सिर्फ पिता के अलावा, अर कोए पिता ताहीं कोनी जाणदा, सिर्फ बेटै के अलावा, अर हरेक वो माणस जो परम पिता नै जाणे सै, जिसकै खात्तर बेटै नै उस ताहीं जाहिर करणा चाह्या सै।” 28 “हे सारे मेहनत करण आळो अर बोझ तै दबे होडे माणसें, मेरे धोरै आओ, मै थमनै सुख-चैन दियुँगा। 29 मेरा जूँ आ अपणे उपर ठा ल्यो, अर मेरै तै सीखो, क्यूँके मै नरम अर मन का दीन सूं: अर थम अपणे मन म्ह सुख-चैन पाओगे। 30 क्यूँके मेरा जूँ सोखा अर मेरा बोझ हल्का सै”

12 तकरीबन उस्से बखत आराम कै दिन यीशु चेल्यां कै गैल खेत्तां

म्ह तै होकै जाण लागरया था, अर उसके चेल्यां नै भूख लागी तो वे गेहूँ की बालें तोड़-तोड़कै खाण लागें। 2 फरीसियाँ नै न्यू देखकै उसतै बोल्ले, “देख, तेरे चेल्लें वो काम करै सै, जो नियम-कायदा के मुताबिक आराम कै दिन करणा ठीक कोनी।” 3 यीशु नै उनतै कह्या, “के थमनै पवित्र ग्रन्थ म्ह यो न्ही पढ्या, के दाऊद अर उसके साथियाँ नै जिब वे भूख्ये होए तो के करया था? 4 वो किस तरियां परमेसवर कै घर म्ह गया, अर भेट की रोटी खाई, जिसका खाणा ना तो उस ताहीं अर ना उसके साथियाँ ताहीं पर सिर्फ याजकां ताहीं सही था? 5 यो थमनै नियम-कायदा म्ह न्ही पढ्या के आराम कै दिन मन्दर के याजक ए आराम कै दिन की विधि ताहीं तोड़े सै केर भी उन ताहीं कोए कुछ न्ही कहन्दा? 6 पर मै थमनै कहूँ सूं के तेरै वो सै जो मन्दर तै वी बड़ा सै। 7 जै थम पवित्र ग्रन्थ म्ह जो लिख्या सै, उसका मतलब जाणदे के, ‘मै बलिदान न्ही पर दया चाहूँ सूं’ तो थम बेक्सूर ताहीं कसूरवार कोनी ठहरान्दे। 8 मै माणस का बेट्टा तो आराम कै दिन का भी प्रभु सूं।” 9 ओड़ तै चालकै वो उनके आराधनालय म्ह आया। 10 ओड़ एक माणस था, जिसका हाथ सूखरया था। फरीसी लोगां नै यीशु पै दोष लाण खात्तर उसतै बुझ्या, “मूसा के नियम-कायदा कै मुताबिक आराम कै दिन ठीक करणा सही सै?” 11 यीशु नै उनतै कह्या, “थारे म्ह तै इसा कौण सै जिसकी एक ए भेड़ हो, अर वा आराम कै दिन खड्हेम्ह पड़ जावै, तो वो उस ताहीं पकड़कै न्ही काढै? 12 फेर माणस तो भेड़

तै भोत घणे खास सै! ज्यांतै आराम कै दिन भलाई करणा ठीक सै, जिसा के माणसां नै चंगा करणा।” 13 फेर यीशु नै उस माणस तै कह्या, “अपणा हाथ बढ़ा।” उसनै बढ़ाया, अर वो दुसरे हाथ की तरियां ठीक होग्या। 14 फेर फरीसियाँ नै बाहरणै जाकै उसकै विरोध म्ह सलाह करी के उसका नाश किस तरियां करया जावै। 15 न्यू जाणकै यीशु ओड़ तै चल्या गया। अर घणे माणस उसकै पाढ्है हो लिए, अर उसनै सारया ताहीं ठीक करया, 16 अर उन ताहीं चेतावनी दी, के मेरै बारै म्ह किसे तै ना कहियो के मै कोण सूं। 17 ताके जो वचन यशायाह नबी कै जरिये कह्या गया था, वो पूरा हो 18 “देक्खो, यो मेरा सेवक सै, जिस ताहीं मनै चुप्या सै, मेरा प्यारा, जिसतै मेरा मन राज्जी सै, मै अपणा आत्मा उसपै तार्गाँ, अर योए दुसरी जातां नै न्याय की खबर देवैगा। 19 “वो ना माणसां के गैल झागड़ा करैगा, अर ना किल्की मरैगा, ना बजारां म्ह उसका कोए शब्द सुणैगा। 20 “वो कुचले होए सरकण्डे की समान कमजोर माणसां ताहीं कोनी लताड़ैगा, अर बुझते होए दीवे के समान, माणस मरता हो तो वो उसनै न्ही मरैगा, वो जिब ताहीं डट्या रहैगा जिब ताहीं न्याय ना दुवा दे। 21 “अर दुसरी जात उसकै नाम पै आस राक्खैगी।” 22 फेर माणस एक आन्धे-गूँगी नै जिसम्ह ओपरी आत्मा थी, जो उसतै देखण अर बोल्लण कोनी देवी थी, उसकै धोरै ल्याए, अर उसनै उस ताहीं ठीक करया, अर वो गूँगा बोलण अर देखण लाग्या। 23 इसपै सारे माणस अचम्भा करकै कहण लागे, “यो के दाऊद की ऊलाद सै!” 24 पर फरीसियाँ नै न्यू सुणकै कह्या, “यो तो ओपरी आत्मायाँ के सरदार शैतान की मदद तै ओपरी आत्मायाँ नै लिकाड़ै सै।” 25 उसनै उनकै मन की बात जाणकै उनतै कह्या, “जिस किसे राज म्ह फूट होवै सै, वो उज़द जावै सै, अर कोए नगर या धराना जिसम्ह फूट होवै सै, बण्या कोनी रहवैगा। 26 अर जै शैतान ए शैतान नै काढै, तो वो अपण ए बिरोधी बण्याया, फेर उसका राज किस तरियां बण्या रहवैगा? 27 भला, जै मै शैतान की मदद तै ओपरी आत्मायाँ नै काढू सूं तो थारी पीढ़ी किसकी मदद तै काढै सै? इस करकै वैए थारा न्याय करैगें। 28 पर जै मै परमेसवर के आत्मा की मदद तै ओपरी आत्मायाँ नै काढू सूं, तो परमेसवर का राज्य थारे धोरै आण पोंहच्या सै।” 29 “या किस तरियां कोए माणस किसे ठाढ़े माणस कै घर म्ह बड़कै उसका माल लूट सकै सै जिब ताहीं के पैहल्या उस ठाढ़े ताहीं ना जुळ ले? जिब वो उसका घर लूट लेवैगा।” 30 “जो मेरै गेल्या न्ही वो मेरै बिरोध म्ह सै, अर जो मेरै गेल्या न्ही कट्ठा करदा, वो खिंडावै सै। 31 ज्यांतै मै थारे तै कहूँ सूं के माणस का सारे ढाल का पाप अर बुराई माफ कोनी करी जावैगी। 32 जो कोए माणस के बेट्टे कै बिरोध म्ह कोए बात कहवैगा, उसका यो कसूर माफ करया जावैगा, पर जो कोए पवित्र आत्मा कै बिरोध म्ह कुछ कहवैगा, उसका कसूर ना तो इस लोक म्ह अर ना परलोक म्ह माफ करया जावैगा।” (aiōn g165)

33 “दरखत अपणे फळ तै ए पिच्छाणा जावै सै, जै दरखत नै बढ़िया कहो, तो उसकै फळ नै भी बढ़िया कहो, या दरखत नै निकम्मा कहो, तो

उसके फल नै भी निकम्मा कहो। 34 हे साँप के सप्पोलों जिसे माणसों, थम भुंडे होकै किस तरियां बढ़िया बात कह सको सो? क्यूँके जो मन म्ह भरया सै, वो ए मुँह पै आवै सै। 35 भला माणस अपणे मन के भले भण्डार तै भली बात लिकड़ै सै, अर बुरा माणस अपणे मन के बुरे भण्डार तै बुराई की बात काढ़े सै। 36 अर मै थारे तै कहूँ सूं के जो-जो निकम्मी बात माणस कहवैगें, न्याय कै दिन वे हरेक उस बात का लेखा देवैगें। 37 क्यूँके तू अपणी बात्तां कै कारण बेक्सूर, अर अपणी बात्तां ए कै कारण कसूरवार ठहराया जावैगा।” 38 इसपै कुछ शास्त्रियाँ अर फरीसियाँ नै उसतै कह्या, “हे गुरु, हम तेरे तै एक चिन्ह-चमत्कार देखणा चाहवां सा।” 39 उसनै उन ताहीं जवाब दिया, “इस युग के बुरे अर जार माणस निशानी टोहैं सै, पर योना नबी की निशानी नै छोड़ कोए और निशानी उन ताहीं कोनी दी जावैगी। 40 जिस तरियां योना नबी तीन रात अर तीन दिन बड़ी मछली कै पेट म्ह रहया, उस्से तरियां ए मै माणस का बेट्टा तीन रात अर तीन दिन धरती कै भीत्तर रहँगा। 41 निनवे नगर के माणस न्याय कै दिन इस युग के माणसां कै गेल्या उठकै उन ताहीं कसूरवार ठहरावैगें, क्यूँके उननै योना नबी का प्रचार सुणकै अपणे पापां ताहीं स्वीकार किया, अर देक्खो, उरै वो सै जो योना नबी तै भी बड़डा सै। 42 दक्षिण देश की राणी न्याय कै दिन इस युग के माणसां कै गेल्या उठकै उन ताहीं कसूरवार ठहरावैगी, क्यूँके वा राजा सुलैमान का ज्ञान सुणण कै खात्तर धरती कै दुसरे सिरे तै आई, अर देक्खो, उरै वो सै जो सुलैमान तै भी बड़डा सै।” 43 “जिब ओपरी आत्मा माणस म्ह तै लिकड़ैके जावै सै, तो सूखी जगहां म्ह आराम टोहन्दी फिरै सै, अर पांडी कोनी। 44 फेर कहवै सै, ‘मै उससे माणस म्ह जड़े तै लिकड़ी थी बोहड़ जाऊँगी।’ अर आकै उस माणस नै घर जिसा झाड़ा-बुहारा अर सजा-धज्या पावै सै। 45 फेर वा ओपरी आत्मा जाकै अपणे तै और भुंडी सात आत्मायाँ नै अपणे गेल्या ले आवै सै, अर वे उस माणस म्ह बड़के ओड़ी वास करै सै, अर उस माणस की पाच्छली हालत पैहल्या तै भी भुंडी हो जावै सै। इस युग के बुरे माणसां की हालत भी इसीए होवैगी।” 46 जिब वो भीड़ तै बात करण ए लागरया था, तब उसकी माँ अर उसके भाई बाहरणे खड़े थे अर उसतै बात करणा चाहवै थे। 47 किसे नै उसतै कह्या, “देख, तेरी माँ अर तेरे भाई बाहरणे खड़े सै, अर तेरे तै बात करणा चाहवै सै।” 48 या सुणकै यीशु नै कहण आळे ताहीं जवाब दिया, “कौण सै मेरी माँ? अर कौण सै मेरे भाई?” 49 अर अपणे चेल्यां कान्ही अपणा हथ बढ़ाकै कह्या, “देक्खो, मेरी माँ अर मेरे भाई ये सै। 50 क्यूँके जो कोए मेरे सुर्गीय पिता की इच्छा पै चाल्लै वोए मेरा भाई, मेरी बेब्बे अर मेरी माँ सै।”

13 उससे दिन यीशु घर तै लिकड़ैके गलील समुन्दर कै किनारे जा बेठ्या। 2 अर उसके धोरे इसी भीड़ कठी होई के वो किस्ती पै चढ़ग्या, अर सारी भीड़ किनारे पै खड़ी रही। 3 अर उसनै उनतै उदाहरणां म्ह घणीए बात कही “एक किसान बीज बोण लिकड़या। 4 बोंद बखत कुछ बीज राही कै किनारे पड़े अर पंछियाँ नै आकै उन ताहीं चुग लिया।

5 कुछ बीज पथरीली धरती पै पड़े, जड़े उनताही घणी माटी ना मिली अर डून्ही माटी ना मिलण कै कारण वे तोलाए जामगे। 6 पर सूरज लिकड़ैपै पै वे जल्गे, अर जड़ ना पकड़ण कै कारण सुखगे। 7 कुछ बीज झाड़ियाँ म्ह पड़े, अर झाड़ियाँ नै बढ़कै उन ताहीं दाब लिया। 8 पर कुछ बीज आच्छी धरती पै पड़े, कोए सौ गुणा, कोए साठ गुणा, अर कोए तीस गुणा फल ल्याए। 9 जिसके कान हों, वो ध्यान तै सुण ले।” 10 चेल्यां नै धोरै आकै उसतै कह्या, “तू माणसां तै उदाहरणां म्ह क्यांतै बात करै सै?” 11 उसनै जवाब दिया, “थारे ताहीं सुर्ग के राज्य के भेद की समझा दे राख्यी सै, पर उन ताहीं नहीं। 12 क्यूँके जिसके धोरै सै, उसतै और दिया जावैगा, अर उसके धोरै धणा हो जावैगा, पर जिसके धोरै कुछ नहीं सै, उसतै जो कुछ उसके धोरै सै, वो भी ले लिया जावैगा। 13 मै उनतै उदाहरणां म्ह ज्यांतै बात करूँ सूं के वे देखेदे होए कोनी देखेदे अर सुणदे होए कोनी सुणदे, अर नहीं समझदे।” 14 “उनकै बाबत यशायाह नबी की या भविष्यवाणी पूरी होवै सै: ‘थम सुणोगे, पर समझोगे कोनी, अर देक्खोगे, पर थमनै कोनी सूझौगा।’” 15 “क्यूँके इन माणसां का मन मोट्टा होग्या सै, अर वे कान्ना तै ऊँच्चा सुणी सै, अर उननै अपणी आँख मूँद ली सै, कदे इसा ना हो के वे आँखां तै देक्खै, अर कान्ना तै सुणै अर मन तै समझौ, अर पलट जावै, अर मै उननै ठीक करूँ।” 16 पर धन्य सै थारी आँख, क्यूँके वे देक्खै सै, अर थारे कान क्यूँके वे सुणै सै। 17 मै थमनै साच्ची कहूँ सूं के धणखरे नवियाँ नै अर धर्मियाँ नै चाह्या के जो बात थम देक्खो सो, देक्खै, पर नहीं देख पाए, अर जो बात थम सुणो सो, सुणै, पर नहीं सुण पाए। 18 “इब थम बोण आळे के उदाहरण का मतलब सुणो 19 जो कोए राज्य का वचन सुणकै कोनी समझादा, यो वोए सै जो राही कै किनारे बोया गया था, उस ताहीं दुष्ट आकै खोस ले जावै सै। 20 अर जो पथरीली धरती पै बोया गया सै, यो वो माणस सै, जो वचन सुणकै जिब्बे खुशी कै गेल्या मान लेवै सै। 21 पर अपणे म्ह जड़ नहीं पकड़ण कै कारण वो माड़े से दिन का सै, अर जिब वचन कै कारण क्लेश या संकट आवै सै, तो जिब्बे ठोक्कर खावै सै। 22 जो झाड़ियाँ म्ह बोया गया, यो वो सै, जो वचन ताहीं सुणै सै, पर इस दुनिया की फिक्र अर धन का धोक्खा वचन नै दाबै सै, अर वो फल कोनी ल्यांदा। (aiōn g165) 23 जो आच्छी धरती पै बोया गया, यो वो सै, जो वचन ताहीं सुणकै समझौ सै, अर फल ल्यावै सै, कोए सौ गुणा, कोए साठ गुणा, अर कोए तीस गुणा।” 24 यीशु नै उन ताहीं एक और उदाहरण दिया: “सुर्ग का राज उस किसान जिसा सै जिसनै अपणे खेत मै बढ़िया बीज बोया। 25 पर जिब माणस सोवै थे तो उसका बैरी आकै गेहूँ कै बिचालै जंगली बीज बोकै चल्या गया। 26 जिब अंकुर लिकड़े अर बाल लाग्यी, तो जंगली दाण्या के पौधे भी दिखण लाग्ये।” 27 “इसपै धरेलू नौकरां नै आकै उसतै कह्या, ‘हे मालिलक, के तन्नै अपणे खेत म्ह बढ़िया बीज कोनी बोया था?’ फेर जंगली दाण्या के पौधे उस म्ह कित्त तै आए?”” 28 “उसनै उनतै कह्या, ‘यो किसे बैरी का काम सै।’ नौकरां नै कह्या, ‘के तेरी मर्जी सै के हम जाकै उन जंगली पौधां नै कठे करा?’”

29 “उसनै कह्या, ‘ना, इसा ना हो के जंगली दाण्या के पौधे कठे करदे हाण थम उनकै गेल्या गेहूँ नै भी पाड़ ल्यो। 30 लामणी तक दोनुआ नै एक सेती बधन घो, अर लामणी के बखत मै काटण आळा तै कहूँगा के पैहल्या जंगली दाण्या के पौधे कठे करकै बालण खात्तर उनके भरोटे जुड़ ल्यो, अर गेहूँ ताहीं मेरे खेते म्ह कठुा करो।’” 31 उसनै उन ताहीं एक और उदाहरण दिया: “सुर्ग का राज राई कै एक दाणै की ढाळ सै, जिस ताहीं किसे माणस नै लेके अपणे खेत म्ह बो दिया। 32 वो सरे बीजां तै छोट्या तो होवै सै पर जिब बध जावै सै फेर सरे साग-पात तै बढ़ा होवै सै, अर इसा दरखत हो जावै सै के अकास के पंछी आकै उसकी डालियाँ पै बसेरा करै सै।” 33 उसनै एक और उदाहरण उन ताहीं सुणाया “सुर्ग का राज खमीर की ढाळ सै, जिस ताहीं किसे बिरबानी नै लेके तीन पसेरी (पन्द्रह किलो) चून म्ह रलाया अर होन्दै-होन्दे वो सारा चून खमीर बणाया।” 34 ये सारी बात यीशु नै उदाहरणां म्ह माणसां तै सिखाई, अर इस तरियां की शिक्षा देण खात्तर वो उदाहरणां का ए इस्तमाल करया करदा। 35 के जो वचन नबी कै जरिये कह्या गया था, वो पूरा होवै: “मै उदाहरण कहण नै अपणा मुँह खोल्लूँगा, मै उन बात्तो नै जो दुनिया की शह-आत तै लुकही होई सै, जाहिर कस्ताँ।” 36 फेर वो भीड़ नै छोड़कै भरां आया, अर उसके चेल्यां नै उसके धोरै आकै कह्या, “खेत म्ह जंगली दाणै का उदाहरण म्हारै ताहीं समझा दे।” 37 यीशु नै उन ताहीं जवाब दिया, “बढ़िया बीज का बोण आळा, मै माणस का बेट्या सू। 38 खेत दुनिया के लोग सै, बढ़िया बीज राज्य की ऊलाद, अर जंगली बीज शैतान की ऊलाद सै।” 39 जिस बैरी नै उन ताहीं बोया वो शैतान सै। लामणी दुनिया का खात्ता सै, अर काटण आळे सुर्गदूत सै।” (aiōn g165) 40 आखर म्ह जिस तरियां जंगली पौधे कठे करे जावै अर बाले जा सै उस्से तरियां दुनिया का खात्ता होवैगा। (aiōn g165) 41 मै माणस का बेट्या अपणे सुर्गदूतां नै भेज्यूँगा, अर वे उसकै राज्य म्ह तै सारे जो खुद पाप करै सै अर दुसरायां नै पाप करण खात्तर उकसावै सै, अर भुद्दे काम करणीया नै कठे करैंगे। 42 अर उसनै आग कै कुण्ड म्ह गैरेंगे, जड़े रोणा, अर दाँत पिसणा होवैगा। 43 उस बखत धर्मी लोग अपणे पिता कै राज्य म्ह सूरज की ढाळ चमकैंगे। जिसके कान हों, वो ध्यान तै सुण ले। 44 सुर्ग का राज्य खेत म्ह लुटके होड़ धन की ढाळ सै, जिस ताहीं किसे माणस नै पाया अर लट्को दिया, अर खुशी के मारे अपणा सारा कुछ बेच दिया अर उस खेत ताहीं मोल ले लिया। 45 फेर सुर्ग का राज्य एक व्यापरी की तरियां सै जो आच्छे मोतियाँ की टोड़ म्ह था। 46 जिब उसनै एक घणा महँगा मोती मिल्या तो उसनै जाकै अपणा सारा कुछ बेच दिया अर उस ताहीं मोल ले लिया। 47 फेर उसनै कह्या, सुर्ग का राज्य उस मछली के बड़े जाल की ढाळ सै जो समुन्दर म्ह गेरया जावै, अर हरेक ढाळ की मच्छी ताहीं समेट ल्यावै। 48 अर जिब जाल भरग्या, तो मछुआरे उस ताहीं किनारे पै खींच ल्यावै, अर बैठके बढ़िया-बढ़िया मच्छी तो बासणा म्ह कठुी करी अर बेकार बगा दी। 49 दुनिया के अन्त म्ह इस तरियां ए होवैगा। सुर्गदूत आकै दुष्ट लोगां नै धर्मियाँ तै

न्यारे करैंगे, (aiōn g165) 50 अर सुर्गदूत, दुष्ट लोगां नै आग कै कुण्ड म्ह गैरेंगे। जड़े रोणा, अर दाँत पिसणा होवैगा। 51 “के थमनै ये सारी बात समझी?” उननै उसतै कह्या, “हाँ।” 52 यीशु नै उनतै कह्या, “इस करकै हरेक शास्त्री जो सुर्ग कै राज्य का चेल्ला बण्या सै, उस घरवासे की तरियां सै जो अपणे भण्डार तै नयी अर पुराणी चीज काढ़े सै।” 53 जिब यीशु नै ये सारे उदाहरण कह लिये, तो ओड़े तै चल्या गया। 54 अर अपणे नगर नासरत म्ह आकै उनकै आराधनालय म्ह उननै इसा उपदेश देण लागाया के वे हैरान होकै कहण लाये, “इसनै यो ज्ञान अर सामर्थ के काम कित्त तै मिले? 55 के यो खात्ती का छोरा कोनी? अर के इसकी माँ का नाम मरियम अर इसके भाईयाँ का नाम याकूब, यूसुफ, शमैन अर यहूदा कोनी? 56 अर के इसकी सारी बेब्बे म्हारै बिचालै कोनी रहन्दी? फेर इसनै यो सारा कित्त तै मिल्या?” 57 इस तरियां उननै उसकै कारण ठोककर खाई, पर यीशु नै उनतै कह्या, “नबी का अपणे गाम अर घर नै छोड़ और कितो निरादर कोनी होन्दा।” 58 अर उसनै ओड़े उनके अविश्वास कै कारण घणे चमत्कार के काम नहीं करै।

14 उस बखत चौथाई देश के गलील परदेस के राजा हेरोदेस नै यीशु का जिक्र सुण्या, 2 अर उसनै अपणे नौकरां तै कह्या, “यो यूहन्ना बपतिस्मा देण आळा सै! वो मेरे होया म्ह तै जिन्दा उठ्या सै, इस्से करकै उसतै ये सामर्थ के काम दिक्खै सै।” 3 यूहन्ना ताहीं पकड़कै बँध्या अर जेल म्ह गेर दिया था। क्यूँकै हेरोदेस नै अपणे भाई फिलिप्पुस के जिन्दा रहन्दे उसकी घरआली हेरोदियास ताहीं अपणे धोरै राखली थी, 4 क्यूँकै यूहन्ना नै उसतै कह्या था के इस ताहीं राखणा मूसा के नियम-कायदा कै मुताबिक तेरे खात्तर ठीक कोनी। 5 ज्यांतै वो उसनै मारणा चाहवै था, पर माणसां तै डेरै था क्यूँकै वे यूहन्ना नै नबी मान्नै थे। 6 पर जिब हेरोदेस का जन्म दिन आया, तो हेरोदियास की बेट्यी नै त्यौहार म्ह नाच दिखाकै हेरोदेस ताहीं राज्जी करया। 7 इसपै उसनै कसम खाकै वचन भर लिया, “जो कुछ तू माँगैगी, मै तन्है दियुँगा।” 8 वा अपणी माँ कै उकसाण तै बोल्ली, “यूहन्ना बपतिस्मा देण आळे का सिर थाल म्ह उरै मनै मँगवा दे।” 9 राजा घणा दुखी होया, पर अपणी कसम, अर गेल्या बैठण आळा कै कारण, हुक्म दिया के दे दिया जावै। 10 अर उसनै जेल म्ह सैनिकां ताहीं भेजकै यूहन्ना का सिर कटवा दिया। 11 अर उसका सिर थाल म्ह ल्याया गया अर छोरी ताहीं दिया गया, जिस ताहीं वा अपणी माँ धोरै लेगी। 12 फेर यूहन्ना के चेल्लें आए अर उसकी लाश ताहीं ले जाकै गड़ दिया, अर जाकै यीशु ताहीं खबर दी। 13 जिब यीशु नै सुण्या, तो वो किस्ती पै चढ़कै ओड़े तै किसे सुनसान जगहां ताहीं, एकान्त म्ह चल्या गया। माणस न्यू सुणकै नगर-नगर तै पांए-पाँ उसकै पाच्छै हो लिये। 14 यीशु किनारे पै पुहुचा तो एक बड़ी भीड़ देक्खी अर उनपै तरस खाया, अर उनके बिमारां ताहीं ठीक करया। 15 जिब साँझ होई तो उसकै चेल्यां नै उसकै धोरै आकै कह्या, “या सुनसान जगहां सै, अर वार होरी सै, माणसां ताहीं बिदा करया जावै के वे बस्तियाँ म्ह जाकै अपणे खात्तर खाणा मोल लियावै।” 16 पर यीशु नै उनतै कह्या, “उनका जाणा

जरूरी कोनी! थमे इनै खाण नै थो।” 17 उननै यीशु तै कह्या, “उरै म्हरै धोरै पाँच रोटी अर दो मच्छियाँ नै छोडकै और कुछ कोनी सै।” 18 यीशु बोल्या, “उन ताहीं उरै मेरै धोरै लियाओ।” 19 फेर यीशु नै माणसां ताहीं घास पै चैठण खात्तर कह्या, अर उन पाँच रोटी अर दो मच्छियाँ ताहीं लिया; सुर्ग कान्ही लखाकै खाणे खान्तर परमेसवर का धन्यवाद करया अर रोटी तोड़-तोड़कै चेल्यां ताहीं दी, अर चेल्यां नै माणसां ताहीं। 20 जिब सारे खाकै छिकगे, तो चेल्यां नै बचे होए टुकड्या तै भरी होई बाहां टोकरी ठाई। 21 अर खाण आळे लुगाईयाँ अर बाल्कां नै छोडकै, पाँच हजार माणसां कै करीबन थे। 22 फेर उसनै जिब्बे अपणे चेल्यां ताहीं किस्ती पै चढ़ण कै खात्तर मजबूर करया के वे उसतै पैहल्या पार चले जावै, जिब ताहीं वो अपणे माणसां ताहीं बिदा करै। 23 वो माणसां ताहीं बिदा करकै, प्रार्थना करण खात्तर उनतै अलग होकै पहाड़ पै चल्या गया; अर साँझ ताहीं वो ओड़ै एकला था। 24 तब तक किस्ती समुन्दर कै किनारे तै भोत दूर जा ली थी अर झाल्लां तै थपेड़ खाकै डगमगाण लागरी थी, क्यूँकै हवा स्याम्ही की थी। 25 यीशु सबै तीन बजे कै लोवै-धोवै यीशु समुन्दर पै चाल्दे होए उनकै धोरै आया। 26 चेल्लें उस ताहीं समुन्दर पै चाल्दे होए देखकै घबरागे। अर बोल्ले, “यो भूत सै!” अर भय के मारे किल्की मारण लाग्ये। 27 फेर यीशु नै जिब्बे उनतै बात करी अर बोल्या, “होसला राक्खो! मैं सूं, डरो मतना!” 28 पतरस नै उसतै जवाब दिया, “हे प्रभु, जै तू ए सै, तो मन्नै अपणे धोरै पाणी पै चालकै आण का हुकम दे।” 29 यीशु बोल्या, “आ!” फेर पतरस किस्ती पै तै उतरकै यीशु कै धोरै जाण ताहीं पाणी पै चाल्लण लाग्या। 30 पर हवा नै देखकै डरग्या, अर जिब ढूबण लाग्या तो किल्की मारकै बोल्या, “हे प्रभु, मन्नै बचा।” 31 यीशु नै जिब्बे हाथ बढ़ाकै थाम लिया अर उसतै बोल्या, “हे अल्पविश्वासी, तन्नै क्यांतै शक करया?” 32 जिब वे किस्ती पै चढ़गे, तो हवा थमगी। 33 इस घटना नै देखकै उसके चेल्यां नै जो किस्ती पै थे, उसकी बड़ाई करकै कह्या, “साच्चए, तू परमेसवर का बेट्टा सै।” 34 वे गलील समुन्दर पार करकै गन्नेसरत परदेस म्ह पोहचे। 35 ओड़ै के माणसां नै उस ताहीं पिंच्छाण लिया अर लोवै-धोवै के सारे देश म्ह खबर भेज दी, अर सारे बिमारां नै उसकै धोरै ल्याए। 36 अर उसतै बिनिती करण लागी के वे उननै अपणे लते कै पल्ले तै ए छू लेण दे अर जितन्या नै उस ताहीं छुआ वे ठीक होगे।

15 फेर यश्वलेम नगर तै कुछ फरीसी अर शास्त्री यीशु कै धोरै आकै बोल्ले, 2 “वेरे चेल्लें बुजुर्गा के रिति-रिवाजां ताहीं क्यांतै टाळै सै, क्यूँ बिना हाथ धोए रोटी खावै सै?” 3 उसनै उन ताहीं जवाब दिया, “थम भी अपणी रिति-रिवाज कै कारण क्यांतै परमेसवर का हुकम टाळौ सौ? 4 क्यूँकै परमेसवर नै कह्या, ‘अपणे माँ-बाप की इज्जत कर, अर जो कोए माँ-बाप नै भुंडा बोल्लै, वो मार दिया जावै।’ 5 पर थम कहो सो के जै कोए अपणे माँ-बाप तै कहवै, ‘जो कुछ मन्नै थारे ताहीं अपणी सम्पत्ति म्ह तै देणा था, वो मन्नै परमेसवर ताहीं अपण ताहीं कर दिया’, 6 तो वो पिता का आदर ना करै, इस तरियां थमनै

अपणी रीत-रिवाजां कै कारण परमेसवर का वचन टाळ दिया। 7 हे कपटियों, यशायाह नबी नै थारे बारै म्ह या भविष्यवाणी ठीक करी सै” 8 ये माणस होइंग तै तो मेरा आदर करै सै, पर उनका मन मेरै तै दूर रहवै सै। 9 “अर वे खांम-खा मेरी भगति करै सै, क्यूँकै माणसां कै तरीक्यां नै धर्म उपदेश करकै सिखावै सै।” 10 फेर उसनै माणसां ताहीं अपणे धोरै बुलाकै उनतै कह्या, “सुणो, अर समझो 11 जो मुँह म्ह जावै सै, वो माणस नै अशुद्ध कोनी करदा, पर जो मुँह तै लिकडै सै, वो ए माणस नै अशुद्ध करै सै।” 12 फेर चेल्यां नै आकै उसतै कह्या, “के तन्नै बेरा सै के फरीसियाँ नै यो वचन सुणकै ठोककर खाई?” 13 उसनै जवाब दिया, “हरेक पौधा जो मेरै सुर्यांग पिता नै न्ही लगाया, उखाडा जावैगा। 14 उन ताहीं जाण थो; वे आन्धे राह बताणीये सै अर आन्धा जै आन्धे नै राह दिखावै, तो दोन्हु ए खुडे म्ह गिरैगें।” 15 न्यू सुणकै पतरस नै उसतै कह्या, “यो उदाहरण म्हरै ताहीं समझा दे।” 16 यीशु नै उनतै कह्या, “के थम भी इब ताहीं नासमझा सो? 17 के थमनै न्ही बेरा के जो कुछ मुँह म्ह जावै वो पेट म्ह पडै सै, अर संडास कै जरिये लिकडै जावै सै? 18 पर जो कुछ मुँह तै लिकडै सै, वो मन तै लिकडै सै, अर वो ए माणस ताहीं अशुद्ध करै सै। 19 क्यूँकै भुन्डे विचार, हत्या, जारी, बिगान्ही बिरबान्नी धोरै जाणा, चोरी, झुट्ठी गवाही अर बुराई मन तै ए लिकडै सै। 20 येए सै जो माणस नै अशुद्ध करै सै, पर हाथ बिना धोए रोटी खाणा माणस नै अशुद्ध कोनी करदा।” 21 यीशु ओड़ै तै लिकडैकै, सूर अर सैदा के परदेसां कान्ही चल्या गया। 22 उस परदेस तै एक कनानी बिरबान्नी लिकडी, अर किल्की मारकै कहण लागी, “हे प्रभु! दाऊद की ऊलाद, मेरै पै दया कर! मेरी बेट्टी ताहीं ओपरी आत्मा धणी सतावै सै।” 23 पर यीशु नै उसतै कुछ जवाब कोनी दिया। फेर उसके चेल्यां नै आकै उसतै बिनती करी, “इस ताहीं बिदा करो, क्यूँकै वा म्हारै पाच्छे रुक्मे कामरादी आवण लागरी सै।” 24 यीशु नै जवाब दिया, “इस्साएल कै कुण्बे की खोई होइ भेट्टा नै छोड़ मै किसे कै धोरै कोनी भेज्या गया।” 25 पर वा आई, अर यीशु ताहीं प्रणाम करकै कहण लागी, “हे प्रभु! मेरी मदद कर।” 26 यीशु नै जवाब दिया, “छोरयां की रोटी लेकै कुत्त्या कै आगै गेरणा ठीक कोनी।” 27 उसनै कह्या, “साच्ची सै प्रभु, पर कुते भी तो मेज कै तलै बाल्कां की रोटी के टुकडे खा लेवैं सै।” 28 इसपै यीशु नै उस ताहीं जवाब दिया, “हे नारी, तेरा विश्वास पक्का सै। जिसा तू चाहवै सै, तेरे खात्तर उसाए हो।” अर उसकी बेट्टी उस्से घडी तै चंगी होगीया। 29 यीशु ओड़ै तै गलील समुन्दर कै धोरै आया, अर पहाड़ पै चढ़कै बैठग्या। 30 फेर भीड़ की भीड़ उसकै धोरै आई। वे अपणे गेल्या लंगडा नै, आन्धा नै, टुंड्याँ नै, गूंगया नै अर दुसरे धणेए माणसां नै उसकै धोरै ल्याए, अर उन ताहीं उसके पायां म्ह गेर दिया, अर उसनै उन ताहीं ठीक करया। 31 जिब माणसां नै देखा के गूँगी बोल्लै सै, अर टुंडे चंगे होवै सै, अर लंगडे चाल्लै सै, अर आन्धे देक्खै सै तो हैरान होकै इस्साएल के परमेसवर की बड़ाई करी। 32 यीशु नै अपणे चेल्यां ताहीं बुलाया अर कह्या, “मन्नै इस भीड़ पै तरस आवै

सै, कर्यूके वे तीन दिनां तै मेरे गेल्या सै अर उनकै धोरै कुछ खाण नै भी कोनी। मै उननै भूख्या बिदा करणा न्ही चाह्न्दा, कदे इसा ना हो राह म्ह थक हार कै बेहोस हो जावै।” 33 चेल्यां नै उसतै कह्या, “हमनै इस बण म्ह कित तै इतनी रोट्टी मिलैगी के हम इतनी बहु भीड़ ताही छिकावा?” 34 यीशु नै उनतै बुझ्याया, “थारे धोरै कितनी रोट्टी सै?” उननै कह्या, “सात, अर माड़ी-सी छोट्टी मच्छी।” 35 फेर उसनै माणसां ताही धरती पै बैठण का हुकम दिया। 36 अर उन सात रोट्टी अर मच्छियाँ ताही लिया, परमेसवर का धन्यवाद करके तोड़या, अर अपणे चेल्यां ताही देन्दा गया, चेल्ले माणसां ताहीं। 37 इस तरियां सारे खाके छिकगे अर चेल्यां नै बचे होड़ टुकड़या तै सात टोकरे ठाए। 38 खाण अले बिरबानियाँ अर बाल्कां नै छोड़कै चार हजार माणस थे। 39 जिब वो भीड़ नै बिदया करके किस्ती म्ह चढ़्या अर मगदन देश की सीमा म्ह आया।

16 फरीसियाँ अर सदूकियाँ नै धोरै आकै उस ताहीं परखण कै खात्तर

उसतै कह्या, “हमनै सुर्ग की कोए निशान्नी दिखा।” 2 उसनै उन ताहीं जवाब दिया, “साँझा नै थम कहो सो, ‘मौसम खुला रहवैगा, क्यांतैके अकास लाल सै’, 3 अर तड़कै नै कहो सो, ‘आज आँधी आवैगी, कर्यूके अकास लाल अर धूल-भरया सै।’ थम अकास के लछण देखकै उसका भेद बता सको सो, पर आज कै बखत म्ह जो होण लाग रह्य सै उसनै देखकै भेद क्यूँ न्ही बता सकदे? 4 इस युग के बुरे अर जार माणस चिन्ह-चमत्कार ठोड़े सै, पर योना नबी के चिन्ह-चमत्कार नै छोड़ उन ताहीं और कोए चिन्ह-चमत्कार कोनी दिया जावैगा।” अर वो उननै छोड़कै चल्या गया। 5 चेल्ले समुन्दर कै परली ओड़ पोहचे, पर वे रोट्टी लेणा भूले थे। 6 यीशु नै उनकी कपट रुपी शिक्षा के बरें म्ह उनतै कह्या, “देक्खो, फरीसियाँ अर सदूकियाँ कै खमीर तै चौकन्ने रहियो।” 7 वे आप्स म्ह विचार करण लागे, “हम रोट्टी कोनी ल्याए ज्यांत वो इस तरियां कहवै सै।” 8 न्यू जाणकै यीशु नै उनतै कह्या, “हे अल्प बिश्वासियो, थम क्यांतै विचार करो सो के म्हारै धोरै रोट्टी कोनी सै? 9 के थम इब ताहीं न्ही समझो? के थमनै उन पाँच हजार की पाँच रोट्टी याद कोनी, अर ना यो के थमनै कितनी टोकरियाँ ठाई थी? 10 अर उन चार हजार की सात रोट्टी, अर ना यो के थमनै कितने टोकरे ठाए थे? 11 थम क्यांतै न्ही समझदे के मन्ने थारे तै रोटियाँ कै बाबत न्ही कह्या, पर यो के फरीसियाँ अर सदूकियाँ कै खमीर तै चौकन्ने रहियो।” 12 फेर उनकै समझ म्ह आया के उसनै रोट्टी कै खमीर तै न्ही, पर फरीसियाँ अर सदूकियाँ कै शिक्षा तै चौकन्ने रहण नै कह्या था। 13 यीशु कैसरिया फिलिष्टी के परदेस म्ह आया, अर अपणे चेल्यां तै बुझ्यण लाग्या, “लोग मुझ माणस कै बेटे नै के कहवै सै?” 14 वे बोल्ले, “कुछ तो यूहन्ना बपतिस्मा देण आला कहवै सै, अर कुछ एलियाह, अर कुछ यिर्मयाह या नबियाँ म्ह तै कोए एक कहवै सै।” 15 उसनै उनतै कह्या, “पर थम मन्नै के कहो सो?” 16 शमौन पतरस नै जवाब दिया, “तू जिन्दे परमेसवर का बेटा मसीह सै।” 17 यीशु नै उस ताहीं जवाब दिया,

“हे शमौन, योना के बेटे, तू धन्य सै; कर्यूके माँस अर लादू नै न्ही, पर मेरे पिता नै जो सुर्ग म्ह सै, या बात तेरे पै जाहिर करी सै। 18 अर मै भी तेरे तै कहूँ सूं के तू पतरस सै, अर मै इस पत्थर पै अपणी कलीसिया बणाऊँगा, अर अधोलोक के फाटक उसपै हावी कोनी होवैगें। (Had es g96) 19 मै तन्है सुर्ग के राज्य की ताळी दियुँगा जो कुछ तू धरती पै बांधेगा, वो सुर्ग म्ह बंधैगा; अर जो तू धरती पै खोलैगा, वो सुर्ग म्ह खुलैगा।” 20 फेर उसनै चेल्यां ताहीं चिताया के किसे तै ना कहियो के मै मसीह सूं। 21 उस बखत तै यीशु अपणे चेल्यां तै बताण लाग्या, “ज़रुरी सै के मै यरुशलेम म्ह जाऊँ अर यहूदी अगुवें, प्रधान याजकां, शास्त्रियाँ के हाथां तै घणा दुख ठाऊँ; अर मार दिया जाऊँ; अर तीसरे दिन जी उँठूँ।” 22 इसपै पतरस उसनै न्यारा ले जाकै झिड़कण लाग्या, “हे प्रभु, परमेसवर इसा ना करै! तेरे गेल्या इसा कदे ना होवैगा।” 23 उसनै पलटकै पतरस तै कह्या, “हे शैतान, मेरै स्याम्ही तै दूर हो! तू मेरै खातर ठोककर का कारण सै; क्यांतैके तू परमेसवर की बात्तां पै न्ही, पर माणसां की बात्तां पै मन लगावै सै।” 24 फेर यीशु नै अपणे चेल्यां तै कह्या, “जो कोए मेरा चेल्ला बणणा चाहवै, वो अपणी ए इच्छा पूरी ना करै बल्के अपणे दुखां का क्रूस ठाकै, मेरै पाच्छै हो लेवै। 25 कर्यूके जो अपणी जान बचाणा चाहवैगा, वो उसनै खोवैगा; अर जो कोए मेरै खातर जान खोवैगा, वो उसनै पावैगा। 26 जै माणस सारी दुनिया नै पा लेवै, अर अपणी जान का नुकसान ठावै, तो उसनै के फायदा होगा? या माणस अपणी जान कै बदले के देवैगा? 27 मै माणस का बेटा अपणे सुर्गदूतां कै गेल्या अपणे पिता की महिमा म्ह आऊँगा, अर उस बखत ‘मै हरेक नै उसकै कामां कै मुताबिक प्रतिफल देऊँगा।’ 28 “मै थारे तै साच्ची कहूँ सूं जो आड़े खड़े सै उन म्ह तै कुछ इसे सै के जिब तक वे मुझ माणस के बेटे नै उसके राज्य म्ह आन्दे होए ना देख लेंगे तब ताहीं मौत उननै छू भी न्ही पावैगी।”

17 छ: दिनां पाच्छ यीशु नै पतरस अर याकूब अर उसके भाई यूहन्ना ताहीं गेल्या लिया, अर उन ताहीं एकते म्ह किसे ऊँच्चे पहाड़ पै लेग्या। 2 ओड़े उनकै स्याम्ही उसका रूप म्ह बदलाव होया, अर उसका मुँह सूरज की ढाल चमक्या अर उसके लत्ते चाँदणे की ढाल थोले होग्ये। 3 अर मूसा नबी अर एलियाह उसकै गेल्या बात करदे होड़ दिक्खै। 4 इसपै पतरस नै यीशु तै कह्या, “हे प्रभु, म्हारा उरै रहणा ठीक सै। जै तेरी मर्जी हो तो मै उरै तीन मण्डप बणाऊँ, एक तेरे खात्तर, एक मूसा नबी खात्तर, एक एलियाह नबी खात्तर।” 5 वो बोल्लणपै लागरया था के एक चमकदा होया बादल उनपै छाया, अर उस बादल म्ह तै या वाणी लिकड़ी, “यो मेरा प्यारा बेटा सै, जिसतै मै राज्जी सूं इसकी सुणो।” 6 चेल्ले न्यू सुणकै मुँह कै बल गिरगे अर घणे डरगे। 7 यीशु नै थोरै आैक उन ताहीं छुया, अर बोल्या, “उठो, डरो मतना।” 8 फेर उननै अपणी निगांह करी अर यीशु नै छोड़ और किसे ताहीं कोनी देख्या। 9 जिब वे पहाड़ पै तै उतरण लाग्ये थे, तो यीशु नै उनते यो हुकम दिया, “जिब ताहीं मै माणस का बेटा मरे होया म्ह तै जिन्दा न्ही हो जाऊँगा, तब

ताहीं जो कुछ थमनै देख्या सै किसे तै ना कहियो।” 10 इसपै उसके चेल्यां नै उसतै बुझ्या, “फेर शास्त्री क्यांतै कहवै सै के एलिय्याह का पैहल्या आणा जरूरी सै।” 11 उसनै जवाब दिया, “एलिय्याह जसर आवैगा, अर सारा कुछ सुधरेगा। 12 पर मै थमनै कहूँ सूं के एलिय्याह आ लिया, अर माणसां नै उस ताहीं न्ही पिच्छाणा, पर जिसा चाह्या उसाए उसकै गेल्या करया। इस तरियां तै मै माणस का बेटा भी उनकै हाथ्यां तै दुख ठाँक्गा।” 13 फेर चेल्यां नै समझ्या के उसनै म्हरै तै यूहन्ना बपतिस्मा देणीये के बाबत कह्या सै। 14 जिब वो भीड़ कै धोरै पोहचे, तो एक माणस उसकै धोरै आया, अर गोड्हे टेक कै कहण लाग्या, 15 “हे प्रभु, मेरे बेटे पै दया कर! क्यूँकै उस ताहीं मिर्झी आवै सै, अर वो घणा दुख ठावै सै; अर बार-बार आग म्ह अर बार-बार पाणी म्ह पड़ ज्या सै।” 16 अर मै उसनै तेरे चेल्यां धोरै ल्याया था, पर वे उसनै ठीक कोनी कर सके।” 17 यीशु नै जवाब दिया, “हे अविश्वासी अर जिही माणसों, मै कद ताहीं थरे गेल्या रह्हांगा? कद ताहीं थरी सह्हांगा? उसनै तैरै मेरे धोरै ल्याओ।” 18 फेर यीशु नै ओपरी आत्मा ताहीं धमकाया, वा उस म्ह तै लिकड्यायी अर छोरा उस्से बखत ठीक होग्या। 19 फेर चेल्यां नै एकले म्ह यीशु कै धोरै आकै कह्या, “हम उसनै क्यातै न्ही काढ सके?” 20 उसनै उनतै कह्या, “अपणे बिश्वास की कमी कै कारण, क्यूँकै मै थमनै साच्ची कहूँ सूं, जै थारा बिश्वास राई कै दाणै कै बराबर भी हो, तो इस पहाड़ तै कह सकोगे, ‘उरै तै रसककै ओड़े चल्या जा’, तो वो चल्या जावैगा, अर कोए बात थरे खात्तर मुश्किल कोनी होवैगा।” 21 (पर या जात बिना प्रार्थना अर ब्रत कै कोनी लिकड़ी।) 22 जिब वे गलील परदेस म्ह थे, तो यीशु नै उनतै कह्या, “मै माणस का बेटा माणसां के हाथ्यां म्ह पकड़वाया जाऊँगा। 23 वे मनै मार देवेगें, अर मै तीसरे दिन जिन्दा हो जाऊँगा।” इसपै वे घणे उदास होए। 24 जिब वे कफरनहम पोहचे, तो मन्दर का कर लेण आला नै पतरस कै धोरै आणकै बुझ्या, “के थारा गुरु, मन्दर का कर कोनी देंदा?” 25 उसनै कह्या, “हाँ, देवै सै।” जिब वो घरां आया, तो यीशु नै उसकै बुझ्यां तै पैहल्याए उसतै कह्या, “हे शमान, तू के सोच्चै सै? धरती के राजा चुंगी किन तै लेवै सै? अपणे बेट्याँ तै या बिगान्याँ तै?” 26 पतरस नै उसतै कह्या “बिगान्याँ तै।” यीशु नै उसतै कह्या “तो बेटे बच्गो। 27 तोभी इस खात्तर के हम उननै ठोक्कर ना खुवावा, तू झील कै किनारे जाकै कांडा गेर, अर जो मच्छी पैहले लिकड़े, उसनै ले, उसका मुँह खोल्लण पै तेरे ताहीं एक सिक्का (जिसकी किमत चार दिन की मजदूरी के बराबर हो सै) मिलैगा, उस्से नै लेकै मेरे अर अपणे बदले म्ह दे दिये।”

18 उस घडी चेल्ये यीशु कै धोरै आकै बुझ्याण लागे, “सुर्ग कै राज्य म्ह बड़ा कौण सै?” 2 इसपै उसनै एक बाल्क ताहीं धोरै बुलाकै उनकै बिचाळै खड्या करया, 3 अर कह्या, “मै थमनै सच कहूँ सूं कै जिब ताहीं थम न्ही बदलो अर बाल्कां कै ढाल नप्र न्ही बणो, थम सुर्ग कै राज्य म्ह बड़ न्ही सकदे। 4 जो कोए अपणे-आपनै इस बाल्क कै

ढाल छोट्या करैगा, वो सुर्ग कै राज्य म्ह बड़ा होवैगा। 5 अर जो कोए मेरै नाम तै एक इसे बाल्क ताहीं अपणावै सै वो मन्नै अपणावै सै।” 6 पर जो कोए इन छोट्या बाल्कां समान जो मेरै पै बिश्वास करै सै, किसे तै भी पाप करवावै, तो उसकै खात्तर भला योए सै के एक बहू चाक्की का पाट उसकै गळ म्ह लटकाया जावै, अर वो इन्ना समन्दर म्ह डबोया जान्दा। 7 ठोकरां कै कारण दुनिया पै हाय! ठोकरां का लागणा जरूरी सै; पर धिक्कार सै उस माणस पै जिसकै जरिये ठोक्कर लागै सै। 8 जै तेरा हाथ या तेरा पैर तेरे तै पाप करवावै सै, तो उसतै काटकै बगा दे, दुंडा या लंगड़ा होकै जीवन म्ह दाखल होणा इसतै भला सै के दो हाथ या दो पैर रहदे होए तू अनन्त आग म्ह गेरया जावै। (aiōnios g166) 9 जै तेरी आँख तेरे तै पाप करवावै सै, तो उस ताहीं लिकाड़िकै फैक दे, काणा होकै अनन्त जीवन म्ह बड़णा तेरे खात्तर भला सै, ना के दो आँख रहंदे होए तू नरक की आग म्ह गेरया जावै। (Geenna g1067) 10 देक्खो, थम इन छोट्या म्ह तै किसे नै तुच्छ ना जाणीयो, क्यूँकै मै थमनै कहूँ सूं कै सुर्ग म्ह उनके सुर्गदूत मेरे सुर्गायी पिता की मौजूदगी म्ह सदा रहवै सै। 11 (क्यूँकै मै माणस का बेटा खोये होया नै बचाण आया सूं।) 12 थारा इसके बारें म्ह के विचार सै? जै किसे माणस की सौ भेड़ हों, अर उन म्ह तै एक भटक जावै, तो के वो निन्यानवे ताहीं छोड़कै, अर पहाड़ा पै जाकै, उस भटकी होई नै कोनी टोहवैगा? 13 अर जै इसा हो के उसनै पावै, तो मै थमनै साच्ची कहूँ सूं, के वो उन निन्यानवे भेड़ियाँ कै खात्तर जो भटकी कोनी थी, इत्तणा आनन्द कोनी करैगा जितना के इस भेड़ कै खात्तर करैगा। 14 इस्से ढाल थारे पिता की जो सुर्ग म्ह सै या मर्जी कोनी के इन छोट्यां म्ह तै एक भी नाश हो। 15 “जै तेरा बिश्वासी भाई तेरे खिलाफ कसूर करै, तो जा अर एकले म्ह बतला कै उसनै समझा, जै वो तेरी सुणकै पछातवै तो तन्नै अपणे भाई ताहीं पा लिया। 16 जै वो तेरी न्ही सुणी, तो एक या दो जन नै अपणे गेल्या और ले जा, क्यूँकै मूसा नवी के नियम-कायदा के मुताबिक ‘हेरेक बात दो या तीन तै ज्यादा गवाह के स्याहीं सच साबित हो जावै।’ 17 जै वो उनकी भी न्ही मान्नै, तो कलीसिया तै कह दे, पर जै वो कलीसिया की भी कोनी मान्नै तो तू यो समझ ले के वो गैर यहूदी अर चुंगी लेण आळे जिसा सै।” 18 “मै थमनै साच्ची कहूँ सूं, जो कुछ थम धरती पै बांधोगे, वो सुर्ग म्ह बंधेगा अर जो कुछ थम धरती पै खोल्लोगे, वो सुर्ग म्ह खुलैगा।” 19 “फेर मै थमनै कहूँ सूं, जै थरे म्ह तै दो जणे धरती पै किसे बात कै खात्तर एक मन होकै बिनती करै, तो वा मेरे पिता की ओड तै जो सुर्ग म्ह सै, उनकै खात्तर हो जावैगी। 20 क्यूँकै जड़े दो या तीन मेरे नाम पै कठे होवै सै, ओड़े मै उनकै बिचाळै म्ह होऊँ सूं।” 21 जिब पतरस नै धोरै आकै उसतै कह्या, “हे प्रभु, जै मेरा भाई कसूर करदा रहवै, तो मै कितनी बार उस ताहीं माफ करँ? के सात बार?” 22 यीशु नै उसतै कह्या, “मै तेरे तै यो न्ही कहन्दा के सात बार, बल्के सात बार के सत्तर गुणा तक माफ करिये।” 23 “इस करकै सुर्ग के राज्य की तुलना इस उदाहरण तै करी जा सकै सै, किसे राजा नै अपणे नौकरां का लेक्खा

(ब्यौरा) लेणा चाह्या। 24 जिब वो लेकस्खा लेण लाग्या, तो एक जणा उसके स्याम्ही ल्याया गया जो दस हजार तोड़े का कर्जवान था। 25 जिब के चुकता करण नै उसकै धोरै कुछ कोनी था, तो उसकै माल्लिक नै कह्या, ‘थो अर इसकी घरआळी अर बाल्भ-बच्चे अर जो कुछ इसका सै सारा बेच्या जावै, अर कर्ज चुकता करया जावै।’ 26 “इसपै उस नौकर नै उसके पायां म्ह पड़कै उस ताहीं कह्या, ‘हे राजा धीरज धर, मै सारा कुछ भर दियुँगा।’ 27 इसपै राजा नै तरस खाकै उस नौकर ताहीं छोड़ दिया, अर उसका कर्जा भी माफ कर दिया।” 28 “पर जिब वो नौकर बाहरणै लिकड़या, तो उसके साथ के नौकरां म्ह तै एक उसतै मिल्या जो उसके सौ दीनार (100 दिन की मजदूरी) का कर्जदार था; उसनै पकड़कै उसका गळा घोट्या अर कह्या, ‘जो कुछ मेरा तेरे पै कर्ज सै भर दे।’” 29 “इसपै उसका साथ का नौकर पायां म्ह पड़कै उसतै बिनती करण लाग्या, ‘धीरज धर, मै सारा कुछ भर दियुँगा।’” 30 वो न्ही मान्या, पर जाकै उस ताहीं जेळ म्ह गेर दिया के जिब ताहीं कर्जा ना भर दे, तब तक ओड़ै रहवै। 31 उसके गेल्या के नौकर यो जो होया था देखकै घणे उदास होए, अर जाकै अपणे राजा ताहीं पूरा हाल बता दिया। 32 “फेर राजा नै उस ताहीं बुलाकै उसतै कह्या, ‘हे दुष्ट नौकर, तनै जो मेरै तै बिनती करी, तो मनै तेरा वो सारा कर्जा माफ कर दिया। 33 ज्यातै जिस ढाळ मनै तेरे पै दया करी, उससे तरियां के तनै भी अपणे साथ के नौकर पै दया न्ही करणी चाहिये थी?’ 34 अर उसकै माल्लिक नै छो म्ह आकै उस ताहीं दण देणाले के हाथां म्ह सौप दिया, के जिब ताहीं वो सारा कर्जा भर न्ही देवै, तब तक उनकै हाथां म्ह रहवै। 35 “इस्से ढाळ जै थारे म्ह तै अपणे झाई नै ना माफ करै तो मेरा पिता जो सुर्ग म्ह सै थारे तै उसाए करैगा।”

19 जिब यीशु नै ये बात कह ली, तो गलील परदेस तै चल्या गया;

अर यरदन नदी कै परली ओड़ यहूदिया परदेस म्ह आया। 2 फेर बड़ी भीड़ उसकै पाच्छै हो ली, अर उसनै ओड़ उन ताहीं चंगा करया। 3 फेर फरीसी उसनै परखण खात्तर धोरै आकै बोल्ले, “के किसे भी कारण तै अपणी घरआळी ताहीं छोड़णा ठीक सै?” 4 उसनै जवाब दिया, “के थमनै न्ही पढ़्या के जिसनै उन ताहीं बणाया, उसनै शरुआत तै नर अर नारी बणाकै कह्या, 5 इस कारण माणस अपणे माँ-बाप तै न्यारा होकै अपणी घरआळी कै गेल्या रहवैगा अर वे दोन्हु एकए तन होवैगें? 6 इस करकै इब वे दो न्ही, पर एक तन सै। इस करकै जिन ताहीं परमेसवर नै जोड़या सै, उन ताहीं माणस न्यारा ना करै।” 7 उसनै उसतै कह्या, “फेर मूसा नबी नै यो क्यातै ठहराया के तलाक देकै उस ताहीं छोड़देदे?” 8 उसनै उनतै कह्या, “मूसा नबी नै थारे मन की कठोरता कै कारण थारे तै अपणी-अपणी घरआळी ताहीं छोड़ देण का हुकम दिया, पर शरुआत म्ह इसा कोनी था। 9 अर मै थमनै कहूँ सूँ के जो कोए जारी नै छोड़कै और किसे कारण तै अपणी घरआळी नै छोड़कै दुसरा ब्याह करै, वो जारी करै सै, जो उस छोड़ी होई तै ब्याह करै, वो भी

जारी करै सै।” 10 चेल्यां नै यीशु तै कह्या, “जै माणस का बिरबान्नी कै गेल्या इसा सम्बन्ध सै, तो ब्याह करणा आच्छा कोनी।” 11 यीशु नै उनतै कह्या, “हरेक कोए इन उपदेशां पै चाल न्ही सकदे, सिफै वे जिन ताहीं या शक्ति देई गई सै।” 12 क्यूँकै कुछ नपुंसक इसे सै, जो माँ के पेट या गर्भ ए तै इसे जन्मे; अर कुछ नपुंसक इसे सै, जिन ताहीं माणस नै नपुंसक बणाया; अर कुछ नपुंसक इसे सै, जिन नै सुर्ग कै राज्य कै खात्तर खुद ताहीं नपुंसक बणाया सै। जो इस बात ताहीं समझ सकै सै, वे समझ ले।” 13 फेर माणस बालकां नै उसकै धोरै त्याए, के वो उनकै उपर हाथ धैरै अर प्रार्थना करै; पर चेल्यां नै उन ताहीं धमकाया। 14 यीशु नै कह्या, “बालकां नै मेरै धोरै आण द्यो, अर उन ताहीं मना मतना करो, क्यूँकै सुर्ग का राज्य इसाए का सै।” 15 अर वो उनपै हाथ धरकै ओड़ै तै चल्या गया। 16 एक माणस यीशु कै धोरै आया अर उसतै कह्या, “हे गुरु, मै कौण सा भला काम करूँ कै अनन्त जीवन पाऊँ?” (aiōnios g166) 17 यीशु नै उसतै कह्या, “तू मेरै तै भलाई कै बाबत क्यातै बुझ्दै सै? भला तो एकै ए सै, पर जै तू जीवन म्ह दाखल होणा चाहवै सै, तो हुकमां नै मान्या कर।” 18 उसनै यीशु तै कह्या, “कौण-से हुकम?” यीशु बोल्या, “खून ना करियो, जारी ना करियो, चोरी ना करियो, झाड़ी गवाही ना दियो, 19 अपणे माँ-बाप का आदर करियो, अर अपणे पडौसी तै अपणे जिसा प्यार राखियो।” 20 उस जवान नै उसतै कह्या, “इन सारया ताहीं तो मनै मान्या सै, इब मनै किस बात की कमी सै?” 21 यीशु नै उसतै कह्या, “जै तू सिद्ध होणा चाहवै सै तो जा, अपणा सारा माळ बेचकै कंगालां ताहीं दे, अर तनै सुर्ग म्ह धन मिलैगा; अर आकै मेरा चेल्ला बणण खात्तर मेरै पाच्छै हो ले।” 22 पर वो जवान या बात सुणकै उदास होकै चल्या गया, क्यूँकै वो घणा साहूकार था। 23 फेर यीशु नै अपणे चेल्यां तै कह्या, “मै थमनै साच्ची कहूँ सूँ के साहूकार का सुर्ग के राज्य म्ह बड़णा ओक्खा सै।” 24 थारे ताहीं फेर कहूँ सूँ के जिस तरियां तै ऊंट का सूई कै मेरै म्ह तै लिकड़णा आसान हो सकै सै। पर परमेसवर के राज्य म्ह साहूकार का बड़णा भोत मुश्किल सै।” 25 न्यू सुणकै चेल्यां नै हैरान होकै कह्या, “फेर किसका उद्धार हो सकै सै।” 26 यीशु नै उनकी ओड़ लखाकै कह्या, “माणसां तै तो यो कोनी हो सकदा, पर परमेसवर तै सारा कुछ हो सकै सै।” 27 इसपै पतरस नै उसतै कह्या, “देख, हम तो सारा कुछ छोड़कै तेरे पाच्छै हो लिए सा: तो हमनै के मिलैगा?” 28 यीशु नै उनतै कह्या, “मै थमनै साच्ची कहूँ सूँ के नयी सुष्टि म्ह जिब माणस का बेट्टा अपणी महिला कै सिंहासन पै बैठैगा, तो थम भी जो मेरै पाच्छै हो लिए सो, बारहां सिंहासनां पै बैठैके इसाएल के बारहां गोत्रां का न्याय करोगे।” 29 अर जिस किसे नै घर, या भाई-भाण, या माँ-बाप, या बाल्भ-बच्चे, या खेतां ताहीं मेरै नाम कै खात्तर छोड़ दिया सै, उस ताहीं सौ गुणा मिलैगा, अर वो अनन्त जीवन का हकदार होवैगा। (aiōnios g166) 30 पर भोत-से जो पैहले सै, पाच्छले होंगे; अर जो पाच्छले सै, पैहले होंगे।”

20 यीशु नै अपणे चेल्यां ताहीं सिखाण खात्तर एक और उदाहरण

दिया, “सुर्ग का राज्य किसे घर के मालिक की ढाळ सै, जो तड़कै लिकड़या के अपणे अंगूर के बाग म्ह मजदूरां नै लावै। 2 वो मजदूरां नै एक दीनार (एक दिन की मजदूरी) रोज की दिहाड़ी पै त्याया अर उनै अपणे अंगूर के बाग म्ह भेज्या।” 3 “फेर सर्वे के नौ बजे पाच्छे उसनै लिकड़कै और माणसां ताहीं बजार म्ह खडे देख्या, 4 अर उसनै कह्या, “थम भी अंगूर के बाग म्ह जाओ, अर मै एक दिन की जो भी मजदूरी थारी बणै सै वा थमनै दियुँगा।” अर वे भी काम पै चले गये। 5 फेर उसनै बारहां बजे अर तीन बजे कै लोवै लिकड़कै उस्से तरियां करया। 6 तकरीबन पाँच बजे फेर वो अपणे घर तै गया अर उसनै फेर कई माणसां ताहीं ओडे खडे देख्या, अर उसनै कह्या, “थम क्यांतै सरे दिन दैर बेकार खडे रहों सो?” उनै उसतै कह्या, “ज्यांतै के किसे नै म्हारै ताहीं मजदूरी पै कोनी लगाया।” 7 “उसनै उनै तै कह्या, “थम भी मेरे अंगूर के बाग म्ह काम करण खात्तर जाओ।”” 8 “साँझ नै अंगूर के बाग के मालिक नै अपणे भण्डारी तै कह्या, “मजदूरां ताहीं बुलाकै पाच्छल्यां तै लेकै पैहल्या ताहीं उनै मजदूरी दे-दे।”” 9 “जो पाँच बजे लगाये थे, उन ताहीं एक-एक दीनार (एक दिन की मजदूरी) मिल्या। 10 जो पैहल्या आये उननै यो सोच्या के म्हारै ताहीं घणा मिलैगा, पर उनै भी एक-एक दीनार (एक दिन की मजदूरी) ए मिल्या। 11 मजदूरी तो उनै ले ली पर वे अंगूर के बाग के मालिक पै बिरडाकै कहण लागे, 12 “जो पाच्छे लागे थे, उनै बस एक घंटा काम करया, अर तनै म्हारै ताहीं भी उतनाए दिया जितना उन ताहीं, जिब के हमनै दिन-भर बोझ ठाया अर घाम सहया?”” 13 “बाग के मालिक नै उन म्ह तै एक ताहीं जवाब दिया, “हे दोस्त, मनै तेरे गैल कोए अन्याय कोनी करया। के तनै ए मेरै तै एक दीनार (एक दिन की मजदूरी) कोनी तय करया था? 14 जो तेरा सै, ठा ले अर चल्या जा; मेरी मर्जी, के जितना तनै दियुँ उतनाए इस पाच्छले ताहीं भी दियुँ। 15 के यो ठीक कोनी के मै अपणे धन का जो चाहूँ वो करँ? के मेरै भले होण कै कारण तू कळवी नजर तै देक्खै सै?”” 16 “इस तरियां तै जो पाच्छले सै, वे पैहले होंगे, जो पैहले सै, पाच्छले होवैंगे।” 17 जब यीशु अपणे बारहां चेल्यां गैल यरुशलेम नगर म्ह जाण लागरया था तो उन ताहीं एकान्त म्ह लेग्या, अर राह म्ह चालते-चालते उनै बोल्या, 18 “देक्खो, हम यरुशलेम नगर म्ह जावां सा; अर मै माणस का बेट्या प्रधान याजकां अर शास्त्रियाँ कै हाथां पकडवाया जाऊँगा, वे मेरे खात्तर मौत की सजा तय करैंगे। 19 अर मेरे ताहीं गैर यहूदियाँ कै हाथां म्ह सौपैंगे, वे मेरा मजाक उडावैंगे, कोडे मारैंगे, कूस पै चढावैंगे, अर मै तीसरे दिन जिन्दा हो जाऊँगा।” 20 फेर जब्दी कै बेट्याँ की माँ नै, अपणे बेट्याँ कै गेल्या यीशु कै धोरै आकै प्रणाम करया, अर उसतै कुछ माँगण लागी। 21 यीशु नै उसतै कह्या, “तू के चाहै सै?” वा यीशु तै बोल्ली, “मनै वचन दे, के मेरे ये दो बेटे तेरे राज्य म्ह एक तेरे सोले अर दुसरा तेरे ओळै कान्ही बेठै।” 22 यीशु नै जवाब दिया, “थमनै न्ही बेरा के थम के माँगो सों। जो दुख का कटोरा

मै पीण पै सूं के थम वो दुख का कटोरा पी सको सो?” उनै उस ताहीं कह्या, “पी सकां सा!” 23 उसनै उनै तै कह्या, “थम मेरे दुख का कटोरा तो पी ल्योगे, पर अपणे सोले अर ओळै कान्ही किसे ताहीं बिठाणा मेरा काम कोनी, पर जिनकै खात्तर मेरे पिता की ओडे तै त्यार करया गया, उनै ए खात्तर सै।” 24 न्यू सुणकै दसो चेल्ये उन दोन्हु भाईयाँ पै छो करण लागे। 25 यीशु नै उन ताहीं थोरै बुलाकै कह्या, “थम जाणो सो के गैर यहूदियाँ कै हाकिम उनपै राज करै सै; अर जो बडे सै, वे उनपै हक जमावै सै।” 26 पर थारे म्ह इसा कोनी होवैगा; जो कोए थारे म्ह बड़ा होणा चाहै, वो थारा सेवक बणै, 27 अर जो थारे म्ह प्रधान होणा चाहै, वो दास बणै, 28 जिसा के मै माणस का बेट्या, ज्यांतै कोनी आया के मेरी सेवा-पाणी करी जावै, पर ज्यांतै आया के खुद सेवा-पाणी करँ, अर घणखरयां के छुटकारै कै खात्तर अपणी जान देऊँ।” 29 जिब वे यरीहो नगर तै लिकड़े थे, तो एक बड़ी भीड़ यीशु कै पाच्छे हो ली। 30 अर दो आन्धे, जो सङ्क कै किनारे बेठे थे, न्यू सुणकै के यीशु जाण लागरया सै, रुक्का मारकै कहण लागे, “हे प्रभु, हे दाऊद की ऊलाद, म्हारै पै दया कर।” 31 माणसां नै उन ताहीं धमकाया के बोल-बाल्ले रहवै; पर वे और भी रुक्के मारकै बोल्ले, “हे प्रभु, दाऊद की ऊलाद, म्हारै पै दया कर।” 32 फेर यीशु नै खडे होकै, उन ताहीं बुलाया अर कह्या, “थम के चाहवो सो के मै थारे खात्तर करँ?” 33 उनै उसतै कह्या, “हे प्रभु, योए के हम देक्खण लाग जावां।” 34 यीशु नै तरस खाकै उनकी आँखां पै हाथ लगाया, अर वे जिब्बे देखण लागै; अर उसकै पाच्छे हो लिये।

21 जिब वे यरुशलेम नगर कै लोवै पोहवे अर जैतून पहाड़ पै बैतफगे

गाम कै थोरै आये, तो यीशु नै दो चेल्यां ताहीं न्यू कहकै भेज्या, 2 “स्याही कै गाम म्ह जाओ। ओडे पोहवे देखदे एक गधी बंधी होई, अर उसकै गेल्या बच्चा थमनै मिलैगा। उनै खोल कै मेरै धोरै त्यायो।” 3 जै थारे तै कोए कुछ कहवै, तो कहियो के प्रभु नै इसकी जसूर तै, अर वो तोला उसनै भेज देवैगा।” 4 यो ज्यांतै होया के जो वचन नबी के जरिये कह्या गया था, वो पूरा हो 5 “यरुशलेम के लोगां तै कहो, देख, थारा राजा थारे धोरै आवै सै; वो नम्र सै, अर गधे पै बेठ्या सै; बल्के गधी के बच्चे पै।” 6 चेल्यां नै जाकै, जिसा यीशु नै उनै तै कह्या था, उस्से तरियां करया। 7 अर गधी अर बच्चे ताहीं त्याकै, उसपै अपणे लते गेरे, अर वो उसपै बैठ्या। 8 फेर घणखरे माणसां नै अपणे लते राह म्ह बिछाये, अर माणसां नै दरखतां तै डालियाँ काटके राह म्ह बिछाई। 9 जो भीड़ आगै-आगै अर पाच्छे-पाच्छे चाल्ली आवै थी, रुक्के मार-मारकै कहवै थी, “दाऊद की ऊलाद ताहीं होशाना, धन्य सै वो जो प्रभु के नाम तै आवै सै, अकास म्ह होशाना।” 10 जिब वो यरुशलेम म्ह बड़ा, तो सरे नगर म्ह खलबल्ली मार्गी, अर माणस कहण लागे, “यो कौण सै?” 11 माणसां नै कह्या, “यो गलील परदेस के नासरत नगर का नबी यीशु सै।” 12 यीशु नै परमेस्वर कै मन्दर म्ह जाकै उन सारया ताहीं, जो मन्दर म्ह लेण-देण कररे थे, काढ दिया, अर सर्साफां (पईसा का लेण

देण करण आळे) के पीढे अर कबूतर बेचणीयाँ की चौकियाँ उल्ट दी; 13 अर उनतै कहा, “लिख्या सै, ‘मेरा घर प्रार्थना का घर कुहावैगा’; पर थम उसनै डाकुवां की गुफा बणाओ सो।” 14 फेर आन्थे अर लंगडे, मन्दर म्ह उसकै थोरै आये, अर उसनै उन ताहीं ठीक करया। 15 पर जिब प्रधान याजकां अर शास्त्रियाँ नै इन अनोक्खे कामां ताहीं, जो उसनै करे, अर छोरयां ताहीं मन्दर म्ह दाऊद की ऊलाद ताहीं होशाना रुक्के मारदे देख्या, तो वे छो म्ह भरगे, 16 अर उसतै कहण लागे, “के तू सुणे सै के ये के कहवै सै?” यीशु नै उनतै कहा, “हाँ; के थमनै यो कदे कोनी पढ्या: ‘बालकां अर दूध पीन्दे बच्यां कै मुँह तै तन्नै धणी जै-जै कार कराई?’” 17 फेर वो उसनै छोडकै नगर कै बाहरण आकै बैतनियाह गाम म्ह गया अर ओडै रात बिताई। 18 तडकै जिब वो नगर नै बोहडण लागरया था तो उसनै भूख लागी। 19 सङ्क कै किनारे अंजीर का एक दरखत देखकै वो उसके थोरै गया, अर पत्त्या नै छोड उस म्ह और कुछ ना पाकै उसतै कहा, “इह तै तेरे म्ह फेर कदे फल कोनी लागै।” अर अंजीर का दरखत जिब्बे सूखग्या। (aiōn g165) 20 न्यू देखकै चेल्यां नै हैरानी होई अर उननै कहा, “यो अंजीर का दरखत जिब्बे किस तरियां सूखग्या?” 21 यीशु नै उन ताहीं जवाब दिया, “मै थमनै साच्ची कहूँ सूं, जै थम बिश्वास राक्खो अर शक ना करो, तो ना केवल यो करोगे जो इस अंजीर कै दरखत गेल्या करया गया सै, पर जै इस पहाडै नै कहोगे, ‘उखड जा, अर समुन्द्र म्ह जा पड़’, तो यो भी हो जावैगा। 22 अर जो कुछ थम प्रार्थना म्ह बिश्वास तै माँगोगे वो सारा थमनै मिलैगा।” 23 वो मन्दर जाकै उपदेश देवै था, तो प्रधान याजकां अर यहूदी अगुवां नै उसकै थोरै आकै बुझग्या, “तू ये काम किसकै हक तै करै सै? अर तेरे ताहीं यो हक किसनै दिया सै?” 24 यीशु नै उनतै जवाब दिया, “मै भी थारे तै एक बात बुझ्यु सूं: जै वो मनै बताओगे, तो मै भी थमनै बताऊँगा के ये काम किस हक तै करूँ सूं।” 25 यूहन्ना का बपतिस्मा कित तै था? सुर्ग की ओडै तै या माणसां की ओडै तै?” फेर वे आप्स म्ह बहस करण लागे, “जै हम कहां ‘सुर्ग की ओडै तै’ तो वो म्हरै तै कहवैगा, ‘फेर थमनै उसका बिश्वास क्यायंतै न्ही करया?’” 26 अर जै कहां ‘माणसां की ओडै तै’ तो हमनै भीड़ का डर सै, क्यूँकै वे सारे यूहन्ना ताहीं नबी मान्नै सै।” 27 फेर उसनै यीशु ताहीं जवाब दिया, “हमनै न्ही बेरा।” यीशु नै भी उनतै कहा, “तो मै भी थमनै कोनी बतान्दा के ये काम किस हक तै करूँ सूं।” 28 “आच्छा बताओ थम इस बारे म्ह के कहो सो? के किसे माणस कै दो बेटे थे; उसनै पैहले कै थोरै जाकै कहा, हे बेटे, आज अंगूर के बाग म्ह काम कर।” 29 “पर बेटे नै जवाब दिया, “मै कोनी जान्दा”, पर कुछ बखत के बाद अपणे दिए होए जवाब पै उसनै भोत पछतावा होया अर वो चल्या गया।” 30 “फेर पिता नै दुसरे कै थोरै जाकै न्यूए कहा, उसनै जवाब दिया, ‘जी हाँ जाऊँ सूं, पर कोनी गया।’” 31 “इन दोनुवां म्ह तै किसनै पिता की मर्जी पूरी करी?” उनतै कहा, “पैहले नै।” यीशु नै उनतै कहा, “मै थारे तै साच्ची कहूँ सूं के चुंगी लेण आळे अर बेश्याँ थारे तै पैहल्या परमेसवर के

राज्य म्ह दाखल हो जावैगे। 32 यो मै इस खात्तर कहूँ सूं क्यूँकै यूहन्ना बपतिस्मा देण आल्या धर्म की राह दिखान्दे होए थोरै आया, अर थमनै उसका बिश्वास कोनी करया; पर चुंगी लेण आळे अर बेश्याँ नै उसका बिश्वास करया अर थमनै न्यू देखकै भी पाप करणा कोनी छोडया अर ना ए उसका बिश्वास करया।” 33 एक और उदाहरण सुणो एक घर का मालिक था, जिसनै अंगूर का बाग लगाया, अर उसकै चौगरदे नै बाडा बाँध्या, अर रस का कुण्ड खोया, अर रुखाल खात्तर एक मचान बणाया; अर किसानां ताहीं उसका ठेकका देकै परदेस चल्या गया। 34 जिब फल का बखत लोवै आया, तो उसनै अपणे नौकरां ताहीं उसके फलां का हिस्सा लेण नै किसानां थोरै भेज्या। 35 पर किसानां नै उसके नौकरां ताहीं पकड़कै, किसे ताहीं छेत्या, अर किसे ताहीं मार दिया, अर किसे पै पथर बरसाए। 36 फेर उसनै पैहल्या तै यांगे और नौकरां ताहीं भेज्या, अर उननै भी उस्से तरियां करया। 37 आखर म्ह उसनै अपणे बेटे ताहीं उनकै थोरै न्यू सोचकै भेज्या के वे मेरै बेटे की इज्जत करैंगे 38 “पर किसानां नै बेटे ताहीं देखकै आप्स म्ह कहा, ‘थो तो वारिस सै, आओ, इसनै मार देवा अर इसकी विरासत ले लेवां।’” 39 अर उननै उस ताहीं पकड़ा अर अंगूर के बाग तै बाहरण काढकै मार दिया। 40 “इस करकै जिब अंगूर के बाग का मालिक आवैगा, तो उन किसानां के गेल्या के करैगा?” 41 उननै उसतै कहा, “वो उन भुन्डे माणसां का भुट्ठी ढाल नाश करैगा; अर अंगूर के बाग का ठेका दुसरे किसानां ताहीं देवैगा, जो बखत पै उस ताहीं फल दिया करैंगे।” 42 यीशु नै उनतै कहा, “के थमनै कदे भी पवित्र ग्रन्थ म्ह यो कोनी पढ्या: ‘जिस पथर ताहीं राजमिस्त्रियाँ नै बेकार ठहराया था, वोए कुणे के सिरे का पथर होग्या? यो प्रभु की ओडै तै होया, अर म्हारी निगाह म्ह अनोक्खा सै।’” 43 “ज्यांतै मै थमनै कहूँ सूं के परमेसवर का राज्य थारे तै ले लिया जावैगा अर इसी जात ताहीं दिया जावैगा, जो उसका आच्छा फल ल्यावै सै।” 44 जो इस पथर पै पड़ेगा, वो चकणाचूर हो जावैगा; अर जिसपै वो पड़ेगा, उसनै पिस देवैगा।” 45 प्रधान याजक अर फरीसी उसके उदाहरणां नै सुणकै समझागे, के वो उनकै बाबत कहवै सै। 46 अर उननै उस ताहीं पकड़णा चाह्या, पर माणसां तै डरो क्यूँकै वे उसनै नबी मान्नै थे।

22 इसपै यीशु फेर उनतै उदाहरणां म्ह कहण लाग्या, 2 “सुर्ग का राज्य उस राजा की ढाल सै, जिसनै अपणे बेटे का ब्याह करया। 3 अर उसनै अपणे नौकरां ताहीं भेज्या, के न्योदे होड़ माणसां ताहीं ब्याह के जिमणे म्ह बुलावै; पर उननै आणा न्ही चाह्या।” 4 “फेर उसनै और नौकरां ताहीं न्यू कहकै भेज्या, ‘न्योदे होड़ माणसां ताहीं कहो देक्ख्यों, मनै भोज त्यार कर लिया सै, अर मेरे बल्ध अर पठ्ठे होड़ डानरार काट लिये सै: सारा कुछ त्यार सै; ब्याह के जिमणे म्ह आओ।’” 5 पर वे बेपरवाह होकै चले गये, कोए अपणे खेत्तां म्ह, कोए अपणे धन्ये पै। 6 और कई माणसां नै तो राजा के नौकरां ताहीं पकड़कै उनकी बेजीती करी अर उन ताहीं मार दिया। 7 जिब राजा नै यो सुण्या तो छो म्ह भरग्या,

अर अपणी पलटन भेजके उन हत्यारा का नाश करया, अर उनके नगर फूँक दिए। 8 फेर राजा नै अपणे नौकरां तै कह्हा, ब्याह का भोज तो त्यार सै, पर के न्योदे होड़ माणस इस जोगो कोनी ठहरे। 9 इस करकै चौराहाय॑ पै जाओ, अर जितने माणस थमनै मिलै, सारया ताहीं ब्याह कै भोज मह बुला ल्याओ। 10 इस तरियां उसके नौकरां नै सड़कां पै जाकै के भुन्डे, के आच्छे, जितने मिले सारया ताहीं कठा करया; ब्याह का घर मेहमानां तै भरया। 11 जिब राजा मेहमानां नै देखण भीत्तर आया, तो उसनै ओड़ै एक माणस ताहीं देखा, जो ब्याह आळे लते कोनी पहररया था। 12 उसनै उसतै बुझ़या, हे दोस्त, तू ब्याह मह पैहरे जाण आळे लते पहरे बिना उरै क्यातै आ ग्या। उसका मुँह बन्द होग्या। 13 फेर राजा नै नौकरां तै कह्हा, इसके हाथ-पैर जुङ्कै उस ताहीं बाहराणै अन्थेरे मह गेर धो, ओड़ै रोणा, अर दाँत पिसणा होवैगा। 14 “क्यूँके बुलाये होड़ तो धणे सै पर चुणे होए कम सै?” 15 फेर फरीसियाँ नै आकै आप्स मह विचार करया, के उसनै किस ढाळ बातां मह फसावा। 16 इस तरियां उननै अपणे चेल्यां ताहीं हेरोदेस राजा के समर्थकां कै गेल्या उसकै थोरै न्यू कहण नै भेज्या, “हे गुरु, हमनै बेरा सै, के तू साच्चा सै, अर परमेसवर की राह सच्चाई तै सिखावै सै; अर किसे की परवाह कोनी करदा, क्यूँके तू माणसां का मुँह देखकै बात कोनी करदा। 17 इस करकै हमनै बता तन्वै के समझ आवै सै? कैसर तै चुंगी देणा ठीक सै के न्ही।” 18 यीशु नै उनका कपट जाणकै कह्हा, “हे कपटियों, मन्नै क्यातै परखो सो? 19 कर का सिक्का मेरै ताहीं दिखाओ।” फेर उसकै थोरै एक दीनार (एक दिन की मजदूरी) लियाये। 20 उसनै उनतै कह्हा, “या छाप अर नाम किसका सै?” 21 उननै उसतै कह्हा, “कैसर का।” फेर उसनै उनतै कह्हा, “जो कैसर का सै, वो कैसर ताहीं; अर जो परमेसवर का सै, वो परमेसवर ताहीं धो।” 22 न्यू सुणकै उननै हैरानी होई, उस ताहीं छोड़कै चले ग्ये। 23 उस्से दिन सदूकी जो कहवै सै के मेरे होया का दुबारा जिन्दा उठणा सै ए कोनी, उसकै थोरै आये अर उसतै बुझ़या, 24 “हे गुरु, मूसा नवी नै कह्हा था के जै कोए माणस बेऊलादा मर जावै, तो उसका भाई उसकी घरआळी तै ब्याह करकै अपणे भाई कै खात्तर पीढ़ी पैदा करै। 25 इब म्हारै उरै सात भाई थे; पैहल्डा ब्याह करकै मरया, अर ऊलाद ना होण कै कारण अपणी घरआळी अपणे भाई कै खात्तर छोड़ ग्या। 26 इस्से तरियां दुसरे अर तीसरे नै भी करया, अर सातुवां तक योए होया। 27 सारया पाच्छै वा बिरबानी भी मरगी। 28 आखर मह जिन्दा होण पै वा सातुवां मह तै किसकी घरआळी होवैगी? क्यूँके वा सारया की घरआळी बण ली थी।” 29 यीशु नै उनतै जवाब दिया, “थारी गलती या सै के थम पवित्र ग्रन्थ अर परमेसवर की सामर्थ नै न्ही जाणते। 30 क्यूँके मरकै जिन्दा हो जाणकै बाद ब्याह शादी कोनी होन्दी, पर सुर्ग मह परमेसवर के सुर्गदूतां की ढाळ होवैंगे। 31 पर मरकै जिन्दा हो जाणकै बाबत के थमनै यो वचन कोनी पढ़या जो परमेसवर नै थारै तै कह्हा 32 ‘मै अब्राहम का परमेसवर, अर इसहाक का परमेसवर, याकूब का परमेसवर सूँ?’ वो मेरे होया का

न्ही, पर जिन्दा का परमेसवर सै।” 33 न्यू सुणकै माणस उसके उपदेश तै हैरान होए। 34 जिब फरीसियाँ नै सुण्या के यीशु नै सदूकियाँ का मुँह बन्द कर दिया, तो वे कठे होए। 35 शास्त्री समाज के माणसां मह तै एक नै उस ताहीं परखण कै खात्तर उसतै बुझ़या, 36 “हे गुरु, नियम-कायदा मह कौण सा हुक्म बड़ा सै?” 37 यीशु नै उसतै कह्हा, “तू परमेसवर अपणे प्रभु तै अपणे पूरे मन अर अपणे सारे प्राण अर अपणी सारी बुद्धि के साथ प्यार राख। 38 पैहला अर बड़ा हुक्म तो योए सै। 39 अर उस्से जिसा यो दुसरा भी सै के तू अपणे पड़ोसी तै अपणे जिसा प्यार राख। 40 ये दो हुक्म सारे नियम-कायदे अर नवियाँ का निचोड़ (आधार) सै।” 41 जिब फरीसी की कठे थे, तो यीशु नै उनतै बुझ़या, 42 “मसीह कै बारै म्ह थम के सोच्चो सो? वो किसका बेट्टा सै?” उननै यीशु तै उनतै कह्हा, “दाऊद का।” 43 यीशु नै उनतै बुझ़या, “तो दाऊद आत्मा मह होकै उसनै प्रभु क्यातै कहवै सै?” 44 “प्रभु नै, मेरै प्रभु तै कह्हा, मेरै सोळे कान्ही बैठ, जिब ताहीं के मै तेरै बैरियाँ ताहीं तेरे पायां म्ह ना झुका दियुँ।” 45 “भला, जिब दाऊद उसनै प्रभु कहवै सै, तो वो उसका बेट्टा किस ढाळ होया?” 46 उसके जवाब मह कोए भी एक बात न्ही कह सक्या। पर उस दिन तै दुबारै उसतै कीमे और बुझ़ण की हिम्मत कोनी करी।

23 फेर यीशु नै भीड़ तै अर अपणे चेल्यां ताहीं कह्हा, 2 “शास्त्री अर फरीसी माणसां नै मूसा नवी के नियम-कायदे सिखाण का हुक सै; 3 ज्यातै वे थारै तै जो कुछ कहवै वो करियो अर मानिये, पर उन जिसे काम ना करियो; क्यूँके वे सिखावै तो सै पर खुद करदे कोनी। 4 वे थारै पै कई नियम लागू करै सै जिसका पालन करणा ओक्खा सै, वे माणसां नै उनपै चाल्लण खात्तर मजबूर करै सै; पर वे खुद अपणे नियमां नै कोनी मानते।” 5 वे अपणे सारे काम माणसां ताहीं दिखाण कै खात्तर करै सै: वे अपणे ताबिजां नै चौड़ा करै सै जिनपै वे पवित्र ग्रन्थ के वचन लिखकै शरीर पै बँधले सै, अर अपणे लत्यां की झाल्लर बधावै सै, ताके लोग उननै धर्मी समझै। 6 भोज म्ह खास-खास जगहां, अर आराधनालयाँ के खास-खास जगहां बैठणा, 7 बजारां म्ह नमस्कार, अर माणसां म्ह गुरु कुहाणा उननै भावै सै। 8 पर थम गुरु ना कुहाणा, क्यूँके थारा एके गुरु सै, अर थम सारे भाई-भाण के समान सौं। 9 धर्म पै किसे नै अपणा पिता ना कहियो, क्यूँके थारा एके आत्मिक पिता सै, जो सुर्ग म्ह सै। 10 अर स्वामी भी ना कुहाणा, क्यूँके थारा एके मालिक सै, यानिके मसीह। 11 जो थारै म्ह बड़ा हो, वो थारा सेवक या नौकर करण। 12 जो कोए अपणे-आपनै बड़ा बणावैगा, वो छोड़ा करया जावैगा: अर जो कोए अपणे-आपनै छोटा बणावैगा, वो बड़ा करया जावैगा। 13 हे कपटी शास्त्रियो अर फरीसियों, थारै पै धिक्कार सै! थम माणसां कै खात्तर सुर्ग राज्य का बारणा बन्द करो सो, ना तो थम खुद उस म्ह दाखल होवो सो अर ना उस म्ह दाखल होण आला नै दाखल होण धो सो। 14 (हे कपटी शास्त्रियो अर फरीसियों, थारै पै

धिक्कार सै! थम बिधवा के घरां नै खा जाओ सो, अर अपणे-आपनै धर्मी दिखाण खात्तर धणी वार ताहीं प्रार्थना करदे रहो सोः ज्यांतै थरे ताहीं परमेसवर की ओड़ तै धणा दण्ड मिलैगा।) 15 हे कपटी शास्त्रियो अर फरीसियों, थरे पै धिक्कार सै! थम एक माणस ताहीं अपणे पंथ म्ह ल्याण कै खात्तर दूर-दूर ताहीं हान्डो सो, अर जिब वो पंथ म्ह आ जावै सै, तो खुद तो नरक म्ह जाओ सों पर दुसरयां नै अपणे तै दुगणा नरक जाण का भागी बणा धो सो। (Geenna g1067) 16 हे आन्धे अगुवों, थरे पै धिक्कार सै! थम जो या शिक्षा धो सो, के जै कोए मन्दर की सूह खावै तो किमे न्हीं, पर जै कोए मन्दर कै सोन्ने की सूह खावै तो उसतै बन्द जावैगा। 17 हे बेअक्लो अर आंध्यो, कौण बड़ा सै; मन्दर का सोन्ना या वो मन्दर जिसनै उस सोने ताहीं पवित्र बणाया सै? 18 थम यो भी सिखाओ सो के जै कोए वेदी की सूह खावै तो किमे न्हीं, पर जो भेंट उसपै सै, जै कोए उसकी कसम खावै तो बन्द जावैगा। 19 हे आंध्यो, कौण बड़ा सै; भेंट या वेदी जिसम्ह भेंट पवित्र होवै सै? 20 इस करकै जो वेदी की कसम खावै सै, वो उसकी अर जो कुछ उसपै सै, उसकी भी कसम खावै सै। 21 जो मन्दर की कसम खावै सै, वो परमेसवर जो उस म्ह रहवै सै, उसकी भी कसम खावै सै। 22 जो सुर्ग की कसम खावै सै, वो परमेसवर कै सिंहासन की अर उसपै बैठै आले की भी कसम खावै सै। 23 हे कपटी शास्त्रियो अर फरीसियों, थरे पै धिक्कार सै! थम पुरीने, सौंफ, जीरे का दसमा हिस्सा तो धो सो, पर थमनै नियम-कायदा की गहरी बातां ताहीं यानिके न्याय, दया, अर वफादारी का तिरस्कार करो सों; थमनै दसमां हिस्सा भी देणा चाहिये पर उन खास बातां नै भी नजरअंदाज ना करो। 24 हे आन्धे अगुवों, थम छोटे-छोटे नियमां का पालन करण का तो भोत ध्यान राख्यों सों, जिस तरियां पाणी म्ह तै माच्छर ताहीं तो छाण ल्यो सो, पर परमेसवर के खास हुकम का पालन कोनी करते, जो ऊँट नै निगळ जाणकै समान सै। 25 हे कपटी शास्त्रियो अर फरीसियों, थरे पै धिक्कार सै! क्यूँके थम लालची अर स्वार्थी सों, पर थम अपणे-आपने पवित्र राक्खण का ढोंग करो सों, इस खात्तर थम उन कठोरे अर थाळी के समान सों जो उपर तै तो साफ सै पर भित्तर तै वे गन्दे सै। 26 हे आन्धे फरीसियों, पैहल्या माणस नै लूटणा बन्द करो जिब्बे थम धर्म के काम का पालन कर पाओगे अर फेर थम उस कठोरे अर थाळी के समान होवैंगे जो भीत्तर बाहर तै भी साफ हों हों सै। 27 हे कपटी शास्त्रियो अर फरीसियों, थरे पै धिक्कार सै! थम चुने फिरी होई कब्रां के जिसे सो जो उपर तै तो सुधरी दिक्खै सै, पर भीत्तर मुर्दा की हाड़ियाँ अर सारे ढाळ की गन्दी तै ठुकी होई सै। 28 इस्से तरियां तै थम भी उपर तै माणसां ताहीं धर्मी दिक्खो सो, पर भीत्तर अधर्म अर कपट तै भेरे सो। 29 हे कपटी शास्त्रियो अर फरीसियों, थरे पै धिक्कार सै! थम उन नवियाँ की कब्र समारो सो अर धर्मियाँ की कब्र सजाओ सो, जिन ताहीं थरे पूर्वजां नै मारा था। 30 “अर कहो सो, ‘जै हम अपणे बाप-दाद्यां के दिनां म्ह होन्दे तो नवियाँ की हत्या म्ह उनके साइझी कोनी होन्दे’। 31 इसतै तो थम अपणे आप ए या गवाही धो सो के थम नवियाँ

के हत्यारां के वंशज सो। 32 ठीक सै थम अपणे पूर्वजां कै पाप का घड़ा भरते जाओ।” 33 हे साँप के सप्पोलों जिसे माणसों, थम नरक की सजा तै किस ढाळ बचोगे? (Geenna g1067) 34 इस करकै देक्खो, मै थरे थोरै नवियाँ अर समझदार अर शास्त्रियाँ ताहीं भेज्जू सूं अर थम उन म्ह तै कुछां नै मार धोगे अर कूस पै चढ़ावोगे, अर कुछां नै अपणे आराधनालायाँ म्ह कोडे मारोगे अर एक नगर तै दुसरे नगर ताहीं भजांदे फिरोगे। 35 जिसतै धर्मी हाबिल तै लेकै बिरिक्याह के बेटे जकर्याह तक, जिस ताहीं थमनै मन्दर अर वेदी कै बिचालै मार दिया था, जितने भी धर्मी माणसां ताहीं मारया सै, वो सारा दण्ड थरे सिर पै पड़ैगा। 36 मै थमनै सच कहूं सूं, ये सब का दण्ड इस पीढ़ी के माणसां नै भुगतणा पड़ैगा। 37 “हे यरुशलेम नगर के लोगों, हे यरुशलेम नगर के लोगों! थम नवियाँ नै मार देओ सो, अर जो थरे थोरै भेज्जै गए, उनपै पत्थर बरसाओ सो। कितनी ए बर मन्नै चाह्या के जिस ढाळ मुर्दा अपणे बच्चां ताहीं अपणे पाक्खां कै तलै छुपा ले सै, उससे तरियां ए मै भी थरे बाल्कां नै कट्ठा कर ल्यूं पर थमनै कोनी चाह्या। 38 देक्खो, थारा घर थरे खात्तर उजाड़ छोड़या जावै सै। 39 क्यूँके मै थमनै साच्ची कहूं सूं के इब तै जिब ताहीं थम न्हीं कहोगे, “धन्य सै वो, जो प्रभु कै नाम तै आवै सै” तब तक थम मनै फेर दुबारै कदे कोनी देक्खोगे।”

24 जिब यीशु मन्दर तै लिकड़कै जाण लागरया था, तो उसके चेल्लें

उस ताहीं मन्दर कै बणावट दिखाण कै खात्तर उसकै थोरै आये।

2 यीशु नै उनतै कह्या, “के थम ये सारी इमारत न्हीं देखेते? मै थमनै साच्ची कहूं सूं, उरै पत्थर पै पथ्थर भी कोनी रहवैगा, जो गेरया ना जावैगा।” 3 जिब यीशु जैतून कै पहाड़ पै बेठ्या था, तो चेल्लां नै एकले म्ह उसकै थोरै आकै कह्या, “हमनै बता, ये बात कद होवैगी? तेरे आण का अर दुनिया कै अन्त की कै निशानी होवैगी?” (aiōn g1065) 4 यीशु नै उन ताहीं जावाब दिया, “चौकने रहियो! कोए थमनै भक्ताण न्हीं पावै, 5 क्यूँके धणखरे इसे होवैंगे जो मेरै नाम तै आकै कहवैंगे, मै मसीह सूं, अर धणाए ताहीं भक्तावैंगे। 6 थम रोले अर लड़ाईया का जिक्र सुणोगे, तो धबराईयो ना क्यूँके इनका होणा जसरी सै, पर उस बख्त खात्ता कोनी होवैगा। 7 क्यूँके जात पै जात, अर राज्य पै राज्य चढ़ाई करैगा, अर जगहां-जगहां अकाळ पड़ैंगे, अर हाल्लण आवैंगे। 8 ये सारी बात दुखां कै शेषआत होवैगी।” 9 फेर माणस कळेश देण कै खात्तर थमनै पकड़वावैंगे, अर थमनै मार देवैंगे, अर मेरै नाम कै कारण सारी जातां के माणस थरे तै बैर राक्खैंगे, क्यूँके थम मेरे पै विश्वास करो सों। 10 फेर धणखरे मेरे पै विश्वास करणा छोड़ देंगे, अर एक-दुसरे नै पकड़वावैंगे, अर एक-दुसरे तै बैर राक्खैंगे। 11 धणखरे झुट्टे नबी आवैंगे, अर धणाए ताहीं भक्तावैंगे। 12 अधर्म कै बढ़ण तै वे एक-दुसरे तै प्यार करणा छोड़ देंगे, 13 पर जो अन्त ताहीं मेरे पै विश्वास राक्खैंगा, उससे ताहीं बचाया जावैगा। 14 अर परमेसवर कै राज्य का यो सुसमाचार सारी दुनिया म्ह प्रचार करया जावैगा, ताके सारी जातां नै इस ताहीं स्वीकार करण

का मौकका मिलै, ताके थम मेरे गवाह होओ, फेर दुनिया का अन्त आ जावैगा। 15 इस करकै जिब थम उस उजाड़ण आळी घृणित चीज ताहीं जिसका जिक्र दानियेल नबी कै जरिये होया था, पवित्र जगहां पै खड़े देक्खो (जो पढ़ै, वो समझै), 16 फेर जो यहूदिया परदेस म्ह हो, वे पहाड़ां पै भाज जावै। 17 जो छात पै हो, वो अपणे घर म्ह तै समान लेण नै तलै न्ही उतरै, 18 अर जो खेत म्ह हो, वो अपणा लत्ता लेण नै पाछ्यै न्ही बोहड़ै। 19 उन दिनां म्ह जो गर्भवती अर दूध पिलान्दी बिरबान्नी होवैगैं, उनकै खात्तर भागणा भी मुश्किल होगा! 20 प्रार्थना करया करो के थमनै जाड़े म्ह या आराम कै दिन भाजणा ना पड़ै। 21 क्यूँकै उस बखत इसा भारया क्लेश होवैगा, जिसा दुनिया की शरुआत तै ना इब ताहीं होया ना कदे होवैगा। 22 “अर जै वे दिन घटाए न्ही जान्दे तो कोए प्राणी कोनी बघदा, पर छाँटे होया कै कारण वे दिन घटाए जावैगे। 23 उस बखत जै कोए थमनै कहवै, ‘देक्खो, मसीह उरै सै?’ या ‘ओडै सै?’ तो बिश्वास ना करियो। 24 क्यूँकै झूँठे मसीह अर झूँठे नबी उठ खड़े होवैं, अर बड़े-बड़े चमत्कार, अर अनोक्खे काम दिखावैगे के जै हो सक्या तो छाँटे होया ताहीं भी भका देवैंगे। 25 देक्खो, मन्नै पैहल्याए थरे तै यो सारा कुछ कह दिया सै। 26 “इस करकै जै वे थारे तै कहवै, ‘देक्खो, वो बण म्ह सै’, तो बाहरणै ना लिकड़यो; या ‘देक्खो, वो कोठड़ी म्ह सै’, तो बिश्वास ना करियो। 27 क्यूँकै जिस तरियां बिजली पूरब तै लिकड़कै पश्चिम ताहीं चमकै सै, उस्से तरियां मुझ माणस के बेट्टे का भी आणा होवैगा। 28 जड़े लाश हो, उड़ैपै चील कठै होवैगे।” 29 उन दिनां के क्लेश कै पाछ्यै जिब्बे सूरज अन्धेरे म्ह हो जावैगा, चाँद का चाँदणा जान्दा रहवैगा, अर तारे अकास तै तलै पड़ैंगे, अर अकास की शक्तियाँ हलाई जावैगी। 30 फेर माणस के बेट्टे का निशान अकास म्ह दिखेगा, अर फेर धरती के सारे खानदान्ना के माणस छात्ती पिटैंगे; अर माणस के बेट्टे ताहीं बड़ी सामर्थ और महिमा कै गेल्या अकास के बादांठां पै आन्दे देक्खोगे। 31 वो तुरही की तेज आवाज कै गेल्या अपणे सुर्गदूतां नै खन्दवैगा, अर वे अकास के इस सिरे तै उस सिरे ताहीं, च्यारु दिशायां तै उसके चुणे होया नै कठै करैंगे। 32 अंजीर के दरखत तै यो उदाहरण सीक्खो: जिब उसकी डाळी कोमल हो जावै अर पत्ते लिकड़ण लाग ज्या सै, तो थम जाण ल्यो के गर्मी का बखत लोवै सै। 33 इस्से तरियां तै जिब थम इन सारी बात्तां नै देक्खो, तो जाण ल्यो के वो लोवै सै, बल्के दरबाजे पै सै। 34 मै थमनै साच्ची कहूँ सूँ के जिब ताहीं ये सारी बात पूरी ना हो लेवै, जद ताहीं इस पीढ़ी का अन्त कोनी होवैगा। 35 धरती अर अकास टल्ल जावैगे, पर मेरी बात कदे न्ही टल्लैगी। 36 “उस दिन अर उस बखत कै बारै म्ह कोए न्ही जाण्दा, ना सुर्गदूत अर ना बेट्टा, पर सिफ पिटा। 37 जिसा पूर्व नूह के दिनां होया था, उस्से तरियां ए माणस के बेट्टे का आणा होगा। 38 क्यूँकै जिस तरियां बाढ़ तै पैहले के दिनां म्ह, जिस दिन ताहीं नूह जहाज पै न्ही चढ़या, उस दिन ताहीं माणस खावै-पीवै थे, अर उन म्ह ब्याह होवै थे। 39 अर जिब ताहीं बाढ़ आकै उन सारया ताहीं बहा न्ही लेग्या, जद ताहीं उननै किमे बेरा न्ही पाठ्या; इस्से तरियां ए मुझ

माणस के बेट्टे का आणा भी होगा। 40 उस बखत दो जाणे खेत म्ह होंगे, एक ठाया जावैगा अर दुसरा छोड़ दिया जावैगा। 41 दो बिरबान्नी एक साथ चाककी पीसदी होवैगी, एक ठा ली जावैगी अर दुसरी छोड़ दी जावैगी।” 42 इस करकै जागदे रहो, क्यूँकै थमनै न्ही बेरा के थारा प्रभु किस दिन आवैगा। 43 पर न्यू जाण ल्यो के जै घर का मालिलक नै बेरा हो के चोर किस घड़ी आवैगा तो जागदा रहन्दा, अर अपणे घर म्ह सेंथ लागण न्ही देन्दा। 44 ज्यांते थम भी त्यार रहो, क्यूँकै जिस घड़ी कै बारै म्ह थम सोचदे भी कोनी, उस्से घड़ी मै माणस का बेट्टा आ जाऊँगा। 45 “आखर म्ह वो विश्वास जोग्गा अर अकलमंद दास कौन सै, जिस ताहीं मालिलक नै अपणे नौकर-चाकरां पर सरदार ठहराया के बखत पै उननै खाणा देवै? 46 धन्य सै वो नौकर, जिस ताहीं उसका मालिलक आकै इसाए करदा पावै। 47 मै थमनै साच्ची कहूँ सूँ वो उसनै अपणी सारी धन-सम्पत्ति का मालिलक बणावैगा। 48 पर जै वो दुष्ट दास सोच्यण लागै के मेरै मालिलक कै आण म्ह वार सै, 49 अर अपणे साथी नौकरां नै पिटृण लागै, अर शराबियाँ कै गेल्या खावै-पीवै। 50 तो उस नौकर का मालिलक उस दिन बोहड़ेगा, जिब वो उसकी बाट ना देख्या हो, अर इसे बखत म्ह आवैगा जिसका उसनै ना बेरा हो, 51 जिब वो उसनै भारी सजा देगा उसकी गिणती कपटियाँ कै म्ह गिणी जावैगी: ओडै रोणा अर दाँत पिसणा होगा।”

25 यीशु नै अपणे चेल्यां ताहीं एक और उदाहरण देकै कह्या,

“सुर्ग का राज्य उन दस कुँवारियाँ कै जिसा होगा जो अपणी मशाल लेकै बन्दडे तै फेटण लिकड़ी। 2 उन म्ह पाँच बेअक्ल अर पाँच समझदार थी। 3 बेअक्ली कुवारियाँ नै अपणी मशाल तो ली, पर अपणे गेल्या फालतू तेल न्ही लिया; 4 पर समझदारां नै अपणी मशालां कै गेल्या अपणी कुपियाँ म्ह तेल भी भर लिया। 5 जिब बन्दडे कै आण म्ह वार होई, तो वे सारी ऊँधण लाग्यी अर सोगी।” 6 “आधी रात नै धूम माच्ची: देक्खो, बन्दडा आण लागरया सै! उसतै फेटण नै चाल्लों।” 7 “फेर वे सारी कुँवारियाँ उठैकै अपणी मशाल ठीक करण लाग्यी। 8 अर बेअक्लियाँ नै समझदारां तै कह्या, ‘अपणे तेल म्ह तै कुछ हमनै भी थी, क्यूँकै म्हारी मशाल बुझण्या लागीरी सै।’” 9 “पर समझदारां नै जवाब दिया, ‘कदे यो म्हारै अर थारे खात्तर पूरा ना पड़ै; भला तो योए सै के थम बेचाणीयाँ कै थेरै जाकै अपणे खात्तर मोल लियाओ।’” 10 जिब वे मोल लेण नै जावै थी तो बन्दडा आण पोंहच्या, अर जो त्यार थी, वे उसकै गेल्या ब्याह कै घर म्ह चली गई अर बारणा मूँद दिया गया। 11 “इसकै पाच्चे वे दुसरी कुँवारियाँ भी बोहड़कै आई अर बन्दडे तै कहण लाग्यी, ‘हे मालिलक, म्हारै खात्तर किवाड़ खोल दे।’” 12 “उसनै जवाब दिया, ‘मै थारे ताहीं साच्ची कहूँ सूँ, मै थमनै कोनी जाण्दा।’” 13 इस करकै चोकने रहो, क्यूँकै मेरे आण के उस दिन नै थम कोनी जाण्दो, ना उस घड़ी नै जिस दिन म्ह आऊँगा। 14 सुर्ग का राज्य उस माणस के उदाहरण के समान भी सै, जिसनै परदेस जान्दे बखत अपणे नौकरां ताहीं बुलाकै अपणी कुछ सम्पत्ति उन ताहीं सौपै

दी, ताके वे व्यापर करके घणा धन जोड़ ले। 15 उसनै एक तै पाँच तोड़े (1 तोड़ा 15 साल की मजदूरी के बराबर सै), दुसरे ताहीं दो, अर तीसरे ताहीं एक; यानिके हरेक नै उसकी काविलियत कै मुताबिक दिया, अर फेर परदेस चल्या गया। 16 फेर, जिस ताहीं पाँच तोड़े मिले थे, उसनै जिब्बे जाकै उनतै लेण-देण करया, अर पाँच तोड़े और कमाए। 17 इसरे तरियां तै जिस ताहीं दो मिले थे, उसनै भी दो और कमाए। 18 पर जिस ताहीं एक मिल्या था, उसनै जाकै माटी खोदी, अर अपणे मालिकका धन लटको दिया। 19 घणे दिनां पाँच तोड़े उन नौकरां का मालिक आया, अर उनतै हिसाब लेण लाग्या, के उननै उन पईसा तै कै कुछ करया। 20 जिसनै पाँच तोड़े मिले थे, उसनै पाँच तोड़े और ल्याकै कह्या, हे मालिक, तन्नै मेरै ताहीं पाँच तोड़े सौप्ये थे, लखा, मन्नै ये पाँच तोड़े और कमाए सै। 21 उसकै मालिक नै उसनै कह्या, शाबाश, हे भरोससे के लायक आच्छे नौकर, तू थोड़े-से धन म्ह भी भरोसमंद लिकड़या, मै तन्नै घणी चिज्जां का अधिकारी बणाऊँगा। अपणे मालिककै आनन्द म्ह साइझी हो। 22 फेर जिस ताहीं दो तोड़े मिले थे, उसनै भी आकै कह्या, हे मालिक, तन्नै मेरै ताहीं दो तोड़े सौप्ये थे, देख, मन्नै दो तोड़े और कमाए सै। 23 उसकै मालिक नै उसतै कह्या, शाबाश, हे भरोससे के लायक आच्छे नौकर, तू थोड़े म्ह भी भरोसमंद लिकड़या; मै तन्नै घणी चिज्जां का अधिकारी बणाऊँगा। अपणे मालिककै आनन्द म्ह साइझी हो। 24 फेर जिस ताहीं एक तोड़ा मिल्या था, उसनै आकै कह्या, हे मालिक, मै तन्नै जाणु था, के तू इसा माणस सै: जित्त किते तू बीज न्ही बोन्दा ओड़े फसल काढै सै, अर जित्त न्ही खिंडान्दा ओड़े तै कठाकै करै सै। 25 जै मै तेरा तोड़ा खो देता तो तू मन्नै दण्ड देता, ज्यांतै मै डरग्या अर जाकै तेरा तोड़ा माटी म्ह दबा दिया। देख, जौ तेरा सै, वो यो सै। 26 उसकै मालिक नै उस ताहीं जवाब दिया, हे दुष अर आलसी नौकर, जिब तन्नै न्यू बेरा था के जित्त मन्नै बीज न्ही बोया ओड़े तै फसल काढू सूँ, अर जित्त मन्नै न्ही खिंडाया ओड़े तै कठाकै करूँ सूँ: 27 जै तन्नै बेरा था के मै इसा सूँ, तो तू मेरा धन सर्फांनै नै ए दे देंदा, फेर मै आकै अपणा धन व्याज सुधां ले लेन्दा। 28 मालिक नै अपणे नौकरां तै कह्या, ज्यातै वो तोड़ा उसतै ले ल्यो, अर जिसकै धोरै दस तोड़े सै उसनै दे द्यो। 29 क्यूँके जिस किसे धोरै सै, उस ताहीं और दिया जावैगा; अर उसकै धोरै घणा हो जावैगा: पर जिसकै धोरै न्ही सै, उसतै वो भी जौ उसकै धोरै सै, ले लिया जावैगा। 30 इस निकम्मे नौकर नै बाहर अन्धेरै म्ह गेर द्यो, जित्त रोणा अर दाँत पिसणा होगा। 31 जिब मै माणस का बेट्ठा अपणी महिमा म्ह आऊँगा अर सारे सुर्गदूत मेरे गेल्या आवैगें, तो मै अपणी महिमा कै सिंहासन पै बैठुँगा। 32 अर सारी जात मेरे स्याम्ही कठुँ करी जावैगी; अर जिस ढाल पाली भेड़ुँ नै बकरियाँ तै न्यारी कर देवै सै, उस्से तरियां मै उननै एक-दुसरे तै न्यारा करूँगा। 33 मै भेड़ुँ नै अपणी सोळी ओड़ अर बकरियाँ नै ओळी ओड़ खड़या करूँगा। 34 “फेर मै राजा अपणी सोळी ओड़ आळा नै कहूँगा, हे मेरे पिता के धन्य माणसों, आओ, उस राज्य के हकदार हो जाओ, जो दुनिया की शरुआत

तै थारे खातर त्यार करया गया सै। 35 क्यूँके जिब मै भूक्खा था, तो थमनै मेरै ताहीं खाण नै दिया; मै तिसाया था, तो थमनै मेरै ताहीं पाणी पिलाया; मै परदेशी था, तो थमनै मेरै ताहीं अपणे घरां ठहराया; 36 मै उघाडा था, तो थमनै मेरै ताहीं लते पिहराए; मै बीमार था, तो थमनै मेरा बेरा लिया, मै जेल म्ह था, तो थम मेरै तै मिलाण आये।” 37 “फेर धर्मी उस ताहीं जवाब देवैगें, हे प्रभु, हमनै कद तेरे ताहीं भूक्खा देख्या अर खुवाया? या कद तिसाया देख्या अर पाणी पिलाया? 38 हमनै कद तेरे ताहीं परदेशी देख्या अर अपणे घरां ठहराया? या उघाडा देख्या अर लते पिहराये? 39 हमनै कद तेरे ताहीं बीमार या जेल म्ह देख्या अर तेरा बेरा लेण आये?” 40 “फेर मै राजा उननै जवाब देऊँगा, ‘मै थमनै साच्ची कहूँ सूँ के थमनै जो मेरे इन छोट्या तै छोट्ये बिश्वासी भाईयाँ म्ह तै किसे एक कै गेल्या करया, वो मेरै ए गेल्या करया।’” 41 “फेर मै ओळै कान्ही आळा ताहीं कहूँगा, हे श्रापित माणसों, मेरै स्याम्ही तै उस अनन्त आग म्ह चले जाओ, जो परमेसवर नै शैतान अर उसके दूतां खातर त्यार करी सै। (aiōnios g166) 42 क्यूँके मै जिब भूक्खा था, तो थमनै मेरै ताहीं खाण नै कोनी दिया; मै तिसाया था, तो थमनै मेरै ताहीं पाणी कोनी पिलाया; मै जिब परदेशी था, तो थमनै मेरै ताहीं अपणे घरां कोनी ठहराया; 43 मै नंगा था, तो थमनै मेरै ताहीं लते कोनी पिहराए; मै जिब बीमार था, तो थमनै मेरा बेरा कोनी लिया, मै जेल म्ह था, तो थम मेरै तै मिलाण कोनी आये।” 44 “फेर वे जवाब देवैगें, हे प्रभु, हमनै तेरे ताहीं कद भूक्खा, या तिसाया, या परदेशी, या उघाडा, या बीमार, या जेल म्ह देख्या, अर तेरी सेवा-पाणी न्ही करी?” 45 “फेर मै उननै जवाब देऊँगा, ‘मै थमनै साच्ची कहूँ सूँ के थमनै जो मेरे इन छोट्या तै छोट्या म्ह तै किसे एक कै गेल्या न्ही करया, वो मेरै गेल्या भी न्ही करया।’” 46 “अर अर्धर्मी जन अनन्त दण्ड भोगैगें पर धर्मी जन अनन्त जीवन म्ह दाखल होंगे।” (aiōnios g166)

26 जिब यीशु नै ये सारी बात कह ली तो अपणे चेल्यां तै कहण लाया, 2 “थमनै बेरा सै के दो दिनां पाँच फसह का त्वौहार सै, अर मै माणस का बेट्ठा क्रूस पै चढाण कै खातर पकड़वाया जाऊँगा।” 3 फेर प्रधान याजक अर प्रजा के यहूदी अगुवें, काइपा नामक महायाजक कै अँगण म्ह कठुँ होए, 4 अर आप्स म्ह विवार करण लागे के यीशु ताहीं धोक्खे तै पकड़कै मार देवा। 5 पर वे कहवै थे, “त्वौहार कै बखत न्ही, कदे इसा ना हो के माणसां म्ह रोळा माच ज्या।” 6 जिब यीशु बैतनिय्याह गाम म्ह शमैन कोढ़ी कै घरां था, 7 तो एक बिरबानी संगमरमर कै बरतन म्ह महँगा खसबूदार तेल लेकै उसकै धोरै आई, अर जिब वो खाणा खाण नै बेठ्या था तो उसकै सिर पै उंडेल दिया। 8 न्यू देख्याकै उसके चेल्लें खीजकै अर कहण लागे, “इसका क्यांतै नाश करया गया? 9 इस ताहीं तो बढ़िया दाम्पां पै बेचकै कंगालां म्ह बांडया जा सकै था।” 10 न्यू जाणकै यीशु नै उनतै कह्या, “बिरबान्नी नै क्यांतै सताओ सो? उसनै मेरे गेल्या भलाई करी सै। 11 कंगाल तो थारे गेल्या सारी हाण रहवै सै, पर मै थारे गेल्या सारी हाण कोनी रहूँगा। 12 उसनै

मेरी देह पै जो यो महँगा खसबूदार तेल उंडेला सै, वो मेरे गाड़े जाणकै खात्तर करया सै। 13 मै थमनै साच्ची कहूँ सूँ के सारे दुनिया म्ह जित्त किते भी यो सुसमाचार प्रचार करया जावैगा, ओड़े उसकै इस काम का जिक्र भी उसकी याद म्ह करया जावैगा। 14 फेर यहूदा इस्करियोती नै, जो बारहां चेल्यां म्ह तै एक था, प्रधान याजकों के धोरै जाकै कह्या, 15 “जै मै यीशु नै थारे हाथ्यां म्ह पकड़वा दियुँ, तो मनै के घोगे?” उननै तीस चाँदी के सिक्के तौलैके दे दिये। 16 अर वो उस्से बखत तै यीशु नै पकड़वाण का मौक्का टोह़ लाग्या। 17 अखिरी रोट्टी के त्यौहार कै पैहलड़े दिन, चेल्लें यीशु कै धोरै आकै बुझ्यण लागे, “तू कित्त चाहवै सै के हम तेरे खात्तर फसह खाण की त्यारी करा?” 18 यीशु बोल्या, “नगर म्ह फलाणा माणस नै जाकै उस्तै कहो, ‘गुरु कहवै सै के मेरा बखत लौवै सै।’ मै अपणे चेल्यां कै गेल्या तेरे उरै फसह का त्यौहार बणाऊँगा।” 19 आखर चेल्यां नै यीशु का हुक्म मान्या अर फसह का भोज त्यार करया। 20 जिब वे खाण लागेर थे तो यीशु नै कह्या, “मै थमनै साच्ची कहूँ सूँ के थारे म्ह तै एक मनै धोक्खा देकै पकड़वावैगा।” 22 इसपै चेल्ले घणे उदास होए, अर हरेक उस्तै बुझ्यण लाग्या, “हे गुरु, के वो मै सूँ?” 23 यीशु नै जावाब दिया, “जिसनै मेरै गेल्या थाळी म्ह हाथ घाल्या सै, वो ए मनै पकड़वावैगा।” 24 मै माणस का बेट्टा तो जिसा मेरे बारै म्ह लिख्या सै, अर जावै ए सै; पर उस माणस पै धिक्कार सै जिसकै जरिये मै माणस का बेट्टा पकड़वावा जाऊँगा: जै उस माणस का जन्म ए न्ही होंदा, तो उसकै खात्तर भला होंदा।” 25 फेर यीशु कै पकड़वाण आळे यहूदा नै कह्या, “हे गुरु, के वो मै सूँ?” यीशु उस्तै बोल्या, “तनै कह लिया।” 26 जिब वे फसह खाण लागेर थे, तो यीशु नै रोट्टी ली, अर आशीष माँगकै तोड़ी, अर चेल्यां ताहीं देकै कह्या, “ल्यो, खाओ; या मेरी देह सै।” 27 फेर यीशु नै अपणे कटोरा लैकै परमेसवर का धन्यवाद करया, अर उन ताहीं देकै कह्या, “थम सारे इस म्ह तै पियो, 28 क्यूँकै यो करार का मेरा वो लहू सै, जो घणखरयां कै खात्तर पापां की माफी कै खात्तर बहाया जावै सै।” 29 मै थमनै साच्ची कहूँ सूँ के अंगूर का यो रस उस दिन ताहीं कदे न्ही पिँँगा, जिब थारे गेल्या अपणे पिता कै राज्य म्ह नया न्ही पीऊँ।” 30 फेर वे भजन गाकै जैतून कै पहाड़ पै गए। 31 फेर यीशु नै उनतै कह्या, “थम आज ए रात नै मेरै बाबत ठोक्कर खाओगे, क्यूँकै लिख्या सै: ‘मै पाली नै मासँगा, अर टोळ की भेड़ तित्तर-बित्तर हो जावैगी।’” 32 “पर मै अपणे जिन्दा उठण कै बाद थारे तै पैहल्या गलील परदेस म्ह मिलूगाँ।” 33 इसपै पतरस नै उस्तै कह्या, “जै सारे छोड़े तो छोड़े, पर मै तेरा साथ कदे न्ही छोड़ुँगा।” 34 यीशु नै उस्तै कह्या, “मै तेरे तै सच कहूँ सूँ के आज ए रात नै मुर्गे के बाँग देण तै पैहल्या, तू तीन बर मेरै बारै म्ह मुकैरगा।” 35 पतरस नै उस्तै कह्या, “जै मनै तेरे गेल्या मरणा भी पड़े, तोभी मै तेरा इन्कार कदे कोनी कसँगा।” इसपै तरियां और सारे चेल्यां नै भी न्यूँ कह्या। 36 फेर यीशु अपणे चेल्यां कै गेल्या गतसमनी नामक एक जगहां म्ह आया

अर अपणे चेल्यां तै कहण लाग्या, “उरैए बेठे रहियो, जिब ताहीं मै ओड़ै प्रार्थना करूँ।” 37 वो पतरस अर जब्दी के दोन्हु बेट्टा नै गेल्या लाग्या, अर उदास अर कांल होण लाग्या। 38 फेर उसनै उनतै कह्या, “मेरा मन घणा उदास सै, उरै ताहीं कै मेरा जी लिकड़ण नै होरया सै। थम उरै ठहरो अर जागदे रहो।” 39 फेर वो माड़ा और आगै सरक कै मुँह कै बछ गिर्या, अर या प्रार्थना करण लाग्या, “हे मेरे पिता, जै हो सकै तो यो दुख का कटोरा मेरै तै ठज जावै, तोभी जिसा मै चाहूँ सूँ इसा न्ही, पर जिसा तू चाहवै सै उस्से तरियां ए होवै।” 40 फेर उसनै चेल्यां कै धोरै आकै उन ताहीं सोन्दे पाया अर पतरस तै कह्या, “के थम मेरै गेल्या एक घड़ी भी कोनी जाग सके? 41 जागदे रहो, अर प्रार्थना करदे रहो के थम परखे ना जाओ, आत्मा तो त्यार सै पर देह कमजोर सै।” 42 फेर उसनै दुसरी बार जाकै या प्रार्थना करी, “हे मेरे पिता, जै यो मेरै पिए बिना न्ही हट सकदा, तो तेरी मर्जी पूरी हो।” 43 फेर उसनै आकै उन ताहीं फेर सोन्दे पाया, क्यूँकै उनकी आँखां म्ह नींद भरी थी। 44 उननै छोड़कै वो फेर चल्या गया, अर उन्हे शब्दां म्ह फेर तीसरी बार प्रार्थना करी। 45 फेर उसनै चेल्यां कै धोरै आकै उनतै कह्या, “इब सोन्दे रहो, अर आराम करो: देक्खो, बखत आण पोंहच्या सै, अर मै माणस का बेट्टा पापियाँ के हाथ्यां पकड़वाया जाऊँगा।” 46 उठो, चाल्लां; देक्खो, मेरा पकड़ण आळा धोरै आण पोंहच्या सै।” 47 वो न्यूँ कहण ए लागरया था के यहूदा जो बारहां चेल्यां म्ह तै एक था आया, अर उसकै गेल्या प्रधान याजकां अर यहूदी अगुवां की ओड़े तै बड़ी भीड़, तलवार अर लाट्ठी लिये होए, आई। 48 यीशु कै पकड़वाण आळे यहूदा नै उन ताहीं यो इशारा दिया था: “जिस ताहीं मै चूम ल्यूँ वोए सै; उस ताहीं पकड़ लियो।” 49 अर जिब्बे यीशु कै धोरै आकै कह्या, “हे गुरु, नमस्कार!” अर उस ताहीं घणा चुम्या। 50 यीशु नै उस्तै कह्या, “हे दोस्त, जिस काम कै खात्तर तू आया सै, उसनै करतो।” फेर उननै धोरै आकै यीशु पै हाथ गेरया अर उस ताहीं पकड़ लिया। 51 यीशु कै साथियाँ म्ह तै एक नै हाथ बढ़ाकै अपणी तलवार खींच ली अर महायाजक के नौकरक पै चलाकै उसका कान उड़ा दिया। 52 फेर यीशु नै उस्तै कह्या, “अपणी तलवार म्यान म्ह धर ले क्यूँकै जो तलवार चालावै सै वे सारे तलवार तै नाश करे जावैगे। 53 के तनै न्ही बेरा के मै अपणे पिता तै बिनती कर सर्कूँ सूँ, अर वो सुर्गदूतां की बारहां पलटन तै घणे मेरै धोरै इब्बे हाजर कर देवैगा? 54 पर पवित्र ग्रन्थ की ये बात के इसाए होणा जरुरी सै, किस ढाळ पूरी होवैगी?” 55 उस बखत यीशु नै भीड़ तै कह्या, “के थम तलवार अर लाट्ठी लेकै मनै ढाकू की ढाळ पकड़ण कै खात्तर लिकड़े सो? मै हरेक दिन मन्दर म्ह बैठकै उपदेश दिया करूँ था, अर थमनै मेरै ताहीं कोनी पकड़या। 56 पर यो सारा ज्यांते होया सै कै नबियाँ के वचन पूरे होवै।” फेर सारे चेल्ले उसनै छोड़कै भाजगे। 57 फेर यीशु कै पकड़ण आळे उस ताहीं काइफा नामक महायाजक कै धोरै लेगे, जित्त शास्त्री अर यहूदी अगुवे कठुँ होए थे। 58 पतरस दूर ए दूर उसकै पाच्छै-पाच्छै महायाजक कै आँगण ताहीं गया, अर भीत्तर जाकै अन्त देखण नै सिपाहियाँ कै

गेल्या बैठग्या। 59 सारे प्रधान याजक अर यहूदी अगुवां की सभा यीशु नै मारण कै खात्तर उसकै बिरोध म्ह झूठी गवाही की टोह म्ह थे, 60 पर घणखे झुटे गवाह कै आण पै भी कोनी पाई। आखर म्ह दो जणे आये, 61 अर बोल्ले, “इसनै कह्या सै के मै परमेसवर कै मन्दर नै गेर सँकू सूं अर उस ताहीं तीन दिन म्ह बणा सँकू सूं।” 62 फेर महायाजक नै खडे होकै यीशु तै कह्या, “के तू कोए जवाब न्ही देंदा? ये माणस तेरे बिरोध म्ह के गवाही देवै सै?” 63 पर यीशु बोल-बाल्ला रहया। फेर महायाजक नै उसतै कह्या, “मै तन्नै जिन्दे परमेसवर की कसम दियुं सूं के जै तू परमेसवर का बेटा मसीह सै, तो म्हारै ताहीं कह दे।” 64 यीशु नै उसतै कह्या, “तन्नै आप ए कह दिया; बल्के मै तेरे तै यो भी कहूं सूं के इब तै थम मुझ माणस के बेटे नै सब तै सर्वशक्तिमान की सोळी ओड बेटे, अर अकास के बाढ़ानै पै आन्दे देख्योगे।” 65 फेर महायाजक नै अपणे लते पाडकै कह्या, “इसनै परमेसवर की बुराई करी सै, इब हमनै गवाह की के जरूरत? देख्यो, थमनै इब्बे या बुराई सुपी सै! 66 थम के सोच्चो सो?” उननै जवाब दिया, “यो मारण जोगा सै।” 67 फेर उननै उसकै मुँह पै थुक्या अर उसकै घुस्से मारे, दुसरायां नै थप्पड मारकै कह्या, 68 “हे मसीह, म्हारै तै भविष्यवाणी करकै कह के किसनै तेरे ताहीं मारया?” 69 पतरस बाहरणै आँगण म्ह बेठ्या था के एक नौकराणी उसकै धोरे आई अर बोल्ली, “तू भी तो गलीलवासी यीशु कै गेल्या था।” 70 उसनै सारया कै स्याम्ही यो कहकै नाट्या, “मन्नै न्ही बेरा तू के कहवै सै।” 71 जिब वो बाहरणै देहछियाँ म्ह गया, तो दुसरी नौकराणी उसनै देख्यकै उनतै जो ओडे थे कह्या, “यो भी तो यीशु नासरी कै गेल्या था।” 72 वो कसम खाकै फेर नाट्या: “मै उस माणस नै कोनी जाण्दा।” 73 माडी बार पाच्छै माणसां नै जो ओडे खडे थे, पतरस कै धोरे आकै उसतै कह्या, “साच्चए तू भी उन म्ह तै एक सै, क्यूँकै तेरी बोल्ली तेरा भेद खोल्लै सै।” 74 फेर वो धिक्कारण अर कसम खाण लाग्या: “मै उस माणस नै कोनी जाण्दा।” जिब्बे मुर्गे नै बाँग देई। 75 जिब पतरस नै यीशु की कही होई बात याद आई “मुर्गे कै बाँग देण तै पैहल्या तीन बर तू मेरा इन्कार करैगा।” अर वो बारणै ज्याकै फूट-फूटकै रोण लाग्या।

27

तड़के ए तड़के सारे प्रधान याजकां अर यहूदी अगुवां नै यीशु ताहीं मारण की सलाह करी। 2 उननै यीशु ताहीं बाँध्या अर ले जाकै पिलातुस राज्यपाल कै हाथां म्ह सौप दिया। 3 जिब उसकै पकड़वाण आळे यहूदा नै अहसास होया के यीशु ताहीं मौत की सजा सुणाई गई सै तो वो पसताया अर वे तीस चाँदी के सिक्के प्रधान याजकां अर यहूदी अगुवां ताहीं बोहडाया 4 अर कह्या, “मन्नै बेकसूर माणस ताहीं मारण कै खात्तर पकड़वाकै पाप करया सै।” उननै कह्या, “हमनै के मतलब? तू ए जाणै।” 5 फेर वो उन सिक्का नै मन्दर के आँगण म्ह बगाकै बाहरणै चल्या गया, अर जाकै अपणे-आप ताहीं फाँसी लगा ली। 6 प्रधान याजकां नै उन सिक्का ताहीं लेकै कह्या, “म्हारे नियम-कायदे इस बात की इजाजत कोनी देंदा के हम इन सिक्क्यां नै मन्दर के खजाने म्ह

धरा, क्यूँकै इसका इस्तमाल किसे ताहीं मारवाण खात्तर करया गया सै, या लहू की किम्मत सै।” 7 आखर म्ह उननै सलाह करकै उन सिक्क्यां तै परदेशियाँ के गाडे जाणकै खात्तर कुम्हार का खेत मोल ले लिया। 8 इस कारण वो खेत आज ताहीं लहू का खेत कुहावै सै। 9 ताके जो वचन यिर्याह नवी कै जरिये कह्या गया था वो पूरा होया: “उन्नै वे तीस सिक्के यानिके उस ठहराए होए मोल ताहीं (जिस ताहीं इस्ताल की ऊलाद म्ह तै कितन्याँ नै ठहराया था) ले लिया, 10 अर जिस तरियां प्रभु नै मेरै ताहीं हुक्म दिया था, उस्से तरियां ए उन्नै कुम्हार के खेत नै खरीदण खात्तर उसका इस्तमाल करया।” 11 जिब यीशु राज्यपाल कै स्याम्ही खड्या था तो राज्यपाल नै उसतै बुझ्याया, “के तू यहूदियाँ का राजा सै?” यीशु नै उसतै कह्या, “तू आप ए कहण लागरया सै।” 12 जिब प्रधान याजक अर यहूदी अगुवे उसपै इल्जाम लावै थे, तो उसनै कुछ जवाब कोनी दिया। 13 इसपै पिलातुस नै उसतै कह्या, “के तू न्ही सुणदा के ये तेरे बिरोध म्ह कितनी गवाही देवै सै?” 14 पर उसनै उस ताहीं एक बात का भी जवाब कोनी दिया, उरै ताहीं के राज्यपाल ताहीं घणी हैरानी होई। 15 राज्यपाल का यो रिवाज था के उस त्यौहार म्ह माणसां कै खात्तर किसे एक कैदी नै जिसनै वे चाहवै थे, रिहा कर देवै था। 16 उस बखत उनकै उरै बरअब्बा नाम का एक मान्या होड कैदी था। 17 आखर जिब वो कहुए होए, तो पिलातुस नै उनतै कह्या, “थम किसनै चाहों सो के मै थारे खात्तर रिहा करैँ? बरअब्बा ताहीं, या यीशु ताहीं जो मसीह कुहावै सै।” 18 क्यूँकै उसनै बेरा था के उनतै उस ताहीं जळण तै पकड़वाया था। 19 जिब वो न्याय की गद्दी पै बेठ्या होया था तो उसकी घरआळी नै उस ताहीं कुहावै भेज्या, “तू उस धर्मी कै मामलै म्ह हाथ ना गेरिये, क्यूँकै मन्नै आज सपनै म्ह उसकै कारण धणा दुख ठाया सै।” 20 प्रधान याजकां अर यहूदी अगुवां नै माणसां ताहीं उकसाया के वे बरअब्बा नै माँग ले, अर यीशु का नाश करावै। 21 राज्यपाल नै उसतै बुझ्याया, “इन दोनुआ म्ह तै किसनै चाहों सो के मै थारे खात्तर छोड दियुँ?” उननै कह्या, “बरअब्बा ताहीं।” 22 पिलातुस नै उनतै कह्या, “फेर यीशु ताहीं, जो मसीह कुहावै सै, के करैँ?” सारया नै उसतै कह्या, “यीशु क्रूस पै चढ़ाया जावै!” 23 हाकिम नै कह्या, “क्यांते, उसनै के बुरा करया सै?” पर वे और भी रुक्के मारण लागे, “वो क्रूस पै चढ़ाया जावै।” 24 जिब पिलातुस नै देख्या के किम्ही न्ही बण पडरया पर उल्टा दंगा बढ़दा जावै सै, तो उसनै पाणी लेकै भीड़ कै स्याम्ही अपणे हाथ थोए अर कह्या, “मै इस धर्मी कै लहू तै बेकसूर सूं: थमे जाओ।” 25 सारे माणसां नै जवाब दिया, “इसकी मौत के जिम्मेदार हम अर म्हारी ऊलाद होवांगे!” 26 इसपै उसनै बरअब्बा ताहीं उनकै खात्तर रिहा कर दिया, अर यीशु कै कोडे लगावकै सौप दिया, के क्रूस पै चढ़ाया जावै। 27 फेर राज्यपाल के सिपाहियाँ नै यीशु ताहीं किले म्ह ले जाकै सारी पलटन उसकै चौगरदे नै कठी करी, 28 अर उसके लते तारकै उस ताहीं लाल रंग का चोग्गा पिहराया, 29 अर काण्डयाँ का ताज गुन्दकै उसकै सिर पै धरया, अर उसकै सोळे हाथां म्ह सरकण्डा दिया अर उसकै आगै गोडे

टेक कै उसका मखौल उड़ाण लागे अर कह्या, “हे यहूदिया परदेस के राजा, नमस्कार!” 30 अर उसपै थुक्या; अर वोए सरकण्डा लेकै उसकै सिर पै मारण लागे। 31 जिब उननै उसका मखौल कर लिया, तो वो चोग्मा उसपै तै तारकै फेर उस्से के लत्ते उस ताहीं पिहराए, अर क्रूस पै चढ़ाण कै खात्तर ले चाल्ले। 32 बाहरण जान्दे होए, उन ताहीं शमौन नाम का एक कुरेनी माणस मिल्या। उननै उस ताहीं बेकार म्ह पकड़या के उसका क्रूस ठाकै ले चाल्लै। 33 उस जगहां पै पोहचे जो “खोपड़ी” यानी इन्हानी भाषा म्ह “गुलगुता” कुहावै सै। 34 उननै सिरका मिल्या होड़ अंगूर का रस उस ताहीं पीण नै दिया, पर उसनै चाखकै पीणा न्ही चाह्या। 35 फेर उननै उस ताहीं क्रूस पै चढ़ाया, अर पर्च्य गेर कै उसके लत्ते बांड लिये, 36 अर ओड़ै बैठकै उसका पैहरा देण लागे। 37 अर उसका दोषपत्र लिखकै उसके सिर पै लगाया, के, “यो यहूदियाँ का राजा यीशु सै।” 38 फेर उसकै गेल्या दो डाकू एक सोली ओड़ अर एक ओली ओड़, क्रूस पै चढ़ाए गए। 39 राह म्ह आण-जाण आळे सिर हलाहलाकै उसकी बेजती कैर थे, 40 अर वे कहवै थे, “हे मन्दर नै ढाण आळे अर तीन दिनां म्ह बणाण आळे, अपणे-आपनै तो बचा! जै तू परमेसवर का बेटा सै, तो क्रूस पै तै उतर आ।” 41 इस्से तरियां तै प्रधान याजक भी शास्त्रियां अर यहूदी अगुवां सुधा मजाक करकै कहवै थे, 42 “इसनै औरां ताहीं बचाया, अर अपणे-आपनै न्ही बचा सकदा। यो तो ‘इसाएल का राजा’ सै। इब क्रूस पै तै उतर आवै तो हम उसपै बिश्वास करां। 43 उसनै परमेसवर पै भरोस्सा राख्या सै; जै वो इसनै चाहवै सै, तो इब इसनै छुड़ा लेवै, क्यूँकै इसनै कह्या था, “मै परमेसवर का बेटा सूं।” 44 इस्से ढाल डाकू भी जो उसकै गेल्या क्रूस पै चढ़ाए गए थे, उसकी बेजती कैर थे। 45 दोफारी तै लेकै तीन बजे ताहीं उस सारे देश म्ह अँधेरा छाया रहया। 46 तीसरे पहर कै लोवै यीशु नै जोर तै बोल्या, “एली, एली, लमा शबक्तनी?” यानिके “हे मेरे परमेसवर, हे मेरे परमेसवर, तनै मेरै ताहीं क्यातै छोड़ दिया?” 47 जो उड़ै खड़े थे, कितन्याँ नै न्यू सुणकै कह्या, “वो तो एलिय्याह ताहीं बुलावै सै।” 48 उन म्ह तै एक जिब्बे भाज्या, अर स्पंज (फोम) लेकै सिरके म्ह ड्योया, अर सरकण्डे पै धरकै उस ताहीं चुसाया। 49 औरां नै कह्या, “रहज्या, देक्खो एलिय्याह उसनै बचाण आवै सै के न्ही।” 50 फेर यीशु नै जोर तै किल्की मारकै जी दे दिया। 51 अर देक्खो, मन्दर का पड़ा उपर तै तळे ताहीं पाटकै दो टुकड़े होया अर धरती काम्बगी चट्टान तड़कगी, 52 अर कब्रे खुलगी, अर मेरे होड़ भोट-से पवित्र माणस जो पैहले मुर्दे थे वे जिन्दा होगे, 53 अर उसकै जिन्दा होण कै पाच्छै वे कब्रां म्ह तै लिकड़कै पवित्र नगर म्ह गए अर घणाए ताहीं दिक्खो। 54 फेर सूबेदार अर जो उसकै गेल्या पैहरा देरे थे, हाल्लण अर जो कुह होया था उस ताहीं देखकै घणे डरगे अर कह्या, “साच्चाए यो परमेसवर का बेटा था।” 55 ओड़ै घणखरी विरबानी जो गलील परदेस तै यीशु की सेवा कर दी होई उसकै गेल्या आई थी, दूर तै देक्ख्यै थी। 56 उन म्ह मरियम मगदलीनी, अर याकूब अर योसेस की माँ मरियम, अर जब्दी के बेट्यां की माँ थी। 57 जिब साँझ होई तो

यूसुफ नामका अरिमतिया गाम का एक साहूकार माणस, जो खुदे यीशु का चेल्ला था। 58 उसनै पिलातुस धोरै जाकै यीशु की लाश माँगी। इस करकै पिलातुस नै यीशु की लाश देण का हुकम दिया। 59 यूसुफ नै यीशु की लाश ली, उस ताहीं थोली चाद्दर म्ह लपेट्या, 60 अर उस ताहीं अपणी नई कब्र म्ह धरया, जो उसनै चट्टान म्ह खुदवाई थी, अर कब्र के बारण पै एक बड़ा पत्थर गिरड़ा कै चल्या गया। 61 मरियम मगदलीनी अर दुसरी मरियम ओड़ै कब्र कै स्याम्ही बेट्टी थी। 62 आगला दिन आराम का दिन था, उस दिन प्रधान याजकां अर फरीसियाँ नै पिलातुस कै धोरै कठुए होकै कह्या, 63 “हे महाराज, म्हरै ताहीं याद सै के उस धोक्खेबाज नै जिब वो जिन्दा था, तो उसनै न्यू कह्या था, ‘मै मरण के तीन दिन पाछै जिन्दा हो जाऊँगा।’” 64 इस करकै हुकम दे के तीसरे दिन ताहीं कब्र की रुखाली सावधानी तै करी जावै, इसा ना हो के उसके चेल्लें आकै उसकी लाश नै चुरा ले जावै, अर माणसां तै कहण लाग्यै, ‘वो मेरे होया म्ह तै जिन्दा होग्या सै।’ फेर पाच्छाला धोक्खा पैहलड़े तै भी बड़ा होगा।” (पैहला धोक्खा के वो खुद नै परमेसवर का बेटा बतावै सै, दुसरा यो के इब वो तीसरे दिन मरे होया मै तै जी उड़ुँगा) 65 “पिलातुस नै उनतै कह्या, ‘थारे धोरै पहरेदार तो सै जाओ, अपणी समझकै मुताबिक कब्र की रुखाली करो।’” 66 आखर वे पैहरेदार नै गैल लैकै ग्ये, अर कब्र के पत्थर पै मोंहर लगाकै कब्र की रुखाली करी।”

28 आराम कै दुसरे दिन पाच्छै, हफ्ते कै पैहलड़े दिन, तड़कै ए तड़कै मगदला कस्बे की मरियम अर दुसरी मरियम कब्र नै देखण आई। 2 अर देक्खो, एक बड़ा हाल्लण आया, क्यूँकै प्रभु का सुर्गदूत सुर्ग तै उतरया अर धोरै आकै उसनै पत्थर ताहीं गिरड़या दिया, अर उसपै बैठया। 3 उसका रूप बिजली बरागा था अर उसके लत्ते पाले की ढाल धोले थे। 4 उसकै डर तै पहरेदार काम्बर्गे, अर मुर्दे की ढाल होग्ये। 5 सुर्गदूत नै बिरबानियाँ ताहीं कह्या, “मतना डरो, मन्नै बेरा सै के थम यीशु नै जो क्रूस पै चढ़ाया गया था, टोहो सो।” 6 वो उरै न्ही सै, पर अपणे वचन कै मुताबिक जिन्दा होग्या सै। आओ, या जगहा देक्खो, जित्त प्रभु राख्या गया था, 7 अर तावळे जाकै उसके चेल्यां ताहीं कहो के वो मेरे होया म्ह तै जिन्दा होग्या सै, अर वो थारे तै पैहल्या गलील परदेस म्ह जावै सै, उड़ै उसका दर्शन पाओगे। देक्खो, मन्नै थारे तै कह दिया।” 8 वे भय अर घणी खुशी कै गेल्या कब्र तै तावली बोहड़कै उसके चेल्यां ताहीं खबर देण नै भाज्जी गई। 9 फेर यीशु उन ताहीं मिल्या। अर कह्या, “सुखी रहो।” उननै धोरै आकै अर उसके पाँ पकड़कै उस ताहीं प्रणाम करया। 10 फेर यीशु नै उनतै कह्या, “मतना डरो; मेरे चेल्यां तै जाकै कहो के गलील परदेस म्ह चले जावै, उड़ै वो मन्नै देख्यो।” 11 जिब वे चेल्यां ताहीं या खबर देण जाण लागरी थी। तो पैहरेदार म्ह तै, जो कब्र की रुखाली करै थे, उन म्ह तै कई धर्याँ नै नगर म्ह आकै सारा हाल प्रधान याजकां तै कह सुणाया। 12 फेर उननै यहूदी अगुवां के गेल्या कठुए होकै सलाह करी अर सिपाहियाँ ताहीं घणाए धन देकै हुकम दिया, 13 “के माणसां तै न्यू कहियो के जिब हम रात नै

सोण लागरे थे, तो उसके चेल्ले आकै उसकी लाश नै चुरा लेगे। 14 जै थारे सोण की खबर राज्यपाल कै कान्नां ताहीं पोहोचैगी, तो हम उसनै समझा लेवैगें अर थमनै जोखिम तै बचा लेवांगें।” 15 आखर उननै रपिये लेकै जिसे सिखाए गये थे, उरसे तरियां ए करया। या बात आज ताहीं यहूदी माणसां म्ह मान्नी जावै सै। 16 ग्यारहां चेल्ले गलील परदेस म्ह उस पहाड़ पै गये, जिस ताहीं यीशु नै उन ताहीं बताया था। 17 उननै उसका दर्शन पाकै उस ताहीं प्रणाम करया, पर कईयाँ नै शक होया के यीशु जिन्दा होग्या सै। 18 यीशु नै उनकै धोरै आकै कह्या, “सुर्ग अर धरती का सारा हक मेरे ताहीं दिया गया सै। 19 इस करकै थम जाओ, सारी जातां के माणसां ताहीं चेल्ला बणाओ; अर उननै पिता, पुत्र अर पवित्र आत्मा कै नाम तै बपतिस्मा द्यो, 20 अर उननै सारी बात जो मनै थोरे ताहीं हुक्म दिया सै, मानना सिखाओ: अर देक्खो मै दुनिया कै अंत तक सदा थारे गैल रहूँगा।” (aiōn g165)

मरकुस

१ यो सुसमाचार यीशु मसीह के बारें म्ह सै। जो परमेसवर का बेटा सै। अर इसकी शरुआत इस तरियां होई २ जिसा के यशायाह नवी की किताब म्ह परमेसवर नै अपणे बेटे ताहीं कह्या सै: “देख, मै अपणे दूत नै तेरे आगै भेज्यू सूं, जो तेरे खात्तर लोगां नै तैयार करैगा। ३ जंगल-बियाबान म्ह एक रुक्का मारणीये का बोल सुणाई देवै सै के प्रभु के आण खात्तर अपणे-आपनै तैयार करो।” ४ वो दूत यूहन्ना था, जो जंगल-बियाबान म्ह कहवै था, “पाप करणा छोड़ द्यो अर बपतिस्मा ल्यो परमेसवर थारे पाप माफ कर देगा।” ५ सारे यूहदिया परदेस के, अर यस्तलेम नगर के सारे बासिन्दे लिकड़कै उसकै धोरे गए, अर अपणे पाणां नै मानकै यरदन नदी म्ह उसतै बपतिस्मा लिया। ६ यूहन्ना ऊँट के रुए के लत्ते पहरे, अर अपणी कड़ म्ह चमड़े की पेटी बाँधे रहवै था, अर टिढ़ियाँ अर शहद खाया करै था। ७ अर न्यू प्रचार करै था, “मेरे पाछै वो आण आळा सै, जो मेरे तै शक्तिशाली सै, मै इस लायक कोनी के झुकैकै उसके जूत्याँ के फित्ते खोल्लूं। ८ मन्त्र तो थारे ताहीं पाणी तै बपतिस्मा दिया सै पर वो थमनै पवित्र आत्मा तै बपतिस्मा देवैगा।” ९ उन दिनां म्ह यीशु नै गलील परदेस कै नासरत नगर तै होके, यरदन नदी म्ह यूहन्ना तै बपतिस्मा लिया। १० अर जिब वो पाणी म्ह तै लिकड़कै उप्पर आया, तो जिब्बे उसनै अकास ताहीं खुल्दे अर पवित्र आत्मा ताहीं कबूतर की तरियां अपणे उप्पर आन्दे देख्या। ११ अर परमेसवर सुर्ग म्ह तै बोल्या, “तू मेरा प्यारा बेटा सै, तेरे तै मै राज्जी सूं।” १२ फेर पवित्र आत्मा नै जिब्बे उस ताहीं जंगल-बियाबान कान्ही भेज्या। १३ जंगल-बियाबान म्ह चालीस दिन ताहीं शैतान उस ताहीं परखता रह्या, अर वो जंगल-बियाबान म्ह पशुओं कै गेल्या रह्या, अर सुर्गदूत उसकी सेवा करदे रहे। १४ यूहन्ना कै पकड़े जाणकै कुछ बखत पाछै, यीशु नै गलील परदेस म्ह आकै परमेसवर कै राज्य का सुसमाचार प्रचार करया, १५ अर कह्या, “बखत पूरा होया सै, अर परमेसवर का राज्य धोरै आरया सै; पाप करणा छोड़ द्यो, अर परमेसवर के सुसमाचार पै बिश्वास करो।” १६ गलील परदेस म्ह गलील समुन्दर कै किनारे जान्दे होड़, उसनै शमौन अर उसके भाई अन्द्रियास ताहीं समुन्दर म्ह जाळ गेर दे देख्या; क्यूँकै वे मछवारे थे। १७ यीशु नै उनतै कह्या, “मेरे पाछै आओ, मै थमनै माणसां ताहीं कठुे करण आळे बणाऊँगा ताके वो मेरे चेल्लें बणे।” १८ वे जिब्बे जाळां नै छोड़िकै उसके चेल्लें बणण खात्तर उसकै पाच्छै हो लिये। १९ थोड़ा आगै चालकै, उसनै जब्दी के बेटे याकूब अर उसकै भाई यूहन्ना ताहीं, किस्ती पै जाळां ताहीं ठीक करदे देख्या। २० उसनै जिब्बे उन ताहीं बुलाया; अर वे अपणे पिता जब्दी ताहीं मजदूरां कै गेल्या किस्ती पै छोड़िकै, उसके चेल्लें बणण खात्तर उसकै पाच्छै हो लिये। २१ जिब यीशु अर उसके चेल्लें कफरनहूम नगर म्ह आए, अर वो जिब्बे आराम कै दिन आराधनालय म्ह जाकै उपदेश देणे लाग्या। २२ अर माणस उसके उपदेश तै हैरान होगे; क्यूँकै वो उननै शास्त्रियाँ की ढाळ न्ही, पर

अधिकार तै उपदेश देवै था। २३ उस्से बखत, उनकै आराधनालय म्ह एक माणस था, जिसम्ह ओपरी आत्मा थी। २४ उसनै रुक्का मारकै कह्या, “हे नासरत के यीशु, हमनै तेरे तै के काम? के तू म्हारा नाश करण नै आया सै? मै तन्नै जांगु सूं, तू कौण सै? तू परमेसवर की ओङ तै भेज्या होया पवित्र मसीह सै!” २५ यीशु नै उसतै धमकाकै कह्या, “चुपचाप रहै, अर इस माणस म्ह तै लिकड़ जा।” २६ फेर ओपरी आत्मा ऊँच्ची आवाज म्ह किल्की मारकै उस म्ह तै लिकड़ी। २७ इस बात पै सारे माणस अचम्भा करदे होए आप्स म्ह बहस करण लाग्ये, “या के बात सै? यो तो कोै नया-ए उपदेश सै! वो हक कै गेल्या ओपरी आत्मायाँ नै भी हुक्म देवै सै, अर वे उसका हुक्म मान्नै सै।” २८ अर उसका नाम जिब्बे गलील के पूरे परदेस म्ह हरेक जगहां फैलाया। २९ यीशु अर उसके सारे चेल्लें जिब्बे आराधनालय म्ह तै लिकड़कै, याकूब अर यूहन्ना कै गेल्या शमौन अर अन्द्रियास कै घरां आये। ३० शमौन की सास्सू कै बुखार चढ़रया था, अर उसके चेल्लां नै जिब्बे उसकै बाबत यीशु ताहीं बताया। ३१ फेर यीशु नै धोरै जाकै उसका हाथ पकड़कै उस ताहीं ठाया, अर उसका बुखार उतर ग्या, अर वा उनकी सेवा-पाणी करण लाग्मी। ३२ साँझ कै बखत जिब सूरज डूबाया तो माणस सारे बिमारां ताहीं अर उननै, जीनम्ह ओपरी आत्मा थी, यीशु कै धोरै ल्याए। ३३ अर साब्ता नगर दरबाजे पै कठुा होया। ३४ उसनै घणखरयां ताहीं जो कई ढाळ की बिमारियाँ तै दुखी थे, ठीक करया, घणखरी ओपरी आत्मायाँ ताहीं काढ्या, अर ओपरी आत्मायाँ ताहीं बोल्लण कोनी दिया, क्यूँकै वे उसनै पिच्छाणै थी, के यीशु परमेसवर की ओङ तै भेज्या होया मसीह सै। ३५ तड़कै दिन लिकड़ण तै पैहल्या, यीशु शमौन के घर तै उठकै लिकड़या, अर एक बियाबान जगहां म्ह गया अर उड़े प्रार्थना करण लाग्या। ३६ फेर शमौन अर उसके साथी उसकी ठोड़ म्ह गए। ३७ जिब वो मिल्या, तो उस ताहीं कह्या, “सारे नगर के माणस तन्नै ठोहवै सै।” ३८ उसनै उनतै कह्या, “आओ; हम और किते लोवै-धोवै की बस्तियों म्ह जावां, के मै उड़े भी प्रचार करूँ, क्यूँकै मै इसे खात्तर आया सूं।” ३९ अर वो सारे गलील परदेस म्ह उनके आराधनालयाँ म्ह जाजाकै उन ताहीं उपदेश सुणान्दा अर ओपरी आत्मायाँ ताहीं लिकाड़दा रह्या। ४० एक कोढ़ी उसकै धोरै आया, उसतै बिनती करी, अर उसकै आगै गोड़े टेककै उस ताहीं कह्या, “जै तू चाहवै तो मन्नै ठीक कर सकै सै।” ४१ उसनै उसपै तरस खाकै हाथ बढ़ाकै, अर उस ताहीं छू कै कह्या, “मै चाहूँ सूं के तू इस बीमारी तै ठीक हो ज्या।” ४२ अर जिब्बे उसका कोढ़ा जान्दा रह्या, अर वो ठीक होग्या। ४३ फेर उसनै उस ताहीं चेतावनी देकै जिब्बे बिदा करया, ४४ अर उसतै कह्या, “लखा, किसे तै कुछ मतना कहिये, पर जाकै अपणे-आपनै याजक ताहीं दिखा, अर अपणे कोढ़ तै ठीक होण कै बारे म्ह जो कुछ मूसा नबी नै जो पवित्र ग्रन्थ म्ह चढ़ावा बताया सै उसनै चढ़ा, के माणसां खात्तर या गवाही हो, के तू ठीक होग्या सै।” ४५ पर वो बाहरणै जाकै इस बात का घणा प्रचार करण अर याडै ताहीं फैलाण लाग्या के यीशु दुबारै सरेआम नगर म्ह

कोनी जा सक्या, पर बाहरपै सुनसान स्थानां म्ह रह्या, अर चौगरदे तै माणस उसकै धोरै आन्दे रहे।

2 थोडे दिनां पाच्छे यीशु फेर कफरनहूम नगर म्ह आया, अर माणसां नै

सुण्या के वो घर म्ह सै। 2 फेर इतने माणस कठे होए के दरबाजे धोरै भी जगहां कोनी थी, अर वो उननै परमेसवर के वचन सुणाण लागरया था। 3 अर चार माणस एक लकवे के मरीज ताहीं बिस्तर पै लिटाकै उसकै धोरै ल्याए। 4 पर जिब वे भीड कै कारण उसकै धोरै कोनी पोहच सके, तो उननै उस छात ताहीं जिसकै तलै यीशु था, खोल दिया; तो उस बिस्तर समेत जिसपै वो लकवे का मरीज लेट्या था, नीच्ये उतार दिया।

5 यीशु नै उनका विश्वास देखकै उस लकवे के मरीज ताहीं कह्या, “हे बेटे, मन्नै तेरे पाप माफ कर दिये।” 6 फेर घणे शास्त्री जो उडे बेठे थे, अपणे-अपणे मन म्ह सोच्यण लागे, 7 “यो माणस न्यू क्यांतै कहवै सै? यो तो परमेसवर की बुराई करै सै! परमेसवर नै छोडकै और कौण पाप माफ कर सकै सै?” 8 यीशु नै जिब्बे अपणे मन म्ह जाण लिया के वे अपणे-अपणे मन म्ह इसा विचार क्यांतै करण लागरे सै? अर उनतै कह्या, “थम अपणे-अपणे मन म्ह यो विचार क्यूँ करण लागरे सो? 9 आसान के सै? के लकवे के मरीज ताहीं यो कहणा के तेरे पाप माफ होए, या फेर यो कहणा के उठ अपणा बिस्तर ठाकै हाँड-फिर? 10 पर जिसतै थम जाण ल्यो के मुझ माणस कै बेटे नै धरती पै पाप माफ करण का भी हक सै!” उसनै उस लकवे कै मरीज ताहीं कह्या, 11 “मै तेरे तै कहूँ सूँ, उठ, अपणे बिस्तर ठाकै अपणे घरां चल्या जा।” 12 वो उठ्या अर जिब्बे बिस्तर ठाकै उसकै स्याही तै लिकड्याः इसपै सारे हेरान होगे, अर परमेसवर की बड़ाई करकै कहण लागे, “हमनै इसा पैहल्या कदे कोनी देख्या।” 13 यीशु दुबारा लिकडकै गलील समुन्दर कै किनरे गया, अर सारी भीड उसकै धोरै आई, अर वो उननै उपदेश देण लाया।

14 जान्दे होए उसनै हलफई के बेटे लेवी जिसका नाम मत्ती था, चुंगी की चौकी पै बेठे देख्या, अर उसतै कह्या, “मेरा चेल्ला बाणण खात्तर मैरे पाच्छे हो ले।” अर वो उठकै उसकै पाच्छे हो लिया। 15 जिब वो मत्ती के घर म्ह खाणा खाण बेठ्या, तो घणेए चुंगी लेण आळे अर जिननै लोग पापी कहवै थे, यीशु अर उसकै चेल्यां गेल्या खाणा खाण बेठे; क्यूँकै वे घणे सारे थे, अर उसकै साथ हो लिए थे। 16 शास्त्रियां अर फरीसियां नै न्यू देखकै के वो तो पापी अर चुंगी लेण आळा गेल्या खाणा खावै सै, उसकै चेल्यां ताहीं कह्या, “वो तो चुंगी लेण आळे अर जिननै लोग पापी कहवै सै, उनकै गेल्या खावै-पीवै सै।” 17 यीशु नै या सुणकै उनतै कह्या, “आच्छे-बिच्छ्यां नै वैट की जरूरत कोनी, पर बिमारां नै सै: जो अपणे-आपनै धर्मी कहवै सै, मै उननै न्ही, पर जो अपणे-आपनै पापी कहवै सै उननै बुलाण आया सूँ।” 18 यूहन्ना के चेल्ले, अर फरीसी ब्रत करया करै थे, तो उननै आकै उसतै कह्या, “यूहन्ना के चेल्ले अर फरीसियां के चेल्ले ब्रत क्यांतै करै सै, पर तेरे चेल्ले ब्रत न्ही राख्यदे?” 19 यीशु नै उनतै कह्या, “जिब ताहीं बन्दङा बरातियां कै गेल्या सै, के वे ब्रत राख सकै सै? आखर जिब ताहीं बन्दङा उनकै गेल्या सै, जद ताहीं

वे ब्रत कोनी कर सकदे। 20 पर वे दिन भी आवैंगें जिब बन्दङा उनतै न्यारा करया जावैगा; उस बखत वे ब्रत करैंगे। 21 “नये लत्यां की थेगळी पुराणे लत्यां पै कोए न्ही लगान्दा, न्ही तो वा थेगळी उस म्ह तै खुस्का लेवैगी, यानिके नया, पुराणे तै, अर वो पैहल्या तै थणा पाट जावैगा। 22 नये अंगूर के रस ताहीं पुराणी मशकां म्ह कोए कोनी राख्या, न्ही तो अंगूर का रस मशकां नै पाड़ देवैगा, अर अंगूर का रस अर मशक दोनुआ का नाश हो जावैगा, पर नया अंगूर का रस नई मशकां म्ह भरया जावै सै।” 23 न्यू होया के आराम कै दिन यीशु चेल्यां कै गैल खेत्तां म्ह तै होकै जाण लागरया था, अर उसके चेल्ले चाल्दे होए गेहूँ की बाल तोड़ण लागे। 24 तो फरीसियां नै उस ताहीं कह्या, “देख, ये आराम कै दिन वो काम क्यांतै करै सै? जो नियम-कायदा कै खिलाफ सै।” 25 यीशु नै उनतै कह्या, “के थमनै पवित्र ग्रन्थ म्ह यो न्ही पढ्या के जिब म्हारे पूर्वज दाऊद नै जरूरत होई, अर जिब वो अर उसके साथी भूक्खे होए, फेर उसनै के करया था? 26 उसनै किस ढाळ अबियातार महायाजक कै बखत, परमेसवर कै घर म्ह जाकै भेंट की रोट्टी खाई, जिनका खाणा याजकां नै छोड और किसे कै खात्तर खाणा ठीक कोनी, अर अपणे साथियां ताहीं भी दी?” 27 फेर उसनै उन ताहीं कह्या, “आराम का दिन माणस खात्तर बणाया गया सै, ना के माणस आराम कै दिन के खात्तर। 28 इस करकै मै माणस का बेट्या आराम कै दिन का भी मालिलक सूँ।”

3 यीशु फेर आराम कै दिन आराधनालय म्ह गया; उडे एक माणस था

जिसका हाथ सूखरया था, 2 अर फरीसी यीशु पै दोष लाण खात्तर उसकी ठाह म्ह थे के देक्खै, वो आराम कै दिन उसनै ठीक करै सै के न्ही। 3 उसनै सूखे हाथ आळे माणस तै कह्या, “बीच म्ह खड्या होज्या” 4 अर उनतै कह्या, “के मूसा के नियम-कायदा कै मुताबिक आराम कै दिन भला करणा ठीक सै या बुगा करणा, जान बचाणा या मारणा?” पर वे बोल-बाल्ले रहे। 5 फेर उसनै उनकै मन की कठोरता तै काल होकै, उन ताहीं छो तै चोगरदेन देख्या, अर उस माणस ताहीं कह्या, “अपणा हाथ बढा।” 6 उसनै बढाया, अर उसका हाथ ठीक हो गया। 6 फेर फरीसी बाहरहै जाकै जिब्बे हेरोदेस राजा के समर्थकां कै गेल्या उसकै बिरोध म्ह सलाह करण लागे के उसका नाश किस तरियां करया जावै। 7 यीशु अपणे चेल्यां गेल्या गलील समुन्दर कान्ही चल्या गया: अर गलील तै एक बड़ी भीड उसकै पाच्छे हो ली; 8 अर यूहदिया नगर, अर यस्तेलेम नगर, अर इदूमिया परदेस, अर यरदन नदी के परली ओड, अर सूर अर सैदा नगर के लोवै-धोवै तै एक बड़ी भीड न्यू सुणकै के वो किसे आच्मे आळे काम करै सै, उसनै देक्खण आई। 9 यीशु नै अपणे चेल्यां तै कह्या, “भीड की बजह तै एक छोट्टी किस्ती मैरे खात्तर त्यार राखियों ताकै वे मन्नै दाव न्ही सके।” 10 क्यूँकै उसनै घणखरयां ताहीं ठीक करया था, इस करकै जितने माणस बीमार थे, उस ताहीं छूण खात्तर उसपै पड़ण लागरे थे। 11 जिन म्ह ओपरी आत्मा भी जिब उस ताहीं देक्खै थी, तो उसकै स्याही गिर ज्या थी, अर किल्की मारकै कहवै थी, तू परमेसवर का बेट्या सै। 12 अर उसनै ओपरी आत्मायाँ

ताहीं चेतावनी देके कह्या के मेरै बारै म्ह किसे तै ना कहियो के मै कौण सूं। 13 फेर यीशु पहाड़ पै चढ़ग्या, अर जिन नै वो चाहवै था उन ताहीं अपणे धोरै बुलाया; अर वे उसकै धोरै आए। 14 फेर उसनै उन म्ह तै बारहा चेल्यां ताहीं नियुक्त करया के वे उसकै गेल्या-गेल्या रहवै, अर वो उननै भेज्जै के वे प्रचार करै, 15 अर ओपरी आत्मा ताहीं काढणा का हक राक्खै। 16 वे बारहा चेल्ले ये सै: “शमौन जिसका नाम उसनै पतरस धरया, 17 अर जब्बी का बेट्टा याकूब अर याकूब का भाई यूहन्ना, जिसका नाम उसनै बुअनरगिस यानिके ‘गरजन का बेट्टा’ धरया।” 18 अर अन्द्रियास, अर फिलिप्पुस, अर बरतुल्मै, अर मत्ती, अर थोमा, अर हलफई का बेट्टा याकूब, अर तदै, अर शमौन कनानी, 19 अर यहूदा इस्करियोती जिसनै उस ताहीं पकड़वा भी दिया था। 20 फेर यीशु धरां आया; अर इसी भीड़ कठी होइ, के यीशु अर उसके चेल्यां पै रेट्टी भी कोनी खाई गई। 21 जिब उसके कुण्बा आळा न्यू सुण्या, तो वे उस ताहीं धरां ले जाण खात्तर लिकड़े: क्यूँके वे कहवै थे, “के उसका दिमाग ठिकाणै कोनी सै” 22 शास्त्री भी जो यस्शलेम नगर तै आये थे, वे कहवै थे, “उस म्ह शैतान सै,” अर न्यू भी के “वो ओपरी आत्मायाँ नै लिकाड़ै सै।” 23 ज्यातै यीशु उननै धोरै बुलाकै उदाहरणां म्ह कहण लाग्या, “शैतान क्यूँकर ओपरी आत्मायाँ नै काढ सकै सै?” 24 जै किसे राज्य म्ह फूट पड़े, तो वो राज्य किस तरियां टिक्या रह सकै सै? 25 अर जै किसे घर म्ह फूट पड़े, तो वो घर क्यूँकर डट्या रह सकैगा? 26 इस करकै जै शैतान खुद का ए बिरोधी होकै अपणे म्ह फूट गेरै, तो वो किस तरियां बण्या रहै सकै सै? उसका तो नाश हो जावै सै। 27 “पर कोए माणस किसे ठाहै माणस कै घर म्ह बड़कै उसका माल कोनी लूट सकदा, जिब तक के पैहल्या उस ठाहै माणस ताहीं ना जुड़ ले; जिब वो उसके घर नै लूट लेवैगा। 28 मै थमनै साच्ची-साच कहूँ सूं के माणसां के सारे पाप अर बुराई जो वे करै सै, माफ करे जावैगे, 29 पर जो कोए पवित्र आत्मा कै बिरोध म्ह बुराई करै सै, वो करे माफ कोनी करया जावैगा: बल्के वो अनन्त पाप का कसूरावर बण ज्यागा।” (aiōn g165, aiōniōs g166) 30 क्यूँके वे न्यू कहवै थे के उस म्ह ओपरी आत्मा सै। 31 फेर यीशु की माँ अर उसके भाई आए, अर बाहरणै खड़े होकै उस ताहीं बुलावा भेज्या। 32 भीड़ उसकै लोवै-धोवै बेट्टी थी, अर उननै उसतै कह्या, “देख, तेरी माँ अर तेरे भाई बाहरणै तन्नै टोहवै सै।” 33 यीशु नै उनतै जवाब दिया, “मेरी माँ अर मेरे भाई कौण सै?” 34 अर जो उसकै लोवै-धोवै बेट्टे थे, उनपै निगांह करकै कह्या, “देक्खों, मेरी माँ अर मेरे भाई ये सै। 35 क्यूँके जो कोए परमेसवर की इच्छा पै चाल्लै, वोए मेरा भाई, मेरी बेब्बे, अर मेरी माँ सै।”

4 यीशु फेर गलील समुन्दर कै किनारे उपदेश देण लाग्या: अर इसी बड़ी भीड़ उसकै धोरै कठी होगी के वो समुन्दर म्ह एक किस्ती पै चढ़कै बैठग्या, अर सारी भीड़ जमीन पै समुन्दर कै किनारे खड़ी रही। 2 अर वो उननै उदाहरणां म्ह घण्णीए बात सिखाण लाग्या, अर

अपणे उपदेश म्ह उन ताहीं कह्या, 3 “सुणो! एक किसान बीज बोण लिकड्या। 4 बोदे बखत कुछ राही कै किनारे पड़े, अर पंछियाँ नै आकै उन ताहीं चुग लिया। 5 कुछ पथरीली धरती पै पड़े जड़ै उसनै घणी माटी ना मिली, अर ढुंगी माटी ना मिलण कै कारण तोलाए उग्या, 6 अर जिब सूरज लिकड्या तो जल्गो, अर जड़ ना पकड़ण कै कारण सुख्गो। 7 कुछ झाड़ियाँ म्ह पड़े, अर झाड़ियाँ नै आग्गे बढ़कै उन ताहीं दाब दिया, अर वो फळ कोनी त्याये। 8 पर कुछ आच्छी धरती पै पड़े, अर वो उग्या अर बढ़कै फळ ल्याये; अर कोए तीस गुणा, कोए साठ गुणा अर कोए सौ गुणा फळ ल्याये।” 9 फेर उसनै कह्या, “जिसके कान हों, वो ध्यान तै सुण ले।” 10 जिब यीशु एकत्ता रहग्या, तो उसके साथियाँ नै उन बारहां चेल्यां सुधा उसतै इन उदाहरणां कै बारै म्ह बुझ्याया। 11 उसनै उनतै कह्या, “थारे ताहीं तो परमेसवर कै राज्य कै भेद की समझ दे राक्खी सै, पर बाहर आळा खात्तर सारी बात उदाहरणां म्ह होवै सै।” 12 इस करकै के “वे देखदे होए देक्खै पर उननै दिखाई ना देवै अर सुणदे होए सुणी भी पर ना समझै; इसा ना हो के वे पाप करणा छाड़दे, अर वे माफ करे जावै।” 13 फेर यीशु नै उनतै कह्या, “के थम यो उदाहरण कोनी समझै? तो फेर और सारे उदाहरणां नै किस तरियां समझोगे? 14 किसान जो बीज बोण आळा सै वो वचन बोण आळे कै समान सै। 15 राही कै किनारे गिरे बीज उन माणसां की तरियां सै जो वचन सुणै सै, तो शैतान जिब्बे आकै वचन नै जो उन म्ह बोया गया था, ठा ले जावै सै। 16 उससे तरियां-ए जो पथरीली धरती पै बीज गिरे सै, ये वे सै जो वचन सुणकै जिब्बे खुश होकै अपणा लेवैं सै। 17 पर उनकै भीत्तर जड़ न्ही पकड़ण कै कारण थोड़े-से दिनां कै खात्तर रहै सै, इसके बाद जिब वचन कै कारण उनपै कल्शे या संकट आवै सै, तो वे जिब्बे ठोककर खा जावै सै। 18 जो झाड़ियाँ म्ह बीज गिरे ये वे सै जिन नै वचन सुण्या, 19 अर दुनिया की फिक्र, अर धन का धोक्खा, अर दुसरी विज्ञां का लालच म्ह पड़कै वचन नै दाब देवै सै अर वो फळदा कोनी। (aiōn g165) 20 अर जो आच्छी धरती पै बीज गिरे, ये वे सै जो वचन सुणकै अपणा लेवैं सै अर फळ ल्यावै सै, कोए तीस गुणा, कोए साठ गुणा अर कोए सौ गुणा।” 21 यीशु नै उनतै एक और उदाहरण दिया, “के दीवै नै इस खात्तर कोनी जलान्दे, के उसनै बरतन या खाट कै तत्त्वे धर देवै? पर इस खात्तर के टांडी पै धरया जावै? 22 इसा कुछ भी न्ही जो लुक्या हो, अर खोल्या न्ही जावैगा अर ना कुछ गुप्त सै, जिसके बारें म्ह बेरा ना लाग्यै। 23 जै किसे के कान हों, तो ध्यान तै सुण ले।” 24 फेर उसनै उनतै कह्या, “चौकस रहियो की के सुणो सो। जिस नाप तै थम नाप्यो सौं उससे नाप तै थारे खात्तर भी नाप्या जावैगा। अर थारे ताहीं घणा दिया जावैगा। 25 क्यूँके जिसकै धोरै सै, उस ताहीं दिया जावैगा, अर जिसकै धोरै न्ही सै, उसतै वो भी जो उसकै धोरै सै, ले लिया जावैगा।” 26 फेर यीशु नै उन ताहीं एक और उदाहरण दिया, “परमेसवर का राज्य इसा सै, जिसा कोए माणस धरती पै बीज छिड़कै सै, 27 अर रात नै सोग्या अर सबेरै जाग ग्या, अर वो बीज इसा उगै अर बधै सै के उसनै बेराए कोनी

लाग्या। 28 धरती खुद-बै-खुद फल लावै सै, पैहल्या अंकुर, फेर बाल, अर फेर बाल म्ह त्यार दाणा। 29 पर जिब दाणा पक जावै सै, फेर वो जिब्बे दांती लावै सै, क्यूँके लामणी का बखत आण पोहचा सै!” 30 फेर यीशु नै उन ताहीं एक और उदाहरण दिया, “हम परमेसवर के राज्य की बराबरी किसतै करां अर किस उदाहरण तै उसका खुलासा करां? 31 वो राई के दाणे की ढाळ सै: जिब धरती म्ह बोया जावै सै तो धरती कै सारे बीज्जां तै छोट्टा होवै सै, 32 पर जिब बोया गया, तो जामकै सारे सागपात तै बड़ा होवै सै, अर उसकी इतनी बड़ी डाळी लिकडै सै के अकास के पंछी उसकी छाया तळै बसेरा कर सकै सै।” 33 यीशु उन ताहीं इस तरियां कै घणे उदाहरण दे-दैके उनकी समझकै मुताबिक वचन सुणावै था, 34 अर इस तरियां की शिक्षा देण खातर वो उदाहरणां का ए इस्तमाल कराया करदा; पर एकले म्ह वो अपणे चेल्यां ताहीं सारी बातों का मतलब बतावै था। 35 उस्से दिन जिब साँझ होई, तो यीशु नै चेल्यां तै कह्या, “आओ, हम समुन्द्र के परली ओड़ चाल्लां” 36 अर वे भीड़ नै छोड़के जिसा वो था, उसाए उस ताहीं किस्ती पै गेल्या ले चाल्ले; अर उसके गेल्या और भी किस्ती थी। 37 फेर बड़ीए आँधी आई, अर पाणी की झाल किस्ती कै उरे ताहीं लाग्यी के वा पाणी कै भरण नै होगी। 38 पर यीशु पाच्छले हिस्से म्ह गदी लगाई सोण लाग रह्या था। फेर उननै उस ताहीं जगाकै उसतै कह्या, “हे गुरु, के तन्नै चिन्ता कोनी के हम ढूकेके मरण आळे सां?” 39 फेर उसनै उठकै आँधी ताहीं धमकाया, अर पाणी की झाल तै कह्या, “शांत रहै, थम ज्या।” अर आँधी थमी अर पूरी तरियां शान्ति लागी। 40 उसनै उनतै कह्या, “थम क्यूँ डरो सों? के थमनै इब ताहीं बिश्वास कोनी?” 41 वे घणे डरगे, अर आप्स म्ह बोल्ले, “यो कौण सै के आँधी अर पाणी की झाल भी उसका हुक्म मान्नै सै?”

5 यीशु अर उसके चेल्लें गलील समुन्दर कै परली ओड़ गिरासेनियों

कै परदेस म्ह पोहचे, 2 जिब यीशु किस्ती पै तै उत्थाया तो जिब्बे एक माणस जिसम्ह ओपरी आत्मा थी, कव्रिस्तान म्ह तै लिकडैके उसतै मिल्या। 3 वो कव्रिस्तान म्ह रह्या करै था अर कोए उस ताहीं बेल्लां तै भी कोनी जुड़ सकै था, 4 क्यूँके वो घणीए बर बेड़ियाँ अर बेल्लां तै जुड्यां गया था, पर उसनै बेल्लां ताहीं तोड़ दिया था अर बेड़ियाँ के टुकड़े-टुकड़े कर दिये थे, अर कोए उस ताहीं बस म्ह कोनी कर सकै था। 5 वो सारीहाण रात-दिन कव्रिस्तानां अर पहाड़ां म्ह किल्की मारदा अर खुद नै पथथां तै जख्यी करै था। 6 वो यीशु नै दूर तै ए देखकै भाजकै आया, उसके पायां म्ह पड़कै घुटने टेक दिए, 7 अर जोर तै किल्की मारकै कह्या, “हे यीशु, परमप्रधान परमेसवर के बेटे, मनै तेरे तै के काम? मै तन्ने परमेसवर की कसम दियुँ सूं के मन्ने काल ना करै।” 8 क्यूँके उसनै उसतै कह्या था, “हे ओपरी आत्मा, इस माणस म्ह तै लिकड़ आ!” 9 यीशु नै उसतै बुझाया, “तेरा के नाम सै?” उसनै उस ताहीं कह्या, “मेरा नाम सेना सै, क्यूँके हम घणे सां।” 10 अर उसनै यीशु तै घणी बिनती करी, “के हमनै इस परदेस तै बाहरणे ना खन्दावै।”

11 उड़े पहाड़ पै सूअरां का एक बड़ा टोळ चरै था। 12 ओपरी आत्मायाँ नै यीशु तै बिनती करकै कह्या, “हमनै उन सूअरां म्ह भेजदे के हम उनकै भीत्तर समा जावां।” 13 यीशु नै उन ताहीं हुक्म दिया अर ओपरी आत्मा लिकडैके सूअरां कै भीत्तर समागी अर टोळ, जो कोए दो हजार का था, ढाळन पै तै झापटकै गलील समुन्द्र म्ह पड़कै ढूब मरया। 14 उनके पालीयाँ नै जो डरे होए थे, भाजकै कस्बे अर गाम्मां म्ह खबर सुणाई, अर जो होया था, माणस उस ताहीं देक्खण आए। 15 अर यीशु कै धोरै आकै वे उस ताहीं जिसम्ह ओपरी आत्मा थी, यानिके जिस म्ह सेना बड़ी थी, लते पहरे अर सोध्दी म्ह बेटे देख्या। 16 अर देखण आळा नै उसका, जिसम्ह ओपरी आत्मा थी, अर सूअरां का पूरा किस्सा उन ताहीं कह सुणाया। 17 फेर वे उसतै बिनती करकै कहण लागे के म्हारी सीमा तै लिकड़ाया। 18 जिब यीशु किस्ती पै चढ़ान लाग्या, तो वो जिस म्ह पैहल्या ओपरी आत्मा थी, उसतै बिनती करण लाग्या, के “मनै अपणे गेल्या रहण दे。” 19 पर यीशु नै उस ताहीं मंजूरी कोनी देई, अर उसतै बोल्या, “अपणे घरां जाकै अपणे माणसां नै बता, के तेरे पै दिया करकै प्रभु नै तेरे खातर किसे बड़े-बड़े काम करे सै।” 20 वो जाकै दिकापुलिस नगर म्ह इस बात का प्रचार करण लाग्या, के यीशु नै मेरै खातर किस ढाळ के बड़े काम करे; अर जिसनै भी यो सुण्या वे सारे अचम्भा करण लागै। 21 जिब यीशु किस्ती तै दुसरे किनारे पै गया, तो एक बड़ी भीड़ उसकै धोरै कट्ठी होगी; वो गलील समुन्द्र का किनारा था। 22 आराधनालयां कै सरदारां म्ह तै एक याईर नाम का आदमी आया, अर उसनै देखकै उसकै पायां के म्ह पड़ग्या, 23 अर न्यू कहकै उस ताहीं बिनती करी, “मेरी छोट्टी छोरी मरण नै होरी सै: तू आकै उसपै हाथ धरदे, तो वा ठीक होकै जिन्दा हो जावै।” 24 फेर वो उसकै गेल्या चाल्या; अर बड़ी भीड़ उसकै पाच्छै हो ली, याड़े ताहीं के माणस उसपै पड़ण लागरे थे। 25 एक बिरबानी थी, जिसकै बारहा साल तै लहू बहण की बीमारी थी। 26 उसनै घणे डाक्टरां तै ईलाज करवा कै भी बड़ा दुख ठाया, अर उसनै अपणा सारा रपियाँ खर्च कै भी कोए फायदा कोनी होया, पर उसकी बीमारी और भी घणी बढ़गी थी। 27 वा बिरबानी यो सुणकै, यीशु माणसां नै ठीक करै सै भीड़ म्ह उसकै पाच्छै तै आई अर उसकै लते ताहीं छू लिया, 28 अर वा या भी कहवै थी, “जै मै उसकै लते नै छू ल्याँगी, तो ठीक हो जाऊंगी।” 29 अर जिब्बे उसका लहू बहण बन्द हो गया, अर उसनै अपणे देह म्ह बेरा लाग्या के मै उस बीमारी तै चंगी होगी सूं। 30 यीशु नै जिब्बे खुद तै बेरा पाटग्या के मेरै म्ह तै सामर्थ लिकड़ी सै, अर भीड़ कै पाच्छै फिरकै बुझाया, “मेरे लते किसनै छुए?” 31 उसके चेल्यां नै उसतै कह्या, “तू देक्खै सै के भीड़ तेरपै गिरण-पड़ण लागरी सै, अर तू पूछै सै के किसनै मेरै ताहीं छुए?” 32 फेर उसनै उस ताहीं देखण खातर जिसनै यो काम करया था, चोगरदेनै निंगाह घुमाई। 33 फेर वा बिरबानी न्यू जाणकै के मेरी किसी भलाई होई सै, डरगी अर काम्बदी होई आई, अर उसकै पायां म्ह पड़कै उस ताहीं सारा हाल सच-सच कह दिया। 34 यीशु नै उसतै कह्या, “बेटी, तेरे

विश्वास नै तेरे ताहीं ठीक करया सै, खुशी-खुशी जा, अर अपणी इस बीमारी तै ठीक रह।” 35 यीशु न्यू कहवै था के आराधनालय कै सरदार याईर कै घर तै माणसां नै आकै कह्या, “तेरी छोरी तो मर ली सै, इब गुरु नै क्यातै काल करै सै?” 36 जो बात वे कहरे थे, उस ताहीं यीशु नै बेगौरी कर्कै, आराधनालय कै सरदार तै कह्या, “मतना डैरै, सिर्फ विश्वास राख।” 37 अर उसनै पतरस अर याकूब अर उसकै भाई यूहन्ना नै छोड़, किसे दुसरे ताहीं अपणे गेल्या आण ना दिया। 38 आराधनालय कै सरदार कै घर म्ह पोहवकै, उसनै माणसां ताहीं घणे रोन्दे अर किल्की मारदे देख्या। 39 फेर उसनै भीत्तर जाकै उनतै कह्या, “थम क्यातै रोछा मचाओ अर रोओ सो, छोरी मरी कोनी, पर सोवै सै।” 40 वे उसका मजाक उडाण लागे, पर उसनै सारया ताहीं बाहर लिकाइकै छोरी कै माँ-बाप अर अपणे चेल्यां कै गेल्या भीत्तर गया, जित छोरी पड़ी थी। 41 अर छोरी का हाथ पकड़कै उसतै कह्या, “तलिता कूमी!” जिसका मतलब सै, “हे छोरी, मै तेरे तै कहूँ सूँ उठ!” 42 अर वा छोरी जो बारहा साल की थी, जिब्बे उठकै चाललण-फिरण लागी; अर इसपै माणस घणे हैरान होगे। 43 फेर उसनै उन ताहीं चेतावनी देकै हुकम दिया के इस बात का किसे नै भी बेरा ना पाटृण दियो अर कह्या, “इसनै कुछ खाण नै द्यो।”

6 कफरन्हूम नगर तै लिकडकै यीशु अपणे नासरत नगर म्ह आया, अर उसके चेल्लें भी उसकै पाछ्यै गए। 2 आराम कै दिन वो आराधनालय म्ह उपदेश देण लागया, अर घणखेर माणसां नै सुणकै अचम्भा करया अर कहण लागे, “इसनै इतनी बात कँडै तै आगी?” यो कौण सा ज्ञान सै जो उस ताहीं दिया होया सै? किस ढाळ के सामर्थ के काम उसकै हाथां तै दिक्ख्यै सै? 3 के यो वोए खात्ती कोनी, जो मरियम का छोरा, अर याकूब, योसेस, यहूदा, अर शमैन का भाई सै? के उसकी सारी बेब्बे याडै म्हारै बिचाळै कोनी रहन्दी? इस करकै उननै उसका विश्वास कोनी करा। 4 यीशु नै उनतै कह्या, “नबी का अपणे गाम, अपणे कुण्बे, अर अपणे घर नै छोड़कै और किते भी निरादर कोनी होन्दा।” 5 वो उड़े कोए चमत्कार के काम न्ही कर सक्या, सिर्फ थोड़े-से बिमारां पै हाथ धरकै उन ताहीं ठीक करया। 6 अर यीशु नै उनकै अविश्वास पै हैरानी होई अर चौगरदे के गाम्मा म्ह उपदेश सुणान्दा हांडाया। 7 यीशु नै बारहा चेल्यां ताहीं अपणे धोरे बुलाया अर उननै ओपरी आत्मायां पै हक दिया अर उननै दो-दो करकै भेजण लागया; 8 उसनै चेल्यां ताहीं हुकम दिया, “रास्ते खात्तर लाढ़ी नै छोड़ और कुछ ना लियो, ना तो रोटी, ना झोली, ना बटुए म्ह पईसे, 9 जूते तो पैहरियो पर पैहरण खात्तर दो कुड़ते ना लियो।” 10 अर यीशु नै चेल्यां ताहीं कह्या, “जित किते थम जिस घर म्ह जाओ, तो जिब ताहीं उड़े तै बिदा ना होइयो तब तक उससे घर म्ह ठहरे रहो। 11 जिस जगहां के माणस थमनै न्ही अपणावै अर थारी न्ही सुणै, उड़े तै चाल्दे-ए अपणे ताल्यां की थूल झाड़ दियो के या उनकै बिरुद्ध गवाही होवै।” 12 फेर चेल्यां नै जाकै प्रचार करया के पाप

करणा छोड़ द्यो, 13 अर घणीए ओपरी आत्मा ताहीं काढ्या, अर घणे बिमारां पै तेल मळ कै उन ताहीं ठीक करया। 14 राजा हेरोदेस नै भी यीशु का जिक्र सुण्या, क्यूँकै उसका नाम फैलग्या था, अर उसनै कह्या, के “यूहन्ना बपतिस्मा देण आळा मरया होया म्ह तै जिन्दा होया सै, इसरे करकै उसतै ये सामर्थ के काम होवै सै।” 15 दुसरे माणसां नै कह्या, “यो एलिय्याह सै।” पर कुछ दुसरयां नै कह्या, “वो एक नबी सै पुराणे नवियाँ म्ह तै किसे कै बरगा।” 16 हेरोदेस नै न्यू सुणकै कह्या, “जिस यूहन्ना का सिर मनै कटवाया था, वोए जिन्दा होया सै।” 17 हेरोदेस नै अपणे भाई फिलिप्पुस की घरआळी हेरोदियास कै कारण, जिसतै उसनै ब्याह कर लिया था, माणसां ताहीं भेजकै यूहन्ना ताहीं पकड़वाकै जेळ म्ह गेर दिया था। 18 क्यूँकै यूहन्ना नै हेरोदेस तै कह्या था, “अपणे भाई की घरआळी ताहीं राखणा मूसा के नियम-कायदा कै मुताबिक तेरे खात्तर ठीक कोनी।” 19 इस करकै हेरोदियास यूहन्ना तै बैर राख्या करै थी अर वा चाहवै थी के उसनै मरवा देवै, पर इसा हो न्ही सक्या, 20 क्यूँकै हेरोदेस यूहन्ना नै धर्मी अर पवित्र माणस जाणकै उसतै डैरे था, अर उसका बाचाव करै था, अर उसकी बात सुणके घणा घबरावै था, फेर भी उसकी बातां नै आनन्द तै सुणे था। 21 आखिरकार एक इसा मौक्का आया, जिब हेरोदेस नै अपणे जन्म दिन पै अपणे प्रधानां, सेनापतियाँ, अर गलील कै बडे माणसां कै खात्तर जीमणा करया। 22 तो हेरोदियास की बेटी भीत्तर आई, अर नाचकै हेरोदेस ताहीं अर उसकै गेल्या बैठण आळा ताहीं राज्जी करया। फेर राजा नै छोरी तै कह्या, “तू जो चाहवै मैरे तै माँग ले, मै तनै वोए दियुँगा।” 23 हेरोदेस नै कसम खाई, “मै अपणा आधा राज्य तक जो कुछ तू मैरे तै माँगेगी मै तनै दियुँगा।” 24 उसनै बाहरणी जाकै अपणी माँ तै बुझ्या, “मै के माँग्गू?” वा बोल्ली, “यूहन्ना बपतिस्मा देण आळे का सिर।” 25 वा जिब्बे राजा धोरे भीत्तर आई अर उसतै बिनती करी, “मै चाहूँ सूँ के तू इब्बे यूहन्ना बपतिस्मा देण आळे का सिर एक थाळ म्ह मन्नै मँगवा दे।” 26 फेर राजा घणा दुखी होया, पर अपणी कसम कै कारण अर गेल्या बैठण आळा कै कारण उस ताहीं टालणा कोनी चाह्या। 27 आखर म्ह राजा नै जिब्बे एक सिपाही ताहीं हुकम देकै भेज्या के उसका सिर काट ल्यावै। 28 उसनै जेलखान्ने म्ह जाकै उसका सिर काट्या, अर एक थाळ म्ह धरकै ल्याया अर छोरी ताहीं दिया, अर छोरी नै अपणी माँ तै दिया। 29 न्यू सुणकै यूहन्ना के चेल्लें आए, अर उसकी लाश नै लेगे अर कब्र म्ह धर दी। 30 चेल्ले बोहडकै यीशु कै धोरे आये, जो कुछ उननै करया अर सिखाया था, सब कुछ उस ताहीं बता दिया। 31 यीशु नै चेल्यां तै कह्या, “आओ हम किसे एकान्त जगहां म्ह चालकै माडा आराम करां।” क्यूँकै घणे माणस आवै-जावै थे, अर उननै खाण का मौक्का भी कोनी मिलै था। 32 ज्यातै वे किस्ती पै चढ़कै सुनसान जगहां म्ह न्यारे चले गए। 33 घणा नै यीशु अर उसके चेल्यां ताहीं जान्दे देखकै पिछाण लिया, अर सरे नगरां तै कठुं होकै उड़े पांए-पाँ भाज लिए अर उनतै पैहल्या जा पोहचे। 34 उसनै उतरकै बड़ी भीड़ देक्खी, अर उनपै तरस

खाया, क्यूंकि वे उन भेड़या की तरियां थे, जिनका कोए सुखाला ना हो; अर वो उनने घणीए बात सिखाण लागमया। 35 जिब दिन घणा ढलगया, तो उसके चेल्ले उसके धोरे आकै कहण लागे, “या सुनसान जगहां सै, अर दिन घणा ढलगया सै। 36 उनने बिदा करकै चौगरदेकै गाम्मां अर बस्तियाँ म्ह जाकै, अपांगे खाण खात्तर कुछ मोल लियावै।” 37 यीशु नै जबाब दिया, “थमे उनने खाण नै द्यो।” चेल्यां नै उस ताहीं कह्हा, “के हम दो सौ दीनार (200 दिन की मजदूरी) की रोटी मोल ल्यावां, अर उनने खुआवां?” 38 यीशु नै उन ताहीं कह्हा, “जाकै देक्खो थारे धोरे कितनी रोटी सै?” उनने कह्हा, “पाँच रोटी अर दो मच्छी भी।” 39 फेर यीशु नै उन ताहीं हुकम दिया के सारया नै हरी घास पै टोल म्ह बिठा द्यो। 40 वे सौ-सौ अर पचास-पचास करकै टोल म्ह बैठांग। 41 यीशु नै उन पाँच रोटी अर दो मच्छियाँ ताहीं लिया, अर सुर्म कै कान्ही लखाकै परमेसवर का धन्यवाद करया, अर रोटी तोड़-तोड़कै चेल्यां ताहीं देन्दा गया के वे माणसां ताहीं बांडै, अर वे दो मच्छियाँ भी उन सारया म्ह बांड दी। 42 सारे खाकै धापगे, 43 अर उनने टुकड़ा अर मच्छियाँ तै भरी होई बाराह टोकरियाँ ठाई। 44 जिन नै रोटी खाई, वे पाँच हजार आदमी थे। 45 फेर यीशु नै जिब्बे अपणे चेल्यां ताहीं किस्ती पै चढ़ण कै खात्तर मजबूर करया, ताके वे उसतै पैहल्या उस पार बैतसैदा नगर म्ह चले जावै, जिब तक के वो माणसां ताहीं बिदा करै। 46 चेल्यां नै बिदा करकै यीशु पहाई धै प्रार्थना करण खात्तर गया। 47 जिब साँझ होइ, तो किस्ती समुन्दर कै बिचालै थी, अर यीशु एकला किनारे पै था। 48 जिब उसने देख्या के वे किस्ती चलाणा म्ह घणी मेहनत करण लागरे सै, क्यूंकि हवा उनके स्याम्ही की थी, तो सबैरे तीन बजे कै लोवै-धोवै यीशु समुन्दर पै चाल्दे होए उनके धोरे आया; अर उनतै आगै लिकड़ जाणा चाहवै था। 49 पर चेल्यां नै उस ताहीं समुन्दर पै चाल्दे देखकै समझाया के भूत सै, अर किल्की मारण लागे; 50 क्यूंकि सरारे उसनै देखकै घबरागे थे। पर उसनै जिब्बे उनतै बात करी अर कह्हा, “होसला राक्खो, मै सूँ डरो मतना!” 51 फेर वो उनके धोरे किस्ती पै आया, अर हवा थमगी: अर वे घणा अचम्भा करण लागे। 52 चेल्ले उस रोटी की घटना के बारे म्ह कोनी समझै थे, क्यूंकि उनके दिल कठोर होरे थे। 53 वे गलील समुन्दर पार करकै गन्नेसरत परदेस म्ह पोहचे, अर किस्ती घाट पै लाई। 54 जिब यीशु किस्ती पै तै उतरया तो माणसां नै उस ताहीं पिच्छाण लिया, 55 लोवै-धोवै कै सारे नगर म्ह भाज्जे-भाज्जे, अर बिमारां नै खाटांग पै लादकै, जित्त-जित्त खबर मिली के यीशु ओडै सै, तुड़े-उड़े लिए हान्दे। 56 अर जित किंते भी वो गाम्मां, नगरां, या बस्तियाँ म्ह जावै था, माणस बिमारां नै बजारां म्ह धरकै उसतै बिनती करै थे के वो उनने अपणे लत्ते कै पल्ले तै ए छू लेण दे: अर जिनने उसनै छुवै थे, सारे ठीक हो जावै थे।

7 एक दिन कुछ फरीसी अर शास्त्री जो यरुशलेम नगर तै आए थे, यीशु कै धरै कठु होए, 2 अर उननै उसके कुछ चेल्यां ताहीं बिना सुच्चे होए यानिके बिना हाथ धोए रोटी खादे देख्या। 3 क्यूंकि फरीसी अर सारे यहूदी, बड़े बुजुर्गा के रिति-रिवाजां पै चाल्लै सै अर जिब ताहीं

ठीक ढाळ हाथ न्ही धो लेदे जद ताहीं कोनी खान्दे। 4 अर बजार तै आकै, जिब तक के अपणे हाथ न्ही धो लेते, जद ताहीं रोटी कोनी खान्दे; और घणीए बात सै, जो उनके रीति-रिवाजां का हिस्सा सै, जिस तरियां कटोरे, अर लोटै, अर ताम्बे के बरतनां ताहीं थोणा मान्जणा। 5 इस करकै उन फरीसियाँ अर शास्त्रियाँ नै यीशु तै बुझाया, “रेरे चेल्ले क्यातै बड़े बुजुर्गा के रीति-रिवाजां पै कोनी चाल्दे, अर बिना हाथ धोए रोटी खावै सै?” 6 यीशु नै फरीसियाँ अर शास्त्रियाँ ताहीं कह्हा, “यशायाह नवी नै थम कपटियाँ कै बारे म्ह घणी ठीक भविष्यवाणी करी; जिसा लिख्या सै: ‘ये माणस होइंगै तै तो मेरा आदर करै सै पर उनका मन मेरै तै दूर रहवै सै।’ 7 वे खामखां मेरी पूजा करै सै, क्यूंकि माणसां कै हुकमां नै धर्म का उदेश करकै सिखावै सै।” 8 “क्यूंकि थम परमेसवर कै हुकम नै टाळकै माणसां कै रिवाजां ताहीं मान्नो सो।” 9 उसनै उन ताहीं कह्हा, “थम अपणे रिवाजां नै मानण कै खात्तर परमेसवर का हुकम कितनी बढ़िया ढाल टाळ द्यो सो। 10 क्यूंकि मूसा नवी नै कह्हा सै, ‘अपणे माँ-बाप की इज्जत कर’ अर ‘जो कोए अपणे माँ-बाप नै भुंडा बोल्लै, वो जरुर मारया जावै।’ 11 पर थम कहो सो के जै कोए अपणे माँ-बाप तै कहवै, ‘जो कुछ मन्नै थारे ताहीं अपणी सम्पत्ति म्ह तै देणा था, वो मनै परमेसवर ताहीं अर्पण कर दिया।’ 12 तो थम उननै उसके माँ-बाप की कुछ भी सेवा करण न्ही देन्दे। 13 इस तरियां थम अपणी रीति-रिवाजां तै, जिन ताहीं थमनै ठहराया सै, परमेसवर का वचन टाळ द्यो सो; अर इसे-इसे घणखरे काम करो सो।” 14 फेर यीशु नै माणसां ताहीं अपणे धोरे बुलाकै कह्हा, “थम सारे मेरी सुणो, अर समझो। 15 इसी कोए चीज कोनी जो माणस म्ह बाहर तै बड़कै उस ताहीं अशुद्ध करै; पर जो चीज माणस कै भीत्तर तै लिकडै सै, वैए उस ताहीं अशुद्ध करै सै। 16 (जै किसे के कान हो तो वो ध्यान तै सुण ले।)” 17 जिब यीशु भीड़ नै छोड़कै घरां आया, तो उसके चेल्यां नै इस उदाहरण कै बारे म्ह उसतै बुझाया। 18 यीशु नै उनतै कह्हा, “के थम भी इसे नासमझ सो? के थमनै न्ही बेरा के जो चीज बाहर तै माणस कै भीत्तर जावै सै वा उसनै अशुद्ध कोनी कर सकदी? 19 क्यूंकि वा उसके मन म्ह न्ही, पर पेट म्ह जावै सै, अर संदास म्ह लिकड़ जावै सै?” न्यू कहकै उसनै सारी खाणे की विज्ञां ताहीं शुद्ध ठहराया। 20 फेर उसनै कह्हा, “जो माणस म्ह तै लिकडै सै, वोए माणस नै अशुद्ध करै सै। 21 क्यूंकि भीत्तर तै, यानिके माणस कै मन तै, भुन्डे-भुन्डे ख्याल, जारी, चोरी, हत्या, बिगान्नी बिरबान्नी कै धोरे जाणा, 22 लोभ, दुष्टा, छळ, लुचपण, जलन, बुराई, घमण्ड, अर बेअक्ली लिकडै सै। 23 ये सारी भुंडी बात भीत्तर तै ए लिकडै सै अर माणस नै अशुद्ध करै सै।” 24 फेर यीशु ओडै तै उठकै सूर अर सैदा के परदेस म्ह आया; जित्त एक घर म्ह गया अर वो चाहवै था ताके किसे नै उनके बारें म्ह बेरा न्ही लागै, पर वो लुक्क न्ही सकवा। 25 अर जिब्बे एक बिरबान्नी जिसकी छोटी छोरी म्ह ओपरी आत्मा थी, उसका जिक्र सुणकै आई, अर उसके पायां म्ह पड़गी। 26 वा सुरुफिनिकी परदेस के यूनानी जात की थी। बिरबान्नी नै उसतै बिनती

करी के मेरी छोरी म्ह तै ओपरी आत्मा लिकाड़ दे। 27 उसनै उसतै कह्या, “पैहल्या मेरे बच्यों जो यहूदी सै उननै खा लेण दे, क्यूँके बालकां की रोट्टी लेकै कुत्पां कै आगै गेरणा ठीक कोनी” (यहूदी दुसरी जात के माणसां नै कुत्पां कै समान समझै थे) 28 उसनै उस ताहीं जवाब दिया, “साच्ची सै प्रभुः पर कुत्ते भी तो मेज कै तळै बालकां की रोट्टी के टुकड़े खा लेवैं सै।” 29 यीशु नै उसतै कह्या, “तेरी बात सुणकै तेरे बिश्वास का बेरा पाटै सै इस कारण चली जा; ओपरी आत्मा तेरी छोरी म्ह तै लिकड़ग्यी सै।” 30 उसनै अपणे घरां आकै देखा के छोरी खाट पै पड़ी सै, अर ओपरी आत्मा लिकड़ग्यी सै। 31 फेर यीशु सूर अर सैदा के परदेसां तै लिकड़कै दिक्कापुलिस नगर तै होंदा होड़ गलील समन्दर पै पोंहच्या। 32 तो आदमियाँ नै एक बैहरै ताहीं जो हाकला भी था, उसकै धोरै आकै उसतै बिनती करी के अपणा हाथ उसपै धैरै। 33 फेर यीशु उसनै भीड़ तै न्यारा लेग्या, अपणी आनाळी उसकै कान्ना म्ह घाल्ली, अर अपणी आनाळी पै थूककै उसकी जीभ ताहीं छुया; 34 अर सुर्ग कान्ही देखकै आह भरी, अर उसतै कह्या, “इफत्तह!” यानिके “खुल ज्या!” 35 वो सही तरियां सुणण, अर वो सुथरी-ढाळ बोल्लण लाग्या। 36 फेर उसनै उन ताहीं चिताया कह्या के किसे तै ना कहियो; पर जितना यीशु नै उन ताहीं बताया उतनाए वे और प्रचार करण लाग्ये। 37 वे घणे हैरान होकै कहण लाग्ये, “उसनै जो कुछ करया सारा ठीक करया सै; वो बैहरया नै सुणण की, गूंगा नै बोल्लण की ताकत देवै सै।”

8 एक दिन जिब भीड़ कठी होई, अर उनकै धोरै इब कुछ खाण नै कोनी बचा था, तो यीशु नै अपणे चेल्यां ताहीं धोरै बुलाकै उनतै कह्या, 2 “मन्नै इस भीड़ पै तरस आवै सै, क्यूँके ये तीन दिनां तै बराबर मेरै गेल्या सै, अर इब उनकै धोरै कुछ खाण नै भी कोनी बचा। 3 जै मै उननै भूक्खा घरां भेज यु, तो राह म्ह थक हार कै बेहोस हो ज्यांगें; क्यूँके इन म्ह तै कई लोग दूर तै आरे सै।” 4 उसकै चेल्यां नै जवाब दिया, “उरै जंगल-बियाबान म्ह इतनी रोट्टी कोए कितन तै त्यावै के वे छिक्क क्या?” 5 यीशु नै उननै बुझ्याया, “थोरे धोरै कितनी रोट्टी सै?” उननै कह्या, “सात।” 6 फेर उसनै माणसां ताहीं धरती पै बैठण का हुकम दिया, अर वे सात रोट्टी ली अर परमेसवर का धन्यवाद करकै तोड़ी, अर अपणे चेल्यां नै देन्दा गया, अर उननै वे रोटी माणसां कै आगै परोस दी। 7 उनकै धोरै माझी-सी छोट्टी मच्छियाँ भी थीं; उसनै परमेसवर का धन्यवाद करकै उन ताहीं माणसां कै आगै धरण का हुकम दिया। 8 वे खाकै छिक्गे अर चेल्यां नै बचे होड़ टुकड़ा के सात टोकरे भरकै ठाए। 9 अर सारे लोग चार हजार कै करीबन थे; फेर यीशु नै उन ताहीं भेज दिया, 10 अर वो जिबे अपणे चेल्यां कै गेल्या किस्ती म्ह चढ़कै दलमनूता परदेस नै चल्या गया। 11 जब फरीसियाँ नै देखा कै यीशु दलमनूता परदेस म्ह आ ग्या तो वे उसतै बहस करण लाग्ये, अर यो परखण खात्तर के परमेसवर नै यीशु ताहीं भेज्या सै, उसतै कोए सुर्पीय चिन्ह-चमत्कार की माँग करी। 12 यीशु नै अपणी आत्मा म्ह आह भरकै कह्या, “इस बखत के माणस क्यांतै चिन्ह-चमत्कार टोहैं सै? मै थमनै साच्ची-साच कहूँ सूँ

के इस बखत के माणसां नै कोए चिन्ह-चमत्कार कोनी दिया जावैगा।” 13 अर वो उननै छोड़कै फेर किस्ती पै चढ़ग्या अर गलील समन्दर के परली ओड़ चल्या गया। 14 चेल्लें रोट्टी लेणा भूलगे थे, पर किस्ती म्ह उनकै धोरै सिर्फ एक-ए रोट्टी थी। 15 यीशु नै उनकी कपट रुपी शिक्षा के बारें म्ह चिताया, “लखाओ, फरीसियाँ अर हेरोदेस के खमीर तै चौकन्ने रहो।” 16 वे आप्स म्ह विचार करकै कहण लाग्ये, “म्हारै धोरै तो रोट्टी सै कोनी।” 17 न्यू जाऊकै यीशु नै उनतै कह्या, “थम क्यांतै आप्स म्ह यो विचार करे सो के म्हारै धोरै रोट्टी कोनी? के इब ताहीं थम न्ही जाणे अर न्ही समझो? के थारा मन कठोर होग्या सै? 18 के आँख खोते होए भी कोनी देखदे, अर कान होते होए भी कोनी सुणदे? के थारे याद कोनी। 19 के जिब मन्नै पाँच हजार माणसां कै खात्तर पाँच रोट्टी तोड़ी थी तो थमनै बचे होड़ टुकड़ा के कितने टोकरे भरकै ठाए थे, उननै उसतै कह्या, बाराह टोकरे।” 20 “अर जिब चार हजार माणसां कै खात्तर सात रोट्टी थी तो थमनै बचे होड़ टुकड़ा के कितने टोकरे भरकै ठाए थे?” उननै उसतै कह्या, “सात टोकरे।” 21 उसनै उनतै कह्या, “के थम इब ताहीं न्ही समझोदे?” 22 यीशु अर उसकै चेल्लें बैतसैदा कस्बे म्ह आए; अर आदमी एक आन्धे नै उसकै धोरै लियाये अर उसतै बिनती करी के उसनै छुवै। 23 वो उस आन्धे का हाथ पकड़कै गाम तै बाहरण लेग्या, अर अपणी आंगली पै थूककै उसकी आँखां पै हाथ धरते होए उसतै बुझ्याया, “के तु कुछ देक्खै सै?” 24 उसनै निंगांठाकै कह्या, “मै माणसां नै देक्खूँ सूँ: वे मन्नै चाल्दे होए दरखां की ढाळ दिक्खै सै।” 25 फेर उसनै दुबारा उसकी आँखां पै हाथ धरे, अर आन्धे नै ध्यान तै देख्या। वो ठीक होग्या, अर सारा कुछ सुथरी-ढाळ देक्खण लाग्या। 26 उसनै उस ताहीं न्यू कहकै घरां भेज्या, “इस गाम म्ह भी ना जाईये।” 27 यीशु अर उसकै चेल्लें कैसिरिया फिलिप्पी परदेस के गाम्मा म्ह चले गये। राह म्ह उसनै अपणे चेल्यां तै बुझ्याया, “माणस मन्नै के कहवै सै?” 28 उननै जवाब दिया, “यूहन्ना बपतिस्मा देण आला, पर कोए एलियाह अर कोए-कोए तो उसनै पुराणे नवियाँ म्ह तै एक सै कहवै सै।” 29 उसनै उनतै बुझ्याया, “पर थम मन्नै के कहो सो?” पतरस नै जवाब दिया, “तू मसीह सै।” 30 फेर उसनै उन ताहीं समझाकै कह्या के मेरै बारै म्ह यो किसे तै ना कहियो। 31 फेर यीशु चेल्यां नै सिखाण लाग्या के माणस कै बेटे (उसनै अपणे बारें म्ह कह्या था) खात्तर जरूरी सै के वो घणा दुख ठावै, यहूदी अगुवे, प्रधान याजकां, अर शास्त्री उसनै तुच्छ समझाकै मार देवै, अर वो तीसरे दिन म्ह जिन्दा हो जावैगा। 32 उसनै या बात उनतै साफ-साफ कह दी। इसपै पतरस उसनै न्यारा ले जाकै झिङ्कण लाग्या, क्यूँके उसनै सोच्या के मसीह मर न्ही सकदा। 33 पर यीशु नै पलटकै अपणे चेल्यां कान्ही देख्या, अर पतरस तै झिङ्ककै कह्या, “हे शैतान, मेरै स्याम्ही तै दूर हो; क्यूँके तू परमेसवर की बातां पै न्ही, पर माणसां की बातां पै मन लगावै सै।” 34 यीशु नै भीड़ ताहीं अपणे चेल्यां सुधा बुलाकै कह्या, “जो कोए मेरा चेल्ला बणणा चाहवै, वो अपणी ए इच्छा पूरी ना करै बल्के अपणे दुखां का

कृस ठाके, मेरै पाछ्यै हो लेवै। 35 क्यूँके जो कोए अपणी जान बचाणा चाहवै वो अनन्त काल खात्तर गवावैगा, पर जो कोए मेरै अर सुसमाचार खात्तर अपणी जान गवावैगा, वो उसनै अनन्त काल खात्तर बचावैगा। 36 जै माणस सारी दुनिया की चिज्जां नै पा लेवै अर फेर भी अनन्त जीवन नै न्ही पा सकै, तो उसतै के फैयदा होगा? 37 कोए भी माणस अनन्त जीवन की तुलना दुनिया की किसी भी चीज तै न्ही कर सकता? 38 जो कोए इस जार अर पापी युग कै बिचाळै मेरै तै अर मेरे वचन तै इन्कार करैगा, तो मै माणस का बेटा भी जिब पवित्र सुर्पद्वात्म के गेल्या अपणे पिता की महिमा सुधा आँँगा, तो मै भी उसतै इन्कार करँगा।”

9 यीशु नै उनतै कह्या, “मै थारे तै साच्ची कहूँ सूं के जो उरे खड़े सै, उन म्ह तै कई इसे माणस सै, के जिब ताहीं परमेसवर के राज्य नै समर्थ सुधा आन्दा होया न्ही देख लेवैंगे, जद तक न्ही मरेंगो।” 2 छ: दिनां पाच्यै यीशु नै पतरस अर याकूब अर यूहन्ना ताहीं गेल्या लिया, अर एकान्त म्ह किसे ऊँच्ये पहाड़ पै लेग्या। ओड़े उनके स्याम्ही उसका रूप बदल ग्या, 3 अर उसके लत्ते इसे चमकण लागे उरै ताहीं जमा धोलाधप होया, के धरती पै कोए धोल्बी भी उसा धोला न्ही लिकाड सकदा। 4 अर उननै मूसा नबी कै गेल्या एलियाह नबी दिख्या; वे यीशु कै गेल्या बात करै थे। 5 इसपै पतरस नै यीशु तै कह्या, “हे गुरु, म्हारा उरै रहणा ठीक सै: इस करकै हम तीन मण्डप बणावा; एक तेरे खात्तर, एक मूसा नबी खात्तर, एक एलियाह नबी खात्तर।” 6 क्यूँके उसनै कोनी बेरा था, के वो के जवाब देवै, ज्यांतै के वे घणे डरगे थे। 7 फेर एक बालद उनपै छाग्या, अर उस बालद म्ह तै परमेसवर नै कह्या, “यो मेरा प्यारा बेटा सै, इसकी सुणो।” 8 फेर उननै चाणचक चौगरदेकै निगांह घुमाई, अर यीशु नै छोड़ अपणे गेल्या और किसे ताहीं कोनी देख्या। 9 पहाड़ तै उतरदी आणी यीशु नै उन ताहीं हुकम दिया के जिब ताहीं मै माणस का बेटा मरे होया म्ह तै जिन्दा न्ही हो जाँँगा, तब तक जो कुछ थमनै देख्या सै वो किसे तै ना कहियो। 10 चेल्यां नै या बात अपणे मन म्ह ए राक्खी, अर आप्पस म्ह बहस करण लागे, के “मेरे होया म्ह तै जी उठण का के मतलब हो सकै सै?” 11 अर उननै उसतै बुझ्याया, “शास्त्री क्यांतै कहवै सै के एलियाह नबी का पैहल्या आणा जरूरी सै?” 12 यीशु नै उन ताहीं जवाब दिया, “यो सच सै एलियाह नबी पैहल्या आकै सारा कुछ सुधरैगा, पर मेरे बारें म्ह पवित्र ग्रन्थ म्ह यो क्यांतै लिख्या सै के वो घणा दुख ठावैगा, अर तुच्छ गिण्या जावैगा? 13 पर मै थमनै कहूँ सूं के एलियाह नबी तो (जो यूहन्ना सै) आ लिया, अर जिसा के उसकै बारें म्ह पवित्र ग्रन्थ म्ह लिख्या सै, उननै जो कुछ चाह्या उसकै गेल्या करया।” 14 यीशु अर उसके तीन चेल्ले दुसरां चेल्यां कै धोरे आये, तो देख्या के उनकै चौगरद नै घणी भीड़ लागरी सै अर शास्त्री उनकै गेल्या बहस कररे सै। 15 यीशु ताहीं देखें ए सारे घणे हैरान होण लागे, अर उननै यीशु कान्ही भाजकै उसतै नमस्कार करया। 16 यीशु नै उनतै बुझ्याया, “थम इनतै के बहस कररे सो?” 17 भीड़ म्ह तै एक नै उसतै जवाब दिया, “हे गुरु, मै अपणे बेटे ताहीं जिसम्ह ओपरी आत्मा सै, जो

उसनै बोल्लण कोनी देती। मै उस ताहीं तेरे धोरे ल्याया था। 18 जित किते ओपरी आत्मा उसनै पकड़ सै, उड़ै पटक देवै सै: अर वो मुँह म्ह तै झाग भर लावै सै, अर दाँत पिसदा, अर सुखदा जावै सै। मन्नै तेरे चेल्यां तै कह्या के वे ओपरी आत्मा नै काढ देवै, पर वे काढ न्ही सके।” 19 न्यू सुणके यीशु नै उनतै जवाब देकै कह्या, “हे अविश्वासी माणसों, मै कद ताहीं थरे गेल्या रहूँगा? अर कद ताहीं थारी सहूँगा? बालक नै मेरै धोरे ल्याओ।” 20 फेर वे बालक नै यीशु कै धोरे लियाये: अर जिब ओपरी आत्मा नै यीशु ताहीं देख्या, तो उस ओपरी आत्मा नै जिब उस ताहीं मरोड़या, अर वो धरती पै पड़या, अर मुँह तै झाग बगान्दे होए लोटूण लाग्या। 21 यीशु नै उसकै पिता तै बुझ्याया, “इसकी या हालत कद तै सै?” उसनै कह्या, “बालकपण तै। 22 उसनै इस ताहीं नाश करण खात्तर कदे आग अर कदे पाणी म्ह गेरया, पर जै तू कुछ कर सकै, तो म्हरै पै तरस खाकै म्हारा भला कर।” 23 यीशु नै उसतै कह्या, “या के बात होई! जै तू कर सकै सै? बिश्वास करण आणा खात्तर सारा कुछ हो सकै सै।” 24 बालक कै पिता नै जिब जोर तै कह्या, “हे प्रभु, मै विश्वास करूँ सूं मेरै अविश्वास का उपाय कर।” 25 जिब यीशु नै देख्या के माणस भाजकै भीड़ लावै सै, तो उस ओपरी आत्मा ताहीं न्यू कहकै धमकाया, “हे गूँगी अर बैहरी करण आणी ओपरी आत्मा, मै तन्नै हुकम दियुँ सूं, उस म्ह तै लिकड़ आ, अर उस म्ह फेर कदे ना बड़ीये।” 26 फेर वा किल्की मारकै अर उस ताहीं घणा मरोड़कै, लिकड़ आईँ; अर बालक मरया होया-सा होग्या, उरै ताहीं के घणे आदमी कहण लागे के वो मरग्या। 27 पर यीशु नै उसका हाथ पकड़कै उस ताहीं ठाया, अर वो खड्या होग्या। 28 जिब वो घरां आया, तो उसके चेल्यां नै एकत्रे म्ह उसतै बुझ्याया, “हम उस ताहीं क्यांतै न्ही काढ सके?” 29 उसनै उनतै कह्या, “या जात, बिना प्रार्थना किसे और उपाय तै कोनी लिकड़ सकदी।” 30 फेर यीशु अर उसके चेल्यां नै ओड़े तै लिकड़कै, गलील परदेस का राह लिया। यीशु न्ही चाहवै था के कोए उननै जाणे, क्यूँके वो अपणे चेल्यां ताहीं सिखाणा चाहवै था 31 यीशु उपदेश देन्द्या अर अपणे बारै म्ह चेल्यां तै कहवै था, मै “माणस का बेटा माणसां के हाथां म्ह पकड़वाया जाऊँगा, अर वे मन्नै मार देवैंगे, अर मै मरण कै तीसरे दिन जिन्दा हो जाऊँगा।” 32 पर या बात उनकी समझ म्ह कोनी आई, अर वे उसतै बुझ्याण तै डरे थे। 33 यीशु अर उसके चेल्ले कफरनहम कस्बे म्ह आये; अर घर म्ह आकै उसनै चेल्यां तै बुझ्याया, “राह म्ह थम किस बात पै बहस कररे थे?” 34 वे बोल-बाल्ले रहे, क्यूँके राह म्ह उननै आप्पस म्ह या बहस करी थी के म्हरै म्ह तै बड़ा कौण सै। 35 फेर यीशु नै बैठकै बारहा चेल्यां ताहीं बुलाया अर उनतै कह्या, “जै कोए बड़ा होणा चाहवै, तो साराया तै छोट्या अर साराया का सेवक बणै।” 36 अर उसनै एक बालक लेकै उनकै बिचाळै खड्या करया अर उस ताहीं गोद्दी म्ह लेकै उन ताहीं कह्या, 37 “जो कोए मेरै नाम तै इसे बालकां म्ह तै किसे एक नै भी अपणावै सै, वो मन्नै अपणावै सै; अर जो कोए मन्नै अपणावै सै, वो मन्नै न्ही, बल्के मेरै भेजण आळे नै अपणावै सै।” 38 यूहन्ना नै

यीशु ताहीं कह्या, “हे गुरु, हमनै एक माणस ताहीं तेरे नाम तै ओपरी आत्मा नै लिकाड़दे देख्या अर हम उसनै मना करण लागे, क्यूँके वो म्हारी तरियां तेरा चेल्ला न्ही था।” 39 उसनै कह्या, “उस ताहीं मना मत करो, क्यूँके इसा कोए न्ही जो मेरै नाम तै अद्भुत काम करै, अर दुसरे पल मेरी बुराई करै 40 क्यूँके जो म्हारै बिरोध म्ह न्ही, वो म्हारै कान्ही सै। 41 जै कोए एक कटोरा पाणी भी थमनै ज्यांतै प्यावै के थम मसीह के सो तो मै थमनै सच कहूँ सूं के वो अपणा ईनाम किसे तरियां भी न्ही खोवैगा।” 42 पर जो कोए इन छोड़ै बाळकां के समान जो मेरै पै विश्वास करै सै, किसे तै भी पाप करवावै तो उसकै खात्तर भला योए सै के एक बड़ी चाक्की का पाट उसकै गळ म्ह लटकाया जावै अर वो समुंदर म्ह गेरया जावै। 43 जै तेरा हाथ तेरे तै पाप करवावै तो उसनै काट दे। दुंडा होके अनन्त जीवन म्ह बड़णा तेरे खात्तर भला सै इसके बजाये के दो हाथ रहंदे होए नरक की आग म्ह गेरया जावै जो कदे न्ही बुझै। (Geenna g1067) 44 (जड़े उनका कीड़ा कोनी मरदा अर आग कोनी बुझदी।) 45 जै तेरा पैर तेरे तै पाप करवावै तो उसनै काट दे। लंगड़ा होके अनन्त जीवन म्ह बड़णा तेरे खात्तर भला सै इसके बजाये के दो पैर रहंदे होए नरक की आग म्ह गेरया जावै। (Geenna g1067) 46 (जड़े उनका कीड़ा कोनी मरदा अर आग कोनी बुझदी।) 47 जै तेरी आँख तेरे तै पाप करवावै तो उसनै लिकाड़ दे। काणा होके परमेसवर कै राज्य म्ह बड़णा तेरे खात्तर भला सै के दो आँख रहंदे होए तू नरक म्ह गेरया जावै। (Geenna g1067) 48 “जड़े उनका कीड़ा कोनी मरदा अर आग कोनी बुझदी।” 49 हेरेक माणस आग तै शुद्ध करया जावैगा, जिस तरियां बलिदान नूण तै शुद्ध करया जावैगा। 50 “नूण एक जरूरत की चीज सै, पर जै नूण का सुवाद जान्दा रहवै तो उसनै किस तरियां नमकीन करोगे? अपणे म्ह नूण जिसा गुण राख्या, अर आप्स म्ह मेल-मिलाप तै रहो।”

10 यीशु ओड़े तै उठके यहूदिया नगर की सीमा नै पार करकै,

यरदन नदी कै परली ओड़ आया। ओड़ उसकै धोरै कठी होपयी, अर अपणी रीत कै मुताबिक उननै दुबारै उपदेश देण लाग्या। 2 फेर फरीसियौं नै यीशु के धोरै आकै उस ताहीं परखण खात्तर उसते बुझद्याया, “के यो ठीक सै के माणस अपणी घरआळी नै छोड़ै?” 3 यीशु नै उनतै पूछ्या, “मूसा नबी नै थारे ताहीं के हुकम दिया सै?” 4 उननै कह्या, “मूसा नबी नै तो तलाकनामा देकै अर छोड़ण का हुकम दिया सै।” 5 यीशु नै उनतै कह्या, “थारे मन की कठोरता कै कारण उसनै थारे खात्तर यो हुकम लिख्या।” 6 “पर सृष्टि की शरुआत तै परमेसवर नै नर अर नारी करकै उन ताहीं बणाया सै। 7 इस कारण माणस अपणे माँ-बाप तै न्यारा होकै अपणी घरआळी गेल्या रहवैगा, 8 अर वे दोन्हु कठे रहवैगे; ज्यांतै के वे इब दो न्ही पर एक तन सै। 9 इस करकै जिस ताहीं परमेसवर नै जोड़या सै उस ताहीं माणस न्यारा ना करै।” 10 जब वे दोबारा घरां आये, तो चेल्यां नै तलाक के बारें म्ह उसते फेर बुझद्याया। 11 यीशु नै उनतै कह्या, “जो कोए अपणी घरआळी नै छोड़के दुसरी तै ब्याह

करै तो वो उस पैहल्डी कै बिरोध म्ह जारी करै सै; 12 अर जै घरआळी अपणे धणी नै छोड़के दुसरे तै ब्याह करै तो वा जारी करै सै।” 13 फेर माणस अपणे बाळकां नै उसकै धोरै ल्याण लागे के वो उनपै हाथ धरै, पर चेल्यां नै उन ताहीं धमकाया। 14 यीशु नै न्यू देख छो म्ह होकै कह्या, “बाळकां नै मेरै धोरै आण थो अर उननै मना मतना करो, क्यूँके परमेसवर का राज्य बाळकां के समान सै। 15 मै थमनै सच कहूँ सूं के जो कोए परमेसवर के राज्य नै बालक की तरियां न्ही अपणावै, वो उस म्ह कदे न्ही बड़ण पावैगा।” 16 अर उसनै उन ताहीं गोद्दी म्ह लिया, अर उनपै हाथ धरकै उन ताहीं आशीर्वाद दिया। 17 जिब यीशु अर उसके चेल्ले यरुशलेम की ओड़ जाण लाग्ये थे, तो एक माणस उसकै धोरै भाज्दा होया आया, अर उसकै आगै चुनै टेक कै उसतै बुझद्याया, “हे उत्तम गुरु, अनन्त जीवन का हकदार होण खात्तर मै के करूँ?” (aiōnios g166) 18 यीशु नै उसतै कह्या, “तू मन्नै उत्तम क्योतै कहवै सै? परमेसवर नै छोड़कै कोए उत्तम कोनी। 19 तनै हुकमां का तो बेराए सै: ‘खून न्ही करणा, जारी न्ही करणा, चोरी न्ही करणा, द्यूम्ही गवाही न्ही देणा, छळ न्ही करणा, अपणे माँ-बाप का आदर करणा।’” 20 उसनै यीशु तै कह्या, “हे गुरु, इन सारया नै मै बालकपण तै मानता आऊँ सूं।” 21 यीशु नै उसपै निगांह करकै उसतै प्याव करया, अर उसतै कह्या, “तेरे म्ह एक बात की कमी सै। जा, जो कुछ तेरा सै उसनै बेचकै कंगलां ताहीं दे, अर तनै सुर्ग म्ह धन मिलैगा, अर आकै मेरा चेल्ला बणण खात्तर मेरै पाच्छै हो ले।” 22 इस बात तै उसकै मुँह पै उदासी छाग्यी, अर वो दुखी होंदा होया चल्या गया, क्यूँके वो धणा साहूकार था। 23 यीशु नै चौगरदेकै देखकै अपणे चेल्यां तै कह्या, “साहूकारां का परमेसवर कै राज्य म्ह दाखल होणा कितना ओक्खा सै।” 24 चेल्ले उसकी बात तै हैरान होए। इसपै यीशु नै उनतै दुबारै कह्या, “हे बालकों, जो धन पै भरोस्सा राक्खै सै, उनकै खात्तर परमेसवर कै राज्य म्ह बड़णा कितना ओक्खा सै! 25 ऊँट का सूर्फै कै छेद म्ह तै लिकड़णा आसान हो सकै सै। पर परमेसवर कै राज्य म्ह साहूकार का बड़णा भोत मुश्किल सै।” 26 वे धणें हैरान होकै आप्स म्ह कहण लागे, “तो फेर किसका उद्धार हो सकै सै?” 27 यीशु नै उनकी ओड़ देखकै कह्या, “माणसां तै तो यो न्ही हो सकदा, पर परमेसवर तै हो सकै सै; क्यूँके परमेसवर खात्तर कुछ भी मुश्किल कोनी।” 28 पतरस उसतै कहण लाग्या, “देख, हम तो सब कुछ छोड़कै तेरे चेल्ले बणगे सा।” 29 यीशु नै कह्या, “मै थमनै सच्ची-साच कहूँ सूं के इसा कोए कोनी, जिसनै मेरै अर मेरै सुसमाचार कै खात्तर धर, भाण-भाई, माँ-बाप, बाल-बच्चे या जमीन-जायदाद ताहीं छोड़ दिया हो, 30 अर इब इस युग म्ह सताव कै बदले म्ह धर, भाण-भाई, माँ-बाप या बाल-बच्चे अर जमीन-जायदाद का सौ गुणा पर आण आळे बखत म्ह अनन्त जीवन पावैगा। (aiōn g165, aiōnios g166) 31 पर धणखेरे जो पैहले सै, पाच्छले होंगे; अर जो पाच्छले सै, वे पैहले होंगे।” 32 वे यरुशलेम नगर म्ह जान्दे होए राह म्ह थे, अर यीशु उनकै आगै-आगै जाण लाग रह्या था: चेल्यां हैरान थे अर जो चेल्यां

कै गैल-गैल चाल्लै थे, वे डरे थे। फेर वो उन बारहां चेल्यां नै न्यारा ले ज्याकै उनतै ये बात कह लाग्या, जो उसकै गेल्या होण आळा था, 33 “देक्खो, हम यरुशलेम नगर म्ह जावां सा, अर मै माणस का बेट्टा प्रधान याजकां अर शास्त्रियाँ कै हाथ्थां पकडवाया जाऊँगा, अर वे मन्नै मारण खात्तर गैर यहूदियाँ कै हाथ्थां म्ह सौपैर्णों। 34 वे मेरा मजाक उड़ावैरे, मेरे पै थूकैर्गे, मेरे कोरडे मारैर्गे अर मन्नै मार देवैर्गे, अर तीसरे दिन मै जिन्दा हो जाऊँगा।” 35 कुछ दिनां बाद जब्दी के दोन्हु बेट्टे याकूब अर यूहन्ना नै यीशु कै थोरै आके कह्या, “हे गुरु, हम चाहवां सां के जो कुछ हम तेरे तै माँगा, वो तू म्हारै खात्तर करै।” 36 यीशु नै उनतै कह्या, “थम के चाहो सो के थरे खात्तर करूँ?”, 37 उननै यीशु तै कह्या, “हमनै यो हक दे, के तेरी माहिमा म्ह म्हारै म्ह तै एक तेरे सोळे अर दुसरा तेरे ओळै कान्ही बेट्टै।” 38 यीशु नै उनतै कह्या, “थम न्ही जाणदे के थम के माँगो सो? अर जो दुख का कटोरा मै पीण पै सूं के थम पी सको सो? अर जो मौत का बपतिस्मा मै लेण पै सूं के थम ले सको सो?” 39 उननै यीशु तै कह्या, “हम कर सका सां।” यीशु नै उनतै कह्या, “जो दुख का कटोरा मै पीण पै सूं थम पी ल्योगे; अर जो बपतिस्मा मै लेण पै सूं उसनै ले भी ल्योगे। 40 पर जिन खात्तर वा जगहां त्यार करी गई सै, उन ताहीं छोड़ और किसे नै अपणी सोळी अर अपणी ओळै बिठाऊ मेरा काम कोनी।” 41 न्यू सुणकै बाकी दस चेल्यां याकूब अर यूहन्ना तै चिड़ोगे। 42 तो यीशु नै उन ताहीं थोरै बुलाकै उनतै कह्या, “थमनै बेरा सै के जो गैर यहूदियाँ के हाकिम समझे जावै सै, वे उनपै राज करै सै; अर उन म्ह जो बडे सै, उनपै हक जमावै सै। 43 पर थरे म्ह इसा न्ही होणा चाहिये, बल्के जो कोए थारे म्ह बड़ा होणा चाहवै वो थारा सेवक बणै, 44 अर जो थरे म्ह प्रधान होणा चाहवै, वो सारया का दास बणै। 45 क्यूँकै मै माणस का बेट्टा ज्यातै कोनी आया के अपणी सेवा-पाणी करवाऊँ, पर ज्यातै आया के खुद सेवा-पाणी करूँ, अर धणखरयां के छुटकारै कै खात्तर अपणी जान देऊँ।” 46 यीशु अर उसके चेल्यें यरुशलेम नगर जाते बखत यरीहो नगर म्ह आये, अर जिब वो अर उसके चेल्यें, अर एक बडी भीड़ यरीहो नगर तै लिकडे जाण लागी थी, तो सङ्क कै किनारे एक आन्धा भिखारी बेळ्या था, जो तिमाई का बेट्टा बरतिमाई था, 47 उसनै न्यू सुणकै के नासरत का यीशु उरै सै, रुक्के मार-मारकै कहण लाग्या, “हे दाऊद की ऊलाद, यीशु मेरै पै दया कर!” 48 घणाए नै उस ताहीं धमकाया के बोल-बाल्ला रह, पर वो और भी रुक्के मारण लाग्या, “हे दाऊद की ऊलाद, मेरै पै दया कर!” 49 फेर यीशु नै ठहकै कह्या, “उस ताहीं बुलाओ।” अर आदमियाँ नै उस आन्धे ताहीं बुलाकै उसतै कह्या, “धीरज धर! उठ! यीशु तन्है बुलावै सै।” 50 वो अपणा चोगा बगाकै तोला उठ्या, अर यीशु कै थोरै आया। 51 इसपै यीशु नै उसतै कह्या, “तू के चाहवै सै के मै तेरे खात्तर करूँ?” आन्धे नै उसतै कह्या, “हे गुरु, यो के मै देक्खण लाग्यू।” 52 यीशु नै उसतै कह्या, “चल्या जा, तेरे बिश्वास नै तेरे ताहीं ठीक करया सै।” वो जिब्बे देखण लाग्या, अर राह म्ह उसकै पाढ़े हो लिया।

11 जिब यीशु अर उसके चेल्यें यरुशलेम नगर कै लोवै, जैतून पहाड़ पै बैतफगे अर बैतनिय्याह गाम कै धोरै आये तो उसनै अपणे चेल्यां म्ह तै दोयां ताहीं न्यू कहकै भेज्या, 2 “स्याम्ही कै गाम म्ह जाओ, अर उस म्ह पोहचदे एक गधी का बच्चा, बन्धया होया थमनै मिलैगा। जिसकी सवारी किसे नै इब ताहीं न्ही करी सै, उसनै खोल ल्याओ। 3 जै थरे तै कोए बुझ्दौ, यो के करो सो? तो कहियो, ‘प्रभु नै इसकी जरूरत सै, अर वो तोला उसनै भेज देवैगा।’” 4 चेल्यां नै जाकै उस गधी के बच्चे ताहीं बाहरणी दरबाजे कै थोरै आँगण म्ह बन्धया होया पाया, अर खोल्लण लाग्ये। 5 उन म्ह तै जो ओड़ै खडे थे, कई कहण लाग्ये, “यो के करो सो, गधी कै बच्चे नै क्यातै खोल्लो सो?” 6 जिसा यीशु नै कह्या था, उस्से तरियां उननै कह दिया; फेर माणसां नै उन ताहीं जाण दिया। 7 चेल्यां नै गधी कै बच्चे ताहीं यीशु कै थोरै ल्याकै उसपै अपणे लत्ते बिछाये अर वो उसपै बैठग्या। 8 फेर धणखरे माणसां नै अपणे लत्ते राह म्ह बिछाये अर आ॒रां नै खेत्ता॑ म्ह तै डालियाँ काटकै फैला दी। 9 जो उसकै आगै-आगै अर पाढ़ै-पाढ़ै चाल्लै थे, रुक्के मार-मारकै कहन्दे जावै थे, “होशाना!” “धन्य सै वो जो प्रभु कै नाम तै आवै सै!” 10 म्हारै पिता दाऊद का राज्य जो आवै सै; “धन्य सै! अकास म्ह होशाना!” 11 यीशु यरुशलेम नगर पोहचकै मन्दर म्ह आया, अर चौगरदे की सारी चिज्जां नै देखकै बाहरां चेल्यां कै गेल्या बैतनिय्याह गाम म्ह गया, क्यूँकै साँझ होण्यी थी। 12 आगले दिन सबैरै जिब यीशु अर उसके चेल्यें बैतनिय्याह गाम तै लिकडे तो यीशु नै भूख लाग्यी। 13 यीशु दूर तै अंजीर का हरा दरखत देखकै उसकै थोरै गया के, के बेरा उस म्ह कुछ पा ज्या: पर पत्त्या नै छोड़कै उस म्ह कुछ न्ही पाया; क्यूँकै फळ लाग्यण का बखत कोनी था। 14 यीशु नै उस दरखत ताहीं देखकै उस ताहीं कह्या, “आज कै पाढ़ै कोए तेरा फळ न्ही खावैगा!” अर उसकै चेल्यें सुणण लाग्ये थे। (ai0n g165) 15 फेर यीशु अर उसके चेल्यें यरुशलेम म्ह आये, अर वो मन्दर म्ह गया; अर ओड़ै जो व्यापार करै थे उननै बाहरणी लिकाडण लाग्या, सर्वफां (पईसा का लेण देण करण आळे) के पीढे अर कबूतर बेचणीयाँ कै चौकियाँ उल्ट दी, 16 अर मन्दर म्ह किसे ताहीं भी व्यापार करण खात्तर आण-जाण कोनी दिया। 17 अर उपदेश देकै उनतै कह्या, “के पवित्र ग्रन्थ म्ह यो न्ही लिख्या सै, के मेरा घर सारी जातां कै खात्तर प्रार्थना का घर कुहावैगा? पर थमनै इस ताहीं डाकुआं की गुफा बणा दी सै।” 18 या घटना सुणकै सारे प्रधान याजक अर शास्त्री लोग उसनै मारण का मौक्का टोह लाग्ये; पर वे भीड़ तै डैरे थे, क्यूँकै सारे माणस उसकै उपदेश तै भोत परभावित होवै थे। 19 अर उस दिन साँझ होन्दे यीशु अर उसके चेल्यें रात काढृण खात्तर यरुशलेम नगर तै बाहरणी चले गये। 20 फेर तड़कैए नै जिब यीशु अर उसके चेल्यें ओड़ै कै जावै थे तो उननै उस अंजीर कै दरखत ताहीं जड़ तै ए सूख्या होया देख्या। 21 पतरस नै वा बात याद आई, अर उसनै उसतै कह्या, “हे गुरु, देख्या यो अंजीर का दरखत जिस ताहीं तन्है श्राप दिया था, वो सूख ग्या सै।” 22 यीशु नै उस ताहीं जावै दिया, “परमेसवर पै

विश्वास राक्खो। 23 मैं थमनै साच्ची कहूँ सूँ के जो कोए इस पहाड़ नै कहवै, ‘तू उखड़ जा, अर समन्दर म्ह जा पड़,’ अर अपणे मन म्ह शक ना कैर, बल्के विश्वास करै के जो कहूँ सूँ वो हो जावैगा, तो उसकै खात्तर वोए होवैगा। 24 ज्यांतै मैं थमनै कहूँ सूँ के जो कुछ थम प्रार्थना करैके माँगो, तो विश्वास कर ल्यो के थमनै मिलाया, अर थारे खात्तर हो जावैगा। 25 अर जिब कदे थम प्रार्थना खात्तर खड़े होओ, तो जै थारे मन म्ह किसे कै बिरोध म्ह कुछ हो, तो उसनै माफ करो: ज्यांतै के थारा सुर्माय पिता भी थारे अपराध माफ करै। 26 अर जै थम माफ ना करो तो थारा पिता भी जो सुर्ग म्ह सै, थारा कसूर माफ कोनी करैगा।” 27 यीशु अर उसके चेल्लें फेर यरुशलेम म्ह आये, अर जिब वो मन्दर म्ह टहलरया था तो सारे प्रधान याजक अर शास्त्री अर यहूदी अगुवें उसकै धोरै आकै बुझाण लागे, 28 “तू ये काम किस हक तै करै सै? अर यो हक तेरे ताहीं किसनै दिया सै के तू ये काम करै?” 29 यीशु नै उनतै कह्या, “मैं भी थारे तै एक बात बुझ्यूँ सूँ: मन्नै जवाब दियो तो मैं थमनै बताऊँगा के ये काम किस हक तै करूँ सूँ। 30 यूहन्ना ताहीं बपतिस्मा देण का हक परमेसवर की ओड़ तै था या माणसां की ओड़ तै था? मन्नै जवाब द्यो।” 31 फेर वे आपस म्ह बहस करण लागो के जै हम कहां, परमेसवर की ओड़ तै, तो वो कहवैगा, फेर थमनै विश्वास क्यांतै न्हीं करया? 32 अर जै हम कहां, माणसां की ओड़ तै, तो माणसां की भीड़ का डर सै, क्यूँके सारे जाणी सै के यूहन्ना साच्चीये नबी था। 33 उननै यीशु ताहीं जवाब दिया, “हमनै न्हीं बेरा।” यीशु नै उनतै कह्या, “मैं भी थारे तै कोनी बतान्दा के ये काम किस हक तै करूँ सूँ।”

12 यीशु उदाहरणां म्ह उनतै बात करण लाया: “किसे माणस नै

अंगूर का बाग लगाया, अर उसकै चौगरदे नै बाड़ा बाँध्या, अर रस का कुण्ड खोद्या, अर रुखाळ खात्तर एक मचान बनाया; अर किसानां ताहीं उसका ठेक्का देकै परदेस चल्या गया। 2 फेर फल तोड़ण का बखत लोवै आया, तो बाग के मालिलक नै अपणे नौककर ताहीं उसका फल लेण नै किसानां धोरै भेज्या के किसानां तै अंगूर के बाग के फलां का हिस्सा लेवै। 3 पर किसानां नै उस नौककर ताहीं पकड़कै छेत्या अर खाल्ली हाथ भेज दिया। 4 फेर उसनै एक और नौककर ताहीं उनकै धोरै भेज्या; उननै उसकी बेजती करी उसका सिर फोड़ दिया अर। 5 फेर उस मालिलक नै एक और ताहीं भेज्या; उननै उस नौककर ताहीं भी मार दिया। फेर उसनै और घणाए ताहीं भेज्या; उन म्ह तै उननै कुछ तो छेते अर कुछ मार दिये।” 6 “इब मालिलक के धोरै एकै आदमी रहण्या जो उसका प्यारा बेट्टा था; आखर म्ह उसनै अपणे बेट्टे ताहीं भी उनकै धोरै न्यू सोचकै भेज्या के वे मेरै बेट्टे की इज्जत तो जसर करैंगे।” 7 पर उन किसानां नै आपस म्ह कह्या, “योए तो वारिस सै; आओ, हम इसनै मार द्या, फेर यो अंगूर का बाग म्हारा हो जावैगा।” 8 अर उननै उस ताहीं पकड़कै मार दिया, अर अंगूर के बाग तै बाहरणी बगा दिया। 9 इस करकै अंगूर के बाग का मालिलक के करैगा? वो आकै उन किसानां का नाश करैगा, अर अंगूर के बाग का ठेक्का दुसरे किसानां नै दे देवैगा।

10 के थमनै पवित्र ग्रन्थ म्ह यो वचन कोनी पढ़ाया: जिस पत्थर ताहीं राजमिस्त्रयाँ नै बेकार बताया था, वोए कोणे का खास पत्थर होग्या; 11 यो प्रभु की ओड़ तै होया, अर यो म्हारे खात्तर अनोकखा सै! 12 फेर यहूदियाँ के प्रधान नै उस ताहीं पकड़णा चाह्या; क्यूँके वे समझगे थे, के उसनै म्हारे विरोध म्ह यो उदाहरण कह्या सै: पर वे माणसां तै डर्गे, अर उसनै छोड़कै चले गये। 13 फेर यहूदियाँ के प्रधान नै यीशु ताहीं बत्तां म्ह उलझाण खात्तर कुछ फरीसियाँ अर हेरोदेस राजा के समर्थकां ताहीं उसकै धोरै भेज्या। 14 उननै आकै यीशु तै कह्या, “हे गुरु, हमनै बेरा सै, के तू साच्चा सै, अर किसे की परवाह न्हीं करदा, क्यूँके तू माणसां का मुँह देखकै बात कोनी करदा, पर परमेसवर की बातें सच्चाई तै सिखावै सै। तो के कैसर ताहीं कर देणा ठीक सै या कोनी? 15 हम देवां, या न्हीं देवां?” उसनै उनका कपट जाणकै उनतै कह्या, “मन्नै क्यांतै परखो सो? एक दीनार (एक दिन की मजदूरी) मेरै धोरै ल्याओ, के मै उसनै देक्खूँ।” 16 वे लियाए, अर उसनै उनतै कह्या, “या छाप अर नाम किसका सै?” उननै उनका कपट जाणकै उनतै कह्या, “मन्नै क्यांतै परखो सो?” 17 यीशु नै उनतै कह्या, “जो कैसर का सै वो कैसर ताहीं, अर जो परमेसवर का सै परमेसवर ताहीं द्यो।” फेर वे उसपै घणे हैरान होण लागे। 18 फेर सदूकी लोग भी, जो कहवै सै के मेरे होए जिन्दा होए न्हीं सकदे; उसकै धोरै आकै उसतै बुझाया, 19 “हे गुरु, मूसा नबी नै म्हारै खात्तर पवित्र ग्रन्थ म्ह लिख्या सै के जै किसे का भाई बेऊलादा मर जावै अर उसकी घरआळी रह जावै, तो उसका भाई उसकी घरआळी तै ब्याह कर लेवै अर अपणे भाई खात्तर पीढ़ी पैदा करै। 20 उदाहरण के तौर पै सात भाई थे। पैहल्डा भाई ब्याह करकै बेऊलादा मरण्या। 21 फेर दुसरे भाई नै उसकी बिरबान्नी तै ब्याह कर लिया अर वो भी बेऊलादा मरण्या; अर उस्से तरियां तीसरे नै भी करया। 22 अर सातुवां कै ऊलाद बोनी होई। सारया पाढ़ै वा बिरबान्नी भी मरी। 23 आखर म्ह जिन्दा होण पै वा उन म्ह तै किसकी घरआळी होवैगी? क्यूँके वा सातुवां की घरआळी हो ली थी।” 24 यीशु नै उनतै कह्या, “थारी गलती या सै के थम पवित्र ग्रन्थ अर परमेसवर की सामर्थ नै न्हीं जाणते। 25 क्यूँके जी उठण कै बाद ब्याह शादी कोनी होन्दी, पर सुर्ग म्ह वो परमेसवर के सुर्गदूतां की ढाल होवैंगे। 26 मेरे होया कै जिन्दा होण कै बारें म्ह के थमनै मूसा नबी की किताब म्ह जल्ती होई जाड़ी की कथा म्ह कोनी पढ़ाया के परमेसवर नै उसतै कह्या, “मैं अब्राहम का परमेसवर, अर इसाहाक का परमेसवर, अर याकूब का परमेसवर सूँ?” 27 परमेसवर मेरे होया का न्हीं बल्के जिन्द्यां का परमेसवर सै; थम बड़ी भूल म्ह पड़े सो।” 28 शास्त्री समाज के माणसां म्ह तै एक नै आकै उन ताहीं बहस करदे सुण्या, अर न्यू जाणकै उसनै उन ताहीं ठीक ढाल तै जवाब दिया, अर उसतै बुझाया, “सारया तै खास हुकम कौण सा सै?” 29 यीशु नै उस ताहीं जवाब दिया, “सारे हुकमां म्ह तै यो खास सै: हे इस्राएल के माणसों सुणो! प्रभु म्हारा परमेसवर सिर्फ एक ही प्रभु सै, 30 अर तू प्रभु अपणे परमेसवर तै अपणे सारे मन तै, अर अपणे सारे प्राण तै, अर अपणी सारी समझ तै, अर अपणी सारी शक्ति तै प्यार

राखणा।” 31 अर दुसरा यो सै, “तू अपणे पड़ोसी तै अपणे जिसा प्यार राखणा।” इस्तै बड़डा और कोए हुकम कोनी।” 32 शास्त्री नै उस्तै कह्या, “हे गुरु, जमा ठीक! तन्नै साच्ची कही के परमेसवर एक-ए सै, अर उस ताहीं छोड़के और कोए कोनी। 33 अर उस्तै सारे मन तै, अर सारे प्राण तै, अर सारी समझ तै, अर सारी शक्ति तै प्यार राखणा; अर पड़ोसी तै अपणे जिसा प्यार राखणा, ये दोनुं हुकम होमबलियाँ अर बलिदान तै बाध सै।” 34 जिब यीशु नै देखा के उसनै समझदारी तै जवाब दिया, तो उस्तै कह्या, “तू परमेसवर कै राज्य तै दूर कोनी।” अर किसे नै फेर उस्तै बुझाण की हिम्मत कोनी होई। 35 फेर यीशु नै मन्दर म्ह उपदेश देन्दे होए न्यू कह्या, “शास्त्री क्यूँ कहवै सै के मसीह दाऊद का बेटा सै? 36 क्यूँके दाऊद नै खुद ए पवित्र आत्मा म्ह होकै कह्या सै, ‘परमेसवर यहोवा नै मेरे प्रभु तै कह्या, “मेरे सोनी ओड़ बैठ, जिब ताहीं के मै तेरे बैरियाँ नै हरा कै, तेरे पायां की चौककी न्हीं बणा दियुँ।” 37 “दाऊद तो खुद ए उसनै प्रभु कहवै सै, फेर वो उसका बेटा किस ढाळ होया?” अर भीड़ के माणस उसकी राज्जी होकै सुणी थे। 38 यीशु नै अपणे उपदेश म्ह उनतै कह्या, “शास्त्रियाँ तै चौकन्ने रहियो, जो लाम्बे-लाम्बे चोगे पहरे होड़ हाँड़े अर बजारा म्ह नमस्कार चाहवैं सै, 39 अर आराधनालाया म्ह खास-खास जगहां बैठाणा, जिम्मण म्ह खास-खास जगहां भी चाहवैं सै। 40 वे बिधवायाँ के घर खा जावै सै अर दिखाण खात्तर घणी वार ताहीं प्रार्थना करदे रहवैं सै। ये घणा दण्ड पावैगो।” 41 यीशु मन्दर कै भण्डार कै स्थाम्ही बैठके देक्ख्यै था के आदमी मन्दर कै दानपात्र म्ह किस तरियां पईसे घालैं सै; अर घणखरे साहुकारां नै घणाए कुछ घाल्या। 42 इतनै म्ह एक कंगाल बिधवा नै आकै दो दमडी घाल्लीं (जो एक धेले कै बराबर होवै सै) 43 फेर उसनै अपणे चेल्यां ताहीं धोरै बुलाकै कह्या, “मै थमनै सच कहूँ सूं के मन्दर कै दानपात्र म्ह घाल्लण आला म्ह तै इस कंगाल बिधवा नै सारया तै बाध घाल्या सै; 44 क्यूँके सारया नै अपणे धन की बढ़दी म्ह तै घाल्या सै, पर इसनै अपणी घटदी म्ह तै जो उसकै धोरै जीवन चलाण खात्तर था, वो सारा घाल दिया।”

13

जिब यीशु मन्दर तै लिकड़े था, तो उसकै चेल्यां म्ह तै एक नै उस्तै कह्या, “हे गुरु, लखा, किसे बड़े-बड़े पत्थरां तै बणाये होए किसे सुधरे भवन सै!” 2 यीशु नै उनतै कह्या, “के थम ये बड़े-बड़े पत्थरा के भवन देक्खो सो: पर उरै एक पत्थर भी कोनी बचैगा जो गेरया न्हीं जावैगा।” 3 जिब यीशु मन्दर कै स्थाम्ही जैतून कै पहाड़ पै बेच्या था, तो पतरस, याकूब, यूहन्ना अर अन्दिगास नै न्यारे जाकै उस्तै बुझाण्या, 4 “हमनै बता के ये बात कद होवैगी? अर जिब ये सारी बात पूरी होण पै होवैगी उस बखत की कै निशानी होवैगी?” 5 यीशु उनतै कहण लाग्या, “चौकने रहियो के कोए थमनै भकावै न्हीं। 6 क्यूँके घणखरे मेरै नाम तै आकै कहवैगे, ‘मै मसीह सूं।’ अर घणाए नै भकावैगे। 7 जिब थम रोके, अर लड़ाईया का जिक्र सुणो, तो घबराईयो ना, क्यूँके इनका होणा जरूरी सै, पर उस बखत खात्ता कोनी होवैगा। 8 क्यूँके जात पै जात, राज्य पै राज्य चढ़ाई करैगा। भोत सारी जगहां पै हाल्लण आवैगें, अर

अकाल पड़ेंगे, ये तो दुखां की शरुआत ए होवैगी।” 9 “पर थम अपणे बारै म्ह चौकने रहो: क्यूँके माणस थारे ताहीं बहु सभा म्ह सौपैगें अर थम आराधनालयों म्ह छितोगे, अर मेरै कारण हाकिमां अर राजां कै आगे खड़े करे जाओगे, ताके थम मेरे बारें म्ह गवाही दे सको। 10 पर जरूरी सै के पैहल्या सुसमाचार सारी जात्तां म्ह प्रचार करया जावै। 11 जिब वे थमनै ले जाकै सौपैगें, तो पैहल्या तै फिक्र ना करियो इब हम के कहवैगें; पर जो कुछ थमनै उस बखत बताया जावै वोए कहियो: क्यूँके बोल्लण आले थम कोनी सो, पर पवित्र आत्मा सै।” 12 “भाई नै भाई, पिता नै बेटा मारण खात्तर सौंप देंगे, अर बालक माँ-बाप कै बिरोध म्ह खड़े होकै उन ताहीं मरवा देवैगें। 13 अर मेरै नाम के कारण सारे माणस थारे तै बैर करैगें, पर जो आखर ताहीं धीरज धरैगा, उस्से का उद्धर होवैगा।” 14 (पढ़ण आला इस बात नै समझ लेवै) “जिस दिन थम मन्दर म्ह उस उजाड़ण आली धृणित चीज नै खड़े देक्खो, जिस ताहीं मन्दर म्ह न्हीं होणा चाहिये, तब जो यहूदिया परदेस म्ह हो वे पहाड़ां पै भाज जावै; 15 जो छात पै हो, वो घर म्ह कुछ लेण खात्तर धर नै ना बोहड़े। 17 उन दिनां म्ह जो गर्भवती अर दूध पिलान्दी बिरबान्नी होवैगीं, उनकै खात्तर भागणा भी मुश्किल होमा। 18 अर प्रार्थना करया करो के यो जाड़यां म्ह न्हीं हो। 19 क्यूँके वे दिन इसे कळेश के होवैगें के सृष्टि की शरुआत तै, जो परमेसवर नै रचाई सै, इब ताहीं ना तो होए अर ना फेर कदे होवैगें।” 20 अर जै प्रभु उन दिनां नै न्हीं घटान्दा, तो कोए जीव भी कोनी बचदा; पर उन छाँटे होया कै कारण जिन ताहीं उसनै छाट्या सै, उन दिनां ताहीं घटाया। 21 उस बखत जै कोए थमनै कहवै, देक्खो, मसीह उरै सै, या देक्खो, ओड़े सै, तो बिश्वास ना करियो; 22 क्यूँके झूँठे मसीह अर झूँठे नबी उठ खड़े होवैगें, अर बड़े-बड़े चमत्कार अर अनोक्खे काम दिखावैगें के जै हो सक्या तो छाँटे होया ताहीं भी भका देवैगें। 23 पर थम चौकने रहियो; देक्खो, मन्नै थारे तै सारी बात बखत तै पैहल्या बता दी सै। 24 उन दिनां म्ह, उस कळेश कै पाच्छे सूरज अन्धेरा हो जावैगा, अर चाँद चाँदणा कोनी देवैगा; 25 अर अकास के तारे पड़ण लागैगें; अर अकास की शक्तियाँ हलाई जावैगी। 26 फेर मुझ माणस कै बेटे नै बहु सामर्थ अर महिमा कै गेल्या सब लोग बादलां पै आन्दे देक्खवैगें। 27 उस बखत मै अपणे सुर्दूत्तां नै भेजकै, धरती कै इस सिरे तै अकास कै उस सिरे ताहीं, च्यारू दिशायां तै अपणे चुणे होए माणसां नै कट्ठा करूँगा। 28 अंजीर के दरखत तै यो उदाहरण सीक्खो: जिब उसकी डाली कोमल हो जावै, अर पते लिकड़ण लागें सै; तो थम जाण ल्यो सो के गर्मी का बखत लोवै सै। 29 इस्से तरियां जिब थम इन बात्तां नै होन्दे देक्खो, तो जाण ल्यो के वो भोत तावळा आण आला सै। 30 मै थमनै साच्ची कहूँ सूं के जिब ताहीं ये बात न्हीं हो लेन्दी, जद ताहीं ये पीढ़ी खतम न्हीं होवैगी। 31 धरती अर अकास टळ जावैगे, पर मेरी बात कदे न्हीं टळेगी। 32 “उस दिन या उस बखत कै बैर म्ह कोए न्हीं जाण्दा, ना सुर्दूत अर ना बेटा; पर सिर्फ पिता जाणी सै। 33 लखाओ, जागदे अर

प्रार्थना करदे रहो; क्यूँके थमनै न्हीं बेरा के वो बखत कद आवैगा। 34 मेरे आण का बखत उस माणस के समान सै, जो परदेस जान्दे बखत अपणा घर छोड़ जावै, अर अपणे नौकरां ताहीं हक देवै, अर हरेक नै उसका काम बता देवै, अर पहरेदार ताहीं जागदे रहण का हुकम देवै। 35 “इस करकै जागदे रहो, क्यूँके थमनै न्हीं बेरा के घर का मालिक कद आवैगा, साँझा नै या आधी रात नै, या मुर्गे के बांग देण के बखत या तड़के ए तड़के नै। 36 इसा ना हो के वो चाणचक आकै थमनै सोंदे पावै। 37 अर जो मै थमनै कहूँ सूँ वोए सारया नै कहूँ सूँ: जागदे रहो!”

14 दो दिनां पाच्छै फसह अर अखमीरी रोट्टी का त्यौहार होण आळा

था। प्रथान याजक अर शास्त्री इस बात की टाठ म्ह थे के यीशु ताहीं किस ढाळ कपट तै पकड़कै मार देवै; 2 पर वे कहवै थे, “त्यौहार कै दिन न्हीं, कदे इसा ना हो के माणसां म्ह रोला माच्चै।” 3 जिब यीशु बैतनिय्याह नगर म्ह आया, ओडै यीशु शमान नाम के माणस जो कोढ़ तै ठीक होया था, उसके घरां खाणा खाण बेठ्या, तो एक बिरबानी संगमरमर कै बरतन म्ह जटामांसी का शुद्ध महँगा खसबूदार तेल लेकै आई, अर बरतन तोड़कै महँगा खसबूदार तेल उसकै सिर पै उंडेल दिया। 4 पर उन म्ह तै कई माणस अपणे मन म्ह बड़बड़ाने लागे, “इस महँगा खसबूदार तेल का क्यांतै सत्यानाश कर दिया? 5 क्यूँके यो महँगा खसबूदार तेल तो तीन सौ दीनार (तीन सौ दिन की मजदूरी) तै भी धाणी किम्मत पै बेचकै कंगालां म्ह बांडया जा सकै था।” अर उस बिरबानी ताहीं डिङ्कण लागे। 6 यीशु नै कह्या, “उस ताहीं छोड़ द्यो; उसनै क्यांतै सताओ सो? उसनै मेरे गेल्या भलाई करी सै। 7 कंगाल थारे गेल्या सारी हाण रहवै सै, अर थम जिब चाहो जद उनतै भलाई कर सको सो; पर मै थारे गेल्या सारी हाण कोनी रहूँगा। 8 जो कुछ वा कर सकी, उसनै करया; उसनै मेरे गाहै जाण की त्यारी म्ह पैहला ए महँगा खसबूदार तेल मेरी देह पै उंडेला सै। 9 मै थमनै साच्ची कहूँ सूँ के सारे दुनिया म्ह जित किते भी सुसमाचार प्रचार करया जावैगा, जो उसनै करया वो सदा याद करया जावैगा।” 10 फेर यहूदा इस्करियोती जो बारहा चेल्यां म्ह तै एक था, प्रथान याजकां कै थोरै गया के यीशु ताहीं उनके हाथ पकड़वा देवै। 11 वे न्यू सुणाकै राज्जी होगे, अर उस ताहीं रपिये देण खात्तर मानो; अर वो मौक्का टोहूँ लाग्या के उस ताहीं किसे ढाळ पकड़वाया जावै। 12 अखमीरी रोट्टी कै त्यौहार कै पैहलडे दिन, जिसम्ह वे फसह खात्तर मेन्ने का बलिदान करै थे, उसके चेल्यां नै उसतै बुझ्याया, “तू कित जाणा चाहवै सै के हम जाकै तेरे खात्तर फसह भोज की त्यारी करा?” 13 उसनै अपणे चेल्यां म्ह तै दो ताहीं न्यू कहकै भेज्या, “यरुशलेम नगर म्ह जाओ, अर एक माणस पाणी का पैंढा ठाए होए थमनै मिलेगा, उसके पाच्छे हो लियो; 14 अर वो जिस घर म्ह जावै, उस घर कै मालिक ताहीं कहियो, ‘गुरु कहवै सै के बैठक कित्सै? जिसम्ह मै अपणे चेल्यां गेल्या फसह भोज खाऊँ।’ 15 वो थमनै एक सजी-सजाई, अर त्यार करी होड़ बड़ी अटारी दिखा देवैगा, ओडै महैर खात्तर त्यारी करो।” 16 चेल्ले लिकड़कै नगर म्ह आये, अर जिसा यीशु

नै उनतै कह्या था, उस्से तरियां पाया; अर फसह का भोज त्यार करया। 17 जिब साँझा होई, तो यीशु बारहा चेल्यां कै गेल्या आया। 18 जिब वे बेठे खाणा खावै थे, तो यीशु नै कह्या, “मै थमनै साच्ची कहूँ सूँ के थारे म्ह तै एक, जो मेरै गेल्या खाणा खाण लागरया सै, वो मनै धोक्खा देकै पकड़वायैगा।” 19 उनपै उदासी छायी अर वे एक-एक करकै उसतै कहण लागे, “के वो मै सूँ?” 20 उसनै उनतै कह्या, “वो बारहां चेल्यां म्ह तै एक सै, जो मेरै गेल्या थाणी म्ह हाथ घालै सै। 21 क्यूँके मै माणस का बेट्टा तो, जिसा मेरे बारे म्ह पवित्र ग्रथ म्ह लिखा सै; मेरा मर जाणा तो पक्का सै, पर उस माणस पै धिक्कार सै जिसकै जरिये मै माणस का बेट्टा पकड़वाया जाऊँगा! जै उस माणस का जन्म ए न्हीं होंदा, तो उसकै खात्तर भला होंदा।” 22 जिब वे खाण ए लागरे थे, उसनै रोट्टी लेकै परमेसवर का धन्यवाद करया, अर आशीष माँगकै तोड़ी, अर उन ताहीं दी, अर कह्या, “ल्प्यो, या मेरी देह सै।” 23 फेर यीशु नै अंगूर के रस का कटोरा लेकै परमेसवर का धन्यवाद करया, अर उन ताहीं दिया; अर उन सारया नै उस म्ह तै पिया। 24 अर उसनै उनतै कह्या, “यो अंगूर का रस मेरे लहू नै दर्शवै सै, जिसका करार परमेसवर नै लोगां तै करया जो धाणाए खात्तर बहाया जावै सै।” 25 “थमनै साच्ची कहूँ सूँ के अंगूर के रस नै मै इब तै इसनै उस दिन तक न्हीं पिऊँगा, जिब ताहीं परमेसवर के राज्य म्ह थारे गेल्या नया रस न्हीं पीऊँगा।” 26 फेर वे भजन गाकै बाहरणी जैतून कै पहाड़ पै गए। 27 जिब यीशु अर उसके चेल्ले राह म्ह थे, तो उसनै उनतै कह्या, “थम सारे मेरा साथ छोड़कै चले जाओगे,” “क्यूँके पवित्र ग्रन्थ म्ह लिखा सै:” मै रुखाळे नै माझ्ञा, अर झूण्ड की सारी भेड़ तित्तर-बित्तर हो जावैगी। 28 पर मै अपणे जी उठण कै बाद थारे तै पैहल्या गलील परदेस म्ह मिलूँगा। 29 पतरस नै उसतै कह्या, “जै सारे छोड़ै तो छोड़ै, पर मै तेरा साथ कदे न्हीं छोड़ूँगा।” 30 यीशु नै उसतै कह्या, “मै तेरे तै सच कहूँ सूँ आज ए इससे रात नै मुर्गे के दो बाँग देण तै पैहल्या, तू तीन बर मेरै बारे म्ह मुकरैगा।” 31 पर उसनै और भी पक्के विश्वास तै कह्या, “जै मनै तेरे गेल्या मरणा भी पड़े, तोभी मै तेरा इन्कार कदे कोनी करूँगा।” इस्से तरियां और सारया चेल्यां नै भी कह्या। 32 फेर यीशु अर उसके चेल्ले गतसमनी नामक बाग म्ह एक जगहां म्ह आए, अर उसनै अपणे चेल्यां तै कह्या, “उरै बेठे रहो, जिब ताहीं मै प्रार्थना करूँ।” 33 अर वो पतरस, याकूब अर यूहन्ना ताहीं अपणे गेल्या लेग्या; अर धाणाए कांल अर दुखी होण लाग्या, 34 अर उनतै कह्या, “मेरा मन धाण उदास सै, उरै ताहीं के मै मरण पै सूँ: थम उरै ठहरो, अर जागदे रहो।” 35 फेर वो माड़ा आगै सरक्या अर धरती पै पड़कै प्रार्थना करण लाग्या के जै हो सकै तो या मुसीबत की घड़ी मेरै पै तै टळ जावै, 36 अर कह्या, “हे अब्बा, हे पिता, तू सारा कुछ कर सकै सै; इस दुख का कटोरे ताहीं मेरै थोरै तै हटा ले: तोभी जिसा मै चाहूँ सूँ उसा न्हीं, पर जो तू चाहवै सै वोए हो।” 37 फेर यीशु आया अर चेल्यां ताहीं सोन्दे पाकै पतरस तै कह्या, “हे शमान, तू सोवै सै? के तू एक घड़ी भी कोनी जाग सक्या? 38 जागदे रहो अर प्रार्थना करदे

रहो के थम इन्मित्हान म्ह ना पड़ो। इस म्ह कोए शक कोनी के आत्मा तो त्यार सै, पर देह कमजोर सै।” 39 अर यीशु फेर चल्या गया अर दोबारा भी वाए प्रार्थना करी। 40 फेर आकै उन ताहीं सोन्दे पाया, क्यूँकै चेल्यां की आँख नींद तै भरी थी; अर न्हीं जाणै थे, के उसनै के जवाब देवै। 41 फेर तीसरी बर आकै उनतै कहा, “थम इब भी सोण लागेर सोण सों? बखत आ लिया; देक्खो, मै माणस का बेटा पापियाँ के हाथां पकड़वाया जाऊँ सूँ। 42 उठो, चाल्लां! लखाओ, मेरा पकड़वाण आळा लोवै आण पोंहच्या सै।” 43 यीशु न्यू कहण ए लागरया था के यहूदा जो बारहा चेल्यां म्ह तै एक था, अपणे गेल्या प्रधान याजकां अर शास्त्रियाँ अर यहूदी अगुवां की ओड़ तै एक बड़ी भीड़ लेकै जिबे आण पोंहच्या, जो तलवार अर लाढ़ी लेरे थे। 44 यीशु कै पकड़वाण आळे नै उन ताहीं यो इशारा दिया था के जिस ताहीं मै चुम्ह वोए यीशु होगा, उस ताहीं पकड़कै सावधानी तै ले जाईयो। 45 वो आया, अर जिबे उसकै धोरै जाकै बोल्या, “हे गुरु!” अर उस ताहीं चुम्हा। 46 फेर उननै उसपै हाथ गेर कै उस ताहीं पकड़ लिया। 47 उन बारहा चेल्यां म्ह जो धोरै खड़े थे, एक नै तलवार खिंचकै महायाजक के नौकर पै चलाई, अर उसका कान उड़ा दिया। 48 यीशु नै उनतै कहा, “के थम डाकू जाणकै मन्नै पकड़ण कै खात्तर तलवार अर लाढ़ी लेकै लिकडे सो? 49 मै तौ हेरेक दिन मन्दर म्ह थारे गेल्या रहकै उपदेश दिया करुँ था, अर जिब थमनै मेरै ताहीं कोनी पकड़या: पर न्यू ज्यातै होया सै के पवित्र ग्रन्थ म्ह लिखी बात पूरी होवै।” 50 यो सब देखकै सारे चेल्ले उसनै छोड़कै भाजगे। 51 एक जवान अपणी उघाड़ी देह पै चादूर ओढ़े होड़ उसकै पाच्छै हो लिया, अर माणसां नै उस ताहीं पकड़या। 52 पर वो चादूर छोड़कै उघाड़ा भाजग्या। 53 फेर वे यीशु ताहीं महायाजक कै धोरै लेगो, अर सारे प्रधान याजक, यहूदी अगुवें अर शास्त्री उसकै ओड़ै कठे होगे। 54 पतरस दूर ए दूर उसकै पाच्छै-पाच्छै महायाजक के आँगण कै भीत्तर ताहीं गया, अर सिपाहियाँ कै गेल्या बैठकै आग पै सीकण लाग्या। 55 प्रधान याजक अर यहूदी अगुवां की सभा यीशु ताहीं मारण कै खात्तर उसकै बिरोध म्ह गवाही की टोह म्ह थे, पर कोन्या मिली। 56 क्यूँकै घणखरे उसकै बिरोध म्ह झूटी गवाही देवै थे, पर उनकी गवाही एक सी कोनी थी। 57 फेर कुछ माणसां नै उठकै यीशु कै बिरोध म्ह या झूटी गवाही दी, 58 “हमनै इस ताहीं कहन्दे सुण्या सै, ‘मै इस हाथ कै बणाए होड़ मन्दर नै गेर दियुँगा, अर तीन दिन म्ह दुसरा बणाऊँगा, जो हाथां तै न्हीं बण्या हो।’” 59 इस बात म्ह भी उनकी गवाही एक सी कोनी लिकडी। 60 फेर महायाजक नै बिचाठै खड़े होकै यीशु तै बुझ़िया, “तू कोए जवाब न्हीं देंदा? ये माणस तेरे बिरोध म्ह के गवाही देवै सै?” 61 पर वो बोल-बाल्ला रहया, अर कुछ ज जवाब न्हीं दिया। महायाजक नै उसतै दुबारा बुझ़िया, “के तू ए परम धन्य परमेसवर का बेटा मसीह सै?” 62 यीशु नै कहा, “हाँ मै ए सूँ: अर थम मुझ माणस के बेटे ताहीं सर्वशक्तिमान परमेसवर की सोळी ओड़ बेठे, अर अकास के बादलां कै गेल्या आन्दे देक्खोगे।” 63 फेर महायाजक नै अपणे लते पाड़कै कहा,

“इब हमनै गवाह की और के जरूरत सै?” 64 थमनै या बुराई सुणी। थारी के राय सै? उन सारया नै कहा के यो मारण कै जोगा सै। 65 फेर कई तो उसपै थूकते, अर कई उसका मुँह ढकते होए, कई उसकै घुस्मारत होए उसतै कहण लाग्ये, जै तू नबी सै, “तो भविष्यवाणी कर!” के तेरे कौण मारै सै, अर सिपाहियाँ नै उस ताहीं पकड़कै थप्पड़ मारे। 66 जिब पतरस तलै आँगण म्ह था, तो महायाजक की नौकराणियाँ म्ह तै एक उड़े आई, 67 अर पतरस ताहीं आग सिक्के देखकै उस ताहीं गौर तै देख्या अर कहण लाग्यी, “तू भी तो उस नासरत के यीशु कै गेल्या था।” 68 पतरस मुकरग्या, अर बोल्या, “मै ना ए जाण्दा अर ना ए समझू सूं के तू के कहवै सै।” फेर वो बाहरणै देहलीया म्ह गया; अर मुर्मै नै बाँग दी। 69 वा नौकराणी उसनै ओड़ै देखकै उनतै जो धोरै खड़े थे, दुबारा कहण लाग्यी, “यो उन म्ह तै एक सै।” 70 पर वो फेर मुकरग्या। माड़ी बार पाच्छै उननै जो धोरै खड़े थे फेर पतरस ताहीं कहा, “पकका तू उन म्ह तै एक सै, क्यूँकै तू गलीली भी सै।” 71 फेर वो धिक्कारा अर कसम खाण लाग्या, “मै उस माणस नै, जिसका थम जिक्र करो सो, कोनी जाण्दा।” 72 फेर जिबे दुसरी बार मुर्मै नै बाँग देई। पतरस ताहीं वाए बात जो यीशु नै उसतै कही थी याद आई “मुर्गै कै दो बर बाँग देण तै पैहल्या तू तीन बार मेरा इन्कार करैगा।” अर वो इस बात नै सोचकै फूट-फूटकै रोण लाग्या।

15 सबेरा होन्दे जिबे सारे प्रधान याजकां, यहूदी अगुवां अर शास्त्रियाँ नै बल्के यहूदी अगुवां की सभा नै सलाह करकै यीशु ताहीं बंधवाया, अर उस ताहीं ले जाकै यहूदिया परदेस के हाकिम पिलातुस कै हाथां म्ह सौप दिया। 2 पिलातुस नै यीशु तै बुझ़िया, “के तू यहूदियाँ का राजा सै?” उसनै उस ताहीं जवाब दिया, “तू आप ए कहण लागरया सै।” 3 प्रधान याजक यीशु पै घणी बातां के इल्जाम लावै थे। 4 पिलातुस नै उसतै फेर बुझ़िया, “के तू कुछ जवाब कोनी देंदा, लखा, ये तेरे पै कितनी बातां के इल्जाम लावै सै?” 5 यीशु नै फेर कुछ जवाब कोनी दिया; उरै ताहीं के पिलातुस नै घणी हैरानी होई। 6 पिलातुस उस त्यौहार म्ह किसे एक कैदी नै जिसनै वे चाहवै थे, उन माणसां खात्तर छोड़ दिया करै था। 7 बरअब्बा नाम का एक माणस उन रोठे करणीया गेल्या कैदी था, जिन नै रोठे म्ह खून करया था। 8 अर भीड़ पिलातुस कै धोरै जाकै उसतै बिनती करण लाग्यी, के जिस तू म्हरै खात्तर करदा आया सै उस्से तरियां कर। 9 पिलातुस नै उन ताहीं जवाब दिया, “थम के चाहो, के मै थारे खात्तर यहूदियाँ के राजा नै छोड़ दियुँ?” 10 क्यूँकै पिलातुस जाणै था के प्रधान याजकां नै यीशु ताहीं चाल तै पकड़वाया था। 11 पर प्रधान याजकां नै माणसां ताहीं उकसाया के वो यीशु की जगहां बरअब्बा नै छोड़ दे। 12 न्यू सुण पिलातुस नै उनतै फेर बुझ़िया, “तो जिसनै थम यहूदियाँ का राजा कहो सो, उसका मै के करूँ?” 13 वे फेर रुक्के मारण लाग्ये, “उसनै क्रूस पै चढ़ा द्यो!” 14 पिलातुस नै उनतै फेर कहा, “क्यांतै उसनै के बुरा करया सै?” पर वे और भी रुक्के मारण लाग्ये, “उसनै क्रूस पै चढ़ा द्यो!” 15 फेर पिलातुस नै भीड़ ताहीं

राज्ञी करण की चाहन्ना तै, बरअब्बा ताहीं उनकै खात्तर छोड़ दिया, अर यीशु कै कोरड़े लगवाकै सिपाहियाँ कै हाश म्ह सौप दिया के क्रूस पै चढ़ाया जावै। 16 यीशु ताहीं सिपाही किले कै भीत्तर कै आँगण म्ह ले गये जो प्रिटोरियुम कुहावै सै, अर सारी पलटन ताहीं बुला ल्याए। 17 फेर सिपाहियाँ नै उसका मजाक उडाण खात्तर उस ताहीं बैंजनी लत्ते पिहराए अर काण्डयाँ का मुकुट गूँथकै उसकै सिर पै धरया, 18 अर न्यू कहकै उस ताहीं नमस्कार करण लागे, “हे यहूदियों के राजा, नमस्कार!” 19 वे उसकै सिर पै सरकण्डे मारदे, अर उसपै थूकदे, अर गोहुटेकै उसनै प्रणाम करदे रहे। 20 जिब उननै उसका मजाक उड़ा लिया, तो उसपै तै बैंजनी लत्ते उतारकै उससे के लत्ते पिहराए; अर फेर उस ताहीं क्रूस पै चढाण कै खात्तर बाहरणे ले गये। 21 सिकन्द्र अर रुफुस का पिता शमोन, जो कुरेन परदेस का बसिन्दा था, वो युश्लेम की ओड़ आण लागरया था; उननै उस ताहीं बेकार म्ह पकड़या ताकै यीशु का क्रूस ठाकै ले चाल्लै। 22 वे यीशु ताहीं गुलगुता नामक जगहां पै लियाए, जिसका मतलब खोपडी की जगहां सै। 23 ओड़ उस ताहीं सिरका मिल्या होड़ अंगूर का रस देण लागे, पर उसनै कोनी लिया। 24 फेर उननै उस ताहीं क्रूस पै चढ़ाया अर उसकै लत्यां पै पर्ची गेर कै, के किसनै कै मिलै, उननै बांड लिये। 25 अर सबैरै के नौ बजे थे, जिब उननै यीशु ताहीं क्रूस पै चढ़ाया। 26 अर उसका दोषपत्र लिखकै क्रूस कै उपर लगा दिया के “यहूदियाँ का राजा।” 27 उननै उसकै गेल्या दो डाकू, एक उसकी सोळी अर एक उसकी ओळी ओड़ क्रूस पै चढ़ा दिये। 28 (तब पवित्र ग्रन्थ का वो वचन के वो अपराधियाँ गेल्या गिण्या गया, पूरा होया।) 29 अर राह म्ह जाण आळे सिर हला-हल्लाकै अर न्यू कहकै उसकी बेजती करै थे, “वाह! मन्दर के गेरण आळे, अर तीन दिन म्ह बणाण आळे। 30 क्रूस पै तै उतारकै अपणे-आपनै बचाले।” 31 इस्से तरियां तै प्रधान याजक भी, शास्त्रियाँ सुधा, आप्सस म्ह मजाक करकै कहवै थे, “इसनै औरां ताहीं बचाया, पर अपणे-आपनै न्हीं बचा सकदा। 32 इस्साएल का राजा, मसीह, इब क्रूस पै तै उतार आ, के हम देखकै बिश्वास करया।” अर जो डाकू उसकै गेल्या क्रूस पै चढ़ाए गए थे, वो भी उसकी बेजती करै थे। 33 दोफारी होण पै सारे देश म्ह अँधेरा छाया, अर तीन बजे ताहीं रहया। 34 तीन बजे यीशु नै बडे जोर तै रुक्ये मारकै कह्या, “इलोई, इलोई, लमा शबक्तीनी?” जिसका मतलब यो सै, “हे मेरे परमेस्वर, हे मेरे परमेस्वर, तन्नै मेरै ताहीं क्यांतै छोड़ दिया?” 35 जो धोरै खडे थे, उन म्ह तै कितन्याँ नै न्यू सुणकै कह्या, “लखाओ, वो एलिय्याह ताहीं बुलावै सै।” 36 अर एक नै भाजकै फोम ताहीं सिरके म्ह ड़बोया, अर सरकण्डे पै धरकै उस ताहीं चुसाया अर कह्या, “ठैहर जाओ, देख्यां, एलिय्याह उस ताहीं उतारण खात्तर आवै सै के न्हीं।” 37 फेर यीशु नै बडे जोर तै किल्की मारकै जी दे दिया। 38 अर मन्दर का पड़ा उपर तै तळै ताहीं पाटकै दो टुकडे होग्या। 39 जो सूबेदार उसकै स्याम्ही खड्या था, जिब उस ताहीं इस ढाल किल्की मारकै जी देन्दे देख्या, तो उसनै कह्या, “साच्चए यो माणस, परमेस्वर का बेटा

था!” 40 कई बिरबान्नी भी दूर तै देक्खै थी: उन म्ह मरियम मगदलीनी, छोटे याकूब अर योसेस की माँ मरियम, अर सलोमी थी। 41 जिब यीशु गलील परदेस म्ह था, तो ये जनानियाँ जो यीशु की चेल्ली थी, वो उसकै सेवा-पाणी करया करै थी; अर घणखरी बिरबान्नी भी थी, जो उसकै गेल्या यरुशलेम नगर तै आई थी। 42 यो आराम कै दिन का एक दिन पैहले की तैयारी का दिन था, अर इब सँझा हो गयी थी। 43 अरिमतिया गाम का बासिन्दा यूसुफ आया, जो बड़ी सभा का खास माणस था अर खुद भी परमेस्वर कै राज्य की बाट देक्खै था। वो हिम्मत करकै पिलातुस कै धोरै गया अर यीशु की लाश माँगी। 44 पिलातुस नै हैरानी होई के वो इतनी तावळी मरया, उसनै सूबेदार ताहीं बुलाकै बुझ्याया, “के उस ताहीं मरे होए वार होई सै?” 45 जिब उसनै सूबेदार कै जरिये हालत जाण ली, तो लाश यूसुफ ताहीं दुवा दी। 46 फेर उसनै मलमल की एक चादू मोल ली, अर लाश ताहीं उतारकै उस चादू म्ह लपेटा, अर एक कब्र म्ह जो चटून म्ह खोद राक्खी थी धरया, अर कब्र कै बारणै पै एक पथर गिरडा दिया। 47 मरियम मगदलीनी अर योसेस की माँ मरियम देक्खै थी के वो कित्त धरया गया सै।

16 जिब आराम का दिन बीत्या, तो मरियम मगदलीनी, अर याकूब

की माँ मरियम, अर सलोमी नै खसबूदार चीज मोल ली, तके आकै यीशु की लाश पै मळै। 2 हफ्तै के पैहल्ले दिन तड़कै ए तड़कै सूरज लिकड़ाए था, वे कब्र पै आई, 3 अर आप्सस म्ह कहवै थी, “म्हारै खात्तर कब्र के दरबाजे पै तै पत्थर कौण गिरड़ावैगा?” 4 जिब उननै कब्र की ओड़ निगांह करी, तो देख्या के पत्थर गिरड़ा होया सै! यो घणाए बड़डा था। 5 कब्र कै भीत्तर जाकै उननै एक जवान ताहीं धोळे लत्ते पहरे होड़ सोळी ओड़ बेठे देख्या, अर उननै घणी हैरान होई। 6 उसनै उनतै कह्या, “हैरान मतना होवो, थम यीशु नासरी नै टोहो सो, जो क्रूस पै चढ़ाया गया था, वो जिन्दा होग्या सै, अर उरै कोनी; लखाओ, याए वा जगहां सै, जित उननै यीशु की लाश ताहीं धरया था। 7 पर थम जाओ, अर उसकै चेल्यां अर पतरस ताहीं कहो के वो थारे तै पैहल्या गलील परदेस म्ह जावैगा। जिसा के उसनै थारे तै कह्या था, थम ओड़ैए उसनै देक्खोगे।” 8 अर वे लिकड़कै कब्र तै बाहर भाज्याई; क्यूँकै वे काम्बगी अर उनकै घबराट होगी थी; अर उननै किसे तै कुछ न्हीं कह्या, क्यूँकै वे डैरे थी। 9 (note: The most reliable and earliest manuscripts do not include Mark 16:9-20.) हफ्तै के पैहल्ले दिन सबेर होन्दे यीशु जिन्दा होकै पैहलम-पैहल्या मरियम मगदलीनी ताहीं जिसमहै तै उसनै सात ओपरी आत्मा काढ़ी थी, दिख्या। 10 उसनै जाकै यीशु के साथियाँ ताहीं खबर दी, जो दुख म्ह ढूबेरे थे, अर रोवै थे। 11 उननै न्यू सुणकै के वो जिन्दा सै, अर मरियम मगदलीनी नै उस ताहीं देख्या सै, उसकी बाट का बिश्वास कोनी करा। 12 इसकै बाद यीशु दुसरे रूप म्ह उन म्ह तै दो चेल्यां ताहीं दिख्या, जिब वे गाम कान्ही जावै थे। 13 उननै भी युश्लेम नगर तै बोहड़कै दुसरयां ताहीं इस बारें म्ह खबर दी, पर उननै उनका भी बिश्वास कोनी करया। 14 पाच्छै यीशु उन ग्यारहां चेल्यां ताहीं भी

दिखया, जिब वे खाणा खाण बेठे थे, अर उनकै अबिश्वास अर मन की कठोरता पै उल्हाणा दिया, क्यूँके जिन नै उसकै जिन्दा होण कै पाच्छै उस ताहीं देखा था, चेल्यां नै उनका भी बिश्वास कोनी करया था। 15 अर यीशु नै उनतै कह्या, “थम सारी दुनिया म्ह जाकै सारी सृष्टि के माणसां ताहीं सुसमाचार प्रचार करो। 16 जो बिश्वास करै अर बपतिस्मा लेवै उस्से का उद्धार होवैगा, पर जो बिश्वास कोनी करैगा वो कसूरवार ठहराया जावैगा; 17 बिश्वास करण आढा म्ह या निशान्नी होवैगी के वे मेरै नाम तै ओपरी आत्मायाँ नै काढैगें, नई-नई भाषा बोल्लैगें, 18 साँप नै हाथ्यां म्ह ठा लेवैगें, अर जै वे गलती तै जहर भी पी जावै तोभी उनका कुछ न्हीं बिगड़ेगा; वे बिमारां पै हाथ धरैगें, अर वे चंगे हो जावैंगे।” 19 फेर प्रभु यीशु उनतै बात करण कै पाच्छै सुर्ग पै ठा लिया गया, अर परमेस्वर कै सोळी ओढ़ बैठाया। 20 अर उननै लिकड़कै हरेक जगहां प्रचार करया, अर प्रभु उनकै गेल्या काम करदा रहया, अर उन निशान्नी कै जरिये जो गैल-गैल होवै थे, अर सावित करदा रहया के वचन सच्चा सै। आमीन।

लूका

1 हे जनाब थियुफिलुस, घणखरयां माणसां नै म्हारै बिचाळै घटी बातां का व्यौरा लिखुण की कोशिश करी सै। 2 शरुआत तै ए जो यीशु मसीह की सेवकाई म्ह साथ थे अर वे बाद म्ह वचन के सेवक बणगे, उनने ए आँखां देक्खी बात म्हारे ताहीं बताई। 3 इस करके हे जनाब थियुफिलुस, मन्नै भी यो ठीक लाग्या के उन सरी बातां का सारा हाल शुरू तै आँच्छी दांडू परख कै, उनने तेरे खात्तर क्रमानुसार लिखूँ 4 के तू या जाण ले के वो बात जिनकी तन्नै शिक्षा पाई सै, वो सच्ची सै। 5 यहूदिया परदेस कै राजा हेरोदेस कै बखत म्ह अबिय्याह कै टोल म्ह जकरयाह नाम का एक याजक था, अर उसकी धरआळी का नाम एलीशिबा था, अर दोनुं हारुन की पीढी के थे। 6 वे दोनुं परमेसवर कै स्याम्ही धर्मां थे, अर प्रभु कै सारे हुकम अर नियमां पै बेखोट चालण आळे थे। 7 पर उनकै कोणे भी ऊलाद कोनी थी, क्यूँके एलीशिबा बाँझ थी, अर वे दोनुं ए बूढे थे। 8 एक दिन मन्दर म्ह जिब याजक के काम की बारी जकरयाह के टोल की आई, तो वो परमेसवर कै स्याम्ही पूजा करण खात्तर ओडै मौजूद था, 9 तो याजकां की रीत कै मुताबिक उसकै नाम की चिट्ठी लिकडी के प्रभु कै मन्दर म्ह जाकै धूप जलावै। 10 धूप जलाण कै बखत माणसां की भीड़ बाहरणै आँगण म्ह प्रार्थना करै थी। 11 उस बखत प्रभु का एक सुर्गदूत धूप की वेदी कै सोली ओड़ खड्ड्या दिख्या। 12 जकरयाह देखके घबराग्या अर घणा डरग्या। 13 पर सुर्गदूत उसतै बोल्या, “हे जकरयाह, डरै ना, क्यूँके परमेसवर नै तेरी प्रार्थना सुणली सै, अर तेरी धरआळी एलीशिबा तेरे खात्तर एक बेटा जाम्मेरी, अर तू उसका नाम यूहन्ना धरिये। 14 वे तेरे ताहीं तौ आनन्द अर खुरी देवैणा, साथ म्ह भोत-से माणस भी उसकै जन्म तै राज्जी होवैंगे। 15 क्यूँके वो प्रभु कै स्याम्ही घणा महान् होगा, अर उस ताहीं कदे भी मदिरा, नशीली चीज न्हीं पीणी सै, अर अपणी माँ की कोख तै ए पवित्र आत्मा तै भर ज्यागा। 16 अर इसाएल के भोत-से माणसां के मन प्रभु परमेसवर की ओड़ मोड़ देवैणा। 17 यूहन्ना एलिय्याह नबी की आत्मा अर सामर्थ म्ह भरा होगा, अर वो परमेसवर के राह नै तैयार करैणा, वो माँ-बाप का मन बालकां की ओड़ मोड़ देवैणा। हुकम ना मानण आळे अर्थमयाँ की सोच नै धर्मियाँ की सोच म्ह बदल देवैणा।” 18 जकरयाह नै सुर्गदूत तै बुझाया, “इस बात का मै किस तरियां बिश्वास कऱै? के यो म्हारे गैल होवैणा, क्यूँके मै तो बूढा सूं, अर मेरी धरआळी भी बूढी होरी सै।” 19 सुर्गदूत नै उसतै जवाब दिया, “मै जिब्राइल सूं, जो परमेसवर कै आगै खड्ड्या रहूँ सूं, अर मै तेरे तै बात करण अर सुसमाचार देण खात्तर भेज्या सूं। 20 अर देख जिब ताहीं ये बात पूरी ना हो लेंगी, तू यूँगा रहवैणा अर बोल न्हीं पावैणा क्यूँके तन्नै मेरी बातां का बिश्वास न्हीं करया, जो अपणे बखत पै पूरी होंगी।” 21 बाहर जकरयाह की बात देक्खण आळे माणस अचम्भे म्ह पडगे, कै उसनै मन्दर म्ह इतनी वार क्यूँ लागी। 22 जिब वो बाहर आया, तो उन ताहीं बोल न्हीं पाया आखर वो जाणगे कै

उसनै मन्दर म्ह कोए दर्शन पाया सै, अर वो उन ताहीं इशारे करदा रह्या, अर गूँगा होग्या। 23 जिब उसकी याजकीय सेवा कै दिन पूरे होए, तो वो यस्तेलेम नगर नै छोड़ अपणे घरां चल्या गया। 24 कई दिनां पाच्छै उसकी धरआळी एलीशिबा गर्भवती होग्यी, अर पाँच महिन्ने तैई अपणे-अप ताहीं ल्हकोए राख्या, 25 उसनै अपणे-अप तै कह्या, प्रभु नै इन दिनां म्ह दया कै मेहर करकै मेरै खात्तर इसा करया सै, “के माणसां के बीच म्ह मेरा अपमान दूर हो।” 26 एलीशिबा कै छठा महिना चढ़ रह्या था, परमेसवर की ओड़ तै जिब्राइल सुर्गदूत, गलील परदेस कै नासरत नगर म्ह, 27 एक कुँवारी की थोरै भेज्या जिसकी सगाई यूसुफ नाम कै दाऊद कै घराने कै एक माणस तै होई थी, उस कुँवारी का नाम मरियम था। 28 जिब्राइल सुर्गदूत नै उसके थोरै आकै कह्या, “आनन्द अर जयजयकार तेरी हो तेरे पै ईश्वर का अनुग्रह होया सै! प्रभु तेरे गैल्या सै!” 29 मरियम या बात सुणकै भोत घबरा ग्यी, अर सोच म्ह पड़ी कै इन बातां का कै मतलब हो सकै सै? 30 सुर्गदूत नै उसतै कह्या, “हे मरियम, डरै ना, क्यूँके परमेसवर का अनुग्रह तेरे पै होया सै। 31 अर देख, तू गर्भवती होगी, अर तेरे एक छोरा पैदा होगा, तू उसका नाम यीशु धरिये। 32 वो महान् होगा अर परमप्रधान का बेटा कुहावैगा, अर प्रभु परमेसवर उसकै पूर्वज दाऊद का सिंहासन उसनै देवैगा, 33 अर वो इसाएल कै घराने पै सदा राज करैगा, अर उसकै राज्य का अंत न्हीं होगा।” (aiōn g165) 34 मरियम नै सुर्गदूत तै कह्या, “यो किस तरियां होगा। मै तो कुँवारी सूं।” 35 सुर्गदूत नै उस ताहीं जवाब दिया, “पवित्र आत्मा तेरे पै आवैगा अर परमप्रधान की सामर्थ तेरे पै छाया करैगी, इस खात्तर वो जो बालक पैदा होण आळा सै, पवित्र अर परमेसवर का बेटा कुहावैगा। 36 अर सुण, तेरी रिस्तेदार जो एलीशिबा सै उसकै भी बुढ़ापे म्ह बेटा होण आळा सै, जो बाँझ कुहावै थी यो उसका, छठा महिना सै। 37 क्यूँके परमेसवर खात्तर कुछ भी मुश्किल कोनी सै।” 38 मरियम नै कह्या, “देख, मै प्रभु की दास्ती सूं, मेरै तै तेरे कहैए वचन कै मुताबिक हो।” फेर सुर्गदूत उसकै थोरै तै चल्या ग्या। 39 कई दिनां बाद मरियम ताल्ली तैयार होकै पहाड़ी परदेस कै यहूदा नगर म्ह ग्यी, 40 अर जकरयाह कै घर म्ह जाकै एलीशिबा ताहीं नमस्कार करया। 41 ज्योए एलीशिबा नै मरियम का नमस्कार सुण्या, त्योंए बालक उसके पेट म्ह उछल्या, अर एलीशिबा पवित्र आत्मा तै भरगी। 42 अर उसनै ऊँच्ची आवाज म्ह बोलकै कह्या, “तू बिरबानियाँ म्ह धन्य सै, अर तेरी कोख का फळ धन्य सै।” 43 मै खुशनसीब सूं जो प्रभु की माँ मेरै धोरै मिलण खात्तर आई? 44 देख, ज्योए तेरे नमस्कार का बोल मेरै कान्ना म्ह पड़ा, त्योंए बालक मेरै पेट म्ह खुशी तै उछल पड़ा। 45 धन्य सै तू क्यूँके तन्नै बिश्वास करया कै जो बात प्रभु नै तेरे ताहीं कही, वे पूरी होई।” 46 फेर मरियम नै कह्या, “मेरा जी प्रभु की बडाई कैरै सै। 47 अर मेरी आत्मा मेरै उद्धार करण आळे परमेसवर तै खुश होई,” 48 “क्यूँके उसनै अपणी दास्ती की लाचारी पै निगांह करी सै, इस खात्तर देक्खो, इब तै सारे युग-युग कै माणस मन्नै धन्य कहवैंगे,” 49 “क्यूँके उस

शक्तिशाली नै मेरै खात्तर बड़े-बड़े काम करै सै। उसका नाम पवित्र सै,” 50 “अर उसकी दया उनपै, जो उसतै डरै सै, पीढ़ी तै पीढ़ी बणी रहवै सै।” 51 “उसनै अपणी शक्ति तै बड़े-बड़े काम करै सै, अर जो अपणे-आप म्ह घमण्ड करै थे, उन ताहीं तितर-बितर कर दिया।” 52 “उसनै शासकों ताहीं उनकै सिंहासनां पै तै गिरा दिया, अर नम्र लोगां ताहीं ऊँच्चा उठा दिया।” 53 “उसनै भूख्या ताहीं बढिया चिज्जां तै छिकाया सै, अर साहूकारां ताहीं खाल्ली हाथ भेज दिया।” 54 “उसनै अपणे सेवक इसाएल ताहीं सम्भाल लिया, तोके अपणी उस दया नै याद करै,” 55 “जो उसनै अब्राहम अर उसकी पीढ़ी पै सदा खात्तर दया करण का वादा करया सै।” (aiōn g165) 56 मरियम करीब तीन महिने उसकै गेल्या रहकै उट्टी अपणे धरां चली ग्यी। 57 फेर एलीशिबा कै दिन पूरे होए अर उसनै बेटा जाम्या। 58 उसके पड़ोसी अर रिश्तेदारां नै या सुणकै के प्रभु नै उसपै बड़ी दया करी सै, उसकै गेल्या खुशी मनाई, 59 आठवे दिन वे बाल्क का खतना करण ताहीं आये, अर उसका नाम उसकै पिता के नाम पै जकरयाह धरणा चाहवै थे। 60 इस पर उसकी माँ एलीशिबा नै जवाब दिया, “ना, इसका नाम यूहन्ना धरो।” 61 उननै उस ताहीं कह्या, “तेरे रिश्तेदारा म्ह किसे का यो नाम न्हीं सै।” 62 फेर उसकै पिता तै इशारा करकै पूछ्या कै तू उसका नाम कै धरणा चाहवै सै? 63 उसनै लिखण की पट्टी पै लिख दिया, “उसका नाम यूहन्ना सै,” अर सारा नै अचम्भा होया। 64 फेर उसकी आवाज बोहङ् आई, अर वो बोल्लण अर परमेसवर का धन्यवाद करण लाग्या। 65 उसके लोवैधोरै कै सब रहण आळे डरगे, अर उन सारी बातां की चर्चा यहूदिया परदेस कै सारे पहाड़ी देश म्ह फैलगी, 66 अर सब सुणण आळा नै अपणे-अपणे मन म्ह विचार करकै कह्या, “यो बाल्क किसा होगा?” क्यूँके प्रभु की शक्ति उसकै साथ सै। 67 उसका पिता जकरयाह पवित्र आत्मा तै भरग्या, अर भविष्यवाणी करण लाग्या: 68 “प्रभु इसाएल का परमेसवर धन्य सै, क्यूँके उसनै अपणे माणसां पै निंगाह करी अर उनका उद्धार करया सै, 69 अर अपणे दास दाऊद कै धराने म्हरै खात्तर एक शक्तिशाली उद्धारकर्ता ताहीं भेज्या सै, 70 (भोत पैहले प्रभु नै अपणे पवित्र नवियां कै जरिये यो कह्या था) (aiōn g165) 71 के वो हमनै दुश्मनां तै बचावैगा अर मेरे तै नफरत करण आळे की ताकत तै भी हमनै बचावैगा। 72 उसनै कह्या, के वो म्हरै पूर्वजां पै दया करैगा अर अपणे पवित्र करार नै याद राक्खैगा, 73 अर वो करार जो उसनै म्हरै पूर्वज अब्राहम तै करया था, 74 उसनै वादा करया सै, के वो म्हारे दुश्मनां कै हाथ तै हमनै छुड़ावैगा, 75 ताके जिन्दगी भर उसकै आगै पवित्रता अर धार्मिकता तै बिना डरें उसकी सेवा कर सकां। 76 हे मेरे बेटे, तू परमप्रथान का नबी कुहावैगा, क्यूँके तू प्रभु का रास्ता त्यार करण कै खात्तर आगै-आगै चाल्लैगा, 77 तू उसकै माणसां नै उद्धार का ज्ञान देगा, जो पापां की माफी तै मिलै सै। 78 यो म्हारे परमेसवर की उस बड़ी दया तै होगा। जिस तरियां सूरज चमकै सै, उसी तरियां मसीहा भी सुर्ग तै म्हारे धोरै आवैगा 79 ताके अन्धेरे अर मौत की छाया म्ह बैठण आळा

नै रोशनी दे, वा रोशनी सही राह पै चाल्लण म्ह म्हारी मदद करैगी।” 80 अर बाल्क यूहन्ना देह अर आत्मा म्ह मजबूत होन्दा गया, अर इसाएल के माणसां पै जाहिर होण तै पैहले वो जंगल-बियाबान म्ह रह्या।

2 उन दिनां म्ह औपुस्तुस कैसर की कान्ही तै हुकम लिकड़ाया के, सारे रोमी साम्राज्य कै माणसां की जनगणना करकै उनके नाम लिक्खे जावै। 2 (या पैहली नाम लिखाई उस बखत होई, जिब विवरिनियुस सीरिया परदेस कै इलाके का राज्यपाल था)। 3 सारे माणस नाम लिखाण कै खात्तर अपणे-अपणे पुश्तैनी नगर म्ह गए। 4 आखर यूसुफ भी इस करकै के वो भी दाऊद कै कुण्बे अर पीढ़ी का था, गलील परदेस कै नासरत नगर तै गया, यूदिया परदेस म्ह दाऊद कै बैतलहम नगर म्ह आया, 5 ताके अपणी मंगेतर मरियम कै गेल्या जो गर्भवती थी, उस जनगणना म्ह नाम लिखवावै। 6 उनके बैतलहम नगर रहन्दे होए उसके जाम्मण के दिन पूरे होए, 7 अर मरियम नै अपणा जेटु छोरा जाम्या अर उस ताहीं लत्ते म्ह लपेटकै खोर म्ह धरया, क्यूँके उनके खात्तर सराये म्ह जगहां कोनी थी। 8 अर उस देश म्ह कई पाली थे, जो रात नै मदानां म्ह रहकै अपणी भेड़ों के टोळ की रुखाळ करै थे। 9 अर उस्से रात नै प्रभु का एक सुर्गदूत उनकै धोरै आण खड़ा होया, अर प्रभु का प्रताप उसकै उप्पर चमक्या, अर वे घणे डरगे। 10 सुर्गदूत नै उनतै कह्या, “मतना डरो, क्यूँके देक्खों, मै थमै धैणी खुशी की खबर सुणाऊँ सूँ जो सारे माणसां खात्तर होगी, 11 आज दाऊद कै नगर बैतलहम म्ह थारे खात्तर एक उद्धारकर्ता जाम्या सै, अर योए मसीह प्रभु सै। 12 अर उसकी थारे खात्तर या निशान्नी होगी के थम एक बाल्क नै लत्ते म्ह लिपट्या होड़ अर खोर म्ह लेट्या होड़ पाओगे।” 13 फेर चाणचक उस सुर्गदूत गेल्या सुर्गदूतां का एक टोळ परमेसवर की भगित करदे होए अर न्यू कूहन्दे दिख्या, 14 “अकास म्ह परमेसवर की महिमा अर धरती पै उन माणसां म्ह जिनतै वो राज्जी सै, शान्ति हो।” 15 जिब सुर्गदूत उसकै धोरै तै सुर्ग म्ह चले गए, तो पालीयाँ नै आप्स म्ह कह्या, “आओ, हम बैतलहम नगर जाकै या बात जो होई सै, अर जो प्रभु नै म्हरै ताहीं बताई थै, देक्खाऊ।” 16 अर उननै जिबे जाकै मरियम अर यूसुफ ताहीं अर खोर म्ह उस बाल्क ताहीं लेट्या देख्या। 17 जिब पालीयाँ नै बाल्क ताहीं देख्या तो उननै वे सारी बात जो सुर्गदूत नै इस बाल्क कै बाबत उनतै कही थी, यूसुफ अर मरियम ताहीं बताई। 18 अर पालीयाँ की ये बात सुणकै सारे सुणण आळा नै अचम्भा करया। 19 पर मरियम ये बात अपणे मन म्ह धरकै सोचदी रई। 20 अर जिसा पालीयाँ ताहीं सुर्गदूतां नै कह्या था, सब कुछ उसाए सुणकै अर देखकै, वे परमेसवर की महिमा अर जय-जयकार करदे होए बोहङ्गे। 21 जिब आठ दिन पूरे होए अर उसकै खतने का बखत आया, तो उसका नाम यीशु धरया गया, अर यो नाम सुर्गदूत के जरिये, मरियम के गर्भ म्ह आण तै पैहल्या बताया गया था। 22 जिब मूसा नबी कै नियम-कायदा कै मुताबिक मरियम अर यूसुफ कै सूच्ये होण के दिन पूरे होए, तो वे दोनु यीशु नै यशश्वलेम नगर के मन्दर म्ह लेगे के प्रभु कै स्याम्ही ल्याए, 23 (जिसा के प्रभु के नियम-कायदा

मह लिखा होड़ सै: हेरेक जेट्रा बेट्टा प्रभु के खात्तर पवित्र ठहरैगा।) 24 अर प्रभु के नियम-कायदा के वचन के मुताबिक “एक कबूतर या मोट्टी के दो बच्चे ल्याकै बलि करै।” 25 उस बखत यरुशलेम नगर म्ह शमौन नाम का एक माणस था। वो धर्मी अर परमेसवर का भगत था, अर वो मसीह की बाट देखण लागरया था, ताके इसाएल के माणसां नै शान्ति मिलै अर पवित्र आत्मा उसपै था। 26 अर पवित्र आत्मा के जरिये उसपै जाहिर होया था के जिब तक वो प्रभु के मसीह नै देख न्ही लेगा, जद ताहीं मौत नै कोनी देखैगा। 27 शमौन आत्मा की अगुवाई तै मन्दर म्ह आया, अर जिब माँ-बाप उस बालक यीशु ताहीं भीत्तर ल्याए, ताके उसके खात्तर नियम-कायदा के रिवाज के मुताबिक करै, 28 फेर उसनै बालक यीशु ताहीं अपणी गोदी म्ह लिया अर परमेसवर का धन्यवाद करकै कहा 29 “हे प्रभु मालिल्क, इब तू अपणे दास नै अपणे वचन कै मुताबिक शान्ति तै इब मर जाणदे, 30 क्यूँके मेरी आँखां नै उद्धारकर्ता ताहीं देख लिया सै, 31 जिस ताहीं तन्नै सारे देशां के माणसां कै स्यामी भेज्या सै, 32 ताके वो गैर यहूदियाँ ताहीं चाँदणा देण कै खात्तर उजाला, अर तेरे अपणे माणस इसाएल की महिमा हो।” 33 यीशु के माँ-बाप इन बात्ता तै, जो शमौन नै यीशु कै बारें म्ह कही थी, सुणकै अचम्भा करै थे। 34 फेर शमौन नै उन ताहीं आशीर्वाद देकै, उसकी माँ मरियम तै कहा, “देख, यो बालक इसाएल म्ह भोत-से माणसां के पतन अर उत्थान का कारण बणैगा, अर या निशानी के रूप म्ह परमेसवर की ओड़ तै भेज्या होया सै, अर भोत सारे लोग उसकै बिरुध बोल्लैगे। 35 इसका नतिज्जा यो होगा के भोत सारे मनां के विचार जाहिर हो जाऊँगे, अर एक भोत बड़ा दुख तेरे पै आवैगा।” 36 अशेर कै गोत म्ह तै हन्नाह नामक फनूएल की बेट्टी एक नवी थी। वा घणी बूढ़ी थी, अर ब्याह होण कै सात साल पाछ्ये उसका धणी गुजर ग्या। 37 वा चौरासी साल तै बिधा थी: अर मन्दर म्ह जाणा कोनी छोड़ा करै थी, पर ब्रत अर प्रार्थना कर-करकै रात-दिन भगति करया करै थी। 38 जिब यूसुफ, मरियम अर बालक यीशु, मन्दर म्ह थे, तो हन्नाह उनकै धोरे आई अर परमेसवर का धन्यवाद करण लाग्या, अर उसनै उन सारया ताहीं इस बालक यीशु के बारें म्ह बताया, जो यरुशलेम कै छुटकारै की बाट देखै थे। 39 यहूदी नियम-कायदा नै पूरा करण कै बाद यूसुफ अर मरियम गलील परदेस के नासरत नगर म्ह अपणे घरां बोहड़ आये। 40 अर बालक यीशु बढ़दा, अर मजबूत होन्दा, अर बुद्धि तै भरपूर होंदा गया, अर परमेसवर का अनुग्रह उसपै था। 41 यीशु के माँ-बाप हेरेक साल फसह कै त्यौहार म्ह यरुशलेम जाया करै थे। 42 जिब यीशु बारहां साल का होया, तो वे त्यौहार की रिति कै मुताबिक यरुशलेम नगर म्ह गए। 43 जिब यीशु के माँ-बाप त्यौहार मनाकै अपणे घरां बोहड़न लागे थे, तो बालक यीशु यरुशलेम म्ह रहाया, अर इसका उसकै माँ-बाप नै कोनी बेरा था। 44 वे न्यू समझकै के वो दुसरे मुसाफिरां कै गेल्या होगा, एक दिन का सफर पार करणे: अर उस ताहीं अपणे कुण्बे आला म्ह अर जाण-पिच्छाण आला म्ह टोहङ लागे। 45 पर जिब कोनी मिल्या, टोन्दे-

टोन्दे यरुशलेम म्ह दुबारै बोहड़गे, 46 अर तीन दिन कै पाच्छे उननै वो मन्दर के आँगण म्ह उपदेशकां कै बिचाळै बेठे, उनकी सुणदे अर उनतै सवाल बुझते पाया। 47 जितने उसकी सुणै थे, वे सारे उसकी समझ अर उसके जवाब तै हैरान थे। 48 फेर उसके माँ-बाप उस ताहीं देखकै हैरान होए अर उसकी माँ नै उसतै कहा, “हे बेटे, तन्नै म्हारे गेल्या इसा बरताव क्यातै करया? देख, तेरा बाप अर मै तन्नै ढूँढ़-ढूँढ़के परेशान होरे थे?” 49 उसनै उनतै कहा, “थम मनै क्यातै टोहो सो? के बेरा कोनी मनै मेरे पिता कै घरां होणा जस्ती सै?” 50 पर जो बात उसनै उनतै कही, उननै कोनी समझया। 51 फेर वो उनकै गेल्या गया, अर नासरत म्ह आया, अर उनकै बस म्ह रह्या, अर उसकी माँ नै ये सारी बात अपणे मन म्ह राक्खी। 52 अर यीशु समझ अर कद-काढ़ी म्ह, अर परमेसवर अर माणसां कै अनुग्रह म्ह बढ़दा गया।

3 जिब रोम साप्राज्य म्ह तिबिरियुस कैसर राजा बण्या तो उसके पंद्रहवें

साल म्ह जिब चौथाई देश म्ह पुनित्युस पिलातुस यहूदिया परदेस का राज्यपाल था, अर हेरोदेस गलील परदेस म्ह इत्यैर्या अर त्रखोनितिस परदेस म्ह उसका भाई फिलिप्पुस राज करै था, अर अबिलेने परदेस म्ह लिसानियास राज करै था 2 अर जिब हन्ना अर कैफा महायाजक थे, उस बखत परमेसवर का वचन जंगल-वियाबान म्ह जकरयाह के बेटै यूहन्ना के धोरे पौंहच्या। 3 यूहन्ना यरदन नदी कै लोवै-धोवै कै साब्दे परदेस म्ह जाकै, पापां की माफी का प्रचार करण लाग्या, के पाप करण छोड़ द्यो अर बपतिस्मा ल्यो। 4 जिसा यशायाह नवी के कहे होए वचनां की किताब म्ह लिख्या सै: “जंगल-वियाबान म्ह एक रुक्के मारणीये का वचन होरया सै के, प्रभु की राही त्यार करो, उसकी सङ्क दीधी बणाओ। 5 हेरेक घाटी भर दी जावैगी, अर हेरेक पहाड़ अर टिल्ला तधै करया जावैगा, अर जो टेढ़ा सै सीधा, अर जो ऊँच्चा नीच्चा सै वो बरोबर राह बणैगा। 6 अर हेरेक माणस परमेसवर के उद्धार नै देक्खैगा।” 7 जो भीड़ की भीड़ उसतै बपतिस्मा लेण नै लिकड़ के आवै थी, उनतै यूहन्ना कहवै था, “हे साँप के सप्पोलों जिसे माणसों, थारे तै कौण बताया के परमेसवर के आण आले छो तै भाग्यो। 8 इस खात्तर जै थमनै सच म्ह पाप करण छोड़ दिया सै तो यो दिखाण खात्तर भले काम तो करो, अर अपणे-अपणे मन म्ह न्यू मतना सोच्यो के हम अब्राहम के वंश तै सां, क्यूँके मै थमनै कहूँ सूँ के परमेसवर इन पत्थरां तै भी अब्राहम के खात्तर ऊलाद पैदा कर सकै सै। 9 इब कुहाड़ दरखतां की जड़ पै धरया सै, इस करकै जो-जो दरखत बढ़िया फळ न्ही ल्यांदा, वो काढ्या अर आग म्ह झोक्या जावैगा।” इसका मतलब यो सै परमेसवर उन सारया नै दण्ड देवैगा जो पाप करण न्ही छोड़ते। 10 फेर माणसां नै उसतै बुझ्या, “तो हम परमेसवर के दण्ड तै बचन खात्तर के करा?” 11 उसनै जवाब दिया, “जिसकै धोरे दो कुड़ते हों, वो उसकै गेल्या जिसकै धोरे न्ही सै उसकै गैल बांड ल्यो अर जिसकै धोरे खाणा हो, वो भी न्यू करै।” 12 चुंगी लेण आले भी बपतिस्मा लेण

आए, अर उसतै बुझया, “हे गुरु, हम के करा?” 13 उसनै उनतै कह्या, “ईमानदार रहों अर जितना रोमी सरकार नै कर तय करया सै, उसतै ज्यादा ना लियो।” 14 कुछ सिपाहियाँ नै भी उसतै बुझया, “हम के करा?” उसनै उनतै कह्या, “किसे पै जुलम करकै पईसे ना लियो, अर ना झूठा इल्जाम लाइयो, अर अपणी तन्खा पै संतोष करियो।” 15 जिब माणस मसीहा की आस लगाये होए थे, अर सारे अपणे-अपणे मन म्ह यूहन्ना के बाबत विचार करे थे, के योए मसीह तो न्हीं सै। 16 तो यूहन्ना नै उन सारया तै कह्या, “मैं तो थमनै पाणी तै बपतिस्मा दिँसूँ सूँ पर वो आण आळा सै, जो मेरै तै घणा शक्तिशाली सै, मैं तो इस लायक भी कोनी के उसके जूत्याँ के फिते खोल सकूँ, वो थमनै पवित्र आत्मा अर आग तै बपतिस्मा देवैगा। 17 उसका छाज, उसके हाथ म्ह सै, अर वो अपणा खलिहां आच्छी तरियां साफ करैगा, अर नाज नै अपणे कोठार (गोदाम) म्ह कठुा करैगा, पर भुर्णी ताहीं उस आग म्ह जलावैगा जो कदे बुझौ कोनी।” 18 आखर वो घणीए शिक्षा दे-देकै माणसां तै सुसमाचार सुणान्दा रह्या। 19 पर जिब उसनै चौथाई देश म्ह गलील परदेस के राजा हेरोदेस तै उसके भाई फिलिप्पुस की धरआळी हेरोदियास कै बाबत अर सारे बुरे काम्मां कै बाबत जो उसनै करे थे, उल्हाणा दिया, 20 तो हेरोदेस नै उन सारया तै बढ़कै यो बुरा काम भी करया के यूहन्ना ताहीं जेळ म्ह गेर दिया। 21 जिब सारे माणसां नै बपतिस्मा लिया अर यीशु भी बपतिस्मा लेकै प्रार्थना कर रह्या था, तो अकास खुलग्या, 22 अर पवित्र आत्मा शारीरिक रूप म्ह कबूतर की तरियां उसपै उतरया, अर परमेसवर सुर्ग म्ह तै बोल्या “तू मेरा प्यारा बेट्टा सै, मै तेरतै राजीनी सूँ।” 23 जिब यीशु खुद उपदेश देण लाग्या, तो करीबन तीस साल की उम्र का था अर (जिसा समझा जावै सै) यीशु यूसुफ का बेट्टा था, अर यूसुफ एली का बेट्टा था, 24 अर एली मत्तात का बेट्टा था, अर मत्तात लेवी का बेट्टा था, अर लेवी मलकी का बेट्टा था, अर मलकी यन्ना का बेट्टा था, अर यन्ना यूसुफ का बेट्टा था, 25 अर यूसुफ मत्तियाह का बेट्टा था, अर मत्तियाह आमोस का बेट्टा था, अर आमोस नहूम का बेट्टा था, अर नहूम असल्याह का बेट्टा था, अर असल्याह नोगह का बेट्टा था, 26 अर नोगह मात का बेट्टा था, अर मात मत्तियाह का बेट्टा था, अर मत्तियाह शिरी का बेट्टा था, अर शिरी योसेख का बेट्टा था, अर योसेख योदाह का बेट्टा था, 27 अर योदाह यूहन्ना का बेट्टा था, अर यूहन्ना रेसा का बेट्टा था, अर रेसा जरुब्बाबिल का बेट्टा था, अर जरुब्बाबिल शालतियेल का बेट्टा था, अर शालतियेल नेरी का बेट्टा था, 28 अर नेरी मलकी का बेट्टा था, अर मलकी अद्वी का बेट्टा था, अर अद्वी कोसाम का बेट्टा था, अर कोसाम इलमोदाम का बेट्टा था, अर इलमोदाम एर का बेट्टा था, 29 अर एर येश का बेट्टा था, अर येश इलाजार का बेट्टा था, अर इलाजार योरीम का बेट्टा था, अर योरीम मत्तात का बेट्टा था, अर मत्तात लेवी का बेट्टा था, 30 अर लेवी शमौन का बेट्टा था, अर शमौन यहूदा का बेट्टा था, अर यहूदा यूसुफ का बेट्टा था, अर यूसुफ योनान का बेट्टा था, अर योनान इलयाकीम का बेट्टा था, 31 अर इलयाकीम

मलेआह का बेट्टा था, अर मलेआह मिन्नाह का बेट्टा था, अर मिन्नाह मत्तता का बेट्टा था, अर मत्तता नातान का बेट्टा था, अर नातान दाऊद का बेट्टा था, 32 अर दाऊद यिशै का बेट्टा था, अर यिशै ओबेद का बेट्टा था, अर ओबेद बोआज का बेट्टा था, अर बोआज सलमोन का बेट्टा था, अर सलमोन नहशोन का बेट्टा था, 33 अर नहशोन अमीनादाब का बेट्टा था, अर अमीनादाब अर्नी का बेट्टा था, अर अर्नी हिसोन का बेट्टा था, अर हिसोन फिरिस का बेट्टा था, अर फिरिस यहूदा का बेट्टा था, 34 अर यहूदा याकूब का बेट्टा था, अर याकूब इसहाक का बेट्टा था, अर इसहाक अब्राहम का बेट्टा था, अर अब्राहम तिरह का बेट्टा था, अर तिरह नाहोर का बेट्टा था, 35 अर नाहोर सरूग का बेट्टा था, अर सरूग रऊ का बेट्टा था, अर रऊ फिलिंग का बेट्टा था, अर फिलिंग एबिर का बेट्टा था, अर एबिर शिलह का बेट्टा था, 36 अर शिलह केनान का बेट्टा था, अर केनान अरफक्षद का बेट्टा था, अर अरफक्षद शेम का बेट्टा था, अर शेम नूह का बेट्टा था, अर नूह लिमिक का बेट्टा था, 37 अर लिमिक मथूशिलह का बेट्टा था, अर मथूशिलह हनोक का बेट्टा था, अर हनोक यिरिद का बेट्टा था, अर यिरिद महललेल का बेट्टा था, अर महललेल केनान का बेट्टा था, 38 अर केनान एनोश का बेट्टा था, अर एनोश शेत का बेट्टा था, अर शेत आदम का बेट्टा था, अर आदम परमेसवर का बेट्टा था।

4 फेर यीशु पवित्र आत्मा तै भरया होया, यरदन नदी तै बोहड़या, अर चालीस दिन ताहीं पवित्र आत्मा कै सिखाण तै जंगल-बियाबान म्ह हाण्डडा रह्या, 2 उन चालीस दिनां म्ह शैतान उस ताहीं परखता रह्या। उन दिनां म्ह उसनै कुछ न्हीं खाया, अर जिब वे दिन पूरे होए, तो उसनै भूख लाग्यी। 3 फेर शैतान नै उसतै कह्या, “जै तू परमेसवर का बेट्टा सै, तो साबित करदे, अर इस पत्थर तै कह, के रोटी बण जावै, ताके तू इननै खा सकै।” 4 यीशु नै उस ताहीं जवाब दिया, “पवित्र ग्रन्थ म्ह लिख्या सै: ‘माणस सिर्फ रोटी तै जिन्दा कोनी रहन्दा।’” 5 फेर शैतान उसनै घणे ऊँच्चे पहाड़ पै लेग्या अर उस ताहीं माड़ी वार म्ह दुनिया के राज्य दिखाए, 6 अर उसतै बोल्या, “मै यो सारा हक, अर उसकी शानों-शोकत तन्नै दियुँगा, क्यूँकि वो मेरैतै सौंस्प्य गया सै: अर जिसनै चाहूँ उसनै दे दिँसूँ सूँ।” 7 इस करकै जै तू मेरी भगति करै, तो यो सब कुछ तेरा हो ज्यागा।” 8 यीशु नै उस ताहीं जवाब दिया, “लिख्या सै: ‘तू प्रभु अपणे परमेसवर की भगति कर, अर सिर्फ उस्से की भगति कर।’” 9 फेर उसनै उस ताहीं पवित्र ग्रन्थ म्ह लिख्या सै: ‘वो तेरे बाबत अपणे सुर्गदूतां नै हुकम देवैगा, के वे तेरी रुखाली कै,’” 11 “अर वे तन्नै हाथों-हाथ उठा लेवैगें, इसा ना हो के तेरे पायां म्ह पत्थर तै ठेस लाग्यै।” 12 यीशु नै उस ताहीं जवाब दिया, “पवित्र ग्रन्थ म्ह यो भी लिख्या सै: ‘तू प्रभु अपणे परमेसवर नै ना परखै।’” 13 जिब शैतान उस ताहीं परख कै हार लिया,

तो कुछ बखत खात्तर उसके धोरे तै चल्या गया। 14 फेर यीशु पवित्र आत्मा की सामर्थ्य तै भैरवा होड़ गलील परदेस बोहड़या, अर उसकी चर्चा लोवै-धोवै के सरे देशां म्ह फैलगी। 15 वो उनके आराधनालयाँ म्ह उपदेश सुणान्दा रह्या, अर सारे उसकी बडाई करै थे। 16 फेर यीशु नासरत नगर म्ह आया, जड़े पाठा-पोस्या गया था, अर अपणी रिति कै मुताबिक आराम कै दिन आराधनालय म्ह जाकै पवित्रग्रन्थ पढण कै खात्तर खड़ा होया। 17 यशायाह नबी की किताब उस ताहीं दी गई, अर उसनै किताब खोल कै, वा जगहां लिकाड़ी जड़े लिखा था: 18 “प्रभु का आत्मा मेरै पै सै, इस करकै के उसनै कंगालां ताहीं सुसमाचार सुणाण कै खात्तर मेरा अभिषेक करया सै, अर मेरै ताहीं इस करकै भेजा सै के कैदियाँ नै छुड़ाण का अर आंध्याँ नै देखण जोगा बणाण की खुशी की खबर का प्रचार करूँ अर कुचले होया नै छुड़ाऊँ, 19 अर प्रभु कै राज्ञी रहण कै साल का प्रचार करूँ।” 20 फेर यीशु नै किताब बन्द करकै सेवक कै हाथ्यां म्ह दे दी अर बैठ्या, अर आराधनालय के सारे माणसां की निगांह उसपै थी। 21 फेर वो उनतै कहण लागया, “आज ए यो पवित्र ग्रन्थ म्ह लिखा होड़ वचन थारे स्याम्ही पूरा होया।” 22 सारया नै उस ताहीं सराह्या, अर जो अनुग्रह की बात उसकै मुँह तै लिकड़ै थी, उनतै हैरान होए, अर कहण लागे, “के यो यूसुफ का छोरा कोनी?” 23 उसनै उनतै कह्या, “थम मेरै पै या कहावत जसर कहोरे के है वैद्य, खुद नै ठीक कर! जो कुछ हमनै सुण्या के कफरनहूम नगर म्ह करया गया सै, उसनै उरै खुद कै नगर म्ह भी कर!” 24 अर उसनै कह्या, “मै थमनै सच-सच कहूँ सूं कोए नबी अपणे गाम म्ह आदर-मान कोनी पान्दा।” 25 मेरी सुणो, के एलियाह नबी कै दिनां म्ह जिब साढे तीन साल ताहीं अकास तै बारिस न्ही होई, उरै ताहीं के सारे देश म्ह बड़ा अकाल पड़या, तो इसाएल देश म्ह घणीए बिधवा थी। 26 पर एलियाह उन म्ह तै किसे कै धोरै कोनी भेज्या गया, सिर्फ सैदा परदेस कै सारफत नगर म्ह एक बिधवा कै धोरै। 27 अर एलीशा नबी कै बखत इसाएल देश म्ह घणे कोढ़ी थे, पर सीरिया परदेस का सेनापति नामान नामक कोढ़ी नै छोड़कै उन म्ह तै कोए शुद्ध कोनी करया गया।” 28 ये बात सुणाद-ए जितने आराधनालय म्ह थे, सारया कै छो उठग्या, 29 अर उठकै उस ताहीं नगर तै बाहरणै लिकाड़या, अर जिस पहाड़ पै उनका नगर बसरया था, उसकी चोटी पै ले चाल्ले, ताके उसनै उड़े तै तळे गेरकै मार दें। 30 पर यीशु उनकै बिचालै तै लिकड़कै चल्या गया। 31 फेर वो गलील परदेस कै कफरनहूम नगर म्ह गया, अर आराम कै दिन माणसां ताहीं उपदेश देवै था। 32 वे उसके उपदेश तै हैरान होगे क्यूँकि उसका वचन हक कुधां था। 33 आराधनालय म्ह एक माणस था, जिस म्ह ओपरी आत्मा थी, उसनै जोर तै किल्की मारी, 34 “हे नासरत के यीशु, हमनै तेरे तै के काम? के तू म्हारा नाश करण नै आया सै? मै तनै जांगु सूं तू कौण सै? तू परमेस्वर की ओड़ तै भेज्या होया पवित्र मसीह सै!” 35 यीशु नै उसतै धमकाकै कह्या, “चुपचाप रहै, अर इस माणस म्ह तै लिकड़ जाए!” फेर ओपरी आत्मा उसनै बिचालै पटकै बिना नुकसान

करे उस म्ह तै लिकड़गी 36 इसपै सारे हैरान होए, अर वे आप्स म्ह बतलाण लागे, “यो किसा वचन सै? क्यूँकि वो हक अर सामर्थ्य कै गेल्या ओपरी आत्मायाँ नै हुकम देवै सै, अर वे लिकड़ जावै सै।” 37 इस करकै चौगरदे नै हरेक जगहां उसका जिक्र होण लाग्या। 38 यीशु आराधनालय म्ह तै उठकै शमौन कै घरां गया। शमौन की साससू कै बुखार चढ़रया था, अर उननै उस खात्तर उसतै बिनती करी। 39 उसनै उसकै धोरै खड़ा होकै बुखार ताहीं धमकाया अर बुखार उतर गया, अर वो जिब्बे उतकै उनकी सेवापाणी करण लागी। 40 सूरज ढूबदे बखत, जिन-जिनकै उरै माणस कई ढाळ की बिमारियाँ म्ह पड़े होए थे, वे सारे उननै उसकै धोरै ल्याए, अर उसनै एक-एक पै हाथ धरकै उन ताहीं ठीक करया। 41 अर ओपरी आत्मा भी किल्की मारदी अर न्यू कहन्दी होई के, “तू परमेस्वर का बेटा सै” धणखरया म्ह तै लिकड़ी। पर वो उननै धमकांदा अर बोल्लण न्ही देवै था, क्यूँकि वे जाणी थी के यीशु ए परमेस्वर की ओड़ तै भेज्या होया मसीह सै। 42 जिब सबैरै होई तो यीशु लिकड़कै एक बियाबान जगहां म्ह गया, अर भीड़ की भीड़ उसनै टोटन्दी होई उसकै धोरै आई, अर उसनै रोकण लागी के वो उनकै धोरै तै न्ही जावै। 43 पर उसनै उनतै कह्या, “मन्ने दुसरे नगरां म्ह भी परमेस्वर कै राज्य का सुसमाचार सुणाणा जरूरी सै, क्यूँकि मै इसे खात्तर भेज्या गया सूं।” 44 अर वो गलील परदेस के आराधनालयाँ म्ह उपदेश सुणान्दा रह्या।

5 जिब यीशु गन्नेसरत की झील कै किनारे पै खड़ा था, तो भीड़ परमेस्वर का वचन सुणाण कै खात्तर उस ताहीं धेरै खड़ी थी, तो इसा होया 2 के उसनै झील कै किनारे दो किस्ती लागी होड़ देक्खी, अर मलुअरे उनपै तै उतरकै मच्छियाँ के जाळ नै धोवै थे। 3 उन किस्तियाँ म्ह तै एक पै, जो शमौन की थी, चढ़कै यीशु नै उसतै बिनती करी के किनारे तै माड़ा सा डिंगा ले चाल्लै। फेर वो किस्ती पै बैठकै माणसां नै उपदेश देण लाग्या। 4 जिब यीशु नै माणसां तै ये बात कर ली, तो शमौन तै बोल्या, “झंझे म्ह ले चाल, अर मच्छी पकड़ण खात्तर अपणा जाळ गेर।” 5 शमौन नै उसतै जवाब दिया, “हे गुरु, हमनै सारी रात मेहनत करी अर कुछ न्ही मिल्या, फेरभी तेरे कहण तै जाळ गेऱ्हाँ।” 6 जिब पतरस अर उसके साथियाँ नै इसा करया, तो घणी मच्छी धेर ल्याए, अर उनके जाळ पाटूण नै होण लाग्ये। 7 इस करकै उननै दुसरी किस्ती म्ह बेठे अपणे साथियाँ ताहीं भी इशारा करकै मदद खात्तर बुलाया, वे आ ग्ये अर उननै आकै दोन्हु किस्ती उरै ताहीं भर ली के डूबण लागी। 8 न्यू देखकै शमौन पतरस यीशु कै पायां म्ह पड़ग्या, अर बोल्या, “हे प्रभु, मेरै धोरै तै जा, क्यूँकि मै पापी माणस सूं।” 9 क्यूँकि इतनी मच्छियाँ कै पकड़े जाण तै उसनै अर उसके साथियाँ नै घणा अचम्भा होया, 10 अर उससे तरियां जब्दी के बेटे याकूब अर यूहन्ना नै भी, जो शमौन के दुसरे साथी थे, अचम्भा होया। फेर यीशु नै शमौन तै कह्या, “मतना डरो, इब तै मै थमनै माणसां ताहीं कठूँ करण आळे बणाऊँगा ताके वो मेरे चेल्लें बणो।” 11 अर वे किस्तियाँ नै किनारे पै

लियाए अर वे जिब्बे सब कुछ छोड़कै उसके चेल्लें बणण खात्तर उसके पाढ़े हो लिये। 11 जिब वो किसे नगर म्ह था, तो उड़े कोढ़ तै भरया होया एक माणस आया, अर उसनै यीशु ताहिं देखकै अर मोध्धा पड़कै बिन्नती करी, “हे प्रभु, जै तू चाहवै तो मनै ठीक कर सकै सै।” 13 उसनै हाथ बढ़ाकै उस ताहिं छुया अर बोल्या, “पै चाहूँ सूं तू इस बीमारी तै ठीक हो ज्या।” अर उसका कोढ़ जिब्बे जान्दा रह्या। 14 फेर उसनै उस ताहिं समझाकै कह्या, “किसे तै ना कहिए, पर जाकै अपणे-आपनै याजक ताहिं दिखा, अर अपणे कोढ़ तै ठीक होण कै बारै म्ह जो कुछ मूसा नवी नै जो पवित्र ग्रन्थ म्ह चढ़ावा बताया सै उसनै चढ़ा, के माणसां खात्तर या गवाही हो, के ठू ठीक होग्या सै।” 15 पर यीशु का जिक्र हरेक जगहां फैल्या गया, अर भीड़ की भीड़ उसकी सुणण कै खात्तर अर अपणी बिमारियाँ तै ठीक होण कै खात्तर कट्ठी होई। 16 पर वो सुनसान जगहां म्ह न्यारा जाकै प्रार्थना करया करे था। 17 एक दिन इसा होया के यीशु उपदेश देण लागरया था अर ठीक करण खात्तर प्रभु की सामर्थ उसकै गेल्या थी, अर फरीसी अर शास्त्री उड़ै बेट्ठे थे, जो गलील अर यहूदिया परदेस कै हरेक गाम अर युश्शलेम नगर तै आए थे। 18 उस बख्त कर्ड एक माणस नै जो लकवे का बीमार था, खाट पै ल्याए, अर वे उसनै भीत्तर ले जाण अर यीशु कै स्याम्ही धरण का जुगाड़ टोह लागरे थे। 19 पर जिब भीड़ कै कारण उसनै भीत्तर कोनी लै जा सके तो उननै छात पै चढ़कै अर टाटी हाटाकै, उस ताहिं बिस्तर समेत बिचाळै यीशु कै स्याम्ही उतार दिया। 20 उसनै उनका बिश्वास देखकै उसतै बोल्या, “हे भाई, मनै तेरे पाप माफ कर दिये।” 21 फेर शास्त्री अर फरीसी बहस करण लागे, “यो कौण सै जौ परमेसवर की बुराई करै सै? परमेसवर नै छोड़ और कौण पाप माफ कर सकै सै?” 22 यीशु नै उनकै मन की बात जाणकै, उनतै कह्या, “थम अपणे मन म्ह क्यूँ विवाद करण लागरे सो की मै परमेसवर की बुराई करूँ सूं? 23 आसान कै सै? के यो कहणा के ‘तेरे पाप माफ होए’, या यो कहणा के ‘उठ अर हॉड-फिर?’ 24 पर इस करकै के थम जाणो, के मुझ माणस कै बेट्ठे नै धरती पै पाप माफ करण का भी हक सै।” उसनै उस लकवे के मरीज तै कह्या, “मै तेरे तै कहूँ सूं के अपणे बिस्तर ठाकै अपणे घरां चल्या जा।” 25 वो जिब्बे उनकै स्याम्ही उठाया, अर जिस खाट पै पड़या था उसनै ठाकै, परमेसवर की बड़ाई करदा होया अपणे घरां चल्या गया। 26 फेर सारे हैरान होए अर परमेसवर की बड़ाई करण लागे अर घणे डरकै बोल्ले, “आज हमनै अनोक्खी बात देक्खी सै।” 27 इसकै बाद यीशु बाहरपै गया अर लेवी नाम के एक चुंगी लेण आळे ताहिं चौकी पै बेट्ठे देख्या, अर उसतै बोल्या, “मेरा चेल्ला बणण खात्तर मेरै पाढ़े हो ले।” 28 फेर वो सारा कुछ छोड़कै उसकै पाढ़े हो लिया। 29 फेर लेवी नै अपणे घरां उसकै खात्तर बड़ा जिम्मण का न्योंदा दिया, अर चुंगी लेण आळे अर दुसरे माणसां की जो उसकै गेल्या खाणा खाण नै बेट्ठे थे, एक बहु भीड़ थी। 30 इसपै फरीसी अर उनके शास्त्री उसके चेल्यां तै न्यू कहकै बिरडाण लागे, “थम चुंगी लेण आळे अर जिननै लोग

पापी कहवै सै, उनकै गेल्या खाओ-पीओ सो?” 31 यीशु नै उनतै जवाब दिया, “वैद आच्छे-बिच्छ्यां खात्तर कोनी, पर बिमारां खात्तर जरूरी सै। 32 मै धर्मियाँ नै न्ही, पर पापियाँ नै मन पलटन कै खात्तर बुलाण आया सूं।” 33 उनतै उसतै कह्या, “यूहन्ना के चेल्ले तो बाबार ब्रत अर प्रार्थना करया करै सै अर उसरे तरियां फरीसियाँ के चेल्ले थी, पर तेरे चेल्ले तो खावै-पीवै सै।” 34 यीशु नै उनतै कह्या, “के थम बरातियाँ तै, जिब्बताहिं बन्दडा उनकै गेल्या रहवैं, ब्रत करा सको सो?” 35 “पर वे दिन भी आवैं, जिब बन्दडा न्यारा करया जावैगा, फेर वे उन दिनां म्ह ब्रत करैंगे।” 36 यीशु नै एक और उदाहरण दिया, “कोए माणस नये लत्यां म्ह तै पाड़कै पुराणे लत्यां पै थेग्ली न्ही लगान्दा, न्ही तो नया पाट ज्यागा अर वा थेग्ली पुराणे पै मेल भी न्ही खावैगी। 37 अर कोए नया अंगूर का रस पुराणी मशकै म्ह न्ही भरदा, न्ही तो नया अंगूर का रस पुराणी मशकै नै पाड़कै बह ज्यागा, अर मशकै फूट ज्या सै। 38 पर नया अंगूर का रस नई मशकै म्ह भरणा चाहिए। 39 कोए माणस पुराण अंगूर का रस पीकै नया अंगूर का रस कोनी चाहन्दा क्यूँकै वो कहवै सै, के पुराण-ए बढ़िया सै।”

6 फेर आराम कै दिन यीशु चेल्यां कै गैल खेतां म्ह तै होकै जाण लागरया था, अर उसके चेल्ले गेहूँ की बाले तोड़-तोड़कै अर हाथ्थां तै मसल-मसल कै खाण लागरे थे। 2 फेर फरीसियाँ म्ह तै कुछ कहण लागे, “थम यो काम क्यांतै करो सो जो आराम कै दिन करणा ठीक कोनी?” 3 यीशु नै उनतै जवाब दिया, “के थमनै पवित्र ग्रन्थ म्ह यो न्ही पढ़या के दाऊद नै, जिब वो अर उसके साथी भूखे थे तो के करया? 4 वो किस तरियां परमेसवर कै घर म्ह गया, अर भेंट की रोट्टी खाई, जिनका खाणा याजकां नै छोड़ और किसे खात्तर ठीक कोनी, अर अपणे साथियाँ ताहिं भी दी?” 5 अर उसनै उनतै कह्या, “मै माणस का बेट्टा आराम कै दिन का भी प्रभु सूं।” 6 इसा होया के किसे और आराम कै दिन वो आराधनालय म्ह जाकै उपदेश देण लाग्या, अर उड़ै एक माणस था जिसका सोळा हाथ सूखरया था। 7 शास्त्री अर फरीसी यीशु पै दोष लाण के मौकैकै की टाह म्ह थे के देक्खै वो आराम कै दिन ठीक करै सै के न्ही। 8 पर वो उनकी सोच जाणी था, इस करकै उसनै सूखे हाथ आळे माणस कह्या, “उठ, बिचाळै खड़ा होन्या।” वो उठ खड़ा होया। 9 यीशु नै उनतै कह्या, “मै थारै तै बुझ्यू सूं के मूसा के नियम-कायदा कै मुताबिक आराम कै दिन के ठीक सै, भला करणा या बुरा करणा, जान बचाणा या नाश करणा?” 10 फेर उसनै चोगरदेनै उन साराया काही देखकै उस सूखे हाथ आळे माणस तै बोल्या, “अपणा हाथ बढ़ा।” उसनै न्यू करया, अर उसका हाथ दुबारा ठीक होया। 11 पर वे फरीसी अर शास्त्री आपे तै बाहर होकै आप्स म्ह बहस करण लागे के हम यीशु कै गैल के करा? 12 उन दिनां म्ह यीशु पहाड़ पै प्रार्थना करण लाग्या, अर परमेसवर तै प्रार्थना करण म्ह सारी रात बिताई। 13 जिब दिन लिकड़या तो उसनै अपणे चेल्यां ताहिं बुलाकै उन म्ह तै बारहां छाँट लिए, अर उन ताहिं प्रेरित कह्या, 14 अर वे ये सै: शमौन जिसका नाम

उसनै पतरस भी धरया, अर उसका भाई अनिद्रियास, अर याकूब, अर यूहन्ना, अर फिलिप्पस, अर बरतुल्मै, 15 अर मत्ती, अर थोमा, अर हलफई का बेटा याकूब, अर शमौन जो जेलोतेस कुहावै सै, 16 अर याकूब का बेटा यहूदा, अर यहूदा इस्करियोती जो उसका पकड़वाण आला बण्या। 17 फेर यीशु उनके गेल्या उतरकै चौरस जगहां म्ह खड़या होया, अर उसके चेल्यां की बड़ी भीड़, अर सारे यहूदिया परदेस अर यस्तलेम नगर, सूर अर सैदा नगर के समुन्दर कै किनारे तै घणे माणस, 18 जो उसकी सुणण अर अपणी बिमरियाँ तै चंगे होण खात्तर उसकै धोरै आए थे, उड़े थे, अर ओपरी आत्मा तै सताए होए भी ठीक करे जावै थे। 19 सारे उसनै छूणा चाहवै थे, क्यूँके उस म्ह तै सार्मथ लिकड़कै साराया नै ठीक करै थी। 20 फेर यीशु नै अपणे चेल्यां काही देखकै कह्या, “धन्य सो थम जो दीन सो, क्यूँके परमेसवर का राज्य थारा सै।” 21 धन्य सो थम जो इब भूक्खे सो, क्यूँके थम परमेसवर के जरिये छिकाए जाओगे। धन्य सो थम जो इब रोओ सो, क्यूँके हांसोगे। 22 धन्य सो थम जिब मुझ माणस कै बेटै कै बाबत माणस थारे तै बैर कैगें, अर थमनै लिकाड़ देवैगें, अर थारी बुराई कैगें, अर थारा नाम बुरा जाणकै काट देवैगें। 23 उस दिन आनन्द तै उछलियो, क्यूँके लखाओं, थारे खात्तर सुर्ग म्ह बड़ा ईनाम सै, उनके पूर्वजां नै भी नवियाँ कै गेल्या भी इसाए करया करै थे। 24 पर धिक्कार सै थारे पै! जो साहूकार सो, क्यूँके थमनै अपणे सारे सुख भोग चुके सों। 25 धिक्कार सै थारे पै! जो छिकेर सो, क्यूँके भूक्खे होओगे। धिक्कार सै थारे पै! जो इब हाँस्सो सो, क्यूँके थम बिलख-बिलख कै रोओगे। 26 “धिक्कार सै थारे पै! जिब सारे माणस थारे ताहीं आच्छा कहवै, क्यूँके थरे पूर्वज भी द्युष्टे नवियाँ कै गेल्या भी इसाए करै थे।” 27 “पर मै थम सुणण आला तै कहूँ सूँ के अपणे बैरियाँ तै प्यार राक्खो, जो थारे तै बैर करै, उनका भला करो। 28 जो थमनै आप देवै, उननै आशीष दो, जो थारी बेजती करै, उनकै खात्तर प्रार्थना करो। 29 जो तेरे एक गाल पै थप्पड़ मारै उसकी ओड़ दुसरा भी फेर दे, अर जो तेरी धोत्ती खोस ले, उसनै कुड़ता लेण तै भी मना मत करो। 30 जो कोए तेरे तै माँगै, उसनै दे, अर जो तेरी चीज खोस ले, उसनै माँगै ना। 31 जिसा थम चाहो सो के माणस थारे गेल्या करै, थम भी उनकै गेल्या उसाए करो।” 32 “जै थम अपणे प्यार करण आला तै ए प्यार करो, तो उसका के फायदा? क्यूँके पापी भी अपणे प्यार करण आला कै गेल्या प्यार करै सै। 33 जै थम अपणे भलाई करण आला ए गेल्या भलाई करो सों, तो थारी के बडाई? क्यूँके पापी भी इसाए करै सै। 34 जै थम उननै ए उथार थो सो जिनतै थमनै दुबारै मिल जाण की आस हो सै, तो कौण सी बड़ी बात सै? क्यूँके पापी, पापियाँ नै उथार देवै सै, के उतनाए दुबारै पावै। 35 बल्के अपणे बैरी तै प्यार करो, अर भलाई करो, अर दुबारै मिलण की उम्मीद राखकै उथार ना थो, तो थारे खात्तर बड़ा ईनाम होवैगा, अर थम परमप्रधान की ऊलाद मान्ने जाओगे, क्यूँके परमेसवर का धन्यवाद ना करण आला अर बुरे माणस पै भी दया करै सै। 36 जिसा थारा पिता दयालु सै, उस्से

ए ढाळ थम भी दयालु बणो।” 37 “दोष ना लाओ, तो थारे पै भी दोष न्ही लगाया जावैगा। कसूरवार ना ठहराओ, तो थमनै भी कोए कसूरवार कोनी ठहरावैगा। माफ कर द्यो, तो थम भी माफ करे जाओगे। 38 दिया करो तो थारे ताहीं भी दिया जावैगा। माणस पूरा नाप दबा दबाकै अर हला-हलाकै अर उभरदा होया थारी गोही म्ह घाल्लैगें, क्यूँके जिस नाप तै थम नापो सों, उस्से नाप तै थारे खात्तर भी नाप्या जावैगा।” 39 फेर उसनै उनतै एक उदाहरण कह्या, “के आन्धा, आन्धे नै राह बता सके सै? के दोनु खुट्टे म्ह कोनी गिरेगे?” 40 वेल्ला अपणे गुरु तै बड़ा न्ही, पर जो कोए आच्छा सीखा होगा, वो अपणे गुरु के ढाल होगा। 41 “तू क्यूँ अपणे भाई की आँख कै तिन्कै जिसी छोटी सी बुराई नै देख्ये सै, अर अपणी आँख म्ह लठ जिसी बड़ी बुराई तनै कोनी दिखदी?” 42 जिब तू अपणी ए आँख का लठ कोनी देख्या, तो अपणे भाई तै किस तरियां कह सके सै, “हे भाई, आ मै तेरी आँख म्ह तै तिन्का लिकाड़ द्यु?” हे कपटी, पैल्ल्या अपणी जीवन की बुराई दूर कर फेर तू अपणे भाई नै आच्छी दाऊँ बुराई तै बचा सकैगा। 43 “कोए आच्छा दरखत कोनी जो बेकार फल ल्यावै, अर ना तो कोए बेकार दरखत सै जो आच्छा फल ल्यावै। 44 हरेक दरखत अपणे फल तै पिच्छाणा जावै सै, क्यूँके माणस झाड़ियाँ तै अंजीर कोनी तोड़दे अर ना बड़बेरी तै अंगूर। 45 भला माणस अपणे मन के भले भण्डार तै भली बात लिकाड़े सै, अर बुरा माणस अपणे मन के भुरे भण्डार तै बुराई की बात लिकाड़े सै, क्यूँके जो मन म्ह भरया सै वोए उसकी जुबान पै आवै सै।” 46 “जिब थम मेरा कहणा न्ही मान्दे तो क्यातै मन्नै ‘हे प्रभु, हे प्रभु’ कहो सो? 47 जो कोए मेरे धोरै आवै सै अर मेरी बातां नै सुणकै उनै मान्दे सै, मै थमनै बताऊँ सूँ के वो किसकी तरियां सै: 48 वो उस माणस की ढाळ सै, जिसनै घर बणादें बखत धरती ढूऱ्यी खोदकै चट्टान पर नीम बणाई, अर जिब बाढ़ आई तो थारा उस घर पै लागी पर उसनै हला न्ही सकी, क्यूँके वो पक्का बणरया था। 49 पर जो सुणकै कोनी मान्दा वो उस माणस की ढाळ सै, जिसनै माटी पै बिना नीम घर बणाया, जिब उसपै थारा लागी तो वो जिब्बे पड़ग्या अर पड़कै उसका सत्यानाश होग्या।”

कोनी समझा के तेरे धौरे आँऊँ, पर सिर्फ मुँह तै कह दे तो मेरा नौकर
ठीक हो ज्यागा। 8 क्यूँके मै जाणु सूँ के मै भी किसी के आदेशां का
पालन करूँ सूँ, अर सिपाही मेरे आदेशां का पालन करै सै। जिब मै एक
तै कहूँ सूँ जा, तो वो जावै सै, अर दुसरे तै, आ, तो वो जावै सै, अर
अपणे नौकर तै कहूँ सूँ यो कर, तो वो करै सै।” 9 यो सुणकै यीशु कै
अचम्भा होया अर उसनै मुँह फेरकै उस भीड़ तै जो उसकै गेल्या आवै
थी, कह्या, “मै थमनै कहूँ सूँ के मन्नै इसाएल म्ह भी इसा बिश्वास न्ही
देख्या।” 10 फेर भेज्जे होए वे माणस जिब घरां बोहड़े तो उननै उस
नौकर ताहीं निरोगी पाया। 11 थोड़े दिनां पाछै यीशु नाईन नाम के
एक नगर म्ह गया, अर उसके चेल्ले अर बड़ी भीड़ उसकै गेल्या जाण
लागरी थी। 12 जिब वो नगर कै फाटक कै धौरे पोहच्या, तो लखाओं,
माणस एक मुरदै नै बाहरणी लैकै जावै थे, जो अपणी माँ का एकला
बेटा था, अर वा बिधवा थी, अर नगर के घणखरे माणस उसकै गेल्या
थे। 13 बिधवा ताहीं देखकै प्रभु नै उसपै तरस आया, अर उसतै कह्या,
“मतना रोवै।” 14 फेर यीशु नै धौरे आकै अर्थी ताहीं छुया, अर अर्थी
ठाण आळे ठैहर्गो। फेर यीशु नै कह्या, “हे जवान, मै तन्नै कहूँ सूँ उठ!”
15 फेर वो मुर्दा उठ बेठ्या, बोल्लण लाग्या। उसनै उस ताहीं उसकी
माँ तै सौंप दिया। 16 इस घटना तै सौरे डर्गे, अर वे परमेसवर कै
बड़ाई करकै कहण लाग्ये, “म्हारे बिचालै एक बड़ा नबी आया सै, अर
परमेसवर नै अपणे माणसां पै दया की निगाह करी सै।” 17 अर उसकै
बारै म्ह या बात सारे यहूदिया परदेस अर लोवै-धोवै के सारे परदेसां म्ह
फैलगी। 18 यूहन्ना ताहीं उसके चेल्लां नै इन बातां की खबर दी। 19
फेर यूहन्ना नै अपणे चेल्लां म्ह तै दोयां ताहीं बुलाकै प्रभु कै धौरे न्यू
बुझाण खातर भेज्या, “के आण आळा तूए सै, या हम किसे और की
बाट देक्खां?” 20 उननै उसकै धौरे आकै कह्या, “यूहन्ना बपतिस्मा
देणआळे नै म्हरे ताहीं तेरे धौरे न्यू बुझाण नै भेज्या सै, के आण आळा
वो मसीहा जिसका वादा परमेसवर नै करया था, तू ए सै, या हम किसे
और की बाट देक्खां?” 21 उससे बखत उसनै घणाए ताहीं बिमारियाँ,
अर काल्ली, अर ओपरी आत्मायाँ तै छुटाया, अर घणाए की आँख
खोल दी, 22 अर उसनै उनतै कह्या, “जो कुछ थमनै देख्या अर सुण्या
सै, जाकै यूहन्ना ताहीं कह द्यो, के आन्धे देक्खें सै, लंगड़े चाल्लै-फिरै
सै, कोढ़ी शुद्ध करे जावै सै, बहरे सुणी सै, मुर्दे जिन्दे करे जावै सै, अर
कंगालां ताहीं सुसमाचार सुणाया जावै सै। 23 धन्य सै वे जो मेरै पै
शक न्ही करते, अर बिश्वास करणा न्ही छोड़दे।” 24 जिब यूहन्ना कै
भेज्जे होड़ माणस चले गये तो यीशु यूहन्ना कै बारै म्ह माणसां तै कहण
लाग्या, “थम जंगल-बियाबानी म्ह कै देखण गये थे? के हवा म्ह हाल्दे
होए सरकंडे नै?” 25 तो फेर थम बण म्ह कै देखण गये थे? के कोमल
लत्ते पहरे होए माणस नै? लखाओं, जो चमकदे लत्ते पहरे अर असो-
आराम म्ह रहवैं सै, वे राजघरां म्ह रहवैं सै। 26 तो फेर थम बण म्ह कै
देखण गये थे? के किसे नबी नै? हाँ, मै थमनै कहूँ सूँ बल्के नबी तै भी
बड़े नै। 27 यो वोए सै, जिसकै बारै म्ह लिख्या सै: लखा, “मै अपणे दूत

नै तेरे आगै-आगै भेज्जू सूँ, जो तेरे आगै तेरी राही सीध्धी करैगा।”
28 “मै थमनै कहूँ सूँ के जो बिरबानियाँ तै जणे सै, उन म्ह तै यूहन्ना
बपतिस्मा देणआळे तै बड़ा कोए न्ही पर जो परमेसवर कै राज्य म्ह
छोटे तै छोटा सै, वो उसतै भी बड़ा सै।” 29 फेर हरेक किसे नै, उरै
ताहीं के चुंगी लेण आळे माणसां नै भी यूहन्ना की बात सुणकै उसतै
बपतिस्मा लैकै यो मान लिया के परमेसवर ए धर्मी सै। 30 पर फरीसियाँ
अर शास्त्रियाँ नै यूहन्ना तै बपतिस्मा कोनी लैकै परमेसवर कै मनसां
ताहीं अपणे बारै म्ह टाळ दिया। 31 “पर मै इस युग कै माणसां की
बराबरी किसतै करूँ के वे किसकी ढाळ सै?” 32 वे उन बाल्कां की
ढाळ सै जो बजारां म्ह बेटे होए एक-दुसरे तै रुक्के मारकै शिकायत करै
सै, हमनै थारे खातर बाँसली बजाई, अर थम कोनी नाचे, हमनै बिलाप
करया, अर थम कोनी रोए। 33 क्यूँके यूहन्ना बपतिस्मा देण आळा ना
रोट्टी खाया होया करदा अर ना अंगूर का रस पिया होया करदा, अर थम
कहो सो, उस म्ह ओपरी आत्मा सै। 34 मुझ माणस के बेटे का खाण-
पान और माणसां की तरियां सादा ए सै, लखाओं, थमनै मेरे ताहीं पेटू
अर पियक्कड़ माणस, चुंगी लेणिये का अर पापियाँ का साथी धोषित
कर दिया। 35 पर ज्ञान अपणे कामां म्ह सच्चा ठहराया गया सै। 36
फेर किसे फरीसी नै उसतै बिनती करी के वो उसकै गेल्या खाण खावै,
आखर वो उस फरीसी कै घरां जाकै खाण खाण बेठ्या। 37 उस नगर
की एक पापण बिरबान्नी न्यू जाणकै के यीशु फरीसी कै घर म्ह खाणा
खाण बेठ्या सै, संगमरमर कै बरतन म्ह महँगा खसबदूर तेल ल्याई, 38
अर उसकै पायां कै धोरै, पाच्छे खड़ी होकै, रोंदी होई उसकै पायां नै
आसुआं तै भेण लागी अर अपणे सिर कै बालां तै पूँझाण लागी, अर
उसकै पायां नै बार-बार चूमकै उनपै महँगा खसबदूर तेल मळया। 39
न्यू देखकै शमौन फरीसी जिसनै यीशु ताहीं बुलाया था, अपणे मन म्ह
सोच्यां लाग्या, “जै यो नबी होन्दा तो जाण जान्दा के या जो उसनै
छूण लागरी सै, वा कौण अर किसी बिरबान्नी सै, क्यूँके वा तो पापण
सै।” 40 यीशु नै उसके मन के विचार जाणकै उस ताहीं उदाहरण म्ह
कह्या, “हे शमौन, मन्नै तेरे तै कुछ कहणा सै।” वो बोल्या, “हे गुरु,
कह।” 41 यीशु नै एक और उदाहरण दिया, “किसे साहूकार के दो
देणदार थे, एक पाँच सौ अर दुमरा पचास दीनार (50 दिन की मजदूरी)
का देणदार था। 42 जिब उनकै धोरै चुकाण नै कुछ न्ही रह्या तो उसनै
दोनुआ का कर्ज माफ कर दिया। इस करकै उन दोनु माणसां म्ह तै
कौण उसतै घणा प्यार राक्खैगा?” 43 शमौन नै जवाब दिया, “मेरी
समझ म्ह वो माणस, जिसका घणा कर्ज माफ होया।” यीशु नै उसतै
कह्या, “तन्नै ठीक कह्या सै।” 44 अर उस बिरबान्नी कान्ही पलटकै
उसनै शमौन तै कह्या, “तन्नै देख्या सै के इस बिरबान्नी नै के करया सै?
मै तेरे घरां आया पर तन्नै मेरे पैर धोण नै पाणी भी कोनी दिया, पर
इसनै मेरे पैर आँसुआँ तै भेणे अर अपणे बालां तै पूँजे। 45 तन्नै मेरे ताहीं
चुम्या न्ही, पर जिब तै मै आया सूँ जिब्बे तै इसनै मेरे पायां ताहीं चुमना
न्ही छोड़या। 46 तन्नै मेरे सिर पै तेल कोनी मळया, पर इसनै मेरे पायां

पै इत्र मळ्या सै। 47 इस करकै मै तन्नै कहूँ सूँ के इसनै कई पाप करे थे, जो माफ होगे, क्यूँके इसनै मेरे तै धणा प्यार करया सै, पर जिसका पाप कम माफ होया सै, वो कम प्यार करै था।” 48 अर उसनै बिरबान्नी तै कह्या, “तेरे पाप माफ होए।” 49 फेर जो माणस उसकै गेल्या खाणा खाण नै बेठे थे, वे अपणे-अपणे मन मृ सोच्यन लागे, “यो के परमेसवर सै, जो पापां नै भी माफ कर सकै सै?” 50 पर उसनै उस बिरबान्नी ताहीं कह्या, “परमेसवर नै तेरे ताहीं बचाया सै, क्यूँके तन्नै मेरे पै बिश्वास करया सै, खुश होकै चली जा।”

8 इसकै बाद यीशु नगर-नगर अर गाम-गाम्मां मृ प्रचार करदा होया,

अर परमेसवर कै राज्य का सुसमाचार सुणादा होया हांडण लाग्या, अर वे बारहां चेल्लें उसकै गेल्या थे, 2 अर कुछ बिरबान्नी भी थी जो ओपरी आत्मायाँ तै अर बिमारियाँ तै छुटाई गई थी, अर वे ये सै: मरियम जो मगदलीनी कुहावै थी, जिसमृ तै सात ओपरी आत्मा लिकडी थी, 3 अर हेरोदेस राजा के भण्डारी खुजा की घरआळी योअन्ना, अर सूंसन्नाह, अर घणखरी दुसरी बिरबान्नी। ये अपणे धन तै यीशु अर उसके चेल्यां की सेवा-पाणी कैरे थी। 4 जिब बहु भीड़ कष्टी होई अर नगर-नगर के माणस उसकै थोरै चालकै आवै थे, तो उसनै उदाहरण मृ कह्या 5 “एक किसान बीज बोण लिकड़या। बोंदे होए कुछ बीज राही कै किनारे पढे, अर रोंद्या गया, अर अकास के पछियाँ नै उस ताहीं चुंग लिया। 6 कुछ बीज चट्टान पै पड़या, अर जामग्या, पर नमी ना मिलण कै कारण सूख ग्या। 7 कुछ झाड़ियाँ कै बिचालै पड़या, अर झाड़ियाँ नै गेलै-गेलै बढ़कै उस ताहीं दबा लिया। 8 कुछ आच्छी धरती पै पड़या, अर उकाकै सौ गुणा फल ल्याया।” न्यू कहकै वो जोर तै बोल्या, “जिसके कान हो वो ध्यान तै सुण लै।” 9 उसके चेल्यां नै उसतै बुझ्याया के इस उदाहरण का के मतलब सै? 10 उसनै कह्या, “थारे ताहीं परमेसवर कै राज्य के भेद की समझा दे राख्यी सै, पर औरां नै उदाहरण मृ सुणाया जावै सै, इस करकै के वे देखदे होए भी कोनी देक्खै, अर सुणदे होए भी कोनी समझै।” 11 उदाहरण का मतलब यो सै: बीज परमेसवर का वचन सै 12 राही कै किनारे के वे सै, जिन नै सुण्या, फेर शैतान आकै उनकै मन मृ तै वचन ठा ले जावै सै के कदे इसा ना हो के वे बिश्वास करकै उद्धार पावै। 13 चट्टान पै के वे सै, के जिब सुणै सै, तो खुश होकै वचन नै अपणावै सै, पर जड़ कोनी पकड़दे वे माडी वार ताहीं बिश्वास राक्खैं सै अर मुसीबत कै बखत बहक जावै सै। 14 जो झाड़ियाँ मृ पड़या, यो वे सै जो सुणै सै, पर आगै जाकै फिक्र, अर धन, अर जिन्दगी के ऐसो-आराम मृ फँस जावै सै अर उनका फल कोनी पकदा। 15 पर आच्छी धरती के वे सै, जो वचन सुणकै भले अर आच्छे मन तै साम्ये राक्खैं सै, अर धीरज तै फल ल्यावै सै। 16 “कोए दीवा जळा कै बरतन तै कोनी ढकदा, अर ना खाट तलै धरै सै, पर टांडी पै धरै सै ताके भीत्तर आण आले नै चाँदणा मिलै। 17 कुछ लुहक्या कोनी जो दिखाया कोनी जावै, अर ना किमे लुहक्या सै जिसका बेरा न्ही पटै। 18 ज्यांतै चौकक्स रहो के थम किस तरियां सुणो सौ? क्यूँके जिसकै थोरै सै उसतै दिया

जावैगा, अर जिसकै थोरै न्ही सै उसतै वो भी ले लिया जावैगा, जिसनै वो अपणा समझै सै।” 19 यीशु की माँ अर उसके भाई उसकै थोरै आए, पर भीड़ कै कारण उसतै मिल न्ही सके 20 उसतै कह्या गया, “तेरी माँ अर तेरे भाई बाहरणी खड़े होए, तेरे तै मिलणा चाहवैं सै।” 21 यीशु नै इसकै जवाब मृ उनतै कह्या, “मेरी माँ अर मेरे भाई ये सै, जो परमेसवर का वचन सुणै अर मान्नै सै।” 22 फेर एक दिन वो अर उसके चेल्लें किस्ती पै चढे, अर उसनै उनतै कह्या, “आओ, समुन्द्र के परली ओड़ चाल्लां।” आखर उननै किस्ती खोल दी। 23 पर जिब किस्ती चालरी थी, तो वो सोग्या अर समुन्द्र पै आँधी आगी, अर किस्ती पाणी तै भरण लाग्या अर वे खतरे मृ थे। 24 फेर उननै थोरै आकै उस ताहीं जगाया, अर कह्या, “हे मालिलक! हे मालिलक! हम डूबके मरण आले सां।” फेर उसनै उठकै आँधी ताहीं अर पाणी की झाल्लां ताहीं धमकाया अर वे थमगे अर शान्ति होई। 25 फेर उसनै उनतै कह्या, “थारा बिश्वास कित था?” पर वे डर्गे अर हैरान होकै आप्स मृ कहण लागे, “यो कौण सै जो आँधी अर पाणी नै भी हुक्म देवै सै, अर वे उसकी मान्नै सै?” 26 फेर वे गिरासेनियों कै देश मृ पोहचे, जो उस पार गलील समुन्द्र के स्याम्ही सै। 27 जिब वो किनारे पै उतरया तो उस नगर का एक माणस उसतै मिल्या जिसमृ ओपरी आत्मा थी। वो घणे दिनां तै उघाडा था अर ना घरां रहवैं था बल्के किन्स्तान मृ रह्या करै था। 28 वो यीशु नै देखकै जोर तै किल्की मारकै उसकै स्याम्ही पड़कै जोर तै बोल्या, “हे परमप्रधान परमेसवर के बेटे यीशु! मन्नै तेरे तै के काम? मै तेरे तै बिनती करूँ सूँ, मन्नै काल ना करै।” 29 क्यूँके वो उस ओपरी आत्मा ताहीं उस माणस मृ तै लिकडण का हुक्म देवै था, इस करकै के वो उसपै बार-बार हावी होवै थी। ऊतो माणस उसनै सँकळां अर बेलां तै जुड़े थे फेरभी वो बन्धनां नै तोड़ देवै था, अर ओपरी आत्मा उसनै बण मृ भजाए फिरै थी। 30 यीशु नै उसतै बुझ्याया, “तेरा के नाम सै?” उसनै कह्या, “सेना,” क्यूँके धणीए ओपरी आत्मा उस मृ रहवैं थी। 31 उननै यीशु बिनती करी कै हमनै अथाह कुण्ड मृ जाण का हुक्म ना देवै। (Abyssos g12) 32 उड़ पहाड़ पै सूरां का एक बड़ा टोल चरै था, इस करकै उननै उसतै बिनती करी कै हमनै उन मृ बैठणे दे। उसनै उन ताहीं जाण दिया। 33 फेर ओपरी आत्मा उस माणस मृ तै लिकडै के सूरां मृ जा पड़ी अर वो टोल ढलान पै तै झापटकै गलील समुन्द्र मृ जा पड़या अर डूब मरया। 34 पाली यो जो होया था देखकै भाज्ये, अर नगर मृ अर गाम्मां मृ जाकै उसकी खबर दी। 35 माणस जो होया था उसनै देखण नै लिकडै, अर यीशु कै थोरै आकै जिस माणस तै ओपरी आत्मा लिकडी थी, उसनै यीशु कै पाणां कै थोरै लत्ते पहरे अर सोधी मृ बेटे देखकै डर्गे, 36 अर देखण आला नै उन ताहीं बताया कै वो ओपरी आत्मायाँ का कांल करया होड़ माणस किस तरियां ठीक होया। 37 फेर गिरासेनियों कै लोवै-धोवै के सारे माणसां नै यीशु तै बिनती करी कै म्हारै उरै तै चल्या जा, क्यूँके वे घणे डरो थे। आखर मृ वो किस्ती पै चढ़कै बोहड़ आया। 38 जिस माणस मृ ओपरी आत्मा लिकडी थी वो उसनै

बिनती करण लाग्या के मन्नै अपणे गेल्या रहण दे, पर यीशु नै उस ताहीं बिदा करके कहा, 39 “अपणे घरां बोहड जा अर माणसां तै बता के परमेसवर नै तेरे खात्तर किसे बडे-बडे काम करे सै!” वो जाकै सारे नगर म्ह प्रचार करण लाग्या के यीशु नै मेरै खात्तर किसे बडे-बडे काम करे। 40 जिब यीशु बोहड्या तो माणस उसतै राजजी होकै मिले, क्यूँकै वे सारे उसकी बाट देक्खै थे। 41 इतनै म्ह याईर नाम का एक माणस आया, जो आराधनालाय का सरदार था, अर यीशु कै पायां म्ह पड़कै उसतै बिनती करण लाग्या के मेरै घरां चाल, 42 क्यूँकै उसकी बारहां साल की एकलौती बेटी थी, अर वा मरण नै होरी थी। जिब वो जाण लागरया था, जद माणस उसपै पड़ण लागरे थे। 43 एक बिरबान्नी नै जिसकै बारहां साल तै लहू बहण की बीमारी थी, अर जो अपणी सारी कमाई डाकटरां कै पाच्छै बरताई थी, फेरभी किसे कै हाथ तै चंगी कोनी हो सकी थी, 44 पाच्छै तै आकै उसकै लत्ते ताहीं छुया, अर जिब्बे उसका लहू बहणा बन्द होगा। 45 इसपै यीशु नै कहा, “मेरेताहीं किसनै छुया?” जिब सारे नाटूण लागे, तो पतरस अर उसके साथियाँ नै कहा, “हे मालिक, तन्नै तो भीड दबाण लागरी सै अर तेरे पै पड़ण लागरी सै।” 46 पर यीशु नै कहा, “किसे नै मेरै ताहीं छुआ सै, क्यूँकै मन्नै बेरा पाठ्या के मेरै म्ह तै सामर्थ लिकडी सै।” 47 जिब बिरबान्नी नै देख्या के मै लुक्क कोनी सकदी, फेर काम्बदी होई आई अर उसकै पायां पै पड़कै सारे माणसां कै स्याम्ही बताया के उसनै किस करण उस ताहीं छुया, अर किस तरिया जिब्बे चंगी होई। 48 उसनै उसतै कहा, “बेटी, तेरे बिश्वास नै तेरे ताहीं ठीक करया सै, खुशी-खुशी चली जा।” 49 वो न्यू कहवै था के किसे नै आराधनालाय कै सरदार याईर कै उरै तै आकै कहा, “तेरी छोरी मर ली सै: गुरु नै काळना करै।” 50 यीशु नै न्यू सुणकै उसतै जवाब दिया, “मतना डैर, सिर्फ बिश्वास राख, तो वा बच जावैगी।” 51 घर म्ह आकै उसनै पतरस, यूहन्ना, याकूब, अर छोरी के माँ-बाप नै छोड दुसरे किसे नै अपणे गेल्या भीत्तर कोनी आण दिया। 52 सारे उसकै बाबत रोण-पिटृण लागरे थे, पर उसनै कहा, “रोओ मतना, वा मरी कोनी पर सोवै सै।” 53 वे न्यू जाणकै के वा मरगी सै उसका मजाक उडाण लाग्ये। 54 पर उसनै उसका हाथ पकड्या, अर रुक्का मारकै कहा, “हे छोरी, उठ!” 55 फेर उसका जी बोहड आया अर वा जिब्बे उठ बेटी। फेर उसनै हुक्म दिया के उसनै कुछ खाण नै द्यो। 56 उसकै माँ-बाप हैरान होए, पर उसनै उन ताहीं चिताया के यो जो होया सै किसे तै ना कहियो।

9 फेर उसनै अपणे बारहां चेल्यां ताहीं बुलाकै उसनै सारी ओपरी आत्मायाँ अर बिमारियाँ ताहीं दूर करण की सामर्थ अर हक दिया, 2 अर उननै परमेसवर कै राज्य का प्रचार करण अर बिमारां ताहीं आच्छा करण खात्तर भेज्या। 3 उसनै उनतै कहा, “राह खात्तर कुछ ना लियो, ना तो लाटी, ना झोळी, ना रोटी, ना रपिये अर ना दो-दो कुडते।” 4 जिस किसे घर म्ह उतरो, उडैए रहो, अर उडैए तै बिदा होइयो। 5 जो कोए थमनै न्ही अपणावै, उस नगर तै जान्दे होए अपणे पायां की थूळ झाड़ दियो के उनपै गवाही होवै।” 6 आखर म्ह वे लिकडै कै गाम-

गाम सुसमाचार सुणान्दे, अर हरेक माणसां नै ठीक करदे होए हांडदे रहे। 7 चौथाई देश के गलील परदेस का राजा हेरोदेस यो सारा सुणकै घबराया, क्यूँकै कर्द्याँ नै कहा, के यूहन्ना मरे होया म्ह तै जिन्दा होया सै, 8 अर कर्द्याँ नै न्यू कहाकै के एलियाह दिख्या सै, अर औरां नै न्यू के पुराणे नवियाँ म्ह तै कोए जिन्दा होया सै। 9 पर हेरोदेस नै कहा, “यूहन्ना का तो मन्नै सिर कटवाया, इब यो कौण सै जिसकै बाबत इसी बात सुण सूँ?” अर उसनै उस ताहीं देखण की चाहन्ना करी। 10 फेर प्रेरित नै बोहडकै जो कुछ उननै करया था, उस ताहीं बता दिया, अर वो उननै न्यारे करकै बैतसैदा नामक नगर म्ह लेग्या। 11 न्यू जाणकै भीड उसकै पाच्छै हो ली, अर वो राज्जी होकै उनतै मिल्या, अर उनतै परमेसवर कै राज्य की बात करण लाग्या, अर जो चंगे होणा चाहवै थे उन ताहीं ठीक करया। 12 जिब दिन छिपण लाग्या तो बारहां नै आकै उसतै कहा, “भीड नै जाणदे के चौगरदे के गाम्मां अर बस्तियाँ म्ह जाकै ठहरै अर खाणे का जुगाड़ करै, क्यूँकै हम उरै बियाबान जगाहां म्ह सां।” 13 यीशु नै उनतै कहा, “थमे उननै खाण नै द्यो।” उननै कहा, “म्हारै थोरै पाँच रोटी अर दो मच्छियाँ नै छोडकै और कुछ कोनी, पर हाँ, जै हम जाकै इन सारया खात्तर खाणा मोल ल्यावा, फेर हो सके सै।” वे माणस तो पाँच हजार माणसां कै करीबन थे। 14 फेर उसनै अपणे चेल्यां तै कहा, “उननै पचास-पचास करकै लैणपतार म्ह बिठा द्यो।” 15 उननै न्यूए करया, अर सारया ताहीं बिठा दिया। 16 फेर यीशु नै वे पाँच रोटी अर दो मच्छियाँ ली, सुर्ग कान्ही लखाकै परमेसवर का धन्यवाद करया, अर रोटी तोड़-तोड़कै चेल्यां ताहीं देंदा गया के माणसां ताहीं बांडै। 17 फेर सारे खाकै छिकगे, अर चेल्यां नै बचे होड टुकड्या तै भरी होई बारहां टोकरी ठाई। 18 जिब वो एकले म्ह प्रार्थना करै था अर चेल्लें उसकै गेल्या थे, तो उसनै उनतै बुझ्याया, “माणस मन्नै कै कहवै सै?” 19 उननै जवाब दिया, “यूहन्ना बपतिस्मा देण आळा, अर कोए एलियाह, अर कोए यो के पुराणे नवियाँ म्ह तै कोए जिन्दा होया सै।” 20 उसनै उनतै बुझ्याया, “पर थम मन्नै कै कहो सौ?” पतरस नै जवाब दिया, “परमेसवर का मसीहा।” 21 फेर उसनै उनतै चिताकै कहा के यो किसे तै ना कहियो। 22 फेर उसनै कहा, “मुझ माणस कै बेटै खात्तर जरूरी सै के मै धणा दुख ठाऊँ, अर यदूदी अगुवैं, प्रधान याजक अर शास्त्री मन्नै तुच्छ समझाकै मार देवै, अर मै तीसरे दिन जिन्दा हो जाऊँगा।” 23 उसनै सारया तै कहा, “जो कोए मेरै मेरा चेल्ला बाणणा चाहवै, वो अपणी ए इच्छा पूरी ना कै बल्के हरेक दिन अपणे दुखां का क्रूस ठाकै, मेरै पाच्छै हो लेवै।” 24 क्यूँकै जो कोए अपणी जान बचाणा चाहवैगा वो उसनै खोवैगा, पर जो कोए मेरी खात्तर अपणी जान खोवैगा वोए उसनै बचावैगा। 25 जै माणस सारी दुनिया नै पा लेवै अर अपणी जान खो दे या उसका नुकसान ठावै, तो उसनै कै फायदा? 26 जो कोए मेरै तै अर मेरी बातां तै सरमावैगा, मै माणस का बेटा भी, जिब अपणी अर अपणे पिता की अर पवित्र सुर्गदूतां कै महिमा सुधां आऊँगा, तो उसतै सरमावैगा। 27 “मै थमनै साच्ची कहूँ सूँ के जो याडै खडे सै, उन

मह तै कुछ इसे सै के जिब ताहीं परमेसवर का राज्य ना देख लेवें, जद ताहीं मौत उननै कदे छू भी न्ही पावैगी।” 28 इन बातों कै कोए आठ दिनां पाच्छै वो पतरस, यूहन्ना अर याकूब नै गेल्या लेकै प्रार्थना करण खात्तर पहाड़ पै गया। 29 जिब वो प्रार्थना कैर था, तो उसके मुँह का रूप बदल गय, अर उसके लेटे धोले होकै चमकण लागे। 30 अर लखाओ, मूसा नबी अर एलिय्याह नबी ये दो माणस उसकै गेल्या बतलावै थे। 31 ये महिमा सुधां दिक्ष्वे अर यीशु के मरण का जिक्र करै थे, जो यशश्वलेम मह होण आळा था। 32 पतरस अर उसके साथी नींद मह होरै थे, अर जिब ठीक तरियां सोध्दी मह आए, तो उसकी महिमा अर उन दो माणसों नै, जो उसकै गेल्या खडे थे, देख्या। 33 जिब वे उसकै धोरै तै जाण लागे, तो पतरस नै यीशु तै कह्या, “हे मालिल्क, म्हारा उरे रहणा भला सैः आखर मह हम तीन मण्डप बणावा, एक तेरे खात्तर, एक मूसा नबी खात्तर, एक एलिय्याह नबी कै खात्तर।” उसनै बेरा कोनी था के कह के रह्या सै। 34 वो न्यू कहवैथा था के एक बाद्दल आकै उनपै छाग्या, अर जिब वे उस बाद्दल तै घिरण लागे तो वे डर्गे। 35 फेर उस बाद्दल मह तै या वाणी लिकडी, “यो मेरा बेट्टा अर मेरा चुण्या होया सै, इसकी सुणो।” 36 या आवाज होन्दे यीशु एकला होग्या, अर वे बोल-बाल्ले रहे, अर जो कुछ देख्या था उसकी कोए बात उन दिनां मह किसे तै न्ही कही। 37 दुसरे दिन जिब वो पहाड़ तै उतरया तो एक बड़ी भीड़ उसतै आ मिली। 38 अर लखाओ, भीड़ मह तै एक माणस नै किल्की मारकै कह्या, “हे गुरु, मै तेरे तै बिनती करूं सूं के मेरे बेट्टे पै दया की निगांह फेर दे, क्यूँके वो मेरा एकला बेट्टा सै।” 39 अर दे, एक भुंडी ओपरी आत्मा उसनै पकड़े थी, अर वो चाणग्वक किल्की मारै था, अर वा उसनै इसा मरोड़े थी के वो मुँह मह तै झाग भर लावै सै, उसनै रोंदेकै घणी मुश्किल तै छोड़ै थी। 40 मन्नै तेरे चेल्यां तै बिनती करी के उसनै लिकाड़े, पर वे कोनी काढ सके।” 41 यीशु नै जवाब दिया, “हे अविश्वासी अर जिद्दी माणसों, मै कद ताहीं थारे गेल्या रहूँगा अर थारी सहूँगा? अपणे बेट्टे नै उरै लिया।” 42 जिब वो आवै था तो ओपरी आत्मा ताहीं धमकाया अर छोरे ताहीं ठीक करकै पिता तै थमा दिया। 43 फेर सारे माणस परमेसवर कै घणे सामर्थ तै हैरान होए। पर जिब सारे माणस उन सारे काम्मां तै जो वो करै था, हवके-बक्के थे, तो उसनै अपणे चेल्यां तै कह्या, 44 “थम इन बातों पै गौर करो, क्यूँके मै माणस का बेट्टा माणसां कै हाथां मह पकड़वाया जाण पै सुं।” 45 पर वे इस बात नै कोनी समझी थे, अर या बात उनतै लुक्ही रही के उननै उसका बेरा न्ही पाटै, अर वे इस बात कै बारै मह उसतै बुझ्याण तै डरै थे। 46 फेर उन मह या बहस होण लागी के म्हारै तै बड़ा कौण सै। 47 पर यीशु नै उनकै मन के विचारां ताहीं पढ़ लिया, अर एक बाल्क नै लेकै अपणे धोरै खड्या करया, 48 अर उनतै कह्या, “जो कोए मेरै नाम तै इस बाल्क नै अपणावै सै, वो मन्नै अपणावै सै, अर जो कोए मन्नै अपणावै सै, वो मेरै भेजण आले नै भी अपणावै सै, क्यूँके जो थारे मह सारया मह छोट्टे तै छोट्टा सै, वोए बड़ा सै।” 49 फेर

यूहन्ना नै कह्या, “हे स्वामी, हमनै एक माणस ताहीं तेरे नाम तै ओपरी आत्मा लिकाड़दे देख्या, अर हमनै उसतै मना करया, क्यूँके वो म्हारी तरियां तेरा चेल्ला न्ही था।” 50 यीशु नै उसतै कह्या, “उसनै नाट्टो ना, क्यूँके जो थारे बिरोध मह न्ही, वो थारे कान्ही सै।” 51 जिब उसके उपर ठाए जाण के दिन पूरे होण पै थे, तो उसनै यरुशलेम जाण का विचार पक्का करया। 52 उसनै अपणे आगै दूत भेज्जै। वे सामरियाँ कै एक गाम मह गए ताके उसकै खात्तर जगहां त्यार करै। 53 पर उन माणसां नै उस ताहीं उतरण कोनी दिया, क्यूँके वो यरुशलेम जावै था। 54 न्यू देख्यै उसके चेल्ले याकूब अर यूहन्ना नै कह्या, “हे प्रभु, तू के चाहवै सै के हम हुक्म देवां, के अकास तै आग गिरकै उननै भस्म करदे?” 55 पर उसनै बोहड़कै उन ताहीं धमकाया (अर कह्या, “थम न्ही जाणदे के थम किसी आत्मा के सो।”) क्यूँके माणस का बेट्टा लोगां नै जान तै मारण कोनी आया, बल्के उननै बचाण आया सै।” 56 अर वे किसे दुसरे गाम मह चले गये। 57 जिब वे राह मह जावै थे, तो किसे नै उसतै कह्या, “जित्त-जित्त तू जावैगा, मै तेरे पाच्छै हो ल्यूँगा।” 58 यीशु नै उसतै कह्या, “लोमडियाँ की घुरखाण अर अकास के पंछियाँ के बसेरे हो सै, पर माणस के बेट्टे खात्तर सिर छिपाण की भी जगां कोनी।” 59 उसनै दुसरे तै कह्या, “मेरै पाच्छै हो ले।” उसनै कह्या, “हे प्रभु, पैहले मन्नै घर जाणदे, मै अपणे पिता के मरण कै बाद उस ताहीं दफना के आऊँगा, फेर तेरा चेल्ला बणुगाँ।” 60 उसनै उसतै कह्या, “जो आत्मिक रूप तै मर चुके सै, उननै मुर्दे दफनाण दे। पर तू जाकै परमेसवर कै राज्य की कथा सुणा।” 61 एक और नै भी कह्या, “हे प्रभु, मै तेरे पाच्छै हो लूँगा, पर पैहल्या मन्नै जाणदे के अपणे घर के माणसां तै बिदा ले आऊँ।” 62 यीशु नै उसतै कह्या, “जो कोए अपणा हाथ हळ पै धरकै पाच्छै देक्ख्यै सै, वो परमेसवर कै राज्य कै जोग्गा कोनी।”

10 इन बातों कै बाद प्रभु यीशु नै सत्तर और चेल्लों तैयार करे, अर जिस-जिस गाम अर जगहां पै वो खुद जाण आळा था, उड़े उननै दो-दो करकै अपणे आगै भेज्जै। 2 उसनै अपणे चेल्यां तै कह्या, “पके होए खेतां की तरियां लोग तो भोत सै जो परमेसवर के वचन नै सुणाण अर समझाणा चाहवै सै। पर फसल काढूण आळे थोड़े लोग सै, जो उन ताहीं जाकै परमेसवर का वचन सुणा अर समझा सकै। इस करकै खेत के मालिल्क यानी परमेसवर का वचन सारे लोगां तक पोहव सकै सै।” 3 जाओ, देक्ख्यों, मै थमनै भेड़ां की तरियां भेड़ियाँ के बिचाल्ये भेज्जूं सूं। 4 इस करकै ना बटुआ, ना झोली, ना जूते ल्यो, अर ना राह मह किसे तै नमस्कार करो। 5 जिस किसे घर मह जाओ, पैहले कहो, इस घर का कल्याण हो। 6 जे उड़े कोए कल्याण के जोग्गा होगा, तो थारा कल्याण उसपै थमैगा, न्ही तो थारे धोरै उल्टा ए आ ज्यागा। 7 उस्से घर मह रहो, अर जो कुछ उनतै मिलै, वोए खाओ-पीओ, क्यूँके मजदूर नै अपणी मजदूरी मिलाणी चाहिए, घर-घर न्ही हांडणा। 8 जिस नगर मै जाओ, अर उड़े के माणस थमनै उतारै, तो जो कुछ थारे स्याम्ही धरया जावै वोए

खाओ। 9 उड़ै के बिमारां नै ठीक करो अर उनतै कहो, परमेस्वर का राज्य थारे धोरै आण पोंहच्या सै। 10 पर जिस नगर म्ह जाओ, अर उड़ै कै माणस थमनै न्ही अपणावै, तो उनके बजारां म्ह जाके कहो, 11 थारे नगर की धूल भी, जो म्हरे पायां म्ह लागी सै, हम थारे स्याही झाड देवां सां, फेरभी न्यू जाण ल्यो के परमेस्वर का राज्य थारे धोरै आण पोंहच्या सै। 12 मै थमनै कहूँ सूँ, “के उस दिन उस नगर की हालत तै सदोम नगर की हालत घणी सहण जोगी होवैगी।” 13 “धिक्कार सै थारे पै खुरजिन नगर के माणसों! धिक्कार सै थारे पै वैतसैदा नगर के माणसों! जो सामर्थ के काम थारे म्ह करे गये, जै वे सूर अर सैदा नगर म्ह करे जान्दे, तो टाट ओढ़ै कै, अर राख म्ह बैठके वे कदे के पाप करणा छोड़ देन्दे। 14 पर न्याय कै दिन थारि हालत तै सूर अर सैदा नगर की हालत घणी सहण जोगी होवैगी। 15 अर है कफरनहूम नगर, तू के सोच्चै सै, के तू सुर्ग ताहीं ऊँच्चा करया जावैगा? तू तो अथोलोक तक नीचै जावैगा। (Hadēs g86) 16 “जो थारी सुणै सै, वो मेरी सुणै सै, अर जो थमनै तुच्छ समझौ सै, वो मन्नै तुच्छ समझौ सै, अर जो मन्नै तुच्छ समझौ सै, वो मेरे भेजण आळे ताहीं तुच्छ समझौ सै।” 17 वे सत्तर चेल्ले राज्जी होन्दे होए बोहडे अर बोल्ले, “हे प्रभु, तेरे नाम तै ओपरी आत्मा भी म्हारा कहणा मान्नै थी।” 18 यीशु नै उनतै कह्या, “जिब थम ओपरी आत्मायाँ नै लिकाडो थे तो मन्नै शैतान ताहीं सुर्ग तै बिजली की तरियां पड़ता होया देख्या। 19 लखाओ, मन्नै थारे ताहीं साँपां अर बिच्छुओ ताहीं पायां तळै रोंदण का, अर बैरी की सारी सामर्थ पै हक दिया सै, अर किसे चीज तै थमनै कुछ नुकसान कोनी होवैगा। 20 फेरभी इतने राज्जी मतना होवो के आत्मा थारा कहणा मान्नै सै, पर इसतै राज्जी होवो थारे नाम सुर्ग पै लिकखे सै।” 21 उस्से बखत यीशु पवित्र आत्मा म्ह होकै खुशी तै भरण्या, अर कह्या, “हे पिता, सुर्ग अर धरती के प्रभु, मै तेरा शुक्रियादा करूँ सूँ, के तन्नै इन बातां ताहीं ज्ञानियां अर समझदारां तै ल्कोए राख्या, अर बाळकां ताहीं दिखा दिया सै।” हाँ, हे पिता, क्यूँकै तन्नै योए भाया। 22 मेरे पिता नै मेरे ताहीं सब कुछ सौप दिया सै, अर किसे नै न्ही बेरा के बेट्या कौण सै, सिवा पिता के, अर पिता कौण सै न्यू भी किसे नै कोनी बेरा सिवाए बेट्ये कै, अर वो जिसपै बेट्या उस ताहीं जाहिर करणा चाहै। 23 फेर चेल्यां की ओड़ बोहड़ै कै उक्ले म्ह बोल्या, “धन्य सै वे आँख, जो ये बात जो थम देक्खो सो। 24 क्यूँकै मै थमनै कहूँ सूँ के घणखरे नवियाँ अर राजयां नै चाह्या के जो बात थम देक्खो सो, देक्खै, पर न्ही देक्खी, अर जो बात थम सुणो सो, सुणो पर न्ही सुणी।” 25 एक दिन यीशु माणसां नै उपदेश देण लागरया था, तो एक शास्त्री उठ्या अर न्यू कहकै उस ताहीं परखण लाग्या, “हे गुरु, अनन्त जीवन का वारिस होण खात्तर मै के करूँ?” (aiōnios g166) 26 यीशु नै उसतै कह्या, “नियम-कायदा म्ह के लिख्या सै? अर तू उसनै किस तरियां समझौ सै?” 27 उसनै जवाब दिया, “तू प्रभु, अपणे परमेस्वर तै अपणे सरे मन, अपणे पूरे प्राण अर अपणे सारी शक्ति अर अपणी सारी बुद्धि कै गेल्या प्यार राख, अर अपणे पड़ोसी तै अपणे जिसा प्यार

राख।” 28 यीशु नै उसतै कह्या, “तन्नै ठीक कह्या, न्यूए करिये जिब्ले तू अनन्त जीवन पावैगा।” 29 पर उसनै खुद ताहीं धर्मी जाहिर करण की इच्छा तै यीशु तै बुद्ध्याया, “तो मेरा पड़ोसी कौण सै?” 30 यीशु नै एक कहाँनी बताकै जवाब दिया, “एक माणस यश्शलेम नगर तै यरीहो नगर म्ह जावै था, के डाकुओं नै धेर कै, उसका सब कुछ खोसा कै, उस ताहीं नंगा कर दिया, अर पिट-छेतकै उस ताहीं अथमरा छोड़कै चले गये। 31 अर इसा होया के उस्से राही तै एक यहूदी याजक जावै था, पर उसनै उस ताहीं देखकै उसकी मदद कोनी करी अर चल्या गया। 32 इस्से ढाळ एक लेवी उस जगहां पै आया, उसनै भी उसकी मदद कोनी करी, अर वो चल्या गया। 33 फेर सामरी गाम का एक राहगीर ओड़ै तै लिकड्या, अर उस माणस ताहीं देखकै उसपै तरस खाया। 34 उसनै उसके धोरै आकै उसके घायां पै तेल अर अंगूर का रस गेर कै पट्टी बाँध्यी, अर अपणे गधे पै चढाकै सराय म्ह लेग्या, अर उसकी सेवा-पाणी करी। 35 दुसरे दिन उसनै दो दीनार (दो दिन की मजदूरी) काढ कै सराय कै मालिक तै दिये, अर कह्या, इसकी सेवा-पाणी करिये, अर जो कुछ तेरा और लाग्यैगा, वो मै बोहड़ा होया भर द्युगां।” 36 यीशु नै उस ताहीं कह्या, “इब यो बता तेरी समझ तै जिस माणस ताहीं डाकुओं नै घायल करा था, उन तीनां म्ह तै उस माणस का सच्चा पड़ोसी कौण था?” 37 उसनै कह्या, “वोए जिसनै उसपै दया करी।” यीशु नै उसतै कह्या, “जा, तू भी न्यूए करया कर।” 38 जिब यीशु अर उसके चेल्ले जावै थे तो वो एक गाम म्ह गया, अर मार्था नाम की एक विरबान्नी नै बड़ी उदारता तै उसका आदर-सत्कार करया। 39 मरियम नाम की उसकी एक बेब्बे थी। वा प्रभु कै पायां म्ह बैठकै उसका वचन सुणी थी। 40 पर मार्था सेवा-पाणी करदे-करदे परेशान होगी, अर उसके धोरै आकै कहण लागी, “हे प्रभु, के तन्नै कुछ भी फिक्र कोनी के मेरी बेब्बे नै सारा काम का बोझ मेरै पै गेर दिया सै? इस करकै उसतै कह के मेरी मदद करै।” 41 प्रभु यीशु मसीह नै मार्था तै जवाब दिया, “मार्था, हे मार्था, तू घणी बातां खात्तर फिक्र करै, अर परेशान हो ज्या सै। 42 पर एक बात जरुर सै, अर उस बढ़िया हिस्से ताहीं मरियम नै छाँट लिया सै जो उसतै खोस्या कोनी जावैगा।”

11 यीशु किसे जगहां प्रार्थना करण लागरया था। जिब उसनै प्रार्थना कर ली, तो उसके चेल्यां म्ह तै एक नै उसतै कह्या, “हे प्रभु, जिस तरियां यूहन्ना नै अपणे चेल्यां ताहीं प्रार्थना करणी सिखाई उस्से तरियां ए तू भी हमनै सीखा दो।” 2 उसनै उनतै कह्या, “जिब थम प्रार्थना करो, तो कहो, ‘हे पिता, तेरा नाम पवित्र मान्या जावै, तेरा राज्य आवै, 3 म्हारी दिन भर की रोट्टी हरेक दिन हमनै दिया कर, 4 अर म्हारे पापां नै माफ कर, क्यूँकै हम भी अपणे हरेक कसूरवार ताहीं माफ करां सां, अर म्हारे ताहीं परखै ना।’” 5 फेर यीशु नै चेल्यां तै कह्या, “मान ल्यो थारा एक दोस्त सै, अर थम आधी रात नै उसकै धोरै ज्याकै उसतै बिनती करो, ‘हे दोस्त, मनै तीन रोट्टी दो।’ 6 क्यूँकै मेरा एक दोस्त सफर करकै मेरै धोरै आया सै, अर उस ताहीं खुआण खात्तर मेरै धोरै कुछ भी

कोनी।’ 7 अर वो भीत्तर तै थमनै जवाब देवै सै, मनै दुखी ना करै, इब तो मनै कुवाड़ मूंद राक्खै सै अर मेरे बाल्क मेरै धारै बिछाणा पै सै, इस करकै मै उठकै तन्नै कुछ भी न्ही दे सकदा।’ 8 मै थमनै कहूँ सूँ हालाकि वो माणस उस ताहीं रोटी ना भी देणा चाहवै, तोभी दोस्त होण के नाते वो जरुर उठैगा, अर दोस्त के बार-बार बिनती करण पै, उसकी जरुरत के मुताबिक उस ताहीं जरुर देवैगा।’ 9 अर मै थारैतै कहूँ सूँ के माँगो तो थमनै दिया जावैगा, टोक्होंगे, तो थम पाओगे, खटखटाओ, तो थरे खात्तर खोल्या जावैगा। 10 क्यूँके जो कोए माँगै सै, उसनै मिलै सै, अर जो ठोहैं सै, वो पावै सै, अर खटखटावै सै, उसकै खात्तर खोल्या जावैगा। 11 थरे म्ह तै इसा कौण पिता होगा, के जिब उसका बेटा रोटी माँगै, तो उसनै पत्थर देवै, या मच्छी माँगै, तो बदले म्ह उसनै साँप देवै? 12 या अंडा माँगै तो उसनै बिछु देवै? 13 इस करकै जिब थम दुरे होकै, अपणे बाल्कां नै आच्छी चीज देणा जाणो सों, तो थारा सुर्यां पिता अपणे माँगण आला नै पवित्र आत्मा क्यूँ न्ही देवैगा। 14 फेर यीशु नै एक गूँगा माणस म्ह तै ओपरी आत्मा ताहीं लिकाड्या। जिब ओपरी आत्मा लिकड्गी तो गूँगा बोलण लाग्या, अर माणसां कै अचम्भा होया। 15 पर उन म्ह तै कुछ नै कह्हा, “यो तो ओपरी आत्मायाँ के प्रधान शैतान की मदद तै ओपरी आत्मायाँ नै लिकाडै सै।” 16 औरानै उस ताहीं परखण कै खात्तर उसतै अकास की एक निशानी माँगी। 17 पर उसनै उनकै मन की बात जाऊकै, उनतै कह्हा, “जिस-जिस राज्य म्ह फूट आवै सै, वो राज्य उजड़ जावै सै, अर जिस घर म्ह फूट होवै सै, वो नाश हो जावै सै।” 18 जै शैतान खुद का बिरोधी हो जावै, तो उसका राज्य किस तरियां बण्या रहवैगा? क्यूँके थम मेरै बाबत कहो सो के वो शैतान की मदद तै ओपरी आत्मायाँ नै काहूँ सूँ, तो थारी ऊलाद किसकी मदद तै काहूँ सै? इस करकै वैए थारा न्याय करणें। 20 पर जै मै परमेस्वर के सामर्थ तै ओपरी आत्मायाँ नै काहूँ सूँ, तो परमेस्वर का राज्य थारे धोरै आण पोंहच्या सै। 21 जिब ठाड़ा माणस हथियार लिये होए अपणे घर की रुखाळी करै सै, तो उसका धन बचा रहवैगा। 22 पर जिब उसतै बाध कोए और ठाड़ा धावा बोलकै उसनै जीत लेवै सै, तो उसकै वे राछ जिनपै उसका बिश्वास था, खोस लेवै सै अर उसका धन लूटकै बांड देवै सै। 23 जो मेरै गेल्या न्ही वो मेरै बिरोध म्ह सै, अर जो मेरै गेल्या न्ही कठुा करदा, वो खिंडावै सै। 24 “जिब ओपरी आत्मा माणस म्ह तै लिकड्कै जावै सै, तो सूक्खी जगहां म्ह आराम टोहन्दी फिरै सै, अर वा पांदी कोनी। फेर वा कहवै सै, ‘मै उस्से माणस म्ह जड़ै तै लिकडी थी बोहड़ जाऊँगी।’ अर आकै उस माणस नै घर जिसा झाड़ा-बुहारा अर सजा-धज्या पावै सै। 25 अर आकै उसनै झाड़ा-बुहारा अर सजा-धज्या पावै सै। 26 फेर वा ओपरी आत्मा जाकै अपणे तै भुंडी सात और आत्मायाँ नै अपणे गेल्या ले आवै सै, अर वे उस म्ह बड़कै वास करै सै, अर उस माणस की पाच्छली हालत पैहल्या तै भी भुंडी हो जावै सै।” 27 जिब यीशु ये बात कहवै था तो भीड़ म्ह तै किसे बिरबान्नी नै जोर तै

बोलकै कह्हा, “धन्य सै वो बिरबान्नी जिस तू जन्मा अर उसका तन्नै दूध पिया।” 28 उसनै कह्हा, “हाँ, पर धन्य वे सै, जो परमेस्वर का चवन सुणै अर मान्नै सै।” 29 जिब बड़ी भीड़ कठी होंदी जावै थी तो वो कहण लाग्या, “इस युग के माणस बुरे सै, वे चिन्ह-चमत्कार टोहैं सै, पर योना नबी के चिन्ह-चमत्कार नै छोड़कै उन ताहीं कोए और चिन्ह-चमत्कार कोनी दिया जावैगा। 30 जिसा योना नबी निनवे के आदमियाँ खात्तर निशानी ठहरी, उससे तरियां मै माणस का बेटा भी इस युग के आदमियाँ कै खात्तर ठहर्ण्हां। 31 दक्षिण देश की राणी न्याय कै दिन इस बखत के माणसां कै गेल्या उठकै उन ताहीं कसूरावर ठैहरावैगी, क्यूँके वा राजा सुलैमान का जान सुणण खात्तर धरती कै सिरे तै आई, अर देक्खों, उरै वो सै जो राजा सुलैमान तै भी बड़डा सै। 32 निनवे नगर के माणस न्याय कै दिन इस युग के माणसां कै गेल्या उठकै, उन ताहीं कसूरावर ठैहरावैगें, क्यूँके उननै योना नबी का प्रचार सुणकै अपणे पापां ताहीं स्वीकार करया, अर देक्खों, उरै वो सै जो योना नबी तै भी बड़डा सै। 33 “कोए माणस दीवा जळा कै बरतन कै तलै न्ही धरदा, पर टांडी पै धरै सै के भीत्तर आण आला नै चाँदणा मिलै। 34 देह का दीवा आँख सै, इस करकै जिब तेरी निगांह आच्छी सै तो तेरी सारी देह भी उजाळा होगा। पर जिब तेरी आँख ठीक कोनी सै तो तेरी सारी देह भी अँधेरे म्ह सै। 35 इस करकै चौकने रहो के जो चाँदणा थारे म्ह सै वो अँधेरा ना हो जावै। 36 इस करकै जै तेरी देह म्ह चाँदणा हो अर उसका कोए हिस्सा अन्धेरे म्ह ना रहवै तो सारा का सारा इसा चाँदणा होगा, जिसा उस बखत होवै सै जिब दीवा अपणी चमक तै थारे ताहीं चाँदणा देवै सै।” 37 जिब वो बात करै था तो किसे फरीसी नै उसतै बिनती करी के मेरै उरै आकै खाणा खाईयों। वो भीत्तर जाकै खाणा खाण नै बेठ्या। 38 फरीसी नै न्यू देखकै हैरानी होई के उसनै खाणा खाण तै पैहल्या हाथ कोनी धोए। 39 प्रभु नै उसके मन के विचारां ताहीं पढ़कै उसतै कह्हा, “हे फरीसियों, थम कटोरे अर थाली नै उपर-उपर तै तो माँजो सो, पर थारे भीत्तर अन्धेरे अर बुराई भरी सै। 40 हे बेअक्लो! जिसनै बाहरारौ का हिस्सा बणाया, के उसनै भीत्तर का हिस्सा कोनी बणाया? 41 पर हाँ, भीत्तर आली चिज्जां नै दान कर धो, तो देक्खो, सारा कुछ थारे खात्तर पवित्र हो जावैगा।” 42 पर हे फरीसियों, थारे पै धिक्कार सै! थम पुरीने अर सुदाब का अर कई तरियां के साग-पात का दसमां हिस्सा धो सो, पर न्याय ताहीं अर परमेस्वर कै प्यार ताहीं टाळ धो सो, आच्छा तो था के इन्हैं भी करदे रहन्दे अर उननै भी कोनी छोड़दे। 43 हे फरीसियों, थारे पै धिक्कार सै! थम आराधनालयाँ म्ह खास-खास आसन नै चाहो सो अर बजारां म्ह नमस्कार चाहो सो। 44 “धिक्कार सै थारे पै! क्यूँके थम उन लुक्की होई कबां की तरियां सो, जिनपै माणस चाल्लै सै पर कोनी जाणदे!” 45 फेर एक शास्त्री नै उसतै जवाब दिया, “हे गुरु, इन बात्तां नै कहकै तू म्हारी बुराई करै सै।” 46 पर यीशु नै जवाब दिया, “हे शास्त्रियो थारे पै धिक्कार सै। थम नियम-कायदा का इसा बोझ जिनका ठाणा ओक्खा सै, माणसां पै लाढो सो, पर थम खुद उनकी मदद खात्तर

उस बोझ़ा नै अपणी आनगाली तै भी कोनी छुन्दे।” 47 “धिक्कार सै थारे पै! थम उन नवियाँ की कब्र बणाओ सो, जिन ताहीं थारे पूर्वजां नै मार दिया था।” 48 आखर मह थम गवाह सो, अर अपणे पूर्वजां कै काम्मां तै रजामंद सो, क्यूँके उननै उन ताहीं मार दिया अर थम उनकी कब्र बणाओ सो। 49 इस करकै परमेसवर की समझ नै भी कह्या सै, “के मै उनकै धोरै नवियाँ अर प्रेरितां नै भेज्जूंगी, अर वे उन म्ह तै कईयाँ नै मार देंगे, अर कईयाँ नै दुखी करेंगे।” 50 ताके जित्त नवियाँ का लहू दुनिया की शूलआत तै बहाया गया सै, सारया का ब्यौरा इस युग के माणसां तै लिया जावै, 51 हाबिल की हत्या तै लेकै जकर्याह की हत्या ताहीं, जो वेदी अर मन्दर कै बिचालै मारया गया। मै थारे तै सच कहूँ सूँ इन सारया का ब्यौरा इस्से बखत के माणसां तै लिया जावैगा। 52 “धिक्कार सै थम शास्त्रियाँ पै! थमनै ज्ञान की ताली तो ले ली, पर थम खुद कोनी दाखल होए, अर दाखल होण आछे ताहीं भी रोक द्यो सो।” 53 जिब वो उड़ै तै लिकड़ाया, तो शास्त्री अर फरीसी भुण्डी तरियां उसकै पाच्छे पड़े अर छेड़ण लागे के वो घणखरी बातां का जिक्र करै, 54 अर ताक मह लागे रहे के उसकै मुँह तै कही होई कोए बात पकड़े।

12 इतनै म्ह जिब हजारां की भीड़ लागी, उरे ताहीं के वे एक-दुसरे पै

पड़ण लागे थे, तो यीशु नै सारया तै पैहल्या अपणे चेल्यां तै यो कह्या, “फरीसियाँ कै कपट रुपी खमीर तै चौकन्ने रहो। 2 कुछ ढकया कोनी, जो उधाड़ाया न्ही जावैगा, ना कुछ लुहक्या सै, जिसका बेरा न्ही पटै। 3 इस करकै जो कुछ थमनै अन्धेरे म्ह कह्या सै, वो उजालै म्ह सुण्या जावैगा, अर जो थमनै कोठड़ियों म्ह चुपके-चुपके कह्या सै, वो छात पै तै प्रचार करया जावैगा। 4 “मै थारे तै जो मेरे साथी सो कहूँ सूँ के जो देह नै धात करै सै पर उसतै ज्यादा और कुछ न्ही कर सकदे, उनतै ना डरियो। 5 मै थमनै समझाँक्सूँ के थमनै किसतै डरणा चाहिये, धात करण कै बाद, जिस ताहीं नरक म्ह गेरण का हक सै, उस्से तै डरियो। हाँ, मै थारे तै कहूँ सूँ उस्से तै डरियो। (Geenna g1067) 6 के दो पिस्या की पाँच गौरैयाँ (एक छोटी चिड़ियाँ) न्ही बिकदी? फेरभी परमेसवर उन म्ह तै एक नै भी कोनी भुल्दा। 7 थारे सिर के एक-एक बाल भी गिणे होड़े सै, इस करकै डरो मतना, थम घणी गौरैयाँ तै बढ़कै सो।” 8 “मै थारे तै कहूँ सूँ जो कोए माणसां कै स्याम्ही मनै मान लेवैगा, उसनै मै माणस का बेट्ठा भी परमेसवर कै सुर्गदूतां कै स्याम्ही मान लेऊँगा। 9 पर जो माणसां कै स्याम्ही मेरा इन्कार करैगा, उसका भी परमेसवर कै सुर्गदूतां कै स्याम्ही इन्कार करया जावैगा।” 10 जो कोए मुझ माणस कै बेट्ठे कै बिरोध म्ह कोए बात कहवै, उसका वो कसूर माफ कर दिया जावैगा, पर जो पवित्र आत्मा की बुराई करै, उसका वो कसूर माफ कोनी करया जावैगा। 11 जिब माणस थमनै आराधनालालै अर हाकिमां अर अधिकारियाँ कै स्याम्ही ल्यावै, तो फिक्र ना करियो के हम किस तरियां तै, या के जवाब देवां, या के कहवांगे। 12 क्यूँके पवित्र आत्मा उस्से बखत थमनै सीखा देगा के, के कहणा चाहिये। 13 फेर भीड़ म्ह तै एक नै यीशु तै कह्या, “हे गुरु, मेरे भाई तै कह के बाप कै

जमीन-जायदाद नै मेरे गेल्या बांड लेवै।” 14 उसनै उसतै कह्या, “हे भले माणस, किसनै मेरे ताहीं थारा जमीन-जायदाद बटवारा करण आळा न्यायी बणा दिया सै?” 15 अर यीशु नै उनतै कह्या, “चौकन्ने रहो, अर सारी तरियां कै लोभ-न्लालच तै खुद नै बचाकै राक्खो, क्यूँके किसे का जीवन उसकै घणी जमीन-जायदाद तै कोनी होंदा।” 16 यीशु नै उनतै एक उदाहरण देकै कह्या, “किसे साहूकार की धरती म्ह घणी पैदावार होई।” 17 फेर वो अपणे मन म्ह विचार करण लाग्या, मै के करँ? क्यूँके मेरे धोरै जगहां कोनी जित्त अपणी उपज वैगरा थँहूँ। 18 अर उसनै कह्या, मै न्यू करँस्गा मै अपणे नाज के गोदाम नै तोड़कै, उनतै नाज के और बड़े गोदाम बणाऊँगा, अर उड़ै अपणा सारा नाज अर धन धरँस्गा, 19 अर अपणे-आप तै कहूँगा, के तेरे धोरै घणे साल खात्तर घणा धन धरया सै, चैन कर, खा, पी, भौज कर। 20 पर परमेसवर नै उसतै कह्या, हे बेकूफ, तू इस्से रात मर जावैगा, फेर जो कुछ तन्नै कठुा करया सै, वो किसका होगा? 21 “इस्से तरियां वो माणस भी सै, जो अपणे खात्तर धन कठुा करै सै, पर परमेसवर की निंगां म्ह साहूकार कोनी।” 22 फेर यीशु नै अपणे चेल्यां तै कह्या, “इस करकै मै थमनै कहूँ सूँ अपणे जीवन के खात्तर या चिंता ना करो के हम के खावांगे, ना अपणी देह की के, के पैहरागें। 23 क्यूँके जीवन खणों तै बढ़कै सै, अर देह लत्यां तै बढ़कै सै। 24 कागां पै ध्यान धो, वे ना बोवै सै, ना काटै सै, अर ना उनके भण्डार अर गोदाम होवै सै, फेरभी परमेसवर उननै पाठै सै। थारी किम्मत पंछियाँ तै बाध सै।” 25 थारे म्ह तै इसा कौण सै, जो चिंता करण तै अपणी उग्र का एक पल भी बढ़ा सकै सै? 26 इस करकै जै थम अपणी जिन्दगी म्ह छोट्टे-छोट्टे काम भी न्ही कर सकदे, तो जिन्दगी की बड़ी-बड़ी बातां खात्तर क्यातै फिक्र करो सो? 27 “जंगली फूललां पै ध्यान करो, के वे किस तरियां बढ़ै सै, वे मेहनत करकै अपणे खात्तर लत्तें कोनी बणाते। तोभी मै थारे तै कहूँ सूँ के राजा सुलैमान भी, अपणे सारे शानों-शोकत म्ह, उन म्ह तै, किसे के समान लत्ते पैहरे होए कोनी था। 28 इस करकै जै परमेसवर मैदान की धास नै, जो आज सै अर काल बाड़ म्ह झोक्की जावैगी, इसे लत्तें पहरावै सै, तो हे बिश्वास म्ह कमजोर माणसों, वो थारी चिन्ता क्यूँ न्ही करैगा? 29 अर थम इस बात की टोह म्ह ना रहो के, के खावांगे अर के पीवांगे, अर शक ना करो। 30 क्यूँके परमेसवर ताहीं ना जाणण आछे लोग, इन सारी चिज्जां की टोह म्ह रहवै सै: पर थारा सुर्गीय पिता जाणी सै, के थमनै इन चिज्जां की जरूरत सै। 31 पर परमेसवर कै राज्य की खोज करो तो ये चीज भी थमनै मिल ज्यागी।” 32 “हे छोट्टे टोळ, मतना डौरै, क्यूँके थारे सुर्गीय पिता नै न्यू भाया सै, के थमनै अपणा राज्य देवै। 33 अपणा धन बेचकै दान कर धो, अर अपणे खात्तर इसे बटुए बणाओ, जो पुराणे कोनी होन्दे, यानिके परमेसवर नै खुश करण आछे भले काम करकै सुर्ग म्ह इसा धन कठुा करो जो खतम कोनी होन्दा, अर जिसकै धोरै चोर कोनी जान्दा, अर कीड़ा कोनी बिगाड़ा। 34 क्यूँके जड़ै थारा धन सै, उड़ै थारा मन भी लाग्या रहवैगा।” 35 “हमेशा परमेसवर के काम्मां खात्तर

तैयार रहों, अर थम प्रभु के आण खात्तर, दीवे जळा कै तैयार रहों, 36 अर थम उन माणसां कै बरगे बणो, जो अपणे मालिलक की बाट देखते रहवै सै, के वो व्याह तै कद बोहड़ेगा, ताके जिब आकै दरबाजा खटखटावै, तो जिब्बे उसकै खात्तर खोल द्यो। 37 धन्य सै वे नौककर जो मालिलक के बोहड़ा की बाट देखते होए तैयार रहवै सै, मै थमनै साच्ची कहूँ सूँ के मालिलक भी खुद एक नौककर की तरियां उन ताहीं खाणा खुआण खात्तर बिठावैगा, अर खुद उनकी सेवा-पाणी करैगा। 38 जै वो आधीरी रात नै या उसकै बाद आकै उन ताहीं तैयार पावै, तो वे नौककर धन्य सै। 39 पर न्यू जाण ल्यो, के जै घर का मालिलक नै बेरा हो, के चोर ठीक किस घडी आवैगा तो वो तैयार रहन्दा, अर अपणे घर म्ह चोरी न्ही होण देन्दा। 40 थम भी मेरे बोहड़े के आण खात्तर तैयार रहो, क्यूँके जिस घडी कै बरै म्ह थम सोचदे भी कोनी, उस्से घडी मै माणस का बेट्टा सुर्ग तै आ जाऊँगा।” 41 फेर पतरस बोल्या, “हे प्रभु, के यो उदाहरण तनै म्हारै खात्तर दिया से या सारया खात्तर दिया सै।” 42 प्रभु नै जवाब दिया, “वो बिश्वास जोगगा अर अकलमंद भण्डारी कौण सै, जिसका मालिलक उस ताहीं नौककर-चाकरां पै सरदार ठैहरावै, के उननै बखत पै खाणा देवै।” 43 धन्य सै वो नौककर, जिस ताहीं उसका मालिलक आकै इसाए करदा पावै। 44 मै थमनै साच्ची कहूँ सूँ वो उस ताहीं अपणी सारी धन-सम्पत्ति का मालिलक बणावैगा। 45 पर जै वो नौककर सोच्चण लागै के मेरा मालिलक आण म्ह वार कर रह्या सै, उसके साथ के नौककर नौकराणियां ताहीं मारण लागज्या अर खाण-पीण अर दारुबाज होण लागे। 46 तो उस नौककर का मालिलक इसे दिन आवैगा, जिब वो उसकी बाट देखा ना हो, अर इसे बखत म्ह आवैगा जिसका उसनै ना बेरा हो, अर उसनै भारी सजा देकै उसकी गिणती बिश्वास लायक माणसां म्ह कोनी करी जावैगी। 47 वो नौककर घणा छितैगा, जो अपणे मालिलक की मर्जी जाणै था, अर तैयार न्ही रह्या अर ना उसकी मर्जी कै मुताबिक चाल्या। 48 पर हरेक वो नौककर जो अपणे मालिलक की मर्जी नै कोनी जाणै, फेर इसा काम करै सै जो मार खण के लायक सै, वो कम छितैगा। इस करकै जिस ताहीं घणा दिया गया सै, उसतै घणा माँगया जावैगा, अर जिस ताहीं घणा सौप्या सै, उसतै घणा लिया जावैगा। 49 “मै धरती पै आग लाण नै आया सूँ, अर कितना आच्छा होन्दा, के या इस्से बखत सुलग जान्दी।” 50 मन्ने तो एक बड़ी भारी बिप्दा का बपतिस्मा लेणा सै, अर जिब ताहीं वो ना हो ले जद ताहीं मै इस्से बिप्दा म्ह रँगूँ। 51 के थम समझो सो के मै धरती पै मिलाप करवाण आया सूँ? मै थमनै कहूँ सूँ ना, बल्के न्यारे करण आया सूँ। 52 क्यूँके इब तै एक घर म्ह पाँच माणस आप्स म्ह बिरोध राक्खैरें, तीन जन जो मेरे पै बिश्वास न्ही करते, वो उन दो जन का बिरोध करैगें जो मेरे पै बिश्वास राक्खै सै। 53 पिता बेट्टे तै, अर बेट्टा बाप तै बिरोध राक्खैगा, माँ बेटी तै, अर बेटी माँ तै, सास्सू बढू तै, अर बढू सास्सू तै बिरोध राक्खैगी।” 54 यीशु नै भीड़ तै कह्या, “जिब थम बाद्दल नै पश्चिम तै उठदे देक्खो सो, तो जिब्बे कहो सो के मिह आवैगा, अर

न्यूए होवै सै, 55 अर जिब दक्षिणी हवा चाल्दी देक्खो सो, तो कहो सो के बड़ी गर्मी पड़ैगी, अर न्यूए हो सै। 56 हे कपटियों! थम धरती अर अकास कै रूप-रंग म्ह भेद जाण सको सो, पर परमेसवर जो इस युग म्ह करण लागरया सै उसका भेद क्यातै न्ही जाणदे? 57 “थम खुद फैसला क्यातै कोनी कर लेदे के ठीक सै?” 58 जिब तू अपणे बैरी कै गेल्या हाकिम कै धोरै जावै सै, तो राही म्ह उसतै छुट्टण की कोशिश करले, इसा ना हो के वो तनै न्यायाधीश कै धोरै घसीट कै ले जावै, अर न्यायाधीश तनै सिपाही के हवालै करदे अर सिपाही तनै जेळ म्ह गेर दे। 59 मै तेरे तै कहूँ सूँ के जिब ताहीं तू पाई-पाई न्ही भर देवैगा, तब तक जेळ तै छुट्टण न्ही पावैगा।

13 उस बखत कुछ माणस आण पोहचे, अर यीशु तै उन गलीली

माणसां का जिक्र करण लागे, जिन ताहीं पिलातुस नै मन्दर म्ह बलिदान करते बखत मार दिया था, अर उनका ए लहू बलिदान की भेट तै मिला दिया था। 2 न्यू सुणके उसनै उनतै जवाब म्ह कह्या, “के थम समझो सो के ये गलीली माणस और बाकी सारे गलीलावासियाँ तै घणे पापी थे के उनपै इसी बिप्दा आण पड़ी? 3 मै थमनै कहूँ सूँ के ना, पर जै थम पाप करणा न्ही छोड़ेगे तो थम भी इस्से तरियां नाश होओगे। 4 अर थम के सोच्चों सों, के उन अठारह माणसां के बारें म्ह जिनपै शीलोह का गुम्फ उपड्या, अर वे दब कै मरगे: यस्शतेम के दुसरे सारे बासिन्द्यां तै घणे अपराधी थे? 5 मै थमनै कहूँ सूँ के जै थम पाप करणा न्ही छोड़ेगे तो थम भी इस्से तरियां नाश होओगे।” 6 फेर यीशु नै यो उदाहरण भी देकै कह्या, “किसे अंगू के बाग म्ह अंजीर का दरखत लागरया था। वो उस म्ह फल टोह आया, पर कोनी मिल्या। 7 फेर उसनै बाग कै रुखाळै तै कह्या, लखा, तीन साल तै म्ह इस अंजीर कै दरखत पै फल टोह आऊँ सूँ पर कोनी पान्दा। इसनै काट बगा के यो धर्ती नै भी क्यूँ रुंधै।” 8 उसनै उसतै जवाब दिया, “हे मालिलक, इस साल और रहण दे के मै इसके चौगरदेकै माटी खोदकै खाद गेऱु। 9 जै आगले साल इसकै फल आ ग्या तो ठीक, न्ही तो इसनै कटवा दियो।” 10 आराम कै दिन यीशु एक आराधनालय म्ह उपदेश देवै था। 11 उड़ै एक बिरबान्नी थी जिसम्ह अठारह साल तै एक कमजोर करण आली ओपरी आत्मा थी, अर वा कुबड़ी होगी थी अर किसे तरियां भी सीधी कोनी हो सकै थी। 12 यीशु नै उस ताहीं देखकै बुलाया अर कह्या, “हे नारी, तू अपणे इस रोग तै मुक्त होगी सै।” 13 फेर उसनै उसपै हाथ धरया, अर वा जिब्बे सीधी होगी अर परमेसवर की बड़ाई करण लागी। 14 इस करकै के यीशु नै आराम कै दिन उस ताहीं ठीक करया था, आराधनालय का सरदार चिढ़ कै माणसां तै कहण लाग्या, “काम करण के छः दिन सै, उन ए दिनां म्ह आकै अपणे रोग ठीक कराओ, पर आराम कै दिन न्ही।” 15 न्यू सुणके प्रभु यीशु नै जवाब दिया, “हे कपटियों, के आराम कै दिन थारे म्ह तै हरेक अपणे बल्द या गथे नै थान म्ह तै खोल कै पाणी पियाण कोनी ले जान्दा? 16 तो के या बिरबान्नी जो अंग्राहम की पीढ़ी सै, जिस ताहीं शैतान नै अठारह साल तै जुँ राख्या था, के इस ताहीं

आराम कै दिन इसके बन्धन तै मुक्त करणा न्ही चाहिये था?” 17 जिब यीशु नै ये बात कहीं, तो उसके सारे बिरोधी शर्मिन्दा होगे, अर साक्षी भीड़ उन महान् काम्मां तै जो वो करै था, राज्जी होई। 18 फेर यीशु नै कह्हा, “परमेसवर का राज्य किस जिसा सै? अर मै उसका उदाहरण किसतै थु? 19 वो राई कै दाणे की ढाल सै, जिस ताहीं किसे माणस नै लेकै अपणे बाग म्ह बोया: अर वो बढ़कै दरखत बणग्या, अर अकास के पछियाँ नै उसकी डालियाँ पै बसेरा कर्हा।” 20 यीशु नै दुबारै कह्हा, “मै परमेसवर के राज्य का उदाहरण किसतै थु? 21 वो खमीर की ढाल सै, जिस ताहीं किसे बिरबान्नी नै लेकै तीन पसेरी (पन्द्रह किलो) चून म्ह रळाया, अर होन्दे-होन्दे सारा चून खमीर बणग्या।” 22 यीशु अर उसके चेल्ले नगर-नगर, अर गाम-गाम होकै उपदेश देन्दे होए यरुशलेम नगर की ओड़ जावै थे, 23 तो किसे नै उसतै बुझ्याया, “हे प्रभु, के थोड़े ए माणसां का उद्धार होगा?” यीशु नै उनतै कह्हा, 24 “भीड़ दरबाजे तै बड़ण की कोशिश करो, क्यूँकै मै थमनै कहूँ सूं के घणखरे उस म्ह बड़णा चाहवैंगे, अर कोनी बड़ सकैंगे। 25 क्यूँकै परमेसवर जो घर का मालिक कै उठकै दरबाजा भेड़ देगा, अर थम बाहरण खड़े होए खटखटाकै कहण लागो, हे प्रभु, म्हारै खात्तर दरबाजा खोल दे, अर वो जवाब देवै, मै थमनै कोनी जाण्दा, थम कित्त के सो?” 26 फेर थम कहण लागोगे, हमनै तेरे स्यामी खाया-पिया अर तन्नै म्हारे बजार म्ह उपदेश दिया। 27 पर वो कहवैंगा, मै थमनै कहूँ चुक्या सूं, मै कोनी जाण्दा, थम कित्त के सो। हे भुन्डे काम करण आळो, थम सारे मेरै तै दूर रहो। 28 जिब अब्राहम अर इसहाक अर याकूब अर सारे नवियाँ ताहीं परमेसवर राज्य म्ह बेटै, अर खुद नै बाहरण लिकाड़े होए देक्खोगे, “उड़े रोणा अर दाँत पिसणा होगा। 29 पूरी दुनिया के माणस आकै परमेसवर कै राज्य के भोज म्ह शामिल होवैंगे। 30 अर सच्चाई या सै के जो पाच्छले सै वे पैहले होंगे, अर जो पैहले सै वे पाच्छले होंगे।” 31 उससे बखत कुछ फरीसियाँ नै आकै यीशु तै कह्हा, “उरै तै लिकइज्या, क्यूँकै हेदोदेस तन्नै मार देणा चाहवै सै।” 32 यीशु नै उनतै कह्हा, “जाकै उस लोमड़ी तै कह हो के लखा, मै आज अर काल ओपरी आत्मायाँ नै काहूँ सूं अर बिमारां नै ठीक करूँ सूं, अर तीसरे दिन अपणा काम पूरा करऱ्गा। 33 फेर भी यो जर्सी सै के मै आज, काल अर परसो सफर करूँ, क्यूँकै हो न्ही सकदा के कोए नबी यरुशलेम नगर कै बाहरण मारया जावै। 34 “हे यरुशलेम के माणसों! हे यरुशलेम के माणसों! तन्नै भोत-से नवियाँ ताहीं मारया सै, जो भोत पैहले रहवै थे, अर उन माणसां ताहीं भी पत्थरां तै मार दिया जिन ताहीं थारे थोरै भेज्जे थे। कितनी ए बर मन्नै न्यू चाह्हा के जिस ढाल मुर्गी अपणे बच्चां नै अपणे पाक्खां तलै कठे करै सै, उससे तरियां ए मै भी तेरे बालकां नै कट्ठा करूँ, पर थमनै न्यू न्ही चाह्हा। 35 देक्खो, थारा घर थारे खात्तर उजाड़ छोड़ा जावै सै, मै थमनै कहूँ सूं: जिब ताहीं थम न्ही कहेगे, “धन्य सै वो, जो प्रभु कै नाम तै आवै सै,” जद ताहीं थम मन्नै दुबारै कदे न्ही देक्खोगे।”

14 एक खास मौककै पै जिब मसीह आराम कै दिन फरीसियाँ कै सरदारां म्ह तै किसे कै घरां रोट्टी खाण नै गया, अर वे सारे उननै घणी उत्सुकता तै देखण लागरे थे। 2 उड़े एक माणस था, जिसम्ह जलोदर की बीमारी थी। 3 इसपै यीशु नै शास्त्रियाँ अर फरीसियाँ तै कह्हा, “के नियम-कायदा के मुताबिक आराम कै दिन आच्छा करणा ठीक सै या न्ही?” 4 पर वे बोल-बाल्ले रहे। फेर यीशु नै उस रोगी पै हाथ धरकै उस ताहीं ठीक करकै, उस ताहीं बिदा कर दिया। 5 अर उनतै कह्हा, “थारे म्ह तै इसा कौण सै, के जै थारा बेट्टा या बल्ध कुँए म्ह आराम कै दिन पड़ज्या अर वो उसनै जिब्बे बाहणी कोनी लिकड़ै?” 6 वे इन बात्तां का कुछ जवाब कोनी दे पाए। 7 जिब यीशु नै देख्या के न्योंदे होए माणस किस तरियां खास-खास जगहां छाँट लेवै सै तो एक उदाहरण देकै कह्हा, 8 “जिब कोए तन्नै ब्याह म्ह बुलावै, तो खास माणसां की जगहां पै न्ही बैठणा, कदे इसा ना हो के उसनै तेरे तै भी बड़े ताहीं न्योंदे रख्या हो, 9 अर जिसनै तेरे ताहीं अर उस ताहीं देनुआ ताहीं न्योंदा दिया सै, आकै कहवै, ‘इसनै जगहां दे,’ अर फेर तन्नै शर्मिन्दा होकै सारया तै पाच्छे बैठणा पड़े। 10 पर जिब तू न्योंदा जावै तो सारया तै पाच्छली जगहां बैठ के जिब वो, जिसनै तेरे ताहीं न्योंदा सै आवै, तन्नै कहवै, ‘हे दोस्त, आगै बढ़कै बैठ,’ फेर तेरे गेल्या बैठण आळा कै स्याम्ही तेरी बडाई होवैगी। 11 क्यूँकै जो कोए अपणे-आपनै बड़डा बणावैगा, वो छोट्टा करण्या जावैगा, अर जो कोए अपणे-आपनै छोट्टा बणावैगा, वो बड़डा करण्या जावैगा।” 12 फेर यीशु नै फरीसी तै जिसनै उसका न्योंदा दिया था उसतै कह्हा, “जिब तू दिन का या रात का भोज करै, तो अपणे साथियाँ या भाईयाँ या कुण्बे या साहुकार पड़ोसियाँ नै ना न्योंद, कदे इसा ना हो के वे भी तन्नै न्योंदा देवै, अर तेरा बदला हो जावै। 13 पर जिब तू भोज करै तो कंगाल, टुड़े, लंगड़े अर आंध्याँ नै न्योंद। 14 तब तू धन्य होवैगा, क्यूँकै उन माणसां कै थोरे बदले म्ह देण खात्तर कुछ कोनी, परमेसवर तन्नै उस काम का बदला धर्मियाँ कै जिन्दा होण के बाद देवैगा।” 15 यीशु कै गेल्या खाणा खाण आळा म्ह तै एक नै ये बात सुणकै उसतै कह्हा, “धन्य सै वो जो परमेसवर के राज्य म्ह भोज खावैगा।” 16 यीशु नै उसतै कह्हा, “किसे माणस नै बड़डा भोज करण्या अर थणा ताहीं न्योंदा। 17 जिब खाणा त्यार होग्या तो उसनै अपणे नौककर कै हाथ न्योंदे होए माणसां ताहीं कहवां भेज्या, ‘आओ, इब खाणा त्यार सै।’” 18 “पर वे सारे के सारे माफी मॉगण लागे। पैहलडे नै उसतै कह्हा, ‘मन्नै खेत मोल लिए सै, उननै परखण जाऊँ सूं, मै तेरे ते बिनती करूँ सूं, मन्नै माफ करदे।’” 19 दुसरे नै कह्हा, “मन्नै पाँच जोड़े बल्ध मोल लिए सै, उननै परखण जाऊँ सूं, मै तेरे ते बिनती करूँ सूं, मन्नै माफ करदे।” 20 एक और नै कह्हा, “मन्नै ब्याह करण्या सै, इस करकै मै न्ही आ सकदा।” 21 उस नौककर नै आकै अपणे मालिक क ताहीं ये बात कह सुणाई। फेर घर कै मालिलक नै खुन्दक म्ह आकै, अपणे नौककर तै कह्हा, “नगर के बजारां अर गलियाँ म्ह इब्बे जाकै कन्नालाँ नै, टुँड्यां नै, लंगड्यां नै, अर आंध्याँ नै उरे लेकै

आओ।” 22 नौकरकर नै दुबारै कह्या, “हे मालिलक, जिस ढाळ तन्नै कह्दा था, उससे तरियां ए करया गया सै, अर फेर भी जगहां सै।” 23 मालिलक नै नौकरकर तै कह्या, “सड़कां पै अर बाड़या की कान्ही जा अर माणसां नै मजबूर करकै लिया ताके मेरा घर भरज्या। 24 क्यूंके मै थमनै कहूँ सूं के उन पैहले बुलाए होड़ माणसां म्ह तै कोपै मेरे खाणे नै कोनी चाख्यांग।” 25 जिब बड़ी भीड़ यीशु कै गेल्या जावै थी, तो उसनै बोहड़कै उनतै कह्या, 26 जै कोए मेरा चेल्ला बणणा चाहवै सै, अर अपणे माँ-बाप अर घरआठी अर बाल्कां नै अर भाईयाँ नै अर भाणां नै बल्के अपणे जीवन नै भी मेरे तै ज्यादा प्यार करै सै, तो वो मेरा चेल्ला न्ही हो सकदा। 27 अर जो कोए अपणे दुखां कूरूस ना ठावै, अर मेरे पाच्छे न्ही आवै, वो भी मेरा चेल्ला कोनी हो सकदा। 28 उदाहरण के तौर पै “थारे म्ह तै कौण सै जो घर बणणा चाहन्दा हो, अर पैहल्या बैठकै खर्च न्ही फैलावै के पूरा करण की गुंजास मेरे धोरै सै के न्ही? 29 जै वो आस ना होया करदा हो, तो जिब वो नीम धर ले पर काम पूरा ना कर पावै, तो सारे देक्खण आळे न्यू कहूँ उसका मखौल उड़ावैगै, 30 कै यो माणस बणण तो लाग्या पर पूरा कोनी कर पाया?” 31 या कौण इसा राजा सै जो दुसरे राजा तै युध करण जान्दा हो, अर जो विचार करले के जो बीस हजार सैनिक लेके मेरै पै चढ़ाया आवै सै, के मै दस हजार सैनिक लेके उसका सामना कर सकूँ सूं के न्ही? 32 न्ही तो उसके दूर रहदे होए वो दूतां नै भेजकै उसतै मिलाप करणा चाहवैगा। 33 इस्से ढाळ थारे म्ह तै कोए अपणे सारा कुछ त्याग न्ही देवै, वो मेरा चेल्ला कोनी हो सकदा। 34 “नूण तो बढ़िया सै, पर जै नूण का सुवाद जान्दा रहवै, तो वो किस चीज तै नमकीन करया जावैगा। 35 वो ना तो धरती कै अर ना खाद कै खात्तर काम म्ह आवै सै: उसनै तो माणस बाहरणै बगा देवै सै। जिसके कान हों वो ध्यान तै सुण ले।”

15 सारे चुंगी लेण आळे अर पापी माणस, यीशु कै धोरै आया कैरे

थे ताके उसकी सुपै। 2 पर फरीसी अर शास्त्री बरड़ाकै कहण लागे, “यो तो पापियाँ तै मिलै सै अर उनके गेल्या खावै भी सै।” 3 फेर उसनै उनतै यो उदाहरण कह्या 4 “थारे म्ह तै कौण सै जिसकी सौ भेड़ हों, अर उन म्ह तै एक खुज्या, तो निन्यानमै नै बण म्ह छोड़कै, उस खुई होड़ नै जिब ताहीं पा न्ही लेन्दी टोहन्दा ना रहवै? 5 अर जिब पा ज्या सै, फेर वो घणा राज्जी होकै उस ताहीं कंधे पै ठा लेवै सै, 6 अर अपणे धारं आकै साथियाँ अर पड़ोसियाँ नै कठुा करकै कहवै सै, ‘मेरे गेल्या खुशी मनाओ, क्यूंके मेरी खुई होड़ भेड़ पापी सै।’ 7 मै थमनै कहूँ सूं सूं के इस्से तरियां तै पापां नै छोड़ण आळे एक पापी खात्तर उन निन्यानबे धर्मियाँ की तुलना म्ह सुर्ग म्ह इसतै भी घणा आनन्द मनाया जावै सै, जिननै पापां की माफी माँगण की जसरत कोनी।” 8 यीशु नै एक और उदाहरण दिया “के कौण इसी बिरबान्नी होगी जिसकै धोरै दस सिक्के हों, अर उन म्ह तै एक खुज्या, तो वा दीवा बाल कै अर घर झाङ-बुहारकै, जिब ताहीं पा न्ही जावै जी लाकै टोहन्दी ना रहवै? 9 अर जिब पा ज्या सै, तो वा अपणी सहेलियाँ अर पड़ोसणां नै कठुा करकै कहवै सै, ‘मेरे गेल्या

खुशी मनाओ, क्यूंके मेरा खुया होया सिवका पाग्या सै।’ 10 मै थमनै कहूँ सूं के इस्से ढाळ जिब कोए माणस अपणे पापां नै छोड़कै परमेसवर की राह पै चाल्लणा शरु करै सै तो उसके खात्तर भी, परमेसवर के सुर्गदूतां कै स्याम्ही उतणा ए आनन्द मनाया जावै सै।” 11 फेर यीशु नै एक और उदाहरण देकै कह्या, “किसे माणस के दो बेटे थे। 12 उन म्ह तै छोट्ठै नै पिता तै कह्या, हे पिता, सम्पत्ति म्ह तै जो मेरा बांडै आवै सै वो मनै इब्बे दे द्यो। इस करकै पिता नै उन ताहीं अपणी सम्पत्ति का बंडवारा कर दिया। 13 धणे दिन कोनी बीते थे के छोट्टा बेटा सारा कुछ कठुा करकै दूर देश म्ह चल्या गया, अर उड़े बुरे कामां म्ह अपणा धन उड़ा दिया। 14 जिब वो सारा कुछ खर्च कर ग्या, तो उस देश म्ह भारया अकाळ पड़ा, अर वो कंगाल होग्या, अर उसकै धोरै खाण नै कुछ भी न्ही रह्या। 15 इस करकै वो उस देश के बाशिंदां म्ह तै एक कै धोरै काम करण खात्तर, अर उसनै उस ताहीं अपणे खेतां म्ह सूअर चराण खात्तर भेज्या। 16 वो भोत भूक्खा था अर वो चाहवै था के उन फलियाँ म्ह तै जिन नै सूअर खावै थे, अपणा पेट भैर, अर उस ताहीं कोए कुछ कोनी देवै था। 17 जिब छोट्टे बेटे के होश ठिकापै आये अर अपणे-आप तै कहण लाग्या, मेरै पिता कै धोरै इसे भोत मजदूर सै जिनकै खाण खाण कै बाद भी धणाए बच जावै सै, पर मै उरे भूक्खा मरण लाग रह्या सूं। 18 इस करकै मै इब उठकै अपणे पिता धोरै जाऊँगा अर उसतै कहूँगा के पिता जी, मनै परमेसवर जो सुर्ग म्ह सै, उसके अर तेरे बिरोध म्ह पाप करया सै। 19 इब इस जोग्गा कोनी रह्या के तेरा बेटा कुहाँड़, मनै अपणे एक मजदूर की ढाळ राख ले।” 20 “पर वो उस देश नै छोड़ के अपणे बाप कै घर की ओड़ चाल्या, वो इब्बे कुछ ए दूर था के उसकै बाप नै उस ताहीं देख्या उसपै तरस आया, अर भाजकै अपणे बेटे ताहीं छात्ती कै लगाकै, उस ताहीं चुम्ता रह्या। 21 बेटे नै उसतै कह्या, पिता जी, मनै परमेसवर जो सुर्ग म्ह सै, उसके अर तेरे बिरोध म्ह पाप करया सै, अर इब इस जोग्गा कोनी रह्या के तेरा बेटा कुहाँड़। 22 पर बाप नै अपणे नौकरां तै कह्या, ‘ताळ्ह करकै सुर्थे-सुर्थे लते लिकाड़कै उसनै पिहराओ, अर उसकै हाथ्यां म्ह गुड़ी, अर पायां म्ह जूती पहराओ, 23 अर बढ़िया भोज तैयार करो ताके हम खावां अर खुशी मनावा। 24 क्यूंके मेरा यो बेटा मरण्या था, दुबारै जीग्या सै: खुशी था अर इब पाग्या सै।’ अर वे खुशी मनान लाग्ये। 25 पर उसका जेट्टा बेटा खेत म्ह काम करण लागरया था। जिब वो आन्दे होए घर कै धोरै पोहच्या, तो उसनै गाण-बजाण अर नाचण का बोल सुण्या। 26 आखर म्ह उसनै एक नौकरकर बुलाकै बुझ्याया, यो कै होण लाग रह्या सै? 27 उसनै उस ताहीं कह्या, तेरा भाई बोहड़ आया सै, अर तेरे बाप नै बढ़िया भोज तैयार करवाया सै, इस करकै के वो ठीक-ठाक घरा आ ग्या सै। 28 न्यू सुणकै वो छो तै भरया अर भीत्तर जाणा कोनी चाह्या, पर उसका बाप बाहरणै आकै उसनै मनान लाग्या। 29 उसनै बाप तै कह्या, ‘देख, मै इतने साल तै तेरी सेवा-पाणी कर रह्या सूं, अर कदे भी तेरा हुक्म कोनी टाळ्या, फेरभी तन्नै मेरै ताहीं कदे भी कोए बढ़िया चीज

कोनी दी, ताके मै अपणे साथियाँ गेल्या आनन्द कर सकूँ। 30 पर जिब तेरा यो बेटा आया, जिसनै तेरी सम्पत्ति अयाशियाँ म्ह उडा दी सै, तो उसकै खातर तनै बढिया भोज तैयार करया।’ 31 उसकै बाप नै उसतै कह्या, मेरे बेटे, तू सारी हाण मेरे गेल्या सै, अर जो कुछ मेरा सै वो सारा तेराए सै। 32 पर इब आनन्द अर मगन होणा चाहिये क्यूँके यो तेरा भाई जो मेरे होए माणसां की तरियां था दुबारा जी ग्या सै, खुग्या था, इब पाग्या सै।”

16 फेर यीशु नै चेल्यां ताहीं एक और उदाहरण देकै कह्या, “किसे

साहूकार का एक भण्डारी था, अर लोगां नै उसकै स्याम्ही उसपै यो इल्जाम लाया के वो तेरा सारा धन उडा देवै सै। 2 आखर म्ह उसनै अपणे भण्डारी ताहीं बुलाकै कह्या, ‘यो के सै मै तेरे बाबत के सुणु सूँ?’ अपणे भण्डारीपण का हिसाब दे, क्यूँके तू आगंगे तै भण्डारी कोनी रह सकदा।’ 3 फेर भण्डारी सोच्याण लाग्या, इब मै के करँ? क्यूँके मेरा मालिलक इब भण्डारी का काम मेरै तै खोस्सै सै। माटी खोदण का काम मेरै तै होवै कोनी, अर भीख माँगदे होए मन्नै शर्म आवैगी। 4 मै जाण ग्या के मै के करँ, ताके मै जिब भण्डारी कै काम तै हटाया जाऊँ तो माणस मन्नै अपणे घरां म्ह ले लेवै। 5 फेर उसनै अपणे मालिलक के देणदारां ताहीं एक-एक करकै बुलाया अर पैहल्या तै बुझ्याया, ‘तेरे उप्पर मेरै मालिलक का कितना कर्जा सै?’ 6 उसनै कह्या, “सौ माण तेल,” फेर उसनै उसतै कह्या, “अपणा खात्ता अर बही ले अर बैठकै तावाळा पचास लिख दे।” 7 फेर उसनै दुसरे तै बुझ्याया, “तेरे पै कितना कर्जा सै?” दुसरे नै कह्या, सौ माण गेहूँ, फेर उसनै उसतै कह्या, “अपणा खात्ता अर बही लेकै अर बैठकै अस्सी लिख दे।” 8 मालिलक नै उस अर्धमै भण्डारी ताहीं साराहया के उसनै कितनी चुतुराई तै काम करया सै। क्यूँके इस दुनिया के माणस अपणे बख्त के माणसां के गेल्या व्यवहार म्ह चाँदपै के माणसां तै घणे चलाक सै। (aiōnios g165) 9 अर मै थमनै कहूँ सूँ के दुनिया की धन-दौलत तै भले काम करकै अपणे खातर साथी बणा ल्यो, ताके जिब वो धन दौलत न्ही रहवैं तो अनन्त काल के घर म्ह थारे स्वागत हो। (aiōnios g166) 10 वे लोग जो थोड़े-तै भी थोड़े म्ह भी बिश्वास जोग्ये सै, वे घणे म्ह भी बिश्वास जोग्ये होंगे, जो थोड़े-तै भी थोड़े म्ह बेर्झमान सै, वो घणा म्ह भी बेर्झमान होंगे। 11 इस करकै जिब थम संसारिक धन म्ह बिश्वास जोग्ये न्ही ठहरे, तो साच्या धन थमनै कौण देवैगा? 12 अर जै थम संसारिक धन-दौलत न इस्तमाल करण म्ह भरोस्सेमंद न्ही ठहरे, तो परमेसवर थमनै सुर्योग्य धन क्यूँ देवैगा? 13 “कोए नौकर को मालिलकै की सेवा एक बख्त पै न्ही कर सकदा, क्यूँके वो एक तै बैर अर दुसरे तै प्यार राख्यैगा, या एक तै मिल्या रहवैगा अर दुसरे नै छोटा जाहैगा। थम परमेसवर अर धन दोनुआ की सेवा न्ही कर सकदे।” 14 फरीसी जो लोभ्भी थे, ये सारी बात सुणकै, मखौल करण लाग्ये। 15 यीशु नै उनतै कह्या, “थम तो माणसां कै स्याम्ही खुद नै धर्मी ठहराओ सो, पर परमेसवर थारे

मन नै जाणै सै, क्यूँके जो चीज माणसां की निगांह म्ह महान् सै, वा परमेसवर कै लोवै धृणित सै।” 16 जब तक यूहन्ना आया, जिब ताहीं मूसा के नियम-कायदे अर नबी का प्रभाव माणसां पै रह्या। उस बख्त तै परमेसवर के राज्य का सुसमाचार सुणाया जाण लागरया सै, अर होरक उस म्ह तेज्जी तै इसकी ओड़ खिचे आण लागरे सै। 17 अकास अर धरती का टळ जाणा आसान सै, पर नियम-कायदा की हर छोटी बात भी पूरी होकै रहवैगी। 18 उदाहरण के तौर पै “जो कोए अपणी घरआळी नै छोड़कै दुसरी तै ब्याह करै सै, वो जारी करै सै, अर जो कोए इसी छोटी होई बिरबान्नी तै ब्याह करै सै, वो भी जारी करै सै।” 19 फेर यीशु नै कह्या, “एक साहूकार माणस था जो बैंजनी अर मलमल के महँगी लते पहरदा अर होरक दिन ऐसो-आराम तै अर मौज तै रहवै था। 20 लाजर नाम का एक कंगाल जिसकै घाः होरे थे उसकी देहळी पै छोड़ दिया जावै था। 21 अर वो चाहवै था, के साहूकार के मेज की जूठण तै अपणा पेट भरै, उरे ताहीं के कुर्ते भी आकै उसके घाः नै चाट्या करै थे।” 22 इसा होया के वो कंगाल मरया, अर सुर्गदूतां नै उस ताहीं लेकै अब्राहम की गोद म्ह पोहच्या। वो साहूकार भी मारया अर गाड्या गया, 23 साहूकार नरक म्ह गेरया गया, अर नरक की ताड़ना तै दर्द म्ह पड़े होए अपणी निगांह ठाई, दूर तै ए अब्राहम के साथ लाजर ताहीं देख्या। (Hadēs g86) 24 फेर उसनै रुक्का मारकै कह्या, हे पिता अब्राहम, मेरै पै दिया करकै लाजर नै भेजदे, ताके वो अपणी आनाळी का कुणा पाणी म्ह डबोकै मेरी जीध नै शीठी करै, क्यूँके मै इस आग तै तड़फूँ सूँ। 25 “पर अब्राहम बोल्या, ‘हे बेटे, याद कर, के तन्नै अपणी जिन्दगी म्ह बढिया तै बढिया चीज ले ली सै,’ अर उससे तरियां लाजर नै तृच्छ चीज, पर इब वो उरे सुख अर शान्ति पा रह्या सै, अर तू तड़फू़ रह्या सै। 26 इन सबके अलावा म्हारै अर तेरे बिचाळै एक बड़ी खाई ठहराई गई सै, के जो उरे तै तेरी ओड़ आणा चाहवै, वे ना जा सकै, अर ना कोए उड़े इस पास्सै म्हारै धोरे आ सकै।” 27 साहूकार बोल्या, तो हे पिता, मै तेरे तै बिनती करूँ सूँ के उस ताहीं मेरै बाप कै घरां भेज, 28 क्यूँके मेरे पाँच भाई सै, वो उनकै स्याम्ही इन बातां की गवाही दे, इसा ना हो के वे भी दुख की जगहां म्ह आवै। 29 अब्राहम नै उसतै कह्या, उनकै धोरे तै उनकै धोरे जावै, तो वे पाप करणा छोड़ देंगे।” 31 अब्राहम नै उसतै कह्या, “जिब वे मूसा नबी अर नवियाँ की न्ही सुणदे, तो जै मेरे होया म्ह तै कोए जी भी जा, तोभी उसकी कोनी मान्नैगें।”

17 फेर यीशु नै अपणे चेल्यां तै कह्या, “हो न्ही सकदा के ठोक्कर ना लागै, पर धिक्कार सै, उस माणस पै जिसकै बाबत ठोक्कर लागै सै। 2 पर जो कोए इन छोट्या बाल्कां समान जो मेरै पै बिश्वास करै सै, किसे तै भी पाप करवावै तो उसकै खातर भला योए सै के एक बड़ी चाक्की का पाट उसकै गळ म्ह लटकाया जावै अर वो समुंदर म्ह

गेरया जावै।” 3 सावधान रहों, “जै तेरा बिश्वासी भाई पाप करै तो उसनै समझा, अर जै पछतावै तो उसनै माफ करदे। 4 जै हरेक दिन वो तेरे बिरुद्ध म्ह सात बार भी पाप करै, अर सातु बार तेरे धेरै आकै कहवै, मै पछताँ सूँ तो उसनै माफ करदे।” 5 फेर प्रेरितां नै प्रभु यीशु तै बिनती करी, “के ध्वरे बिश्वास नै बढ़ा।” 6 प्रभु बोल्या, “जै थमनै राई कै दाणै बराबर भी बिश्वास होन्दा, तो थम इस शहतूत कै दरखत नै कहन्दे के जड़ तै उखड़कै समुन्दर म्ह जा लाग, तो वो थारी मान लेन्दा।” 7 फेर यीशु नै कहवा, “मान ल्यो थरे म्ह तै किसे कै धोरै एक नौककर सै जो नौककर हळ चलान्दा या भेड़ चरान्दा हो, अर जिब वो खेत तै बोहड़ आवै, तो के थम उसतै कहोंगे, ‘आकै मेरे गैल खाणा खाण बैठ ज्या?’ 8 पर इसके बजाये के वो अपणे नौककर न्यू कोनी कहवैगा, ‘मेरे खात्तर खाणा त्यार कर, अर मेरे ताहीं खाणा परोसण खात्तर तैयार हो ज्या, जिब ताहीं मै खाऊँ पीऊँ तब ताहीं मेरी सेवा-पाणी कर, इसकै पाच्छै तू भी खा-पी लिये?’ 9 के वो उस नौककर का शयान मान्दैगा के उसनै वै काम करे जिसका हुकम दिया सै? 10 इससे तरियां तै थम भी जिब उन सारे काम्मां नै कर ल्यो जिसका हुकम थरे ताहीं दिया गया सै, तो उस ताहीं कर लेण के बाद थमनै कहणा चाहिये, ‘हम नौककर सां, हम किसे बडाई के हकदार कोनी हमनै तो बस अपणा फर्ज निभाया सै।’” 11 फेर जिब यीशु यशुश्लेम जाण लागरया था तो सामरिया अर गलील परदेस कै बिचालै की सीमा तै होन्दा होया लिंकड्या। 12 तो गाम म्ह बड़दे बखत उसनै दस कोढ़ी मिले वे दूर खड़े थे। 13 वे जोर तै रुक्का मारकै बोल्ले, “हे यीशु, हे मालिलक, म्हारै पै दया कर!” 14 यीशु नै उन कान्ही लखाकै कहवा, “यशुश्लेम के मन्दर म्ह जाओ, अर खुद नै याजकां ताहीं दिखाओ, ताकै वो भी देक्खै के थम ठीक होए सों के न्ही।” अर जान्दे ए जान्दे वे कोढ़ तै मुक्त होगये। 15 फेर उन म्ह तै एक न्यू देखकै के मै ठीक होया सूँ, जोर-जोर तै परमेसवर की बडाई करदा होया यीशु कै धेरै बोहड़या, 16 अर यीशु कै पायां पै मुँह कै बळ पड़कै उसका धन्यवाद करण लाग्या, अर वो सामरी था। 17 इसपै यीशु नै कहवा, “के दस कोढ़ी चंगे न्ही होए, तो फेर नौ कित्त सै? 18 के गैर यहूदी नै छोड़ कोए और न्ही लिंकड्या जो परमेसवर की बडाई करदा?” 19 फेर उसनै उस ताहीं कहवा, “उठकै चल्या जा, तनै बिश्वास करया इस खात्तर तू ठीक होया सै।” 20 फेर फरीसियाँ नै यीशु तै बुझ्याके परमेसवर का राज्य कद आवैगा, तो उसनै उनतै जवाब दिया, “परमेसवर का राज्य इस ढाल आवैगा के थम उसनै अपणी आँखां तै न्ही देख ख सकदे। 21 अर ना ए माणस इसके बारें म्ह न्यू कह सकैगे, देख्यों यो सै परमेसवर का राज्य। क्यूँके परमेसवर का राज्य थरे बिचालै सै।” 22 फेर यीशु नै चेल्यां तै कहवा, “वो दिन आवैगा, जिब थम उस दिन नै देखणा चाहोंगे जिब मै माणस का बेट्टा बोहड़ के आँऊंगा पर थम उस दिन नै देख न्ही पाओगे।” 23 माणस थरे तै कहवैगे, लखाओ, “मसीहा उड़े सै!” या लखाओ, “वो आड़े सै!” पर थम यो सुणकै चले ना जाइयो, अर ना उनकै पाच्छै लागियो। 24 क्यूँके जिस तरियां बिजली अकास कै एक छोर तै कोंधं कै

अकास कै दुसरे छोर ताहीं चमकै सै, उससे तरियां मै माणस का बेट्टा भी अपणे दिना म्ह जाहिर होऊँगा। 25 पर पैहल्या जरूरी सै के मै घणा दुख ठावै, अर इस युग कै माणस मेरे ताहीं नकार देंगे। 26 जिस पूर्वज नूह के दिना म्ह होया था, उससे तरियां मुझ माणस के बेटे के दिनां म्ह भी होवैगा। 27 जिस दिन तक नूह जहाज म्ह न्ही चढ़ाया, उस दिन तक माणस खावै-पीवै थे, अर उन म्ह ब्याह होवै थे। फेर बाढ़ नै उन सारया का नाश करया। 28 ठीक याए हालात लूत कै दिनां म्ह होई थी, जिब वो सदोम नगर म्ह रहवै था। माणस खावै-पीवै, लेणा-देणा करदे, दरखत लगान्दे अर घर चिंगै थे, 29 पर जिस दिन लूत सदोम तै लिंकड्या, उस दिन आग अर गन्धक अकास तै बरसी सारे नगर के माणसां ताहीं नाश कर दिया। 30 यो उस दिन की तरियां होगा जिब मै माणस का बेट्टा बिना बताये आ जाऊँगा। 31 “उस दिन जो छात पै हो, अर उसका समान घर म्ह हो, अर वो उसनै लेण खात्तर तलै न्ही उतरैं, अर उससे तरियां जो खेत्तां म्ह हो, वो पाच्छै न्ही बोहड़े।” 32 याद राखियों लूत की घरआळी कै गैल कै होया था! 33 जो कोए अपणी जान बचाणा चाहवै, वो उसनै खोवैगा, अर जो कोए उसनै खोवै वो उसनै जिन्दा राक्खैगा। 34 मै थमनै कहूँ सूँ, उस रात नै दो माणस एक खाट पै होंगे, एक ठाया जावैगा अर दुसरा छोड़ दिया जावैगा। 35 दो बिरबानी एक साथ चाक्की पीसदी होवैगी, एक ठाली जावैगी अर दुसरी छोड़ दी जावैगी। 36 (दो जणे खेत म्ह होंगे, एक ठाया जावैगा अर दुसरा छोड़या जावैगा।) 37 न्यू सुण उननै उसतै बुझ्याया, “हे प्रभु, यो कित्त होवैगा?” यीशु नै उनतै कह्या, “जड़े लाश हो सै, उड़े चील कठु होवै सै, उससे तरियां यो हरेक कोए जाण लेवैगा के यो कित्त होगा।”

18 फेर यीशु नै अपणे चेल्यां तै इसकै बाबत कह्या, के रोज प्रार्थना करणी चाहिये अर हिम्मत न्ही हारनी चाहिये, उनतै यो उदाहरण दिया, 2 “किसे नगर म्ह एक न्यायाधीश रहवै था, जो ना परमेसवर तै दैरे था अर ना किसे माणस की परवाह करया करै था। 3 उससे नगर म्ह एक बिधवा भी रहवै थी, जो उसकै धेरै आ-आकै कहवा करै थी, मेरा न्याय चुकाकै मन्नै बैरी तै बचा।” 4 कुछ बखत ताहीं तो वो कोनी मान्या पर आखर म्ह मन सोचकै बोल्या, “ऊंतो मै परमेसवर तै कोनी डरदा, अर ना माणसां की कुछ परवाह करूँ सूँ, 5 फेरभी या बिधवा मन्नै कालं राक्खै सै, इस करकै मै उसका न्याय चूकाऊँगा, कदे इसा ना हो के घडी-घडी आकै आखर म्ह मेरी नासासा म्ह दम करदे।” 6 प्रभु यीशु नै कह्या, “सुणो, इस अर्धमौ न्यायाधीश नै देख के सीखों। 7 के परमेसवर अपणे चुणे होया का न्याय कोनी करैगा, जो दिन-रात उसके नाम की दुहाई दें रहवै सै? के वो उनकी मदद करण म्ह वार लगावैगा? 8 मै थमनै कहूँ सूँ, वो जिबे उनका न्याय करैगा। फेर भी मै माणस का बेट्टा जिब आँऊंगा, तो के मै धरती पै मेरे पै बिश्वास करणीया नै पाऊँगा?” 9 यीशु नै उन माणसां तै यो उदाहरण दिया, जो अपणे बारें म्ह यो सोच्चै थे, के हम धर्मी सां, अर दुसरयां नै नकारै थे। 10 “दो माणस मन्दर म्ह प्रार्थना करण नै गए, एक फरीसी था अर दुसरा चुंगी

लेण आळा, 11 फरीसी खड़ा होकै अपणे मन म्ह न्यू प्रार्थना करण लाग्या, हे परमेसवर, मै तेरा धन्यवाद करूं सूं के मै और माणसां की तरियां अन्धेर करण आळा, जुल्मी, अर जार कोनी, अर ना इस चुंगी लेण आळे की तरियां सूं। 12 मै हफ्ते म्ह दो बर ब्रत राक्षयूं सूं मै अपणी सारी आमदणी का दसमां हिस्सा भी तेरे ताहीं देऊं यु सूं।” 13 पर चुंगी लेण आळे नै दूर खडे होकै, सुर्य कै कान्ही निगांह ठाणा भी कोनी चाह्या, बल्के दुखी होकै अपणी छात्ती पीट-पीटकै कह्या, “हे परमेसवर, मुझ पापी पै दया कर!” 14 “बिश्वास करो वास्तव म्ह योए चुंगी लेण आळा माणस (परमेसवर की ओङ्डे तै) धर्मी ठहराया जाकै घरां गया, ना के वो फरीसी माणस। क्यूँकै जो कोए अपणे-आपनै बड़ा बणावैगा, वो छोट्टा करया जावैगा, अर जो कोए अपणे-आपनै छोट्टा बणावैगा, वो बड़ा करया जावैगा।” 15 फेर माणस अपणे बाळकां नै भी उसकै धोरै ल्याण लाग्ये के वो उनपै हाथ धरै, पर चेल्यां नै देख उन ताहीं धमकाया। 16 यीशु नै बाळकां ताहीं धोरै बुलाकै कह्या, “बाळकां नै मेरै धोरै आण द्यो अर उननै रोक्को मतना: क्यूँकै परमेसवर का राज्य इसाए का सै। 17 मै थमनै सच कहूं सूं के जो कोए परमेसवर कै राज्य नै बाळक की तरियां कोनी अपणावै वो उस म्ह कदे न्हीं बड़ सकदा।” 18 किसे सरदार नै उसतै बुझाया, “हे उत्तम गुरु, अनन्त जीवन का हकदार होण खात्तर मै के करूं?” (aiōnios g166) 19 यीशु नै उसतै कह्या, “तू मन्नै उत्तम क्यांतै कहवै सै? कोए उत्तम कोनी, सिर्फ एक, यानिके परमेसवर। 20 तन्नै हुक्मां का तो बेराए सै: ‘जारी ना करिये, खून ना करिये, अर चोरी ना करिये, अर झूठी गवाही ना दियो, अपणे माँ-बाप का आदर करियो।’” 21 उसनै कह्या, “मै तो इन सारया नै बाळकपण तै ए मान्दा आँऊं सूं।” 22 न्यू सुणकै यीशु नै उसतै कह्या, “तेरे म्ह इब भी एक बात की कमी सै, अपणा सब कुछ बेचकै कंगालां ताहीं बांड दे, अर तन्नै सुर्ग म्ह धन मिलैगा, अर आकै मेरा चेल्ला बणण खात्तर मेरै पाच्छै हो ले।” 23 वो न्यू सुणकै घणा उदास होया, क्यूँकै वो घणा साहूकार था। 24 यीशु नै उस ताहीं देखकै कह्या, “साहूकारां का परमेसवर कै राज्य म्ह बड़ा कितना ओक्खा सै। 25 जिस तरियां तै ऊंकूं का सूर्यू कै मोरै म्ह तै लिकडणा मुश्किल सै। उस्से तरियां परमेसवर के राज्य साहूकार का बड़ा भी मुश्किल सै।” 26 इसपै सुणण आळा नै कह्या, “तो फेर किसका उद्धार हो सकै सै?” 27 उसनै कह्या, “जो माणसां तै न्हीं हो सकदा वो परमेसवर तै हो सकै सै।” 28 पतरस नै कह्या, “लखा, हम तो घर-बार छोडकै तेरे पाच्छै हो लिये सां।” 29 उसनै उनतै कह्या, “मै थमनै साच्ची-साच कहूं सूं के इसा कोए कोनी जिसनै परमेसवर के राज्य कै खात्तर घर, या घरआळी, भाई, या माँ-बाप, या बाल-बच्चे ताहीं छोड दिया हो, 30 अर इस बखत कई गुण घणा न्हीं पावै अर परलोक म्ह अनन्त जीवन।” (aiōn g165, aiōnios g166) 31 फेर उसनै बारहां चेल्यां ताहीं गैल लेकै उनतै कह्या, “देक्खो, हम यरुशलेम नगर म्ह जावां सां, अर जितनी बात मुझ माणस कै बेटू खात्तर नवियाँ नै लिक्खी होई सै, वे सारी पूरी होवैगी। 32 क्यूँकै मै गैर यहूदियाँ कै हाथां

म्ह सौप्या जाऊँगा, अर मेरा मजाक उडावैगें, मेरी बेजती करैगें, अर मेरे पै थूकैगें, 33 अर मेरै कोडे मारैगें, अर मन्नै छेतैगें अर मार देवैगें, अर मै तीसरे दिन जिन्दा हो जाऊँगा।” 34 पर उननै इन बातां म्ह तै कोए बात न्हीं समझी, अर या बात उनतै लुक्की रही, अर जो कह्या गया था वो उनकी समझ कोनी आया। 35 जिब वो यरीहो नगर कै लोवै पोंहच्या, तो एक आन्था सङ्क कै किनारे बेठ्या होया भीख माँगण लागरया था। 36 वो भीड़ कै चाल्लण की आवाज सुणकै बुझण लाग्या, “यो के होरया सै?” 37 उननै उसतै बताया, “यीशु नासरी जाण लागरया सै।” 38 फेर उसनै रुक्का मारकै कह्या, “हे यीशु, दाऊद की ऊलाद, मेरै पै दया कर!” 39 जो आगै-आगै जाण लागरे थे, वे उसनै धमकाण लाग्ये के बोल-बाल्ला रहे, पर वो और भी रुक्का मारण लाग्या, “हे दाऊद की ऊलाद, मेरै पै दया कर!” 40 फेर यीशु नै खडे होकै हुक्म दिया के उसनै मेरै धोरै ल्याओ, अर जिब वो धोरै आया तो उसनै उसतै बुझाया, 41 “तू के चाहवै सै के मै तेरे खात्तर करूं?” उसनै कह्या, “हे प्रभु, योए के मै देक्खण लाग्नू।” 42 यीशु नै उसतै कह्या, “देक्खण लाग, तेरे बिश्वास नै तेरे ताहीं ठीक करया सै।” 43 फेर वो जिब्बे देखण लाग्या अर परमेसवर की बड़ाई करदा होया उसकै पाच्छै हो लिया, अर सारे आदमियाँ नै देखकै परमेसवर की जै-जै कार करी।

19 यीशु यरीहो नगर म्ह बड़ाण लागरया था। 2 ओङ्डे जक्कर्ड नाम का एक माणस था जो चुंगी लेण आळा का सरदार, अर साहूकार था। 3 वो यीशु नै देखण चाहवै था के वो कौण सै। पर भीड़ कै कारण देख न्हीं सकै था, क्यूँकै वो बोन्ना था। 4 फेर उस ताहीं देक्खण खात्तर वो आगै भाजकै गुलर कै दरखत पै चढ़ाया, क्यूँकै यीशु नासरी उसकै धोरै आया, तो उपर लखाकै उसनै कह्या, “हे जक्कर्ड, तोला उतरया, क्यूँकै आज मन्नै तेरे घरां जसर रहणा सै।” 6 वो दरखत तै उतरकै राज्जी होकै यीशु नै अपणे घरां लेग्या। 7 न्यू देखकै सारे माणस बरडाण लाग्ये, “वो तो एक पापी माणस कै घरां रुकरया सै।” 8 जिब यीशु जक्कर्ड के घर खाण लागरया था तो जक्कर्ड नै खडे होकै प्रभु तै कह्या, “हे प्रभु यीशु, देख, मै अपणी आश्ची सम्पत्ति कंगालां नै यु सूं अर किसे का कुछ भी जुल्म करकै ले लिया सै तो उस ताहीं चौगुणा बोहडा यु सूं।” 9 फेर यीशु नै उसतै कह्या, “आज इस घर के माणसां पै उद्धार आया सै, इस करकै के यो भी अब्राहम के वंश तै सै।” 10 मै माणस का बेटू खोए होया नै टोहळ अर उनका उद्धार करण आया सूं।” 11 जिब वे ये बात सुणे थे, तो यीशु नै एक उदाहरण देकै कह्या, इस करकै के वो योश्शलेम कै धोरै था, अर वे समझै थे के परमेसवर का राज्य इब्बे जाहिर होण आळा सै। 12 आखर उसनै कह्या, “एक साहूकार माणस दूर देश तै चल्या के राजपद पाकै बोहडै।” 13 उसनै अपणे नौकरां म्ह तै दस ताहीं बुलाकै उन ताहीं दस मोंहर दी अर उनतै कह्या, “मेरे बोहडण ताहीं लेण-देण करियो।” 14 पर उसकै नगर के बासिन्दे उसतै बैर राक्खै थे, अर उसकै पाच्छै

दूरां तै कुहा भेज्या, “हम नहीं चाहन्दे के यो म्हारै पै राज करै।” 15 “जिब मालिक राजपद पाकै बोहड्या, तो इसा होया के उसनै अपणे नौकरां ताहीं जिन ताहीं रपिये दिये थे, अपणे धोरै बुलाया ताके बेरा करै के उननै लेण-देण म्ह के-के कमाया।” 16 फेर पैहल्ले नै आकै कह्या, “हे मालिक, तेरी मोहर तै दस और मोहर कमाई सै।” 17 उसनै उसतै कह्या, “शाबाश, हे आच्छे नौकर! तू धणेए थोड़े म्ह भरोसमंद लिकड्या इब दस नगरां का हक राख।” 18 दुसरे नौकर नै आकै कह्या, “हे मालिक, तेरी मोहर तै पाँच और मोहर कमाई सै।” 19 मालिक नै उसतै कह्या, “तू भी पाँच नगरां पै हाकिम होज्या।” 20 तीसरे नौकर नै आकै कह्या, “हे मालिक, देख, तेरी मोहर या सै: जिस ताहीं मन्नै अंगोच्छे म्ह जुड़ राख्यी थी। 21 क्यूँके मै तेरै तै डरूँ था, इस करकै के तू कठीर माणस सै: जो तन्नै न्हीं धरया उसनै ठा ले सै, अर जो तन्नै न्हीं बोया, उस ताहीं काहै सै।” 22 मालिक नै उसतै कह्या, “हे दुष्ट नौकर, मै तेरै मुँह तै तन्नै कसूरवार ठहराऊँ सूँ। जिब तन्नै मेरा बेरा सै के करड़ा माणस सूँ, जो मन्नै न्हीं धरया उसनै ठा ल्यु सूँ, अर जो मन्नै न्हीं बोया, उस ताहीं काठूँ सूँ, 23 तो तन्नै मेरे रपिये सर्फां कै धोरै क्यातै कोनी धरे के मै आकै व्याज सुधां ले लेन्दा?” 24 अर जो माणस धोरै खड़े थे, उसनै उनतै कह्या, “वा मोहर उसतै ले ल्यो, अर जिसकै धोरै दस मोहर सै उसनै दे घो।” 25 उननै उसतै कह्या, “हे मालिक, उसकै धोरै दस मोहर तो सै।” 26 “मै थमनै कहूँ सूँ के जिसकै धोरै सै, उस ताहीं दिया जावैगा, अर जिसकै धोरै न्हीं सै, उसतै वो भी जो उसकै धोरै सै ले लिया जावैगा। 27 पर मेरे उन बैरियाँ ताहीं जो न्हीं चाहवैं थे के मै उनपै राज करूँ, उन ताहीं उरै ल्याकै मेरै स्याम्ही धात करो।” 28 ये बात कहकै यीशु यरुशलेम नगर कै कान्ही चेल्यां कै आगै-आगै चाल्या। 29 जिब वो जैतून नामक पहाड़ पै बैतफगे अर बैतनिय्याह गाम कै धोरै पोंहच्या, तो उसनै अपणे चेल्यां म्ह तै दोयां ताहीं न्यू कहकै भेज्या, 30 “स्याम्ही के गाम म्ह जाओ, अर उस म्ह पोहोचदये एक गधी का बच्चा जिसपै कोए कदे न्हीं बेच्या हो, बन्धया होड़ थमनै मिलैगा, उसनै खोल कै लियाओ। 31 जै थारै तै कोए बुझ्यै के क्यातै खोल्लो सो, तो कहियो के प्रभु नै इसकी जरूरत सै।” 32 जो भेज्जै गए थे, उननै जाकै जिसा यीशु नै कह्या था, उससे तरियां पाया। 33 जिब वे गधी कै बच्चे नै खोल्लै रहे थे, तो उसके मालिकां नै उनतै बुझ्याया, “इस बच्चे नै क्यातै खोल्लो सो?” 34 चेल्यां नै कह्या, “प्रभु नै इस ताहीं काम म्ह ल्याणा सै।” 35 वे उसनै यीशु कै धोरै लियाए, अर अपणे लत्ते उस गधी के बच्चे पै गेरकै यीशु ताहीं उसपै बिठा दिया। 36 जिब वो जाण लागरया था, तो वे अपणे लत्ते राह म्ह बिछान्दे जावै थे। 37 यरुशलेम नगर कै धोरै आन्दे होए जिब यीशु जैतून पहाड़ कै ढलाण पै पोंहच्या, तो चेल्यां का सारा टोळ उन सारे सामर्थ के कामां कै कारण जो उननै देक्खे थे, राज्जी होकै जोर तै परमेसवर की जय-जयकार करण लागे 38 “धन्य सै वो राजा, जो प्रभु कै नाम तै आवै सै। सुर्ग म्ह शान्ति अर अकास मण्डप म्ह महिमा हो!” 39 फेर भीड़ म्ह तै

कुछ फरीसी यीशु तै कहण लागे, “हे गुरु, इस बात के कारण अपणे चेल्यां नै धमका।” 40 उसनै जवाब दिया, “मै थमनै कहूँ सूँ जै ये बोल-बाल्ले रहे तो स्तुति इन पत्थरां तै लिकडण लागैगी।” 41 जिब यीशु यरुशलेम नगर कै धोरै आया तो नगर नै देखकै माणसां खात्तर रोया 42 अर बोल्या, “कितना भला होन्दा के तू हाँ, तू ए अज इतणाए समझ लेन्दा की परमेसवर के साथ शान्ति का के मतलब सै, पर यो तेरे तै लहको के राख्या गया सै। 43 क्यूँके वे दिन तेरे म्ह आवैंगे के तेरे बैरी मोर्चा बाँधकै तन्है धेर लेवैंगे, अर चौगरादे तै तन्नै दबवैंगे ताके थारा राह बन्द होज्या, 44 अर तेरा बैरी तन्नै अर तेरे बाल्कां ताहीं जो तेरे म्ह सै, माट्टी म्ह मिलावैंगे, अर तेरे म्ह पत्थर पै पत्थर भी कोनी रहवैगा, जो गेरया ना जावैगा, क्यूँके तन्नै उस मौकके ताहीं जिब तेरे पै दया की निगांह होई थी तो तन्नै कोनी पिच्छाणा।” 45 फेर वो मन्दर म्ह जाकै समान बेचण आळा ताहीं बाहरणै लिकडण लाग्या, 46 अर उनतै कह्या, “पवित्र शास्त्र म्ह लिख्या सै, ‘मेरा घर प्रार्थना का घर होगा,’ पर थमनै इस ताहीं डाकुआं की गुफा बणा दिया।” 47 वो हरेक दिन मन्दर म्ह उपदेश दिया करै था, अर प्रधान याजक अर शास्त्री अर माणसां के मुखिया उसका नाश करण का मौकका टोहैं थे। 48 पर कोए जुगाड़ कोनी काढ सकै थे, के यो किस तरियां करा, क्यूँके सारे माणस घणे चाह तै उसकी सुणै थे।

20 एक दिन इसा होया के जिब यीशु मसीह मन्दर म्ह माणसां नै उपदेश देवै था अर सुसमाचार सुणावै था, तो प्रधान याजक अर शास्त्री, यहूदी अगुवां कै गेल्या धोरै आकै खड़े होए, 2 अर कहण लागे, “म्हारै ताहीं बता, तू इन काम्मां नै किसकै हक तै करै सै, अर वो कौण सै जिसनै तेरे ताहीं यो हक दिया सै?” 3 उसनै उनतै कह्या, “मै भी थारै तै एक बात बुझ्यू सूँ, मन्नै बताओ। 4 यून्ना का बपतिस्मा सुर्ग की ओड़ था या माणसां की ओड़ तै था?” 5 फेर वे आप्स म्ह कहण लागे, “जै हम कहां, ‘सुर्ग की ओड़,’ तो वो कहवैगा, ‘फेर थमनै उसका विश्वास क्यातै न्हीं करया?’ 6 अर जै हम कहां, ‘माणसां की ओड़,’ तो सारे माणस म्हारै पै पत्थर बरसावैंगे, क्यूँके सारे जागै सै के यून्ना साच्चीये नवी था।” 7 आखर उननै जवाब दिया, “हमनै न्हीं बेरा के वो किस ओड़ तै था।” 8 यीशु नै उनतै कह्या, “तो मै भी कोनी बतान्दा के मै ये काम किस हक तै करूँ सूँ।” 9 फेर वो माणसां तै यो उदाहरण कहण लाग्या: “किसे माणस नै अंगूर का बाग लगाया, अर किसानां तै उसनै ठेकका दे दिया अर घणे दिनां खात्तर परदेस चल्या गया। 10 जिब बखत आया तो उसनै किसानां कै धोरै एक नौकर ताहीं भेज्या के वे अंगूर के बाग के कुछ फलां का हिस्सा उसनै देवै, पर किसानां नै उस ताहीं छेतकै रिते हाथ्यां बोहडा दिया। 11 फेर उसनै एक और नौकर ताहीं भेज्या, अर उननै उस ताहीं भी छेतकै अर उसकी बेजती करकै रिते हाथ्यां बोहडा दिया। 12 फेर उसनै तीसरा भेज्या, उननै उस ताहीं भी घायल करकै लिकडण दिया।” 13 फेर अंगूर के बाग कै मालिक नै कह्या, “मै के करूँ? मै अपणे प्यारे बेटे नै भेज्जूगा, हो सकै सै वे उसकी इज्जत करै।”

14 जिब किसानां नै उस ताहीं देख्या तो आप्स म्ह विचार करण लागे, “यो तो वारिस सै, आओ, हम इसनै मार दया के विरासत म्हारी हो जावै।” 15 अर उननै उस ताहीं अंगूर के बाग तै बाहरण लिकाड़कै मार दिया। इस करकै अंगूर के बाग का मालिलक उनकै गेल्या के करैगा? 16 वो आकै उन किसानां का नाश करैगा, अंगूर के बाग और नै सोपैगा। न्यू सुणकै उननै कह्या, “परमेसवर करै इसा ना हो।” 17 उसनै उनकी ओड़ देखकै कह्या, फेर यो के लिख्या सै: “जिस पथर नै राजमिस्त्रियाँ नै निकम्मा ठहराया था, वोए कोणे का सिरा होग्या। 18 “जो कोए उस पथर पै पड़ेगा वो चकणाचूर हो ज्यागा, अर जिसपै वो पड़ेगा, उसनै पिस देवैगा।” 19 उस्से बखत शास्त्रियाँ अर प्रधान याजकां नै उस ताहीं पकडणा चाह्या, क्यूँकै वे समझागे थे के उसनै म्हारै पै यो उदाहरण कह्या, पर वे माणसां तै डरो। 20 अर वे उसकी टाह म्ह लागे अर भेदिए भेज्जै के धर्म का भेष धरकै उसकी कोए ना कोए बात पकडै, ताके उस ताहीं राज्यपाल कै हाथ अर अधिकार म्ह सौंप दें। 21 उननै उसतै न्यू बुझ्याया, “हे गुरु, हमनै बेरा सै के तू ठीक कहवै अर सिखावै भी सै, अर किसे की मेरै कोनी लेन्दा, बल्के परमेसवर की राह सच्चाई तै बतावै सै। 22 के म्हारा कैसर तै चुंगी देणा ठीक सै या कोनी?” 23 उसनै उनकी श्याणपत ताहीं ताड़कै उनतै कह्या, 24 “एक दीनार (एक दिन की मजदूरी) मन्नै दिखाओ। इसपै किसकी छाप अर नाम सै?” उननै कह्या, “कैसर का।” 25 उसनै उन ताहीं कह्या, “तो जो कैसर का सै, वो कैसर नै द्यो, अर जो परमेसवर का सै, वो परमेसवर नै द्यो।” 26 वे माणसां कै स्याही इस बात म्ह उसनै पकड़ कोनी सके, बल्के उसकै जवाब तै हैरान होकै बोल-बाल्ले रहगे। 27 फेर सदूकी जो कहवै सै के मेरे होया का जिन्दा होणा सै ए कोनी उन म्ह तै कुछ नै उसकै धोरै आकै बुझ्याया, 28 “हे गुरु, मूसा नबी नै म्हारै खात्तर यो लिख्या सै: जै किसे का भाई अपणी घरआळी कै रहन्दे बेतलादा मर जावै, तो उसका भाई उसकी घरआळी तै ब्याह करले, अर अपणे भाई कै खात्तर पीढ़ी पैदा करै। 29 सात भाई थे, पैहल्डा भाई ब्याह करकै बेतलादा मरण्या। 30 फेर दुसरे 31 अर तीसरे नै भी उस बिरबानी तै ब्याह कर लिया। इस तरियां तै सातु बेतलादे मरगे। 32 आखर म्ह वा बिरबानी भी मरगी। 33 आखर म्ह जिन्दा होण पै वा उन म्ह तै किसकी घरआळी होवैगी, क्यूँकै वा सातुवां की घरआळी हो ली थी।” 34 यीशु नै उनतै कह्या, “इस युग की ऊलादां म्ह ब्याह होवै सै, (aiōn g165) 35 पर जो माणस इस जोगे ठहरैगे के उस युग नै अर मेरे होया म्ह तै जिन्दा उठुणके पद नै पा लेवै, उन म्ह ब्याह शादी कोनी होन्दी। (aiōn g165) 36 वे दुबारै मरण के भी कोनी, क्यूँकै वे सुर्गदूतां की ढाळ होवैगे, अर पुनरस्त्वान की ऊलाद होणे तै परमेसवर की भी ऊलाद होवैगे। 37 पर इस बात ताहीं के मेरे होए जिन्दा होवै सै, मूसा नबी नै भी झाड़ी की कहाँनी म्ह दिखाया सै के वो प्रभु ताहीं ‘अब्राहम का परमेसवर, अर इसहाक का परमेसवर अर याकूब का परमेसवर कहवै सै।’ 38 परमेसवर तो मुर्दा का कोनी पर जिन्दा का परमेसवर सै: क्यूँकै उसकै लोवै सारे जिन्दे सै।” 39 फेर न्यू

सुणकै शास्त्रियाँ म्ह तै कुछ नै न्यू कह्या, “हे गुरु, तनै ठीक कह्या।” 40 अर उननै दुबारै उसतै कुछ और बुझ्याण की हिमत कोनी करी। 41 फेर उसनै उनतै बुझ्याया, “मसीह नै दाऊद की ऊलाद किस तरियां कहवै सै?” 42 दाऊद खुदे भजन संहिता की किताब म्ह कहवै सै: 43 प्रभु नै मेरे प्रभु तै कह्या, “मेरै सोळे कान्ही बैठ, जिव ताहीं के मै तेरे बैरियाँ तेरे पायां म्ह न्ही झुका दियुँ।” 44 दाऊद तो उसनै प्रभु कहवै सै, “तो फेर वो उसकी ऊलाद किस ढाळ होया?” 45 जिब सारे सुण थे, तो उसनै अपणे वेल्यां तै कह्या, 46 “शास्त्रियाँ तै चौकन्ने रहियो, जिनताहीं लाम्बे-लाम्बे चोगे पहरकै हांडणा आच्छा लागै सै, अर जिन नै बजारां म्ह नमस्कार, अर आराधनालायां म्ह खास बैठणा अर जिम्मण म्ह खास जगहां यारी लागै सै। 47 वे बिधवायाँ के घर खा जावै सै, अर दिखाण खात्तर घणी वार ताहीं प्रार्थना करदे रहवै सै: ये घणा दण्ड पावैगें।”

21 फेर उसनै निगांह ठाकै सूहाकारां ताहीं अपणा-अपणा दान भण्डार म्ह घालदे देख्या। 2 उसनै एक कंगाल बिधवा ताहीं भी उस म्ह दो दमडी (जो एक धेले कै बराबर होवै सै) घालदे देख्या। 3 फेर उसनै कह्या, “मै थमनै सच कहूँ सूँ के इस कंगाल बिधवा नै सारया तै बाथ घाल्या सै। 4 क्यूँकै उन सारया नै अपणी-अपणी बढ़दी म्ह तै दान म्ह कुछ घाल्या सै, पर इसनै अपणी घटी म्ह तै अपणी सारी कमाई घाल्ली सै।” 5 जिब घणखरे माणस मन्दर कै बाबत कहरे थे के वो किसे सुथरे पत्थरां अर भेटां की चिज्जां तै समारया गया सै, तो उसनै कह्या, 6 “वे दिन आवैगें, जिन म्ह यो सारा जिन नै थम देक्खो सो, उन म्ह तै तैरे किसे पत्थर पै पत्थर भी कोनी रहवैगा, जो गेरया न्ही जावैगा।” 7 उननै उसतै बुझ्याया, “हे गुरु, यो सारा कद होवैगा? अर ये बात जिब पूरी होण पै होवैगी, तो उस बखत की कै निशानी होवैगी?” 8 उसनै कह्या, “चौकने रहियो के भकाए ना जाओं, क्यूँकै घणखरे मेरै नाम तै आकै कहवैगें, ‘मै वोए सूँ’ अर न्यू भी के, ‘बखत लोवै आण पोंहच्या सै।’ थम उनकै पाच्छै ना चले जाइयो। 9 जिब थम रोळे अर झागडे का जिक्र सुणो तो घरबाईयो ना, क्यूँकै इनका पैहल्या होण जरूरी सै, पर उस बखत जिब्बे खात्ता कोनी होवैगा।” 10 फेर उसनै उनतै कह्या, “जात पै जात अर राज्य पै राज्य चढ़ाई करैगा, 11 अर बड़े-बड़े हाल्लण आवैगें, अर जगहां-जगहां अकाळ अर महामारियाँ पड़ेंगी, अर अकास म्ह खतरनाक बात अर बड़े-बड़े निशान जाहिर होवैगें।” 12 पर इन सारी बातां तै पैहल्या मेरै नाम कै बाबत थमनै पकड़गें, अर कांल करैगें, अर आराधनालायां म्ह सोपैगें, अर जेळ म्ह गिरवावैंगे, राज्यपालों अर राज्यां कै स्याही ले जावैगे। 13 पर यो थारे खात्तर गवाही देण का मौका हो जावैगा। 14 इस करकै अपणे-अपणे मन म्ह ठान ल्यो के हम पैहल्या तै जवाब देण की फिक्र कोनी करागें। 15 क्यूँकै मै थारे ताहीं इसा बोल अर समझ दियुँगा के थारे सारे बिरोधी सामना या खण्डन कोनी कर सकैगें। 16 थारे माँ-बाप, अर भाई अर कुण्बा, अर साथी भी थमनै पकड़वावैगें, तैरे ताहीं के थारे म्ह तै कईयाँ नै मरवा देवैगें। 17 मेरै नाम कै कारण सारे

माणस थारे तै बैर राकखैगें। 18 पर थारे सिर का एक बाल भी बाँका कोनी होवैगा। 19 अपणे धीरज तै थम अपणी जान नै बचाए राकखोगे। 20 “जिब थम यरुशलेम की पलटन तै घिरया होया देक्खो, तो जाण लियो के उसका उजड़ जाणा लोवै सै। 21 फेर जो यहूदिया परदेस म्ह हों पहाड़ां पै भाज जावै, अर जो यरुशलेम नगर कै भीत्तर हों वे बाहरणे लिकड़ जावै, अर जो गाम्मा म्ह हों वे उस म्ह न्ही जावै। 22 क्यूँके ये बदला लेण के इसे दिन होंगे, जिन म्ह लिक्खी होइ सारी बात पूरी हो जावैगी। 23 उन दिनों म्ह जो गर्भवती अर दृथ पिलान्दी विरासानी होवैगीं, उनकै खात्तर भागणा भी मुश्किल होगा! क्यूँके देश म्ह बड़ा क्लेश अर इन माणसां पै बड़ा प्रकोप होवैगा। 24 वे तलवार की कौर हो जावैगे, अर सारे देश के माणसां म्ह कैदी होके पोहचाये जावैगे, अर जिब ताहीं गैर यहूदी का बखत पूरा कोनी होवै, जद ताहीं यरुशलेम गेरजात्तां तै रोंद्या जावैगा। 25 “सूरज, चाँद, अर तारां म्ह निशानी दिखेगी, अर धरती पै देश-देश के आदमियाँ पै संकट होगा, क्यूँके वे समुन्द्र कै गरजण अर लहरां के रोले तै घबरां जावैगे। 26 भय कै कारण अर दुनिया पै आण आळी घटनायां की बाट देखदे-देखदे माणसां कै जी म्ह जी कोनी रहवैगा, क्यूँके अकास की शक्तियाँ हर्लाइ जावैगी। 27 फेर वे माणस के बेटे नै सामर्थ अर बड़ी महिमा कै गेल्या बादलां पै आन्दे देखेंगे। 28 जिब ये बात होण लागै, तो सीधे होके अपणे सिर उप्पर ठाईयो, क्यूँके थारा छुटकारा लोवै होगा।” 29 यीशु नै उनतै एक उदाहरण देकै कह्या, “अंजीर के दरखत अर सारे दरखतां नै देक्खो। 30 ज्यों ए उन म्ह कौंपले लिकड़ै सै, तो थम खुद जाण ल्यो सो, के गर्मी का बखत लोवै सै। 31 इस तरियां तै जिब थम ये बात होन्दे देक्खो, तो जाण ल्यो के परमेसवर का राज्य लोवै सै।” 32 मै थमनै साच्ची कहूँ सूं के जिब ताहीं ये सारी बात न्ही हो ले, जद तक इस पीढ़ी का कदे भी अन्त कोनी होवैगा। 33 धरती अर अकास टल जावैगे, पर मेरी बात कदे न्ही टल्गी। 34 “इस करकै चौकन्ने रहियो, इसा ना हो के थारा मन खुमार, अर मतवालेपण, अर इस जिन्दगी की फिक्र तै सुस्त हो जावै, अर वो दिन थारे पै फन्दे की ढाल चानचक आण पड़े। 35 क्यूँके वो सारी धरती के सारे बासिन्दा पै इस तरियां आण पड़ैगा। 36 इस करकै जागदे रहो अर हर बखत प्रार्थना करदे रहो के थम इन सारी आण आळी घटनायां तै बचण अर माणस के बेटे कै स्याम्ही खड़े होण कै जोग्ये बण सको।” 37 वो दिन म्ह मन्दर म्ह उपदेश देवै था, अर रात नै बाहरणै जाकै जैतून नामक पहाड़ पै रहावै था, 38 अर सबैनै तै ठड़के सारे माणस उसकी सुणण की खात्तर मन्दर म्ह उसकै धोरै आया करै थे।

22 अखमीरी रोट्टी का त्यौहार जो फसह कुहावै सै, धोरै था, 2 अर प्रधान याजक अर शास्त्री इस बात की टोह म्ह थे। के यीशु नै किस तरियां मारै, पर वे माणसां तै डरै थे। 3 फेर शैतान यहूदा म्ह बड़या, जो इस्करियोती कुहावै अर बारहां चेल्यां म्ह गिण्या जावै था। 4 उसनै जाकै प्रधान याजकां अर पहरेदार के सरदारां के गेल्या बातचीत

करी के किस तरियां यीशु नै उनके हाथ पकड़वांवां। 5 वे राज्जी होए, अर उस ताहीं रुपिये देण का बादा किया। 6 वो मान ग्या अर मौक्का टोह लाग्या के जिब भीड़ न्ही हो तो उसनै उनके हाथ पकड़वा दे। 7 फेर अखमीरी रोट्टी के त्यौहार का दिन आया, जिसम्ह फसह का मेम्ना बलि करणा जरूरी था। 8 यीशु नै पै तपरस अर यहून्हा ताहीं यो कहकै भेज्या, “जाकै म्हारै खाण खात्तर फसह त्यार करो।” 9 उननै यीशु तै बुझ्या, “तू कित्त चाहवै सै के हम उसनै त्यार करा?” 10 यीशु नै चेल्यां ताहीं कह्या, देक्खो, नगर म्ह बदलेते एक आदमी पाणी का पैदा ठाए होए थमनै मिलैगा, जिस घर म्ह वो जावै थम उसके पाछ्ये चले जाइयो, 11 अर उसके घर के मालिलक तै कहियो, “गुरु तेरे तै बुझ्यै सै के वा बैठक कित्त सै जिस म्ह मै अपणे चेल्यां के गेल्या फसह खाऊँ?” 12 वो थमनै एक सजी-सजाई बड़ी अटारी दिखा देवैगा, ओड़ैए त्यारी करियो। 13 उननै जाकै, जिसा उसनै उनतै कह्या था, उस्से तरियां पाया अर फसह का भोज त्यार करया। 14 जद वा घडी आगी, के यीशु प्रेरितां गेल्या खाण खाण बेठ्या। 15 अर उसनै उन ताहीं कह्या “मन्नै बड़ी लालसा थी के मरण तै पैल्ल्या यो फसह भोज थारे गेल्या खाऊँ। 16 क्यूँके मै थमनै सच कहूँ सूं के मै इसनै जिब तक न्ही खाँऊँगा जब तक यो परमेसवर के राज्य म्ह पूरा न्ही हो।” 17 फेर उसनै अंगूरं के रस का कटोरा लैकै परमेसवर का धन्यवाद करया अर कह्या, “इसनै ल्यो अर आप्पस म्ह बाँट ल्यो। 18 क्यूँके के मै थमनै कहूँ सूं के जिब ताहीं परमेसवर का राज्य न्ही आवै तब तक मै अंगूर का रस इब तै कदे न्ही पिँऊँगा।” 19 फेर यीशु नै रोट्टी ली अर परमेसवर का धन्यवाद करकै तोड़ी, अर चेल्यां ताहीं या कहकै दी, “या मेरी देह सै जो थारे खात्तर दी जा सै: मेरी याद म्ह न्यूए करया करो।” 20 इसे तरियां तै उसनै खाणे के पाच्छै कटोरा भी यो कहन्दे होए दिया, “यो कटोरा मेरै उस लहू म्ह जो थारे खात्तर बहाया जा सै नया करार सै। 21 पर देक्खो, जो मन्नै पकड़वावैगा वो म्हारे गेल्या इस भोज म्ह शामिल सै। 22 क्यूँके मै माणस का बेट्या तौ जिसा मेरे खात्तर तय करया गया सै, ठीक उस्से तरियां होण लाग्यरा सै, पर धिक्कार सै उस माणस पै जिसकै जरिये मै पकड़वाया जाऊँ सूं!” 23 फेर वे आप्पस म्ह पूछ्यताछ करण लाग्ये के म्हारै म्ह तै कौण सै, जो यो काम करैगा। 24 उन म्ह या बहस भी होगी के म्हारे मै तै कौण बड़ा समझा जावै सै। 25 यीशु नै उन ताहीं कह्या, “और गैर यहूदियाँ के राजा उनपै राज करै सै, अर जो उनपै हक जमावै सै वे भले कुहावै सै। 26 पर थम इसे ना होइयो, बल्के जो थारे म्ह बड़दा सै वो छोटे कै बरोबर अर जो प्रधान सै, वो सेवक कै बरोबर बणै। 27 क्यूँके बड़ा कौण सै, वो जो खाणे पै बेठ्या सै, या वो जो सेवा करै सै? के वो न्ही जो जिम्माण बेठ्या सै? पर मै थारे बिचालै सेवक बरोबर सूं। 28 थम वो सों, जो मेरी मुसीबतां म्ह लगातार मैरै गेल्या रहे, 29 अर जिस तरियां मेरै पिता नै मैरै खात्तर एक राज्य ठहराया सै, उस्से तरियां मै थी थारे खात्तर ठहराऊँ सूं। 30 ताके थम मैरै राज्य म्ह मेरी मेज पै खाओ-पीओ बल्के सिंहासनां पै बैठकै इस्त्राएल के बारहां गोत्रां का

न्याय करो।” 31 “शमौन, हे शमौन! देख शीतान नै परमेसवर तै हुकम ले लिया सै, के थारे ताहिं परखै जिस तरियां किसान गेहूँ नै भूसी तै न्यारा करै सै। 32 पर मन्नै तेरे खात्तर बिनती करी ताके थम मेरे पै बिश्वास करणा ना छोड़ दे, अर जिब थम पाप करणा छोड़ दे, तो अपणे भाईयाँ नै भी इसाए करण खात्तर कहियो।” 33 उसनै उसतै कह्या, “हे प्रभु मै, तेरे गेल्या जेल जाण, बल्के मरण नै भी त्यार सूं।” 34 उसनै कह्या, “हे पतरस, मै तन्मै सच कहूँ सूं के आज मुर्गा बाँग न्ही देवैगा जब ताहिं तू तीन बर मेरै बारै म्ह मुकरैगा जावैगा, के मै तन्मै न्ही जाणदा।” 35 फेर यीशु नै चेल्यां ताहिं कह्या, “जिब मन्नै थारे ताहिं वचन सुणाण खात्तर बटुए, अर झोली, अर जूत्याँ कै बिना भेज्या था, तो के थमनै किसे चीज की कमी होई थी?” उननै कह्या, “किसे चीज की न्ही।” 36 उसनै चेल्यां तै कह्या, “पर इब जिसके थोरै बटुआ ना हो वो उसनै ले अर उससे तरियां जिसके थोरै तलवार न्ही हो तो वो अपणे लते बेचकै एक मोल लेवै। 37 क्यूँके मै थमनै कहूँ सूं यो जो पवित्र ग्रन्थ म्ह लिख्या सै, ‘वो गुन्हेगार गेल्या गिण्या गया,’ उसका मेरै म्ह पूरा होणा जरूरी सै, क्यूँके मेरै बारै म्ह लिखी सारी बात्तां का होणा जरूरी सै।” 38 चेल्यां नै कह्या, “हे प्रभु याड़े दो तलवार सै।” यीशु नै उन ताहिं कह्या, “भतेरी सै।” 39 फेर यीशु बारपै लिकड़कै अपणी रीत के मुताबिक जैतून कै पहाड़ पै गया, अर चेल्यें उसकै पाच्छै हो लिये। 40 उस जगहां पोहुच कै उसनै चेल्यां तै कह्या, “प्रार्थना करो कै थम परखे ना जाओ।” 41 अर आप उनतै न्यारा एक डळा फेकण के बराबर जितनी दूर गया, अर गोड़े टेक कै प्रार्थना करण लाग्या, 42 “हे पिता जै तू चाहवै तो इस दुख के कठोरे नै मेरै थोरै तै हटा ले, तोभी मेरी न्ही पर तेरी मर्जी पूरी हो।” 43 फेर सुर्ग तै एक सुर्गदूत उसनै दिख्या जो उसनै सामर्थ दिया करै था। 44 वो और घणे संकट म्ह काल होकै और भी मन तै प्रार्थना करण लाग्या, अर उसका पसीन्ना मान्नो लहू की बड़ी-बड़ी बूँदां के जू धरती पै गिरै था। 45 फेर वो प्रार्थना तै उठ्या अर अपणे चेल्यां कै थोरै आकै उन ताहिं उदासी कै मारै सोन्दे पाया। 46 अर उनतै कह्या, “क्यूँ सोवों सों? उठो, प्रार्थना करो के थम परखे ना जाओ।” 47 यीशु न्यू कहण ए लागरया था, के एक भीड़ आई, अर उन बारहां चेल्यां म्ह तै एक जिसका नाम यहूदा था उसकै आग्नै-आग्नै आण लाग रह्या था। वो यीशु के थोरै आया के उसनै चूम ले। 48 यीशु नै उसतै कह्या, “हे यहूदा, के तू चुम्मा लेकै माणस के बेट्टा नै पकड़वावै सै?” 49 उसकै साथियाँ नै जद देख्या के, के होण आळा सै, तो कह्या “हे प्रभु, के हम तलवार चलावां?” 50 अर उन म्ह तै एक नै महायाजक के नौकर करै तलवार चलाकै उसका सोळा कान उड़ा दिया। 51 इसपै यीशु नै कह्या, “इब बस करो।” अर उसका कान छू कै उस ताहिं ठीक करया। 52 फेर यीशु नै प्रधान याजकां अर मन्दर कै पैहरेदारां कै सरदारां अर यहूदी अगुवां तै, जो उसपै चढ़ ग्ये थे, कह्या, “के थम मन्नै डाकू जाणकै तलवार अर लाटी लेकै लिकड़े सों? 53 जद मै मन्दर म्ह हरेक दिन थारे गेल्या था, तो थमनै मेरै हाथ भी कोनी लाया, पर यो थारा बखत सै, अर अन्धकार का हक सै।” 54 फेर

वे यीशु नै पकड़कै ले चाल्ले, अर महायाजक कै घर म्ह लाये, पतरस दूरे ए दूर उसकै पाढ़े-पाढ़े चाल्लै था। 55 अर जद वे आँगण म्ह आग सुलगाकै कठे बेठे, तो पतरस भी उसके बिचालै बैठ्या। 56 फेर एक नौकराणी उस ताहिं आग के चाँदगे म्ह बेठ्या देखकै अर उस कान्ही देखकै कहण लाग्यी, “यो भी तो उसकै गेल्या था।” 57 पर पतरस नै यो कहकै मना कर दिया, के “हे, जनानी मै उसनै कोनी जाणदा।” 58 थोड़ी हाण पाच्छै किसे और नै पतरस ताहिं देखकै कह्या, “तू भी तो उन म्ह तै ए सै।” उसनै कह्या, “हे भाई, मै वो कोनी।” 59 कोए एक धंटे कै पाच्छै एक और माणस पक्के बिश्वास तै कहण लाग्या, “सही म्ह यो भी तो उसकै गेल्या था, क्यूँके यो गलीलवासी सै।” 60 पतरस नै कह्या, “हे भाई, मै न्ही जाणदा के तू के कहवै सै!” वो या कहवै था के मुर्मै नै बाँग देई 61 फेर धूमकै प्रभु नै पतरस की ओड़ देख्या अर पतरस नै प्रभु की बात याद आई जो उसनै कही थी: “आज मुर्गे कै बाँग देण तै पैहल्या, तू तीन बर इन्कार करैगा।” 62 अर वो बारपै लिकड़कै नै फूट-फूटकै रोण लाग्या। 63 जो माणस यीशु नै पकड़े होए थे, वे उसका मजाक बणाकै पीटण लागे, 64 अर उसकी आँख ढँक कै उसतै बुझ्या, “भविष्यवाणी करकै बता के तेरे किसनै माराया!” 65 अर उननै धणीए बुराई की बात उसकै बिरोध म्ह कही। 66 जिब दिन लिकड़या तो यहूदी अगुवें, प्रधान याजक अर शास्त्री कठे होए, अर उस ताहिं अपणी बड़ी सभा म्ह ल्याकै बुझ्या, 67 “जै तू मसीह सै, तो म्हरै ताहिं कह दो।” उसनै उनतै कह्या, “जै मै थारे तै कहूँ, तो बिश्वास कोनी करोगे, 68 अर जै बुझ्या, तो जवाब न्ही द्योगे। 69 पर इब तै मै माणस का बेट्टा सर्वशक्तिमान परमेसवर कै सोळी ओड़ बेठ्या रहूँगा।” 70 इसपै सब नै कह्या, “तो के तू परमेसवर का बेट्टा सै?” यीशु नै उन ताहिं कह्या, “थम अपणे-आप्ये कहो सों, क्यूँके मै सूं।” 71 फेर उननै कह्या, “इब हमनै गवाह की के जरूरत सै, क्यूँके हमनै आप्ये उसकै मुँह तै सुण लिया सै।”

23

फेर सारी मंडली उठकै यीशु नै राज्यपाल पिलातुस कै थोरै लेण्यी। 2 वो ये कहकै उसपै इल्जाम ल्याण लागे, “हमनै इस ताहिं माणसां नै भकांदे, अर कैसर नै चुंगी देण तै मना करदे, अर खुद नै मसीह, राजा कहन्दे होए सुण्या सै।” 3 पिलातुस नै उसतै बुझ्या, “के तू यहूदियाँ का राजा सै?” उसनै उस ताहिं जवाब दिया, “तू आप ए कहण लागरया सै।” 4 फेर पिलातुस नै प्रधान याजकां तै अर माणसां तै कह्या, “मन्नै इस आदमी म्ह कोए खोट न्ही पाया।” 5 पर वे और भी बिश्वास के गेल्या कहण लागे, “यो गलील परदेस तै लेकै याड़ ताहिं, सारे यहूदिया परदेस के माणसां नै उपदेश देकै दंगा करवावै सै।” 6 या सुणकै पिलातुस नै बुझ्या, “के यो आदमी गलीलवासी सै?” 7 अर या जाणकै के वो हेरोदेस की रियासत का सै, उस ताहिं हेरोदेस के थोरै भेज दिया, क्यूँके उस बखत वो भी यस्शलेम म्ह था। 8 हेरोदेस यीशु नै देखकै घणा राज्जी होया, क्यूँके वो घणे दिनां तै उसनै देख्या चाहवै था, इस खात्तर के उसके बारै म्ह सुण्या था, अर उसतै किमे चमत्कार देख्या की आस राक्खै था। 9 वो उसतै भोत-सी बात बुझता रह्या, पर उसनै

उस ताहीं कोए भी जवाब नहीं दिया। 10 प्रधान याजक अर शास्त्री खड़े होए तन मन तै उसपै इल्जाम लगान्दे रहे। 11 फेर हेरोदेस नै अपणे सिपाहियाँ के गेल्या उसकी बेजती करकै मजाक उड़ाया, अर भड़किले लते पिराह के उस ताहीं पिलातुस के थोरै भेज दिया। 12 उस्से दिन पिलातुस अर हेरोदेस साथी बणगे, इसतै पैहल्या वे एक-दुसरे के दुश्मन थे। 13 पिलातुस नै प्रधान याजकां, सरदारां अर माणसां नै बुलाकै उन ताहीं कह्या, 14 “थम इस आदमी नै माणसां का भकाण आळा बताकै मैरै थोरै त्याए सों, अर देक्खो, मनै थारे स्याप्ही उसकी जाँच करी, पर जिन बात्तां का थम उसपै इल्जाम लगाओ सों उन बात्तां के बारै म्ह मनै इस म्ह कोए भी खोट कोनी पाया, 15 ना हेरोदेस नै दोषी पाया, क्यूँकै उसनै इस ताहीं म्हारै थोरै भेज दिया सैः अर देक्खो, उसतै इसा कुछ कोनी होया के वो मौत की सजा के काबिल ठहराया जावै। 16 इस खात्तर मै इसनै छित्वा कै छोड़ यु सूँ।” 17 (पिलातुस त्यौहार के बखत उनकै खात्तर एक कैदी नै छोड़ण पै मजबूर था।) 18 फेर सारे मिलकै चिल्ला उठे, “इसका काम तमाक करदे, अर म्हारै खात्तर बरअब्बा नै छोड़दे!” 19 वो किसे बलवे के कारण जो नगर म्ह होया था, अर हत्या के कारण जेळ म्ह गेरया ग्या था 20 पर पिलातुस नै यीशु ताहीं छोड़ण की इच्छा तै माणसां ताहीं फेर समझाया, 21 आखर उननै रुक्के मारकै कह्या, “उसनै क्रूस पै चढ़ा, क्रूस पै!” 22 उसनै तीसरी बर उन ताहीं कह्या, “क्यांतै उसनै के बुरा करया सैः? मनै उस म्ह मौत की सजा के काबिल कोए बात कोनी पाई। इस तरियां मै इसनै छित्वा कै छोड़ देऊ सूँ।” 23 पर वे रुक्के मार-मारकै पाच्छै पड़ ग्ये के वो क्रूस पै चढ़ाया जावै, अर उनका रुक्के मारणा तेज होग्या। 24 आखर पिलातुस नै हुकम दिया के उनकी बिनती के मुताबिक करया जावै। 25 उसनै उस आदमी के जो बलवे अर हत्या के कारण जेळ म्ह गेरया ग्या था, अर जिसनै वो मँगै थे, छोड़ दिया, अर यीशु नै उनकी इच्छा के मुताबिक सौप दिया। 26 जिव वो यीशु नै लेकै जावै थे, तो उननै एक माणस जिसका नाम शमैनू कुरेनी था, जो गाम म्ह तै आवै था, पकड़कै उसपै क्रूस लाद दिया के उस्से यीशु के पाच्छै-पाच्छै ले चाल्लै। 27 माणसां की भीड़ उसकै पाच्छै-पाच्छै हो ली उन म्ह घणीए बिरबान्नी भी थी जो उसकै खात्तर छात्ती पीटै अर रोवै थोरै थी। 28 यीशु नै उनकै कान्ही मुड़कै कह्या, “हे यस्तशलेम की बेटियों, मेरै खात्तर ना रोओ, पर अपणे अर अपणे बाल्कां के खात्तर रोओ 29 क्यूँकै देक्खो, वे दिन आवै सै, जिन म्ह माणस कहवैं, ‘धन्य सै वे जो बिरबान्नी जो बाँझ सै अर वे गर्भ जिननै ऊलाद न्ही पैदा करी, अर वे स्तन जिन नै दूध न्ही पियाया।’ 30 उस बखत ‘माणस पहाड़ां अर टीलां तै कहण लाग्ये के म्हारै पै आण पड़ो, अर हमनै ढँक ल्यो।’” 31 क्यूँकै वे जिब हरे रुखां गेल्या इसा करै सै, तो सूख्या कै गेल्या के किमे न्ही करया ज्यागा? 32 वे और दो माणसां नै भी जो बुरे काम करण आळे थे यीशु कै गेल्या मारण नै ले चाल्लै। 33 जद वे उस जगहां पै पोहचे जो “खोपड़ी” यानी इब्रानी भाषा म्ह “गुलगुता” कुहावै सै, तो उननै ओड़े यीशु ताहीं अर बुरे काम करण

आळे ताहीं भी, एक नै सोळी अर दुसरे नै ओळी ओड़ क्रूस पै चढ़ाए। 34 फेर यीशु नै कह्या, “हे पिता इन्हनै माफ कर, क्यूँकै ये न्ही जाणदे के ये के कैरै सै।” अर उननै पर्ची गेर कै उसके लते बांड लिए। 35 माणस खड़े-खड़े देक्खै थे, अर सरदार भी मजाक करकै कहवै थे “इसनै औरां ताहीं बचाया, जै यो परमेसवर का मसीह सै, अर उसका छाट्या होए सै, तो अपणे-आपनै बचाले।” 36 सिपाही भी थोरै आकै अर सिरका देकै उसका मजाक बणा के कहवै थे, 37 “जै तू यहूदियां का राजा सै, तो अपणे-आपनै बचाले!” 38 अर उसके उपर एक दोषपत्र भी लगा दिया: “यो यहूदियां का राजा सै।” 39 जो बुरे काम करणीये ओड़ लटकाए गए थे, उन म्ह तै एक नै उसकी बेजती करकै कह्या, “के तू मसीह कोनी? फेर अपणे-आपनै अर हमनै बचाला!” 40 इसपै दुसरे नै उस ताहीं धमका के कह्या, “के तू परमेसवर तै भी कोनी डरदा? तू भी तो वाए सजा पा रया सै, 41 हम तो न्याय के मुताबिक सजा पारे सां, क्यूँकै हम अपणे कामां की ठीक सजा पारे सां, पर उसनै कोए गलत काम न्ही करया।” 42 फेर उसनै कह्या, “हे यीशु, जद तू अपणे राज्य म्ह आवै, तो मेरी खियास करिये।” 43 उसनै उस ताहीं कह्या, “मै तन्नै सच कहूँ सूँ के आजे तू मेरै गेल्या सुर्गीलोक म्ह होगा।” 44 करीबन दोफकरै तै तीन बजे ताहीं सारे देश म्ह अन्धेरा होया रह्या, 45 अर सूरज का चाँदांगा जान्दा रह्या, अर मन्दर का पड़दा बिचालै तै पाटग्या, 46 अर यीशु नै जोर तै किल्की मारकै कह्या, “हे पिता, मै अपणी आत्मा तेरे हाथ्यां म्ह सौंपू सूँ।” अर या कह के जी दे दिया। 47 सूबेदार नै जो कुछ होया था देखकै परमेसवर की बड़ाई करी, अर कह्या, “पक्का यो माणस धर्मी था।” 48 अर भीड़ जो यो देक्खण नै कट्टी होई थी, इस घटना नै देखकै दुख के मारे छात्ती पीटती होई बोहड़ी। 49 पर उसकै सब जाण-पिच्छाण, अर जो बिरबान्नी गलील परदेस तै उसकै गेल्या आई थी, दूर खड़ी यो सब देक्खै थी। 50 ओड़े यूसूफ नाम का यहूदी अगुवां की सभा का एक सदस्य था जो आच्छा अर धर्मी आदमी था 51 वो सभा के फैसले अर इस काम तै राज्जी कोनी था। वो यहूदिया परदेस के नगर अरिमतिया गाम का रहण आळा अर परमेसवर के राज्य की बाट देखण आळा था। 52 उसनै पिलातुस के थोरै जाकै यीशु की लाश मँगै, 53 अर उस ताहीं उतार के मलमल की चाद्र म्ह लपेट्या, अर एक कब्र म्ह धरया, जो पथरां म्ह खुट्टी होए थी, अर उस म्ह कोए कदे न्ही राख्या ग्या था। 54 वो त्यारी का दिन था, अर आराम का दिन शरु होण आळा था। 55 उन बिरबान्नीयौं नै जो उसके गेल्या गलील परदेस तै आई थी, पाच्छै-पाच्छै जाकै उस कब्र ताहीं देख्या, अर यो भी के उसकी लाश किस रीति तै राक्खी गयी सै। 56 फेर उननै घर बोहड़ के खुशबुदार चीज अर इत्र त्यार करया, अर आराम कै दिन उननै हुकम के मुताबिक आराम करया।

24 पर हफ्तै कै पैहल्डे दिन तड़कै-तड़कै नै वे उन खुशबुदार चिज्जां नै जो उननै बणाई थी, लेकै यीशु की कब्र पै आई। 2 उननै पथर कब्र पै तै गिरङ्ग्या होया पाया, 3 पर भीत्तर जाकै प्रभु यीशु की लाश कोनी पाई। 4 जब वे इस बात तै हैरान होरी थी तो देक्खो दो माणस

चमकदे होए लते पहरी होए उनकै धोरे आण खडे होए। 5 जिब वे डरगी अर धरती की ओड मुँह स्काए ही तो उननै उन ताहीं कहा, “थम जान्दे नै मेरे होया म्ह क्यूँ टोहो सो? 6 वो उरै कोनी, पर जिन्दा होग्या सै। याद करो कै उसनै गलील परदेस म्ह रहदे होए थारे तै कै कह्या था, 7 जरुरी सै कै मै माणस का बेट्या पापियाँ कै हाथर्यां म्ह पकडवाया जाऊँ, अर कूस पै चढाया जाऊँ, अर तीसरे दिन जी उठु।” 8 फेर उसकी बात उनकै याद आई, 9 अर कब्र तै उल्टे आकै उननै उन ग्याराहां नै अर, सारया ताहीं ये सब बात कह दी। 10 जिन नै प्रेरितां तै ये बात कही वे मरियम मगदलीनी अर योअन्ना अर याकूब की माँ मरियम अर उसकै साथ की और भी बिरबानी थी। 11 पर उनकी बात उन ताहीं कहाहीं-सी लामगी, अर उननै उसका बिश्वास कोनी करया। 12 फेर पतरस कब्र पै भाज्या ग्या, अर झुककै लत्यां की पटियाँ का ढेर पडे देक्खे, अर जो होया था उसतै अचम्भा होया करदा होया अपणे घरां चल्या ग्या। 13 उस्से दिन उन म्ह तै दो चेल्ले इम्माऊस नाम के गाम म्ह जाण लागेर थे, जो यश्शलेम तै कोए सात कोंस की दूरी पै था। 14 वे इन सब बातां पै जो होई थी, आप्स म्ह बातचीत करदे जाण लागेर थे, 15 अर जद वे आप्स म्ह बातचीत अर पूछताछ करे थे तो यीशु खुद धोरे आकै उनकै गेल्या चाल्लण लाग्या। 16 पर परमेसवर नै उनकी आँख न्यू बन्द कर दी थी कै यीशु ताहीं पिच्छाण ना सकै। 17 यीशु नै उनतै बुझ्या, “ये कै बात सै, जो थम चाल्दे-चाल्दे आप्स करो सों?” वे खडे होगे अर उनका मुँह भोत उदास था। 18 या सुणकै चेल्यां म्ह तै क्लियुपास नाम के एक चेल्ले नै कह्या, “इसा लागै सै कै तू यश्शलेम म्ह एक्ला परदेशी सै, जो न्ही जाण्डा के इन दिनां म्ह इस नगर म्ह के-के होया सै?” 19 यीशु नै उनतै बुझ्या, “कौण सी बात? उननै उस ताहीं कह्या, यीशु नासरी जो नबी था उसकी बात, जो परमेसवर अर सारे माणसां कै स्याम्ही काम अर वचन म्ह सामर्थी था। 20 अर प्रधान याजकां अर म्हारै सरदारां नै उस ताहीं पकडवा दिया ताके उसतै मौत का हुक्म दिया जावै, अर उस ताहीं कूस पै चढवाया। 21 पर हमनै उम्मीद थी के योए इसाएल नै रोमी साम्राज्य तै छुटकारा देवैगा। इन सारी बातां कै सिवा इस घटना नै होए आज तीसरा दिन सै, 22 अर म्हारै म्ह तै कई बिरबानियाँ नै भी म्हारै ताहीं उळझान म्ह गेर दिया, जो आज सबैरै कब्र पै ग्यी थी, 23 अर जिब उसकी लाश कोनी पाई तो वा या कहन्दी आई के हमनै सुर्गदूतां के दर्शन पाये, जिन नै कह्या कै यीशु जिन्दा सै। 24 फेर म्हारै साथियां म्ह तै कई कब्र पै गये, अर जिसा बिरबानियाँ नै कह्या था उसाए पाया, पर वो कोनी देख्या।” 25 फेर यीशु नै उन दो चेल्यां तै कह्या, “हे सब बेकुफों अर नवियाँ की सारी बातां पै बिश्वास करण म्ह नासमझो! 26 कै जरुरी कोनी था कै मसीह ये दुख उठाकै अपणी महिमा म्ह दाखल हो?” 27 फेर उसनै मूसा नबी तै अर सारे नवियाँ तै शुरु करकै सारे पवित्र ग्रन्थां म्ह तै अपणे बारै म्ह लिक्खी बातां का मतलब, उन ताहीं समझा दिया। 28 इतनै म्ह वो उस गाम कै धोरै पोहचे जित्त वे जावै थे, अर उसके ढंग तै इसा लाग्या के वो आगै जाणा चाहवै सै। 29 पर उननै यो कहकै उस ताहीं रोक्या, “म्हारै गेल्या रह, क्यूँके सॉँझ होली सै अर दिन इब धणा ढल्या सै।” फेर वो उनकै गेल्या रहण के खात्तर भीत्तर ग्या। 30 जद वो उनकै गेल्या खाण बेठ्या, तो उसनै रोट्टी तेकै धन्यवाद करया अर उस ताहीं तोडकै उननै देण लाग्या। 31 फेर उनकी आँख खुलागी, अर उननै उस ताहीं पिच्छाण लिया, अर वो उनकी आँखां तै ओऽन्धाल होग्या। 32 उननै आप्स म्ह कह्या, “जद वो म्हारै तै रास्ते म्ह बात करै था अर पवित्र ग्रन्थ का मतलब हमनै समझावै था, तो कै म्हारै मन म्ह जोश न्ही आया?” 33 वो उस्से बखत जिल्ले उठकै यश्शलेम नगर म्ह चले गये, अर उन ग्याराहां चेल्यां अर उनकै साथियाँ ताहीं उननै कठे मिलगे। 34 वो कहवै थे, “प्रभु साच्चेए जी उठ्या, अर शमोनै नै दिख्या।” 35 फेर उन दो चेल्लां नै भी राह म्ह होई घटना के बारें ब्यौरा सुण्या अर किस तरियां खाण खान्दे बखत उननै मसीह यीशु ताहीं पिच्छाण लिया था। 36 वे ये बात करै ए थे के वो खुद ए उनके बिचाळै आण खड्या होया, अर उन ताहीं कह्या, “थमनै शान्ति मिलै।” 37 पर वे घरारो अर डरो, अर समझो के हम किसे भूत नै देक्खां सां। 38 यीशु तै उनतै कह्या के, “क्यूँ घबराओ सों? अर थारे मन म्ह क्यूँ बैहम हो सै? 39 मेरै हाथ-पायां नै देक्खो के मै वाओ सू। मनै छू के देक्खो, क्यूँके आत्मा के हाड-मासू कोनी होन्दे जिसा मेरै म्ह देक्खो सों।” 40 न्यू कहकै उसनै उन ताहीं अपणे हाथ पैर के घा दिख्याए। 41 जद खुशी के मारै उननै बिश्वास कोनी होया, अर वो अचम्भा मान्नै थे, तो यीशु नै उन ताहीं बुझ्या, “के याडे थारे धोरै किमे खाण नै सै?” 42 चेल्यां नै उस ताहीं भुमी होई मच्छी का टुकडा दिया। 43 उसनै वो मच्छी का टुकडा तेकै उनकै आगै खाया। 44 फेर उसनै उन ताहीं कह्या, “ये मेरी वे बात सै, जो मनै थारे गेल्या रहदे होए थारे तै कही थी के जरुरी सै जितनी बात मूसा नबी की नियम-कायदा अर नवियाँ अर भजनां की किताबां म्ह मेरै बारै म्ह लिक्खी सै, सारी पूरी हों।” 45 फेर उसनै पवित्र ग्रन्थ बुझाण के खात्तर उनकी बुद्धि खोल दी, 46 अर उनतै कह्या, “यो पवित्र ग्रन्थ म्ह लिख्या सै कै मसीह दुख ठावैगा, अर तीसरे दिन मरे होया म्ह तै जी उठूंगा, 47 अर यश्शलेम तै लैकै सारी जातां म्ह पापां नै छोडण का अर पापां की माफी का प्रचार, उसकै-ए नाम तै करया जावैगा। 48 थम इन सारी बातां के गवाह सों। 49 अर देक्खो, मै थारे पै पवित्र आत्मा भेज्जूँगा जिसा मेरे पिता नै कह्या सै, जिब तैई पवित्र आत्मा थारे पै न्ही आवै, अर थम सुर्ग तै सामर्थ ना पाओ, जब ताहीं इसे नगर म्ह रुके रहो।” 50 फेर यीशु उननै बैतनियाह गाम ताहीं बाहर लेग्या, अर अपणे हाथ ठाकै उन ताहीं आशीर्वाद दिया, 51 अर उननै आशीष देंदे होए वो उनतै न्यारा होग्या अर सुर्ग पै उठा लिया। 52 फेर वो उसनै नमस्कार करकै बडी खुशी तै यश्शलेम चले गए, 53 अर वे लगातार मन्दर म्ह हाज्जर होकै परमेसवर की भगति करया करै थे।

यूहन्ना

1 दुनिया बणण तै पैहल्या वचन था, अर वचन परमेसवर कै गेल्या था, अर वचन परमेसवर था। 2 यो वचन ए शरुआत तै परमेसवर कै गेल्या था। 3 दुनिया की हरेक चीज उस्से कै जरिये बणी सै, अर उसके बिना किसे भी चीज की रचना न्ही होई। 4 वो जीवन का जरिया था, अर वो जीवन मानव जाति कै खात्तर चाँदणा था। 5 चाँदणा अन्धेरै म्ह चमकै सै, अर अन्धेरा उस ताहीं बुझा न्ही सक्या। 6 परमेसवर कै ओड़ तै भेज्जा होया एक माणस आया, जिसका नाम यूहन्ना था। 7 वो गवाही देण खात्तर आया के माणसां नै चाँदणे की गवाही देवै, के सारे माणस उसके जरिये चाँदणे पै विश्वास करै। 8 वो खुद तै वो चाँदणा कोनी था, पर माणसां नै उस्से चाँदणे की गवाही देण खात्तर आया था। 9 जो साच्चा चाँदणा था, हरेक माणस नै जान का चाँदणा देवै सै, वो धरती पै आण आला था। 10 वो दुनिया म्ह था, अर दुनिया उसके जरिये बणी, अर दुनिया के माणसां नै उस ताहीं न्ही पिछाण्या। 11 वो अपणे यदूदी माणसां कै धोरै आया अर उसके अपणे लोगां नै उस ताहीं कोन्या अपणाया। 12 पर जितन्या नै उस ताहीं अपणाया, उसनै उन ताहीं परमेसवर के ऊलाद होण कि हक दिया। 13 वे कुदरती तौर पै ना तो पूर्वजां तै, ना देह की मर्जी तै, ना माणसां की मर्जी तै, पर परमेसवर की मर्जी तै पैदा होए सै। 14 अर वचन देह धारण करकै आया, अर अनुग्रह अर सच्चाई तै भरकै म्हरै बिचालै रहण लाग्या, अर हमनै उसकी इसी महिमा देक्खी, जिसी पिता कै इकलौते बेटे की महिमा। 15 यूहन्ना नै उसके बारे म्ह गवाही दी, अर रुक्का मारके बोल्या, “यो वोए सै, जिसका मन्नै जिक्र करया के जो मेरै पाच्छै आण लागरया सै, वो मेरतै घणा महान् सै क्यूँके वो मेरतै पैहल्या था।” 16 क्यूँके उसकी करुणा अर सच्चाई की भरपूरी म्ह तै हम सारया नै आशीष पै आशीष पाई। 17 इस खात्तर के नियम-कायदे तो मूसा नबी तै मिले, पर अनुग्रह अर सच्चाई यीशु मसीह कै जरिये पोहची। 18 परमेसवर ताहीं किसे नै कदे कोन्या देख्या, पर परमेसवर के इकलौते बेटे नै, जो सदा परमपिता कै गैल सै, उस्से नै म्हरे ताहीं दिखाया। 19 यूहन्ना की गवाही या सै, के जिब यहूदी अगुवां नै यस्शलेम तै याजकां अर लेवियाँ नै उसतै यो बुझण्य नै भेज्या, के “तू कौण सै?” 20 फेर उसनै नाट्या कोनी, पर मान लिया के “मै मसीह कोनी।” 21 फेर उननै यूहन्ना तै बुझण्या, “तो फेर तू कौण सै? के तू एलियाह नबी सै?” उसनै साफ-साफ कह दिया के, “मै मसीह कोनी।” “तो के तू वो नबी सै?” उसनै जवाब दिया, “ना।” 22 फेर उननै यूहन्ना तै बुझण्या, “फेर तू सै कौण? ताके हम अपणे भेजण आला ताहीं जवाब देवां। तु अपणे बारै म्ह के कहवै सै?” 23 वो बोल्या, “जिसा यशायाह नबी नै बोल्या सै: ‘मै जंगल-बियाबान म्ह एक रुक्का देवण अन्ळे का वचन सूँ के थम प्रभु का रास्ता सीधा करो।’” 24 वे फरीसियों के कान्ही तै भेज्जे होड़ थे। 25 उननै उसतै यो सवाल बुझण्या, “जै तू ना मसीह सै, अर ना एलियाह, अर ना वो नबी

सै, तै फेर बपतिस्मा क्यांतै देवै सै?” 26 यूहन्ना नै उन ताहीं जवाब दिया, “मै तो थमनै पाणी तै बपतिस्मा देऊ सूँ पर थारे बीच म्ह एक माणस खड्या सै जिसनै थम कोनी जाणदे। 27 यानी मेरै पाच्छै आण आला सै, जिसके जूत्यां के फिटे भी मै खोल्लम जोग्या कोनी।” 28 ये बात यरदन नदी तै परली ओड़ बैतनिय्या हगम म्ह होई, जडै यूहन्ना माणसां ताहीं बपतिस्मा दिया करदा। 29 दुसरे दिन यूहन्ना नै यीशु ताहीं अपणी ओड़ आन्दे देखकै बोल्या, “देक्खो, यो परमेसवर का मेम्ना सै जो दुनिया का पाप ठावै सै। 30 यो वोए सै जिसके बारै म्ह मन्नै कहा था, एक माणस मेरै बाद आवै सै जो मेरतै महान् सै, ज्यातै वो मेरतै पैहल्या था। 31 मै खुद तो उसनै कोनी पिच्छाण्या था, पर इस्से खात्तर मै पाणी तै बपतिस्मा देन्दा होया आया, ताके इसाएल के माणस उसनै जान ले।” 32 अर यूहन्ना नै या गवाही दी: “मन्नै सुर्ग तै पवित्र आत्मा ताहीं कबूतर की तरियां अकास तै उतरदे अर उस ताहीं मसीह यीशु पै ठहरते देख्या सै।” 33 मै तो उसनै पिच्छाणु कोनी था, पर जिसनै मेरै ताहीं पाणी तै बपतिस्मा देन्दा होया आया, ताके इसाएल के माणस उसनै जान ले।” 34 “अर मन्नै देख्या, अर गवाही दी सै, के योए परमेसवर का बेटा सै।” 35 आगले दिन यूहन्ना अपणे दो चेल्यां कै गैल फेर ओड़ खडे थे, 36 अर उसनै यीशु ताहीं जो उसके धोरै तै जाण लागरया था, उसकी ओड़ लखाकै बोल्या, “देक्खो, यो परमेसवर का मेम्ना सै।” 37 जिबे वे दोनु चेल्यां उसकी या बात सुणकै यीशु कै गैल हो लिए। 38 यीशु नै मुड़कै उन ताहीं गैल आन्दे देख्या अर उनतै बोल्या, “थम के चाहो सो?” वे उसतै बोल्ले, “हे गुरु, तू कित्त रहवै सै?” 39 यीशु उनतै बोल्या, “चाल्लों, तो देख लियो।” फेर उननै उसके रहण की जगहां देक्खी, अर उस दिन उसके गेल्या रहे। क्यूँके साँझ के करीब चार बजे थे। 40 उन दोनुआ म्ह तै, जो यूहन्ना की बात सुणकै यीशु कै गेल्या हो लिए थे, एक तो शमौन पतरस का भाई अन्द्रियास था। 41 उसनै पैहल्या अपणे सगे भाई शमौन तै मिलकै उसतै बोल्या, “हमनै ख्रिस्त यानी मसीह (परमेसवर का अभिषिक्त) मिलग्या।” 42 फेर अन्द्रियास शमौन नै यीशु कै धोरै ल्याया। यीशु नै उसकी ओड़ लखाकै कहा, “तू यूहन्ना का बेटा शमौन सै: तू कैफा यानिके पतरस कुआवैगा।” 43 आगले दिन यीशु नै गलील परदेस जाण का इरादा करया। वो फिलिप्पुस तै मिल्या अर बोल्या, “मेरै पाच्छै हो ले।” 44 फिलिप्पुस, अन्द्रियास अर पतरस के नगर बैतैसैदा का रहणीया था। 45 फिलिप्पुस नतनएल तै मिल्या अर उसतै बोल्या, “जिसका जिक्र मूसा नबी नै नियम-कायदा म्ह अर नवियाँ नै करया सै, वो हमनै मिलग्या सै! वो यूसूफ का बेटा, यीशु नासरी सै।” 46 नतनएल नै उसतै बुझण्या, “के कोए उत्तम चीज भी नासरत तै लिकड़ सकै सै?” फिलिप्पुस उसतै बोल्या, “चालकै देख ले।” 47 यीशु नै नतनएल ताहीं अपणी ओड़ आन्दे देखकै उसके बारै म्ह कहवै, “देक्खो, यो साच्चए इसाएली सै: इस म्ह कपट कोनी।” 48 नतनएल नै उसतै बुझण्या, “तू मन्नै किस-

तरियां जाणे सै?” यीशु नै उस ताहीं जवाब दिया, “इस्तै पैहल्या के फिलिप्पुस नै तेरे ताहीं बुलाया, तो मनै तेरे ताहीं देख्या था जिब तू अंजीर कै दरखत तळै था।” 49 नतनएल नै उस ताहीं जवाब दिया, “हे गुरु, तू परमेस्वर का बेटा सै, तू इसाएल का राजा सै।” 50 यीशु नै उस ताहीं जवाब दिया, “मनै जौ तेरे तै कह्या कै मनै तेरे ताहीं अंजीर कै दरखत तळै देख्या, के तू इस्से बात पै बिश्वास करै सै? तू इस्तै भी बड़े-बड़े काम देक्खैगा।” 51 फेर उसनै कह्या, “मै तेरे तै सच-सच कहूँ सूँ के थम सुर्ग नै खुल्या होइ अर परमेस्वर के सुर्दूतां ताहीं मुझ माणस कै बेटै कै खात्तर नीचै उतरदे अर उपर जान्दे होए देक्खोगे।”

2 फेर तीसरे दिन गलील परदेस कै काना नगर म्ह किसे का ब्याह था, अर यीशु की माँ भी ओड़ै थी। 2 यीशु अर उसके चेल्ले भी उस ब्याह म्ह न्योंद राक्खे थे। 3 जिब अंगूर का रस खतम होग्या, फेर यीशु की माँ उस्तै बोल्ली, “उनकै धोरै अंगूर का रस कोनी रहाया।” 4 यीशु नै उसतै कह्या, “हे नारी, या बात तू मेरे तै क्यूँ कहवै सै? इब्बे मेरा बखत कोनी आया।” 5 पर उसकी माँ नै नौकरां तै कह्या, “जो कुछ यो थरे ताहीं कहवै, न्यूँ करियो।” 6 यहूदी परम्परा के मुताबिक शुद्ध करण कै खात्तर ओड़ै छ: पथर कै पैण्डे धरे थे, जिन म्ह दो-दो, तीन-तीन मण पाणी आवै था। 7 यीशु नै उनतै कह्या, “पैंढा म्ह पाणी भर द्यो।” अर उननै वे मुँह तक भर दिए। 8 फेर यीशु नै नौकरां ताहीं कह्या, “इब काढकै भोज कै प्रधान धरै ले जाओ।” अर वे लेरे। 9 जिब भोज कै प्रधान नै वो पाणी चाख्या, जो अंगूर का रस बण्ग्या था अर वे न्ही जाणे था के वो कड़ै तै आया सै पर जिन नौकरां नै पाणी काढ्या था वे जाणे थे फेर भोज कै प्रधान नै बन्दड़े ताहीं बुलाकै उसतै कह्या, 10 “हेरेक माणस पैहल्या बढ़िया अंगूर का रस देवै सै, अर जिब माणस पीकै छिक्क क्यावै सै, फेर हल्का देवै सै, पर तन्है बढ़िया अंगूर का रस इब ताहीं राख राख्या सै।” 11 यीशु नै गलील परदेस कै काना नगर म्ह अपणा यो पैहला चिन्ह-चमत्कार दिखाकै अपणी महिमा जाहिर कर दी अर जिसकी बजह तै उसके चेल्लां नै उसपै बिश्वास करया। 12 इसकै बाद वो अर उसकी माँ अर उसके भाई अर उसके चेल्ले कफरनहूम नगर म्ह गए अर ओड़ै कुछ दिन रहे। 13 यहूदियाँ का फसह का त्योहार लोवै था, अर यीशु यशश्वलेम नगर म्ह गया। 14 उसनै मन्दर म्ह बल्ध, भेड़ अर कबूतर बेच्यण आळे अर सर्फां (पईसा का लेण देण करण आळे) ताहीं बेठे होइ पाया। 15 फेर उसनै जेवडियां का कोरडा बणाकै, सारी भेड़ अर बल्धां ताहीं मन्दर तै काढ दिया, अर सर्फां कै पईसे खिन्डा दिए अर उनके पीढ़े पलट दिए, 16 अर कबूतर बेच्यण आळा ताहीं बोल्या, “इन्हनै उरै तै ले जाओ। मेरै पिता कै घर नै व्यापर का घर ना बणाओ।” 17 फेर उसकै चेल्लां नै याद आया के पवित्र ग्रथ म्ह लिख्या होइ सै, “तेरे घर की धुन मनै खा ज्यागी।” 18 इसपै यहूदी अगुवां नै यीशु तै कह्या, “तू म्हारै ताहीं कौण सा अदभुत निशान दिखा सकै सै?” जो इस तरियां के काम तू करै सै, यो सावित हो सकै, के तू उसका हक राक्खै सै। 19 यीशु नै उन ताहीं जवाब दिया, “इस मन्दर नै ढां दो, मै

इसनै तीन दिन म्ह बणा दियुँगा।” 20 यहूदी अगुवां नै कह्या, “इस मन्दर कै बणाए म्ह छियालिस साल लाग्ये सै, अर के तू इसनै तीन दिन म्ह बणा देवैगा?” 21 पर यीशु नै उनतै अपणी देह रूपी मन्दर कै बारै म्ह कह्या था। 22 आखर म्ह जिब वो मरे होया म्ह तै जिन्दा होया, जिब उसकै चेल्लां नै याद आई, के उसनै यो कह्या था, अर उनै पवित्र ग्रथ के वचन जो यीशु के जिन्दा होण के बारें म्ह बतावै सै, अर उनै यीशु के जरिये कहे होए वचनां पै बिश्वास करया। 23 फसह के त्योहार के दिनां म्ह जिब यीशु यशश्वलेम नगर म्ह था, तो उसके जायिये करे गये चिन्ह-चमत्कार के कामां नै देखकै घणे माणसां नै उसपै बिश्वास करया। 24 पर यीशु नै अपणे-आप ताहीं उनकै भरोसै पै कोनी छोड़या, ज्यातै वो सारया नै जाणै था, 25 अर उसनै इस बात की जरूरत कोनी थी के कोए आकै उसनै माणसां के बारै म्ह बतावै, क्यूँकै वो खुदे जाणै था के माणस कै मन म्ह कै सै?

3 फरीसियाँ म्ह तै नीकुदेमुस नाम का एक माणस था, जो यहूदियाँ का प्रधान था। 2 उसनै रात नै यीशु के धोरै आकै उस ताहीं कह्या, “हे गुरु, हमनै बेरा सै कै तू परमेस्वर की ओड़ै तै म्हरे ताहीं सिखाण खात्तर आया सै, ज्यातैए कोए इन चिन्ह-चमत्कारां नै जिननै तू दिखावै सै, जै परमेस्वर उसकै गेल्या ना हो, तो दिखा कोन्या सकदा।” 3 यीशु नै उस ताहीं जवाब दिया, “मै थरे ताहीं सच कहूँ सूँ जै कोए नए सिरे तै ना जन्म ले तो परमेस्वर का राज्य देख न्ही सकदा।” 4 नीकुदेमुस नै उस ताहीं कह्या, “माणस जिब बूढ़ा होया, तो किस ढाळ जन्म ले सकै सै? के वो अपणी माँ कै गर्भ म्ह दुसरी बर भीत्तर बड़ै कै जन्म ले सकै सै।” 5 यीशु नै जवाब दिया, “मै तेरे तै सच कहूँ सूँ जिब ताहीं कोए माणस पाणी अर आत्मा तै ना जन्मे तो वो परमेस्वर के राज्य म्ह बड़ न्ही सकदा।” 6 क्यूँकै मानव देह म्ह जन्म सिर्फ देह का जन्म सै, जिब के आत्मा तै जन्म नया जन्म सै। 7 हैरन ना होवै, के मनै तेरे तै कह्या, के थरे ताहीं नए सिरे तै जन्म लेणा जरूरी सै। 8 हवा जितोड़ चाहवै सै उतोड़ चाल्लै सै, अर तू उसकी आवाज सुणै सै, पर जाण्दा कोनी, के वा कड़ै तै आवै सै अर कितोड़ नै जावै सै? जो कोए पवित्र आत्मा तै जन्म सै वो इसाए सै।” 9 नीकुदेमुस नै उस ताहीं जवाब दिया, के या बात किस ढाळ हो सकै सै? 10 या सुणै की यीशु नै उस ताहीं जवाब दिया, “तू इसाएलियाँ का गुरु होकै भी के इन बातां नै कोनी समझदा?” 11 मै तेरे तै साच्ची-साच कहूँ सूँ कै हम जो जाणां सां, वो कहां सां, अर जिस ताहीं हमनै देख्या सै उसकी गवाही देवा सां, अर जो हम कहां सां, उसका थम बिश्वास कोनी करदे। 12 जिब मनै थरैतै दुनिया की बात कही, अर थम बिश्वास न्ही करदे, तो जै मै थमनै सुर्ग की बात कहूँ, तो फेर किस ढाळ बिश्वास करोगे? 13 अर कोए सुर्ग पै कोनी चढ़ा, सिर्फ वोए एक सै जो सुर्ग तै उतरा यानिके मै माणस का बेटा। 14 अर जिस ढाळ तै मूसा नबी नै जंगल-बियाबान म्ह कांस्सी का साँप बणाकै उस ताहीं ऊँच्चे पै चढ़ाया जाऊँ। 15 ताके जो कोए मेरे पै बिश्वास करै वो अनन्त

जीवन पावै। (aiōnios g166) 16 क्यूंकि परमेसवर नै दुनिया के माणसां तै इसा प्यार राख्या के उसनै अपणा इकलौता बेटृ दे दिया, ताके जो कोए उसपै बिश्वास करै, वो नाश कोनी होवै, पर अनन्त जीवन पावै। (aiōnios g166) 17 क्यूंकि परमेसवर नै अपणा बेटृ दुनिया म्ह इस खात्तर न्ही भेज्या, के दुनिया पै दण्ड का हुकम देवै, पर इस खात्तर भेज्या के दुनिया उसकै जरिये उद्धार पावै। 18 जो परमेसवर के बेटृ पै बिश्वास करै सै, उसपै दण्ड का हुकम कोन्या होन्दा, पर जो उसपै बिश्वास न्ही करदा, वो कसूवार बणीगा, ज्यांतै के उसनै परमेसवर के इकलौते बेटृ के नाम पै बिश्वास कोनी करया। 19 अर दण्ड कै हुकम का कारण यो सै के चान्दणा दुनिया म्ह आया सै, अर माणसां नै अन्धेरै ताहीं चाँदणे तै घणा प्यारा जाण्या क्यूंकि उनके काम बुरे थे। 20 क्यूंकि जो कोए पाप करै सै, वो चाँदणे तै बैर राक्खै सै, अर चाँदणे धोरै कोनी आन्दा, क्यूंकि उसके पाप उजागर हो जावैंगे। 21 पर जो सच्चाई पै चाल्लै सै वो चाँदणे धोरै आवै सै, ताके ये साबित हो जावै के उसके काम परमेसवर की ओङ्डै तै कराये गये सै। 22 फेर यीशु अर उसके चेल्लें यहूदिया परदेस म्ह पोहचे, अर वो ओङ्डै उनके गेल्या रहकै माणसां ताहीं बपतिस्मा देवै था, क्यूंकि ओङ्डै धणाए पाणी था, अर माणस आकै बपतिस्मा लेवै थे। 24 यूहन्ना उस बखत ताहीं जेळखाने म्ह कैद न्ही करया था। 25 ओङ्डै यूहन्ना के कुछ चेल्यां का किसे यहूदी गेल्या पाणी तै शुद्धिकरण कै बरै म्ह बहस होगी। 26 अर यूहन्ना कै चेल्यां नै आकै उस ताहीं कह्या, “हे गुरु, जो माणस यरदन नदी कै परली ओङ्डै तेरी गेल्या था, अर जिसके बारें म्ह तन्नै कह्या सै, देख, वो यीशु बपतिस्मा देवै सै, अर सारे उसकै धोरै आवै सै।” 27 यूहन्ना नै जवाब दिया, “माणस नै तब तक कुछ न्ही मिल सकता, जिब तक वो सुर्ग तै ना दिया जावै।” 28 थारे ताहीं तो पैहले मन्नै बताया था के “मै मसीह कोनी, पर उसतै पैहले भेज्या गया सूं।” 29 बन्दडा बन्दडी तै व्याह करै सै, पर बन्दडे का साथी जो खड्या होया उसकी आवाज सुणी सै, बन्दडे कै वचन तै घणा खुश होवै सै, अर मै भी खुश सूं। 30 जरूरी सै के वो बधै अर मै घटूं। 31 जो सुर्ग तै आवै सै, वो सारया म्ह सबतै महान् सै, जो धरती कान्ही तै आवै सै वो धरती का सै, अर धरतीए की बात कहवै सै: जो सुर्ग कान्ही तै आवै सै, वो सारया तै उप्पर सै। 32 उसनै जो कुछ देख्या अर सुण्या सै, वो उस्से की बात करै सै, पर उसकी गवाही कोए न्ही मानता। 33 जिसनै उसकी गवाही अपणाई उसनै बात पै छाप लगा दी के परमेसवर साच्चा सै। 34 क्यूंकि जिस ताहीं परमेसवर नै भेज्या सै, वो परमेसवर की बात कहवै सै, क्यूंकि परमेसवर उननै बिना किसे माप के पवित्र आत्मा देवै सै। 35 पिता अपणे बेटृ तै प्यार करै सै, अर उसनै सारी चीज उसके हाथां म्ह दे दी सै। 36 जो बेटृ पै बिश्वास करै सै, अनन्त जीवन उस्से का सै, पर जो बेटृ की बात कोनी मान्दा, उसनै वो अनन्त जीवन कोनी मिलै, इसकी बजाये उसपै परमेसवर का छो बण्या रहवैगा। (aiōnios g166)

4 फेर जिब यीशु नै बेरा पाठ्या के फरीसियाँ नै सुण्या सै के यीशु यूहन्ना तै घणे चेल्लें बण्यावै सै अर उन्नै बपतिस्मा देवै सै। 2 (ऊतो यीशु खुद न्ही बल्कि उसके चेल्लें बपतिस्मा देवै थे) 3 फेर वो यहूदिया परदेस नै छोड़कै दुवारै गलील परदेस म्ह चल्या गया, 4 इस बार उसनै सामरिया परदेस होकै जाणा पड्या था। 5 इस करकै वो सामरिया परदेस के सूखार नामक एक नगर म्ह आया, यो नगर उस जगहां कै धोरै था जो याकूब का कुआँ भी ओडै था। यीशु सफर का थक्या होडै उस कुएँ पै न्यूए बैठग्या। दोपहर का बखत होराया था। 7 इतनै म्ह एक सामरी बिरबान्नी पाणी भरण आई। यीशु नै उस ताहीं कह्या, “मन्नै पाणी पिया।” 8 क्यूंकि उसके चेल्लें नगर म्ह खाणा मोल लेण जारे थे। 9 उस सामरी बिरबान्नी नै उस ताहीं कह्या, “तू यहूदी होकै मेरे तै सामरी बिरबान्नी तै पाणी क्यांतै माँगै सै?” (क्यूंकि यहूदी सामरियाँ तै नफरत करै थे।) 10 यीशु नै जवाब दिया, “जै तू जाणदी के परमेसवर तन्नै के देणा चाहवै सै, अर वो कौण सै, जो तेरे तै कहवै सै, ‘मन्नै पाणी पिया,’ फेर तू उसतै माँगदी, अर वो तन्नै जीवन का पाणी देन्दा।” 11 बिरबान्नी नै उस ताहीं कह्या, “हे प्रभु, तेरे धोरै पाणी भरण नै तो किमे सै भी कोनी, अर कुआँ डून्या सै, तो फेर वो जीवन का पाणी तेरे धोरै कडै तै आया? 12 के तू म्हरै पूर्वज याकूब तै बड़डा सै, जिसनै म्हरै ताहीं यो कुआँ दिया, अर खुद भी अपणे ऊलादां, अर अपणे डानारां सुधा इस म्ह तै पिया?” 13 यीशु नै उस ताहीं जवाब दिया, “जो कोए यो पाणी पीवैगा वो फेर तिसाया होगा, 14 पर जो कोए उस पाणी म्ह तै पीवैगा जो मै उस ताहीं दियुँगा वो फेर अनन्त काल ताहीं तिसाया कोनी होवैगा, बल्के जो पाणी मै उस ताहीं दियुँगा वो उस म्ह तै एक चोवा बण ज्यागा जो अनन्त जीवन खात्तर उमड़दा रहवैगा।” (aiōn g165, aiōnios g166) 15 बिरबान्नी नै उस ताहीं कह्या, “हे प्रभु, वो पाणी मन्नै दे ताके मै तिसाई ना होँक अर ना पाणी भरण नै इतनी दूर आँऊँ।” 16 यीशु नै उस ताहीं कह्या, “जा अपणे धर्णी नै याढै बुला ल्या।” 17 बिरबान्नी नै जवाब दिया, “मै बिना धर्णी की सूं।” यीशु नै उस ताहीं कह्या, “तू ठीक कहवै सै, ‘मै बिना धर्णी की सूं।’ 18 क्यूंकि तन्नै पाँच धर्णी कर लिए सै, अर जिस माणस कै गेल्या तू इब सै वो भी तेरा धर्णी कोनी। या तन्नै साच्ची-ए कही सै।” 19 बिरबान्नी नै उस ताहीं कह्या, “हे प्रभु, मन्नै लागै सै तू नबी सै। 20 म्हरै सामरी पूर्वजां नै इस्से पहाड़ पै भगति करी, अर यहूदी लोग कहवै सै, के वा जगहां जडै भगति करणी चाहिए यस्तशेलम नगर म्ह सै।” 21 यीशु नै उस ताहीं कह्या, “हे नारी,” मेरी बात का भरोस्सा कर, के वो बखत आवै सै, के थम ना तो इस पहाड़ पै पिता की भगति करोगे, ना यश्शलेम म्ह। 22 थम जिसनै कोनी जाणदे, उसकी भगति करो सो, अर हम यहूदी लोग जिसनै जाणा सा उसकी भगति करा सों, क्यूंकि उद्धार यहूदियाँ म्ह तै सै। 23 पर वो बखत आवै सै, बल्कि इब भी सै, जिसम्ह सच्चे भगत पिता की भगति आत्मा अर सच्चाई तै करैगें, क्यूंकि पिता अपणे खात्तर इसेए भगतां नै टोहवै सै।

24 परमेस्वर आत्मा सै अर जरूरी सै के उसकी भगति करण आले आत्मा अर सच्चाई तै उसकी भगति करै। 25 बिरबान्नी नै उस ताहीं कह्या, “मै जाणु सूं के मसीह” जो ख्रिस्ट कुहावै सै, “आण आळा सै, जिब वो आवैगा, फेर म्हारै ताहीं सारी बात बता देवैगा।” 26 यीशु नै उस ताहीं कह्या, “मै जो तेरे तै बोल्लण लागरया सूं, मै वोए सूं।” 27 इन्ते म्ह उसके चेल्लें आण पोहचे, अर हैरान होण लागणे के वो बिरबान्नी तै बतलावै था, फेर भी किसे नै कोनी बुझ़ाया, “तू के चाहवै सै? या क्यातै उसतै बतलावै सै?” 28 फेर बिरबान्नी अपणा पैंढा छोड़के नार म्ह चली गई, अर माणसां तै कहण लागी, 29 “आओ एक माणस नै देक्खो, जिसनै सारा किमे जो मन्नै करया मेरै तै बता दिया। कदे योए तो मसीह न्हीं सै?” 30 तब वे नगर के बासिन्दे गाम तै लिकड़के यीशु कै धोरै आण लागे। 31 इस बिचालै उसके चेल्लां नै यीशु तै या बिनती करी, “हे गुरु, किमे खा ले।” 32 पर उसनै उन ताहीं कह्या, “मेरै धोरै खाण खातर इसा खाणा सै जिसनै थम कोनी जाणदे।” 33 फेर चेल्लां नै आप्स म्ह कह्या, “के कोए उसकै खातर खाणा लेकै आया सै?” 34 यीशु नै उनतै कह्या, “मेरा खाणा यो सै के अपणे भेजण आले की मर्जी कै मुताबिक चाल्लै अर उसके काम नै पूरा करूं जो उसनै कह्या सै। 35 के थम कोनी कहन्दे, ‘लामारीयां के इब्बै चार महिने रहेर सै?’ अपणी आँखां तै देक्खों जितने माणस आण लागरे सै, वो उस खेत की तरियां सै जो काढृण खातर तैयार सै।” 36 पैहेलै तै मजदूर काम करण लागरया सै अर अपणी मजदूरी पाण लागरया सै, इसका मतलब यो सै के वो माणसां नै कठुा करण लागरया सै जो अनन्त जीवन पागे। (aiōnios g166) 37 क्यूँके याडै या कहावत ठीक बेटै सै: बोणआळा और सै, अर काढृण आळा और। 38 मन्नै थोरे ताहीं वो खेत काढृण खातर भेज्या जिसम्ह थमनै मेहनत कोन्या करी दुसरयां नै मेहनत करी अर थम उनकी मेहनत कै फल म्ह हिस्सेदार होए।” 39 उस नगर के घणखेरे सामरियाँ नै उस बिरबान्नी कै कहण तै यीशु पै बिश्वास करया, क्यूँके उसनै कह्या था, के “उसनै सारा किमे जो मन्नै करया सै, मेरै तै बता दिया।” 40 ज्यांतै जिब सामरी उसकै धोरै आए, तो उसतै बिनती करण लागणे के म्हारै याडै रह। आखर म्ह वो ओडै दो दिन ताहीं रहया। 41 उसके वचन कै कारण और भी घणखेरे माणसां नै बिश्वास करया 42 अर उस बिरबान्नी तै कह्या, “इब हम तेरे कहण तैए बिश्वास कोनी करदे, क्यूँके हमनै खुदे सुण लिया, अर जाणणे सा के योए साच्चए म्ह दुनिया का उद्धार करणीया सै।” 43 फेर दो दिनां कै पाच्छे वो ओडै तै लिकड़के गलील परदेस म्ह गया। 44 क्यूँके यीशु नै खुदे गवाही दी के नबी अपणे गाम म्ह आदर मान कोनी पान्दा। 45 जिब वो गलील परदेस म्ह आया, तो गलील परदेस के माणस राजजी होकै उसतै मिले, क्यूँके जितने काम उसनै यरुशलेम म्ह त्यौहार कै बखत करे थे, उननै उन साराया ताहीं देख्या था, क्यूँके वे भी त्यौहार म्ह जारे थे। 46 फेर वो दुबारे गलील परदेस कै काना नगर म्ह आया, जडै उसनै पाणी ताहीं अंगूर का रस बणाया था। ओडै राजा का एक कर्मचारी था जिसका बेटा

कफरनहूम नगर म्ह बीमार था। 47 वो या सुणकै के यीशु यहूदिया परदेस तै गलील परदेस म्ह आ रहया सै, उसकै धोरै गया अर उसतै बिनती करण लागण्या के चालकै मेरै बेटै नै ठीक कर दे: क्यूँके वो मरण आळा था। 48 यीशु नै उस ताहीं कह्या, “जिब ताहीं थम चमत्कार अर अचम्भे के काम कोनी देखदे जद ताहीं कदे भी बिश्वास कोनी करोगे।” 49 राजा कै कर्मचारी नै उसतै कह्या, “हे प्रभु, मेरै बालक की मौत होण तै पैहल्या चाल।” 50 यीशु नै उस ताहीं कह्या, “जा, तेरा बेटा जिन्दा सै।” उस माणस नै यीशु की कही होई बात का बिश्वास करया अर चल्या गया। 51 वो रास्ते म्ह था के उसके नौकर उसतै आ मिले अर कहण लागे, “तेरा छोरा जिन्दा सै।” 52 उसनै उसतै बुझ़ाया, “किस बखत वो ठीक होण लागण्या?” उननै उस ताहीं कह्या, “काल दोफहरै एक बजे उसका बुखार उतर गया।” 53 फेर बाप जाण गया के यो उससे बखत होया जिस बखत यीशु नै उस ताहीं कह्या, “तेरा बेटा जिन्दा रहवैगा,” अर उसनै अर उसके सारे कुण्डे नै बिश्वास करया। 54 यो दुसरा अचम्भे का काम था जो यीशु नै यहूदिया परदेस तै गलील परदेस म्ह आकै दिखाया।

5 इन बातां कै पाच्छे यहूदियाँ का एक त्यौहार आया, अर यीशु यरुशलेम नगर म्ह गया। 2 यरुशलेम म्ह भेड़-फाटक कै धोरै एक कुण्ड सै जो इब्रानी भाषा म्ह बैतहसदा कुहावै सै, उसके पाँच घाट सै। 3 इन म्ह घणखेरे बीमार, आन्धे, लंगडे अर सूखे अंगआले (पाणी कै हाल्लण कै आस म्ह) पड़े रहवै थे। 4 (क्यूँके खास बखत पै परमेस्वर के सुर्दूत कुण्ड म्ह उतरकै पाणी नै हलाया करै थे। पाणी हाल्लै जो कोए पैहल्या उतरदा वोए ठीक हो जान्दा चाहे उसकै कोए बीमारी क्यूँ ना हो।) 5 उडै एक माणस था, जो अडीतीस साल तै बीमारी म्ह पड़या था। 6 यीशु नै उस ताहीं पड़या होया देखकै अर न्यू जाणकै के वो घणे दिनां तै इसी हाल्लत म्ह पड़या सै, उसतै बुझ़ाया, “के तू ठीक होणा चाहवै सै?” 7 उस बीमार नै उस ताहीं जवाब दिया, “हे प्रभु, मेरै धोरै कोए माणस कोनी के जिब पाणी हलाया जावै, तो मन्नै कुण्ड म्ह उतरै, पर मेरे पैंहोचदे-पैंहोचदे दुसरा मेरतै पैहल्या पाणी म्ह उतर जावै सै।” 8 यीशु नै उस ताहीं कह्या, “उठ, अपणे बिस्तर ठाकै, हाँड़-फिर।” 9 वो माणस जिब्बे ठीक होग्या, अर अपणे बिस्तर ठाकै हाँड़-फिरण लागण्या। 10 वो आराम का दिन था। ज्यांतै यहूदी उस ताहीं जो ठीक होया था, कहण लागे, “आज तो आराम का दिन सै, तेरा बिस्तर ठाणा नियम-कायदा के मुताबिक ठीक कोनी।” 11 उसनै उस ताहीं जवाब दिया, “जिसनै मेरै ताहीं ठीक करया, उस्से नै मेरै ताहीं कह्या, ‘अपणा बिस्तर ठाअ रह हाँड़-फिर।’” 12 उननै उसतै बुझ़ाया, “वो कौण माणस सै जिसनै तेरे तै कह्या, ‘बिस्तर ठा, अर हाँड़-फिर?’” 13 पर जो ठीक होया था वो कोनी जाणै था के वो कौण सै, क्यूँके उस जगहां पै भीड़ होण कै कारण यीशु ओडै तै चला ग्या था। 14 इन बातां कै पाच्छे वो यीशु नै मन्दर म्ह मिल्या। यीशु नै उस ताहीं कह्या, “देख, तू ठीक होग्या सै: दुबारा पाप ना करिये, इसा ना हो के इसतै कोए भारी संक्ट तेरे पै

आण पडै।” 15 उस माणस नै जाकै यहूदियाँ तै कह दिया के जिसनै मेरे ताहीं ठीक करया वो यीशु सै। 16 इस कारण यहूदी अगुवें यीशु नै तंग करण लागे, क्यूँके वो इसे काम आराम कै दिन करया करदा। 17 इसपै यीशु नै उन ताहीं कह्या, “मेरा पिता सारी हाण काम करै सै, अर मेरे ताहीं भी करते रहणा सै।” 18 यीशु की बात के कारण यहूदी अगुवें और भी घणे उस ताहीं मारण खात्तर कोशिश करण लागे, क्यूँके वो ना सिर्फ आराम कै दिन का नियम तोड़ा करदा, पर परमेसवर नै अपणा पिता कहके खुद ताहीं परमेसवर कै बरोबर भी ठैहावै था। 19 इसपै यीशु नै उस ताहीं कह्या, “मै थारैताहीं साच्ची-साच कहूँ सूँ बेट्टा खुद तै किमे न्ही कर सकदा, सिर्फ वो जो पिता नै करदे देक्खै सै, क्यूँके जिन-जिन काम्मां नै वो करै सै उननै बेट्टा भी इससे ढाळ करै सै। 20 क्यूँके पिता बेटै तै प्यार करै सै अर जो-जो काम वो खुद करै सै, वो सारे उसतै दिखावै सै: अर वो इसतै भी बड़े काम उस ताहीं दिखावैगा, ताके थम हैरान होओ। 21 जिसा पिता मरे होया नै ठावै अर जिवावै सै उससे ढाळ बेट्टा भी जिननै चाहवै सै उननै जिवावै सै। 22 पिता किसे का न्याय कोनी करदा, पर न्याय करण का सारा काम बेटै ताहीं सौंप राख्या सै, 23 ताके सारे माणस जिस ढाळ पिता की इज्जत करै सै उससे ढाळ बेटै की भी इज्जत करै। जो बेटै की इज्जत कोनी करदा, वो पिता की भी इज्जत कोनी करदा, जिसनै उस ताहीं भेज्या सै।” 24 मै थारैतै साच्ची-साच कहूँ सूँ, जो मेरा वचन सुणैके उसपै बिश्वास करै सै, जिसनै मेरे ताहीं भेज्या सै, वो अनन्त जीवन पावै सै, अर उसपै दण्ड का हुक्म कोनी होन्दा, पर वो मौत नै पार करकै जीवन म्ह दाखल हो लिया सै। (aiōnios g166) 25 “मै थारैतै साच्ची-साच कहूँ सूँ वो बखत आवै सै, अर इब सै, जिसम्ह मरे होड़ परमेसवर के बेटै का वचन सुणैंगे, अर जो सुणैंगे वे जिवैंगे। 26 क्यूँके जिस ढाळ तै पिता खुद म्ह जीवन राख्यै सै, उससे ढाळ तै उसनै बेटै ताहीं भी यो अधिकार दिया सै के खुद जीवन राख्यै। 27 बल्के मेरे ताहीं माणसां के न्याय करण का भी अधिकार दिया सै, ज्यातै के मै माणस का बेट्टा सूँ।” 28 इसतै हैरान मतना होओ: क्यूँके वो बखत आवै सै के जितने मरे होए लोग कब्रां म्ह सै वे मेरा वचन सुणैके लिकड़ आवैंगे। 29 जिन नै भले काम करै सै वे जीवन कै पुनरुत्थान खात्तर जी जावैंगे अर जिन नै दुरे काम करै सै वे दण्ड के पुनरुत्थान खात्तर जी जावैंगे। 30 “मै खुद तो कुछ कोनी कर सकदा, जिसा सुण सूँ, उससे तरियां न्याय करूँ सूँ अर मेरा न्याय साच्चा सै, क्यूँके मै अपणी मर्जी कोनी पर अपणे भेज्य आळे की मर्जी चाहूँ सूँ।” 31 जै मै खुदे अपणी गवाही धूँ तो मेरी गवाही साच्ची कोनी। 32 एक और सै जो मेरा पिता सै, वो मेरी गवाही देवै सै, अर मै जाणु सूँ के मेरी जो गवाही वो देवै सै, वा साच्ची सै। 33 थमनै यूहन्ना तै बुझावाया अर उसनै सच्चाई की गवाही दी सै। 34 पर मै अपणे बारै म्ह माणसां की गवाही कोनी चाहन्दा, फेर भी मै ये बात ज्यातै कहूँ सूँ के थारा उद्घार हो। 35 यूहन्ना तो बल्दे अर चमकदे होए दीवै कै समान था, अर थमनै किमे वार ताहीं उसके चाँदणे म्ह मगन होणा भाया। 36 पर मेरै धैरै जो

गवाही सै वा यूहन्ना की गवाही तै बहूँ सै, क्यूँके जो काम पिता नै मेरे ताहीं निपटाण नै सौच्या सै यानिके योए काम जो मै करूँ सूँ वे मेरे गवाह सै के पिता नै मेरै ताहीं भेज्या सै। 37 अर पिता जिसनै मेरै ताहीं भेज्या सै, उस्से नै मेरी गवाही दी सै। थमनै ना कदे उसका वचन सुण्या, अर ना उसकी शक्ति देक्खी सै, 38 अर उसकै वचन ताहीं मन म्ह बणाए कोनी राखदे, क्यूँके जिस ताहीं उसनै भेज्या थम उसका बिश्वास कोनी करदे। 39 थम पवित्र ग्रन्थ म्ह टोक्हो सो, क्यूँके समझों सो के उस म्ह अनन्त जीवन थारे ताहीं मिलै सै, अर यो वोए सै जो मेरी गवाही देवै सै, (aiōnios g166) 40 फेर भी थम अनन्त जीवन पाण खात्तर मेरै धैरै आणा कोनी चाहन्दे। 41 मै माणसां तै आदर कोनी चाहन्दा। 42 पर मै थमनै जाणु सूँ, के थारे म्ह परमेसवर खात्तर प्यार कोनी। 43 थम मेरे ताहीं पसन्द न्ही करते जिब के मै अपणे पिता कै नाम तै आया सूँ जै दुमरा कोए खुद कै नाम तै आवै, तो उसनै थम अपणा लोगे। 44 थम मेरै पै किस तरियां बिश्वास कर सको सो? क्यूँके थम तो आप्स म्ह एक-दुसरे तै तारीफ सुणणा चाहो सो, अर उस तारीफ की ओड़ देखते भी कोनी जो एकमात्र परमेसवर तै आवै सै। 45 न्यू ना समझियों के मै पिता के स्याही थारे म्ह खोट काछूँ सूँ, थारे म्ह खोट काढिण्या तो मूसा नबी सै, जिसपै थमनै भरोस्सा करया सै। 46 क्यूँके जै थम मूसा नबी पै बिश्वास करदे, तो मेरा भी बिश्वास करदे, ज्यातै के उसनै मेरै बारै म्ह लिख्या सै। 47 पर जै थम उसके पवित्र ग्रन्थ म्ह लिक्खी होइ बात्तां पै बिश्वास कोनी करदे, तो मेरी बात्तां पै किस तरियां बिश्वास करोगे?

6 इन बात्तां के पाछ्ये यीशु गलील समुन्दर यानिके तिबिरियास की झील कै धैरै गया। 2 अर एक बहूँ भीड़ उसकै गेल्या हो ली क्यूँके जो अचम्भे के काम वो बिमारां पै दिखावै था वे उननै देखाया करै थे। 3 फेर यीशु पहाड़ पै चढ़कै अपणे चेल्यां कै गेल्या बैठ्याए। 4 यहूदियाँ कै फसह का त्यौहार लोवै था। 5 जिब यीशु नै अपणी आँख ठाकै एक बहूँ भीड़ ताहीं अपणे कान्ही आन्दे देख्या, फेर फिलिप्पुस ताहीं कह्या, “हम इनकै खाणे कै खान्तर कड़ै तै रोटी मोल ल्यावां?” 6 उसनै या बात उस ताहीं आजमाण ताहीं बोल्ली, क्यूँके वो खुदे जाणै था के वो के करैगा। 7 फिलिप्पुस नै उस ताहीं जवाब दिया, “दो सौ दीनार (200 दिन की मजदूरी) की रोटी भी उन खान्तर पूरी कोनी पड़े के उन म्ह तै होरेक नै माड़ी-माड़ी मिल जा।” 8 उसके चेल्यां म्ह तै शमौन पतरस का भाई अन्द्रियास नै उस ताहीं कह्या, 9 “याड़ै एक छोरा सै जिसकै धैरै जौ की पाँच रोटी अर दो मच्छी सै, पर इतने माणसां खान्तर वे के सै?” 10 यीशु बोल्या, “माणसां नै बिठा थो।” उस जगहां धनी धास थी: फेर माणस जिन म्ह आदमियाँ की गिणती करीबन पाँच हजार की थी, बैठगे। 11 फेर यीशु नै रोटी ली अर परमेसवर का धन्यवाद करकै बैठन आला ताहीं बांड दी: अर उस्से ढाळ मच्छियाँ म्ह तै जितनी वे चाहवै थे, बांड दी। 12 जिब वे खाकै छिको फेर वो चेल्यां तै बोल्या, “बचे होड़ टुकड़े करै कर ल्यो के किमे बगायां न्ही जावै।” 13 आखर म्ह उननै कठूँ करया, अर जौ की पाँच रोटियाँ के टुकड्या तै जो खाण आला तै बची

होड़ थी, बारहा टोकरी भरी। 14 फेर जो अचम्भे के काम उसनै कर दिखाये उसनै वे माणस देखकै कहण लागे, “वो नबी जो दुनिया म्ह आण आला था, पक्का योए सै” 15 यीशु न्यू जाणकै के वे मन्नै राजा बणाण खात्तर पकड़णा चाहवै सै, फेर पहाड़ पै एकला चल्या गया। 16 जिब साँझ होई, तो उसके चेल्लें झील कै किनारे गए, 17 अर किस्ती पै चढ़कै झील कै परली ओड़ कफरनहूम नगर म्ह जाण लागे। उस बखत अन्धेरा होग्या था, अर यीशु इब ताहीं उनकै धोरै कोनी आया था। 18 अर आँधी कै कारण समुन्द्र म्ह झाल उठुण लागी। 19 जिब वे खेते खेते तीन-चार कोस कै करीबन लिकड़ो, फेर उननै यीशु ताहीं समुन्द्र पै चाल्दे अर किस्ती कै धोरै आन्दे देख्या, अर डरगे। 20 पर उसनै उनतै कहा, “मै सूं, डरो मतना” 21 आखर म्ह वे उसनै किस्ती पै चढाण नै राज्जी होए अर जिब्बे वा किस्ती उस जगहां पै जा पोहची जड़ै वे जाण लागरे थे। 22 जो लोग गलील समुन्द्र के उस पार रहो थे, उननै दुसरे दिन देख्या के याड़ि सिर्फ एक ए किस्ती थी, अर यीशु अपणे चेल्यां गेल्या उस किस्ती पै कोनी चढ़्या था, पर सिर्फ उसके चेल्लें एकले ए चले गए थे। 23 तिविरियास नगर की कुछ किस्ती उस जगहां कै धोरै आकै रुकी, जड़ै प्रभु नै परमेसवर का धन्यवाद करकै भीड़ ताहीं रोटी खुआई थी। 24 जिब भीड़ नै देख्या के याड़ै ना यीशु सै अर ना उसके चेल्लें, फेर वे भी छोट्टी-छोट्टी किस्तियाँ पै चढ़कै यीशु नै टोन्दे होए कफरनहूम नगर पोहचे। 25 गलील समुन्द्र कै परली ओड़ जिब वे उसतै मिले तो बोल्ले, “हे गुरु, तू याड़ै कद आया?” 26 यीशु नै उन ताहीं जवाब दिया, “मै थारैताहीं साच्ची-साच कहूँ सूं, थम मन्नै ज्यांतै कोनी टोक्को सो के थमनै अचम्भे के काम देकर्ये, पर ज्यातै के थमनै पेट भरकै रोटी खाई थी।” 27 उस खाणे खात्तर मेहनत ना करो जो सड़ जावै सै, पर उस खाणे खात्तर जतन करो जो कदे खराब न्हीं होंदा अर अनन्त जीवन देवै सै, मै माणस का बेट्ठा यो खाणा थारे ताहीं देऊँगा, क्यूँकै पिता परमेसवर नै मेरे ताहीं इसा करण का हक दिया सै। (aiōnios g166) 28 वे उसतै बोल्ले, “परमेसवर के काम करण खात्तर हम के करा?” 29 यीशु नै उन ताहीं जवाब दिया, “परमेसवर चाहवै सै, के थम उसपै बिश्वास करो, जिस ताहीं उसनै भेज्या सै।” 30 फेर वे उसतै बोल्ले, “फेर तू कौण सा निशान दिखावै सै के हम उसनै देखकै तेरा बिश्वास करा? तू कौण सा काम दिखावै सै? 31 म्हारै पूर्वजां नै जंगल-बियाबान म्ह मन्ना खाया, जिसा पवित्र शास्त्र म्ह लिख्या सै, ‘परमेसवर नै उन ताहीं खाण खात्तर सुर्ग तै रोटी देई।’” 32 यीशु नै उनतै कहा, “मै थारे ताहीं साच्ची-साच कहूँ सूं के मूसा नबी नै थारे ताहीं वा रोटी सुर्ग तै कोनी दी, पर मेरा पिता थमनै सुर्ग तै असली रोटी देवै सै। 33 क्यूँकै परमेसवर की रोटी वाए सै, जो सुर्ग तै उतरकै दुनिया के माणसां ताहीं जिन्दगी देवै सै।” 34 फेर यो सुणकै यीशु तै बिनती करी, “के हे प्रभु, वा रोटी हमनै सदा दिया करा।” 35 यीशु नै उनतै कहा, “जीवन की रोटी मै सूं जो मेरै धोरै आवैगा, वो कदे भूक्खा कोनी रहवैगा, अर जो कोए मेरै पै बिश्वास करैगा, वो कदे तिसाया कोनी होवैगा। 36 पर मन्नै थारे ताहीं

पैहले तै कह्या था, के थमनै मेरैताहीं देख भी लिया सै, फेर भी बिश्वास कोनी करदे। 37 वे सारे जो पिता नै मेरे ताहीं दिये सै, वे मेरै धोरै आवैगें, अर हर एक जो कोए मेरै धोरै आवैगा उसनै मै कदे भी कोनी छोट्टुंगा। 38 पर मै अपणी मर्जी कोनी पर अपणे भेजण आळे पिता की मर्जी पूरी करण खात्तर सुर्ग तै उतरया सूं। 39 अर मेरै भेजण आळे की मर्जी या सै के जो किमे उसनै मेरै ताहीं दिया सै, उस म्ह तै मै किसे नै ना खोँक, पर उसनै आखर के दिनां म्ह दुबारै जिन्दा कर द्यूँ। 40 क्यूँकै मेरै पिता की मर्जी या सै के जो कोए बेट्टै नै अपणा कै उसपै बिश्वास करै, वो अनन्त जीवन पावै, अर मै उसनै आखरी के दिनां म्ह दुबारै जिन्दा कर द्यूँगा।” (aiōnios g166) 41 इसपै यहूदी उसपै बिरडाण लागगे, क्यूँकै उसनै कहा था, “जो रोटी सुर्ग तै उतरी, वा मै सूं।” 42 अर वे बोल्ले, “के यो यीशु तै, यूसुफ का बेट्ठा, जिसकै माँ-बाप नै हम जाणां सां? केर वो किस ढाळ कह सकै सै के मै सुर्ग तै उतरया सूं?” 43 यीशु नै उन ताहीं जवाब दिया, “आप्स म्ह मतना बिरडाओ।” 44 कोए मेरै धोरै कोनी आ सकदा जिब ताहीं पिता, जिसनै मेरैताहीं भेज्या सै, उसनै खींच न्हीं लेवै, अर मै उसनै आखर के दिनां म्ह फेर जिन्दा करँगा। 45 नवियाँ के लेखां म्ह यो लिख्या सै: “वे सारे परमेसवर की ओड़ तै सिखाए होए होवैगें।” जिस किसे नै पिता तै सुण्या अर सिख्या सै, वो मेरै धोरै आवै सै। 46 किसे नै पिता ताहीं कोनी देख्या, सिवाए उसके, जो परमेसवर की ओड़ तै सै, सिर्फ उससे नै पिता ताहीं देख्या सै। 47 मै थारैताहीं साच्ची-साच कहूँ सूं के जो कोए बिश्वास करै सै, अनन्त जीवन उससे का सै। (aiōnios g166) 48 जीवन की रोटी मै सूं। 49 थारे पूर्वजां नै जंगल-बियाबान म्ह मन्ना खाया अर मरगे। 50 या वा रोटी सै जो सुर्ग तै उतरी सै, ताके माणस उस म्ह तै खावै अर ना मरै। 51 जीवन की रोटी जो सुर्ग तै उतरी सै, मै सूं। जै कोए इस रोटी म्ह तै खावै, तो सारी हाण जिन्दा रहवैगा, अर जो रोटी मै दुनिया कै जीवन खात्तर दियुँगा, वो मेरा माँस सै। (aiōn g165) 52 इसपै यहूदी न्यू कहकै आप्स म्ह बहस करण लागगे, “यो माणस किस ढाळ हमनै अपणा माँस खाण नै दे सके सै?” 53 यीशु नै उन ताहीं कहा, “मै थारैताहीं साच्ची-साच कहूँ सूं के जिब ताहीं थम मुझ माणस कै बेट्ठे का माँस ना खाओ, अर मेरा लहू ना पियो, थारे म्ह जीवन कोनी।” 54 जो मेरा माँस खावै अर मेरा लहू पीवै सै, अनन्त जीवन उससे का सै, अर आखरी के दिनां म्ह मै उसनै दुबारै जिन्दा कर दियुँगा। (aiōnios g166) 55 क्यूँकै मेरा माँस सच म्ह खाण की चीज सै, अर मेरा लहू सच अर मेरा लहू पीवै सै वो मेरे म्ह डट्या रहवै सै, अर मै उस म्ह। 57 जिसा जिन्दे पिता नै मेरैताहीं भेज्या सै, अर मै पिता कै कारण जिन्दा सूं उससे ढाल वो भी जो मन्नै खावैगा मेरै कारण जिन्दा रहवैगा। 58 जो रोटी सुर्ग तै उतरी सै याए सै, उस रोटी बरगी कोनी जो पूर्वजां नै खाई अर मरगे, जो कोए या रोटी खावैगा, वो सदा ताहीं जिन्दा रहवैगा।” (aiōn g165) 59 ये बात उसनै कफरनहूम नगर कै एक आराधनालाल्य म्ह उपदेश देन्दे बखत कही। 60 उसके चेल्यां म्ह तै घणखरा नै या सुणकै

कह्या, “या सख्त शिक्षा सै, इसने कौण सुण सकै सै?” 61 यीशु नै अपणे मन म्ह न्यू जाणके के मेरे चेल्लें आप्स म्ह इस बात पै बिरडावै सै, उन ताहीं बुझ्याया, “के इस बात तै थारे ताहीं ठेस लागै सै?” 62 जै थम मुझ माणस कै बेटै नै जडै मै पै वेहल्या था, ओडेँ उपर जान्दे देक्खोगे, तो के होगा? 63 आत्मा ए सै जो देह नै जीवन देवै सै, देह का कोए महत्व कोनी, जो वचन मन्नै थारैतै कह्यै सै, वे आत्मा सै, अर जीवन भी। 64 पर थारे म्ह तै किमे इसे सै जो बिश्वास कोनी करदे। क्यूँके यीशु पैहल्या तै ए जागै था के जो बिश्वास न्ही करदे, वे कौण सै, अर कौण मेरै ताहीं पकड़वावैगा। 65 अर वो बोल्या, “ज्यातै मन्नै थारे ताहीं कह्या था के जिब ताहीं किसे नै पिता की ओङडै तै यो वरदान ना मिलै तब ताहीं वो मेरै धोरै कोनी आ सकदा।” 66 इसपै उसके चेल्यां म्ह तै घण्खेरे उल्टे हटोगे अर उसके बाद उसके गेल्या कोनी चाल्ले। 67 फेर यीशु नै उन बारहां चेल्यां तै कह्या, “के थम भी चले जाणां चाहो सै?” 68 शमैन पतरस नै उस ताहीं जवाब दिया, “हे प्रभु, हम किसके धोरै जावां? अनन्त जीवन की बात तो तेरै धोरै सै, (aiōnios g166) 69 अर हमनै बिश्वास करया अर जाणगे सै के परमेसवर का पवित्र जन तूए सै।” 70 यीशु नै उन ताहीं जवाब दिया, “के मन्नै थम बारहां चेल्यां ताहीं कोन्या छाट्या? फेरभी थारे म्ह तै एक जन शैतान सै।” 71 यो उसनै शमैन इस्करियोती के बेटै यहूदा कै बारै म्ह कह्या था, क्यूँके वोए जो बारहां चेल्यां म्ह तै एक था, उस ताहीं पकड़वाण म्ह था।

7 इन बातां कै हो लेण कै पाच्छै यीशु गलील परदेस म्ह सफर करण लाग्या, वो यहूदिया परदेस म्ह जाणा कोनी चाहवै था, क्यूँके यहूदी लोग उस ताहीं मारण की ताक म्ह थे। 2 यहूदियाँ का झोपड़ियाँ का त्यौहार लोवै था। 3 ज्यातै उसके भाईयां नै उस ताहीं कह्या, “याडै तै यहूदिया परदेस नै जा, ताके जो काम तू करै सै उननै तेरे चेल्लें ओङडै भी देक्खै। 4 क्यूँके इसा कोए न्ही होगा जो मशहुर होणा चाहवै, अर लुट्क कै काम करै। जै तूयो काम करै सै, तो खुद नै दुनिया म्ह साबित करा।” 5 क्यूँके उसके भाई भी उसपै बिश्वास कोनी करै थे। 6 फेर यीशु नै उनतै कह्या, “मेरे खात्तर इब्बै सही बखत कोनी आया, पर थारे खात्तर सारा बखत सही सै।” 7 दुनिया थारे तै बैर कोनी कर सकदी, पर वा मेरै तै बैर करै सै क्यूँके मै उसके बिरोध म्ह या गवाही दियुँ सूँ कै उसके काम भुडे सै। 8 थम त्यौहार म्ह जाओ, मै इब्बै इस त्यौहार म्ह कोनी जान्दा, क्यूँके इब्बै मेरा सही बखत कोनी आया।” 9 वो उननै ये बात कहकै गलील परदेस म्ह रहण्या। 10 पर जिब उसके भाई त्यौहार म्ह जा लिए तो वो खुद भी, जाहिर म्ह न्ही पर मानो गुप्ती तै गया। 11 त्यौहार म्ह कुछ यहूदी लोग यीशु ताहीं टोहन्दे होए पूछताळ करण लागरे थे, “के वो कडै सै?” 12 फेर भी यीशु के बारें म्ह बडी बहस होण लागरी थी, कई माणस कहवै थे, “के वो भला माणस सै।” अर कईयाँ का कहणा था, “के ना, वो माणसां नै बहकावै सै।” 13 फेर भी यहूदियाँ कै डरकै मरे कोए भी माणस यीशु कै बारै म्ह खुलकै कोनी बोल्लै था। 14 जिब त्यौहार के आध्ये दिन बीतगे, फेर यीशु मन्दर म्ह जाकै उपदेश देण

लाग्या। 15 फेर यहूदियाँ नै हैरान होकै कह्या, “इसनै बिना पढे ज्ञान किस तरियां आ ग्या?” 16 यीशु नै उन ताहीं जवाब दिया, “जो उपदेश मै देकै सूँ मेरा अपणा कोनी, पर उसतै आवै सै जिसनै मेरे ताहीं भेज्या सै।” 17 जै कोए माणस उसकी मर्जी पै चाल्लण का प्रण करै, तो उस ताहीं यो बेरा लाग जग्या, के यो उपदेश परमेसवर की ओङडै तै सै, या मै अपणी ओङडै देकै सूँ। 18 जो अपणी ओङडै तै कुछ कहवै सै, वो खुद की बडाई चाहवै सै, पर जो अपणे भेजण आळे की बडाई चाहवै सै वोए साच्चा सै, अर उस म्ह अर्थम कोनी। 19 के मूसा नबी नै थारैताहीं नियम-कायदे कोनी दियेये? फेरभी थारैम्ह तै कोए नियम-कायदा पै कोनी चाल्दा। थम मन्नै क्यातै मारणा चाहो सो?” 20 माणसां नै जवाब दिया, “तेरे म्ह ओपरी आत्मा सै! कौण तन्नै मारणा चाहवै सै?” 21 यीशु नै उन ताहीं जवाब दिया, “मन्नै आराम कै दिन एक चमत्कार करया, अर थम सारे छो म्ह होगे। 22 इस्से खात्तर मूसा नबी नै थारैताहीं खतने का नियम दिया था (यो नियम मूसा नबी का न्ही था बल्के या थारे पूर्वजां तै ए लाग लागरी सै) अर थम आराम कै दिन माणस का खतना करो सो। 23 जिब आराम कै दिन माणस का खतना करया जावै सै ताके मूसा नबी कै नियम-कायदा का हुक्म न्ही टळै। फेर थम मेरै पै क्यातै छो करो सो के मन्नै आराम कै दिन एक माणस ताहीं पूरी तरियां ठीक करया। 24 मुँह देख्या न्याय मतना करो, पर सही-सही न्याय करो।” 25 फेर यहुश्लेम म्ह रहण आळे माणसां म्ह तै कईयाँ नै कह्या, “के यो वोए कोनी जिस ताहीं यहूदी अगुवां मार देणा चाहवै सै?” 26 पर लखाओ, “वो तो सरेआम बात करै सै अर कोए उसतै किमे कोनी कहन्दा। के यो न्ही हो सकता के यहूदी अगुवां नै साच्यो बेरा पाटग्या सै, के योए मसीह सै? 27 इसकै बारै म्ह हमनै बेरा सै यो कितका सै, पर मसीह जिब आवैगा तो कोए कोनी जाणै के वो कितका सै।” 28 फेर यीशु नै मन्दर म्ह उपदेश देन्दे होए रुक्का मारकै कह्या, “थम मन्नै जाणो सो, अर न्यू भी जाणो सो के मै कित्त तै आया सूँ। मै तो खुद कोनी आया, पर मेरा भेजण आळा साच्चा सै, उसनै थम कोनी जाण्दे।” 29 पर मै उसनै जाणु सूँ, क्यूँके मै उसके कान्ही तै आया सूँ, अर उस्से नै मेरै ताहीं भेज्या सै।” 30 यो सुणकै यहूदी अगुवां नै यीशु ताहीं पकड़णा चाह्या, फेरभी किसे नै उसकै हाथ कोनी लाया, क्यूँके उसके मरण का सही बखत इब्बै कोनी आया था। 31 फेर भी भीड़ म्ह तै घण्खरे माणसां नै उसपै बिश्वास करया, अर बोल्ले, “मसीह जिब आवैगा तो के इसतै घणे अचम्पे के काम दिखावैगा जो इसनै दिखाए?” 32 फरीसियाँ नै भीड़ म्ह माणस ताहीं यीशु के बारें म्ह चुपके-चुपके बात करते सुण्या, तो प्रथान याजक अर फरीसियाँ नै यीशु ताहीं पकड़ण खात्तर मन्दर के सिपाहियाँ ताहीं भेज्या। 33 मसीह यीशु बोल्या, “मै थोडी बार ताहीं थारे गेल्या सूँ, फेर अपणे भेजण आळे धोरै उल्टा चल्या जाऊँगा।” 34 थम मन्नै टोहांगे, पर कोनी पाओगे, अर जडै मै सूँ, ओङडै थम कोनी आ सकदे।” 35 इसपै यहूदी अगुवां नै आप्स म्ह कह्या, “यो कित्त जावैगा, के हम इसनै कोनी टोहै सकदे? के यो जो यूनानी परदेशियाँ म्ह तै बसणा

नहीं चाहन्दा, ताके यूनानियाँ ताहीं भी उपदेश दें? 36 इसकी इस बात का के मतलब सै? जो उसनै बोल्ली सै, के थम मन्नै टोहओगे, पर कोनी पाओगे, अर जड़ै मै सू, ओड़ै थम न्हीं आ सकदे।” 37 त्यौहार कै आखरी दिन, जो खास दिन सै, यीशु खड़ा होया अर रुक्का मारकै कह्या, “जै कोए तिसाया हो तो मेरे धोरे आवै अर पीवै।” 38 जो कोए मेरे पै बिश्वास करैगा, जिसा पवित्र ग्रन्थ म्ह लिख्या सै, ‘उसकी अंतरआत्मा म्ह तै जीवन कै जल की नदियाँ बह लिकड़ेंगी, जो अनन्त जिन्दी देवै सै।’” 39 यीशु नै यो वचन पवित्र आत्मा कै बारै म्ह कह्या, जो बिश्वास करण आळा नै मिलण आळी थी, क्यूँकै इब ताहीं पवित्र आत्मा कोनी उतरया था, क्यूँकै यीशु इब ताहीं अपणी महिमा म्ह कोनी पोंच्याथा। 40 फेर भीड़ म्ह तै कईयाँ नै या बात सुणकै कह्या, “साच्ये योए वो नबी सै, जिसके आण की हम आस देक्खाए थे।” 41 अर कईयाँ नै कह्या, “यो मसीह सै” पर कई बोल्ले, “मसीह गलील परदेस तै तो न्हीं आवैगा?” 42 पवित्र ग्रन्थ यो कहवै सै, के मसीह दाऊद की पाढ़ी तै अर बैतलहम नगर तै आवैगा, जड़ै दाऊद रहवै था? 43 आखर म्ह उसकै कारण माणसां म्ह फूट पड़ी। 44 उन म्ह तै कई उसकै हाथ कोनी लाया। 45 फेर सिपाही, प्रधान याजकां अर फरीसियाँ कै धोरे बोहड़ आए, उननै उन ताहीं कह्या, “थम उसनै क्यातै न्हीं ल्याए?” 46 सिपाहियाँ नै जवाब दिया, “इसी बात बताण आळा माणस हमनै आज ताहीं कदे भी कोनी मिल्या।” 47 फरीसियाँ नै उन ताहीं जवाब दिया, “के थम भी भलोई म्ह आगै? 48 के सरदारां या फरीसियाँ म्ह तै किसे नै भी उसपै बिश्वास करया सै? 49 पर ये माणस जो मूसा नबी के नियम-कायदे कोनी जाणदे, परमेसवर की ओड़ै तै सरापित सै।” 50 नीकुदेमुस जो उन म्ह तै एक था, वो मसीह यीशु तै पैहल्या मिल चुका था, उन ताहीं बोल्या, 51 “के म्हरे नियम-कायदे किसे माणस नै, जिब ताहीं पैहल्या उसकी सुणकै जाण ना लेवै, के वो के करै सै, कसूरावर मानै सै?” 52 उननै नीकुदेमुस ताहीं जवाब दिया, “तू भी गलील परदेस का सै? पवित्र ग्रन्थ म्ह ढूँढ़ अर देख के गलील परदेस तै कोए नबी कोनी आवै।” 53 फेर सारे अपणे-अपणे घरां चले गए।

8 यीशु अपणे चेल्यां कै गैल जैतून कै पहाड़ पै गया। 2 तळैकै आगले दिन यीशु फेर मन्दर म्ह आया। भोत सारे माणस उसकै धोरे आए अर वो बैठकै उननै उपदेश देण लाग्या। 3 जिब वो बोलण लागरया था, तो जिब्बे शास्त्री अर फरीसी एक बिरबान्नी नै ल्याए, जो जारी करते होए रंगे हाथ पकड़ी गयी थी, अर उस ताहीं माणसां के स्यामी खड़ा कर दिया, अर यीशु ताहीं कह्या, 4 “हे गुरु, या बिरबान्नी जारी कर दी रंगे हाथ पकड़ी गयी सै। 5 मूसा नबी के नियम-कायदा म्ह उसनै म्हरे ताहीं हुक्म दिया सै, के इसी बिरबान्नी नै पत्थर बरसा कै मार द्यो। पर तू इस बिरबान्नी कै बारै म्ह के कहवै सै?” 6 उननै यीशु ताहीं परखण खात्तर या बात कही, ताके उस म्ह खोट लिकाइण का कोए सुराग मिलै जावै। पर यीशु कोड़ू होकै आनाळी तै धरती पै लिखण लाग्या। 7

जिब वे बार-बार उसतै सवाल करते रहे, तो फेर उसनै सीधा होकै उन ताहीं कह्या, “थारे म्ह जिसनै भी कोए पाप न्हीं करया हो, वो ए उसकै सबतै पैहला पत्थर मारै।” 8 फेर यीशु कोड़ू होकै आनाळी तै धरती पै लिक्खण लाग्या। 9 जिब माणसां नै यो सुण्या तो सबतै पैहले बूढ़े माणस अर फेर एक-एक करकै ओड़ै तै खिसकण लागे, क्यूँकै वे सब जाणै थे, के हम सब पापी सां, अर सिफ यीशु अर वा बिरबान्नी ओड़ै रहगे। 10 यीशु खड़ा होया अर उस बिरबान्नी ताहीं कह्या, “हे नारी, वे कित गए? के किस्से नै तेरे ताहीं दण्ड न्हीं दिया?” 11 वा बोल्ली, “हे प्रभु, किसे नै न्हीं।” यीशु बोल्या, “मै भी तेरे ताहीं दण्ड न्हीं देऊँगा, जा, अर दुबारा कदे पाप ना करिए।” 12 मन्दर म्ह अपणे उपदेश नै दुबारै शरु करदे होए यीशु नै माणसां तै कह्या, “दुनिया का चाँदणा मै सू, जो कोए मेरे पाछै चाल्लैगा, वो अन्धैरै म्ह कदे कोनी चाल्लैगा, पर वो चाँदणा पावैगा जो अनन्त जीवन देवै सै।” 13 फरीसियाँ नै उस ताहीं कह्या, “तू अपणी गवाही खुद देवै सै, इस खात्तर तेरी गवाही साच्यी कोनी।” 14 यीशु नै उन ताहीं जवाब दिया, “भलाए मै अपणी गवाही खुद देऊँ सू, फेर भी मेरी गवाही मान्नी जावैगी, क्यूँकै मै जाणु सू, के मै कित्त तै आया सू, अर कितोड़ जाऊँ सू? पर थम कोनी जाणदे के मै कित्त तै आऊँ सू, या कितोड़ जाऊँ सू।” 15 थम मानवीय सोच तै, न्याय करो सो, मै किसे का न्याय कोनी करदा। 16 जै मै न्याय करै भी तो वो सही ए होगा, क्यूँकै मै एकला कोनी, पर परम पिता, जिसनै मेरे ताहीं भेज्या सै, वो अर मै दोनु मिलकै न्याय करा सां। 17 थारे मूसा नबी के नियम-कायदा म्ह भी लिख्या सै, के दो जणां की गवाही सच के रूप म्ह मान्नी जा सकै सै। 18 एक तो मै खुद अपणी गवाही दियुँ सू, अर दुसरा मेरा पिता मेरी गवाही देवै सै, जिसनै मेरेताही भेज्या।” 19 उननै उस ताहीं कह्या, “तेरा पिता कित तै सै?” यीशु नै जवाब दिया, “ना थम मन्नै जाणो सो, ना मेरै पिता नै, जै मन्नै जाणदे तै मेरै पिता नै भी जाणदे।” 20 यीशु नै ये वचन मन्दर म्ह उपदेश देन्दे होए भण्डार घर म्ह बोल्ली, अर किसे नै उस ताहीं कोनी पकड़ा, क्यूँकै उसके दुख ठाण का अर मरण का बखत इब ताहीं कोनी आया था। 21 यीशु नै फेर उन ताहीं कह्या, “मै जाऊँ सू, अर थम मन्नै टोहओगे, अर अपणे पाप म्ह मरोगे। जड़ै मै जाऊँ सू, ओड़ै थम न्हीं आ सकदे।” 22 इसपै यहूदी अगुवां नै कह्या, “के वो खुद नै मार देवैगा, जो कहवै सै, ‘जड़ै मै जाऊँ सू, ओड़ै थम न्हीं आ सकदे?’” 23 यीशु नै उन ताहीं कह्या, “थम इस दुनिया म्ह पैदा होए सों, अर मै सुर्ग तै आया सू। थम इस दुनिया के सो, मै इस दुनिया का कोनी।” 24 ज्यातै मन्नै थारे ताहीं कह्या के थम अपणे पापां म्ह मरोगे, जै थारा मेरे म्ह बिश्वास कोनी के मै कौण सू, तो थम मरोगे, अर थरे पाप माफ कोनी होंगे।” 25 यहूदी अगुवां नै यीशु ताहीं कह्या, “के तू कौण सै?” वो उनतै बोल्या, जिब तै मन्नै प्रचार करणा शरु करया सै, तब तै मै थमनै कहन्दा आया सू, “के मै कौण सू?” 26 “थारे बारै म्ह कहण खात्तर अर फैसला करण खात्तर मेरे धोरे भोत कुछ सै, पर सच्चाई याए सै के जिसनै मेरे ताहीं भेज्या सै, मै वोए कहूँ सू, जो

मन्नै उसतै सुण्या सै, वोए दुनिया के माणसां तै कहूँ सूँ।” 27 वे न्यू न्ही समझै के म्हारै तै, पिता कै बारै म्ह कहवै सै। 28 फेर यीशु बोल्या, “जिब थम मुझ माणस कै बेटै नै ॐचे पै चढाओगे, जिब जाणोगे के मै वोए सूँ। मै खुद तै किमे कोनी करदा, पर जिस तरियां मेरै पिता तै, मेरै ताहीं सिखाया सै, उसरे ढाल ये बात कहूँ सूँ।” 29 मेरा भेजण आळा मेरै गेल्या सै, उसनै मेरैताहीं एक्ला कोनी छोड़या क्यूँके मै सारी हाण वैए काम करूँ सूँ, जिसतै वो राजी होवै सै।” 30 वो ये बात कहणे लागरया था, के घणाख्यरयां नै उसपै बिश्वास करया। 31 फेर पीशु नै उन यहूदियाँ तै जिन नै उसपै बिश्वास करया था, बोल्या, “जै थम मेरै वचन म्ह बणे रहोगे, तो साच-ए मेरे चेल्ले ठहरोगे।” 32 थम सच नै जाणोगे अर सच थमनै आजाद करैगा। 33 उनै उस ताहीं जवाब दिया, “हम तो अब्राहम के वंशज सा, कदे किसे के गुलाम कोनी बणे। फेर तू किस तरियां कहवै सै, के थम आजाद हो जाओगे?” 34 यीशु नै उन ताहीं जवाब दिया, “मै थारैतै साच्ची-साच कहूँ सूँ, के जो कोए पाप करै सै, वो पाप का गुलाम सै।” 35 गुलाम सारी हाण घर म्ह कोनी रहन्दा, बेट्टा सारी हाण घरां रहवै सै। (aiōn g165) 36 ज्यांतै जै बेट्टा थमनै आजाद करैगा, तो साच्ये थम आजाद हो जाओगे। 37 मै जाणूँ सूँ, के थम अब्राहम के वंश के सो, फेर भी थम मेरै वचनां नै कोनी मानते, ज्यांतै थम मन्नै मारणा चाहो सो। 38 मै वोए कहूँ सूँ, जो मेरे पिता नै मेरे ताहीं दिखाया सै, अर थम वोए करो सो, जो थमनै अपणे पिता तै सुण्या सै।” 39 उनै उस ताहीं जवाब दिया, “म्हारा पूर्वज तो अब्राहम सै।” यीशु उनै बोल्या, “जै थम अब्राहम के वंशज होन्दे, तो अब्राहम जिसे काम करदे।” 40 पर इब थम मेरै ताहीं मारणा चाहो सो, जिसनै थारे ताहीं वो साच्चा वचन बताया जो परमेसवर तै सुण्या, इस तरियां तो अब्राहम नै कोनी करया था। 41 थम अपणे पिता कै जिसे काम करो सो।” उनै यीशु ताहीं कह्या, “हम जारी तै कोनी जणे, म्हारा एक ए पिता सै यानिके परमेसवर।” 42 यीशु उनै बोल्या, “जै परमेसवर थारा पिता होन्दा, तो थम मेरै तै प्यार करदे, क्यूँके मै परमेसवर की ओड़ तै आया सूँ। मै खुद कोनी आया, पर उसरे नै मेरै ताहीं भेज्या।” 43 थम मेरी बात क्यांतै न्ही समझदे? ज्यांतै के थम मेरै वचनां नै अपणादे कोनी। 44 थम अपणे पिता शैतान की ओड़ तै सो, अर अपणे पिता की मर्जी पूरी करणा चाहो सो। वो तो शर तै ए खून्ही सै, अर सच पै टिक्या ए कोनी रहया, क्यूँके सच उस म्ह सै ए कोनी। जिब वो झूठ बोल्लै सै, तो अपणे सुभाव तै ए बोल्लै सै, क्यूँके वो झूठा सै बल्के झूठ का बाप सै। 45 पर मै जो सच बोल्लूँ सूँ, इस्से करके थम मेरा बिश्वास कोनी करदे। 46 थारे म्ह तै कौण मन्नै पापी ठैहरावै सै? जै मै सच बोल्लूँ सूँ, तो थम मेरा बिश्वास क्यांतै न्ही करदे? 47 जो परमेसवर कान्ही तै होवै सै, वो परमेसवर की बात सुणै सै, अर थम ज्यांतै कोनी सुणदे के परमेसवर की ओड़ तै कोनी सो।” 48 न्यू सुण यहूदियाँ नै उस ताहीं कह्या, “के हम ठीक कोनी कहन्दे के तू सामरी सै, अर तेरे म्ह भुन्डी ओपरी आत्मा सै?” 49 यीशु नै जवाब दिया, “मेरै म्ह भुन्डी ओपरी आत्मा कोनी,” पर मै अपणे बाप की

इज्जत करूँ सूँ, अर थम मेरी बेजती करो सो। 50 पर मै अपणा मान-सम्मान कोनी चाहन्दा, हाँ, एक सै जो चाहवै सै, अर न्याय करण आळा सै। 51 मै थमनै साच्ची-साच कहूँ सूँ, “के जै कोए माणस मेरे वचनां नै मान्नैगा, तो वो अनन्त काल ताहीं कोनी मरै।” (aiōn g165) 52 यहूदियाँ नै उस ताहीं कह्या, “इब हम जाणगे के तेरे म्ह भुन्डी ओपरी आत्मा सै। अब्राहम मरग्या अर नबी भी मरग्ये सै, अर तू कहवै सै, “जै कोए मेरे वचनां नै मान्नैगा, तो वो अनन्त काल ताहीं कोनी मरै।” (aiōn g165) 53 म्हारा पूर्वज अब्राहम तो मरग्या। के तू उसतै भी बड़ा सै? अर नबी भी मरग्ये। तू अपणे-आपनै के मान्नै सै?” 54 यीशु नै जवाब दिया, “जै मै खुद अपणी महिमा करूँ, तो मेरी महिमा किमे कोनी। पर मेरी महिमा करण आळा मेरा पिता सै, जिसनै थम कहो सो के वो थारा परमेसवर सै।” 55 थमनै तो उस ताहीं कोनी जाण्या, पर मै उस ताहीं जाणु सूँ। जै मै कहूँ के मै उस ताहीं कोनी जाण्दा, तो मै थारी ढाळ झूटा ठहरूँगा, पर मै उस ताहीं जाणु अर उसके वचनां नै मान्नू सूँ। 56 थारा पूर्वज अब्राहम मेरा दिन देक्खण की आस म्ह घणा मगन था, अर उसनै देख्या अर आनन्द करया।” 57 यहूदियाँ नै उस ताहीं कह्या, “इब ताहीं तू पचास साल का कोनी, फेरभी तनै अब्राहम ताहीं देख्या सै?” 58 यीशु उनै बोल्या, “मै थमनै साच्ची-साच कहूँ सूँ, के पैहल्या इसकै के अब्राहम पैदा होया, मै सूँ।” 59 या बात सुणकै माणसां नै यीशु ताहीं मारण खातर पथर ठाए, पर यीशु लुक्कै मन्दर तै लिकड़ ग्या।

9 ओड़ तै जान्दे होए राह म्ह एक यीशु ताहीं जन्म तै आन्था एक माणस मिला। 2 उसके चेल्यां नै उसतै बुझ्याया, “हे गुरु, किसनै पाप करया था के यो आन्था पैदा होया, इस माणस नै या इसकै माँ-बाप नै?” 3 यीशु नै जवाब दिया, “ना तो इसनै पाप करया था, ना इसके माँ-बाप नै पाप करया, पर यो ज्यांतै आन्था पैदा होया ताके परमेसवर की शक्ति दिखाई जा सकै। 4 जिसनै मेरै ताहीं भेज्या सै, हमनै उसके काम दिन-ए-दिन म्ह करणा जरूरी सै। वा रात आण आळी सै, जिस म्ह कोए माणस काम न्ही कर पावैगा। 5 जिब ताहीं मै दुनिया म्ह सूँ, जद ताहीं दुनिया का चान्दणा सूँ।” 6 न्यू कहकै यीशु नै धरती पै थुक्या, अर उस थूक तै माटी का लेप बणाया, अर उस लेप ताहीं आँखे की आँखां पै लगाकै। 7 उसतै बोल्या, “जा,” “शीलोह कै कुण्ड म्ह” (शीलोह का मतलब भेज्या होया सै)। उसनै जाकै अपणा मुँह धोया, अर जिब वो बोहड़ा तै उसनै दिक्खण लाग्या। 8 फेर भिखारी के पडोसी अर उन माणसां नै जिननै उस ताहीं पैहल्या भीख माँदे देख्या था, एक-दुसरे तै कहण लागे, “के यो वोए न्ही सै, जो बेठ्या भीख माँग्या करै था?” 9 कई माणस बोल्ले, “यो वोए सै,” दुसरे बोल्ले, “कोनी, पर उसकै जिसा सै।” उसनै कह्या, “मै वोए सूँ।” 10 फेर वे उसतै बुझ्याण लागे, “तेरी आँखां की रोशनी किस तरियां आगी?” 11 उसनै जवाब दिया, “यीशु नामक एक माणस नै माटी का लेप बणाया, अर मेरी आँखां पै लाकै मेरै ताहीं बोल्या, ‘जा, शीलोह म्ह जाकै अपणा मुँह धो ले,’ बस फेर के था मै गया अर अपणा मुँह धोया अर देक्खण लाग्या।” 12 उनै उसतै

बुद्धिया, “वो माणस कित्त सै?” वो बोल्या, “मैं कोनी जाएँदा।” 13 माणस उसनै जो आन्था था फरीसियाँ कै धेरै ले आए। 14 जिस दिन यीशु नै माटी लगाकै उसकी आँख खोल्ली थी, वो आराम का दिन था। 15 फेर फरीसियाँ नै भी उनतै बुद्धिया के उसकी आँखां की रोशनी किस ढाल मिली। उसनै उन ताहीं कह्या, “उसनै मेरी आँखां पै माटी लाई, फेर मन्नै अपणा मुँह थो लिया, अर इब देक्खूँ सूँ।” 16 इसपै कई फरीसी कहण लागे, “यो माणस परमेसवर की ओड़ तै कोनी, क्यूँके वो आराम कै दिन नै कोनी मान्दा।” दुसरे बोल्ले, “पापी माणस इसे अचम्भे के काम किस ढाल दिखा सकै सै?” आखर म्ह उन म्ह फूट पड़गी। 17 उननै उस आंधे तै फेर कह्या, “जिस माणस नै तेरे ताहीं आँखां की रोशनी दी सै। तू उसकै बारै म्ह के कहणा चाहवै सै?” उसनै कह्या, “वो नबी सै।” 18 पर यहूदी अगुवां नै बिश्वास कोनी होया, के वो आन्था था, अर इब वो देक्खै सै, इस खात्तर उननै उसके माँ-बाप ताहीं बुलाया। 19 अर उनतै बुद्धिया, “के यो थारा बेट्टा सै, जिसके बारे मै थम कहों सौं, के वो जन्म तै आन्था था? फेर इब वो किस तरिया देक्खै सै?” 20 उसके माँ-बाप नै जवाब दिया, “हाँ, या तो जाणा सा के यो म्हारा बेट्टा सै, अर या भी के यो आन्था जन्मा था, 21 पर न्यू कोनी जाणदे, के इब यो किस तरिया देक्खण लाग्या, अर ना न्यू जाणदे के किसनै इसकी आँखां की रोशनी दी सै। वो बाल्क कोनी सै, उससे तै बुझल्यो, वो अपणे बारै म्ह खुद ए बतावैगा।” 22 ये बात उसके माँ-बाप नै ज्यातै कहीं क्यूँके वे यहूदी अगुवां तै डरै थे, क्यूँके यहूदी अगुवां नै एक्का कर लिया था, के जै कोए कहवै के वो मसीह सै, तो उस ताहीं आराधनालय म्ह तै लिकाड़ दिया जावैगा। 23 इस्से कारण उसके माँ-बाप नै कह्या, “वो बाल्क कोनी, उससे तै बुझल्यो।” 24 फेर यहूदी अगुवां नै उस माणस ताहीं जो आन्था था, दुसरी बर बुलाकै उसतै कह्या, “सच बता अर जो ठू ठीक होया सै, तो तू सच बोलैकै परमेसवर की महिमा कर, हम जाणां सां के वो माणस पापी सै।” 25 उसनै जवाब दिया, “मैं नहीं जाणदा, के वो पापी सै के नहीं, मैं एक बात जाणु सूँ, के मै आन्था था अर इब देक्खूँ सूँ।” 26 उननै उस ताहीं फेर दुबारै कह्या, “उसनै तेरे गेल्या के करया? अर किस ढाल तेरी आँखां की रोशनी आगी?” 27 उसनै उन ताहीं कह्या, “मन्नै तो थारे ताहीं पैहले भी बता दिया, पर थम उस बात नै सुणते कोनी, इब दुसरी बर क्यांते सुणणा चाहवो सो? के थम भी उसके चेल्लें बणाणा चाहवो सो?” 28 फेर वे उसतै आच्छा-भुड़ा कहकै बोल्ले, “तूँ ए उसका चेल्ला सै, हम तो मूसा नबी के चेल्ले सौं। 29 हम जाणा सां, के परमेसवर नै मूसा नबी तै बात करी, पर इस माणस नै कोनी जाणदे के कड़े तै आया सै।” 30 उसनै उन ताहीं जवाब दिया, “या तो अचम्भे की बात सै, के थम नहीं जाणदे के वो कित्त का सै, फेर भी उसनै मेरी आँखां की रोशनी दे दी। 31 हम जाणां सां, के परमेसवर पापियाँ की कोनी सुणदा, पर जै कोए परमेसवर का भगत हो अर उसकी मर्जी पै चालदा हो, तो वो उसकी जरुर सुणे सै। 32 दुनिया कै शरुआत तै यो कदे सुणनै म्ह कोनी आया, के किसे नै जन्म तै आन्थै

की आँखां की रोशनी दी हो। (aiōn g165) 33 जै यो माणस परमेसवर कै कान्ही तै न्हीं होन्दा, तो किमे भी कोनी कर सकदा।” 34 उननै उस ताहीं जवाब दिया, “तू तो जमाए पापां म्ह जन्मा सै, तू हमनै के सिखावै सै?” अर उननै उस ताहीं आराधनालय तै बाहरण लिकाड़ दिया। 35 यीशु नै सुण्या के उननै उस ताहीं बाहरण लिकाड़ दिया सै, अर जिब उसतै मिल्या तो बोल्या, “के तू परमेसवर कै बेटै पै बिश्वास करै सै?” 36 उसनै जवाब दिया, “हे जनाब, परमेसवर का बेट्टा कौण सै, के मै उसपै बिश्वास कँ?” 37 यीशु नै उस ताहीं देखा भी सै, अर जौ तेरे गेल्या बात करण लाग रह्या सै, वो मै ए सूँ।” 38 उसनै कह्या, “हे प्रभु, मै तेरे पै बिश्वास करूँ सूँ।” अर उस ताहीं मोथा पड़के प्रणाम करया। 39 फेर यीशु बोल्या, “मैं इस दुनिया म्ह न्याय खात्तर आया सूँ, ताके जो आंधे सै, वे देक्खै, अर जौ देक्खै सै, वे आंधे हो जावै।” 40 जो फरीसी उसकै गेल्या थे, उननै या बात सुणकै उस ताहीं कह्या, “के हम भी आंधे सां?” 41 यीशु नै उन ताहीं कह्या, “जै थम आन्धे होन्दे तो पापी कोनी होते, पर इब जिसा के थम कहो सो, के थम देक्खों सौं, तो सच म्ह थारा पाप माफ नहीं हो सकदा।”

10 यीशु नै कह्या,

“मै थारे ताहीं साच्ची-साच कहूँ सूँ के जो कोए भेड़ा के बाड़े म्ह दरबाजे तै न्हीं आन्दा, बल्के बाड़ा कूदैकै बड़ै सै, वो चोर अर डाकूँ सै। 2 पर जो दरबाजे तै भीत्तर बड़ै सै वो भेड़ां का पाली सै। 3 उस खात्तर द्वारपाल दरबाजा खोल देवै सै, अर भेड़ उसका बोल सुणै सै, अर वो अपणी उन भेड़ां नै नाम ले-लैकै बुलावै सै, अर बाड़ै तै बाहरण ले जावै सै। 4 जिब वो अपणी सारी भेड़ां नै बाहरण काढ लेवै सै, तो उनकै आगै-आगै चाल्लै सै, अर भेड़ उसके गैल-गैल हो ले सै, क्यूँके वे उसका बोल पिच्छाणै सै। 5 पर भेड़ बिगान्ने कै गेल्या कोनी चाल्लै, पर उसतै भाज्जैंगी, क्यूँके वे बिगान्ने का बोल कोनी पिच्छाणीदी।” 6 यीशु नै उन ताहीं यो उदाहरण देकै कह्या, पर वे कोनी समझे के वो उनतै के समझाणा चाहवै। 7 फेर यीशु नै उन ताहीं दुबारै कह्या, “मै थारेताहीं साच्ची-साच कहूँ सूँ, भेड़ां का दरबाजा मै सूँ। 8 जितने मेरै तै पैहल्या आए वे सारे चोर अर डाकूँ सै, पर मेरी भेड़ां नै उनकी एक नहीं सुणी। 9 दरबाजा मै सूँ, जै कोए मेरै भीत्तर बड़ै सै, तो वो उदाहर पावैगा, अर भीत्तर बाहर आण-जाण लाग ज्यागा अर खाण खात्तर खाणा पावैगा।” 10 चोर किसे और काम खात्तर कोनी पर सिफ़ चोरी करण अर घाट करण अर नुकसान करण नै आवै सै, मै ज्यातै आया के वे जिन्दगी पावै अर भोत-ए धणी पावै। 11 आच्छा पाली मै सूँ, आच्छा पाली भेड़ां कै खात्तर अपणी मर्जी तै जान देवै सै। 12 मजदूर जो ना पाली सै अर ना भेड़ां का मालिक सै, भेड़ियो नै आन्दे देखकै भेड़ां नै छोड़कै भाज जावै सै, अर भेड़िया उननै पकड़ै सै, अर उनपै हमला कै देवै सै। 13 वो ज्यातै भाज जावै सै क्यूँके वो मजदूर सै, उसनै भेड़ां की फिक्र कोनी। 14 “काम्ल चरवाहा मै सूँ, मै अपणी भेड़ां नै जाणु सूँ, अर मेरी भेड़ मन्नै जाणै सै। 15 जिस ढाल पिता मन्नै जाणै सै, अर मै पिता नै जाणु सूँ, अर मै अपणी भेड़ां खात्तर अपणी जान दियूँ

सं। 16 मेरी और भी भेड़ सै, जो इस बाढ़ की कोनी। मन्नै उन ताहिं भी ल्याणा जरूरी सै। वे मेरा बोल पिछाणौंगी, फेर एकैरे रेवड़ अर एकैरे पाली होगा। 17 पिता ज्यांतै मेरै तै प्यार करै सै, क्यूँके मै अपणी जान अपणी मर्जी तै दियुँ सूँ के उसने दुबारै ले लूँ। 18 कोए मेरी जान मेरै तै खोसदा कोनी, बल्के मै उसनै खुदे उसनै अपणी मर्जी तै दियुँ सूँ। मन्नै उसकै देण का भी हक सै, अर उस ताहिं दुबारा लेण का भी हक सै, यो हुकम मेरै पिता नै मेरै ताहिं दिया सै।” 19 इन बातां कै कारण यहूदियाँ मह दुबारै फूट पड़ी। 20 उन मह तै धणखरे माणस कहण लागे, “उस मह ओपरी आत्मा सै, अर वो बावला सै, उसकी क्यांतै सुणो सो?” 21 दुसरे माणसां नै कह्या, “ये वचन इसे माणस की न्ही हो सकदे, जिसमह ओपरी आत्मा हो। के ओपरी आत्मा आन्ध्यां नै आँखां की रोशनी दे सकै सै?” 22 यशश्वलेम नगर मह स्थापन का त्पौहार मनाया जारया था, अर जाऊं का मौसमथा। 23 यीशु मन्दर मह सुलैमान कै बराम्दा मह हान्डण लागरया था। 24 फेर यहूदियाँ नै उस ताहिं आ घेरया अर बुझ्या, “तू म्हारै मन नै कद ताहिं दुविधा मह गेरे राक्खैगा? जै तू मसीह सै, तो म्हारै तै साफ-साफ बता दे।” 25 यीशु नै उन ताहिं जवाब दिया, “मन्नै थारैतै कह दिया पर थम बिश्वास करदेए कोनी। जो काम मै अपणे पिता कै नाम तै करूँ सूँ, वैए मेरे गवाह सै, 26 पर थम ज्यांतै बिश्वास कोनी करदे क्यूँके थम मेरी भेड़ुं मह तै कोनी सो। 27 मेरी भेड़ मेरा बोल पिच्छाणै सै, मै उननै जाणु सूँ, अर वे मेरै पाच्छै-पाच्छै चाल्लै सै 28 अर मै उन ताहिं अनन्त जीवन दियुँ सूँ। वे कदे नाश कोनी होवैगीं, अर कोए उननै मेरै हाथ तै खोस न्ही सकदा। (aiōn g165, aiōnios g166)

29 मेरा पिता, जिसनै उन ताहिं मेरै तै दिया सै, सारया तै बड़ा सै, अर कोए उननै पिता कै हाथ्थां तै खोस कोनी सकदा। 30 मै अर पिता एक सां।” 31 यहूदियाँ नै यीशु पै मारण खात्तर दुबारा पत्थर ठा लिये। 32 इसपै यीशु नै उन ताहिं कह्या, “मन्नै थारै तै अपणे पिता की ओऽ तै धणे भले काम दिखाए सै, उन मह तै कौण सै काम खात्तर थम मेरै पै पत्थर मारणा चाहो सो?” 33 यहूदियाँ नै उस ताहिं जवाब दिया, “भले काम खात्तर हम तेरे पै पत्थर कोनी मारदे, पर परमेसवर की बुराई करण कै कारण, अर ज्यांतै के तू माणस होके खुद नै परमेसवर कहवै सै।” 34 यीशु नै उन ताहिं जवाब दिया, “के थारे मूसा नबी के नियम-कायदा मह कोनी लिख्या सै, ‘मन्नै कह्या, थम ईश्वर सो?’ 35 जै उसनै उन ताहिं ईश्वर कह्या, जिनकै धोरै परमेसवर का वचन पोंहच्या (अर पवित्र ग्रन्थ की बात झूठ न्ही हो सकदी), 36 तो जिस ताहिं पिता नै पवित्र ठहराकै दुनिया मह भेज्या सै, थम मेरे ताहिं कहो सो, ‘तू बुराई करै सै, ज्यांतै के मन्नै यो कह्या,’ ‘मै परमेसवर का बेटा सूँ?’ 37 जै मै अपणे पिता कै काम कोनी करदा, तो मेरा बिश्वास ना करो। 38 पर जै मै करूँ सूँ, तो चाहे मेरा बिश्वास ना भी करो, पर उन काम्मां का तो बिश्वास करो, ताके थम जाणो अर समझो के पिता मेरै मह सै अर मै पिता मह सूँ।” 39 फेर यहूदियाँ नै दुबारै उस ताहिं पकड़ण की कोशिश करी पर वो उनके हाथ्थां तै लिकड़ ग्या। 40 यीशु दुबारै यरदन नदी कै परली ओऽ उस

जगहां पै चल्या गया, जड़े यूहन्ना पैहल्या बपतिस्मा दिया करै था, अर वो ओड़ै रह्या। 41 धणखरे माणस उसकै धोरै आकै कहवै थे, “यूहन्ना नै तो कोए चमत्कार कोनी दिखाया, पर जो किमे यूहन्ना नै इसकै बारै मह कह्या था, वो सारा कुछ साच्ची था।” 42 अर ओऽ भोट-से माणसां नै यीशु पै बिश्वास करया।

11 लाजर नामका एक माणस बीमार था, जो बैतनिय्याह गाम का

था, अर उसकी दो भाण थी मरियम अर मार्था। 2 या वाए मरियम थी जिसनै बाद मह प्रभु पै खसबूदार तेल गेर कै उसके पायां ताहिं बाल्लं तै पुञ्जयां था, लाजर इस्से का भाई था जो बीमार था। 3 इस करकै उसकी भाणां नै यीशु ताहिं कुहवां भेज्या, “हे प्रभु, लखा, जिसतै तू प्यार करै सै, वो बीमार सै।” 4 न्यू सुणकै यीशु न्यू बोल्या, “या बीमारी मरण का कारण कोनी, पर परमेसवर की महिमा खात्तर सै, ताके उसकै जरिये परमेसवर कै बेटै की महिमा होवै।” 5 मार्था उसकी बेब्बे अर लाजर तै यीशु प्यार करै था। 6 पर जिब उसनै सुण्या के लाजर बीमार सै, तो जिस जगहां पै वो था, ओऽ दो दिन और रुक ग्या। 7 दो दिन बाद फेर उसनै चेल्यां ताहिं कह्या, “आओ, हम फेर यहूदिया परदेस मह चाल्लां।” 8 चेल्यां नै उस ताहिं कह्या, “हे गुरु, कुछ दिन पैहल्या तो यहूदी तेरे पै पत्थर बरसा कै तन्नै मारणा चाहवै थे, अर के तू फेर भी उड़ै ए जाणा चाहवै सै?” 9 यीशु नै जवाब दिया, “के दिन के बारह धन्टे कोनी होन्दे? जै कोए दिन मह चाल्लै तौ ठोक्कर कोनी खान्दा, क्यूँके वे इस दुनिया के उजालै नै देक्खै सै। 10 पर जै कोए रात मह चाल्लै तौ ठोक्कर खावै सै, क्यूँके उस मह उजाला कोनी!” 11 उसनै ये बात कही, अर इसके बाद उन ताहिं कहण लाग्या, “के म्हारा साथी लाजर सो ग्या सै, पर मै उसनै जगाण जाऊँ सूँ।” 12 फेर चेल्यां नै उस ताहिं कह्या, “हे प्रभु, जै वो सो ग्या सै तो वो ठीक हो ज्यागा।” 13 यीशु नै तो उसकी मौत कै बाबत कह्या था, पर उननै सोच्या के उसनै नीद तै सोण कै बाबत कह्या सै। 14 फेर यीशु नै उन ताहिं साफ-साफ कह दिया, “लाजर मर लिया सै, 15 यो थारे ए हित मह सै, के मै उड़े कोनी था, क्यूँके इब थम मेरै पै बिश्वास कर सकोगे, आओ, हम उसकै धोरै चाल्लां।” 16 फेर थोमा नै जो दिदुमुस कुहवै सै, अपणे गेल्या के चेल्यां ताहिं कह्या, “आओ, हम भी प्रभु कै गेल्या मरण नै चाल्लां।” 17 बैतनिय्याह गाम पोहचे पाच्छै यीशु नै न्यू बेरया पाट्या के लाजर नै कब्र मह धोरै चार दिन हो लिए सै। 18 बैतनिय्याह गाम यरशलेम कै धोरै कोए दो कोस की दूरी पै था, 19 धणखरे यहूदी माणस मार्था अर मरियम कै धोरै उसकै भाई की मौत कै बाबत दीलास्सा देण नै अरे थे। 20 जिब मार्था नै यीशु कै आण की खबर सुणी, तो मार्था उसतै मिलण खात्तर गई, पर मरियम घरा ए बेटी रही। 21 मार्था नै यीशु ताहिं कह्या, “हे प्रभु, जै तू आँड़े होंदा, तो मेरा भाई कदे न्ही मरदा। 22 अर इब भी मन्नै बेरा सै, जो कुछ तू परमेसवर तै माँगीगा, परमेसवर तन्नै देवीगा।” 23 यीशु नै उस ताहिं कह्या, “तेरा भाई जी ज्यागा।” 24 मार्था नै उस ताहिं कह्या, “मन्नै बेरा सै, के आखर के दिन मह पुनरुत्थान के बखत वो जी

ज्यागा।” 25 यीशु नै मार्था तै कहदा, “पुनरुत्थान अर जीवन मै ए सूं, जो कोए मेरै पै बिश्वास करैगा, वो जै मर भी जावै फेर भी जिवैगा, 26 अर जो कोए जीवै सै, अर वो मेरै पै बिश्वास करै सै, वो अनन्त काल ताहीं कोनी मरैगा। के तु इस बात पै बिश्वास करै सै।” (aiōn g165) 27 मार्था नै यीशु तै कहदा, “हाँ, हे प्रभु, मै बिश्वास करूं सूं के परमेस्वर का बेटृ मसीह जो दुनिया म्ह आण आळा था, वो तूए सै।” 28 न्यू कहकै मार्था चली गयी, अर अपणी बेब्बे मरियम ताहीं एक्ले म्ह बुलाकै चुपेतै कहदा, “गुरु याडैरै सै अर तन्नै बुलावै सै।” 29 न्यू सुण तिए मरियम जिब्बे उठकै थोरै आई। 30 यीशु इब्बे गाम तै बाहरे था, पर उस्से जगहां था जडै मार्था उसतै मिली थी। 31 फेर जो यहूदी माणस उसकै गेल्या घर म्ह थे अर उस ताहीं दीलास्सा देवै थे, न्यू देखकै के मरियम जिब्बे उठकै बारणै चली गयी सै, न्यू समझे के वा कब्र पै रोण नै जावै सै, तो उसकै पाच्छे हो लिये। 32 जिब मरियम उडै गई जडै यीशु था, तो उसनै देखदे उसकै पायां म्ह पड़कै कहदा, “हे प्रभु, जै तू आडै होन्दा फेर मेरा भाई कोनी मरदा।” 33 जिब यीशु नै जो यहूदी माणस उसकै गेल्या आये थे, रोन्दे होए देख्या, तो आत्मा म्ह घणाए दुखी अर उदास होग्या, 34 अर कहदा, “थमनै उसकी लाश कित्त थर राक्खी सै?” उन्नै उस ताहीं कहदा, “हे प्रभु, चालकै देख ले।” 35 यीशु रोण लाग्या। 36 फेर यहूदी माणस कहण लाग्ये, “लखाओ, वो लाजर तै कितना प्यार करै था।” 37 पर उन म्ह तै कईयाँ नै कहदा, “के यो जिसनै आध्याँ ताहीं रोशनी दे दी, के यो लाजर ताहीं मरण तै न्हीं बचा सकै था?” 38 यीशु मन म्हए फेर घणाए दुखी होकै कब्र पै आया। वा एक गुफा थी अर एक पत्थर उसपै धरया था। 39 यीशु नै कहदा, “पत्थर हटादो।” लाजर की बेब्बे मार्था उसतै कहण लाग्यी, “हे प्रभु, उस म्ह तै इब तो बदबू आवै सै, क्यूँकै उसनै मेरे चार दिन हो लिए सै।” 40 यीशु नै उन ताहीं कहदा, “के मन्नै तेरे तै कोनी कहदा था के जै तू बिश्वास करैगी, तो परमेस्वर की महिमा नै देक्खैगी।” 41 फेर उन्नै पत्थर ताहीं हटाया। यीशु नै सुर्ग कान्ही निगांह ठाकै कहदा, “हे पिता, मै तेरा धन्यवाद करूं सूं के तन्नै मेरी सुण ली सै। 42 अर मन्नै बेरा था के तू सारी हाण मेरी सुणै सै, पर जो भीड़ आसै-पासै खड़ी सै, उनकै बाबत मन्नै कहदा, ताके वे बिश्वास करै, के तन्नै मेरैताहीं भेज्या सै।” 43 न्यू कहकै ठाढू आवाज म्ह रुक्का मारया, “हे लाजर, लिकड आ।” 44 जो मर लिया था उसके हाथ पैर पट्टियाँ तै बंधे हुए थे, अर उसकै मुँह पै अंगोच्छा लिपरत्या था। यीशु नै उन ताहीं कहदा, “उसनै खोलदो अर जाण द्यो।” 45 फेर जो यहूदी मरियम थोरै मिलण आये थे, अर उसका यो चमत्कार देख्या था, उन म्ह तै घणखरयां नै उसपै बिश्वास करया। 46 पर उन म्ह तै कईयाँ नै फरीसियाँ थोरै जाकै यीशु के काम्मां की खबर दी। 47 ज्यांतै प्रथान याजकां अर फरीसियाँ नै यहूदी अगुवां की सभा करी, अर कहदा, “हमनै के करणा चाहियेये? यो माणस तो घणे चमत्कार दिखावै सै।” 48 जै हम उसनै न्यूए करण द्या, तो फेर सारे उसपै बिश्वास करैंगे, अर रोमी सैनिक आकै म्हरे देश अर मन्दर दोनुवां पै कब्जा कर लेवैंगे।” 49 फेर उन म्ह

तै काइफा नामका एक माणस नै जो उस साल का महायाजक था, उन ताहीं कहदा, “थम किमे न्हीं जाणदे।” 50 अर ना ए थमनै इस बात की समझ सै, के इस्से म्ह थारा फायदा सै, के बजाये इसके के सारे माणस ए नाश हो जावै, सब खात्तर एक आदमी नै मरणा होगा।” 51 पर या बात उसनै अपणी ओड़ तै कोन्ना कही, पर उस साल का महायाजक होण के नाते या भविष्यवाणी करी, के यीशु उस जात खात्तर मरैगा। 52 अर ना सिर्फ यहूदी जात खात्तर बल्के ज्यातै के परमेस्वर की खिंडि-मिंड ऊलादां नै एक कदे। 53 इस तरियां उसे दिन तै यहूदी अगुवें उस ताहीं मारण खात्तर साजिस रचाण लाग्ये। 54 ज्यांतै यीशु उस बखत तै यहूदी लोगां म्ह घाट दिक्खण लाग्या, अर यरुशलेम नगर नै छोड़कै वो जंगल-बियाबान कै थोरै इफ्राईम नामक एक नगर कान्ही चल्या गया, अर अपणे चेल्यां गैल उड़ैर रहण लाग्या। 55 यहूदियाँ का फसह का त्योहार लोवै था, अर घणेए माणस फसह तै पैहल्या अपणे गामां म्ह तै यरुशलेम नगर म्ह गए, के खुद नै पवित्र करै। 56 वे यीशु नै टोह़ लाग्ये अर मन्दर म्ह खड़े होकै आप्स म्ह बतलाण लाग्ये, “थम के सोच्चो सो? के वो त्योहार म्ह कोनी आवैगा?” 57 अर प्रथान याजकां अर फरीसियाँ नै हुक्म दे राख्या था, के जै कोए न्यू जाणै सै, के यीशु कित्त सै तो बतावै, ताके वे उसनै पकड़ ले।

12 फेर यीशु फसह का त्योहार तै छ: दिन पैहल्या बैतनिय्याह गाम म्ह आया जित्त लाजर था, जिस ताहीं यीशु नै मरया होड़ म्ह तै जिन्दा करया था। 2 उडै उन्नै यीशु कै खात्तर भोज तैयार करया, अर मार्था सेवा करण लागरी थी, अर लाजर भी उन म्ह तै एक था जो उसकै गेल्या खाणा खाण बेठे थे। 3 फेर मरियम नै जटामांसी फूल का आध्या सेरे घणा महँगा खसबूदार तेल लेकै यीशु के पायां पै गेरया, अर अपणे बाळां तै उसके पैर पुऱ्ये, अर खसबूदार तेल की खस्बू तै घर खसबूदार होग्या। 4 पर उसके चेल्यां म्ह तै यहूदा इस्करियोती नामका एक चेल्ला जो उस ताहीं पकड़वाणा चाहैवै था, कहण लाग्या, 5 “यो महँगा खसबूदार तेल तीन सौ दीनार (तीन सौ दिन की मजदूरी) म्ह बेचकै कंगालां ताहीं क्यातै कोनी दिया गया?” 6 उसनै या बात ज्यातै कोनी कही के उसनै कंगालां की फिक्र थी बल्के ज्यांतै के वो चोर था, अर उसकै थोरै पिस्या की थैल्ली रह्या करै थी अर उस म्ह जो कुछ गेरया जान्दा, वो काढ लेवै था। 7 यीशु नै कहदा, “उस ताहीं यो करण द्यो, यो मेरे गाड़े जाण की तैयारी कै खात्तर सै।” 8 क्यूँकै कंगाल तो थोरे गेल्या सारी हाण रहवेंगे, पर मेरे गेल्या सारी हाण कोनी रहेंगा।” 9 फसह का त्योहार म्ह आई यहूदियाँ की एक बड़ी भीड़ नै जिब बेरा लाग्या के वो बैतनिय्याह गाम म्ह सै, तो वे ना सिर्फ यीशु कै बाबत आये पर ज्यांतै भी के लाजर नै देक्खै, जिस ताहीं यीशु मसीह नै मरया होड़ म्ह तै जिन्दा करया था। 10 फेर प्रथान याजकां नै लाजर ताहीं भी मारण की सलाह करी। 11 क्यूँकै उसकै बाबत घणखरे यहूदी चले गये अर यीशु पै बिश्वास करया। 12 दुसरे दिन घणखरे माणसां नै जो फसह के त्योहार

म्ह आरे थे न्यू सुण्या, के यीशु यस्तलेम नगर म्ह आरया सै। 13 ज्यांतै उननै खजूर की डाळी ली, अर उसतै फेटूण नै लिकडे, अर रुक्के मारण लाग्ये, “होशाना! (मतलब जै-जै कार हो) धन्य इसाएल का राजा, जो प्रभु कै नाम तै आवै सै।” 14 जिब यीशु यस्तलेम नगर कै धोरै आया, तो उसनै एक गधे का बच्चा मिल्या, फेर वो उसपै बैठग्या, 15 जिसा पवित्र शास्त्र म्ह लिख्या सै, “हे सियोन की बेटी, मतना डरै, लखा, तेरा राजा गधी के बच्चे पै चढ़ा होड़ चाल्या आवै सै।” 16 यीशु के चेल्लें ये बात पैहल्या कोनी समझी थे, पर जिब यीशु की महिमा दिक्खी फेर उनकै याद आया के ये बात उसकै बाबत लिक्खी होड़ थी, अर माणसां नै उसकै गेल्या न्यू बरताव करया था। 17 फेर उसकै गैल जो भीड़ थी उननै या गवाही दी, जो उस बखत उसकै गेल्या थे, जिब उसनै लाजर ताहीं कब्र म्ह तै बुलाकै मरया होया म्ह तै जिन्दा करया था। 18 ज्यांतै माणस यीशु तै फेटूण नै आरे थे क्यूँके उननै सुण्या था के उसनै यो अचम्भे का काम करया था। 19 फेर फरीसियाँ नै आपस्स म्ह कह्या, “सोचकै तो देख्खो, के थारे तै कुछ भी कोनी बणदा। लखाओ, दुनिया उसकै गैल हो ली सै।” 20 जो माणस उस फसह के त्यौहार म्ह भगति करण नै आये थे उन म्ह तै कुछ यूनानी थे। 21 उननै गलील परदेस कै बैतसैदा नगर के बासिन्दे फिलिप्पुस कै धोरै आकै उसतै बिनती करी, “श्रीमान, हम यीशु तै फेटणा चाहवां सां।” 22 फिलिप्पुस नै आकै अन्द्रियास तै कह्या, फेर अन्द्रियास अर फिलिप्पुस नै जाकै यीशु ताहीं कह्या। 23 इसपै यीशु नै उन ताहीं कह्या, “वो बखत आ ग्या सै के मुझ माणस के बेटै की महिमा हो। 24 मै थारे तै साच्ची-साच कहूँ सूँ के जिब ताहीं गेहूँ का दाणा धरती म्ह पड़कै मर न्ही जान्दा, वो एकला रहवै सै, पर जिब मर जावै सै, तो वो अनगणित दाण्या नै जन्म देवै सै। 25 जो अपणे जीवन नै प्यारा जाणै सै, वो उसनै खो देवै सै, अर जो इस दुनिया म्ह अपणे जीवन नै प्यारा कोनी जाण्दा, वो अनन्त जीवन कै खात्तर उसकी रुखाळी करैगा। (aiōnios g166) 26 जै कोए मेरी सेवा करै, तो वो मेरा चेल्ला बण जावै, अर जिब जडै मै सूँ उड़े मेरा सेवक भी होवैगा। जै कोए मेरी सेवा करै, तो पिता उसका आदर करैगा। 27 “इब मेरा जी भोत दुखी सै। ज्यांतै इब मै कै कहूँ? हे पिता, मन्नै इस दुख की घड़ी तै बचा?” पर मै इस्से खात्तर इस दुनिया म्ह आया सूँ, ताके मै दुख सहु। 28 हे पिता अपणे नाम की महिमा कर।” फेर या अकास वाणी होई, “मन्नै इसकी महिमा करी सै, अर फेर भी करूँगा।” 29 फेर जो माणस खडे होए सुणेरे थे, उननै कह्या के बाढ़ल गरजा। दुसरयां नै कह्या, “कोए सुर्गदूत उसतै बोल्या।” 30 इसपै यीशु नै कह्या, “या आवाज मेरै खात्तर न्ही, पर थारे खात्तर आई सै। 31 इब इस दुनिया का न्याय होवै सै, इब इस दुनिया का अधिकारी काढ्या जावैगा। 32 अर मै जै धरती पै तै ॐ चै चढ़ाया जाऊँगा, तो सारया नै अपणे कान्ही खिच्चुगाँ।” 33 न्यू कहकै उसनै यो बता दिया के वो किस ढाल की मौत तै मरैगा। 34 इसपै माणसां नै यीशु ताहीं कह्या, “हमनै मूसा नबी के नियम-कायदा की या बात सुणी सै के मसीह सदा जिन्दा

रहवैगा, फेर तू क्यातै कहवै सै के माणस का बेटा ॐ चै चढ़ाया जाणा जासूरी सै? यो माणस का बेटा कौन सै?” (aiōn g165) 35 यीशु नै उन ताहीं कह्या, “चाँदणा (यीशु नै अपणे-आप तै कह्या सै) इब थोड़ी देर ताहीं थारे बिचालै सै। जिब ताहीं चाँदणा थारे गेल्या सै जद ताहीं चाल्दे रहो, इसा ना हो के अँधेरा थारे ताहीं घेर लेवै, जो अँधेरे म्ह चाल्लै सै वो कोनी जाणदा के कडै जावै सै। 36 जिब ताहीं चाँदणा थारे गेल्या सै, चाँदणे पै बिश्वास राक्खो ताके थम चाँदणे की ऊलाद बणो” ये बात कहकै यीशु चल्या गया अर उनतै दूर रह्या। 37 यीशु मसीह नै उनकै स्यामी इतने चमत्कार दिखाए, फेर भी उननै उसपै बिश्वास कोनी करया, 38 ताके यशायाह नबी का वचन पूरा हो जो उसनै कह्या “हे प्रभु, म्हरै संदेश का किसनै बिश्वास करया सै? अर प्रभु की शक्ति किसपै जाहिर होई सै?” 39 इस बाबत वे बिश्वास कोनी कर सके, क्यूँके यशायाह नै न्यू भी कह्या सै: 40 “उसनै उनकी आँख आँथी, अर उनके मन कठोर कर दिए सै, कदे इसा ना हो के वे आँखां तै देक्खै, अर मन तै समझै, अर पलटै, अर मै उननै ठीक करूँ।” 41 यशायाह नै ये बात ज्यांतै कही, के उसनै यीशु मसीह की महिमा देक्खी, अर उसनै उसकै बारे म्ह बताया। 42 फेरभी यहूदी सरदारा म्ह तै धणाए नै उसपै बिश्वास करया, पर फरीसियाँ कै कारण खुलकै कोनी मान्नै थे, क्यूँके उननै डर था कदे वे आराधनालय म्ह तै लिकाडे ना जावै 43 क्यूँके माणसां की ओड़ तै करी जाण आळी बड़ाई उननै परमेसवर की ओड़ तै बड़ाई की बराबरी म्ह घणी प्यारी लाग्यी थी। 44 यीशु नै रुक्का मारकै कह्या, “जो मेरै पै बिश्वास करै सै, वो मेरै पै न्ही बल्के मेरै खन्दानआळै पै बिश्वास करै सै। 45 अर जो मन्नै देक्खै सै, वो मेरै खन्दानआळै नै देक्खै सै। 46 मै दुनिया म्ह चाँदणा बणकै आया सूँ, ताके जो कोए मेरै पै बिश्वास करै वो अँधेरे म्ह कोनी रहवै।” 47 “जै कोए मेरे वचन सुणकै भी उननै न्ही मानता, तोभी मै उसनै कसूरवार कोनी ठहरान्दा, क्यूँके मै दुनिया के माणसां ताहीं कसूरवार ठहराण खात्तर कोनी, पर दुनिया के माणसां का उद्धार करण खात्तर आया सूँ। 48 जो कोए मन्नै नकरै सै, अर मेरे सुसामाचार नै कोनी अपणावै, उस ताहीं कसूरवार ठहराण आळा तो एके सै, यानिके जो वचन मन्नै कह्या सै, वोए पाच्छले दिन म्ह उस ताहीं कसूरवार ठहरावैगा। 49 क्यूँके मै अपणी ओर तै बात न्ही कहन्दा, पर पिता जिसनै मेरै ताहीं भेज्या सै, उसनै मेरै ताहीं हुक्म दिया सै के, के मै कहूँ अर किस तरियां बोल्लूँ? 50 अर मन्नै बेरा सै के उसका हुक्म अनन्त जीवन देवै सै। ज्यांतै मै जो कुछ कहूँ सूँ थीक उसाए कहूँ सूँ जिसा पिता नै मेरै ताहीं कहण का हुक्म दिया सै।” (aiōnios g166)

13

फसह कै त्यौहार तै पैहल्या, जिब यीशु नै बेरा लाग्या, के मेरा वो बखत आ लिया सै, के दुनिया छोड़कै पिता कै धरै उल्टा जाऊँ, तो अपणे मानण आळा तै, जो दुनिया म्ह थे, जिसा प्यार वो करया करदा, आखर ताहीं उसाए प्यार करदा रह्या। 2 यीशु अर उसके चेल्लें सँझ नै खाणा खाण लागरे थे। शमान के बेटे यहूदा इस्करियोती

के मन म्ह शैतान नै यो विचार घाल दिया था, के वो यीशु कै गेल्या धोक्खा करै। 3 यीशु यो जाणै था, के पिता नै सब कुछ उसके हाथ म्ह सौप दिया सै, अर यो भी के वो परमेसवर की ओड़तै आया सै, परमेसवर कै धोरै ए उल्टा जाण लागरया सै। 4 इस खात्तर वो खाणा छोड़कै खड़ा होग्या, उसनै अपणे उपमले लत्ते उतार दिये, अंगोच्छा लैकै अपणी कमर म्ह बाँध लिया। 5 फेर बास्पण म्ह पाणी भरकै चेल्यां के पैर धोये, अर जो अंगोच्छा कमर पै बाँध रख्या था, उससे तै पूँज्ञा लागग्या। 6 जिब वो शमौन पतरस कै धोरै आया, फेर पतरस नै उस ताहीं कह्या, “हे प्रभु, कै तू मेरे पैर धोवैगा?” 7 यीशु नै उस ताहीं जवाब दिया, “जो मै करूँ सूँ, तू उसका मतलब इब्बे न्ही समझा पावैगा, पर इसकै बाद समझैगा।” 8 पतरस नै उस ताहीं कह्या, “मै अपणे पैर तेरे ताहीं कदे न्ही धोण दियुँगा।” न्यू सुणकै यीशु नै उस ताहीं कह्या, “जै मै तेरे पैर ना धोऊँ, तो तू मेरा चेल्या न्ही कुहावैगा।” (aiōn g165) 9 शमौन पतरस नै उस ताहीं कह्या, “हे प्रभु, फेर मेरे पैर ए न्ही बल्के मेरे हाथ अर सिर भी धोदे।” 10 यीशु नै उस ताहीं कह्या, “जो माणस न्हा लिया हो उस ताहीं पैर कै सिवाय और कुछ धोण की जरूरत कोनी, पर वो पूरी तरियां साफ हो चुका सै, थम सारे साफ सो, पर एक नै छोड़ के।” 11 यीशु तो अपणे पकड़वाणा आले नै जाणै था, ज्यांते उसनै कह्या, “थम सारे साफ सो, पर एक नै छोड़ के।” 12 जिब यीशु नै पैर धो लिये, अर अपणे लत्ते बुबारा पहरकै फेर बैठ्या, तो उन ताहीं कहण लागग्या, “के थम समझे के मन्नै थारे गेल्या के करया?” 13 थम मन्नै गुरु अर प्रभु कहो सो, अर सही कहो सो, क्यूँकै मै वोए सूँ। 14 जिब मन्नै गुरु अर प्रभु होकै थारे पैर धोए, तो थमनै भी मेरी तरियां एक-दुसरे के पैर धोण चाहिये। 15 क्यूँकै मन्नै थारे ताहीं नमूना दिखाया सै, के जिसा मन्नै थारे गेल्या करया सै, थम भी उसाए करया करो। 16 मै थारे तै साच्ची-साच कहूँ सूँ, नौकर कर अपणे मालिक तै बड़ा कोनी, अर ना प्रेरित अपणे भेजण आले तै। 17 इब थम ये बात जाणगे सों, जै उनपै चाल्लों तो थम सुखी रहोगे। 18 मै थम सारया कै बारें म्ह कोनी कहन्दा, मै उननै जांयुँ सूँ, जिनताहीं मन्नै छाँट लिया सै, (अर यो भी के यहूदा बिश्वासघाती सै) क्यूँकै मन्नै उस ताहीं इस खात्तर छाट्या सै, ताके पवित्र ग्रन्थ का यो वचन पूरा हो, “जो मेरी रोट्टी खावै सै, उसनै मेरै पै लात ठाई।” 19 “ये सब कुछ मन्नै थारे ताहीं पैहले ए बता दिया था, के जब न्यू हो जावै तो थम बिश्वास करियो के मै वोए सूँ। 20 मै थारे ताहीं साच्ची-साच कहूँ सूँ, के जो मेरे भेज्जै होया नै अपणावै सै, वो मन्नै अपणावै सै, अर जो मन्नै अपणावै सै, वो मेरे भेजण आले नै अपणावै सै।” 21 ये बात कहकै यीशु आत्मा म्ह दुखी होया अर या गवाही दी, “मै थारे ताहीं साच्ची-साच कहूँ सूँ, के थारे म्ह तै एक मन्नै धोक्खा देकै पकड़वावैगा।” 22 चेल्ये यो शक करते होए के वो किसकै बाबत कहवै सै, एक-दुसरे कै कान्ही लखाण लागगे। 23 उसके चेल्यां म्ह तै यूहन्ना जिस ताहीं यीशु प्यार राक्खै था, यीशु कै धोरै बेठ्या था। 24 शमौन पतरस नै यूहन्ना कान्ही इशारा करकै उस ताहीं बुझ्या, “बता तो, वो किसकै बाबत कहवै

सै?” 25 फेर उसनै उससे ढाळ यीशु की छाती कै कान्ही झुककै उस ताहीं बुझ्या, “हे प्रभु, वो कौण सै?” 26 यीशु नै जवाब दिया, “जिस ताहीं मै यो रोट्टी का टुकड़ा डुबोकै यूगां वोए सै।” अर उसनै टुकड़ा डुबोकै शमौन के बेटे यहूदा इस्करियोती ताहीं दिया। 27 टुकड़ा खान्दे शैतान यहूदा इस्करियोती म्ह बढ़या। फेर यीशु नै उस ताहीं कह्या, “जो तू करै सै, तोछा कर।” 28 भोज पै बैठण आले चेल्यां म्ह तै किसे नै भी यो कोनी बेरा लागण पाया के उसनै या बात उसतै किस मतलब तै कही। 29 कईयाँ नै सोच्या के रपियाँ की थैली यहूदा कै धोरै रहवै सै, ज्यांतै यीशु उस ताहीं कहवै सै के त्यौहार कै खात्तर जस्ती समान मोल ले आओ या गरीबां नै कुछ देवै, इस खात्तर यहूदा नै रोट्टी का टुकड़ा लिया। 30 आखर म्ह वो टुकड़ा खाकै जिबे बाहरणे लिकड़या, अर रात का बखत था। 31 जिब यहूदा बाहरणे लिकड़या तो यीशु नै कह्या, “इब मुझ माणस के बेटे की महिमा होई सै, अर परमेसवर की महिमा मेरे म्ह होई सै, 32 परमेसवर भी अपणे बेटे की महिमा करैगा, अर वो जिबे करैगा।” 33 हे बालकों, मै रोट्टी सी बार और थारे धोरै सूँ, फेर थम मन्नै टोहओगे, अर जिसा मन्नै यहूदियाँ ताहीं कह्या, “जड़ै मै जाऊँ सूँ, उड़ै थम कोनी आ सकदे, न्यू बूँध मै थारे ताहीं भी कहूँ सूँ।” 34 “मै थमनै नया हुक्म यूँ सूँ, के एक-दुसरे तै प्यार करो, जिसा मन्नै थारैतै प्यार करया सै, उससे तरियां थम भी एक-दुसरे तै प्यार करो। 35 जै आप्स म्ह प्यार राक्खोगे, तो इसतै सारया नै बेरा पाट्ट्या के थम मेरे चेल्यों सो।” 36 शमौन पतरस नै उस ताहीं कह्या, “हे प्रभु, तू कित जा सै?” यीशु नै जवाब दिया, “जड़ै मै जाऊँ सूँ, उड़ै तू इब्बे मेरै पाछ्यै न्ही आ सकदा, पर इसकै बाद मेरै गेल्या आवैगा।” 37 पतरस नै उसतै कह्या, “हे प्रभु, इब्बे मै तेरे पाछ्यै क्यातै न्ही आ सकदा? मै तो तेरी खात्तर अपणी जान भी देण नै तैराय सूँ।” 38 यीशु नै जवाब दिया, “के तू मेरी खात्तर अपणी जान दे देवैगा? मै तेरे तै सच कहूँ सूँ, के मुर्गे कै बाँग देण तै पैहल्या तू तीन बार मेरे बारें म्ह मुकरैगा।

14

“अपणे मन नै दुखी ना होण दो, थम परमेसवर पै बिश्वास राक्खो। 2 मेरै पिता कै घर म्ह धणीए रहण की जगहां सै, जै न्ही होहीं दी तो मै थारे ताहीं कह देंदा, क्यूँकै मै थारे खात्तर जगहां त्यार करण नै जाऊँ सूँ। 3 अर जै मै जाकै थारे खात्तर जगहां त्यार करूँ, तो फेर दुबारै आकै थमनै अपणे उरै ले जाऊँगा के जड़ै मै रहूँ उड़ै थम भी रहो। 4 अर जित्त म्ह जाऊँ सूँ, थम ओड़ै की राह जाणो सो।” 5 थोमा नै उसतै सवाल करया, “हे प्रभु, हमनै तेरे ठिकाणै का ए कोनी बेरा तो उसका राह किस तरियां जाण सका सो?” 6 यीशु नै उस ताहीं जवाब दिया, “मै ए वो राह अर सच अर अनन्त जीवन सूँ, बिना मेरै जिरिये कोए पिता धोरै कोनी पोहच सकदा। 7 जै थम सच म्ह ए मन्नै जाणदे होन्दे, तो मेरै पिता नै भी जाणदे, इसके बाद थमनै उस ताहीं जाण लिया सै, अर उस ताहीं देख भी लिया सै।” 8 फिलिप्पुस नै उस ताहीं कह्या, “हे प्रभु, तू म्हारै ताहीं पिता के दर्शन ए करा दे, योए म्हारै खात्तर भतेरा होगा।” 9 यीशु नै उस ताहीं कह्या, “हे फिलिप्पुस, मै

इतने दिन तै थारे गेल्या सूं के तू मन्नै कोनी जाण्दा? जिसनै मेरैताही देख्या सै उसनै पिता ताहीं देख्या सै। फेर क्यातै कहवै सै के पिता नै म्हारैताहीं दिखा?” 10 के तन्नै बिश्वास कोनी के मै पिता म्ह सूं अर पिता मेरै म्ह सै? ये वचन जो मै थारे ताहीं बताऊँ सूं अपणी ओड़ तै कोनी बतान्दा, पर मेरे भित्तर बसा पिता ए सै, जो मेरे म्ह होकै अपणे काम पूरा करण लागरया सै। 11 मेरा-ए बिश्वास करो के मै पिता म्ह सूं अर पिता मेरै म्ह सै, ना तो काम्मां कै कारण मेरा बिश्वास करो। 12 मै थारैतै साच्ची-साच कहूँ सूं, के जो मेरै पै बिश्वास रक्खै सै, ये काम जो मै करूँ सूं वो भी करैगा, बल्के इनतै भी बड़े-बड़े काम करैगा, क्यूंकि मै इब पिता कै धोरे जाऊँ सूं। 13 मेरै नाम तै थम जो कुछ माँगोगे, वोए मै करूँगा, जिसतै बेटे कै जरिये पिता की महिमा हो। 14 जै थम मेरै तै मेरै नाम तै कुछ माँगोगे, तो मै उस ताहीं पूरा करूँगा। 15 “जै थम मेरै तै प्यार करो सो, तो मेरे हुकमां नै मान्नोगे। 16 मै पिता तै बिनती करूँगा, अर वो थारे ताहीं एक और मददगार देवैगा के वो सारीहाण थारे गेल्या रहवै। (ai0n g165) 17 यानिके सच का आत्मा, जिस ताहीं दुनिया कोनी अपणे सकदी, क्यूंकि वो ना उसनै देक्खै सै, अर ना उस ताहीं जाणै सै, थम उसनै जाणों सो, क्यूंकि आज वो थारे गेल्या सै, अर आण आळे बखत म्ह भी वो थारे म्ह बणा रहवैगा।” 18 “मै थारे ताहीं अनाथ कोनी छोड़ूँगा, मै थारे धोरे बोहड के आऊँगा। 19 थोड़ा ए बखत बाकी सै, जिब दुनिया मेरै ताहीं कोनी देक्खैगी, पर थम मन्नै देक्खोगे, ज्यातै के मै जिन्दा सूं थम भी जिन्दा रहोगे। 20 जिब मै बोहड के आऊँगा, उस दिन थमनै बेरा लागैगा, के मै अपणे पिता म्ह सूं अर थम मेरै म्ह, मै थारे म्ह। 21 वो, जो मेरे हुकम नै मान्नै सै अर उननै निभावै सै, वोए मेरतै प्यार करै सै, अर जो मेरतै प्यार करै सै, वोए मेरे पिता का प्रियजन होगा, मै उसतै प्यार करूँगा, अर अपणे-आप ताहीं उसपै जाहिर करूँगा।” 22 उस यहूदा नै (जो इस्करियोती कोनी था) यीशु ताहीं कह्या, “हे प्रभु, इसा के होया के तू अपणे-आप ताहीं म्हरै पै जाहिर करणा चाहवै सै, अर दुनिया के माणसां पै न्ही?” 23 यीशु नै उस ताहीं जवाब दिया, “जै कोए मेरै तै प्यार करै सै, तो वो मेरी शिक्षा का पालन करैगा, वो मेरे पिता का प्रियजन बणैगा, अर हम उसकै धोरे आकै उसकै गेल्या वास करांगे।” 24 वो, जो मेरतै प्यार कोनी करदा, वो मेरै वचन नै कोनी मानता, अर जो वचन थम सुणो सो वो मेरे कोनी बल्के पिता के सै, जो मेरा भेजण आळा सै। 25 “ये बात मन्नै थारे गेल्या रहदै होए थारैतै कही। 26 पर मददगार यानिके पवित्र आत्मा जिस ताहीं पिता मैनै नाम तै भेजैगा, वो थारे ताहीं इन सारी बातों की शिक्षा देवैगा, अर जो कुछ मन्नै थारे तै कह्या सै, वो सारा कुछ थारे ताहीं याद दुआवैगा।” 27 मै थारे ताहीं शान्ति देकै जाऊँ सूं, अपणी शान्ति थारे ताहीं दियुँ सूं, जिसी दुनिया थारे ताहीं शान्ति देवै सै, मै थमनै उसी शान्ति कोनी देंदा अपणे मन नै दुखी ना होण द्यो अर ना डरियो। 28 थमनै सुण्या के मन्नै थारे ताहीं के कह्या, “मै जाऊँ सूं अर थारे धोरे फेर आऊँगा।” जै थम मेरै तै प्यार करदे, तो यो जाणकै राज्जी होन्दे, के मै पिता कै धोरे जाऊँ सूं, जो

मेरै तै घणा महान् सै। 29 यो सब होण तै पैहल्या मन्नै थारे ताहीं इसके बारै म्ह बता दिया सै, के जिब यो हो जावै, तो थम बिश्वास करो। 30 मै इब थारे तै घणा कुछ न्ही कहूँगा, क्यूंकि इस दुनिया का शासक (शैतान) आवै सै। मेरै पै उसका कोए हक कोनी, 31 दुनिया यो समझ ले के मै पिता तै प्यार करूँ सूं योए कारण सै के मै उसके सारे हुकमां का पालन करूँ सूं। उठो, हम याडै तै चाल्लां।

15 यीशु नै कह्या, “मै सच्ची अंगूर की बेल की तरियां सूं अर मेरा पिता किसान की तरियां सै। 2 मेरे मै लाग्मी हरेक डाळी जो फल न्ही देन्दी, उस ताहीं वो काट देवै सै, पर हरेक एक फल देण आळी डाळी ताहीं छाँगे सै ताके वा और घणा फल ल्यावै। 3 थम तो उस वचन कै कारण जो मन्नै थारैताहीं कह्या सै, शुद्ध होगे सो। 4 थम मेरै म्ह बणे रहो, अर मै थारे म्ह, जिस तरियां डाळी जै अंगूर की बेल म्ह बणी न्ही रहवै तो खुद तै कोनी फल सकदी, उस्से तरियां थम भी जै मेरै म्ह बणे न्ही रहो तो कोनी फल सकदे।” 5 मै अंगूर की बेल की ढाळ सूं अर थम डाळी सो। जो मेरै म्ह बण्या रहवै सै अर मै उस म्ह, वो घणाए फल फँकै सै, क्यूंकि मेरै तै न्यारे पाटके थम कुछ न्ही कर सकदे। 6 जै कोए मेरै म्ह न्ही बण्या रहंदा, तो वो डाळी की तरियां बगा दिया जावैगा, अर सूख जावै सै, अर माणस उन ताहीं कठे करकै आग म्ह झोक देवै सै, अर वे बल जावै सै। 7 जै थम मेरै म्ह बणे रहो अर मेरे वचन थारे म्ह बणे रहवै, तो थारे माँगण पै थारी इच्छा पूरी करी जावैगी। 8 थारे फल की भरपूरी म्ह मेरै पिता की महिमा अर थारा मेरे चेल्लें होण का सबूत सै। 9 जिसा पिता नै मेरै तै प्यार करया, उसाए मन्नै थारैतै प्यार करया, मेरै प्यार म्ह बणे रहो। 10 जै थम मेरे हुकमां नै मान्नोगे, तो मेरै प्यार म्ह बणे, जिस ढाळ के मन्नै अपणे पिता का हुकम मान्या सै, अर उसकै प्यार म्ह बणा रहूँ सूं। 11 मन्नै ये बात थारे तै ज्यातै कही, के जो आनन्द मेरे म्ह सै, वो थारे म्ह भी हो अर बढ़ता जावै। 12 “मै थमनै नया हुकम द्यु सूं के एक-दुसरे तै प्यार करियो, जिसा मन्नै थारैतै प्यार करया सै, उसाए थम भी एक-दुसरे तै प्यार करियो। 13 इसतै बड़ा प्यार किसे का कोनी के कोए अपणे दोस्तां कै खात्तर अपणी जान दे। 14 जो हुकम मै थारे ताहीं दियुँ सूं जै थम उसपै चाल्लों सों तो थम मेरे साथी सो।” 15 मन्नै थारे ताहीं नौकरकर न्ही, पर साथी मान्या सै, क्यूंकि नौकरकर मालिलक के काम्मां तै अनजान रहवै सै, मन्नै थारे ताहीं वे सारी बात बता दी सै, जो मनै पिता तै मिली सै। 16 थमनै मेरै ताहीं कोनी चुण्या पर मन्नै थारे ताहीं चुण्या सै अर थारैताहीं काम पै लाया सै, के थम जाकै फल ल्याओ अर थारा फल बणा रहवै, के थम मेरै नाम तै जो कुछ पिता तै माँगो, वो थारे ताहीं दे दे। 17 मेरा हुकम यो सै के थम एक-दुसरे तै प्यार करो। 18 “जै दुनिया के माणस थारैतै बैर राक्खै सै, तो जाण ल्यो के उसनै थारैतै पैहल्या मेरै तै बैर राख्या सै। 19 जै थम दुनिया के माणसां जिसे होन्दे, तो दुनिया थारे तै आपण्यां जिसा प्यार करदी, पर थम दुनिया के कोनी, बल्के मन्नै थारैताहीं दुनिया म्ह तै छाँट लिया सै, इस करकै दुनिया के माणस थारे तै बैर राक्खै सै। 20 याद

राक्खों मनै थारे तै के कह्या था, ‘नौकर अपणे मालिलक तै बड़ा कोनी होंदा,’ जिब उननै मेरै ताहीं सताया, तो थारैताहीं भी सतावैगें। जै उननै मेरी शिक्षा मान्नी, तो थारी भी माँनैगें। 21 पर यो सब कुछ माणस मेरै नाम कै कारण थारे गेल्या करैगे, क्यूँके माणस मेरै भेजण आळे नै कोनी जाणदे। 22 जै मै न्ही आन्दा, अर उनतै बात न्ही करदा, फेर वे पापी कोनी ठहरदे, पर इब उननै उनकै पाप खात्तर कोए बहाना कोनी। 23 जो मेरै तै बैर राक्खै सै, वो मेरै पिता तै भी बैर राक्खै सै। 24 जै मै उनके बीच म्ह वे काम न्ही करदा, जो और किसे नै कोनी करे, तो वे पापी कोनी ठहरदे, पर इब तो जो कुछ मनै करया सै उननै मेरै ताहीं देख लिया सै, उननै मेरै ताहीं अर मेरै पिता दोनुआ तै बैर करया। 25 पर यो इस करके होया के जो उनकै नियम-कायदा म्ह लिख्या सै वो सच हो सके, ‘उननै मेरै तै खामखां बैर करया।’ 26 पर जिब वो मददगार (सच का आत्मा जो पिता की ओड़ तै आवै सै) धोरै आवैगा, जिसनै मै थारे धोरै पिता की ओड़ तै भेज्यांगा, तो वो मेरी गवाही देवैगा, 27 अर थम भी मेरै गवाह सो, क्यूँके थम शश तै मेरै गेल्या रहे सो।

16 “ये बात मनै थारैतै ज्यांतै बताई सै के थारा बिश्वास डगमगा न्ही जावै।”

2 वे थमनै आराधनालयां म्ह तै काढ देवैगे, बल्के वो बखत आवै सै, के जो कोए थमनै मार देवैगा, वो न्यू समझैगा के मै परमेसवर की सेवा करूँ सूँ। 3 इसा वे ज्यांतै करैंगे के उननै ना पिता ताहीं जाण्या सै, अर ना मनै जाणी सै। 4 पर ये बात मनै ज्यांतै थारैतै कही, के जिब इनका बखत आवै तो थमनै याद रहवै के मनै थारैतै पैहल्याए उसकै बारे म्ह बता दिया था। “मनै शरु म्ह थारैतै ये बात ज्यांतै कोनी कही क्यूँके मै थारे गेल्या था।” 5 पर इब मै अपणे भेजण आळे कै धोरै जाऊँ सूँ अर थारे म्ह तै कोए मेरै तै कोनी बुझाता, “तू कित्त जावै सै?” 6 पर मनै जो ये बात थारैतै कही सै, ज्यांतै थारा मन दुख तै भरग्या सै। 7 फेरभी मै थारैतै साच्ची कहूँ सूँ के मेरा जाणा थारे खात्तर ठीक सै, क्यूँके जै मै ना जाऊँ तो वो मददगार थारे धोरै कोनी आवैगा, पर जै मै जाऊँगा, तो उस ताहीं थारे धोरै भेज्यांगा। 8 वो आकै दुनिया के माणसां ताहीं पाप अर धार्मिकता अर न्याय कै बाबत बतावैगा। 9 पाप कै बारै म्ह ज्यांतै के वे मेरै पै बिश्वास कोनी करदे। 10 अर धार्मिकता कै बारै म्ह ज्यांतै के मै पिता कै धोरै जाऊँ सूँ अर थम मनै दुबारै कोनी देक्खोगे, 11 न्याय कै बारै म्ह ज्यांतै के दुनिया का शासक कसूरवार ठहराया जा चुक्या सै। 12 मनै थारे तै और भी घणीए बात कहणी सै, पर इब्बे थम उननै सह न्ही सकदे। 13 पर जिब वो यानिके सच का आत्मा आवैगा, तो थम सारया नै सच का रास्ता बतावैगा, क्यूँके वो अपणी ओड़ तै कोनी कहवैगा पर जो कुछ सुणैगा वोए कहवैगा, अर होण आळी बात थारे ताहीं बतावैगा। 14 वो मेरी महिमा करैगा, क्यूँके उस ताहीं मेरी ओड़ तै जो मिला सै, वो थारे ताहीं मेरी बातां म्ह तै लेकै बतावैगा। 15 वो सब कुछ, जो पिता का सै, वो सारा मेरा सै, ज्यांतै मनै कह्या के वो मेरी बातां म्ह तै लेकै थारे ताहीं बतावैगा। 16 “थोड़ी देर म्ह थम मनै कोनी देक्खोगे, अर फेर थोड़ी देर

म्ह मनै दुबारा देक्खोगे।” 17 फेर उसके कुछ चेल्यां नै आप्सस म्ह कह्या, “उसका इस बात तै के मतलब सै जो वो म्हारै ताहीं कहवै सै, ‘थोड़ी देर म्ह थम मनै कोनी देक्खोगे, अर फेर थोड़ी देर म्ह मनै दुबारा देक्खोगे?’ अर यो “ज्यांतै के मै पिता कै धोरै जाऊँ सूँ?” 18 फेर उननै कह्या, “यो ‘थोड़ी देर’ जो वो कहवै सै, या के बात सै? हम कोनी जाणदे के वो के कहवै सै।” 19 यीशु नै न्यू जाणकै के वे मेरतै बुझाणा चाहवै सै, उन ताहीं कह्या, “के थम आप्सस म्ह मेरी इस बात बाबत जाँच-पड़ताळ करो सो, ‘थोड़ी देर म्ह थम मनै कोनी देक्खोगे, अर फेर थोड़ी देर म्ह मनै दुबारा देक्खोगे?’” 20 मै थारे तै साच्ची-साच कहूँ सूँ के जिब मै मरूँगा तो थम रोओगे अर बिलाप करोगे, पर दुनिया राज्जी होवैगी। थमनै दुख होगा, पर थारा दुख आनन्द म्ह बदल जावैगा। 21 जापै के बखत बिरबान्नी नै दुख होवै सै, क्यूँके उसके दुख का बखत आरया सै, पर जिब वा बालक नै जन्म दे सै, तो इस खुशी तै, के दुनिया म्ह एक माणस पैदा होया, उस दुख नै फेर याद कोनी कर दी। 22 उस्से तरियां थारे म्ह भी इब तो दुख सै, पर मै थारे तै दुबारा मिलूँगा अर थारे मन आनन्द तै भर जावैगे, थारा आनन्द कोए थारे तै खोस न्ही सकदा। 23 उस बखत थम मेरतै कुछ न्ही बुझाऊँगे। मै थारैतै सच कहूँ सूँ जै थम पिता तै कुछ माँगोगे, तो वो मेरै नाम तै थमनै देवैगा। 24 इब ताहीं थमनै मेरै नाम तै पिता तै कुछ न्ही मांग्या, माँगो, तो पा ल्योगे ताके थारा आनन्द पूरा हो जावै। 25 “मनै ये बात थारैताहीं उदाहरणां म्ह कहीं सै, पर वो बखत आवै सै, जिब पिता के बारें म्ह मै उदाहरणां म्ह न्ही कहूँगा, पर साफ शब्दां म्ह थारे ताहीं बताऊँगा। 26 उस दिन थम मेरै नाम तै माँगोगे, अर मै थारैतै न्यू कोनी कहन्दा के मनै ए थारे खात्तर पिता तै बिनती करणी पड़ेंगी, 27 क्यूँके मेरा पिता तौ खुदे थारैतै प्यार करै सै, ज्यांतै के थमनै मेरतै प्यार करया सै अर यो बिश्वास करया सै के मै पिता की ओड़ तै भेज्या होड़ सूँ। 28 मै पिता की ओड़ तै दुनिया म्ह आया सूँ, अर इब दुनिया नै छोड़कै पिता कै धोरै जाऊँ सूँ।” 29 उसके चेल्यां नै कह्या, “हाँ, इब तू उदाहरणां म्ह न्ही, बल्के साफ शब्दां म्ह समझाणा लागरया सै। 30 इब हम समझागे सां, के तू सब कुछ जाऊँ सै, अर इब किसे नै तेरे तै कोए सवाल पूछ्यण जुरत कोनी, इस खात्तर हम बिश्वास करा सां के तू परमेसवर की ओड़ तै आया सै।” 31 न्यू सुणैके पीशु नै उन ताहीं कह्या, “के थमनै इब बिश्वास होया सै?” 32 लखाओ, वो बखत आवै सै बल्के आण पहोंच्या सै के थम सारे खिंड-मिन्ड होकै अपणे-अपणे घर बोहड़ जाओगे, अर मनै एकला छोड़ दोगे, फेरभी मै एकला कोनी क्यूँके पिता मेरै गेल्या सै। 33 “मनै ये बात थारैतै ज्यांतै कही सै, के थम मेरै म्ह शान्ति पाओ। दुनिया म्ह थारे पै क्लेश होवै सै, पर हिम्मत राखियो, मनै दुनिया ताहीं जीत लिया सै।”

17 यीशु नै ये बात कही अर अपणी नजर अकास कान्ही ठाकै कह्या,

“हे पिता, वो बखत आण पहोंच्या सै, अपणे बेटे की महिमा कर, के बेटा भी तेरी महिमा कर सके, 2 क्यूँके तन्नै उस ताहीं सारी मानवजाति पै हक दिया, के वो सब नै अनन्त जीवन देवै जो तन्नै उस

ताहीं सौष्या सै। (aiōnios g166) 3 अर अनन्त जीवन यो सै के वे तुझ, जो के एकमात्र सच्चे परमेसवर अर यीशु मसीह नै जिस ताहीं तन्नै भेज्या सै, जाणै। (aiōnios g166) 4 जो काम तन्नै मेरै ताहीं सौष्या था, उस ताहीं पूरा करकै मन्नै धरती पै तेरी महिमा करी सै। 5 जो महिमा मेरी तेरे गैल दुनिया की सृष्टि तै पैहल्या थी, इब है पिता, तू अपणे गेल्या मन्नै भी महिमावान कर।” 6 “मन्नै तेरा नाम उन माणसां पै जाहिर करया सै दुनिया म्ह तै जिनताहीं तन्नै छाटकै मेरै ताहीं सौष्या था, वे तेरे थे पर तन्नै उन ताहीं मेरै ताहीं सौष्या सै, अर उननै तेरे वचन का पालन करया सै।” 7 इब जाणगे सै के जो कुछ तन्नै मेरै ताहीं दिया सै, वो सारा तेरी ओङ्कै तै सै, 8 क्यूँकै जो बात तन्नै मेरै ताहीं बताई, मन्नै उन ताहीं उनकै धोरै पहांच्या दी सै, अर उननै उन ताहीं अपणालिया, अर सच म्ह ए जाण लिया सै के मै तेरी ओङ्कै तै आया सूँ, अर उननै विश्वास भी कर लिया सै के तू ए मेरा भेजण आळा सै। 9 मै उन खात्तर बिनती करूँ सूँ, दुनिया के माणसां कै खात्तर बिनती कोनी करदा पर उन्नै कै खात्तर करूँ सूँ जिन ताहीं तन्नै मेरै ताहीं दिया सै, क्यूँकै वे तेरे सै, 10 अर जो कुछ मेरा सै वो सारा तेरा सै, अर जो तेरा सै वो मेरा सै, अर मन्नै उनके जरिये महिमा पाई सै। 11 इब मै इस दुनिया म्ह कोनी रहूँगा, अर मै तेरे धोरै आँऊँ सूँ, पर ये दुनिया म्ह रहवैंगे, है पवित्र पिता, अपणे नाम की शक्ति तै उनकी रुखाल कर, जो तन्नै मेरै ताहीं दिया सै, ताके जिस तरियां मै अर तू एक सां, वे भी एक हो सकै। 12 जिब मै उनकै गेल्या था, तो मन्नै उन ताहीं तेरे नाम म्ह, जो तन्नै मेरै ताहीं दिया था, उनकी रुखाल करी, अर उन म्ह तै किसे का नाश कोनी होया, सिवाए उसके जिस ताहीं खोणा जरूरी था, वो भी ज्यांतै के पवित्र ग्रन्थ म्ह जो लिख्या होड़ सच हो। 13 पर इब मै तेरे धोरै आँऊँ सूँ, अर ये बात दुनिया म्ह रहते होए कहूँ सूँ ताके वे अपणे मनां म्ह मेरे भरपूर आनन्द नै पा सकै। 14 मन्नै तेरा वचन उन ताहीं पोहोचा दिया सै, अर दुनिया के माणसां नै उनतै बैर करया, क्यूँकै जिस तरियां मै इस दुनिया का कोनी, उससे तरियां वे भी इस दुनिया के कोनी। 15 मै या बिनती कोनी करदा के उननै तू दुनिया तै लिकाड़ ले, बल्के तू उननै उस शैतान तै बचाए राख। 16 जिस तरियां मै दुनिया का कोनी, उससे तरियां वे भी दुनिया के कोनी। 17 तेरा वचन साच्चा सै, सच कै जरिये तू उननै अलग करण खात्तर समर्पित कर। 18 जिस तरियां तन्नै मेरै ताहीं दुनिया म्ह भेज्या, उससे तरियां मन्नै भी उन ताहीं दुनिया म्ह भेज्या, 19 मै उनकै खात्तर खुद नै तेरी सेवा म्ह समर्पित करूँ सूँ, ताके वे भी सच कै खात्तर समर्पित हो जावै। 20 “मै केवल इन्हे खात्तर बिनती कोनी करदा, पर उन माणसां खात्तर भी जो इनकै वचन कै जरिये मेर पै विश्वास करैंगे, 21 ताके वे सब एक हों, जिस तरियां है पिता तू मेरै म्ह सै, अर मै तेरे म्ह सूँ उससे तरियां वे भी म्हरै म्ह एक हो, जिसतै दुनिया के माणस विश्वास करै के तन्नै ए मेरै ताहीं भेज्या सै। 22 वा महिमा जो तन्नै मेरै ताहीं दी, मन्नै उन ताहीं दी सै, ताके वे उससे तरियां ए एक होवै जिस तरियां हम एक सा, 23 मै उन म्ह अर तू मेरे म्ह ताके वे सिध्ध होकै एक हो जावै, अर दुनिया

नै बेरा पाढ़ै के तन्नै ए मेरै ताहीं भेज्या, अर जिस तरियां तन्नै मेरै तै प्यार करया उस्से तरियां उनतै प्यार करया।” 24 है पिता, मै चाहूँ सूँ के जिन ताहीं तन्नै मेरैताहीं सौष्या सै, जड़ै मै सूँ उड़ै वे भी मेरै गेल्या हो, के वे मेरी उस महिमा नै देक्ख्यै जो तन्नै मेरैताहीं दी सै, क्यूँकै तन्नै दुनिया नै बणाण तै पैहल्या मेरतै प्यार करया सै। 25 “हे धार्मिक पिता, दुनिया के माणसां नै तो तेरे ताहीं कोनी जाण्या, पर मन्नै तेरे ताहीं जाण लिया सै, अर मेरे चेल्यां नै भी बेरा पाटग्या के तन्नै ए मेरैताहीं भेज्या सै। 26 मन्नै तेरे ताहीं उनपै जाहिर करया सै, अर जाहिर हो-न्दा रहूँगा, के जो प्यार तन्नै मेरतै करया था वोए प्यार उन म्ह बस जावै, अर मै उन म्ह रहूँ।”

18 जिब यीशु नै प्रार्थना खतम कर ली, तो वो अपणे चेल्यां कै गेल्या

किद्रोन नाले कि परली ओङ्कै गया। उड़ै एक फूल्ला का बाग था, जिस म्ह वो अर उसके चेल्यें गए। 2 यीशु का पकड़ाण आळा यहूदा भी उस जगहां नै जाणी था, क्यूँकै यीशु अपणे चेल्यां कै गैल उड़ै जाया करै था। 3 फेर यहूदा, सिपाहियाँ कै एक टोळ नै अर प्रधान याजकां अर फरीसियाँ कै ओङ्कै तै मन्दर के पैहरेदारां नै लैकै, दीवे अर मशाल अर हथियारां नै लैकै उड़ै आया। 4 फेर यीशु, उन सारी बातां नै जो उसपै बीत्तण आळी थी जाणकै, लिकड़कै उन ताहीं पूछा, “किसनै टोहो सो?” 5 उननै उस ताहीं जवाब दिया, “यीशु नासरी नै।” यीशु नै उन ताहीं कह्या, “मैं सूँ।” यीशु नै पकड़ाण आळा यहूदा भी उनकै गेल्या खड्या था। 6 जिब यीशु नै उनतै कह्या, “मैं सूँ” वे पाच्छै हटकै धरती पै पड़ो। 7 फेर उसनै दुबारै उन ताहीं बुद्ध्याया, “थम किसनै टोहो सो?” वे बोल्ले, “यीशु नासरी नै।” 8 यीशु नै जवाब दिया, “मन्नै तो थारे ताहीं कह दिया सै के वो मै सूँ जै थम मन्नै टोहो सो तो इन माणसां नै जाण दो।” 9 यो इस करकै के खुद उसके जरिये कह्या गया यो वचन पूरा हो, “मन्नै उन म्ह तै एक भी न्ही खोया, जिन ताहीं तन्नै मेरतै सौष्या था।” 10 फेर शमौन पतरस नै तलवार, जो उसकै धोरै थी, खींच्ची अर महायाजक के नौकरकर पै चलाकै उसका सोळा कान उड़ा दिया, उस नौकरकर का नाम मलखुस था। 11 फेर यीशु नै पतरस तै कह्या, “अपणी तलवार म्यान म्ह धरा। जो दुख का कटोरा पिता नै मेरै ताहीं दिया सै, के मै उसनै न्ही पीँऊँ?” 12 फेर रोमी सिपाहियाँ अर उनकै सूबेदार अर यहूदिया परदेस के मन्दर के पैहरेदारां नै यीशु ताहीं पकड़कै बाँध लिया, 13 अर पैहल्या उस ताहीं हन्ना कै धोरै ले गए, क्यूँकै वो उस साल के महायाजक का इफा का सुसरा था। 14 यो वोए काइफा था, जिसनै यहूदियाँ ताहीं सलाह दी थी के म्हरे माणसां खात्तर एक आदमी का मरणा ठीक सै। 15 शमौन पतरस अर एक और दुसरा चेल्ला भी यीशु कै पाच्छै हो लिए। यो चेल्ला महायाजक का जाण-पिच्छाण का था, ज्यांतै वो यीशु कै गेल्या महायाजक कै आँगण म्ह गया, 16 पर पतरस बाहरणे दरखाजे पै खड्या रह्या। फेर दुसरा चेल्ला जो महायाजक की जाण-पिच्छाण का था, वो बाहरणे लिकड़ाया अर पहरेदारणी तै कहकै पतरस ताहीं भीत्तर लियाया। 17 उस नौकराणी नै, जो पहरेदारणी भी थी, पतरस तै कह्या, “कदे तू भी इस माणस के चेल्यां म्ह तै तो न्ही

सै?” उसने कहा, “मैं कोनी।” 18 नौकर अर मन्दर के पहरेदारां ने जाड़े के कारण आग जला राक्खी थी, अर खड़े होके सेकके थे, अर पतरस भी उनके गेल्या खड़ा आग सेकके था। 19 फेर महायाजक नै यीशु नै उसके चेल्यां कै बाबत अर उसके उपदेशां कै बाबत जाँच-पड़ताल करी। 20 यीशु नै उस ताहीं जवाब दिया, “मन्नै हरेक माणस तै खुलकै बात करी, मन्नै सभायां अर आराधनालायाँ म्ह, जड़े सारे यहूदी कठुे होया करै सै, सारी हाण उपदेश दिया अर लुक्क कै कुछ कोनी कहा। 21 तू क्यूँ मेरै तै सवाल बुझँसै? सवाल उनतै कर जिनै मेरे वचन सुणे सै, वे जाणे सै, के मन्नै उन ताहीं कै-कै कहा।” 22 जिब उसने न्यू कहा, तो मन्दर के पैहरेदारां म्ह तै एक नै जो धोरै खड़ा था, यीशु के थप्पड़ मारके कहा, “के तन्नै महायाजक ताहीं इस तरिया जवाब देण की हिम्मत किसी करी?” 23 यीशु नै उसतै जवाब दिया, “जै मेरा कहणा गलत सै तो साबित करो पर मन्नै जो कहा सै वो सही सै तो फेर थम मेरै क्यूँ मारण लागरे सों?” 24 इस खात्तर यीशु ताहीं जो इब भी बाँधे होए थे, हन्ना नै काइफा महायाजक कै धोरै भेज दिया। 25 शमौन पतरस खड़ा होया आग सेकके था, फेर उनै उसतै कहा, “कदे तू भी उसके चेल्यां म्ह तै तो न्हीं सै?” उसने नाट-कै कहा, “मैं कोनी।” 26 महायाजक के नौकरां म्ह तै एक, जो उसके कुण्जे म्ह तै था, जिसका कान पतरस नै काट दिया था, बोल्या, “के मन्नै तेरे ताहीं यीशु कै गेल्या फूल्लां के बाग म्ह कोनी देख्या था?” 27 पतरस फेर नाटग्या, अर जिब्बे मुर्मै नै बाँग देई। 28 फेर वे यीशु ताहीं काइफा कै धोरै तै किले म्ह लेगे, अर तड़कैए का बखत था, पर वे खुद किले कै भीत्तर कोनी गए ताके वे फसह का भोज खाण तै पैहल्या अशुद्ध ना हों जावै। 29 फेर राज्यपाल पिलातुस उनकै धोरै बाहरणै लिकड़कै आया अर कहा, “थम इस माणस पै किस बात का दोष लाओ सो?” 30 उनै उस ताहीं जवाब दिया, “जै वो बुरे काम करणीया न्हीं होंदा तो हम इसनै तेरे धोरै कोनी ल्यान्दे।” 31 पिलातुस नै उनतै कहा, “थमे इसनै ले जाकै अपणे नियम-कायदा कै मुताबिक इसका न्याय करो।” यहूदी अगुवां नै उसतै कहा, “हमनै हक कोनी के किसे की जानलेव।” 32 यो इस करकै होया, ताके यीशु की वा बात पूरी हो जो उसनै यो इशारा देंदे होड़ कही थी के उसकी मौत किस ढाल होगी।” 33 फेर पिलातुस दुबारै किले कै भीत्तर गया, यीशु ताहीं बुलाकै उसने बुझँया, “के तू यहूदियाँ का राजा सै?” 34 यीशु नै जवाब दिया, “के तू या बात अपणी ओड़ तै कहवै सै या दुसरायां नै मेरै बाबत तेरे तै न्यू कहा सै?” 35 पिलातुस नै जवाब दिया, “के मै यहूदी न्हीं सूँ तेरी-ए कोम अर प्रधान याजकां नै तेरे ताहीं मेरै हाथ म्ह सौंप्या सै। तन्नै कै करया सै?” 36 यीशु नै जवाब दिया, “मेरा राज्य इस दुनिया का कोनी, जै मेरा राज्य इस दुनिया का होंदा, तो मेरे सेवादार लड़दे के मै यहूदी अगुवां कै हाथ्यां सौंप्या कोनी जान्दा पर सच्चाई तो या सै के मेरा राज्य आड़े का सै ए कोनी।” 37 पिलातुस नै उसतै कहा, “के तू राजा सै?” यीशु नै जवाब दिया, “तू कहवै सै के मै राजा सूँ। मन्नै ज्यातै जन्म लिया अर ज्यातै दुनिया म्ह

आया सूँ के सच की गवाही दियुँ। जो कोए सच का सै, वो मेरा वचन सुणे सै।” 38 पिलातुस नै उसतै कहा, “सच के सै?” न्यू कहकै वो फेर यहूदी अगुवां कै धोरै लिकड़ आया अर उन ताहीं कहा, “मैं तो उस म्ह कुछ खोट कोनी पांदा।” 39 पर थारे यो रिवाज सै के मै फसह पै थारे खात्तर एक माणस नै छोड़ दियुँ। आखर के थम चाहो सो, “के मै थारे खात्तर यहूदियाँ के राजा नै छोड़ दियुँ?” 40 फेर उनै रुक्के मारकै कहा, “इसनै न्हीं, पर म्हारै खात्तर बरअब्बा नै छोड़दे।” जिब के बरअब्बा बिद्रोही था।

19 फेर पिलातुस राज्यपाल नै यीशु कै कोडे लगवाण खात्तर सिपाहियाँ कै हाथ सौप दिया। 2 सिपाहियाँ नै काण्डयाँ का मुकुट गूँथकै उसकै सिर पै धरया, अर उस ताहीं बैंजनी लत्ते पिहाये, 3 अर उसकै धोरै आ-आकै कहण लागे, “हे यहूदियाँ के राजा, प्रणाम!” अर उसकै थप्पड़ भी मारे। 4 फेर पिलातुस नै दुबारै बाहरणै लिकड़कै माणसां ताहीं कहा, “लखाओ, मै उसनै थारे धोरै फेर ल्याया सूँ ताके थमनै बेरा लागै कै मै उस म्ह कुछ भी खोट कोनी पान्दा।” 5 फेर यीशु ताहीं काण्डयाँ का मुकुट अर बैंजनी लत्ते पहरे होड़ बाहरणै लेग्या, अर पिलातुस नै उन ताहीं कहा, “देख्यों, इस माणस नै!” 6 जिब प्रधान याजकां अर मन्दर के पैहरेदारां नै उस ताहीं देख्या, तो रुक्के मारकै कहा, “उस ताहीं क्रूस पै चढ़ा, क्रूस पै!” पिलातुस नै उनतै कहा, “थमे उसनै ले जाकै क्रूस पै चढ़ाओ, क्यूँकै मै उस म्ह कोए खोट कोनी पान्दा।” 7 यहूदी अगुवां नै उस ताहीं जवाब दिया, “म्हारे नियम-कायदे सै अर उस नियम-कायदा कै मुताबिक इस माणस नै मौत की सजा मिलणी चाहिये, क्यूँकै इसनै खुद ताहीं परमेसवर का बेटा होण का दावा करया सै।” 8 जिब पिलातुस नै या बात सुणी तो और भी धण डरग्या, 9 अर दुबारै किले कै भीत्तर गया अर यीशु तै कहा, “तू कितका सै?” पर यीशु नै उसतै कुछ भी जवाब कोनी दिया। 10 इसपै पिलातुस नै उसतै कहा, “मेरतै क्यातै न्हीं बोल्दा? के तन्नै कोनी बेरा के तेरे ताहीं छोड़ देण का हक मेरै ताहीं सै, अर तेरे ताहीं क्रूस पै चढ़ाण का भी मेरै ताहीं हक सै।” 11 यीशु नै जवाब दिया, “जै तेरे ताहीं परमेसवर की ओड़ तै हक न्हीं दिया जान्दा, तो तेरा मेरै पै कोए हक कोनी होंदा, ज्यातै जिसनै मेरै ताहीं तेरे हाथ पकड़ाया सै उसका पाप धण सै।” 12 इस बात नै सुणकै पिलातुस नै उस ताहीं छोड़ देणा चाह्या, पर यहूदी माणसां की भीड़ नै रुक्के मार-मारकै कहा, “जै तू इसनै छोड़ देवैगा, तो तू कैसर का बिरोधी बण जावैगा। जो कोए खुद नै राजा होण का दावा करै सै, वो कैसर का बिरोध करै सै।” 13 ये बात सुणकै पिलातुस यीशु नै बाहरणै ल्याया अर उड़े न्याय की गद्दी पै बैठग्या, जो इब्रानी भाषा म्ह “गब्बता” कुहावै सै, जिसका मतलब चोतरा हो सै। 14 यो फस्ह की त्यारी का दिन था, अर दोफाहरा का बखत था। फेर उसनै यहूदी माणसां ताहीं कहा, “यो रह्या थारा राजा!” 15 पर उनै और ऊँच्ची आवाज म्ह कहा, “उस ताहीं मार द्यो! उस ताहीं मार द्यो! उस ताहीं क्रूस पै चढ़ा!” पिलातुस नै उनतै कहा, “के मै थारे राजा नै क्रूस पै चढ़ाऊँ?”

प्रधान याजकां नै जवाब दिया, “कैसर नै छोड़ म्हारा और कोए राजा कोनी।” 16 फेर पिलातुस नै यीशु ताहीं कूस पै चढ़ाण खात्तर उनकै हवालै कर दिया। 17 फेर सिपाही यीशु नै ले गए, अर यीशु अपणा कूस ठाए होइ उस जगहां तक बाहर गया, जो “खोपडी” यानी इत्रानी भाषा मह “गुलगुता” कुहावै सै। 18 उडै उननै उस ताहीं अर उसकै गेल्या और दो माणसां ताहीं कूस पै चढ़ाया, एक इस ओड़ अर एक दुसरी ओड़, अर बिचाळे यीशु ताहीं। 19 पिलातुस नै एक दोषपत्र लिखकै कूस पै लगवा दिया, अर उसपै लिखा होया था, “यीशु नासरी, यहूदियाँ का राजा।” 20 यो दोषपत्र धणखरे यहूदियाँ नै पढ़ाया, क्यूंकि यस्तशेम नगर जडै यीशु कूस पै चढ़ाया गया था नगर कै धोरै थी, अर दोषपत्र इत्रानी अर लतीनी अर यूनानी मह लिखा होया था। 21 फेर यहूदियाँ के प्रधान याजकां नै पिलातुस तै कह्या, “यहूदियाँ का राजा” मतना लिखै पर यो के उसनै कह्या, “मै यहूदियाँ का राजा सूं।” 22 पिलातुस नै जवाब दिया, “मन्नै जो लिखणा था, लिख दिया।” 23 जिब सिपाहियाँ नै यीशु ताहीं कूस पै चढ़ा दिया, तो उसके लते लेकै चार हिस्यां म्ह बांड लिए, हरेक सिपाही खात्तर एक हिस्सा, अर कुड़ता भी लिया, पर कुड़ता बिन सिलाई उपर तै तळै ताहीं सिम्या होया था। 24 इस करकै सिपाहियाँ नै आप्स मह कह्या, “हम इस ताहीं पाड़ा कोनी, पर इसपै पर्ची गेर कै, के यो किसका होवैगा।” न्यू इस करकै होया के पवित्र ग्रन्थ मह जो लिखा होया वो पूरा हो, “उननै मेरे लते आप्स म्ह बांड लिए अर मेरे लते पै पर्ची गेरी।” 25 आखर मह सिपाहियाँ नै इसाए करया। यीशु कै कूस कै धोरै यीशु की माँ, अर उसकी मौस्ती, क्लोपास की घरआळी मरियम, अर मगदल गाम की मरियम खड़ी थी। 26 जिब यीशु नै अपणी माँ, अर उस चेल्लें ताहीं जिसतै वो प्यार करै था, धोरै खड़े देख्या तो अपणी माँ तै कह्या, “हे नारी, लखा, यो तेरा बेटा सै।” 27 फेर उस चेल्लें तै कह्या, “या तेरी माँ सै।” अर उससे बख्त वो चेल्ला उस ताहीं अपणे घरां लेग्या। 28 इसकै पाच्छै यीशु नै बेरा लाग्या के इब उसनै सारा काम पूरा कर लिया सै, ज्यांते के पवित्र ग्रन्थ मह जो कह्या गया वो पूरा हो, कह्या, “मै तिसाया सूं।” 29 उडै सिरकै तै भरया होइ एक बास्सण धरया था, आखर मह सिपाहियाँ नै सिरके मह भेकै स्पंज (फोम) ताहीं जुफे की लाट्ठी पै धरकै उसकै मुँह कै लगाया। 30 जिब यीशु नै वो सिरका चख्या, तो कह्या, “पूरा होया,” अर सिर झुकाकै जी दे दिया। 31 इब यो त्यारी का दिन था, अर आगला दिन आराम का दिन अर फसह का दिन था, यो यहूदी माणसां खात्तर एक खास दिन था, अर वे न्हीं चाहवै थे, के इस दिन देह कूस पै टंगी रहवै, इस करकै यहूदियाँ नै पिलातुस तै बिनती करी के उन माणसां की टाँग तोड़ दी जावै, जो कूस पै चढ़ाये गये थे। 32 आखर मह सिपाहियाँ नै आकै उन माणसां मह तै पैहले की टाँग तोड़ी फेर दुसरे की भी, जो उसकै गेल्या कूस पै चढ़ाए गए थे, 33 पर जिब यीशु कै धोरै आकै देख्या के वो मर लिया सै, तो उसकी टाँग कोनी तोड़ी। 34 पर सिपाहियाँ मह तै एक नै बरछी तै उसका पंजर चीर दिया, अर उस मह तै जिब्बे लहू अर पाणी लिकड्या। 35 जिस

माणस नै यो देख्या, उसनै गवाही दी सै, अर उसकी गवाही साच्ची सै, अर उननै बेरा सै के वो साच्ची कह सै के थम भी विश्वास करो। 36 ये बात ज्यांतै होई के पवित्र ग्रन्थ मह जो कह्या गया वो पूरा हो, “उसकी कोए हाड़ी कोनी तोड़ी जावैगी।” 37 फेर एक और जगहां पै पवित्र ग्रन्थ मह न्यू लिख्या सै, “जिस ताहीं उननै बेथा सै, उसनै वे देक्खैंगे।” 38 इन बातां पाच्छै अरिमतिया गाम के यूसुफ नै जो यीशु का चेल्ला था, पर यहूदी अगुवा कै डर के मारे इस बात नै ल्कोए राक्ख्यै था, पिलातुस तै बिनती करी, के वो यीशु की लाश ले जा सके सै। पिलातुस नै उसकी बिनती सुणी, अर वो आकै उसकी लाश लेग्या। 39 नीकुदेमुस भी, जो पैहले यीशु कै धोरै रात नै गया था, पचास सेर कै करीबन रळा होइ गन्धरस अर एलवा (काण्डल्याँ आळा पौथा) लियाया। 40 फेर उननै यीशु की लाश ली, अर यहूदियाँ कै गाड्हुण कै रिवाज कै मुताबिक उस ताहीं खुशबुदार द्रव्य कै गेल्या कफन मह लपेट्या। 41 उस जगहां पै जडै यीशु कूस पै चढ़ाया गया था, एक फूल्लां का बगीचा था, अर उस फूल्लां की क्यारी मह एक नई कब्र थी जिसम्ह कदे कोए कोनी राख्या ग्या था। 42 ज्यांतै उननै यीशु की लाश ताहीं उससे कब्र मह धर दिया, क्यूंकि वा लोवै ए थी, अर वो यहूदियाँ के आराम की त्यारी का दिन भी था।

20 हफ्ते कै पैहल्डे दिन तड़कैए सूरज लिकड्ण तै पैहल्या अन्धेरै रहदे ए मगदल गाम की मरियम कब्र पै गई, अर पत्थर ताहीं कब्र पै तै हट्या होइ देख्या। 2 फेर वा भाज्जी अर शमौन पतरस अर उस दुसरे चेल्ले कै धोरै जिसतै यीशु प्यार राक्ख्यै था, आकै कह्या, “वे प्रभु की लाश नै कब्र मह तै काढ लेगे सै, अर हमनै न्हीं बेरा के उस ताहीं कित्त धर दिया सै।” 3 फेर पतरस अर वो दुसरा चेल्ला लिकड्कै कब्र कै कान्ही चाल्ले। 4 वे दोन्हु गैल-गैल भाजरे थे, पर दुसरा चेल्ला पतरस तै तेज भाजकै कब्र पै पैहल्या पोंहच्या, 5 अर झुककै लत्ते पड़े देक्खे, तोभी वो भीत्तर कोनी गया। 6 फेर शमौन पतरस उसकै पाच्छै-पाच्छै पोंहच्या, अर कब्र कै भीत्तर गया अर उसनै भी लत्ते पड़े देक्खे, 7 अर वो अंगोच्छा जो उसकै सिर पै बन्ध्या होइ था, लत्यां कै गेल्या कोनी पड़या था, पर न्यारा एक जगहां लपेट्कै धरया होया देख्या। 8 फेर दुसरा चेल्ला भी जो कब्र पै पैहल्या पोंहच्या था, भीत्तर गया अर देख्यै किंश्वास करया के यीशु मुर्दा मह तै जिन्दा होग्या। 9 पतरस अर दुसरा चेल्ला इब ताहीं पवित्र ग्रन्थ की वा बात कोनी समझे थे के उसनै मरे होया मह तै जी उठाना होगा। 10 फेर चेल्लें अपणे घरां बोहङ्गे। 11 पर मरियम रोंदी होई कब्र कै धोरै ए बाहरणी खड़ी रही, अर रोन्दे-रोन्दे कब्र कै कान्ही कोहुई होकै, 12 दो सुर्गदूतां ताहीं धोले-चमकदे लत्ते पहरे होइ एक सिरहाणै अर दुसरे ताहीं पांयां की ओड़ बेठे देख्या, जडै यीशु की लाश धरी गई थी। 13 उननै उस ताहीं कह्या, “हे नारी, तू क्यातै रोवै सै?” उसनै उन ताहीं कह्या, “वे मेरै प्रभु की लाश नै ठा लेगे अर मन्नै कोनी बेरा के उसनै कित्त धर राख्या सै।” 14 न्यू कहकै वा पाच्छै मुड़ी अर यीशु ताहीं खड़े देख्या, पर पिछाण्या कोनी के यो यीशु सै। 15 यीशु नै उसतै कह्या, “हे नारी, तू क्यातै रोवै सै? किसनै टोहवै सै?”

उसनै माली समझकै उस ताहीं कह्या, “हे श्रीमान, जै तन्नै उस लाश ताहीं ठा लिया सै, तो मन्नै बता के उस ताहीं कित्त धर राख्या सै, अर मै उसनै ले जाऊँगी” 16 यीशु नै उस ताहीं कह्या, “मरियम!” उसनै बोहड़कै उस ताहीं इब्रानी म्ह कह्या, “रख्युनी!” यानिके “हे गुह़”। 17 यीशु नै उस ताहीं कह्या, “पैरां म्ह लिपटैकै मन्नै मतना छुओ, क्यौंकै मै इब ताहीं पिता कै धोरै उप्पर कोनी गया, पर मेरे भाईयाँ कै धोरै जाकै उनतै कह दे, के मै अपणे पिता अर थारे पिता, अर अपणे परमेसवर अर थारे परमेसवर कै धोरै उप्पर जाकै आऊँ सूं” 18 मरियम मगदलीनी नै जाकै चेल्यां ताहीं बताया, “मन्नै प्रभु ताहीं देख्या, अर उसनै मेरै तै ये बात कही।” 19 उस्से दिन जो हफ्तै का पैलल्डा दिन था, साँझा कै बखत यहूदियाँ कै डर के मारे चेल्ले जिब किवाड़ मूंदे होड़ एक कमरे म्ह थे, तो यीशु उनकै बिचाळै आ खड्या होया अर उनतै बोल्या, “थमनै शान्ति मिलै।” 20 अर न्यू कहकै उसनै अपणे हाथ्थां के घा अर अपणा पंजर उनतै दिखाए। फेर चेल्ले यीशु नै देखकै राज्जी होए। 21 यीशु नै फेर उनतै कह्या, “थमनै शान्ति मिलै: जिस तरियां पिता नै मेरै ताहीं दुनिया म्ह भेज्या सै, उस्से तरियां ए मै थमनै दुनिया म्ह भेज्जू सूं।” 22 न्यू कहकै उसनै उनपै फूँक मोरी अर उसनै कह्या, “पवित्र आत्मा ल्यो।” 23 जिनके पाप थम माफ करो, वे उनकै खात्तर माफ करे गए सै, जिनके थम राक्खो, वे राक्खे गए सै।” 24 पर बारहा चेल्यां म्ह तै एक, यानिके थोमा जो दिदुमुस कुहावै सै, जिब यीशु आया तो उनकै गेल्या कोनी था। 25 जिब दुसरे चेल्ले उसतै कहण लागे, “हमनै प्रभु ताहीं देख्या सै,” फेर उसनै उनतै कह्या, “जिब ताहीं मै उसकै हाथ्थां म्ह कील्ला के छेद न्ही देख ल्यूँ अर कील्ला के छेदां म्ह अपणी आंगली न्ही घाल ल्यूँ अर उसकै पंजर म्ह अपणा हाथ ना घाल ल्यूँ, जद ताहीं बिश्वास कोनी करँगा।” 26 आठ दिन कै पाढ़े उसके चेल्ले फेर घर कै भीत्तर थे, अर थोमा उनकै गेल्या था, अर किवाड़ मूंद राक्खे थे, फेर यीशु आया अर उनकै बिचाळै खड्या होकै कह्या, “थमनै शान्ति मिलै।” 27 फेर उसनै थोमा तै कह्या, “अपणी आंगली याड़े ल्याकै मेरै हाथ्थां नै देख अर अपणा हाथ ल्याकै मेरै पंजर म्ह घाल, अर अविश्वासी न्ही पर बिश्वासी बण।” 28 न्यू सुणकै थोमा नै जवाब दिया, “हे मेरे प्रभु, हे मेरे परमेसवर!” 29 यीशु नै उसतै कह्या, “तन्नै तो मेरै ताहीं देखकै बिश्वास करया सै, धन्य वे सै जिन नै बिन देक्खे बिश्वास करया।” 30 यीशु नै और भी धणखरे चमत्कार चेल्यां कै आगै दिखाए, जो इस किताब म्ह कोनी लिक्खे गए, 31 पर ये ज्यांतै लिक्खे गए सै के थम बिश्वास करो के यीशु ए परमेसवर का बेटा मसीह सै, अर बिश्वास करकै उसकै नाम म्ह अनन्त जिन्दगी पाओ।

21 इन बातां कै पाढ़े यीशु नै खुद ताहीं तिविरियास झील कै किनारे चेल्यां पै जाहिर करया, अर इस ढाल जाहिर करया 2 शमौन पतरस, अर थोमा जो दिदुमुस कुहावै सै, अर गलील परदेस कै काना नगर का नतनएल, अर जब्दी के बेटे, अर उसके चेल्यां म्ह तै दो और जणे कठुंथे थे। 3 शमौन पतरस नै उन ताहीं कह्या, “मै मच्छी पकड़नै

जाऊँ सूं।” उननै उसतै कह्या, “हम भी तेरे गेल्या चाल्लां सां।” इस करकै वे लिकड़कै किस्ती पै चढ़े, पर उस रात उननै कुछ न्ही पकड्या। 4 सबेर होन्दे-ए यीशु किनारे पै आ खड्या होया, फेर भी चेल्यां नै कोनी पिच्छाणा के यो यीशु सै। 5 फेर यीशु नै उन ताहीं कह्या, “हे बाल्कों, के थारे धोरै कुछ खाण नै सै?” उननै जवाब दिया, “कोनी।” 6 यीशु नै उन ताहीं कह्या, “किस्ती कै सोली ओड़ जाल गेरो फेर पाओगे।” आखर उननै जाल गेरया, अर इब धणी मच्छियाँ कै बाबत जाल उनपै चिच्या कोनी। 7 फेर उस चेल्ले नै जिसतै यीशु प्यार कै था, पतरस तै कह्या, “यो तो प्रभु सै!” शमौन पतरस नै न्यू सुणकै के वो तो प्रभु सै, अपणा बाहरी कपड़ा लपेट्या अर झील म्ह कूद पड्या, क्यौंकै उस बखत वो अंगोच्छें-अंगोच्छें म्ह था। 8 पर दुसरे चेल्ले डोंगी पै मच्छी तै भरया होड़ जाल खिंचेदे होए आए, क्यौंकै वे किनारे तै धणी दूर कोनी, पर कोए दो सौ हाथ (सौ मीटर) की दूरी पै थे। 9 जिब चेल्ले किनारे पै उतरे, तो उननै कोयले की आग अर उसपै मच्छी धरी होई, अर रोटी देक्खी। 10 यीशु नै उनतै कह्या, “जो मच्छी थमनै इब्बे पकड़ी सै, उन म्ह तै कुछ ल्याओ।” 11 फेर शमौन पतरस नै डोंगी पै चढ़कै एक सौ तै तेरेपन बट्टी मच्छियाँ तै भरया होड़ जाल किनारे पै चिच्या, अर इतनी मच्छी होन्दे होए भी जाल कोनी पाठ्या। 12 यीशु नै उनतै कह्या, “आओ, खाणा खाओ।” चेल्यां म्ह तै किसे की हिम्मत कोनी होई, के उसतै बुझ्यै, “तू कौण सै?” क्यौंकै उननै बेरा था, के हो ना हो यो प्रभु ए सै। 13 यीशु आया अर रोटी लेकै उन ताहीं दी, अर उस्से ढाल मच्छी भी। 14 यो तीसरी बार सै के यीशु मरे होया म्ह तै जिन्दा उठण कै पाढ़े चेल्यां नै देखाई दिया। 15 खाणा खाणे कै पाढ़ै यीशु नै शमौन पतरस तै कह्या, “हे शमौन, यूहन्ना के बेटे, के तू चेल्यां तै बाध मेरतै प्यार करै सै?” उसनै उसतै कह्या, “हाँ प्रभु, तन्नै तो बेरा सै के मै तेरे तै प्यार राक्खूँ सूं।” उसनै उसतै कह्या, “मेरे मेमा नै चरा।” 16 उसनै दुसरी बर उसतै कह्या, “हे शमौन, यूहन्ना के बेटे, के तू मेरै तै प्यार राक्खै सै?” उसनै उसतै कह्या, “हाँ प्रभु, तन्नै तो बेरा सै के मै तेरे तै प्यार राक्खूँ सूं।” उसनै उसतै कह्या, “मेरी भेड़ों की रुखाणी कर।” 17 उसनै तीसरी बर उस ताहीं कह्या, “हे शमौन, यूहन्ना के बेटे, के तू मेरतै प्यार राक्खै सै?” पतरस काल होया के उसनै उसतै तीसरी बर इसा कह्या, “हे शमौन, यूहन्ना के बेटे, के तू मेरतै प्यार राक्खै सै?” अर उसतै कह्या, “हे प्रभु, तन्नै तो सारा कुछ बेरा सै, तन्नै न्यू बेरा सै के मै तेरे तै प्यार राक्खूँ सूं।” यीशु नै उसतै कह्या, “मेरी भेड़ों नै चरा।” 18 मै तेरे तै साच्ची-साच कठूँ सूं, “जिब तू जवान था तो अपणी कड़ बाँधकै जड़ चाहवै था उड़े हाँड़े था, पर जिब तू बूढ़ा होगा तो अपणे हाथ पसारैगा, अर दुसरा तेरी कड़ बाँधकै जड़े तू ना चाहवैगा उड़े तन्नै ले जावैगा।” 19 यीशु नै इन बातां तै इशारा करया के पतरस किसी मौत तै परमेसवर की महिमा करैगा, अर फेर उसनै उसतै कह्या, “मेरै पाढ़ै हो ले।” 20 पतरस नै बोहड़कै उस चेल्ले ताहीं पाढ़ै आन्दे देख्या, जिसतै यीशु प्यार राक्खै था, जो खाणे कै बखत उसकै साथ बेठ्या था, उसतै बुझ्याया,

“हे प्रभु, तेरा पकड़वाण आला कौण सै?” 21 उस ताहीं देखकै पतरस
नै यीशु तै कह्या, “हे प्रभु, इसका के हाल होगा?” 22 यीशु नै उसतै
कह्या, “जै मै चाहूँ के वो मेरै आण ताहीं रुक्या रहवै, तो तन्नै इसतै के?
तू मेरै पाढ्ये हो ले।” 23 ज्यांते भाईयाँ म्ह या बात फैलगी के वो चेल्ला
कोनी मरेगा, फेरभी यीशु नै उसतै न्यू कोनी कह्या के वो कोनी मरेगा,
पर यो के, “जै मै चाहूँ के वो मेरै आण ताहीं रुक्या रहवै, तो तन्नै इसतै
के?” 24 यो वोए चेल्ला सै जो इन बात्तां की गवाही देवै सै अर जिसनै
इन बात्तां ताहीं लिख्या सै, अर हमनै बेरा सै के उसकी गवाही साच्ची
सै। 25 और भी घणेए काम सै, जो यीशु नै करे, जै वे एक-एक करकै
लिखे जान्दे, तो मै समझूँ सूँ के किताब जो लिक्खी जान्दी वा दुनिया म्ह
भी कोनी समान्दी।

प्रेरितों के काम

1 हे थियुफिलुस, मन्ने पैहलडी किताब उन सारी बातों के बारें म्ह सिखान्दा रहया, 2 पर यीशु ताहीं परमेसवर के जरिये सुर्ग म्ह ठाए जाण तक करदा अर लिक्खी, जो यीशु शरु तै लैकै सुर्ग म्ह ठाए जाण तक करदा अर लिक्खी, जो यीशु शरु तै लैकै सुर्ग म्ह ठाए जाण तै पैहले उसनै अपणे चुणे होए प्रेरितां ताहीं पवित्र आत्मा के जरिये हुकम दिया। 3 यीशु के दुख ठाण कै पाच्छै उन प्रेरितां कै स्यामी भोत-से पक्के सबूत दिखाए के वो जिन्दा सै, अर वो चालीस दिन तक उननै दिखदा रहया, अर परमेसवर के राज्य की बात करदा रहया। 4 अर एक दिन मसीह यीशु नै उनतै कठै करकै उन ताहीं हुकम दिया, “यस्तशेम नगर नै ना छोड़ौ, पर पिता की उस प्रतिज्ञा की पूरे होण की बाट देखदे रहो, जिसका जिक्र थम मेरै तै सुण चुके सो। 5 क्यूँकि यूहन्ना नै तो पाणी तै बपतिस्मा दिया सै पर थोड़े दिनां पाच्छै थम पवित्र आत्मा तै बपतिस्मा पाओगे।” 6 चेल्लें जिब यीशु तै दुबारा मिले तो उननै उसतै बुद्धज्ञया, “हे प्रभु, के वो बखत आ ग्या सै, के तू इस्त्राएल ताहीं छुड़वा कै उसनै दुबारा बसाकै राजा के रूप म्ह सब पै शासन करैगा।” 7 उसनै उनतै कह्या, “उस बखत या युगा ताहीं, जिन ताहीं पिता नै अपणे अधिकार म्ह कर राख्या सै, उननै जाणणा थारा काम कोनी। 8 पर जिब पवित्र आत्मा थारे पै आवैगा फेर थम सामर्थ पाओगे, अर यस्तशेम नगर अर सारे यहूदिया और सामारिया परदेसां म्ह, अर धरती कै सिरे ताहीं मेरे बारें म्ह गवाही द्योगे।” 9 न्यू कूहकै यीशु उनकै देखदे-देखदे परमेसवर के जरिये उप्पर ठालिया गया, अर बाढ़ल नै उस ताहीं उनकी आँखां तै लटको लिया। 10 उसके जान्दे बखत जिब वे अकास की ओड़ देक्ख्ये थे, तो देक्खो, चाणकच को माणस धोळे लत्ते पहरे ओड़ उनकै लोवै आण खड़े होए, 11 अर उनतै कह्या, “हे गलील परदेस के माणसों, थम खड़े अकास कान्ही क्यांतै लखाओ सो? योए यीशु, जो परमेसवर के जरिये थारे धोरै तै सुर्ग पै ठालिया गया सै, जिस तरियां तै थमनै उस ताहीं सुर्ग नै जान्दे देख्या उस्से तरियां तै वो दुबारा आवैगा।” 12 जिब सुर्गदूत चले गये, तो चेल्लें जैतून नाम के पहाड़ तै जो यस्तशेम नगर तै करीब आधै कोस की दूरी पै सै, यस्तशेम नगर म्ह बोहँडे। 13 जिब वे नगर पोहचे तो उस चुबारै पै गये, जित्त पतरस अर यूहन्ना अर याकूब अर अन्द्रियास अर फिलिप्पुस अर थोमा अर बरतुल्मै अर मत्ती अर हलफई का बेट्टा याकूब अर शमौन, जेलोतेस अर याकूब का बेट्टा यहूदा ये सारे माणस ओड़िथे। 14 ये सारे कई विबानियां अर यीशु की माँ मरियम अर उसके भाईयाँ कै गेल्या कठै होकै एक मन तै प्रार्थना म्ह लागे रहे। 15 उन्हे दिनां म्ह पतरस विश्वासियाँ कै बिचाकै म्ह जो एक सौ बीस आदमियाँ कै करीबन थे, खड्या होकै कहण लाग्या, 16 हे भाईयो, जरूरी था के पवित्र ग्रन्थ का वो लेख पूरा हो जो पवित्र आत्मा नै दाऊद के मुँह तै यहूदा कै बाबत, जो यीशु कै पकड़वाण आळा का अगुवा था, पैहल्याए तै कह्या था। 17 क्यूँकि वो तो म्हारै म्ह गिण्या गया, अर इस सेविकाई म्ह साइझी होया। 18 “जिसा थम जाणो सो

(उसनै पाप की कमाई तै एक खेत मोल लिया, अर सिर के बळ गिरया अर उसका पेट पाटग्या अर उसकी सारी आन्दड़ी लिकड़गी। 19 इस बात ताहीं यस्तशेम नगर के सारे रहणीये जाणगे, उरै ताहीं के उस खेत का नाम उनकी भाषा म्ह ‘हक्कलदमा’ यानिके ‘लहू का खेत’ पड़ग्या।)” 20 “दाऊद नै भजन सहिता म्ह लिख्या सै, ‘उसका घर उज़ड जावै, अर यो भी लिख्या सै, के उस म्ह कोए न्ही बसै,’ अर ‘उसका पद कोए और ले लेवै।’” 21 “इस करकै यो जरूरी सै के एक इस माणस छाट्या जावै, जो प्रभु यीशु के सारे कामां के हरेक बखत का गवाह हो, प्रभु यीशु ताहीं यूहन्ना के जरिये बपतिस्मा दिये जाण तै लैकै, सुर्ग म्ह स्वीकार किये जाण तक, 22 वो माणस म्हारे गैल प्रभु यीशु के जिन्दा होण का गवाह बणै।” 23 फेर उननै दो नाम सुझाए, एक यूसुफ जो बरसबा कुहावै था, जिसका उपनाम यूस्तुम सै, दुसरा मतियाह ताहीं, 24 अर या प्रार्थना करी, “हे प्रभु, तू जो सारया के मनां नै जाणै सै, न्यू बता के इन दोनुआ म्ह तै तन्नै किस ताहीं चुण्या सै, 25 के वो इस सेवा के काम अर प्रेरितों की वा खाल्ली जगहां ले, जिसनै यहूदा छोड़कै अपणी जगहां चल्या गया, जित्त उसनै जाणा चाहिए था।” 26 फेर उननै उनकै बाबत पर्ची गेरी, अर पर्ची मतियाह कै नाम लिकड़ी। आखर वो उन ग्यारहां प्रेरितां कै गेल्या गिण्या गया।

2 यहूदियाँ कै पिन्तेकुस्त त्योहार के दिन, यीशु के चेल्लें एक जगह अँढ़े थे। 2 चाणकच अकास तै तेज आँधी जिसी आवाज आई, अर उसतै सारा घर जित वे बेंटै थे, गूँजग्या। 3 अर उननै एक आग की लपट दिक्खी, जो जीभ के समान थी, वा आग की लपट अलग-अलग होकै उन सब कै उप्पर आ उतरी। 4 वे सारे पवित्र आत्मा तै भरगे, अर जो वरदान पवित्र आत्मा नै उन ताहीं दिया, उसके मुताबिक वो अन्य-अन्य भाषा बोल्लण लागे। 5 उस बखत पूरी दुनिया की होकै जात म्ह तै यहूदी-भगत यस्तशेम नगर म्ह रहण लागरे थे। 6 जिब आँधी जिसा शब्द गरजा, तो भीड़ लाग्यी अर आदमी घबरागे, क्यूँकि हर एक अपणी-अपणी भाषा म्ह चेल्यां ताहीं बोलदे सुणण लागरे थे। 7 वे सारे हैरान अर अचम्भा करकै कहण लागे, “देक्खो, जो वे बोल्लण लागरे सै के सारे गलीलवासी कोनी? 8 तो यो के होण लागरया सै, के जो म्हारे म्ह तै हर एक इन ताहीं अपणी-अपणी जन्म-भूमि की भाषा म्ह बात करते सुणै सै! 9 हम जो पारथी अर मेदी अर एलामी अर मेसेपोटामिया अर यहूदिया अर कप्पटदूकिया अर पुन्तुस अर आसिया परदेस, 10 कुछ फुगिया, पांपुलिया परदेस अर कुछ मिस देश अर लौंबिया देश जो कुरेने नगर कै लोवै-धोरै सै, इन सारे देशों के रहण आळे अर रोमी प्रवासी, 11 यानिके यहूदी माणस अर यहूदी पंथ धारण करण आळे, क्रेतो दीप अर अरब देश के माणस भी सै, पर अपणी-अपणी भाषा म्ह उनतै परमेसवर के बड़े-बड़े कामां का जिक्र सुणै सै।” 12 अर वे सारे हैरान होए अर घबराकै एक-दुसरे तै कहण लागे, “यो के होण लागरया सै?” 13 पर औरां नै मखौल करकै कह्या, “वे तो नई मदिरा कै नशै म्ह चूर सै।”

14 जिब पतरस उन ग्यारहां प्रेरितां कै गेल्या खड्या होया, अर ठाडू आवाज म्ह बोल्या, “हे यूदिवासियों अर हे युश्लेमवासियों, न्यू जाण ल्यो, अर कान लाकै मेरी बात सुणो” 15 जिसा थम समझरे सो, ये आदमी नशी म्ह कोनी, क्यूँके इब्बे दिन कै नी बजे सै। 16 जो थम म्हरै साथ होते होए देखण लागरे सों, यो योएल नवी कै जरिये कही गई भविष्यवाणी का पूरा होणा सै। 17 “परमेसवर कहवै सै, के अन्त के दिनां म्ह इसा होवैगा के मै अपणा आत्मा सारे माणसां ताहीं दियुँगा,” अर थारे बेटे अर थारी बेटी भविष्यवाणी करैगी, अर थारे जवान दर्शन देखैरेंगे, अर थारे बुजुर्ग सपना देक्खैरेंगे। 18 उन दिनां म्ह, मै अपणे दास्सां, अर दासियों ताहीं अपणी आत्मा दियुँगा, अर वे भविष्यवाणी करैगे। 19 अर मै उप्पर अकास म्ह अनोक्खे काम अर तळे धरती पै निशान, यानिके लहू अर आग अर धूम्पौ का बाढ़ल दिखाऊँगा। 20 प्रभु के महान् अर तेजस्वी दिन कै आण तै पैहल्या सूरज अँधेरा अर चाँद लहू-सा हो जावैगा। 21 अर जो कोए प्रभु का नाम लेवैगा, उसका उद्धार होवैगा। 22 “हे इसाएलियों, इन बातां नै सुणो यीशु नासरी एक माणस था जिसका परमेसवर की ओड तै होण का सबूत उन सामर्थ के कामां अर हैरानी के कामां अर चमत्कारां तै जाहिर सै, जो परमेसवर नै थारे बिचालै उसके जरिये कर दिखाए जिसकै बारे म्ह थमनै खुदे बेरा सै। 23 उस्से यीशु ताहीं, जो परमेसवर की ठहराई होई योजना अर पूर्व ज्ञान कै मुताबिक पकडवाया गया, थमनै अधर्मियां कै हाथां तै क्रूस पै चढ़ाकै उस ताहीं मार दिया। 24 पर उस्से ताहीं परमेसवर नै मौत के बन्धनां तै छुड़ाकै जिन्दा करया, क्यूँके यीशु ताहीं अपणे बस म्ह राखणा मौत खात्तर असम्भव था।” 25 राजा दाऊद यीशु कै बारे म्ह कहवै सै, “मै प्रभु नै सारी हाण अपणे धोरे देखा रहया क्यूँके वो मेरी सोळी ओड सै, मै उनतै न्ही ढऱ्या जो लोग मेरा नुकसान करणा चाहवै सै।” 26 इस्से कारण मेरा मन आनन्दित होया, अर मै खुशी तै गाऊँगा, बल्के मेरी आस भी उस्से म्ह बणी रहवैगी। 27 क्यूँके तू मेरै प्राणां नै अथोलोक म्ह कोनी छोड़ैगा, अर ना अपणे पवित्र माणस नै सड़ण देवैगा। (Hades g86) 28 “तन्नै मेरै ताहीं जीण का राह बताया सै, तू मन्नै दर्शन कै जरिये आनन्द तै भर देवैगा।” 29 “हे भाईयो, मै कुलपति राजा दाऊद कै बारे म्ह थारे तै हिम्मत करकै कूँहूं सूं कै वो तो मरण्या अर गाड्या भी गया अर उसकी कब्र आज ताहीं म्हरै उरे न्यू-की-न्यू सै। 30 वो नवी था अर उसनै बेरा था के परमेसवर नै मेरै तै वादा करया सै के मै तेरी पीढी म्ह तै एक माणस नै तेरे सिंहासन पै बिठाऊँगा, 31 उसनै होण आळी बात ताहीं पैहल्याए तै देखकै मसीह कै जिन्दा उठण कै बारे म्ह भविष्यवाणी करी के ना तो उसका प्राण अथोलोक म्ह छोड्या गया अर ना उसकी देह सङ्घर्ष पाई। (Hades g86) 32 इस्से यीशु ताहीं परमेसवर नै जिन्दा करया, जिसके हम सारे गवाह सां। 33 इस तरियां परमेसवर के सोळे हाथ पै सबतै ऊँच्या पद पाकै, अर पिता तै वो पवित्र आत्मा पाकै जिसका वादा लिया गया था, उसनै यो उण्डेल दिया सै जो थम देक्खो अर सुणो सो। 34 क्यूँके दाऊद तो सुर्ग पै कोनी चढ्या, पर वो खुद कहवै सै, ‘प्रभु

परमेसवर नै मेरे प्रभु तै कह्या,’ मेरै सोळी ओड नै बैठ, 35 “जिब ताहीं के मै तेरे बैरियाँ नै तेरे कदमां तळै ना झुका दियुँ।” 36 “आखर इसाएल का सारा खानदान पक्की तरियां तै जाण लेवै के परमेसवर नै उस्से यीशु ताहीं जिस ताहीं थमनै क्रूस पै चढाया, प्रभु भी ठहराया अर मसीह भी।” 37 जिब माणसां नै यो सुण्या, तो विश्वास होया था के उनै गलत काम करया सै, अर वे पतरस अर बाकी प्रेरितां तै बुझाण लागे, “हे भाईयो, हम के करा?” 38 पतरस नै उनतै कह्या, “पाप करणा छोड़ द्यो, अर थारे म्ह तै होरेक अपणे-अपणे पापां की माफी कै खात्तर यीशु मसीह कै नाम तै बपतिस्मा लेवै, जिब थम पवित्र आत्मा का दान पाओगे। 39 क्यूँके या प्रतिज्ञा थम, अर थारी ऊलां, अर उन सारे दूर-दूर के आदमियां खात्तर भी सै जिन ताहीं प्रभु म्हरा परमेसवर अपणे धोरै बुलावैगा।” 40 पतरस नै कई और बातां तै, भी गवाही देदेकै समझाया के अपणे-अपणे इस टेढी जात तै बचाओ। 41 आखर जिननै उसके वचन पै विश्वास करकै बपतिस्मा लिया, अर उस्से दिन तीन हजार माणसां कै कीरीबन उन म्ह मिलगे। 42 जिननै पतरस के वचन पै विश्वास करया, वे प्रेरितां तै शिक्षा लेन्दे, अर संगति राखदे, अर रोट्टी तोड़ण, अर प्रार्थना करण म्ह मन रहे। 43 अर सारे के युश्लेम माणस दर्गे, अर घणे अनोक्खे काम अर चमत्कार प्रेरितां कै जरिये जाहिर होवै थे। 44 अर सारे विश्वास करणीये कठ्ठे रहवै थे, अर उनकी सारी चीज साझे म्ह थी। 45 वे अपणी-अपणी जायदाद अर सामान बेच-बेचकै जिसकी ज़रूरत होवै थी बांड दिया करै थे। 46 वे होरेक दिन एक मन होकै मन्दर म्ह कठ्ठे होवै थे, घर-घर रोट्टी तोड़दे होए खुशी अर मन की सीधाई तै खाणा खावै थे, 47 अर परमेसवर की जय-जयकार करै थे, अर सारे माणस उनतै राजजी थे जो उद्धार पावै थे, उन ताहीं प्रभु होरेक दिन उन म्ह मिला देवै था।

3 पतरस अर यूहन्ना दोफाहरै के तीन बजे पाच्छै प्रार्थना कै बखत मन्दर म्ह जाण लागरे थे। 2 अर माणस एक जन्म तै लंगडे नै ल्यावै थे, जिस ताहीं वे होरेक दिन मन्दर कै बाहरां पै जो सुन्दर नामक फाटक कुहावै सै, बिठा देवै थे, के वो मन्दर म्ह जाण आळा तै भीख माँगी। 3 जिब उसनै पतरस अर यूहन्ना ताहीं मन्दर म्ह जान्दे देख्या, तो उनतै भीख माँगी। 4 पतरस नै यूहन्ना कै गेल्या उसकी ओड गौर तै देखकै कह्या, “म्हारी ओड लखा!” 5 आखर वो उनतै कुछ पाण की आस राखते होए उनकी ओड लखाण लाग्या। 6 फेर पतरस नै कह्या, “चाँदी अर सोना तो मेरै धोरे सै न्ही, पर जो मेरै धोरै सै वो तनै दियुँ सूं यीशु मसीह नासरी कै नाम तै उठ अर चाल-फिर।” 7 पतरस नै उसका सोळा हाथ पकड़कै उस ताहीं ठाया, अर जिब्बे उसके पायां अर टाखण्यां म्ह ताकत आगी। 8 वो उछलते-कूदते खड्या होया अर चाल्लण-फिरण लाग्या, अर चाल्दा, अर कुद्दा, अर परमेसवर की जय-जयकार करदा होया उनकै गेल्या मन्दर म्ह गया। 9 सारे आदमियां नै उस ताहीं चाल्दे-फिरदे अर परमेसवर की जय-जयकार करदे होए देखकै, 10 उस ताहीं पिच्छाण लिया के यो वोए सै जो मन्दर कै “सुन्दर” नामक फाटक पै

बैठके भीख मांगया करै था, अर उस घटना तै जो उसकै गेल्या होई थी वे घणे अचम्भित अर हैरान होए। 11 जिब वो पतरस अर यूहन्ना ताहीं पकड़े होए था, तो सारे माणस घणे हैरान होन्दे होए उस बराम्दा म्ह जो सुलैमान का कुहावै सै, उनकै धोरै भाज्जे आये। 12 न्यू देखकै पतरस नै माणसां तै कह्या, “हे इस्याएलियों, थम इस माणस पै क्यातै हैरान होवो सो, म्हारी ओड़ क्यातै इस ढाळ लखाओ सों, के मान्नो हमनै-ए अपणी सामर्थ या भगति तै इस ताहीं चाल्लान-फिरण जोग्गा बणा दिया। 13 अब्राहम अर इसहाक अर याकूब के परमेसवर, म्हरे पूर्वजां के परमेसवर नै अपणे सेवक यीशु मसीह की महिमा करी, जिस ताहीं थमनै पकड़वा दिया, अर जिब राज्यपाल पिलातुस नै उस ताहीं छोड़ देण का विचार करया, फेर थमनै उसकै स्याम्ही उसका इन्कार करया। 14 थमनै उस धर्मी अर पवित्र का इन्कार करया, अर बिनीती करी के एक खुन्नी ताहीं थारे खात्तर छोड़ दिया जावै, 15 अर थमनै अनन्त जीवन के कर्ता ताहीं मार दिया, जिस ताहीं परमेसवर नै मरे होया म्ह तै जिन्दा करया, अर इस बात के हम गवाह सां। 16 मसीह यीशु कै नाम म्ह बिश्वास कै कारण इस माणस नै जिसनै थम जाणो सों, जिसनै थम इस बखत देक्खण लागरे सों, उस ताहीं ताकत दी सै, यो माणस यीशु के नाम म्ह अर मसीह यीशु पै बिश्वास के जरिये कती भला चंगा होया सै, जिसा के थम खुद देख सको सों।” 17 “इब हे भाईयो, मनै बेरा सै के थमनै अर थारे अगुवा नै यो काम अज्ञानता म्ह करया, क्यूँके थम न्ही जाणो थे के वो मसीह सै। 18 पर जिन बात्तां ताहीं परमेसवर नै सारे नबियाँ के मुँह तै पैहल्याए तै बता दिया था, के उसका मसीह दुख ठावैगा, उन ताहीं उसनै इस्से ढाळ पूरा करया। 19 इस करकै, पाप करणा छोड़ द्यो अर बोहड़ आओ के थारे पाप मिटाए जावै, जिसतै प्रभु के स्याम्ही तै सुख-चैन के दिन आवै, 20 अर वो यीशु ताहीं भेज्जै, जो थारे खात्तर पैहल्या तै ए मसीह ठहराया गया सै। 21 जरूरी सै के वो सुर्ग म्ह उस बखत ताहीं रहवै जिब ताहीं के वो सारी बात्तां का सुधार ना कर लेवै जिसका जिक्र पुराणे बखत तै परमेसवर नै अपणे पवित्र नबियाँ के मुँह तै करया सै। (aiōn g165) 22 जिस ढाळ के मूसा नबी नै कह्या, ‘परमेसवर थारे भाईयाँ म्ह तै थारे खात्तर मेरै जिसा एक नबी भेज्जैगा, जो किमे वो थारे तै कहवै उसकी सुपीयो।’ 23 पर हेरेक माणस जो उस नबी की न्ही सुणै, आदमियाँ म्ह तै नाश करया जावैगा।” 24 “अर शमूएल तै लेकै उसकै पाछै आला ताहीं जितने नबी बोल्ले उन सारया नै इन दिनां का सन्देश दिया सै। 25 थम सारे नबियाँ की ऊलाद अर उस करार के हिस्सेदार सो, जो परमेसवर नै थारे बाप-दाद्यां तै करया, जिब उसनै अब्राहम तै कह्या, ‘तेरी पीढ़ी के जरिये धरती के सारे खानदान आशीष पावैगें।’ 26 परमेसवर नै अपणे सेवक ताहीं मरे होया म्ह तै ठाकै सब तै पैहल्या थारे धोरै भेज्या, के थारे म्ह तै हेरेक ताहीं उसकी बुराईयाँ तै पलटा कै आशीष देवै।”

4 जिब वे आदमियाँ तै न्यू कहण लागरे थे, तो याजक अर मन्दर के सरदार अर सदूकी दल के लोग उनपै चढ़ आये। 2 क्यूँके वे घणे

खुन्दक म्ह थे के वे आदमियाँ ताहीं सिखावै थे, अर यीशु का उदाहरण दे-देकै प्रचार करै थे, के परमेसवर मुर्दा नै एक दिन जिन्दा करैगा जिसा उसनै यीशु ताहीं करया। 3 उननै उन ताहीं बन्दी बणाकै दुसरे दिन तक हवालात म्ह राख्या क्यूँके साँझा होग्यी थी। 4 पर वचन के सुणण आला म्ह तै घणाए नै बिश्वास करया, अर उनकै मिणती पांच हजार माणसां कै करीबन होग्यी थी। 5 दुसरे दिन इसा होया के उनके सरदार, यहूदी अगुवे, शास्त्री 6 अर महायाजक हन्ना, कैफा, यूहन्ना, सिकन्दर अर जितने महायाजक के कुण्डे के थे, सारे यशस्वीम नगर म्ह एक जगहां कठु होए। 7 वे उन ताहीं बिचालै खड़ा करकै बुझाण्डा लागे के थमनै यो काम किसकै सामर्थ तै अर किसकै नाम तै करया सै। 8 फेर पतरस नै पवित्र आस्मा तै भरकै उनतै कह्या, 9 “हे माणसां के सरदारो अर यहूदी अगुवों, इस कमजोर माणस गेल्या जो भलाई करी गयी सै, जै आज म्हरै तै उसकै बारै म्ह पूछताछ करी जावै सै, के वो किस ढाळ ठीक होया।” 10 तो थम सारे अर सारे इस्याएली आदमी जाण लेवै के यीशु मसीह नासरी कै नाम तै जिस ताहीं थमनै क्रूस पै चढ़ाया, अर परमेसवर नै मरे होया म्ह तै जिन्दा करया, यो माणस थारे स्याम्ही भला-चंगा खड़ा सै। 11 यीशु मसीह ए वो पत्थर सै जिस ताहीं थम राजमिस्त्रियाँ नै नकार दिया, अर वो सिरे का पत्थर होग्या। 12 “यीशु के अलावा किसे दुसरे नाम म्ह उद्धार कोनी, क्यूँके सुर्ग कै तलै माणसां म्ह और कोए दुसरा नाम कोनी दिया गया, सिर्फ यीशु के जरिये हम उद्धार पा सकां सां।” 13 जिब उननै पतरस अर यूहन्ना कै हिम्मत देक्खी, अर न्यू बेरा लाग्या के ये अनपढ़ अर साधारण सा माणस सै, तो अचम्भा करया, फेर उन ताहीं पिछाण्या के ये यीशु कै गेल्या रहे सै। 14 उस माणस ताहीं जो ठीक होया था, पतरस अर यूहन्ना कै गेल्या खड़े देखकै, वे बिरोध म्ह किमे न्ही कह सके। 15 पर उन ताहीं यहूदी अगुवां की सभा तै बाहर जाण का हुक्म देकै, वे आप्स म्ह विचार करण लागे, 16 “हम इन माणसां कै गेल्या के करा? क्यूँके यशस्वीम नगर के सारे रहणीया नै बेरा पाटरया सै, के इनकै जरिये एक मशहुर चमत्कार दिखाया गया सै, अर हम उसकै बारै म्ह नाट न्ही सकदे। 17 पर माणसां म्ह इस सुसमाचार का और घण प्रसार ना हो।” 18 फेर उन ताहीं बुलाया अर चेतावनी देकै न्यू कह्या, “यीशु कै नाम पै ना तो वे चर्चा करै अर ना सिखाइयो।” 19 पर पतरस अर यूहन्ना नै उन ताहीं जावाब दिया, “थमे न्याय करो, के यो परमेसवर कै धोरै भला सै के हम परमेसवर की बात तै बढ़कै थारी बात मान्नां। 20 क्यूँके यो तो म्हरै तै न्ही हो सकदा के जो हमनै देख्या अर सुण्या सै, वो न्ही कहां।” 21 फेर उननै उन ताहीं और धमकाकै छोड़ दिया, क्यूँके आदमियाँ कै कारण उन ताहीं सजा देण का कोए मौक्का न्ही मिल्या, इस करकै के जो घटना होई थी उसकै कारण सारे आदमी परमेसवर की बड़ाई करै थे। 22 वो माणस जो अचम्भे के काम तै ठीक होया था, चालीस बरस तै घणी उग्र का था। 23 वे छूट कै अपणे साथियाँ कै धोरै आए, अर जो किमे प्रधान याजकां अर यहूदी अगुवां नै उनतै कह्या था, उन ताहीं सुण्या दिया।

24 न्यू सुणके उननै एक मन होके ठाड़ू आवाज तै परमेसवर तै कह्हा, “हे मालिक,” तू वोए सै जिसनै सुर्ग अर धरती अर समन्दर अर जो किमे उन म्ह सै बणाया सै। 25 तन्नै पवित्र आत्मा के जरिये अपणे सेवक म्हारे पूर्वज दाऊद के मुँह तै कह्हा, “गैर यहूदियाँ नै रोला क्यातै मचाया? अर देश-देश के माणसां नै क्यातै बेकर म्ह बात सोच्ची?” 26 प्रभु अर उसके अभिषिक्त के बिरोध म्ह धरती के राजा खड़े होए, अर हाकिम एक सेती कठु होए। 27 “क्यूँके साच्चए तेरे सेवक यीशु के बिरोध म्ह, जिसका तन्नै अभिषेक करया, हेरोदेस अर पुन्तियुस पिलातुस भी गैर यहूदियाँ अर इसाएलियाँ कै गेल्या इस नगर म्ह कठु होए, 28 के जो किमे पैहल्या तै तेरी सामर्थ अर बुद्धि तै ठहरा था वोए करै। 29 इब हे प्रभु, उनकी धमकियाँ नै सुण, अर अपणे दास्सां ताही यो वरदान दे के तेरा वचन बड़ी हिम्मत तै सुणावै। 30 ठीक करण कै खात्तर तू अपणा हाथ बढ़ा के चमत्कार अर अनोखे काम तेरे पवित्र सेवक यीशु कै नाम तै करे जावै।” 31 जिब उननै प्रार्थना कर ली, तो वा जगहां जित वे कठु थे काम्बगी, अर वे सारे पवित्र आत्मा तै भरगे, अर परमेसवर का वचन हिम्मत तै सुणान्दे रहे। 32 बिश्वास करण आळा का टोळ एक चित्त अर एक मन का था, उरै ताहीं के कोए भी अपणी सम्पत्ति अपणी न्ही कहवै था, पर सारा किमे साझूझै म्ह था। 33 प्रेरित बड़ी सामर्थ तै प्रभु यीशु के जिन्दा होण की गवाही देन्दे रहे, अर उन साराया पै घणा अनुग्रह था। 34 अर उन बिश्वासियाँ म्ह कोए भी गरीब कोनी था, क्यूँके जिनकै धोरे धरती या घर थे, वे उननै बेच-बेचै, बिकि होई चिज्जां का दाम ल्यावै थे, अर उस ताहीं प्रेरितां के पायां म्ह धरे थे। 35 अर जिसी जिसकी जरूरत होवै थी, उसकै मुताबिक हरेक ताहीं बांड दिया करै थे। 36 यूसुफ नाम का साइप्रेस टापू का एक लेवी था जिसका नाम प्रेरितां नै बरनबास (यानिके उत्साहित करण आळा) धरया था। 37 उसकी किमे धरती थी, जिस ताहीं उसनै बेच्या, अर दाम के रपिये प्रेरितां के पायां म्ह धर दिए।

5 हन्न्याह नाम का एक माणस अर उसकी धरआळी सकिरा नै अपणी कुछ जमीन बेच्ची। 2 अर उसकै दाम म्ह तै कुछ अपणे खात्तर राख लिया, अर या बात उसकी धरआळी भी जाणै थी, उसका एक हिस्सा ल्याकै प्रेरितां के पायां म्ह धर दिया। 3 पतरस बोल्या, “हे हन्न्याह! शैतान नै तेरे मन म्ह या बात क्यातै घाल्ली के तू पवित्र आत्मा तै झूठ बोल्लै, अर जमीन के दाम म्ह तै किमे राख लैवै? 4 के बेचण तै पैहल्या वा जमीन तेरी कोनी थी? अर जिब बिकगी तो उस धन पै तेरा हक कोनी था? तन्नै या बात अपणे मन म्ह क्यातै सोच्ची? तन्नै माणसां तै न्ही, पर परमेसवर तै झूठ बोल्या सै।” 5 या बात सुणदे हन्न्याह जमीन पै पिर पड़या अर जी लिकड़या, सारे सुणाण आळे घणे डरगे। 6 फेर जवानां नै उठकै उसकी लाश ताहीं कपड़े म्ह लपेटा अर बाहरणै ले जाकै गाड़ दिया। 7 करीबन तीन धंटा कै पाछ्ये उसकी धरआळी, जिसनै बेराए कोनी था जो किमे होया था, भीत्तर आई। 8 फेर पतरस नै उसतै कह्हा, “मन्नै बता के थम दोनुआं नै वा जमीन इतनै म्ह बेच्ची थी?” वा बोल्ली,

“हाँ, इतनै ए म्ह।” 9 पतरस नै उसतै कह्हा, “या के बात सै के थम दोनुआं नै प्रभु की आत्मा ताहीं परखण खात्तर एक्का करया? लखा, तेरे धणी नै गाड्हण आळे बाहरणै ए खड़े सै, अर तन्नै भी बाहरणै ले जावैगे।” 10 फेर वा जिबे उसकै पायां म्ह गिर पड़ी, अर जी लिकड़या, अर जवानां नै भीत्तर आकै उस ताहीं मरया पाया, अर बाहरणै ले जाकै उसकै धणी कै धोरे ए उस ताहीं भी गाड़ दिया। 11 यरुशलेम की सारी कलासिया अर इन बात्तां के सारे सुणिनिये भोत घणे डरगे। 12 प्रेरितां के जरिये घणे चमत्कार अर अनोखे काम आदमियाँ कै बिचालै रिखाए जावै थे, अर वे सारे एक चित्त होकै सुलैमान के बरामदे म्ह कठु होया करै थे। 13 पर औरां म्ह तै किसे और की या हिम्मत कोनी होवै थी के उन म्ह जा मिलै, फेर भी आदमी उनकी बड़ाई करै थे। 14 प्रभु म्ह बिश्वास करण आळी की गिणती बढ़ती गई भोत घणे बिश्वासी प्रभु म्ह आ मिले, लोग-लुगाईयाँ का एक भोत बड़ा टोळ बणगया। 15 जो प्रेरित करण लागे थे, उसकी बजह तै माणस, बिमारां ताहीं सड़कां पै ल्याल्याकै, खाट-खटोल्यां पै लिटा देवै थे, के जिब पतरस आवै, तो उसकी छाया-ए उन म्ह तै किसे पै पड़ जावै। 16 यरुशलेम नगर कै लोवै-धोवै के नगरा तै भी घणे माणस बिमारां अर भुंडी ओपरी आत्मायाँ के सताए होया ताहीं चेल्यां के धोरै ल्या-ल्याकै, कठु होवै थे, अर सारे ठीक कर दिए जावै थे। 17 फेर महायाजक अर उसके सारे मित्तर जो सदूकियाँ कै पथ के थे, प्रेरितां तै जळण लागे। 18 अर प्रेरितां ताहीं पकड़कै जेल म्ह बन्द कर दिया। 19 पर रात नै प्रभु के एक सुर्गदूत नै जेल के किवाड़ खोल कै उन ताहीं बाहरणै ल्याकै कह्हा, 20 “जाओ, मन्दर म्ह खड़े होकै अनन्त जीवन की सारी बात आदमियाँ ताहीं सुणाओ।” 21 वे न्यू सुणकै सबेरा होन्दे मन्दर म्ह जाकै उपदेश देण लागे। फेर महायाजक अर उसके मित्तरां नै आकै यहूदी अगुवां की सभा अर इसाएलियाँ के सारे बुजुर्गां ताहीं कठु करया, अर जेल म्ह कहवां भेज्या के उन ताहीं ल्याओ। 22 पर मन्दर के पैहरेदारां नै उड़े पोहचकै उन ताहीं जेल म्ह कोन्या पाया, अर बोहड़के संदेशां दिया, 23 “हमनै जेल ताहीं घणी चौकसी तै बन्द कर राख्या था, अर पैहरेदारां ताहीं बाहरणै दरवाजायां पै खड़े पायां, पर जिब खोल्या, तो भीत्तर कोए ना मिल्या।” 24 जिब मन्दर के सरदार अर प्रधान याजकां नै या खबर सुणी, तो वे घबराए थे, अर वे यो विचार करण लागे के इन बात्तां का नतिज्जा के होगा! 25 इतनै म्ह किसे नै आकै उन ताहीं बताया, “देक्खो, जिन ताहीं थमनै जेल म्ह बन्द कर राख्या था, वे माणस मन्दर म्ह खड़े होकै आदमियाँ नै उपदेश देण लागे सै।” 26 फेर सरदार, पैहरेदारां कै गेल्या ओड़े जाकै, प्रेरितां ताहीं यहूदी अगुवां की सभा कै स्याम्ही लीआया, पर होंगे तै न्ही, क्यूँके वे आदमियाँ तै डरै थे के कदे म्हरै पै पथर ना बरसा देवै। फेर महायाजक नै उनतै बुझ्या, 28 “के हमनै थारे ताहीं चिताकै हुकम न्ही दिया था के थम इस नाम तै उपदेश ना दियो? फेरभी, थमनै सारे यरुशलेम नगर ताहीं अपणे उपदेश तै भर दिया सै अर उस माणस की हत्या का कसूर थम म्हारै पै लगाणा चाहो सो।” 29 फेर पतरस अर दुसरे प्रेरितां नै जवाब दिया,

“माणसां के हुक्म तै बढ़कै परमेसवर के हुक्म का पालन करणा ए म्हारा फर्ज सै। 30 म्हारे पूर्वजां कै परमेसवर नै यीशु ताहीं मुर्दा म्ह तै जिन्दा करया, जिस ताहीं थमनै क्रूस पै लटकाकै मार दिया था। 31 उससे ताहीं परमेसवर नै प्रभु अर उद्धरकर्ता ठैहराया अर परमेसवर नै मसीह यीशु ताहीं अपणे सोळे हाथ कान्ही बैठाया, ताके इस्याएल के माणस आप करणा छोड़ दे, अर अपणे पापां खात्तर उन ताहीं माफि मिल सकै। 32 हम इन बात्तां के गवाह सां अर उससे तरियां पवित्र आत्मा भी, जिस ताहीं परमेसवर नै उन ताहीं दिया सै जो उनका हुक्म मानै सै।” 33 यहूदी अगुवां की सभा के सारे माणस या बात सुनैकै जळगे, अर प्रेरितां ताहीं मारणा चाह्या। 34 पर गमलीएल नामक एक फरीसी नै जो शास्त्री अर सारे आदमियाँ म्ह आदर-मान राख्यै था, यहूदी अगुवां की सभा म्ह खड़े होकै प्रेरितां ताहीं थोड़ी देर खात्तर बाहरणै ले जाण का हुक्म दिया। 35 फेर वो बोल्या, “हे इस्याएलियों, थम जो किमे इन माणसां गैल करणा चाहवो सो, सोच-समझाकै करियो। 36 इन दिनां तै पैहल्या थियूदास भी दावा करै था के मै भी किमे सूं अर तकरीबन चार सौ माणस उसकै चेल्लें बणगे, पर वो मारया गया, अर उस ताहीं मानण आळे सब लोग बिखरणे अर उनका नामो-निशान भी कोनी रह्या। 37 उसकै पाच्छै नाम लिखाई के दिनां म्ह गलीलावासी यहूदा आया, अर कई आदमी अपणी ओड़ कर लिये, वो भी मर ग्या, अर जितने आदमी उसनै मानै थे, सारे तितर-बितर होग्ये। 38 ज्यांते मै थारे तै कहूँ सूं इन माणसां तै रूर ए रहो अर इनतै किमे काम ना राख्यो, क्यूँकै जै यो धर्म या काम माणसां की ओड़ तै हो फेर तो मिट जावैगा। 39 पर जै परमेसवर की ओड़ तै सै, तो थम उन ताहीं कदे भी नहीं मिटा सकदे। कदे इसा ना हो के थम परमेसवर तै भी लड़ान्आळे ठहरो।” फेर उननै उसकी बात मान ली। 40 अर प्रेरितां ताहीं बुलाकै छितवाया, अर यो हुक्म देकै छोड़ दिया के यीशु कै नाम तै दुबारा कोै बात ना करणा। 41 वे इस बात तै राज्जी होकै यहूदी अगुवां की सभा कै स्याम्ही तै चले गये, के हम यीशु कै नाम कै खात्तर बैज्जत होण कै जोग्ये तो ठहरे। 42 वे हेरेक दिन मन्दर म्ह अर घर-घर म्ह उपदेश करण तै, अर इस बात का सुसमाचार सुणाण तै के यीशु ए मसीह सै नहीं रुके।

6 उन दिनां म्ह जिब चेल्यां की गिणती घणी बधण लाग्यी, फेर यूनानी भाषा बोल्लण आळे यहूदी चेल्लें ड्रानी भाषा बोल्लण आळे यहूदी चेल्यां पै बिरडाण लागे, के हेरेक दिन पर्झिसा अर खाणे के मामलै म्ह म्हारी बिधवायाँ की सुध कोनी ली जान्दी। 2 फेर उन बारहां चेल्यां नै उन बिश्वासियाँ ताहीं जो यरशलेम म्ह थे, अपणे धोरै बुलाकै कह्या, “यो ठीक कोनी के हम परमेसवर का वचन छोड़कै खिलाण-पिलाण की सेवा म्ह रह्या। 3 इस करकै, हे बिश्वासी भाईयो, अपणे म्ह तै सात बढ़िया नाम्मी माणसां ताहीं जो पवित्र आत्मा अर बुद्धि तै भरे हो, जिनके बारें म्ह सब नै बेरा हो, छाँट ल्यो, के हम उननै इस काम पै ला देवां। 4 पर हम तो प्रार्थना म्ह अर वचन के प्रचार अर शिक्षा देण की सेवा म्ह लागे रहवांगे।” 5 या बात सारे टोळ नै आच्छी लाग्यी, अर उननै स्तिफनुस

नामक एक माणस ताहीं जो बिश्वास अर पवित्र आत्मा तै भरया था, अर फिलिप्पुस, अर पुखुरुस, अर नीकानोर, अर तीमोन, अर परमिनास, अर अन्ताकियावासी नीकुलाउस ताहीं जो यहूदी पंथ म्ह आ ग्या था, छाँट लिया। 6 इन ताहीं प्रेरितां कै स्याम्ही ल्याए अर उननै प्रार्थना करकै उनपै हाथ थे, ताके वे उस काम नै करै। 7 परमेसवर का वचन फैलदा गया अर यरशलेम नगर म्ह चेल्यां की गिणती घणी बढ़ी गई, अर भोत सारे यहूदी याजक भी प्रभु यीशु के सुसमाचार पै बिश्वास करकै मानणआळे होगे। 8 स्तिफनुस अनुग्रह अर सामर्थ तै भरया-पूरा होकै आदमियाँ म्ह बड़े-बड़े अनोखे काम अर चमत्कार दिखाया करै था। 9 फेर वो आराधनालय म्ह तै जो लिबरितिनों की कुहावै थी, अर कुरेनी अर सिकन्दरिया अर किलिकिया अर आसिया पदेस के आदमियाँ म्ह तै कई माणस उठकै स्तिफनुस तै बहसण लागे। 10 पर उस ज्ञान अर उस पवित्र आत्मा का जिसतै वो बात करै था, वे सामना नहीं कर सके। 11 इसपै उननै कई आदमियाँ ताहीं उकसाया जो कहण लागे, “हमनै इस ताहीं मूसा नबी अर परमेसवर कै बिरोध म्ह बुराई की बात कहन्दे होए सुण्या सै।” 12 उननै स्तिफनुस के बिरुद्ध माणसां, यहूदी अगुवां अर शास्त्रियाँ ताहीं उकसाया अर आकै उस ताहीं पकड़कै यहूदी अगुवां की सभा कै स्याम्ही ले ले गये। 13 अर उननै झूँझे गवाह खड़े करे, जिननै स्तिफनुस पै यो इलजाम लगाकै, कह्या, “यो माणस इस पवित्र जगहां अर मूसा के नियम-कायदे कै बिरोध म्ह बुराई करणा नहीं छोड़ा। 14 क्यूँकै हमनै उस ताहीं न्यू कहन्दे सुण्या सै के योए यीशु नासरी इस मन्दर नै गेर देवैगा, अर उन रिवाज्जां नै बदल देवैगा जो मूसा नबी नै म्हरै ताहीं सौपी सै।” 15 फेर सारे आदमियाँ नै जो यहूदी अगुवां की सभा म्ह बेठे थे, उसपै निगांह गड़ाई तौ उसका मुँह सुर्गदूत जिसा दिख्या।

7 फेर महायाजक नै स्तिफनुस तै बुझ्याया, “के यो इलजाम सच सै?” 2 उसनै कह्या, “हे भाईयो, अर बुजुर्गों सुणो। म्हारा पूर्वज अब्राहम हारान नगर म्ह बसण तै पैहल्या जिब वो मेसोपोटामिया परदेस म्ह था, तो तेजोमय परमेसवर नै उस ताहीं दर्शन दिया, 3 अर उसतै बोल्या, ‘तू अपणे देश अर अपणे कुण्बे म्ह तै लिकड़कै उस देश म्ह जा, जिस ताहीं मै तन्नै दिखाऊँगा।’” 4 फेर अब्राहम कसदियो के देश तै लिकड़कै हारान नगर म्ह जा बस्या। उसकै पिता की मौत कै पाच्छै परमेसवर नै उस ताहीं ओड़े तै इस देश म्ह ल्याकै बसाया जिसम्ह इब हम बसां सां, 5 अर उस ताहीं कुछ भी विरासत नहीं दी, बल्के पैर धरण भर की भी उस म्ह जगहां कोनी देर्खे, पर परमेसवर नै वादा करया, के मै यो देश तेरे अर तेरे बाद तेरे वंश कै हाथ कर दियुँगा, हालाकि उस बखत उसकै कोए बेटा कोनी था। 6 अर परमेसवर नै यो भी कह्या, “वे लोग उननै गुलाम बणा लेगे, अर चार सौ साल ताहीं उनकै गैल भुडा बरताव करैंगे।” 7 फेर परमेसवर नै यो भी कह्या, “के जिस जात के वे गुलाम होवैंगे, उस ताहीं मै सजा देँगा, अर इसकै बाद वे लिकड़कै इस्से देश म्ह मेरी भगति करैंगे।” 8 अर परमेसवर नै अब्राहम कै गैल खतने का करार

करया, जिब अब्राहम के बेटे इसहाक का जन्म होया, तो आंठवै दिन उसका खतना करया गया, अर इसहाक तै याकूब अर याकूब तै बारहां कुलपति पैदा होए। 9 “कुलपतियाँ नै अपणे भाई यूसुफ तै जल्ण करकै उस ताहीं मिस देश जाण आळा ताहीं बेच्या। पर परमेसवर उसकै गेल्या था, 10 अर परमेसवर नै यूसुफ ताहीं उसके सारे क्लेशां तै छुड़ाकै मिस देश कै राजा फिरैन की निगांह म्ह अनुग्रह अर बुद्धि दी, अर फिरैन नै उस ताहीं मिस देश पै अर अपणे सारे घर पै हाकिम बणा दिया। 11 “जिब यूसुफ मिस देश का हाकिम था, तो सारे मिस देश अर कनान देश म्ह अकाळ पड़ग्या, जिसै हरेक जगहां हाहाकार माचग्या, अर म्हारे पूर्वजां ताहीं नाज कोनी मिलै था। 12 पर याकूब नै न्यू सुणकै के मिस देश म्ह नाज सै, म्हारे पूर्वजां ताहीं नाज मोल लेण खात्तर पैहली बार भेज्या। 13 जिब वे दुसरी बार नाज मोल लेण खात्तर गये, तो यूसुफ नै खुद ताहीं अपणे भाईयाँ पै जाहिर करया, अर यूसुफ के परिवार के बारें म्ह फिरैन नै बेरा पाटग्या। 14 फेर यूसुफ नै अपणे बाप याकूब अर अपणे साबतै कुण्डे ताहीं, जो पचत्तर माणस थे, बुलवा भेज्या। 15 फेर याकूब मिस देश गया, अर कुछ साल्लां बाद ओड़ेप वो अर म्हारे पूर्वज मरग्ये। 16 उनकी लाश शकेम नगर म्ह पहुँचाकै उस कब्र म्ह धरी गई, जिस ताहीं अब्राहम नै चाँदी देकै शकेम नगर म्ह हमोर की ऊलाद तै मोल लिया था।” 17 “पर जिब उस वादा के पूरे होण का बखत लोवै आया जो परमेसवर नै अब्राहम तै करया था, तो मिस देश म्ह वे आदमी बढ़ग्ये अर घणे होये। 18 फेर मिस देश म्ह दुसरा राजा होया जो यूसुफ ताहीं कोनी जाणै था। 19 उसनै म्हारे जात्ति भाईयाँ तै हेरा-फेरी करकै म्हारे पूर्वजां कै गेल्या उरै ताहीं भुंडा बीवार करया, के अपणे माँ-बाप नै अपणे बाल्कां ताहीं बगाणे पड़गे, के एक भी बाल्क जिन्दा ना रहवै। 20 “उस बखत मूसा नबी पैदा होया। वो परमेसवर की निगांह म्ह घणा सुथरा था। वो तीन महिने ताहीं अपणे बाप कै घरां लुक्को कै पाल्या गया। 21 जिब उसके परिवार आळे उस ताहीं और न्ही लटको सके, तो उननै मूसा ताहीं छोड़णा पड़या, फेर फिरैन की बेटी नै उस ताहीं ठा लिया, अर अपणा बेटा करकै पाल्या। 22 मूसा नबी नै मिस देश की सारी विद्या पढ़ाई गई, अर वो बोलण म्ह अर काम करण म्ह, दोनुआ म्ह सामर्थी था।” 23 “जिब मूसा नबी चालीस साल का होया, तो उसकै मन म्ह आया के मै अपणे इस्माएली भाईयाँ तै मिलूं। 24 उसनै एक इस्माएली माणस पै जुल्म होन्दे देखकै उस ताहीं बचाया, अर उस मिसी आदमी ताहीं मारकै सताए होए का बदला लिया। 25 मूसा नै सोच्या के उसके भाई-बन्धु जाण जावैंगे के उन ताहीं गुलामी तै छुटकारा दुआण खात्तर परमेसवर उसका इस्तमाल करण लाग रह्या सै, पर वे इस ताहीं समझ न्ही पाये। 26 दुसरे दिन जिब वे आप्स स्व म्ह लड़ै थे, तो वो उड़ै तै आण लिकड्या, अर न्यू कहकै उननै मेल करण कै खात्तर समझाया, हे भले माणसों, थम तो भाई-भाई सो, एक-दुसरे पै क्यांतै जुल्म करो सो?” 27 “पर जो अपणे पडोसी पै जुल्म करै था, उसनै उस ताहीं न्यू कहकै धक्का दिया, ‘तेरे ताहीं किसनै म्हारै पै हाकिम अर न्यायाधीश

ठहराया सै? 28 के जिस ढाळ तै तन्नै काल उस मिसी आदमी ताहीं मार दिया मनै भी मार देणा चाहवै सै?’ 29 या बात सुणकै मूसा नबी डरकै भाज्या अर मिथान देश म्ह परदेशी होकै रहण लाग्या, अर ओड़ै उसके दो बेटे पैदा होए।” 30 “जिब मूसा ताहीं ओड़ै रहदे पूरे चालीस साल बीतगे, तो परमेसवर नै एक सुर्गदूत के रूप म्ह सीनै पहाड़ के बण म्ह उस ताहीं बल्दी होई झाड़ी की ज्वाला म्ह दर्शन दिया। 31 मूसा नबी नै यो बल्दी होई झाड़ी का दर्शन देखकै हेरानी होई, अर जिब देखण खात्तर लोवै गया, तो प्रभु की या वाणी सुणाई दी, 32 ‘मै तेरे पूर्वज, अब्राहम, इसहाक, याकूब का परमेसवर सूँ’ फेर मूसा नबी डर के मारे काम्बग्या, उरै ताहीं के उसकी देखण की हिम्मत भी कोनी होई।” 33 “फेर प्रभु नै मूसा नबी तै कह्या, ‘अपणे पायां तै जूती उत्तर ले, क्यूँके जिस जगहां तू खड्या सै, वा पवित्र धरती सै। 34 मनै साच्ये अपणे आदमियाँ की जो मिस देश म्ह सै, भुन्डी हालत देक्खी सै, अर उनकी आह अर उनका रोणा सुण्या सै, ज्यातै उन ताहीं छुड़ाण कै खात्तर उत्तरया सूँ। इब आ, मै तन्नै मिस देश भेज्जूँगा।’” 35 “जिस मूसा नबी ताहीं उननै न्यू कहकै नकारा दिया था, ‘तेरे ताहीं किसनै म्हारै पै हाकिम अर न्यायाधीश ठहराया सै?’ उससे ताहीं परमेसवर नै हाकिम अर छुड़ाण आळा ठहराकै उस सुर्गदूत के जरिये जिसनै उस ताहीं झाड़ी म्ह दर्शन दिया था, भेज्या। 36 योए माणस मिस देश अर लाल समुन्दर अर जगळ म्ह चालीस साल ताहीं अनोखें काम अर चमत्कार दिखाए-दिखाकै उन ताहीं लिकाड़ ल्याया।” 37 यो वोए मूसा नबी सै, जिसनै इस्माएल के माणसां तै कह्या, “परमेसवर थारे भाईयाँ म्ह तै थारे खात्तर मेरै जिसा एक नबी ठावैगा। 38 यो वोए सै, जिसनै जंगळ म्ह इस्माएली मण्डळी कै बिचाळै उस सुर्गदूत के साथ सीनै पहाड़ पै उसतै बात करी, अर म्हारे पूर्वजां कै गेल्या था, उस्से ताहीं जिन्दा वचन मिल्या ताके म्हारै तक पोहोचावै।” 39 पर म्हारे पूर्वजां नै उसकी मानानी कोनी चाही, बल्के उस ताहीं हटाकै अपणे मन मिस देश की ओड़ पलटे, 40 अर मूसा नबी कै भाई हालन तै, कह्या, म्हारै खात्तर इसा देवता बणा, जो म्हारै आगै-आगै चाल्लै, क्यूँके यो मूसा नबी जो हमनै मिस देश तै लिकाड़ ल्याया, हमनै न्ही बेरा के उसकै के होया? 41 उन दिनां म्ह उननै एक बाल्डे की मूर्ति बणाकै उसकै आगै बलि चढ़ाई, अर अपणे हाथां तै बणाई होई मूर्ति तै मन्न होण लाग्ये। 42 इस खात्तर परमेसवर नै मुँह मोङ्कै उन ताहीं छोड़ दिया, के अकास के सूरज चाँद सितारां ताहीं परमेसवर मानकै पूजै, जिस नबीयाँ की किताब म्ह लिख्या सै, “हे इस्माएल के घराने, के थम जंगळ म्ह चालीस साल ताहीं पशुबलि अर अन्नबलि मेरै ताहीं ए चढ़ान्दे रहे?” 43 “थम उस तम्बू ताहीं जिस म्ह मोलेक देवता की मूर्ति अर अपणे रिफान देवता, के तरे नै लिये फिरे, यानिके उन मूरतां ताहीं जिन ताहीं थमनै आराधना करण कै खात्तर बणाया था। इस करकै मै थारे ताहीं बेबीलोन देश तै परली ओड़ ले जाकै बसाऊँगा।” 44 “मिलापआळे तम्बू की जंगल-बियाबान म्ह म्हारै पूर्वजां कै बिचाळै था, जिसा उसनै ठहराया जिसनै मूसा नबी तै कह्या, ‘जो रूप

तन्नै देख्या सै, उसकै मुताबिक इसनै बणा।’ 45 उस्से तम्भू नै म्हरे पूर्वज पाछ्छले बखत तै पाकै यहोशू कै गेल्या उरै लियाये, जिस बखत के उननै उन दुसरी जात्तां पै हक पाया, जिन ताहीं परमेसवर नै म्हरै पूर्वजां कै स्याम्ही तै लिकाडु दिया, अर वो तम्भू राजा दाऊद के बखत ताहीं रहया। 46 दाऊद पै परमेसवर नै अनुग्रह करया, राजा दाऊद नै याकूब के परमेसवर कै खात्तर रहण की जगहां बणाण की बिनती करी। 47 पर उसके बेटे राजा सुलैमान नै उसकै खात्तर घर बणाया।’ 48 पर परमप्रथान हाथ के बणाए होए घरां म्ह कोमी रहन्दा, जिसा के यशायाह नवी की किताब म्ह कहाया, 49 “परमेसवर कहवै सै, सुर्ग मेरा सिंहासन अर धरती मेरी पायां तलै की पीढी सै, मेरै खात्तर थम किस ढाळ का घर बणाओगे? अर मेरै आराम कि कौण-सी जगहां होवैरी?” 50 के ये सारी चीज मेरै जरिये न्हीं बणाई गई सै? 51 “हे जिद्दी, अर मन अर कान के खतनारहित आदमियो, थम सारी हाण पवित्र आत्मा का बिरोध करो सो। जिसा थारे पूर्वज करै थे, उस्से तरियां ए थम भी करो सो। 52 के कोए इसा भी नवी था, जिस ताहीं थारे पूर्वजां नै न्हीं सताया हो? उननै तो उस ताहीं भी मार दिया, जिननै भोत पैहले ए तै उस मसीहा के आण की मुनाद्दी कर दी थी, जिस ताहीं इब थमनै धोक्खे तै पकड़वा दिया अर मार दिया। 53 थमनै सुर्गदूतां कै जरिये ठहराये होए नियम-कायदे तो पाए, पर उसका पालन कोनी करया।” 54 ये बात सुणकै यहूदी अगुवे छो म्ह भरगे अर स्तिफनुस पै दाँत पिस्सण लाग्ये। 55 पर उसनै पवित्र आत्मा तै पूरी तरियां भरकै सुर्ग की ओड़ देख्या अर परमेसवर की महिमा अर यीशु ताहीं परमेसवर के सोळी ओड़ खड्या देखकै 56 कहा, “देक्यो, मै सुर्ग नै खुल्या होया, अर माणस के बेटे ताहीं परमेसवर कै सोळी ओड़ खड्या देखु सूं।” 57 फेर ये बात सुणते ए सुणण आला नै चीखते होए अपणे कान्ना पै हाथ रख लिये, अर वे छो म्ह एक साथ उसपै टूट पडे, 58 अर स्तिफनुस ताहीं यश्शलेम नगर कै बाहरणे लिकाड़कै उसपै पत्थर बरसाण लाग्ये। गवाहां नै अपणे लत्ते शाऊल नामक एक जवान कै पायां कै धोरै उतारकै धर दिए। 59 वे स्तिफनुस पै पत्थर बरसान्दे रहे, अर वो न्यू कूहकै प्रार्थना करदा रह्या, “हे प्रभु यीशु, मेरी आत्मा ताहीं अपणाले।” 60 फेर गोहु टेककै ठाडू आवाज म्ह रुक्का मारया, “हे प्रभु, यो पाप उनपै मतना ला।” अर न्यू कह कै उसनै अपणे प्राण दे दिए।

8 शाऊल उसकै मारण म्ह सहमत था। उस्से दिन यरुशलेम नगर की कलीसिया म्ह घणा दंगा शरू होया अर प्रेरितां नै छोड़कै सारे के सारे यहूदिया अर सामरिया परदेस म्ह खिंड-मिंड होये। 2 कुछ परमेसवर भगतां नै स्तिफनुस ताहीं कब्र म्ह धरया अर उसकै खात्तर घणा बिलाप करया। 3 शाऊल कलीसिया नै सताण लागरया था, अर घर-घर म्ह बड़कै माणसा अर लुगाईयां ताहीं घिसड़ा-घिसड़ा कै जेल म्ह गैरे था। 4 जो बिश्वासी खिंड-मिंड होए थे, वे सुसमाचार सुणान्दे होए हान्डे, 5 अर फिलिप्पुस सामरिया परदेस के एक नगर म्ह जाकै माणसा म्ह मसीह का प्रचार करण लाग्या। 6 जो बात फिलिप्पुस नै कही उन

ताहीं आदमियाँ नै सुणकै अर जो चमत्कार वो दिखावै था उन ताहीं देख देखकै, एक चित्त होकै मन लगाया। 7 क्यूँकै घणाखरयां म्ह तै भुंडी ओपरी आत्मा ठाडू आवाज म्ह किल्की मारदी होई लिकड़ग्यी, अर घणखरे लकवे के बीमार अर लंगड़े भी ठीक करे गये, 8 अर उस नगर म्ह घणी खुशी मनाई गई। 9 उस नगर म्ह शमौन नाम का एक माणस था, जो जादू-टोणा करकै सामरिया परदेस के आदमियाँ नै हैरान करदा अर खुद ताहीं एक बड़ा माणस बतावै था। 10 छोट्या तै लेकै बहुयाँ ताहीं सारे उसका आदर करके कहवै थे, “यो माणस परमेसवर की वा शक्ति सै, जो महान् कुहावै सै।” 11 उसनै घणे दिनां तै उन ताहीं अपणे जादू के कामां तै हैरान कर राख्या था, ज्यांते वे उसकी घणी मानै थे। 12 पर जिब माणसां नै परमेसवर के राज्य अर यीशु मसीह के नाम का सुसमाचार, फिलिप्पुस के संदेश म्ह सुण्या, तो सारे माणसां अर लुगाईयाँ नै बिश्वास करया अर सब नै बपतिस्मा ले लिया। 13 फेर शमौन नै खुद भी फिलिप्पुस के संदेश का बिश्वास करया अर बपतिस्मा लेकै उसकै गेल्या रहण लाग्या। वो चमत्कार अर बेन्ड-बड़े सामर्थ के काम होन्दे देखकै हैरान होवै था। 14 जिब प्रेरितां नै जो यरुशलेम नगर म्ह थे, सुण्या के सामरिया परदेस के माणसां नै परमेसवर का वचन मान लिया सै तो पतरस अर यूहन्ना ताहीं उनकै धोरै भेज्या। 15 उननै ओड़े जाकै उनकै खात्तर प्रार्थना करी के पवित्र आत्मा पावै। 16 क्यूँकै वो इब ताहीं इन म्ह तै किसे पै भी कोनी उतरया था, उननै तै सिफ्र प्रभु यीशु कै नाम तै बपतिस्मा लिया था। 17 फेर प्रेरितां नै उनपै हाथ धरे अर उननै पवित्र आत्मा पाया। 18 जिब शमौन नै देख्या के प्रेरितां कै हाथ धरण तै पवित्र आत्मा दिया जावै सै, तो उनकै धोरै रपिये ल्याकै कहाया, 19 “या शक्ति मन्नै भी थो, के जिस किसे पै हाथ धरू वो पवित्र आत्मा पावै।” 20 पतरस नै उसतै कह्या, “तेरे रपिये तेरे गेल्या नाश होज्या, क्यूँकै तन्नै परमेसवर का दान रपियाँ तै मोल लेण का विचार करया। 21 इस बात म्ह ना तेरा हिस्सा सै, ना हक, क्यूँकै तेरा मन परमेसवर कै आगै सच्चा कोनी। 22 इस करकै अपणी इस बुरी सोच नै छोड़कै प्रभु तै प्रार्थना कर, हो सकै सै वो तेरे मन का यो बुरा विचार माकै करदे। 23 क्यूँकै मै देक्खूँ सूं के तू कूड़वाहट तै भरया सै अर पाप के चुंगल म्ह फैसा सै।” 24 शमौन नै जबाब दिया, “थम मेरै खात्तर प्रभु तै प्रार्थना करो के जो बात थमनै कही, उन म्ह तै कोए भी मेरै पै न्हीं आवै।” 25 आखर म्ह वे गवाही देकै प्रभु यीशु का वचन सुणाकै यरुशलेम नगर नै बोहंडे, अर सामरिया के घणखरे गाम्मा म्ह सुसमाचार सुणान्दे गये। 26 फेर प्रभु कै एक सुर्गदूत नै फिलिप्पुस तै कहाया, “उठ अर दक्षिण की ओड़ उस राह पै जा, जो यरुशलेम नगर तै गाज़ा नगर म्ह जावै सै।” यो बियाबान राह सै। 27 वो उठकै चल दिया, अर देक्यो, कूश देश का एक माणस आण लागरया था जो खोजा (किन्नर) अर कूशियों की राणी कन्दाके का मंत्री अर खजांची था। वो आराधना करण खात्तर यरुशलेम नगर म्ह आया था। 28 वो अपणे रथ पै बेठ्या होया था, अर यशायाह नवी की किताब पढ़दा होया बोहंडण लागरया था। 29

फेर पवित्र आत्मा नै फिलिप्पुस ताहीं कह्या, “लोवै जाकै इस रथ कै गेल्या हो ले।” 30 फिलिप्पुस दौड़ कै रथ कै धोरै पोहचा अर उस ताहीं यशायाह नबी की किताब पढ़ते होए सुण्या, अर बुझ्याया, “तू जो पढ़ै सै, के उसनै समझौ भी सै?” 31 वो बोल्या, “जिब ताहीं कोए मैरै ताहीं नहीं समझावै तो मै किस ढाळ समझूँ।” अर फिलिप्पुस तै बिनती करी के वो रथ पै चढ़कै उसकै धोरै बेटै। 32 पवित्र ग्रन्थ का जो पाठ वो पढ़ै था, वो यो था: “वो भेड़ की ढाळ मारण खातर पोहचाया गया, अर जिस तरियां मेमा अपणे ऊन काढुण आठाकै स्याम्ही बोल-बाल्ला रहवै सै, उस्से तरियां ए उसनै भी अपणा मुँह कोनी खोल्या।” 33 “उस ताहीं अपमानित करया गया अर उस ताहीं कोए न्याय न्ही मिल्या। उसकै बखत के माणसां का ब्यौरा कौण देवैगा? क्यूँकै धरती तै उसका प्राण ठा लिया जावै सै।” 34 इसपै खोजे (किन्नर) नै फिलिप्पुस तै बुझ्याया, “मै तेरै तै बिनती करूँ सूँ न्यू बता के नबी यो किसकै बारै मृ कहवै सै, अपणे या किसे दुसरै कै बारै मृ?” 35 फेर फिलिप्पुस नै बताणा शुरू करया, अर इस्से पवित्र ग्रन्थ तै शुरू करकै उस ताहीं यीशु का सुसमाचार सुणाया। 36 राह मृ चाल्दे-चाल्दे वे किसे तालाब कै धोरै पोहवे। फेर खोजे नै कह्या, “लखा उरै पाणी सै, इब मनै बपतिस्मा लेण मृ के रोक सै।” 37 फिलिप्पुस बोल्या, “जै तू पूरे मन तै बिश्वास करै सै तो ले सकै सै।” उसनै जवाब दिया, “मै बिश्वास करूँ सूँ के यीशु मसीह परमेसवर का बेट्टा सै।” 38 फेर उसनै रथ खड़या करण का हुकम दिया, अर फिलिप्पुस अर खोजा (किन्नर) दोनु तालाब मृ बड़े, अर उसनै खोजा (किन्नर) ताहीं बपतिस्मा दिया। 39 जिब वे पाणी मृ तै लिकड़कै ऊपरान आये, तो प्रभु का आत्मा फिलिप्पुस ताहीं ठा लैया, अर खोजे नै उस ताहीं दुबारा न्हीं देख्या, अर वो खुश था क्यूँकै परमेसवर नै उस ताहीं बचा लिया सै। 40 फिलिप्पुस अशदोद नगर मृ आ लिकड़या, अर जिब ताहीं कैसरिया नगर मृ न्हीं पोँच्या, तब तक नगर-नगर सुसमाचार सुणान्दा गया।

9 शाऊल जो इब ताहीं प्रभु यीशु कै चेल्यां ताहीं धमकाण अर मारण की धुन मृ था, महायाजक कै धोरै गया 2 अर उसतै दमिश्क नगर के आराधनालायों कै नाम पै इस बाबत मृ चिट्ठियाँ माँगी के, के चाहे माणस हो, चाहे लुगाई हो, जिन नै वो इस पंथ मृ पावै उन ताहीं बाँधकै यरुशलेम नगर लियावै। 3 पर चाल्दे-चाल्दे जिब शाऊल अर उसकै साथी दमिश्क नगर कै लोवै पोहुच्ये, तो चाणचक अकास तै उसकै चौगरदे नै चाँदांगा चमक्या, 4 अर वो धरती पै पड़या अर परमेसवर का यो शब्द सुण्या, “हे शाऊल, हे शाऊल, तू मनै क्यांतै सतावै सै?” 5 उसनै बुझ्याया, “हे प्रभु, तू कौण सै?” उसनै कह्या, “मै यीशु सूँ जिस ताहीं तू सतावै सै।” 6 पर इब उठकै नगर मृ जा, अर जो तनै करणा सै वो तेरै तै कह्या जावैगा।” 7 जो माणस उसकै गेल्या थे, वे हैरान रहये, क्यूँकै बोल तो सुणै थे पर किसे ताहीं देक्खै कोनी थे। 8 फेर शाऊल धरती पै तै उठ्या, पर जिब आँख खोल्ली तो उस ताहीं किमे कोनी दिख्या, अर वे उसका हाथ पकड़कै दमिश्क नगर मृ ले गये। 9

वो तीन दिन ताहीं कोनी देख सक्या, अर ना खाया अर ना पिया। 10 दमिश्क नगर मृ हनन्याह नामक एक चेल्ला था, उसतै प्रभु यीशु नै दर्शन मृ कह्या, “हे हनन्याह!” वो बोल्या, “हाँ, प्रभु!” 11 फेर प्रभु नै उसतै कह्या, “उठकै उस गली मृ चल्या जा जो ‘सीधी’ कुहावै सै, अर यहूदा कै घर मृ शाऊल नामक एक तरसुसवासी नै बुझ, क्यूँकै देख, वो प्रार्थना करण लागरया सै, 12 अर उसनै दर्शन मृ हनन्याह नामक एक माणस ताहीं भीत्तर आन्दे अर अपणे उपर हाथ धरदे देख्या सै, ताके दुबारा आँखां की रोशनी पावै।” 13 हनन्याह नै जवाब दिया, “हे प्रभु, मनै इस माणस कै बारै मृ धणाए तै सुण्या सै कै इसनै यरुशलेम नगर मृ तेरै आदिमयाँ गेल्या बहृ-बहृ बुराई करी सै, 14 अर उरै भी इस ताहीं प्रधान याजकां की ओड़ तै हक मिल्या सै कै जो माणस तेरे मृ बिश्वास राक्खै सै, उन सारया नै बाँधकै यरुशलेम ले जा।” 15 पर प्रभु नै उसतै कह्या, “तू चल्या जा, क्यूँकै वो तो गैर यहूदी अर राजयां अर इसाएलियों कै स्याम्ही मेरा नाम का प्रचार करण कै खात्तर चुण्या होया पारत सै। 16 अर मै उसनै बताऊँगा, के मैरै बारें बताण कै खात्तर उसनै किसा-किसा दुख ठाणा पड़ैगा।” 17 फेर हनन्याह उठकै उस घर मृ गया जड़ै शाऊल रुक्या था, अर उसपै अपणा हाथ धरकै कह्या, “हे भाई शाऊल, प्रभु, यानिके यीशु, जो उस राह मृ, जिसतै तू आया तेरे ताहीं दिख्या था, उस्से नै मैरै ताहीं भेज्या सै कै तू दुबारा आँखां की रोशनी पावै अर पवित्र आत्मा तै भरया-पूरा हो जावै।” 18 अर जिब्बे उसकी आँखां तै छिल्के-से पड़े अर वो देखण लाग्या, अर उठकै बपतिस्मा लिया, 19 फेर खाणा खाकै हिम्मत पाई। शाऊल कई दिन उन चेल्यां कै गेल्या रह्या जो दमिश्क नगर मृ थे। 20 अर वो जिब्बे दमिश्क नगर के आराधनालायाँ मृ यीशु का प्रचार करण लाग्या, के वो परमेसवर का बेट्टा सै। 21 सारे सुणण आळे हैरान होकै कहण लाग्ये, “के यो वोए माणस न्हीं सै जो यरुशलेम नगर मृ उन ताहीं जो यीशु मसीह के बिश्वासी थे, उनका नाश करया करै था, अर उरै भी इस्से खात्तर आया था, के उननै बाँधकै प्रधान याजकां कै धोरै ले जावै?” 22 पर शाऊल और भी सामर्थी होंदा गया, अर इस बात का सबूत दे-देकै, के मसीह यीशु-ए सै, दमिश्क नगर के रहणीये यहूदियाँ का मुँह बन्द करदा रह्या। 23 जिब शाऊल नै ओड़े रहन्दे होए भोत दिन बीतगे, तो यहूदियाँ नै मिलकै उस ताहीं मारण की साजस रही। 24 पर उनकी साजिस का शाऊल नै बेरा पाटग्या। वे तो उसनै मारण खात्तर रात-दिन फाटकां पै घात मृ लाग्ये रहवै थे। 25 पर रात नै उसके चेल्यां नै उस ताहीं टोकरे मृ बिठाया, अर दमिश्क नगर की चारदीवारी पै तै लटकाकै उतार दिया। 26 यरुशलेम नगर मृ पोहचकै शाऊल नै चेल्यां कै गेल्या मिल जाण की कोशिश करी, पर सारे उसतै डैरै थे, क्यूँकै उननै बिश्वास कोनी होवै था, के वो भी चेल्ला सै। 27 पर बरनबास नै उस ताहीं अपणे गेल्या प्रेरितां कै धोरै ले जाकै उन ताहीं बताया कै इसनै किस ढाल तै राह मृ प्रभु यीशु ताहीं देख्या, अर यीशु नै इसतै बात करी, फेर दमिश्क नगर मृ इसनै किस तरियां हिम्मत दिखाकै यीशु कै नाम

का प्रचार करया। 28 वो उनके गेल्या यरुशलेम नगर म्ह आन्दा-जान्दा रहया 29 अर बेधडक होके प्रभु का नाम तै प्रचार करै था, अर यूनानी भाषा बोल्लण आळे यहूदियाँ कै गेल्या बोलचाल अर बहस करै था, पर वे उसनै मारण की कोशिश करण लाग्ये। 30 न्यू जाणकै भाई उस ताहीं कैसरिया नगर लिअये, अर तरसुस नै भेज दिया। 31 इस तरियां सारे यहूदिया परदेस, अर गलील परदेस, अर सामरिया परदेस की कल्लिसिया नै चैन मिल्या, अर उसके बढोतरी होन्दी गई, अर वा प्रभु कै भय अर पवित्र आत्मा की शान्ति म्ह चाल्दी अर बढ़दी गई। 32 फेर इसा होया कै पतरस हरेक जगहां हांडदा होया, उन पवित्र आदिमियाँ कै धोरै भी पोंहच्या जो लुद्धा नगर म्ह रहवै थे। 33 ओङै उसनै एनियास नामक लकवे का रोगी एक माणस मिल्या, जो आठ साल तै खाट पै पड्या था। 34 पतरस नै उसतै कह्या, “हे एनियास! यीशु मसीह तनै ठीक करै सै। उठ, अपणा बिछाणा ठा।” फेर वो जिब्बे उठ खड्या होया। 35 फेर लुद्धा नगर अर शारोन के सारे रहणीये उस ताहीं देखकै प्रभु की ओङै फिरे। 36 याफा नगर म्ह तबीता यानिके दोरकास नाम की एक विश्वासण रहवै थी। वा घणे भले-भले काम अर दान करया करै थी। 37 उन्हे दिनां म्ह जिब पतरस लुद्धा नगर म्ह था, तो वा बीमार होके मरणी, अर उननै उस ताहीं नुहांके चुबारे पै धर लिया। 38 लुद्धा नगर याफा नगर कै धोरै था, चेल्यां नै न्यू सुणकै पतरस ओङै सै, दो माणस भेजकै उसतै बिनती करी, “म्हारै धोरै आण म्ह वार ना लावै।” 39 फेर पतरस उठकै उसके गेल्या हो लिया, अर जिब वो पोंहच्या तो वे उसनै उस चौबारे म्ह ले गये। सारी बिधवां रोंदी होई उसके धोरै आण खडी होई, अर जो कुडते अर लत्ते दोरकास नै उनके गेल्या रहदे होए बणाए थे, दिखाण लाग्यी। 40 फेर पतरस नै सारया ताहीं बाहरणी कर दिया, अर गोडू टेक कै प्रार्थना करी अर लाश की ओड़ लखाकै कह्या, “हे तबीता, उठ!” फेर उसनै अपणी आँख खोल दी, अर पतरस ताहीं देखकै उठ बेट्टी। 41 उसनै हाथ बढ़ाकै उस ताहीं ठाया, अर पवित्र आदमी अर बिधवायाँ ताहीं बुलाकै उस ताहीं जिन्दा दिखा दिया। 42 या बात साब्बत याफा नगर म्ह फैलग्यी, अर घणखरयां नै प्रभु यीशु पै विश्वास करया। 43 अर पतरस याफा नगर म्ह शमौन नामक किसे चमडे का धन्धा करणीये कै उरै घणे दिनां ताहीं रहया।

10 कैसरिया नगर म्ह कुरनेलियुस नाम का एक माणस था, जो इतालियानी नामक पलटन का सूबेदार था। 2 वो भगत था, अर अपणे साज्जे कुण्बे सुधा परमेसवर तै डरै था, अर गरीब यहूदी आदिमियाँ ताहीं घणा दान देवै था, अर बराबर परमेसवर की प्रार्थना करै था। 3 उसनै दिन कै बजे कै लोवै दर्शन म्ह साफ तौर तै देख्या कै परमेसवर का एक सुर्गदूत उसकै धोरै भीत्तर आकै कहवै सै, “हे कुरनेलियुस!” 4 कुरनेलियुस नै उस ताहीं गौर तै देख्या अर डरकै कह्या, “हे प्रभु, के हुक्म सै?” उसनै उसतै कह्या, “तेरी प्रार्थनाएँ अर तेरे दान याद कै खात्तर परमेसवर कै स्याम्ही पोहचे सै, 5 अर याफा नगर म्ह माणस भेजकै शमौन नै, जो पतरस कुहावै सै, बुलवा ले। 6 वो शमौन, चमडे

का धन्धा करण आळे कै उरै मेहमान सै, जिसका घर समुन्दर कै किनारे सै।” 7 जिब वो सुर्गदूत जिसनै उसतै बात करी थी चल्या गया, तो कुरनेलियुस नै दो नौककर, अर जो उसकै लोवै हाजिर रहया करै थे उन म्ह तै एक भगत सिपाही ताहीं बुलाया, 8 अर उन ताहीं सारी बात बताकै यापा नगर की ओङै भेजा, ताके पतरस ताहीं ले आवै। 9 दुसरे दिन जिब वे तीन आदमी जो कुरनेलियुस जरिये भेज्जे गये थे, चाल्दे-चाल्दे नगर कै धोरै पोहचे, तो दोफारी कै लोवै पतरस छात पै प्रार्थना करण चढ़या। 10 उसनै भूख लाग्या अर कुछ खाणा चाहवै था, पर जिब वे खाणा त्यार करै थे तो वो बेसुध होग्या, 11 अर उसनै देख्या, के अकास खुलग्या, अर एक बड़ी चाद्र च्यारु कुण्यां तै लटकदी होई, धरती की ओङै उतै सै। 12 जिस म्ह धरती के सरे ढाळ के चार पैरां आळे अर रेणीए आळे जिनोर अर अकास के पंछी थे। 13 उसनै एक इसा बोल सुण्या, “हे पतरस उठ, मार अर खा।” 14 पर पतरस नै कह्या, “ना प्रभु, कती भी न्ही, क्यूँके मन्नै कदे कोए अशुद्ध चीज न्ही खाई सै।” 15 फिर दुसरी बर उस ताहीं बोल सुणाई दिया “जो किमे परमेसवर नै शुद्ध कर दिया सै, उस ताहीं अशुद्ध मतना कहवै।” 16 तीन बर इस तरियां ए होया, फेर जिब्बे वा चाद्र अकास म्ह ठा ली गई। 17 जिब पतरस अपणे मन म्ह दुबिध्या म्ह था, के यो दर्शन जो मन्नै देख्या इसका के मतलब हो सकै सै, तो देक्खो, वे माणस जिन ताहीं कुरनेलियुस नै भेज्या था, शमौन कै घर का पता लगाकै दरबाजे पै आण खडे होए, 18 अर रुक्का मारकै बुझाण लाग्ये, “के शमौन जो पतरस कुहावै सै, यडैए सै के?” 19 पतरस तो उस दर्शन पै सोचण ए लागरया था, के पवित्र आत्मा नै उसतै कह्या, “देख, तीन माणस तेरी टोह म्ह सै। 20 आखर उठकै तलै जा, अर बेझिझिक उनकै गेल्या हो ले, क्यूँके मन्नै ए उन ताहीं भेज्या सै।” 21 फेर पतरस नै उतरकै उन माणसां ताहीं कह्या, “देक्खो, जिसकी ठोह म्ह थम सो, वो मै सूं। थरे आण का के कारण सै?” 22 वे बोल्ले, “कुरनेलियुस सूबेदार जो धर्मी अर परमेसवर तै डरणआळा अर सारी यहूदी जात म्ह नामी माणस सै, उसनै एक पवित्र सुर्गदूत तै यो निर्देश पाया सै के तेरे ताहीं अपणे घरां बुलाकै तेरे तै वचन सुणै।” 23 फेर उसनै उन ताहीं भीत्तर बुलाकै उनकी मेहमान-नवाजी करी। दुसरे दिन वो उनकै गेल्या गया, अर याफा नगर के बिश्वासी भाईयां म्ह तै कुछ उसकै गेल्या हो लिए। 24 आगले दिन वे कैसरिया नगर पोहचे, अर कुरनेलियुस अपणे कुण्बे आळा अर प्यारे साथियाँ ताहीं कठा करकै उनकी बाट देक्खै था। 25 जिब पतरस भीत्तर आवै था, तो कुरनेलियुस उसतै मिल्या, अर उसकै पायां म्ह पड़कै उस ताहीं प्रणाम करया, 26 पर पतरस नै उस ताहीं ठा कै कह्या, “खड्या हो, मै भी तो माणस सूं।” 27 अर उसकै गेल्या बतलान्दा भीत्तर गया, अर घणे आदिमियाँ ताहीं कठे देखकै 28 पतरस नै उनतै कह्या, “थमनै बेरा सै के हम यहूदियाँ कै खात्तर गैर यहूदियाँ तै संगति करणा या उसकै उरै जाणा कानून के खिलाफ सै, पर परमेसवर नै मेरै तै बताया सै के किसे माणस ताहीं अपवित्र या अशुद्ध ना कहूँ। 29 ज्यांतै मै जिब बुलाया गया तो बिना कुछ

कहे चल्या आया। इब मैं बुझू सूं के मेरै ताहीं किस काम कै खात्तर बुलाया गया?” 30 कुरनेलियुस बोल्या, “इससे घड़ी, पूरे चार दिन होए, मैं अपणे घर मूँ दोफाहै पाछ्हे तीन बजे प्रार्थना करण लागरया था, तो एक माणस चमकीला बाणा पहरे होए, मेरै स्यामी आण खड्डाहा होया 31 अर कहण लाग्या, ‘हे कुरनेलियुस, तेरी प्रार्थनाएँ अर तेरे दान याद कै खात्तर परमेसवर कै स्यामी पोहचे सै। 32 इस करकै किसे नै याफा नगर भेजकै शमौन जो पतरस कुहावै सै, बुलवा ले। वो शमौन, चमडे का धन्धा करण आळे कै उरै मेहमान सै, जिसका घर समूद्र कै किनारे सै।’ 33 फेर मन्नै जिब्बे तेरे धोरै आदमी भेजै, अर तन्नै भला करया जो आ ग्या। इब हम सारे उरै परमेसवर कै स्यामी सां, ताके जो किमे परमेसवर नै तेरे तै कह्या उस ताहीं सुणां।” 34 फेर पतरस बोल्या, “इब मेरै पक्का यकिन होग्या के परमेसवर किसे का पक्षपात कोनी करदा, 35 बल्के हरेक जात मूँ जो परमेसवर तै डरे अर धर्म के काम कैरै सै, वो उसनै भावै सै। 36 थम जाणो सों के परमेसवर नै इसाएल के माणसां ताहीं अपणा संदेश भेज्जा, उसनै शान्ति के बारै मूँ सुसमाचार सुणाया जो माणसां ताहीं यीशु मसीह पै बिश्वास करण कै जरिये मितै सै। 37 वो वचन थमनै बेरा सै, जो यूहन्ना के बपतिस्मा के प्रचार कै पाच्छे गलील परदेस तै शरु होकै साब्बे यहूदिया परदेस मूँ फैलग्या। 38 परमेसवर नै किस तरियां तै यीशु नासरी ताहीं पवित्र आत्मा अर सामर्थ तै अभिषेक करया, वो भलाई करदा अर सारया ताहीं जो शेतान के सताए होई थे, आच्छा करदा फिरया, क्यूँकि परमेसवर उसकै गेल्या था।” 39 “हम उन सारे काम्मां के गवाह सां, जो उसनै यहूदिया परदेस अर यरुशलेम नगर मूँ भी करे, अर उननै उस ताहीं क्रूस पै लटकाकै मार दिया। 40 उस ताहीं परमेसवर नै तीसरे दिन जिन्दा करया, अर जाहिर भी कर दिया सै, 41 सारे आदमियां पै न्ही बल्के उन गवाह पै जिन ताहीं परमेसवर नै पैहल्या तै छाँट लिया था, यानिके म्हारै पै जिन नै उसकै मेरे होया मूँ तै जिन्दा उठण कै पाच्छे उसकै गेल्या खाया-पिया, 42 अर उसनै म्हारै ताहीं हुकम दिया के आदमियां मूँ प्रचार करो अर गवाही थो, के यो वोए सै जिस ताहीं परमेसवर नै जिन्दा अर मरया होया का न्यायी ठहराया सै। 43 उसकी सारे नबी गवाही देवैं सै के जो कोए उसपै बिश्वास करैगा, उस ताहीं उसकै नाम तै पापां की माफी मिलैगी।” 44 पतरस ये बात कहण ए लागरया था के पवित्र आत्मा वचन के सारे सुणण आळा पै उतर आया। 45 अर जितने खतना करे होए बिश्वासी पतरस कै गेल्या आये थे, वे सारे हैरान होए के गैर यहूदियाँ पै भी पवित्र आत्मा का दान ढाला गया सै। 46 क्यूँकि उननै उन ताहीं कई ढाल की भाषा बोल्दे अर परमेसवर की बड़ाई करदे सुण्या। इसपै पतरस नै कह्या, 47 “के कोए पाणी नै रोक सकै सै के ये बपतिस्मा ना पावै, जिननै म्हारै की ढाल परमेसवर की ओड तै पवित्र आत्मा पाया सै?” 48 अर उसनै हुकम दिया के उननै यीशु मसीह के नाम मूँ बपतिस्मा दिया जावै। फेर उननै उसतै बिनती करी के वो कुछ दिन और उनकै गेल्या रहवै।

11 फेर प्रेरितां अर बिश्वासी भाईयाँ नै जो यहूदिया परदेस मूँ थे सुण्या के गैर यहूदियाँ नै भी परमेसवर का वचन मान लिया सै। 2 आखर मूँ जिब पतरस यरुशलेम नगर मूँ आया, तो खतना किये होए आदमी उसतै बहस करण लाग्ये, 3 “तन्नै खतनारहित आदमियाँ कै उरै जाकै उनकै गेल्या खाया।” 4 फेर पतरस नै उन ताहीं शरू तै आखर ताहीं सारा किमे कह सुणाया 5 “मै याफा नगर मूँ प्रार्थना करण लागरया था, अर बेसुध होकै एक दर्शन देख्या के एक बड़ी चादर च्यारु कुण्यां तै लटकदी होई, अकास तै उतरकै मेरै धोरै आई।” 6 जिब मन्नै उसपै गौर करया, तो उस मूँ धरती के चार पैरां आळे अर बणपश अर रेंगण आळे जिनोर अर अकास के पंछी देख्ये, 7 अर यो बोल भी सुण्या, “हे पतरस उठ, मार अर खा।” 8 मन्नै कह्या, “ना प्रभु, ना, क्यूँकै कोए अशुद्ध चीज मेरै मुँह मूँ कदे न्ही गइ।” 9 इसकै जवाब मूँ अकास तै दुसरी बर आवाज होई, “जो किमे परमेसवर नै शुद्ध ठैहराया सै, उस ताहीं अशुद्ध मतना कहवै।” 10 तीन बर इसा होया, फेर सारा किमे दुबारा अकास पै खींच लिया गया। 11 जिब्बे तीन माणस जो कुरनेलियुस नै कैसरिया परदेस तै मेरै धोरै भेज्जे थे, उस धर पै जिसमूँ हम थे, आण खड़े होए। 12 फेर पवित्र आत्मा नै मेरै तै बेड़िज़क होकै उनकै गेल्या जाण खात्तर कह्या, अर छः भाई भी मेरै गेल्या हो लिये, अर हम उस माणस कै घरां गये। 13 उसनै म्हारै ताहीं बताया, के उसनै एक सुर्गदूत ताहीं अपणे धर मूँ खड्डा देख्या, जिसनै उसतै कह्या, “याफा नगर मूँ माणस भेजकै शमौन ताहीं जो पतरस कुहावै सै, बुलवा ले। 14 वो थारे तै इसी बात कहवैगा, जिनकै जरिये तू अर तेरा सारा धराना उद्धार पावैगा।” 15 जिब मूँ बात करण लाग्या, तो पवित्र आत्मा उनपै उसपै तरियां तै उतरया जिस तरियां तै शरू मूँ म्हारै पै उतरया था। 16 फेर मन्नै प्रभु का यो वचन याद आया, जो उसनै कह्या था, “यूहन्ना नै तो पाणी तै बपतिस्मा दिया, पर थम पवित्र आत्मा तै बपतिस्मा पाओगे। 17 इस खात्तर जिब परमेसवर नै उन ताहीं भी वोए दान दिया, जो म्हारै ताहीं प्रभु यीशु मसीह पै बिश्वास करण तै मिल्या था, तो मै कौण था जो परमेसवर नै रोक सकदा?” 18 यो सुणण कै बाद उसके जवाब मूँ वे यहूदी बिश्वासी कुछ भी न्ही बोल पाए, अर परमेसवर की बड़ाई करकै कहण लाग्ये, “फेर तो परमेसवर नै गैर यहूदियाँ ताहीं भी अनन्त जीवन कै खात्तर पापां की माफी अर यीशु मसीह पै बिश्वास करण का दान दिया सै।” 19 जो आदमी उस क्लेश के मारे जो स्तिफनुस कै कारण पड़ा था, खिंड-मिंड हो गये थे, वे हांडदे-हांडदे फीनीके परदेस अर साइप्रस टापू अर अन्ताकिया नगर मूँ पोहचे, पर यहूदियाँ नै छोड़ किसे और ताहीं वचन कोनी सुणावै थे। 20 पर उन मूँ तै कुछ बिश्वासी साइप्रस टापू अर कुरेनवासी थे, जो अन्ताकिया नगर मूँ आकै यूनानियाँ ताहीं भी प्रभु यीशु का सुसमाचार सुणाण लाग्ये। 21 प्रभु का हाथ उनपै था, अर घणे आदमी बिश्वास करकै प्रभु की ओड फिरे। 22 जिब उनका जिक्र यरुशलेम नगर की कलीसिया के लोगां कै सुणण मूँ आया, तो उननै बरनबास ताहीं अन्ताकिया नगर भेज्या। 23 वो उड़े पोहचकै अर

परमेस्वर के अनुग्रह नै देखकै राजजी होया, अर सारया ताहीं उपदेश दिया के तन-मन लगाकै प्रभु तै लिपटे रहो। 24 वो एक भला माणस था, अर पवित्र आत्मा अर बिश्वास तै पूरा भरया था, अर दुसरे धणखरे आदमी प्रभु म्ह आ मिले। 25 फेर वो शाऊल नै टोड़ कै खात्तर तरसुस नगर म्ह चल्या गया। 26 जिब वो उसतै मिल्या तो उस ताहीं अन्ताकिया नगर ल्याया, अर इसा होया के वे एक साल ताहीं कलीसिया कै गेल्या मिलदे अर प्रभु यीशु मसीह का घणे आदमियाँ ताहीं उपदेश देन्दे रहे, अर चेल्ले सारया तै पैहल्या अन्ताकिया नगर ए म्ह मसीह कुहाए। 27 उननै दिनां म्ह कई नबी यरुशलेम नगर तै अन्ताकिया नगर आए। 28 उन म्ह तै अगबुस नामक एक नबी नै खड़े होकै आत्मा की प्रेरणा तै न्यू बताया के सारी दुनिया म्ह बड़ा अकाल पड़ेगा, वो अकाल (रोम के सप्राट) कलौदियुस के बखत म्ह पड़ा। 29 फेर चेल्यां नै फैसला लिया के हरेक अपणी-अपणी पूंजी कै मुताबिक यहूदिया परदेस म्ह रहण आळे भाईयाँ की मदद कै खात्तर किमे भेजजै। 30 उननै इस तरियां ए करया, अर बरनबास अर शाऊल कै हाथ कलीसिया के अगुवां कै थोरै कुछ भेज दिया।

12 उस बखत हेरोदेस राजा नै कलीसिया के कई माणसां ताहीं

सताण कै मकसद तै बन्दी बणा लिया। 2 उसनै प्रेरित यूहन्ना के भाई याकूब ताहीं तलवार तै मरवा दिया। 3 जिब उसनै देख्या के यहूदी माणस इसतै राजजी होवै सै, तो उसनै पतरस ताहीं भी पकड़ लिया। वे अख्मिरी रेट्टी के त्प्यहार के दिन थे। 4 हेरोदेस नै उस ताहीं पकड़कै जेळ म्ह गेरया, अर चार-चार सिपाहियाँ के चार पहरया म्ह राख्या, इस विचार तै के फसह कै बाद उसनै आदमियाँ कै स्याम्ही ल्यावै। 5 जेळ म्ह पतरस बन्द था, पर कलीसिया उसकै खात्तर लौ लाकै परमेस्वर तै प्रार्थना करण लागरी थी। 6 जिब हेरोदेस राजा उसनै आदमियाँ कै स्याम्ही ल्याण आळा था, उस्से रात पतरस दो जंजीरां तै बंध्या होड़ दो सिपाहियाँ कै बिचाळै सोण लागरया था, अर पहेरेदार दरबाजे पै जेळ की रुखाली कररे थे। 7 तो देक्खो, प्रभु का एक सुर्गदूत आण खड़ा होया अर उस कोठड़ी म्ह चाँदणा चमक्या, अर उसनै पतरस की पासली पै हाथ मारकै उस ताहीं जगाया अर बोल्या, “उठ, तावळ कर।” अर उसकै हाथां तै बेड़ी खुलैकै शिरी। 8 फेर सुर्गदूत नै उसतै कह्या, “कमर बाँध, अर अपणे जूते पहर ले।” उसनै उस्से ढाल करया। फेर उसतै कह्या, “अपणे लत्ते पहरकै मेरै पाच्छै हो ले।” 9 वो लिकड़कै उसकै पाच्छै हो लिया, पर उसनै न्यू-न्ही बेरा था के जेणु मै दर्शन देख्या लागरया सू। 10 फेर वे पैहल्या अर दुसरे पहरे तै लिकड़कै उस लोहे के फाटक पै पोहचे, जो नगर की ओड़ सै। वो उनकै खात्तर अपणे-आप्ये खुलग्या, अर वे लिकड़कै एक गळी म्ह गए, अर जिब्बे ए सुर्गदूत उसनै छोड़कै चल्या गया। 11 फेर पतरस नै चेत म्ह होकै कह्या, “इब मन्नै सच का बेरा पट्या सै के प्रभु नै अपणा सुर्गदूत भेजकै मेरै ताहीं हेरोदेस राजा के हाथां तै छुड़ा लिया, अर यहूदी अगुवां की सारी मनसा

पै पाणी फेर दिया सै।” 12 न्यू जाणकै वो उस यूहन्ना की माँ मरियम कै घरां आया, जो मरकुस कुहावै सै। ओड़े घणे आदमी कठुँ होकै प्रार्थना करण लागरे थे। 13 जिब उननै दरबाजा खटखटाया, तो रुदे नामक एक नौकराणी देख्या नै आई। 14 पतरस का बोल पिच्छाणै कै उसनै खुशी के मरे दरबाजा न्ही खोल्या, पर भाजकै भीत्तर गई अर बताया के पतरस दरबाजे पै खड़ा सै। 15 उननै उसतै कह्या, “तू बावळी सै।” पर वा पूरे बिश्वास तै बोल्ली के पतरस ए सै। फेर उननै कह्या, “उसका सुर्गदूत होगा।” 16 पर पतरस खटखटान्दा ए रहया आखर म्ह उननै दरबाजा खोल्या, अर उस ताहीं देखकै हैरान होये। 17 फेर उसनै उन ताहीं हाथ तै इशारा करया के बोल-बाल्ले रहवैं, अर उन ताहीं बताया के प्रभु किस ढाळ उस ताहीं जेळ तै लिकाड़ ल्याया सै। फेर बोल्या, “याकूब अर दुसरे भाईयाँ नै या बात बता दियो।” फेर लिकड़कै दुसरी जगहां चल्या गया। 18 ठड़कै जेळ के सिपाहियाँ म्ह घणी भगदड़ माचगी के पतरस कित्त गया। 19 जिब हेरोदेस राजा नै उसकी टोह्या-ताही करवाई अर न्ही मिल्या, तो पैहेरेदारं की जाँच करकै हुकम दिया के वे मार दिये जावै, अर वो यहूदिया परदेस नै छोड़कै कैसरिया नगर म्ह जाकै रहण लाग्या। 20 हेरोदेस राजा सूर अर सैदा नगर के लोगोंगां तै घणा नाराज था। वे एक टोल बणाकै उसतै मिलण आये, राजा का एक खास कर्मचारी बलास्तुस ताहीं मनाकै राजा तै मेल करणा चाह्या, क्यूँकै राजा के देश म्ह उनकै देश का पालन-पोषण होवै था। 21 खास दिन पै हेरोदेस राजा राजसी-बाणा पहरकै सिंहासन पै बेठ्या, अर उन ताहीं खुलास्सा करण लाग्या। 22 फेर आदमियाँ नै रुक्का मारया, “यो तो माणस का न्ही ईश्वर का बोल सै।” 23 उस्से घडी प्रभु कै एक सुर्गदूत नै जिब्बे आकै हेरोदेस राजा ताहीं झिङ्काका, अर वो कीड़े पड़कै मरण्या। क्यूँकै उसनै परमेस्वर की महिमा कोनी करी, 24 पर परमेस्वर का बचन बड़ा अर फैलदा गया। 25 जिब बरनबास अर शाऊल नै अपणी सेवा पूरी कर ली तो यूहन्ना जो मरकुस कुहावै था, गेल्या लेकै यस्सलेम नगर तै बोहड़े।

13 अन्ताकिया नगर की कलीसिया म्ह कई नबी अर उपदेशक थे,

यानी बरनबास, शमैन जो नीगर (काला आदमी) कुहावै सै, अर शाऊल अर कुरेनी लूकीयुस, मनाहेम जिसका पालन-पोषण चौथाई देश के राजा हेरोदेस कै गैल होया था। 2 जिब वे लोग प्रभु की आराधना अर ब्रत करण लागरे थे, तो पवित्र आत्मा नै उनतै कह्या, “मेरै खात्तर बरनबास अर शाऊल नै उस काम कै खात्तर न्यारा करो जिसकै खात्तर मनै उन ताहीं बुलाया सै।” 3 फेर उननै ब्रत अर प्रार्थना करकै अर उनपै हाथ धरकै उन ताहीं परमेस्वर के काम खात्तर बिदा करया। 4 शाऊल अर बरनबास पवित्र आत्मा के भेज्जै होए सिलूकिया बन्दरगाह गये, अर ओड़े तै जहाज पै चढ़कै साइप्रस टापू कान्ही चाल्ले, 5 अर सलमीस नगर म्ह पोहचकै, परमेस्वर का बचन यहूदियाँ के आराधनालायाँ म्ह सुणाया। यूहन्ना उनका सेवक था। 6 वे उस सारे टापू म्ह होन्दे होए पाफुस परदेस ताहीं पोहचे। ओड़े उननै बार्याईशु नामक एक यहूदी जादूगर अर झूँझा नबी मिल्या। 7 वो राज्यपाल सिरगियुस पौलुस कै

गेल्या था, जो अकलमंद माणस था। उसनै बरनबास अर शाऊल ताहीं अपणे धोरै बुलाकै परमेसवर का वचन सुणणा चाह्या। 8 पर इलीमास जादूगर नै (क्यूँके योए उसकै नाम का मतलब सै) उनका बिरोध करकै हाकिम ताहीं यीशु पै बिश्वास करण तै रोकणा चाह्या। 9 फेर शाऊल नै जिसका नाम पौलुस भी सै, पवित्र आत्मा तै पूरी तरियां भरकै उसकी ओड टकटकी लाकै देख्या अर बोल्या, 10 “हे सारे कपट अर सारी ढाळ कि चतुराई तै भरे होड शैतान की ऊलाद, सारे धर्मां के बैरी, के तू प्रभु के सीध्यी राही नै टेढी करणा न्ही छोडैगा?” 11 इब लखा, “प्रभु का हाथ तेरे बिरोध म्ह उठ्या सै, अर तू कुछ बखत ताहीं आन्था रहवैगा अर सूरज नै कोनी देक्खैगा!” फेर जिब्बे धृंथालापण अर अन्धेरा उसपै छा गया, वो आसै-पासै टटोलण लाया ताके कोए उसका हाथ पकड़कै ले चाल्लै। 12 फेर हाकिम नै जो होया था उस ताहीं देखैके अर प्रभु के उपदेश तै तै हैरान होकै यीशु पै बिश्वास करया। 13 पौलुस अर उसके मित्र पाफुस परदेस तै पाणी का जहाज खोल कै पंफूलिया परदेस के पिरगा नगर म्ह आये, अर यूहन्ना उननै छोड़कै यरुशलेम नगर बोहड़ गया। 14 पिरगा नगर तै आग्नी बढ़कै वे पिसिदिया परदेस के अन्ताकिया नगर म्ह पोहचे, अर आराम कै दिन आराधनालय म्ह जाकै बैठग्ये। 15 मूसा के नियम-कायदे अर नबियाँ की किताब नै पढ़ण कै पाच्छै आराधनालय के सरदारां नै उनकै धोरै कहवां भेज्या, “हे भाईयो, जै आदमियों के उपदेश कै खातर थारे मन म्ह कोए बात हो तो कहो!” 16 फेर पौलुस नै खडे होकै अर हाथ तै इशारा करकै कह्या, “हे इसाएलियों, अर गैर यहूदी जो परमेसवर तै डरण आलो, सुणो!” 17 इसाएल के परमेसवर नै म्हारै पूर्वां ताहीं छांत लिया, अर जिब वे मिस देश म्ह परदेशी होकै रहवै थे, तो उनकी बढ़ोतरी की, अर अपणी शक्ति के दम पै उननै लिकाड़ ल्याया। 18 वो कोए चाळीस साल ताहीं जंगल-बियाबान म्ह उनकी सहण करदा रहया, 19 अर कनान देश की सात जातां का नाश करकै उनका देश कोए साढे चार सौ साल म्ह इनकी वसियत म्ह कर दिया। 20 “इसकै बाद परमेसवर नै शमूएल नवी ताहीं उन म्ह न्यायाधीश ठहराया। 21 इसकै पाच्छै उननै शमूएल तै उनपै एक राजा ठैहराण की माँग की, फेर परमेसवर नै चाळीस साल कै खात्तर बिन्यामीन के गोत्र म्ह तै एक माणस, यानिके कीश के बेटे शाऊल ताहीं उनपै राजा ठहराया। 22 फेर परमेसवर नै शाऊल ताहीं पद तै हत्थाकै दाऊद ताहीं उनका राजा बणाया, जिसकै बारै म्ह उसनै गवाही दी, ‘मनै एक माणस यिशु का बेटा दाऊद, जो मेरी इच्छा कै मुताबिक मिलग्या सै, वोए मेरी सारी इच्छा पूरी करैगा।’” 23 इससे पीढ़ी म्ह तै परमेसवर नै अपणे वादा कै मुताबिक इसाएल कै धोरै एक उद्घारकर्ता, यानिके यीशु भेज्या। 24 यीशु कै आण तै पैहल्या यूहन्ना नै सारे इसाएलियाँ नै अपणे पाप मान के परमेसवर की ओड मुडण का अर बपतिस्मा का प्रचार करया। 25 जिब यूहन्ना अपणी सेवा पूरी करण पै था, तो उसनै कह्या, “थम मनै के समझो सो? मै मसीह कोनी! बल्के देखखो, मेरे पाच्छै एक आण आला सै, जो भोत महान् सै, जिसके जूत्याँ के फिते

भी मै खोल्लण जोग्या कोनी।” 26 “हे भाईयो, थम जो अब्राहम की ऊलाद सो, अर थम गैर यहूदी जो परमेसवर तै डरो सो, थारे धोरै इस उद्घार का वचन भेज्या गया सै। 27 यरुशलेम नगर के रहणआलो अर उनके सरदारां नै, ना मसीह यीशु ताहीं पिच्छाणा अर ना नवियाँ की बात समझी, जो हरेक आराम कै दिन पढी जावै सै, ज्यातै उस ताहीं कस्रूवार ठहराकै उन बातां नै पूरा करया। 28 उननै मारण कै जोग्या कोए कस्रू उस म्ह कोनी पाया, फेरभी राज्यपाल पिलातुस तै बिनती कीरी, के वो मार दिया जावै। 29 जिब उननै उसकै बारै म्ह पवित्र ग्रन्थ लिकवी होई सारी बात पूरी कीरी, तो उस ताहीं कूस पै तै उत्तराकै कब्र म्ह धरया। 30 पर परमेसवर नै उस ताहीं मरे होया म्ह तै जिन्दा करया, 31 अर वो उन ताहीं जो उसकै गेल्या गलील परदेस तै यरुशलेम नगर आये थे, घणे दिनां ताहीं अपणे चेल्यां नै दिख्दा रहया, आदमियाँ कै स्यामी हिव वैऐ उसके गवाह सै।” 32 हम थमनै उस वादा कै बारै म्ह जो बाप-दाद्या तै करया गया था, यो सुसमाचार सुणावां सां, 33 के परमेसवर नै यीशु ताहीं जिन्दा करकै, वोए वादा म्हारी ऊलाद कै खात्तर पूरा करया, जिसा के भजन संहिता दो म्ह लिख्या सै, “तू मेरा बेटा सै, आज तै ए मै तेरा पिता बाणग्या सूं।” 34 अर उसके इस तरियां तै मरे होया म्ह तै जिन्दा होण कै बारै म्ह भी के वो कदे न्ही सङ्डे, परमेसवर नै यो कह्या सै, “मै दाऊद पै की पवित्र अर अटल दया तेरे पै करूँगा।” 35 दाऊद नै और जगहा भी भजन संहिता म्ह भी लिख्या सै, “तू अपणे पवित्र माणस नै सङ्डण न्ही देवैगा।” 36 दाऊद तो परमेसवर की मर्जी कै मुताबिक अपणे बखत म्ह सेवा करकै मर गया, अर अपणे बाप-दाद्या म्ह जा मिल्या, अर सङ्ड भी गया। 37 पर जिस ताहीं परमेसवर नै जिन्दा करया, वो सङ्डण कोनी पाया। 38 ज्यांतै, हे भाईयो, थम जाण ल्यो के इस्से के जरिये पापां की माफी का सुसमाचार थारे ताहीं दिया जावै सै, 39 अर पापां तै मुक्त करण म्ह मूसा नवी के नियम-कायदे हमेशा नाकामयाब रहे सै, हरेक जो बिश्वास करै सै, वो यीशु के जरिये सारे पापां तै मुक्त करया जावै सै। 40 ज्यांतै चौकन्ने रहो, इसा ना हो के जो नवियाँ की किताब म्ह आया सै, थारे पै भी आण पडै 41 “हे बुराई करण आलो, देक्खो, अर हैरान होवो, अर मिट जाओ, क्यूँके मै थारे दिनां म्ह एक काम करूँ सूं, ‘इसा काम के जै कोए थारे तै उसका जिक्र करै, तो थम भी बिश्वास कोनी करोगे।’” 42 जिब पौलुस अर बरनबास यहूदी सभाधर तै बाहरणे लिकडण लागरे थे, तो माणस उनतै बिनती करण लागेके आगले आराम कै दिन म्हारै ताहीं ये बात फेर सुणाई जावै। 43 जिब सभा उठ ली फेर भोत-से यहूदी अर यहूदी पंथ म्ह आये होए भगतां म्ह तै घणखरे पौलुस अर बरनबास कै पाच्छै हो लिये, अर उननै उन ताहीं बात करकै समझाया के परमेसवर कै अनुग्रह म्ह बणे रहो। 44 आगले आराम कै दिन नगर के तकरीबन सारे लोग परमेसवर का वचन सुणण नै कठे हो गये। 45 पर यहूदी भीड़ नै देखकै मन ए मन म्ह जळण लागें, अर बुराई करदे होए पौलुस की बातां कै बिरोध म्ह बोल्लण लागें। 46 फेर पौलुस अर बरनबास हिम्मत करकै कहण लागें, “जरूरी था के परमेसवर का

वचन पैहल्या थारे तै सुणाया जान्दा, इब जिब के थमनै इस ताहीं नकार दिया सै, अर यो करते होए अपणे-आप ताहीं अनन्त जीवन के खात्तर अयोग्य घोषित कर दिया सै, तो देक्खो, हम गैर यहूदियाँ कै कान्ही फिरां सां। (aiōnios g166) 47 क्यूँकि प्रभु नै म्हरै ताहीं यो हुकम दिया सै, ‘मनै तेरे ताहीं गैर यहूदियाँ कै खात्तर चाँदाणा ठहराया, तके तू धरती कै छोर ताहीं उद्धार का दरबाजा हो।’” 48 न्यू सुणक गैर यहूदी राज्जी होए, अर परमेस्वर कै वचन की बड़ाई करण लाग्ये, अर जितने अनन्त जीवन कै खात्तर ठहराए गये थे, उनै बिश्वास करया। (aiōnios g166) 49 फेर प्रभु का वचन उस सारे देश म्ह फैलाणा लाग्या। 50 पर यहूदी अगुवां नै भगत अर आच्छे खानदान की लुगाईयाँ ताहीं अर नगर के खास आदमियाँ ताहीं उकसाया, अर पौलुस अर बरनबास कै खिलाफ दंगा करा कै उन ताहीं अपणी सीमा तै लिकाड़ दिया। 51 फेर पौलुस अर बरनबास उनकै स्याम्ही पायां की धूळ झाङ्कै इकुनियुम नगर म्ह चले गये। 52 अर चेल्ले आनन्द अर पवित्र आत्मा तै भरदे चले गये।

14 इकुनियुम नगर म्ह इसा होया के वे यहूदियाँ कै आराधनालय म्ह गैल-गैल गये, अर इस ढाळ बात करी के यहूदियाँ अर यूनानियाँ म्ह घणखरयां नै बिश्वास करया। 2 पर विश्वास ना करण आळे गैर यहूदियाँ कै मन बिश्वासी भाईयाँ कै बिरोध म्ह उकसाये अर कडुवापण पैदा करया। 3 पौलुस अर बरनबास घणे दिन ताहीं उड़ रहे, अर प्रभु कै भरोसै पै हिम्मत तै बात करे थे, अर वो उनकै हाथ्थां तै चमत्कार अर अनोकखे काम करवा कै अपणे अनुग्रह के वचन ताहीं साबित करदा रह्या। 4 पर नगर के लोगां म्ह फूट पड़ी थी, इसतै घणेए तो यहूदियाँ कान्ही अर घणेए प्रेरितां कान्ही होग्ये। 5 जिब गैर यहूदी अर यहूदी उनकी बेजती करण नै अर उनकै पत्थर मारण कै खात्तर अपणे सरदारां सुधा उन कान्ही भाज्जे, 6 फेर वे इस बात नै जाणगे अर लुकाउनिया परदेस के लुस्त्रा अर दिरबे नगरां म्ह, अर लोवै-धोरै के परदेसां म्ह भाज्जे 7 अर ओड़े सुसमाचार सुणाण लाग्ये। 8 लुस्त्रा नगर म्ह एक माणस बेठ्या था, जो पायां तै लाचार था। वो जन्म तै ए लांडा था, अर कदे न्ही चाल्या था। 9 वो पौलुस नै बात करदे सुणे था। पौलुस नै उसकी ओड़े टकटकी लाकै देख्या के उसनै ठीक होण का विश्वास सै, 10 अर ठाड़ आवाज म्ह बोल्या, “अपणे पायां कै बळ सीधा खड़ा हो।” फेर वो उठळकै चाल्लण-फिरण लाग्या। 11 लोगां नै पौलुस का यो काम देखकै लुकाउनिया की भाषा म्ह ठाड़ आवाज म्ह कह्या, “देवता माणस कै रूप म्ह होकै म्हरै धोरै उतर आये सै।” 12 उनै बरनबास ताहीं ज्यूस देवता, अर पौलुस ताहीं हिरमेस कह्या क्यूँकि वो खास संदेश देण आळा था। 13 ज्यूस देवता के उस मन्दर का पुजारी जो उनकै नगर कै स्याम्ही था, बळध अर फूल्लां के हार फाटकां पै ल्याकै लोगां के गेल्या बलिदान करण चाहवै था। 14 पर बरनबास अर पौलुस प्रेरितां नै जिब यो सुण्या, तो अपणे लरे पाड़े अर भीड़ म्ह लपके, अर रुक्का मारकै कहण लाग्ये, 15 “हे भले माणसों, थम के करो सो? हम भी तो थरे तरियाँ दुख-सुख भोगण आळे माणस सां, अर थमनै सुसमाचार सुणावां सां के थम इन

बेकार विज्जां तै न्यारे होकै जिन्दे परमेस्वर कै कान्ही फिरो, जिसनै सुर्य अर धरती अर समन्दर अर जो किमे उन म्ह सै बणाया सै। 16 उसनै बीते होए बखत म्ह सारी जात्ता ताहीं अपणे-अपणे रास्तयां पै चाल्लण दिया। 17 फेर भी वो अपणे भले काम करण के जरिये अपणे बारे म्ह गवाही देंदा रहया, अर अकास तै मिह अर फलआळी ऋतु देकै थारे मन नै खाणे अर खुशी तै भरदा रहया।” 18 न्यू कहकै भी उननै लोगां ताहीं बहु मुशिकलां तै रोक्या के उनकै खात्तर बलिदान ना करै। 19 पर कुछ यहूदियाँ नै अन्ताकिया नगर अर इकुनियुम नगर तै आळे लोगां ताहीं अपणी ओड़ कर लिया, अर पौलुस पै पत्थर बरसाए, अर मरया होड़ सोचकै उस ताहीं नगर कै बाहरण घसीट लेगे। 20 पर चेल्ले जिब उसकै चौगढ़ेकै आण खड़े होए, तो वो उठकै नगर म्ह गया अर दुसरे दिन बरनबास कै गेल्या दिर्बे नगर कान्ही चल्या गया। 21 वे उस नगर के लोगां ताहीं सुसमाचार सुणाकै अर घणे चेल्ले बणाकै, लुस्त्रा अर इकुनियुम अर अन्ताकिया नगर नै बोहड़ आये, 22 अर चेल्यां के मनां नै स्थिर करदे अर उत्साहित करते होए या शिक्षा देते रह्ये के बिश्वास म्ह बणे रहो, अर न्यू कहवै थे, “हमनै घणे दुख ठाकै परमेस्वर के राज्य म्ह बड़णा होगा।” 23 अर उनै बहरेक कलीसिया म्ह उनकै खात्तर अगुवे ठहराए, अर ब्रत सुधा प्रार्थना करकै उन ताहीं प्रभु कै हाथ्थां म्ह सौप्या जिसपै उनै बिश्वास करया था। 24 फेर पिसिदिया परदेस तै होन्दे होए वे पंफूलिया परदेस पोहचे, 25 फेर पिरगा नगर म्ह वचन सुणाकै अत्तलिया नगर म्ह आये, 26 अर ओड़े तै वे पाणी के जहाज तै अन्ताकिया नगर गये, जित्त वे उस काम कै खात्तर जो उनै पूरा करया था परमेस्वर के अनुग्रह म्ह सौपे गये थे। 27 अन्ताकिया नगर पोहचकै उनै कलीसिया कठी करी अर बताया के परमेस्वर नै उनकै गेल्या होकै किसे बड़े-बड़े काम करे, अर गैर यहूदियाँ कै खात्तर बिश्वास का बारणा खोल दिया। 28 अर वे चेल्यां कै गेल्या घणे दिन ताहीं रहे।

15 फेर कुछ यहूदी बिश्वासी यहूदिया परदेस तै आळे भाईयाँ नै सिखाण लाग्ये “जै मूसा नबी की रीत पै थारा खतना न्ही हो तो थम उद्धार कोनी पा सकदे।” 2 जिब पौलुस अर बरनबास का उनतै घणा वाद-विवाद अर बहस होई तो यो फैसला लिया गया के पौलुस अर बरनबास अर उन म्ह तै कुछ माणस इस बात कै बारै म्ह प्रेरितां अर कलीसिया के अगुवां कै धोरै यश्ललेम नगर म्ह जावै। 3 कलीसिया नै उन ताहीं बिदा करया, अर वे फीनीके अर सामरिया परदेसां तै होन्दे होए गैर यहूदियाँ के जरिये यीशु मसीह पै बिश्वास करण का जिक्र करते गये, जिसतै सारे बिश्वासी भाई घणे राज्जी होए। 4 जिब वे यश्ललेम नगर पोहचे, तो कलीसिया अर प्रेरित अर कलीसिया के अगुवे उनतै खुशी कै गैल मिले, अर पौलुस अर बरनबास नै बताया के परमेस्वर नै उनकै गेल्या होकै किसे-किसे काम करे थे। 5 पर फरीसियाँ के पंथ म्ह तै जिन नै बिश्वास करया था, उन म्ह तै कितन्याँ नै उठकै कह्या, “गैर यहूदियाँ ताहीं खतना कराण अर मूसा नबी के नियम-कायदे नै मानण का हुकम देणा चाहिए।” 6 फेर प्रेरित अर कलीसिया के अगुवे इस बात कै बारै

मह विचार करण कै खात्तर कठें होए। 7 फेर पतरस नै घणी बहस हो जाणकै पाच्छै खडे होकै उनतै कद्या, “हे भाईयो, थमनै बेरा सै कै घणे दिन होए परमेसवर नै थारे म्ह तै मेरै ताहीं छाँट लिया के मेरै मुँह तै गैर यहूदी सुसमाचार का वचन सुणकै विश्वास कै। 8 मन कै जाँच्यां आले परमेसवर नै उन ताहीं भी म्हारै की तरियां पवित्र आत्मा देकै यो बताया सै कै वे सब भी उसके माणस सै, 9 अर विश्वास कै जरिये उनके मन शुद्ध करके म्हारै म्ह अर उन म्ह किमे फर्क कोनी राख्या। 10 तो इब थम क्यातै परमेसवर नै परखो सौं, ताके गैर यहूदी चेल्यां के कंध्या पै इसा जूआ धरो, जिसनै ना म्हारे बाप-दादे ठा सकै थे अर ना हम ठा सकां सां? 11 हाँ, म्हारा यो यकिन सै कै जिस तरियां तै वे प्रभु यीशु कै अनुग्रह तै उद्धार पावैंगे, उस्से तरियां तै हम भी पावांगे।” 12 फेर सारी सभा चुपचाप बरनबास अर पौलुस की सुणण लाग्यी, के परमेसवर नै उनकै जरिये गैर यहूदियाँ म्ह किसे बडे-बडे चमत्कार, अर अनोक्ये काम दिखाए। 13 उनके भाषण के खत्तम होण पै याकूब सभा ताहीं कहण लाग्या, “हे भाईयो, मेरी सुणो।” 14 शमौन पतरस नै बताया के परमेसवर नै पैहले-पहल गैर यहूदियाँ पै किसी दया की निगांह करी के उन म्ह तै अपणे नाम कै खात्तर एक प्रजा बणा लो। 15 नवियाँ लेख भी इस बात का समर्थन करै सै, जिसा के पवित्र ग्रन्थ म्ह लिख्या सै 16 “इसकै पाच्छै मै फेर आकै दाऊद का पड्या होडे डेरा उठाऊंगा, अर उसके खण्डरां नै दुबारा बणाऊंगा, अर उस ताहीं खड्या करूऱ्या,” 17 जिसके कारण बाकी की बची होडे मानवजाति परमेसवर नै पा सकै, अर वे सारी गैर यहूदी भी, जिनपै मेरै नाम की छाप लागी सै, प्रभु नै टोहैं, 18 यो वोए प्रभु कहवै सै जो दुनिया की शरुआत तै इन बातां की खबर देंदा आया सै। (aiōn g165) 19 “ज्यांतै मेरा विचार यो सै कै हम उन गैर यहूदियाँ खात्तर कोए मुसीबत पैदा ना करा, जो परमेसवर कै कान्ही फिरै सै, हम उन ताहीं दुख ना देवा, 20 पर आच्छा तो यो होगा के हम उन ताहीं यो हुकम लिख भेजा, के वे मूर्तियाँ नै चढाण आळी चिज्जां अर जारी अर गळा घोटे होया के माँस तै अर लहू तै दूर रहवै। 21 क्यूँके गुजरे खत्ततै नै नगर-नगर मूसा नबी के नियम-कायदे का प्रचार करण आले होदे चले आये सै, अर वा हरेक आराम कै दिन आराधनालालय म्ह पढी जावै सै।” 22 फेर सारी कलीसिया सुधा प्रेरितां अर कलीसिया के अगुवां नै आच्छा लाग्या के अपणे म्ह तै कुछ माणसां नै चुपै, यानिके यहूदा जो बरसब्बा कुहावै सै, अर सीलास ताहीं जो भाईयाँ म्ह मूसिया थे, अर उन ताहीं पौलुस अर बरनबास कै गेल्या अन्ताकिया नगर खन्दावै। 23 उननै उनकै हाथ या चिठ्ठी लिख भेजी “अन्ताकिया नगर, सीरिया अर किलिकिया परदेस के रहण आले भाईयाँ नै जो गैर यहूदियाँ म्ह तै सै, प्रेरितां अर कलीसिया के अगुवे भाईयाँ का नमस्कार। 24 हमनै सुण्या सै के म्हारै म्ह तै कुछां नै ओडे जाकै, थारे ताहीं अपणी बातां तै डरा दिया, अर थारे मन उल्ट दिये सै पर हमनै उन ताहीं हुकम कोनी दिया था। 25 इस करकै हमनै एक चित्त होकै ठीक जाण्या के छाँटे होडे माणसां ताहीं अपणे प्यारे बरनबास अर

पौलुस कै गेल्या थारे धोरै भेज्या। 26 ये इसे माणस सै जिन नै अपणी ज्यान म्हारै प्रभु यीशु मसीह कै नाम कै खात्तर जोख्खम म्ह गेरी सै। 27 ज्यातै हमनै यहूदा अर सीलास ताहीं भेज्या सै, के थम खुद उनकै ए मुँह तै इस बारें म्ह सुण सको। 28 पवित्र आत्मा नै अर हमनै ठीक जाण पाटी के इन जरूरी बातां नै छोड़, थारे पै और बोझ ना गेरै, 29 के थम मूर्तियाँ पै बलि करे होया तै अर लहू तै, अर गळा घोटे होए पशुओं के माँस तै, अर जारी तै दूर रहो। इनतै दूर रहो तो थारा भला होगा। बाकी सब ठीक-ठाक सै।” 30 फेर वे बिदा होकै अन्ताकिया नगर पोहचे, अर सभा नै कट्ठी करकै वा चिठ्ठी उन ताहीं दे दी। 31 वे चिठ्ठी पढ़कै उस उपदेश की बात तै घणे राज्जी होए। 32 यहूदा अर सीलास नै जो आप भी नवी थे, घणी बातां तै विश्वासी भाईयाँ ताहीं उपदेश देकै पक्का करया। 33 वे कुछे दिन रहकै, विश्वासी भाईयाँ तै शान्ति कै गेल्या बिदा होए के अपणे खन्दाण आळा कै धोरै जावै। 34 (पर सीलास नै ओडे रहणा आच्छा लाग्या।) 35 पर पौलुस अर बरनबास अन्ताकिया नगर म्ह रह गये अर और धणखरे आदमियाँ कै गेल्या प्रभु यीशु कै वचन सुणाया था, आओ, फेर उन म्ह चालकै अपणे विश्वासी भाईयाँ ताहीं देक्खै के वे किस तरियां सै।” 37 फेर बरनबास नै यूहन्ना ताहीं जो मरकुस कुहावै सै, गेल्या लेण का विचार करया। 38 पर पौलुस नै उस ताहीं जो पंफूलिया परदेस म्ह उनतै न्यारा होग्या था, अर काम पै उनकै गेल्या कोनी गया, गेल्या ले जाणा ठीक कोनी समझाया। 39 आखर म्ह इसा वाद-विवाद होया के वे एक-दुसरे तै न्यारे पाटायो, अर बरनबास, मरकुस नै लेकै जहाज पै साइप्रस टापू चल्या गया। 40 पर पौलुस नै सीलास ताहीं छाँट लिया, अर विश्वासी भाईयाँ तै परमेसवर कै अनुग्रह म्ह सौंप्या जाकै ओडे तै चल्या गया, 41 अर वो कलीसियाओं ताहीं स्थिर करदा होया सीरिया अर किलिकिया परदेस तै होन्दे होए लिकड़या।

16

फेर वो दिरबे अर लुस्त्रा नगर म्ह भी गया। ओडे तीमुथियुस नाम का एक चेल्ला था, उसकी माँ एक यहूदी विश्वासी थी, पर उसका बाप यूनानी था। 2 वो लुस्त्रा अर इकुनियुम नगर के भाईयाँ म्ह उसका आच्छा नाम था। 3 पौलुस की मर्जी या थी कै वो उसके गेल्या जावै, अर जो यहूदी माणस उन जगहां म्ह थे उनकै कारण उननै उनका खतना करया, क्यूँके वे सारे जापै थे, के उनका बाप यूनानी था। 4 पौलुस अर उसका साथी नगर-नगर जान्दे होडे चेल्यां ताहीं वे सारे हुकम सौपते जावै थे, जो यस्शलेम नगर के प्रेरितां अर कलीसिया के अगुवां नै तय करी थी। 5 इस तरियां कलीसिया विश्वास म्ह पक्की होंदी गई अर गिणती दिन-ब-दिन बधती गई। 6 वे फुगिया अर गलातिया परदेसां म्ह तै होकै गये, क्यूँके पवित्र आत्मा नै उननै आसिया परदेस म्ह वचन सुणाया तै मना करया। 7 उननै मूसिया परदेस कै लोवै पोहचै, बिथुनिया परदेस म्ह जाणा चाह्या, पर पवित्र आत्मा नै उन ताहीं जाण कोनी दिया। 8 आखर म्ह वे मूसिया परदेस तै होकै त्रोआस म्ह आये। 9 ओडे पौलुस

नै रात नै दर्शन देख्या के एक मकिंदुनिया परदेस का माणस खड़या होया उनतै बिनती करके कहण लागरया सै, “पार उतरकै मकिंदुनिया परदेस म्ह आ, अर म्हारी मदद कर।” 10 उसकै यो दर्शन देखदे हमनै जिब्बे मकिंदुनिया परदेस जाणा चाह्या, न्यू सोचकै के परमेसवर नै म्हारै ताहीं उनतै सुसमाचार सुणाण कै खात्तर बुलाया सै। 11 इस करकै त्रोआस नगर तै जहाज खोल कै हम सीधे सुमात्राके टापू अर दुसरे दिन नियापुलिस नगर म्ह आये। 12 ओडै तै हम फिलिप्पी नगर पोहचे, जो मकिंदुनिया परदेस का खास नगर अर रोमियों का मोहल्ला सै, अर हम उस नगर कुछे दिन रहे। 13 आराम कै दिन हम नगर कै फाटक कै बाहरणै नदी कै किनारे न्यू सोचकै गये के ओडै प्रार्थना करण की जगहां होगी, अर बैठके उन लुगाईयाँ तै जो कठी होई थी, बतलाण लागे। 14 थुआतीरा नगर की बैंजनी लते बेचण आळी एक लुदिया नाम की परमेसवर की भगतणी उनकी बात सुणण लागरी थी। प्रभु नै उसका मन खोल्या ताके वा पौलुस की बातां पै मन लगावै। 15 जिब उसनै अपणे कुण्बे सुधा बपतिस्मा लिया, तो उसनै म्हारै तै बिनती करी, “जै थम मनै प्रभु की बिश्वासिणी समझो सो, तो चालकै मेरै घर म्ह रहो,” अर वा हमनै मनाकै ले गई। 16 जिब हम प्रार्थना करण की जगहां पै जाण लागे थे, तो हमनै एक कम उम्र की दास्सी मिली जिसम्ह भविष्य बताण आळी आत्मा थी, अर वा भविष्य बताकै अपणे मालिकां कै खात्तर घणाए कमा लेवै थी। 17 वा पौलुस कै अर म्हारै पाच्छे आकै नै किल्की मारण लागी, “ये माणस परमप्रथन परमेसवर के दास सै, जो म्हारै ताहीं उद्धार के राह की कथा सुणावै सै।” 18 वा घणे दिनां ताहीं न्यूए कर दी रही, पर पौलुस परेशन होया, अर बोहडैके उस ओपरी आत्मा तै बोल्या, “मै तनै यीशु मसीह कै नाम तै हुकम दियुँ सूके उस म्ह तै बाहरणै लिकड़ जा।” अर वा उस्से बखत लिकड़गी। 19 जिब उसके मालिकां नै देख्या के म्हारी कमाई की आस खतम होयी, तो पौलुस अर सीलास नै पकड़कै चौक म्ह प्रधानां कै थोरै खींच ल्याए, 20 अर उन ताहीं न्यायाधीश कै थोरै ल्याए अर बोल्ले, “ये माणस जो यहूदी सै, म्हारे नगर म्ह दंगा मचाण लागे सै, 21 अर इसे रीति-रियाज बतावै सै, जिन ताहीं हम रोमियाँ कै खात्तर अपणाना सही कोनी।” 22 फेर भीड़ के माणस उनकै बिरोध म्ह कठै होकै उनपै चढ़ याए, अर हाकिमां नै उनके लते पाड़कै उतार दिये, अर उनकै बैत मारण का हुकम दिया। 23 घणी बैत मारे पाच्छे उननै उन ताहीं जेल म्ह गेर दिया अर दरोग्गा ताहीं हुकम दिया के उननै चौकक्स राखिये। 24 उसनै इसा हुकम पाकै उन ताहीं भित्तरली कोठड़ी म्ह राख्या अर उनके पाँ काठ की बेड़ियाँ तै जकड़ दिये। 25 आध्यात्मिक रात कै बखत पौलुस अर सीलास प्रार्थना करदे होए परमेसवर के भजन गाण लागे थे, अर कैदी उनकी सुणण लागे थे। 26 इतनै म्ह चाणचक बड़ा हाल्लण आ ग्या, उरै ताहीं के जेल की नीम भी हालगी, अर जिब्बे सारे दरबाजे खुल्गे, अर साराया के बन्धन खुल्कै पड़े। 27 दरोग्गा जागग्या, अर जेल के दरबाजे खुल्ले देखकै समझ गया के कैदी भाजगे सै, इस करकै उसनै तलवार खिंचकै खुद

ताहीं मारणा चाह्या। 28 पर पौलुस नै ठाड़ू आवाज म्ह रुक्का मारया, “अपणे-आपनै किमे नुकसान ना पोहोचाइये, क्यूँकि हम सारे उरैपै सां।” 29 फेर दरोग्गा दिवां मङ्गाकै भित्तर आया, अर काम्बदा होया पौलुस अर सीलास कै आगै पड़या, 30 अर उन ताहीं बाहरणै ल्याकै बोल्या, “हे भले माणसों, उद्धार पाण कै खात्तर मै के करूँ?” 31 उननै कह्या, “प्रभु यीशु मसीह पै बिश्वास कर, तो तू अर तेरा कुप्पा उद्धार पावैगा।” 32 अर उननै उस ताहीं अर उसके सारे घर के माणसां ताहीं प्रभु का वचन सुणाया। 33 रात नै उस्से बखत उसनै उन ताहीं ले जाकै उनके घाव धोये, अर उसनै अपणे सारे माणसां सुधा जिब्बे बपतिस्मा लिया। 34 फेर दरोग्गे नै उन ताहीं अपणे घरां ले जाकै उनकै आगै खाणा धरया, अर साले कुण्बे सुधा परमेसवर पै बिश्वास करकै आनन्द करया। 35 आगले दिन फेर हाकिमां नै सिपाहियाँ कै हाथां चक्कावै जेया के उन माणसां नै छोड़ द्यो। 36 दरोग्गे नै ये बात पौलुस तै कही, “हाकिमां नै थारे ताहीं छोड़ देण का हुकम दिया सै। ज्यांतै इब खुश होकै जाओ।” 37 पर पौलुस नै उनतै कह्या, “उननै म्हारै ताहीं जो रोमी माणस सै, कसूरवार ठहराए बिना माणसां कै स्याम्ही मारया अर जेल म्ह गेरया। इब के हमनै बोल-बाल्ले लिकाड़ण लागरे सै? इसा कोनी, पर वे खुद आकै हमनै बाहरणै लिकड़ा।” 38 सिपाहियाँ नै ये बात हाकिमां तै कही, अर वे न्यू सुणकै के वे रोम के बासिन्दे सै, डरगे, 39 अर आकै उन ताहीं मनाया, अर बाहरणै ले जाकै बिनती करी के नगर चले जाओ। 40 वे जेल तै लिकड़कै लुदिया कै उरै गये, अर बिश्वासी भाईयाँ तै भेंट करकै उन ताहीं शान्ति देई, अर चले गये।

17 पौलुस अर सीलास अस्फिपुलिस अर अपुल्लोनिया नगरां तै होकै थिस्सलुनीके नगर म्ह आये, जित यहूदियाँ का एक आराधनालय था। 2 पौलुस अपणी रीत कै मुताबिक उनकै थोरै गया, अर तीन्हु आराम कै दिनां म्ह पवित्र ग्रन्थ म्ह तै उनकै गेल्या बहस करी, 3 अर वो उनका मतलब खोल-खोल कै समझावै था के मसीह नै दुख ठाणा, अर मेरै होया म्ह तै जिन्दा उठणा, जरूरी था, अर “योए यीशु जिसकी मै थमनै कथा सुणाऊँ सूं मसीह सै।” 4 कितने यहूदी अर परमेसवर के भगत यूनानियाँ म्ह तै घणखरयां नै, अर घणी आच्छे खानदान की लुगाईयाँ नै मान लिया, अर पौलुस अर सीलास कै गेल्या मिलगे। 5 पर यहूदियाँ नै जलण तै भरकै बाजारू माणसां म्ह तै कुछ दुष्ट माणसां ताहीं अपणे गेल्या लिया, अर भीड़ कठै करकै नगर म्ह दंगा मचाण लागे, अर यासोन कै घर पै चढ़ाइ करकै उन ताहीं आदमियाँ कै स्याम्ही ल्याणा चाह्या। 6 उननै जिब वे ओडै न्ही मिले तो वे किल्की मारदे होए यासोन अर कुछ बिश्वासी भाईयाँ ताहीं नगर के हाकिमां कै स्याम्ही खींच ल्याए, “ये माणस जिन नै दुनिया ताहीं उल्टा-पुल्टा कर दिया सै, उरै भी आ लिए सै।” 7 यासोन नै उन ताहीं अपणे घरां रहण की इजाजत दी सै। ये सारे के सारे न्यू कहवै सै के यीशु राजा सै, अर कैसर के हुकमां का बिरोध करै सै।” 8 उननै आदमियाँ ताहीं अर नगर के हाकिमां ताहीं न्यू सुणाकै डरा दिया। 9 ज्यांतै उननै यासोन अर

बाकी माणसां तै जमानत पै उन ताहिं छोड़ दिया। 10 बिश्वासी भाईयाँ नै जिब्बे राते-रात पौलुस अर सीलास ताहिं बिरीया नगर भेज दिया, अर वे ओड़े पोहचकै यहूदियाँ के आराधनालय म्ह गये। 11 ये माणस तो थिस्सलुनीके नगर के यहूदियाँ तै आच्छे थे, अर उननै घणे चाह तै वचन अपणाया, अर हर-रोज पवित्र ग्रन्थां म्ह टोहन्दे रहे के ये बात न्यू सै के न्ही। 12 ज्यांतै उन म्ह तै घणखरयां नै, अर यूनानी आच्छे खानदान की बिरबानियाँ म्ह तै अर माणसां म्ह तै भी घणखरयां नै बिश्वास करया। 13 पर जिब थिस्सलुनीके नगर के यहूदी जाणों के पौलुस बिरीया नगर म्ह भी परमेसवर का वचन सुणावै सै, तो ओड़े भी माणसां ताहिं उक्साण अर गडबड मचाण लागे। 14 फेर बिश्वासी भाईयाँ नै जिब्बे पौलुस ताहिं बिदा करया के समुन्दर कै किनारे चल्या जावै, पर सीलास अर तीमुथियुस बिरीया रहगे। 15 पौलुस के मददगार उस ताहिं एथेंस नगर तक लेगे, अर सीलास अर तीमुथियुस के खात्तर या आज्ञा पाकै बिदा होए के उसकै धोरे घणी तगाजै तै आवै। 16 जिब पौलुस एथेंस नगर म्ह उसकी बाट देक्खै था, तो नगर नै मूर्तियाँ तै भरया होड़ देखकै भोत परेशान होग्या। 17 इस करकै वो आराधनालय म्ह यहूदियाँ तै अर भगता तै, अर चौकै म्ह जो माणस उसतै फैटे थे उनते हरेक दिन बहस करया करै था। 18 फेर इपिकूरी अर स्टोईकी उपदेशकां म्ह तै कुछे उसतै तर्क करण लागे, अर कुछां नै कह्या, “यो बकवादी के कहणा चाहवै सै?” पर दुसरयां नै कह्या, “वो दुसरे देवत्यां का प्रचारक दिक्खै सै” क्यूँके वो यीशु का अर पुनरुत्थान का सुसमाचार सुणावै था। 19 फेर वे उसनै अपणे गेल्या अरियुपगुस नामकी आराधनालय म्ह लेगे अर बुझद्या, “के हम जाण सकां सां के यो नया पंथ जो तू सुणावै सै, के सै? 20 क्यूँके तू अनोक्खी बात म्हारै ताहिं सुणावै सै, ज्यांतै हम जाणणा चाहवां सां के इनका के मतलब सै!” 21 (ज्यांतै के सारे एथेंसवासी अर परदेशी जो ओड़े रहवै थे, नयी-नयी बात कहण अर सुणण के सिवाए और किसे काम म्ह बखत कोनी बितावै थे।) 22 फेर पौलुस नै अरियुपगुस के बिचालै खड़े होकै कह्या, “हे एथेंस के माणसों, मै देक्खूँ सूँ के थम हर बात म्ह देवत्यां के घणे माणन आळे सो। 23 क्यूँके मै हांडे होए जिब थारी पूज्जण की चिज्जां नै देखण लागरया था, तो एक इसी वेदी भी मिली, जिसपै लिख्या था, ‘अनजाणे इश्वर कै खात्तर।’ इस करकै जिसनै थम बिना बेरे पूज्जो सो, मै थमनै उस्से परमेसवर का सुसमाचार सुणाऊँ सूँ।” 24 जिस परमेसवर नै धरती अर उसकी सारी चिज्जां ताहिं बणाया, वो सुर्ग अर धरती का मालिलक होकै, हाथ के बणाए होड़ मन्दरां म्ह कोनी रहन्दा, 25 उसनै माणसां की जरूरत कोनी, क्यूँके वो तो खुदे सारया ताहिं जिन्दगी अर साँस अर सारा किसे देवै सै। 26 उसनै एक ए मूल तै माणसां की सारी जात सारी धरती पै रहण कै खात्तर बणाई सै, अर उनकै ठहराए होड़ बखत अर रहण या निवास की हादां ताहिं ज्यांतै बाँधया सै, 27 के वे परमेसवर नै टोहवै, कदाचित उस ताहिं टोठोलकै पावै, फेरभी वो म्हारै म्ह तै किसे तै दूर कोनी। 28 क्यूँके उस्से म्ह म्हारा जीवन, चलणा-फिरणा अर म्हारी

पहचान बणै सै, जिस ढाळ थारे कितने कवियाँ नै भी कह्या सै, “हम तो उस्से के वंशज सां।” 29 “इस करकै म्ह परमेसवर का वंश होकै म्हारा यो समझाणा सही कोनी के ईश्वरत्व सोने-चाँदी, पत्थर के जिसा सै, जो माणसां की कारिगरी अर कल्पना तै गढ़े गये हों। 30 ज्यांतै परमेसवर नै अज्ञानता के बखत पै खियास कोनी करी, पर इब हरेक जगहां सारे माणसां ताहिं पाप छोड़ण का हुकम देवै सै। 31 क्यूँके उसनै एक दिन तय करया सै, जिसम्ह वो धार्मिकता म्ह खुद के जरिये ठारया गये उस माणस के जरिये दुनिया का न्याय करैगा, जिन ताहिं उसनै मरे होया म्ह तै दुबारा जिन्दा करकै या बात सारे माणसां के स्याम्ही सावित कर दी सै।” 32 मरे होया के पुनरुत्थान की बात सुणकै कुछ तो मखौल करण लागे, अर कुछां नै कह्या, “या बात हम तेरे तै फेर कदे सुणांगे।” 33 इसपै पौलुस उनकै बिचालै तै लिकड़ग्या। 34 पर कई माणस प्रभु यीशु के गेल्या मिलगे, अर बिश्वास करया, जिन म्ह दियुनुसियुस जो अरियुपगुस का सदस्य था, अर दमरिस नामकी एक लुगाई थी, अर उनकै गेल्या कुछ और भी माणस थे।

18 इसकै पाच्छे पौलुस एथेंस नगर नै छोड़कै कुरिन्थ्युस नगर म्ह आया।

2 ओड़े उसनै अविवला नामक एक यहूदी मिल्या, जिसका जन्म पुन्तुस परदेस म्ह होया था। वो अपणी घरआली प्रिसिकिल्ला कै गेल्या इटली देश तै इब्बे आया था, क्यूँके समाप्त क्लैदियुस नै सारे यहूदियाँ ताहिं रोम तै लिकड़ जाण का हुकम दिया था। ज्यांतै वो उनकै उरै गया। 3 पौलुस अर अविवला का एक ए काम-धन्धा था, इस करकै वो उनकै गेल्या रह्या अर वे काम करण लागे, अर उनका काम-धन्धा तम्बू बणाण का था। 4 पौलुस हरेक आराम कै दिन आराधनालय म्ह बहस करकै यहूदियाँ अर यूनानियाँ ताहिं भी समझावै था, के यीशु ए मसीह सै। 5 जिब सीलास अर तीमुथियुस मकिदुनिया परदेस तै आये, तो पौलुस वचन सुणाण की धुन म्ह यहूदियाँ ताहिं गवाही देण लाग्या के यीशु ए मसीह सै। 6 पर जिब यहूदी बिरोध अर बुराई करण लागे, तो उसनै अपणे लत्यां तै थूळ झाड़कै उनतै कह्या, “इब जै परमेसवर थमनै इस पाप की सजा देवै तो उसकी मौत के जिम्मेदार थम खुदे हो! मै बेकसूर सूँ। इब तै मै गरे यहूदियाँ कै थोरै जाऊँगा।” 7 पौलुस यहूदी आराधनालय तै लिकड़कै वो तीतुस यूस्तुस नामक परमेसवर के एक भगत कै घरां आया, जिसका घर आराधनालय तै लाग्या होड़ था। 8 फेर आराधनालय के सरदार क्रिस्पुस नै अपणे सारे कुण्डे सुधा प्रभु पै बिश्वास करया, अर घणखरे कुरिन्थ्वासी सुणकै बिश्वास लाये, अर बपतिस्मा लिया। 9 प्रभु नै एक रात दर्शन कै जरिये पौलुस तै कह्या, “मतना डौर, बल्के कहे जा अर बोल-बाल्ला मतना रहवै, 10 क्यूँके मै तेरे गैल सूँ, अर कोए तेरे पै चाँदाई करकै तेरा नुकसान कोनी करैगा, क्यूँके इस नगर म्ह मेरे घणे माणस सै।” 11 ज्यांतै पौलुस उन म्ह परमेसवर का वचन सिखान्दे होए डेढ़ साल ताहिं रह्या। 12 जिब गल्लियो अखाया परदेस का राज्यपाल था, तो यहूदी माणस एकका करकै पौलुस पै चढ़ आये, अर उस ताहिं न्याय गद्दी कै स्याम्ही ल्याकै कहण लागे, 13 “यो

माणसां नै समझावै सै, के परमेसवर की आराधना इस ढाळ तै करो, जो नियम-कायदे कै उल्ट सै।” 14 जिब पौलुस बोल्लण पैए था, तो गल्लियो नै यहूदियाँ ताहिं कह्या, “हे यहूदियों, जै या किमे अन्याय या दुष्टता की बात होन्दी, तो सही था के मै थारी सुणदा। 15 पर जै या बहस शब्दों, अर नामां, अर थारे उरे के नियम-कायदे कै बारै मृ सै, तो थमे जाणो, क्यूँकै मै इन बातां का न्यायाधीश कोनी बणणा चाहन्दा।” 16 अर उसनै उन ताहिं न्याय गद्दी कै स्याही तै लिकड़ दिया। 17 जद सरे माणसां नै आराधनालय के सरदार सोसिथेस ताहिं पकड़कै न्याय गद्दी कै स्याम्ही मारया। पर गल्लियो नै इन बातां की भी किमे चिन्ता कोनी करी। 18 पौलुस घणे दिन ताहिं कुरिन्थुस नगर रहया। फेर बिश्वासी भाईयाँ तै बिदा होकै किंचिया बन्दरगाह मृ ज्यातै सिर मुण्डाया, क्यूँकै उसनै मन्नत मान्नी थी, अर जहाज पै सीरिया परदेस नै चल्या गया अर उसकै गेल्या प्रिसकिल्ला अर अकिला थे। 19 उसनै इफिसुस नगर पोहचकै उन ताहिं ओड़े छोड़या, अर खुद आराधनालय मृ जाकै यहूदियाँ तै बहस करण लाग्या। 20 जिब माणसां नै उसतै बिनती करी, “म्हरै गेल्या कुछ और दिन रह।” तो उसनै कोनी मान्नी, 21 पर न्यू कहकै उसतै बिदा होया, “जै परमेसवर नै चाह्या तो मै थारे थोरै फेर आऊँगा।” फेर वो इफिसुस नगर तै जहाज खोल कै चाल दिया, 22 अर कैसरिया नगर मृ उतरकै (यरुशलेम नगर नै) गया अर कलीसिया ताहिं नमस्कार करकै अन्ताकिया नगर मृ आया। 23 फेर किमे दिन रहकै वो ओड़े तै लिकड़या, अर एक और तै गलातिया अर फुगिया परदेसां मृ सारे चेल्यां ताहिं स्थिर करदा हांडया। 24 अपुल्लोस नामक एक यहूदी, जिसका जन्म सिकन्दरिया नगर मृ होया था, जो ज्ञानी माणस था अर पवित्र ग्रन्थ ताहिं आच्छी तरियाँ तै जाणै था, इफिसुस नगर मृ आया। 25 उसनै प्रभु कै राह की शिक्षा पाई थी, अर मन लाकै यीशु कै बारै मृ सही-सही सुणावै अर सिखावै था, पर वो सिर्फ यहूना कै बपतिस्मा की बात जाणै था। 26 वो आराधनालय मृ बिना डरे बोल्लण लाग्या, पर प्रिसकिल्ला अर अकिला उसकी बात सुणकै उस ताहिं अपणे उरे लेगे अर परमेसवर की राह उस ताहिं और भी सही-सही बताई। 27 जिब उसनै फैसला करया के पार उतरकै अखाया परदेस मृ जावै तौ बिश्वासी भाईयाँ तै उस ताहिं धीरज बन्धाकै चेल्यां ताहिं लिख्या के वे उसतै आच्छी ढाळ फेटै, अर उसनै ओड़े पोहचकै उन माणसां की घणी मदद करी जिन नै अनुग्रह कै कारण बिश्वास करया था। 28 क्यूँकै वो पवित्र ग्रन्थ तै सबूत देंदेकै कै यीशु ए मसीह सै, घणे तावलेपण तै यहूदियाँ ताहिं सारया कै स्याम्ही निरुतर (बोलती बन्द) करदा रहया।

19 जिब अपुल्लोस कुरिन्थुस नगर मृ था, तो पौलुस उपर के सारे परदेस तै होकै इफिसुस नगर मृ आया। ओड़े कई चेल्यां ताहिं मिल्या। 2 उनतै बोल्या, “के थमनै बिश्वास करदे बखत पवित्र आत्मा पाया था?” उननै उसतै कह्या, “हमनै तौ पवित्र आत्मा का जिक्र भी कोनी सुण्या।” 3 पौलुस नै उनतै कह्या, “तो फेर थमनै

किसका बपतिस्मा लिया?” वे बोल्ले, “यूहन्ना का बपतिस्मा।” 4 पौलुस बोल्या, “यूहन्ना नै न्यू कह्या, के पाप करणा छोड़ दो, अर बपतिस्मा त्यो, परमेसवर थारे पाप माफ कर देगा, अर जो मैरै पाच्छै आण आळा सै, उसपै बिश्वास करियो, यानिके यीशु पै।” 5 न्यू सुणकै उनपै प्रभु यीशु कै नाम मृ बपतिस्मा लिया। 6 जिब पौलुस नै उनपै हाथ धरे, तो पवित्र आत्मा उनपै उतरया, अर वे अन्य-अन्य भाषा बोल्लण अर भविष्यवाणी करण लाग्ये। 7 ये सारे करीबन बारहा माणस थे। 8 पौलुस आराधनालय मृ जाकै तीन महिने ताहिं बिना डरे होकै बोल्दा रहया, अर परमेसवर के राज्य कै बारै मृ बहस करदा अर समझान्दा रहया। 9 पर जो माणसां कठोर थे उननै उसका बिश्वास कोनी करया, बल्के माणसां कै स्याही इस पंथ नै बुरा कहण लाग्ये, तो उसनै उन ताहिं छोड़ दिया अर चेल्यां ताहिं साथ लेकै तुरन्नुस की पाठशाला मृ गये, जित वे रोज भीड़ तै परमेसवर के बारें मृ बहस करया कैरे थे। 10 दो साल ताहिं न्यूए होन्दा रहया, उरे ताहिं के आसिया परदेस के रहणीये के यहूदी के यूनानी सारया नै प्रभु का वचन सुण लिया। 11 परमेसवर नै पौलुस ताहिं अदभुत चमत्कार करण की सामर्थ दी। 12 उरे ताहिं के रूमाल अर अनोंछे उसकै गात तै छुआ कै बिमारा पै गेरै थे, अर उनकी बीमारी जान्दी रहवै थी, अर भुंडी ओपरी आत्मा उन मृ तै लिकड़ जाया कैरे थी। 13 पर कुछ यहूदी लोग जो झाड़ा-फूँक करदे हान्डै थे, न्यू करण लाग्ये के जिन मृ भुंडी ओपरी आत्मा हो उनपै प्रभु यीशु का नाम न्यू कहकै फूँके, “जिस यीशु का प्रचार पौलुस करै सै, मै थारे ताहिं उस्से आदमी की कसम दियुँ सू।” 14 अर स्किक्वा नाम का एक यहूदी प्रधान याजक के सात बेटे थे, जो इस्से तरियाँ ए करै थे। 15 पर भुंडी ओपरी आत्मा नै उन ताहिं जवाब दिया, “यीशु ताहिं मै जांयु सू, अर पौलुस ताहिं भी पिच्छाणु सूं, पर थम कौण सो?” 16 अर उस माणस नै जिसमृ भुंडी ओपरी आत्मा थी उनपै लपककै अर उन ताहिं बस मृ करकै, उनपै इसा दुर्गति मचाया के वे उघड़े अर घायल होकै उस घर तै लिकड़ भाज्जे। 17 या बात इफिसुस नगर के रहण आळे सारे यहूदी अर यूनानी भी जाणगे, अर वे सारे डरगे, अर प्रभु यीशु के नाम की बड़ाई होई। 18 जिन नै बिश्वास करया था, उन मृ तै घणखरयां नै आकै अपणे-अपणे कामां ताहिं मान लिया अर दिखा दिया। 19 जातू करण आळा मृ तै घणाए नै अपणी-अपणी सारी पोथी कट्टी करकै सारया कै स्याम्ही जळा दी, अर जिब उसका दाम जोड़या गया, तो पचास हजार चाँदी के सिक्के कै बराबर लिकडया। 20 इस तरियाँ प्रभु का वचन सामर्थ तरिककै तै फैलदा अर हावी होंदा गया। 21 जिब ये बात हो ली तो पौलुस नै आत्मा मृ ठांग लिया के मकिदुनिया अर अखाया परदेस तै होकै यरुशलेम नगर जाऊँ, अर बोल्या, “यरुशलेम जाणकै बाद मन्नै रोम ताहिं भी देखणा जरूरी सै।” 22 इस करकै अपणी सेवा करणीया मृ तै तीमुथियुस अर इशास्तुस ताहिं मकिदुनिया परदेस भेजकै खुद किमे दिन आसिया परदेस मृ रहया। 23 उस बखत उस पन्थ कै बारै मृ घण दंगा माच्या। 24 क्यूँकै देमेत्रियुस नाम का एक सुनार अरतिमिस

के चाँदी के मन्दर बणवाकै कारिगरां ताहीं घणा काम दुवाया करै था। 25 उसनै उन ताहीं अर इस्से तरियां की चिज्जां के कारिगरां ताहीं कठ्ठ करकै कह्वा, “हे भाईयो, थमनै बेरा सै के इस काम तै हमनै कितना धन मिलै सै।” 26 थम देक्खो अर सुणो सो के सिर्फ इफिसुस नगर म्ह ए कोनी, बल्के कई बर सारे आसिया परदेस म्ह न्यू कह्ह-कह्हकै इस पौलुस नै घणे माणसां ताहीं समझाया अर भकाया भी सै, के जो हाथ की कारिगरी सै, वे ईश्वर कोनी। 27 इसतै डब सिर्फ इस्से बात का ए भय न्हीं सै के म्हारै इस धर्थे की इज्जत-मान जान्दी रहवैगी, बल्के न्यू भी के महान् देवी अरतिमिस का मन्दर तुच्छ समझाया जावैगा, अर जिस ताहीं सारा आसिया परदेस अर दुनिया पूजै सै उसका महत्व भी जान्दा रहवैगा।” 28 कारिगर न्यू सुणकै खुन्दक तै भरो अर किल्की मार-मारकै कहण लागे, “इफिसियाँ की अरतिमिस देवी, महान् सै।” 29 अर सारे नगर म्ह घणा दंगा माचग्या, अर माणसां नै मकिदुनियावासी गयुस अर अरिस्तर्खुस ताहीं जो पौलुस के संगी मुसाफर थे, पकड़ लिया, अर एक सेती रंगशाला म्ह भाजगे। 30 जिब पौलुस नै माणसां कै धोरै भीत्तर जाणा चाह्वा तो चेल्यां नै उस ताहीं जाण न्हीं दिया। 31 आसिया परदेस के हाकिमा म्ह तै भी उसके कई साथियाँ नै उसके धोरै कहवा भेज्या अर बिनती करी के रंगशाला म्ह जाकै जोख्खम ना ठाईयो। 32 भीड़ म्ह तै कोए कुछ चिल्लावै था अर कोए कुछ, सारी भीड़ पूरी तरियां घबराई होई थी, अर घणखरे माणसां नै तो न्यू कोनी बेरा था के वे क्या खात्तर कठ्ठे होए सै। 33 फेर उननै सिकन्दर ताहीं, जिस ताहीं यहूदियाँ नै खड्या करया था, भीड़ म्ह आगै बढ़ाया। सिकन्दर हाथ तै इशारा करकै माणसां कै स्याही जवाब देणा चाह्वै था। 34 पर जिब उननै बेरा लागग्या के वो यहूदी सै, तो सारे के सारे एक बोल म्ह कोए दो धंटे ताहीं चिल्लान्दे रहे, “इफिसियाँ की अरतिमिस देवी, महान् सै।” 35 फेर नगर के मन्त्री नै माणसां ताहीं शान्त करकै कह्वा, “हे इफिसुस नगर के माणसों, किसनै न्हीं बेरा के इफिसियाँ का नगर महान् अरतिमिस देवी के मन्दर, अर ज्यूस की ओड़ तै गिरि होड़ मूर्ति का टहलुआ सै।” 36 आखर म्ह जिब के इन बातां का खण्डन ए कोनी हो सकदा, तो सही सै के थम शान्त रहो अर बिना सोच्चे-समझे किमे ना करो। 37 क्यूँकै थम इन माणसां नै ल्याए सो जो ना मन्दर के लुट्टण आळे सै अर ना म्हारी देवी के बुराई करणीये सै। 38 इस करकै देमेत्रियुस अर उसके मित्तर-कारिगरां ताहीं किसे तै एतराज हो तो कच्छेड़ी जा सकै सै अर हाकिम भी सै, वे एक-दुसरे पै दोष लावै। 39 पर जै थम किसे और बात कै बारै म्ह किमे बुझणा चाहो सो, तो बखत पै सभा म्ह फैसला करया जावैगा। 40 आज की इस घटना कै कारण म्हारै पै उपद्रव का इल्जाम लागण का खतरा सै, क्यूँकै इसकै खात्तर कोए भी ठोस कारण दिखाई कोनी देंदा, “हम इस भीड़ के कठ्ठा होण का कोए जवाब कोनी दे सकांगें।” 41 न्यू कहकै उसनै सभा ताहीं बिदा करया।

20 जिब दंगा थम ग्या तो पौलुस नै चेल्यां ताहीं बुलाकै उत्साहित करया, अर उनतै बिदा होकै मकिदुनिया परदेस की ओड़ चाल

दिया। 2 उस सारे परदेस म्ह तै होकै अर चेल्यां ताहीं घणा समझाकै वो यूनान देश म्ह आया। 3 जिब तीन महिने रहकै वो ओड़ तै जहाज पै सीरिया परदेस की ओड़ जाण पै था, तो यहूदी अगुवे उसकी टाह म्ह लागे, ज्यातै उसनै निश्चय करया के मकिदुनिया परदेस होकै बोहड़ जावै। 4 विरीयावासी पुरुस का बेटा सोपत्रुस अर थिस्सलुनीकियों नगर म्ह तै अरिस्तर्खुस अर सिकुन्दुस, अर दिरबे नगर का गयुस, अर तीमुथियुस, अर आसिया परदेस का तुखिकुस अर त्रुफिमुस आसिया परदेस ताहीं उसके गैल हो लिये। 5 ये म्हारे मुसाफिर साथी म्हारे तै पैहले चले गये। 6 अर हम अखमीरी रोटी के त्यौहार के दिन्हां कै पाच्छे फिलिप्पी तै जहाज पै चढ़कै पांच दिन म्ह त्रोआस म्ह उसके धोरे पोहचे, अर सात दिन ताहीं रहे। 7 हप्तै के पैहल्डे दिन जिब हम प्रभुभोज कै खात्तर कठ्ठे होए, तो पौलुस जो दुमरे दिन चले जाण पै था, उनतै बात करी, आधी रात ताहीं बात करदा रहया। 8 जिस चौबारे पै हम कठ्ठे थे, उस म्ह घणे दीवे जलण लागरे थे। 9 अर यूतुखुस नाम का एक जवान खिड़की पै बेठ्या होया नींद की झपकियाँ लेण लागरया था। जिब पौलुस वारी ताहीं बात करदा रहया तो यूतुखुस नींद कै झोकके म्ह तीसरी अटारी पै तै पड़ग्या, अर उसकी मौत होगी। 10 पौलुस नीच्यै गया, उसके धोरे जाकै उसतै लिपटग्या, अर गळे लाकै कह्वा, “घबराओ ना, वो जीवै सै।” 11 अर उसनै दुबारा उप्पर जाकै रोटी तोड़ी अर खाकै दिन लिकडण ताहीं उनतै बात करदा रहया, सबरा होग्या। फेर वो चल्या गया। 12 अर वे उस जवान ताहीं जिन्दा लियाए अर माणस भोत खुश होए। 13 हम पाणी के जहाज पै सवार होकै अस्सुस नगर की ओड़ बढ़े, जड़े हमनै पौलुस ताहीं साथ लैकै आगै बढ़णा था, पर पौलुस ओड़ पैदल राह तै पोहोचा था, क्यूँकै या उसकी पैहले तै बणाई तरकीब थी। 14 अस्सुस नगर उन ताहीं मिल्या तो हमनै उस ताहीं पाणी के जहाज म्ह अपणे साथ लिया अर मितुलेने नगर म्ह जा पोहचे। 15 ओड़ तै जहाज खोल कै हम दुमरे दिन खियुस टापू कै स्याही पोहगे, अर आगले दिन सामुस टापू म्ह जाण लागे, पर उसके आगले एक दिन कै बाद मीलेतुस बन्दरगाह म्ह आये। 16 पौलुस नै इफिसुस नगर म्ह ना उतरकै आगै बढ़ जाण का इशाद करया क्यूँकै वो चाह्वै था के आसिया परदेस म्ह ठैहरण की बजाए जै हो सक्या तो तगाजै तै पिन्तेरुक्स तै त्यौहार के मौककै पै यरुशलेम नगर म्ह पोहज्य चावै। 17 मीलेतुस नगर तै पौलुस नै इफिसुस नगर म्ह समाचार भेजकै कलीसिया के अगुवां ताहीं बुलावाया। 18 जिब वे उसकै लोवै आये, तो उनतै कह्वा “थमनै बेरा सै के पैहल्डे ए दिन तै जिब मै आसिया परदेस म्ह पोहच्या, मै हर-बखत थारे गेल्या किस ढाळ रहया, 19 यानिके घणी दीनता तै, अर आँसू बहा-बहाकै, अर उन मुसीबतां म्ह जो यहूदियाँ की साजिस कै कारण मेरै पै आण पड़ी, मै प्रभु की सेवा करदा ए रहया। 20 अर जो-जो बात थारे फायदे की थी, उन ताहीं बताण अर माणसां कै स्याही अर घर-घर सिखाण तै कदे न्हीं दिझाक्या, 21 बल्के यहूदियाँ अर यूनानियाँ कै स्याही गवाही देंदा रहया के परमेसवर की ओड़ मन फिराणा अर म्हारै प्रभु यीशु पै बिश्वास करणा

चाहिये।” 22 इब देक्खो, मैं पवित्र आत्मा मह बन्धया होया यरुशलेम नगर नै जाऊँ सूँ अर मन्नै न्हीं बेरा के ओड़े मेरै पै के-के बीतैगी। 23 सिर्फ यो के पवित्र आत्मा हरेक नगर मह गवाही दे-देकै मेरै तै कहवै सै के बन्धन अर कल्लेश तेरे खात्तर त्यार सै। 24 पर मैं अपणी जान नै किमे न्हीं समझदा के उसते प्यार राक्खूँ बल्के यो के मैं अपणी दौड़ ताहीं अर उस सेवा नै पूरी करूँ, जो मन्नै परमेसवर कै अनुग्रह के सुसमाचार पै गवाही देण के खात्तर प्रभु यीशु तै पाई सै। 25 इब देक्खो, मन्नै बेरा सै के थम सारे जिन मह मैं परमेसवर के राज्य का प्रचार करया सै, मेरा मुँह दुबारा कोनी देक्खोगे। 26 ज्यांतै मैं आज कै दिन थारे तै गवाही देकै कहूँ सूँ के मैं किसे की भी मौत का कसूरवार न्हीं सूँ। 27 क्यूँकै मैं परमेसवर की सारी इच्छा नै थारे ताहीं बताण मह कदे कोनी हिचकिचाया। 28 इस करकै थम अपणा ध्यान राक्खो अर उस टोळ का भी, जिसका रुखाला थारे ताहीं पवित्र आत्मा ठहराया सै, के थम परमेसवर की कलीसिया की रुखाली करो, जिस ताहीं उसने खुद अपणे लहू तै मोल लिया सै। 29 मन्नै बेरा सै के मेरै जानकै बाद पाड़ण आळे भेड़िये थारे मह आवेंजों जो टोळ नै कोनी छोड़ैगें। 30 थारे ए बिचालै तै भी इसे-इसे माणस उठेंगें, जो चेल्यां ताहीं अपणे पाढ़ै खींच लेण ताहीं टेढ़ी-मेढ़ी बात कहवैंगें। 31 इस करकै जागदे रहो, अर याद राक्खो के मन्नै तीन साल्लां ताहीं रात-दिन आँसू बहा-बहाकै हरेक ताहीं चेतावनी देणा न्हीं छोड़ा। 32 “अर इब मैं थमनै परमेसवर अर उनके अनुग्रह के वचन की देखभाल मह सौपण लागरया सूँ, जिस मह थारी बढ़ोतरी करण अर उन सब के साथ मीरास देण की ताकत सै, जो प्रभु खात्तर न्यारे करे गये सै। 33 मन्नै किसे के चाँदी, सोन्ने या लते का लोभ कोनी करया। 34 थमनै खुदे बेरा सै के इन्हे हाथ्थां नै मेरी अर मेरे साथियाँ की जस्तर पूरी करी सै। 35 मन्नै थारे ताहीं सारया किमे करकै दिखाया के इस तरियां तै मेहनत करदे होए कमजोरां ताहीं सम्भालणा अर प्रभु यीशु के वचन याद राखणा जरूरी सै, जो उसने खुदे कह्या सै: ‘लेण तै देणा धन्य सै।’” 36 न्यू कुहकै उसनै गोड़े टेक्के अर उन सारया कै गेल्या प्रार्थना करी। 37 फेर वे सारे घणे रोये अर पौलुस कै गळे लिपटकै उस ताहीं चुम्ण लाग्गे। 38 वे खासकर इस बात तै दुखी थे जो उसनै कही थी के थम मेरा मुँह दुबारा कोनी देक्खोगे। इसके बाद वे पौलुस के साथ पाणी के जहाज तक गये।

21

जिब हमनै उनतै न्यारे होकै जहाज खोल्या, तो सीधी राही तै कोस टापू मह आये, अर दुसरे दिन रुदुस टापू मह अर ओड़े तै पतरा टापू मह। 2 ओड़े एक जहाज फीनीके परदेस नै जान्दा होया मिल्या, अर हमनै उसपै चढ़कै अपणा सफर शरु करया। 3 हमनै ओळै हाथ कान्ही साइप्रस टापू दिखया, तो हम उसनै छोड़कै सीरिया परदेस की ओड़ बढ़ते गये अर सूर नगर मह जा पोहचे, क्यूँकै ओड़े जहाज तै समान उतारया जाणा था। 4 चेल्यां नै पाके हम ओड़े सात दिन ताहीं रहे। उननै पवित्र आत्मा के सिखाए पौलुस तै कह्या के ओड़े (यरुशलेम नगर मह) पाँ ना धरिये। 5 सात दिन के बाद जिब ओड़े तै म्हरे जाण का

बखत आया, तो वे पूरे परिवार कै साथ म्हरै ताहीं बिदा करण खात्तर नगर की सीमा तक आये, अर समन्दर कै किनारे हमनै घुटने टेकै प्रार्थना करी, 6 फेर एक-दुसरे तै बिदा होकै, हम तो जहाज पै चढ़गे अर वे अपणे-अपणे घरां बोहड़गे। 7 जिब हम सूर नगर तै जहाज पै सफर करकै पतुलिमियस नगर मह पोहचे, अर विश्वासी भाईयाँ नै नमस्कार करकै उनकै गेल्या एक दिन रहे। 8 दुसरे दिन हम ओड़े तै चालकै कैसरिया नगर मह आये, अर फिलिप्पुस सुसमाचार प्रचारक कै घर मह जो उन सात आदिमियाँ मह तै एक था, जिन ताहीं प्रेरितां नै बिध्वा जननियाँ की सेवा करण खात्तर यरुशलेम मह छाट्या था, हम उस्से कै घर मह ठहरे। 9 उसकी चार कुँवारी बेटी थी, जो भविष्यवाणी करया करै थी। 10 जिब हम ओड़े धणे दिन ताहीं रह लिये, तो अगबुस नाम का एक नवी यहूदिया परदेस मह आया। 11 उसनै म्हारै धोरै आके पौलुस का कमरबन्द लिया, अर अपणे हाथ-पाँ बाँधकै कह्या, “पवित्र आत्मा न्यू कहवै सै के जिस माणस का यो कमरबन्द सै, उस ताहीं यरुशलेम नगर मह यहूदी इस्से तरियां तै बाँधैंगे, अर गैर यहूदियाँ कै हाथ्थां मह सौंपेंगे।” 12 जिब हमनै ये बात सुणी, तो हमनै अर ओड़े के माणसां नै पौलुस तै बिनती करी के यरुशलेम नगर नै ना जाइए। 13 पर पौलुस नै जवाब दिया, “थम के करो सो के रो-रोकै मेरा मन तोड़ो सो? मैं तो प्रभु यीशु कै नाम कै खात्तर यरुशलेम नगर मह ना सिर्फ बाँधे जाण ए कै खात्तर बल्के मरण कै खात्तर भी त्यार सूँ।” 14 जिब उसनै न्हीं मान्नी तो हम न्यू कुहकै बोल-बाल्ले रहगे, “प्रभु की मर्जी पूरी हो।” 15 कई दिनां पाच्छै हमनै त्यारी करी अर यरुशलेम नगर नै चाल दिए। 16 कैसरिया नगर तै भी कुछ चेल्ये म्हरै गेल्या हो लिए, अर म्हरै ताहीं ठैहराण खात्तर साइप्रसवासी मनासोन के घर ले गये, वो सब तै पैहले के चेल्यां म्ह तै एक था। 17 जिब हम यरुशलेम नगर मह पोहचे, तो विश्वासी भाई धणी खुशी कै गेल्या हम तै मिले। 18 दुसरे दिन पौलुस म्हरै ताहीं लेकै याकूब कै धोरै गया, जित सारे कलीसिया के अगुवें कठै थे। 19 जद उसनै उन ताहीं नमस्कार करकै, जो-जो काम परमेसवर नै उसकी सेवा के जरिये गर यहूदियाँ म्ह करे थे, एक-एक करकै सारे बताए। 20 उननै न्यू सुणकै परमेसवर की महिमा करी, फेर उसतै बोल्या, “हे भाई, तू देक्खै सै के यहूदियाँ म्ह तै कई जहाजां नै बिश्वास करया सै, अर सारे नियम-कायदे के खात्तर मानण म्ह पक्के सै। 21 उननै यो सुण राख्या सै के तू गैर यहूदी माणसां के बीच म्ह रहन्दे होए यहूदियाँ ताहीं या शिक्षा देण लागरया सै के मूसा नबी के नियम-कायदा नै छोड़ द्यो, ना तो अपणे बाल्कां का खतना करो अर ना रीति-रिवाजां पै चाल्लों। 22 तो फेर के करया जावै? माणस जस्तर सुणैंगे के तू आया सै। 23 इस करकै जो हम तेरे तै कहां सां, वो कर। म्हारा सुझाव मान उरै इसे चार माणस सै, जिन नै कसम खाई सै।” 24 तू उनकै गैल जा, शुद्ध होण की विधि पूरी कर, अर उसकै मुण्डन का खर्च ठां, फेर सारया नै यो बेरा लाग ज्यागा के जो कुछ भी बात तेरे बारै म्ह कह्या गया सै, उस म्ह कोए सच्चाई न्हीं सै पर तू खुद भी नियम-कायदे का पालन करै सै। 25 पर उन गैर यहूदियाँ कै

बारे म्हं जिन नै बिश्वास करया सै, हमनै यो फैसला करके लिख भेज्या सै “के वे मूर्तियाँ के स्याम्ही बलि करे हाड़ माँस तै, अर लहू तै अर घेट्टी घोट्टे होयां के माँस तै अर जारी तै बचे रहवैं” 26 फेर पौलुस उन माणसां नै लैकै, अर दुसरे दिन उनकै गेल्या शुद्ध होकै मन्दर म्हं गया, अर ओडै बता दिया के शुद्ध होण कै दिन, यानिके उन म्हं तै होरेक कै खात्तर चढावा चढाए जाण तक के दिन कद पूरे होवैगें। 27 जिब वे सात दिन पूरे होण पै थे, तो आसिया परदेस के यहूदियाँ नै पौलुस ताहीं मन्दर म्हं देखकै सरे माणसां ताहीं उकसाया, अर न्यू रुक्का मारकै उस ताहीं पकड़ लिया, 28 “हे इसाएलियों, मदद करो, यो वोए माणस सै, जो माणसां के, अर नियम-कायदे के, अर इस जगहां कै बिरोध म्हं होरेक जगहां सरे माणसां नै सिखावै सै, उरै ताहीं के यूनियाँ ताहीं भी मन्दर म्हं ल्याकै उसनै इस पवित्र जगहां ताहीं अपवित्र करया सै।” 29 उननै इसतै पैहल्या इफिसुसवासी त्रुफिमुस ताहीं पौलुस कै गेल्या नगर म्हं देख्या था, अर सोच्यै थे के पौलुस उसनै मन्दर म्हं लियाया सै। 30 फेर सारे नगर म्हं दंगा माचग्या, अर माणस भाजकै कठ्ठे होए, अर पौलुस नै पकड़कै मन्दर कै बाहरणी घरसीट ल्याए, अर जिब्बे किवाड़ बन्द करे गये। 31 जिब वे उसनै मार देणा चाहवै थे, तो पलटन के सरदार नै सन्देश पोंहच्या के सारे यरुशलेम नगर म्हं दंगा माचरया सै। 32 फेर वो जिब्बे सिपाहियाँ अर सूबेदारां नै लैकै उनकै धोरै तळै भाज आया, अर उननै पलटन के सरदार अर सिपाहियाँ ताहीं देखकै पौलुस ताहीं मारण-छेतणा छोड़ दिया। 33 फेर पलटन के सरदार नै धोरै आकै पौलुस ताहीं पकड़ लिया, अर दो साँकळां तै बाँधण का हुक्म देकै बुझाण लाग्या, “यो कौण सै अर इसनै के करया सै?” 34 पर भीड़ म्हं तै कोए किमे अर कोए किमे चिल्लान्दा रहया। जिब रोले कै कारण वो सही सच्चाई न्ही जाण सक्या, तो उस ताहीं गढ़ म्हं ले जाण का हुक्म दिया। 35 जिब वो सीढ़ी पै पोंहच्या, तो इसा होया के भीड़ की दाब कै मारे सिपाहियाँ नै उस ताहीं ठाकै ले जाणा पड़या। 36 क्यूँकै माणसां की भीड़ न्यू चिल्लान्दी होइ उसकै पाढ़ी थी, “उसनै खतम कर द्यो।” 37 जिब वे पौलुस नै गढ़ म्हं ले जावण आले थे, तो उसनै पलटन के सरदार तै कह्या, “जै मन्नै इजाजत हो तो मै थारे तै किमे कँहूँ?” वो बोल्या, “के तू यूनानी भाषा जाणै सै? 38 “के तू मिस्य देश का कोनी, जो इन दिनां तै पैहल्या बिद्रोही बणकै, चार हजार हथियार सुधा माणसां नै जंगल म्हं लेग्या?” 39 पौलुस नै कह्या, “मै तो तरसुस का यहूदी माणस सूँ! मै किलिकिया परदेस के तरसुस नगर का बासिन्दा सूँ। मै तेरे तै बिनती करूँ सूँ के मन्नै माणसां तै बात करण दे।” 40 जिब उसनै हुक्म दिया, तो पौलुस नै सीढ़ी पै खड़े होकै माणसां ताहीं हाथ तै इशारा करया। जिब वे चुप होए तो वो इब्रानी भाषा म्हं बोल्लण लाग्या:

22 “हे भाईयो अर बुजुर्गों, मेरा बदले म्हं जवाब सुणो, जो मै इब थारे स्याम्ही ल्याऊँ सूँ!” 2 वे न्यू सुणकै के वो हम तै इब्रानी भाषा म्हं बोल्लै सै, और भी बोल-बाल्लै होगे। फेर उसनै कह्या 3 “मै तो यहूदी माणस सूँ, जो किलिकिया के तरसुस नगर म्हं जन्मा, पर इस नगर म्हं

गमलीएल के पायां कै धोरै बैठकै पढाया गया, अर पूर्वजां के नियम-कायदा नै ठीक रीति तै सिखाया गया अर परमेसवर कै खात्तर इसी धुन लारया था, जिस तरियां थम सारे आज लारे सो। 4 मन्नै माणस अर लुगाई दोनुआ ताहीं जुङ-जुङकै अर जेळ म्हं गेर-गेर कै, इस पंथ नै उरै ताहीं सताया के उन ताहीं मरवा भी दिया। 5 इस बात कै खात्तर महायाजक अर सारे यहूदी अगुवें गवाह सै, के उनतै मै भाईयाँ कै नाम पै चिट्ठियाँ लैकै दमिश्क नगर नै चाल्या जाऊँ था, के जो ओडै हों उन ताहीं भी सजा दुवाण कै खात्तर बाँधकै यस्शलेम नगर लाऊँ। 6 “जिब मै चाल्दे-चाल्दे दमिश्क नगर कै लोवै पोंहच्या, तो इसा होया के दोपहर कै करीबन चाणचक एक घणा चाँदणा अकास तै मेरै चौगरदे नै चमक्या। 7 अर मै धरती पै गिर ग्या अर यो शब्द सुण्या, हे शाऊल, हे शाऊल, तू मन्नै क्यांतै सतावै सै?” 8 मन्नै जवाब दिया, “हे प्रभु, तू कौण सै?” उसनै मेरै तै कह्या, “मै यीशू नासरी सूँ.” जिस ताहीं तू सतावै सै। 9 मेरै साथियाँ नै चाँदणा तौ देख्या, पर मेरै तै जो बोल्लै था उसनै समझ कोनी पाए। 10 फेर मन्नै कह्या, “हे प्रभु, मै के करूँ?” प्रभु नै मेरै तै कह्या, “उठकै दमिश्क नगर म्हं जा, अर जो किमे तेरे तै करण कै खात्तर ठहराया गया सै ओडै तेरे तै सब बता दिया जावैगा।” 11 जिब उस चाँदणे के तेज के मारे मन्नै किमे कोनी दिख्या, तो मै अपणे साथियाँ का हाथ पकड़े होए दमिश्क नगर म्हं आया। 12 “फेर हनन्याह नामक नियम-कायदे कै मुताबिक एक भगत माणस, जो ओडै के रहणीये सारे यहूदियाँ म्हं सुनाम्ही था, मेरै धोरै आया,” 13 अर खड़े होकै मेरै तै कह्या, “हे भाई शाऊल, फेर देखण लागा!” उससे बखत मेरी आँख खुल्गी अर मन्नै उस ताहीं देख्या। 14 फेर उसनै कह्या, “म्हारै बाप-दाया के परमेसवर नै तेरे ताहीं ज्यांतै ठहराया के तू उसकी मर्जी नै जाणै, अर उस धर्मी नै देक्खै अर उसकै मुँह की बात सुणै। 15 क्यूँकै तू उसकी ओडै तै सारे माणसां कै स्याम्ही उन बात्तां का गवाह होगा जो तन्नै देक्खी अर सुणी सै। 16 इब क्यांतै वार कैरै सै? उठ, बपतिस्मा ले, अर उसका नाम लैकै अपणे पापां की माफी पाले।” 17 “जिब मै दुबारा यरुशलेम नगर म्हं आकै मन्दर म्हं प्रार्थना करण लागरया था, तो बेसुध होग्या, 18 अर उस ताहीं देख्या के वो मेरै तै कहवै सै, ‘तावळ करकै यरुशलेम नगर तै झाट दे-सी लिकडज्या,’ क्यूँकै वे मेरै बैरै म्हं तेरी गवाही कोनी मान्नैगें।” 19 मन्नै कह्या, “हे प्रभु, उननै तो खुदे बेरा सै के मै तेरे पै बिश्वास करण आळा नै जेळ म्हं गेरै अर जगहां-जगहां आराधनालय म्हं छित्वाऊँ था। 20 जिब तेरे गवाह स्तिफनुस का लहू बहाया जाण लागरया था जद मै भी ओडै खड्या था अर इस बात म्हं सहमत था, अर उसकै मारणीयां के लत्यां की रुखाळी करूँ था।” 21 अर प्रभु नै मेरै तै कह्या, “चल्या जा क्यूँकै मै तेरे ताहीं गैर यहूदियाँ कै धोरै दूर-दूर भेज्यूँगा।” 22 माणस इस बात तक उसकी सुणदे रहे, फेर जोर तै चिल्लाए, “इसे माणस का नाश करो, उसका जिन्दा रहणा ठीक कोनी!” 23 जिब वे चिल्लान्दे अर लत्ते बगान्दे अर अकास म्हं थूळ उड़ावै थे, 24 तो पलटन के सरदार नै कह्या, “इस ताहीं गढ़ म्हं ले

जाओ, अर कोड़े मारके जाँचो, के मनै बेरा लागौ के माणस किस कारण उसके बिरोध म्ह इस ढाळ चिल्लावै सै।” 25 जिब उन्नै उस ताहीं फित्यां तै बाँधया तो पौलुस नै उस सूबेदार तै जो धोरै खड़ा था, कह्या, “के यो सही सै के थम एक रोमी माणस ताहीं, अर वो भी बिना कसूरवार ठहराए होए, कोड़े मारो?” 26 सूबेदार नै न्यू सुणकै पलटन के सरदार कै धोरै जाकै कह्या, “तू यो के करै सै? यो तो रोमी माणस सै।” 27 फेर पलटन के सरदार नै उसके धोरै आकै कह्या, “मनै बता, के तू रोमी सै?” उसनै कह्या, “हाँ।” 28 न्यू सुणकै पलटन के सरदार नै कह्या, “मनै रोमी होण का पद घणे रपिये देकै मिल्या सै।” पौलुस नै कह्या, “मै तो जन्म तै रोमी सूं?” 29 फेर जो माणस उस ताहीं जाँच्यण पै थे, वे जिब्बे उसके धोरै तै हट्टो, अर पलटन का सरदार भी न्यू जाणकै के यो रोमी सै अर मनै उस ताहीं बाँधया सै, डरग्या। 30 दुसरे दिन उसनै सही-सही जाणण की मर्जी तै के यहूदी उसपै क्यांते दोष लावै सै, उसके बन्धन खोल दिए, अर प्रथान याजकां अर यहूदी अगुवां की सभा ताहीं कठ्ठा होण का हुकम दिया, अर पौलुस नै तळै ले जाकै उनकै स्याही खड़ा कर दिया।

23 पौलुस नै यहूदी अगुवां की सभा की ओड़ गौर तै देख्या अर कह्या,

“हे भाईयो, मनै आज ताहीं परमेसवर कै खात्तर जमा-कती सच्चे मन तै जीवन बिताया सै।” 2 इसपै हनन्याह महायाजक नै उन ताहीं जो उसकै धोरै खड़े थे, उसकै मुँह पै थप्पड़ मारण का हुकम दिया। 3 फेर पौलुस नै उसतै कह्या, “हे चुन्ना फिरि होड़ भीत, परमेसवर तेरे ताहीं मारैगा। तू नियम-कायदे कै मुताबिक मेरा न्याय करण नै बेठ्या सै, अर फेर के नियम-कायदे कै खिलाफ मेरै ताहीं मारण का हुकम देवै सै?” 4 जो धोरै खड़े थे उननै कह्या, “के तू परमेसवर कै महायाजक नै आच्छा-भुंडा बोल्लै सै?” 5 पौलुस नै कह्या, “हे भाईयो, मनै न्ही बेरा था के यो महायाजक सै, क्यूँकै वचन म्ह लिख्या सै: ‘अपणे माणसां के प्रथान नै भुंडा ना बोलिए।’” 6 फेर पौलुस नै न्यू जाणकै के एक टोल्ल सट्कूकी अर दुसरा फरीसी लोगां का सै, यहूदी अगुवां की सभा म्ह रुक्का मारकै कह्या, “हे भाईयो, मै फरीसी अर फरीसी लोगां के वंश का सूं मेर होया की आस अर पुनरुत्थान कै बारे म्ह मेरा मुकहमा होरया सै।” 7 जिब उसनै या बात कही तो फरीसियाँ अर सदूकियाँ म्ह दंगा होण लाग्या, अर सभा म्ह फूट पड़ी। 8 क्यूँकै सदूकियाँ कौ विश्वास तो न्यू कहवै सै, के ना पुनरुत्थान सै, ना सुर्गदूत अर ना आत्मा सै, पर फरीसी इन साराख नै मानै सै। 9 फेर घणा दंगा माच्या अर कुछ शास्त्री जो फरीसियाँ के टोल के थे, उठ लिए अर न्यू कहकै दंगा करण लाग्ये, “हम इस माणस म्ह कोए बुराई कोनी पांदे, अर जै कोए आत्मा या सुर्गदूत उसतै बोल्या सै तो फेर के होग्या?” 10 जिब घणा दंगा होया, तो पलटन के सरदार नै इस भय तै के वे पौलुस के टुकड़े-टुकड़े ना कर देवै, पलटन ताहीं हुकम दिया के उत्तरकै उस ताहीं उनकै बिचालै तै हाँगै तै लिकाड़, अर गढ़ म्ह ले जावै। 11 उस्से रात प्रभु यीशु नै उसकै धोरै खड़े होकै कह्या, “हे पौलुस, धीरज राख, क्यूँकै जिसी तनै यस्शलेम नगर

म्ह मेरी गवाही देई, उसीए तनै रोम म्ह भी गवाही देणी होगी।” 12 जिब दिन लिकड़या तो यहूदियाँ नै साजिस रची अर कसम खाई के जिब ताहीं हम पौलुस नै मार न्ही देवा, जै हम खावां या पीवां तै म्हारै पै धिक्कार सै। 13 जिन नै आप्पस म्ह या कसम खाई थी, वे चालीस जण्यां तै घणे थे। 14 उन्नै प्रथान याजकां अर यहूदी अगुवां कै धोरै जाकै कह्या, “हमनै न्यू ठान लिया सै के जिब ताहीं हम पौलुस नै मार न्ही देंदे, जद ताहीं जै किमे काच्खां तै म्हारै पै धिक्कार सै। 15 इस करकै इब यहूदी अगुवां की सभा सुथा पलटन के सरदार नै समझाओ के उसनै थारे धोरै लियावै, मान ल्यो के थम उसकै बारे म्ह और भी सही तै जाँच करण चाहवो सो, अर हम उसकै पोहोचण तै पैहल्याए उस ताहीं मार देण कै खात्तर त्यार रहवांगे।” 16 पौलुस कै भाएंजै नै सुण्या के वे उसकी टाह म्ह सै, तो गढ़ म्ह जाकै पौलुस ताहीं संदेशां दिया। 17 पौलुस नै सूबेदारां म्ह तै एक ताहीं अपणे धोरै बुलाकै कह्या, “इस जवान नै पलटन के सरदार कै धोरै ले जाओ, यो उसतै किमे कहणा चाहवै सै।” 18 इस करकै उसनै उस ताहीं पलटन के सरदार कै धोरै ले जाकै कह्या, “कैदी पौलुस नै मेरै ताहीं बुलाकै बिनती करी के यो जवान पलटन के सरदार तै किमे कहणा चाहवै सै, उस ताहीं उसकै धोरै ले जा।” 19 पलटन के सरदार नै उसका हाथ पकड़कै अर न्यारा जाकै बुझ्याया, “तू मेरै तै के कहणा चाहवै सै?” 20 वो बोल्या, “यहूदियाँ नै साजिस रची सै के तेरे तै बिनती करै के काल पौलुस नै यहूदी अगुवां की सभा म्ह ल्यावै, मान्नो वे और सही ढाळ तै उसकी जाँच करण चाहवै सै। 21 पर उनकी मानियो मतान, क्यूँकै उन म्ह तै चालीस कै उपर माणस उसनै मारण की टाह म्ह सै, जिन नै न्यू ठान लिया सै के जिब ताहीं वे पौलुस नै मार न्ही देवै, जद ताहीं ना खावांगे अर ना पीवांगे, अर इब वे त्यार सै अर तेरे वचन की बाट देखण लागरे सै।” 22 फेर पलटन के सरदार नै जवान ताहीं यो हुकम देकै बिदा करया, “किसे तै ना कहिये के तन्नै मेरै तै ये बात बताई सै।” 23 फेर उसनै दो सूबेदारां ताहीं बुलाकै कह्या, “दो सौ सिपाही, सत्तर सवार, अर दो सौ भालेत, रात के नौ बजे कैसरिया नगर नै जाणकै खात्तर त्यार कर करो। 24 अर पौलुस की सवारी कै खात्तर घोड़े त्यार राक्ख्यो, के उस ताहीं फेलिक्स राज्यपाल कै धोरै राज्जी-खुशी तै पोहोचा दै।” 25 उसनै इस तरियां की चिठ्ठी भी लिक्खी 26 महामहिम फेलिक्स राज्यपाल ताहीं क्लॉकियुस लूसियास का नमस्कार। 27 इस माणस ताहीं यहूदियाँ नै पकड़कै मार देण चाह्या, पर जिब मनै जाण्या के रोमी सै, तो पलटन लेकै छुडा ल्याया। 28 मै जाणणा चाहूँ था के वे उसपै किस कारण दोष लावै सै, ज्यांतै उस ताहीं यहूदी अगुवां की सभा म्ह ले गया। 29 फेर मनै जाण लिया के वे अपणे नियम-कायदे कै रोले कै बारे म्ह उसपै इल्जाम लगावै सै, पर मार देण जोग्या या बाँधे जाणकै जोग्या उस म्ह कोए कसूर कोनी। 30 जिब मेरै ताहीं बताया गया के वे इस माणस की टाह म्ह लागरे सै तो मनै जिब्बे उस ताहीं तेरे धोरै भेज दिया, अर बैरियाँ ताहीं भी हुकम दिया के तेरे स्याही उसपै नालिश करै। 31 अखर म्ह जिसा सिपाहियाँ नै हुकम मिल्या था, उस्से तरियां ए वे पौलुस नै लेकै

रातो-रात अन्तिपत्रिस म्ह आये। 32 दुसरे दिन वे सवारा नै उसकै गेल्या जाणकै खात्तर छोड़कै खुद यरुशलेम म्ह बोहड़े। 33 उननै कैसरिया पोहचकै राज्यपाल ताहीं चिट्ठी दी, अर पौलुस ताहीं भी उसकै स्याम्ही खड्या करया। 34 राज्यपाल नै चिट्ठी पढ़कै बुझ्या, “यो किस प्रान्त का सै?” 35 अर जिब जाण लिया के किलिकिया परदेस का सै तो उसतै कह्या, “जिब तेरे बैरी भी आवैगें, तो मै तेरा मुकद्दमा करूँगा।” अर उसनै उस ताहीं हेरेदेस कै किले म्ह पहरे म्ह राक्खण का हुकम दिया।

24 पाँच दिन कै पाच्छे हनन्याह महायाजक कर्द यहूदी अगुवें अर

तिरतुल्लुस नामक किसे वकील नै गेल्या लेकै कैसरिया नगर आ पोहच्ये। उननै राज्यपाल कै स्याम्ही पौलुस कि बुराई करी। 2 जिब पौलुस बुलाया गया तो तिरतुल्लुस उसपै इल्जाम लाकै कहण लाग्या: “हे महामहिम फेलिक्स, तेरे जरिये हम राज्जी-खुशी सां, अर तेरे इन्तजाम तै इस जात कै खात्तर घणीए बुराईयाँ सुधरदी जावै सै। 3 इस ताहीं हम हेरेक जगहां अर हेरेक तरियाँ तै धन्यवाद कै गैल मान्नां सां। 4 मै तेरा और ज्यादा बखत कोनी लेऊँ, मै तेरे तै बिनती करूँ सूँ के दया करकै दो-एक बात सुण ले।” 5 “बात या सै के इस माणस ताहीं हमनै एक उत्पाती के रूप म्ह पाया सै, सारी दुनिया के यहूदिया परदेस म्ह इसनै दोगे भड़काए सै, यो नासरियाँ के पंथ का नेता नै। 6 उसनै मन्दर ताहीं अशुद्ध करणा चाह्या, पर हमनै उस ताहीं पकड़ लिया। (हमनै उस ताहीं अपणे नियम-कायदे कै मुताबिक सजा दे दी होन्दी, 7 पर पलटन कै सरदार लूसियास नै उस ताहीं हाँगै तै म्हाहै हाथ तै खोस लिया, 8 अर बैरियाँ ताहीं तेरे स्याम्ही आण का हुकम दिया।) इन सारी बातांनै जिनकै बाई म्ह हम उसपै इल्जाम लावां सां, तू खुदे ए उसनै जाँच करकै जाण लेवैगा!” 9 यहूदियाँ भी उसका साथ देकै कह्या, ये बात इस्से ढाळ तै करी सै। 10 जिब राज्यपाल नै पौलुस ताहीं बोल्लण का इशारा करया, तो उसनै जवाब दिया: “मै न्यू जाणकै के तू घणे साल्लां तै इस जात का न्याय करण लागरया सै, खुशी तै अपणा बदले का जवाब देऊँ सूँ। 11 तू आप्ये ए जाण सकै सै जिब तै मै यरुशलेम नगर के मन्दर म्ह आराधना करण नै आया, मन्ने बाहरा दिनां तै बाध कोनी होए, 12 उननै मेरै ताहीं ना मन्दर म्ह, ना आराधनालायाँ म्ह, ना किसे नगर म्ह किसे तै बहस करदे या भीड़ लागादे पाया, 13 अर ना तो वे उन बातां ताहीं, जिनका वे इब मेरै पै दोष लावै सै, तेरे स्याम्ही साच्ची साबित कर सकै सै। 14 पर मै तेरे स्याम्ही यो मान ल्यु सूँ के जिस पन्थ नै वे बुरा पन्थ कहवै सै, उस्से की रीत पै मै अपणे बाप-दाद्या के परमेसवर की सेवा करूँ सूँ, अर जो बात नियम-कायदे अर नबियाँ की किताबां म्ह लिक्खी सै, उन सारया पै बिश्वास करूँ सूँ। 15 अर परमेसवर तै आस राक्खूँ सूँ जो वे खुद भी राक्खै सै, के धर्मी अर अधर्मी दोनुआ का जिन्दा उठणा होवैगा। 16 इसतै मै खुद भी कोशिश करूँ सूँ के परमेसवर की, अर माणसां की ओड़ तै मेरा मन सारी-हाण बेक्सूर रहवै।” 17 “घणे साल्लां पाच्छे मै गरीबां नै दान पोहोचाण, अर भेट चढाण आया था। 18 उस्से

बखत इननै मेरै ताहीं मन्दर म्ह, शुद्ध होण की रीति पूरी करते देख्या, ओड़ ना कोए भीड़ थी, अर ना ए किसे ढाल का शोर, पर ओड़ आसिया परदेस के कई यहूदी थे 19 जै मेरै बिरोध म्ह उनकै धोरै कोए बात कहण की हो तो उरे तेरे स्याम्ही आकै मेरै पै इल्जाम लादे। 20 या ये खुद ए बतावै के जिब मै यहूदी अगुवां की सभा कै स्याम्ही खड्या था, तो उननै मेरै म्ह कौण सा कस्रू पाया? 21 इस एक बात नै छोड़ जो मन्नै उनकै बिचालै खड्या होकै कही थी: ‘‘मेरे होया के जिन्दा उठण कै बाई म्ह आज मेरा थारे स्याम्ही मुकद्दमा होण लागरया सै’’ 22 फेलिक्स नै, जो इस पन्थ की बात सही-सही जाणी था, उन ताहीं न्यू कहकै टाळ दिया, “जिब पलटन का सरदार लूसियास आवैगा, तो थारी बात का फैसला करूँगा।” 23 उसनै सूबेदार ताहीं हुकम दिया के पौलुस ताहीं जेल म्ह तो राख्या जावै पर उस ताहीं इतनी छूट जरुर दी जावै के उसके खास साथी आकै उसकी सेवा कर सकै। 24 कुछ दिनां पाच्छे फेलिक्स हाकिम अपणी घरआली दुसिल्ला ताहीं, जो यहूदी थी, गेल्या लेकै आया अर पौलुस ताहीं बुलवाकै उस बिश्वास कै बाई म्ह जो मसीह यीशु पै सै, उसतै सुण्या। 25 जिब पौलुस धर्म, अर संयम, अर आण आळे न्याय का जिक्र करण लागरया था, तो फेलिक्स नै भयभीत होकै जवाब दिया, “इब तो जा, मौक्का मिल तिए मै तन्नै दुबारा बुलवाऊँगा।” 26 फेलिक्स ताहीं पौलुस तै कुछ रपिये मिलण की भी आस थी, ज्यांतै और भी बुला-बुलाकै उसतै बात करया करै था। 27 पर जिब दो साल बीतगे तो पुरकियुस फेस्तुस, फेलिक्स की जगहां पै आया, अर फेलिक्स यहूदियाँ ताहीं राज्जी करण की मर्जी तै पौलुस ताहीं कैदी ए छोड़ ग्या।

25 राज्यपाल पद का काम सम्भालण के तीन दिन बाद फेस्तुस

कैसरिया नगर तै यरुशलेम नगर म्ह गया। 2 फेर प्रधान याजकां अर यहूदियाँ कै खास माणसां नै उसकै स्याम्ही पौलुस की बुराई करी, 3 के वो खियास करकै पौलुस ताहीं यरुशलेम नगर भेजदे, असल म्ह उसकी तरकीब राह म्ह मौक्का देखकै पौलुस ताहीं मारण की थी। 4 फेस्तुस नै जवाब दिया, “पौलुस कैसरिया म्ह पहरे म्ह सै, अर मै आप्ये ए तावळ तै ओड़ जाऊँगा।” 5 फेर बोल्या, “थारे म्ह जो अधिकार राक्खै सै वे गैल चाल्लै, अर जै इस माणस नै किमे गलत काम करया सै तो उसपै इल्जाम लावै।” 6 उनकै बिचालै कोए आठ-दस दिन रहकै फेस्तुस कैसरिया चल्या गया, अर दुसरे दिन न्याय-गद्दी पै बैठकै पौलुस ताहीं ल्याण का हुकम दिया। 7 जिब वो आया तो जो यहूदी अगुवें यरुशलेम नगर तै आये थे, उननै लोवै-धोवै खड़े होकै उसपै घणे भार्या दोष लगाये, जिनका सबूत वे कोनी दे सकै थे। 8 पर पौलुस नै जवाब दिया, “मन्नै ना तो यहूदियाँ कै नियम-कायदे कै अर ना मन्दर कै, अर ना ए कैसर कै बिरुद्ध कोए अपराध करया सै।” 9 फेर फेस्तुस नै यहूदी अगुवां ताहीं राज्जी करण के मक्सद तै पौलुस तै कह्या, “के तू चाहवै सै के यरुशलेम नगर नै जावै, अर ओड़ मेरै स्याम्ही तेरा यो मुकद्दमा तय करया जावै?” 10 पौलुस नै कह्या, “मै कैसर कै न्याय-गद्दी कै स्याम्ही खड्या सूँ, मेरै मुकद्दमे फैसला उरैए होणा चाहिये। जिसा तन्नै आच्छी

ढाल बेरा सै, यहूदियाँ का मन्नै किमे अपराध कोनी करया। 11 जै मै अपराधी सूं अर मारण कै जोगा कोए काम करया सै, तो मरण तै कोनी नाटदा, पर जिन बात्तां की ये मेरै पै इल्जाम लावै सै, जै उन म्ह तै कोए भी बात साच्ची न्ही लिकडी, तो कोए मेरै ताहीं उनकै हाथ्या न्ही सौंप सकदा। मै कैसर की दुहाई यु सूं।” 12 फेर फेस्तुस नै मन्त्रियाँ की सभा कै गेल्या बात करकै जवाब दिया, “तन्नै कैसर की दुहाई दी सै, तू कैसर कै ए धोरै जावैगा।” 13 कुछे दिन बीतण कै पाछै अग्रिप्पा राजा अर बिरनीकै नै कैसरिया म्ह आकै फेस्तुस तै भेंट करी। 14 उनकै घणे दिन ओड़े रहण कै पाछै फेस्तुस नै पौलुस कै बारै म्ह राजा ताहीं बताया “एक माणस सै, जिस ताहीं फेलिक्स कैदी छोड़ ग्या सै।” 15 जिब मै यरुशलेम नगर म्ह था, तो प्रधान याजक अर यहूदिया परदेस के यहूदी अमुगां नै उसकी बुराई करी अर चाह्या के उसपै दण्ड का ढुकम होवै। 16 पर मन्नै उन ताहीं जवाब दिया के रेमियों की या रीत कोनी कै किसे माणस ताहीं सजा कै खात्तर सौंप देवै, जिब ताहीं मुजारिम ताहीं अपणे बैरियॉ कै स्याम्ही खड़े होकै दोष का जवाब देण का मौक्का ना मिलै। 17 आखर जिब वे कठै होए, तो मन्नै किमे वार कोनी करी, पर दुसरे ए दिन न्याय-गद्दी पै बैठकै उस माणस ताहीं ल्याण का ढुकम दिया। 18 जिब उसके बैरी खड़े होए, तो उननै इसी गलत बात्तां की इल्जाम कोनी लाई, जिसा मै समझूँ था। 19 पर वे अपणे पंथ कै अर यीशु नाम किसे माणस कै बारै म्ह, जो मरण्या था अर पौलुस उस ताहीं जिन्दा बतावै था, बहस कैरे थे। 20 मै उळझन म्ह था के इन बात्तां का बेरा किस ढाल लाऊँ? ज्यांते मन्नै उसतै बुझाया, के तू यरुशलेम नगर जावैगा के ओड़े इन बात्तां का फैसला होवै? 21 पर जिब पौलुस नै दुहाई देई के “उसकै मुकद्दमे का फैसला सम्प्राट कै उरै हो, तो मन्नै ढुकम दिया कै जिब तक उस ताहीं कैसर कै धोरै न्ही भेज्जू, उस ताहीं हिरासत म्ह राख्या जावै।” 22 फेर अग्रिप्पा नै फेस्तुस तै कह्या, “मै भी उस माणस की सुणाणा चाहूँ सूं।” उसनै कह्या, “तू काल सुण लेवैगा।” 23 आखर म्ह दुसरे दिन जिब अग्रिप्पा अर बिरनीकै बड़ी धूम-धड़ाकै तै आये अर पलटन कै सरदारां अर नगर के खास आदियाँॉ कै गेल्या दरबार म्ह पोहचे। फेर फेस्तुस नै ढुकम दिया के वे पौलुस ताहीं ली यावै। 24 फेस्तुस नै कह्या, “हे राजा अग्रिप्पा, अर हे सारे माणसों जो उरै म्हारै गेल्या सो, थम इस माणस नै देक्खो सो, जिसकै बारै म्ह सारे यहूदियाँॉ नै यरुशलेम नगर म्ह अर उरै भी रुक्के मार-मारकै मेरै तै बिनती करी के इसका जिन्दा रहणा सही कोनी। 25 पर मन्नै बेरा पाट लिया के उसनै इसा किमे कोनी करया के मार दिया जा, अर जिब के उसनै आप्ये ए सम्प्राट की दुहाई दी, तो मन्नै उस ताहीं खन्दाण का फैसला करया। 26 मन्नै उसकै बारै म्ह कोए पक्की बात कोनी पाई के अपणे मालिलक कै धोरै लिखूँ। ज्यांते मै उस ताहीं थारे स्याम्ही अर खासकर हे राजा अग्रिप्पा तेरे स्याम्ही ल्याया सूं के जाँचे पाच्छे मन्नै किमे लिखण का मौक्का मिलै। 27 क्यूँकै कैदी ताहीं खन्दाण अर जो दोष उसपै लगाये सै, उन ताहीं न्ही बताणा, मन्नै खामखां लाग्या सै।”

26 अग्रिप्पा नै पौलुस तै कह्या, “तेरे ताहीं अपणे बाबत बोल्लण की आज्ञा सै।” फेर पौलुस हाथ तै इशारा करकै जवाब देण लाग्या, 2 “हे राजा अग्रिप्पा, जितनी बात्तां का यहूदी अगुवे मेरै पै इल्जाम लावै सै, आज तेरे स्याम्ही उनका जवाब देण म्ह अपणे ताहीं धन्य समझूँ सूं। 3 खास करकै ज्यांतै के तू सारी यहूदी प्रथा अर परेशानियाँै भली-भाँति जाणै सै। इस करकै मै बिनती करूँ सूं, धीरज तै मेरी सुण।” 4 “मेरा चाल-चलण शरुआत तै अपणी जात कै बिचालै अर यरुशलेम नगर म्ह जिसा था, उसका सारे यहूदियाँै नै बेरा सै। 5 जै वे गवाही देणा चाहवैं, तो तू मेरै ताहीं तब तै पिछाणे सै जिब मै जवान था, के फरीसी होकै अपणे धर्म कै सबतै खेरे पन्थ कै मुताबिक चाल्या। 6 अर आज मै परमेसवर के जरिये म्हारे पूर्वजां नै दिए गये उस वादे की आस के कारण उरै दोषी कै रुप म्ह खड्या सूं। 7 यो वोए वादा सै, जिसके पूरे होण की आस म्हारे बाराहां कुल दिन-रात सच्चाई म्ह परमेसवर की भगति-आराधना करदे होए आये सै। हे राजा, आज मेरै पै यहूदियाँै के जरिये मुकद्दमा इस्से आस कै कारण चलाया जाण लागरया सै। 8 जिब के परमेसवर मरे होया नै जिन्दा करै सै, तो थारे उरै या बात क्यांतै बिश्वास कै जोगी कोनी समझी जान्दी?” 9 “मन्नै भी समझाया था के यीशु नासरी कै नाम कै बिरेथ म्ह मन्नै भोत कुछ करणा चाहिये। 10 अर मन्नै यरुशलेम नगर म्ह न्यूए करया, अर प्रधान याजकां तै हक पाकै घणखेरे पवित्र माणसां ताहीं जेल म्ह गेरया, अर जिब वे मार दिये जावै थे तो मै भी उनकै बिरेथ म्ह अपणी राय यु था। 11 हेरेक आराधनालाय म्ह मै उन ताहीं कालं कर-करकै यीशु की बुराई करवाऊँ था, उरै ताहीं के छो के मारे इसा बावला होग्या के दुसरे नगरां म्ह भी जाकै उन ताहीं कालं करूँ था।” 12 “इस्से धुन म्ह जिब मै प्रधान याजकां तै अधिकार अर हुकम-चिठ्ठी लेकै दमिशक नगर नै जाण लागरया था, 13 तो हे राजा, राह म्ह दोफारी कै बखत मन्नै अकास तै सूरज कै तेज तै भी बढ़कै एक चाँदणा, अपणे अर अपणे गेल्या चाल्लण आला कै चौगरदे नै चमकदा होड़ देख्या। 14 जिब हम सारे धरती पै पड़ोगे, तो मन्नै इङ्गानी भाषा म्ह, मेरै तै न्यू कहन्दे होए एक बोल सुण्या, ‘हे शाऊल, हे शाऊल, तू मन्नै क्यांतै सतावै सै? पैने पै लात मारणा तेरे खात्तर ओक्खा सै। (जै तू मन्नै सतावैगा तो तू खुद नै सतावैगा)’” 15 फेर मै बोल्या, “हे प्रभु, तू कौण सै?” प्रभु नै कह्या, “मै यीशु सूं जिस ताहीं तू सतावै सै। 16 पर तू उठ, अपणे पायां पै खड्या हो, क्यूँकै मन्नै तेरे ताहीं ज्यांतै दर्शन दिया सै के तन्नै उन बात्तां का भी सेवक अर गवाह ठहराऊँ, जो तन्नै देक्खी सै, अर उनका भी जिनकै खात्तर मै तन्नै दर्शन दियुँगा। 17 अर मै तन्नै तेरे माणसां तै अर गैर यहूदियाँै तै बचान्दा रहूँगा, जिनकै धोरै मै इब तन्नै इस करकै भेज्जू सूं। 18 के तू उनकी आँख खोल्लै कै वे अन्धेरै तै चाँदणे कान्ही, अर शैतान कै अधिकार तै परमेसवर कै कान्ही पलटै, इस करकै के पायां कै माफि अर उन माणसां कै गेल्या जो मेरै पै बिश्वास करण तै पवित्र करे गये सै, वसियत पावै।” 19 “इस करकै हे राजा अग्रिप्पा, मन्नै उस सुर्गीय दर्शन की बात कोनी टाली, 20

मन्नै सबतै पैहल्या दमिशक नगर कै, फेर यरुशलेम नगर कै, अर फेर यहूदिया परदेस के बासिन्दा ताहीं, अर गैर यहूदियाँ म्ह भी यो प्रचार करदा रहया के पाप करणा छोड़कै परमेसवर कान्ही बोहड़ आओ, अर अपणे सुभाव के जरिये यो साबित करो के थमनै पाप करणा छोड़ दिया सै। 21 इन बात्तां कै कारण यहूदी मन्नै मन्दर म्ह पकड़कै मार देण की कोशिश करै थे। 22 पर परमेसवर की मदद तै मै आज ताहीं बण्या सूं छोट्या-बड़या सारया कै स्याम्ही गवाही धूं सूं, अर उन बात्तां नै छोड़ किमे कोनी कहन्दा जो नवियाँ अर मूसा नवी नै भी कह्या के होण आठी सै, 23 के मसीह नै दुख ठाणा होगा, अर वोए सब तै पैहल्या मरे होया म्ह तै जी उठकै, म्हरै माणसां म्ह गैर यहूदियाँ म्ह चाँदेण का प्रचार करैगा।” 24 जिब वो इस तरियां तै जवाब देण लागरया था, तो फेस्तुस नै ऊँच्ची आवाज म्ह कह्या, “हे पौलुस, तू बावला सै। घणे ज्ञान नै तेरे ताहीं बावला कर दिया सै।” 25 पर पौलुस नै कह्या, “हे महामहिम फेस्तुस, मै बावला कोनी, पर सच्चाई अर बुद्धि की बात कहूं सूं। 26 राजा नै भी जिसकै स्याम्ही मै बिना डरे बोल्लण लागरया सूं, इन बात्तां का बेरा सै, अर मन्नै बिश्वास सै कै इन बात्तां म्ह तै कोए उसतै लुक्ही कोनी, क्यूँकि यो वाक्या गुप्त म्ह कोनी होया। 27 हे राजा अग्रिष्ठा, के तू नवियाँ के विश्वास करै सै? हाँ, मन्नै बेरा सै के तू बिश्वास करै सै।” 28 फेर अग्रिष्ठा नै पौलुस तै कह्या, “तू माडे-से समझाण तै मन्नै मसीह बणाणा चाहवै सै?” 29 पौलुस बोल्या, “परमेसवर तै मेरी प्रार्थना सै के, देर या सबेर तै, पर ये सारे सुणण आळे, जो आज मेरी बात सुणै सै, वे मेरै समान हो जावै।” 30 फेर राजा अर अधिकारी अर विरनीके अर उनकै गेल्या बैठणीये उठ खडे होए, 31 न्यायालय तै बाहर लिकाड़कै आप्पस म्ह कहण लागे, “यो माणस इसा तो किमे कोनी करदा, जो मौत की सजा या जेल, म्ह गेरण जोग्या हो।” 32 अग्रिष्ठा नै फेस्तुस तै कह्या, “जै यो माणस कैसर की दुर्हाई न्ही देंदा, तो छूट सकै था।”

27 जिब फेस्तुस राज्यपाल के जरिये यो पक्का होया के हम जहाज

कै जरिये इटली देश जावां, तो उननै पौलुस अर कुछ दुसरे कैटियाँ ताहीं भी यूलियुस नामक औगुस्तुस सम्प्राट की पलटन कै एक सूबेदार कै हाथां सौंप दिया। 2 अद्रमुत्तियुम नगर के एक जहाज पै जो आसिया परदेस कै किनारे की जगहां पै जाण पै था, पाणी रास्ते हमनै अणणा परदेस शरु करया, अर अरिस्तर्वुस नामक जो मकिदुनिया परदेस कै थिस्सलुनीके नगर का एक बसिन्दा था। 3 दुसरे दिन हम सैदा नगर पोह्याये गये, अर यूलियुस नै पौलुस पै दया करकै उस ताहीं साथियाँ कै उरै जाण दिया के उनतै जरुरी चीज ले आवां। 4 ओड़े तै हमनै सफर दुबारा शरु करया, हवा कै पलट होण कै कारण हम साइप्रस टापू की ओट म्ह होकै चाल्ले, 5 अर किलिकिया परदेस अर पंफूलिया किनारे कै लोवै कै समुन्दर म्ह होकै लूसिया के मूरा नगर म्ह उतरे। 6 ओड़े सूबेदार नै सिकन्दरिया नगर का एक जहाज इटली देश जान्दा होड़ मिल्या, अर उसने म्हरै ताहीं उस जहाज पै चढ़ा दिया। 7 जिब हम घणे दिनां ताहीं होड़-होळे चालकै मुश्किल तै कनिदुस कस्बे कै स्याम्ही पोहचे, तो इस

करकै के हवा म्हरै ताहीं आगै बढण कोनी देवै थी, हम सलमोने कै स्याम्ही तै होकै क्रेते टापू की आड म्ह चाल्ले, 8 अर उसकै किनारे-किनारे मुश्किल तै चालकै “शुभलंगरबारी” नामक एक जगहां पोहचे, जित्त तै लसया नगर लोवै थे। 9 जिब घणे दिन बीत लिये अर पाणी कै सफर म्ह जोख्खम ज्यांतै होवै थी ब्रत कै दिन इब बीत लिये थे। अन्खर म्ह पौलुस नै उन सारया ताहीं कहकै चेतावनी दी, 10 “हे सज्जनों, मन्नै इसा लाग्यै सै के इस सफर म्ह मुश्किल अर घणा नुकसान, ना सिंक माल अर जहाज की बत्के म्हारी जान का भी, होणआळा सै।” 11 पर सूबेदार नै पौलुस की बात्तां तै कप्तान अर जहाज कै मालिलक की बात्तां तै बाध मान्या। 12 शुभ लंगरबारी नाम का बंदरगाह जाड़ा काटण कै खात्तर सही कोनी था, ज्यांतै घणाए का विचार होया के ओड़े तै आगै बढ़ जावां जै किसे तरियां तै हो सके तो फीनिक्स पोहचकै जाड़ा काटै। यो तो क्रेते टापू का एक बंदरगाह सै जो दक्षिण-पश्चिम अर उत्तर-पश्चिम कान्ही खुलै सै। 13 जिब दक्षिणी हवा होळे-होळे चाल्लण लाग्या, तो न्यू सोच्या के उनकी तरकीब पूरी करण खात्तर बढिया बखथा, लंगर उठाया अर किनारे धोरै होन्दे होए क्रेते टापू कै किनारे जाण लागे। 14 पर माड़ी वार म्ह धरती कै कान्ही तै बड़ी ए आँधी उठी, जो “यूरकुलिन” कुहावै सै। 15 जिब आँधी जहाज पै लाग्यी तो जहाज उसकै स्याम्ही ठैहर कोनी सक्या, इस करकै हमनै जहाज ताहीं हवा के बाहाव छोड़ दिया, अर इस्से तरियां बहन्दे होए चाल्ले गये। 16 फेर कोंदा नामक एक छोटे-से टापू की आड म्ह बहन्दे-बहन्दे हम मुश्किल तै डोंगी नै बस म्ह कर सके। 17 फेर जहाज के मल्लाहां नै उस ताहीं ठाकै सही उपाय करकै जहाज ताहीं तळै तै रस्यां तै कसकै बाँध्या, अर सुरातिस खाड़ी के चोरबालू पै फँस जाणकै डर तै उननै लंगर ताहीं थोड़े नीच्चे उतारकै जहाज ताहीं हवा के बाहाव के गैल-गैल बहण कै खात्तर छोड़ दिया। 18 जिब हमनै आँधी तै घणे हिचकोले अर धक्के खाए, तो दुसरे दिन वे जहाज का माल बगाण लागे, 19 अर तीसरे दिन उननै अपणे हाथां तै जहाज का साज-सामान भी बगा दिया। 20 जिब घणे दिन ताहीं ना सूरज, ना तारे दिक्खे अर बड़ी आँधी चाल्दी रही, तो आन्खर म्हरै बचण की सारी उम्मीद जान्दी रही। 21 जिब वे घणे दिन ताहीं भूखे रह लिये, तो पौलुस नै उनकै बिचालै खड़े होकै कह्या, “हे भाईयो, चाहिये था के थम मेरी बात मानकै क्रेते टापू तै आगै ए ना बढ़ते तो या मुसीबत न्ही आन्दी अर ना यो नुकसान ठान्दे। 22 पर इब मै थमनै समझाऊँ सूं के धीरज राख्ये, क्यूँकि थरे म्ह तै किसे की जान का नुकसान कोनी होवैगा, पर सिंक जहाज का। 23 क्यूँकि परमेसवर जिसका मै सूं, अर जिसकी भगति करूं सूं, उसके सुर्गदूत नै आखरी रात मेरै धोरै आकै कह्या, 24 “हे पौलुस, डर मतानी! तन्नै कैसर कै स्याम्ही खड्या होणा जरुरी सै। परमेसवर नै सारया ताहीं जो तेरे गेल्या सफर करै सै, जीवन दान दिया सै।” 25 ज्यांतै, हे भले माणसों, सब्र करो, क्यूँकि मै परमेसवर का बिश्वास करूं सूं के जिसा मेरै तै कह्या गया सै, उसाए होगा। 26 पर म्हरै ताहीं किसे टापू पै जा टिकणा होगा।” 27 जिब चौदहवीं रात आई,

अर हम अद्विया समुन्दर मह भटकदे होए हाँ डरे थे, तो आधी रात कै लोवै मल्लाहां नै अंदाजे तै जाण्या के हम किसे देश कै लोवै पौहच रहे सां। 28 पाणी की गहराई नाप्पण पै उननै एक सौ बीस फुट डून्घा पाया, अर थोड़ा आगै बढ़कै दुबारा थाह लेर्हे तो नबै फुट पाया। 29 फेर पथरीली जगहां तै टकराण कै डर तै उननै जहाज की पिछली ओड़ चार लंगर गेरे, अर सबैरै होण की चाह करदे रहे। 30 पर जिब मल्लाह जहाज पै तै भाजणा चाहवै थे, अर गलही तै लंगर गेरण कै बहाणे डोंगी समुन्द्र मह उतार दी, 31 तो पौलुस नै सूबेदार अर सिपाहियाँ तै कह्या, “जै वे जहाज पै न्ही रहे, तो थम भी कोनी बच सकदे।” 32 फेर सिपाहियाँ नै जोड़े काटकै डोंगी गेर दी। 33 जिब सबैरै होण पै था, फेर पौलुस नै न्यू कहकै, सारया ताहीं खाण खाण कै खात्तर बिनती करी, “आज चौदहा दिन होगे सै के थम चिन्ता करते-करते खूखे रहे, अर किमे न्ही खाया। 34 ज्यांते थारे तै समझाऊँ सूं के किमे खा ल्यो, जिसतै थारा बचाव होवै, क्यूंकि थारे मह तै किसे का सिर का एक बाल भी कोनी मिरागा।” 35 न्यू कहकै उसनै रोटी लेकै सारया कै स्याही परमेसवर का धन्यवाद करया अर तोड़कै खाण लाग्या। 36 इस बात तै वे सारे उत्साहित होकै खाणा खुवाण लाग्ये। 37 हम सारे मिलकै जहाज पै दो सौ छिहतर जाणे थे। 38 जिब वे खाणा खाकै छिक्क किये, तो गेहूं ताहीं समुन्द्र मह बगाकै जहाज हल्का करण लाग्ये। 39 जिब दिन लिकड्या तो उननै उस देश ताहीं कोनी पिच्छाणा, पर एक खाड़ी देक्खी जिसका किनारा चौरस था, अर विचार करया के जै हो सकै तो इस्से पै जहाज नै टिकावै। 40 फेर उननै लंगरा ताहीं खोल कै समुन्द्र मह छोड़ दिया अर उस्से बखत पाल के रस्से ढील्ले कर दिये, अर हवा कै स्याही आगला पाल चढ़ाकै किनारे कै कान्ही चाल्ले। 41 पर दो समुन्द्र के संगम की जगहां पड़कै उननै जहाज ताहीं टिकाया, अर आगला भाग तो टिक ग्या, पर पिछली ओड़ लहरा तै टूटण लाग्यी। 42 फेर सिपाहियाँ का यो विचार होया के कैदियाँ ताहीं मार दें, इसा ना हो के कोए तैर कै लिकड़ भाजै। 43 पर सूबेदार नै पौलुस ताहीं बचाण की मर्जी तै उन ताहीं इस विचार तै रोक्या अर न्यू कह्या, के जो तैर सकै सै, पैहल्या छलाँग मारकै किनारे पै लिकड़ जावै। 44 अर बाकी कोए फटा पै, अर कोए जहाज की दुसरी चीज कै सहारै लिकड़ जावै। इस तरियां तै सारे धरती पै बच लिकड़े।

28 जिब हम बच लिकड़े, तो बेरा लाग्या के यो माल्टा टापू कुहावै सै।

2 ओड़े के बासिन्दां नै म्हारै पै अनोक्खी दया करी, क्यूंकि मिह बरसण कै कारण ठण्ड थी, ज्यांते आग सुलगाकै हम सारया ताहीं ठहराया। 3 जिब पौलुस नै लाकडियाँ का भरोटा कट्ठा करकै आग पै धरया, तो एक साँप आँच पाकै लिकड्या अर उसकै हाथ तै लिपट गया। 4 जिब उन बासिन्दां नै साँप ताहीं उसकै हाथ तै लिपटे होड़ देख्या, तो आप्स मह कह्या, “साच्चे यो माणस खूनी सै कै केर भी समुन्दर तै बच ग्या, तोभी न्याय नै जिन्दा कोनी रहण दिया।” 5 फेर उसनै साँप ताहीं आग मह झटक दिया, अर उस ताहीं किमे नुकसान कोनी होया। 6 पर वे लोग बाट देक्खै थे के वो सूज जावैगा या चाणचक पड़कै मर-

जावैगा, पर जिब वे घणी वार ताहीं देखदे रहे अर देख्या के उसका किमे भी कोनी बिगड़या, तो अपणा विचार बदलकै कह्या, “यो तो कोए देवता सै।” 7 उस जगहां कै लोवै-धोवै उस टापू कै प्रधान पुबलियुस की धरती थी। उसनै म्हारै ताहीं अपणे धरां ले जाकै तीन दिन मित्तर की ढाळ सेवा-पाणी करी। 8 पुबलियुस का बाप बुखार अर बवासीर तै बीमार पड़या था। आखर मह पौलुस नै उसकै धोरै कमरे मह जाकै प्रार्थना करी अर उसपै हाथ धरकै उस ताहीं ठीक करया। 9 जिब इसा होया तो उस टापू के बाकी बीमार पौलुस कै धोरै आये अर वे चंगे करे गये। 10 उननै म्हारा घणा आदर-मान करया, अर जिब हम चाल्लण लाग्ये तो जो किमे म्हारै खात्तर जरूरी था, उननै जहाज पै धर दिया। 11 तीन महिने कै पाच्छै हमनै सिकन्दरिया जावण आळे जहाज पै सफर शरु करया, यो जहाज ठण्ड के कारण इस टापू मह ठैहरा होया था, इस जहाज के आगले भाग पै एक जोड़ी देवत्यां का एक निशान था। (दियुसकूरी गढ़ी होई थी) 12 सुरकूसा नगर मह लंगर गेर कै हम तीन दिन टिके रहे। 13 ओड़े तै आगे बढ़कै हम रेगियुम नगर मह आये, अर एक दिन कै पाच्छै दक्षिणी हवा चाल्ली, फेर हम दुमरे दिन पुतियुली नगर मह आये। 14 ओड़े हमनै बिश्वासी भाई मिले, उनकै कहणे तै हम उनकै उरे सात दिन ताहीं रहे, अर इस तरियां तै हम रोम देश कान्ही चाल्ले। 15 कुछ बिश्वासी भाई रोम देश तै म्हारी खबर सुणकै अप्पियुस कै चौक अर तीन-सराए ताहीं म्हारै तै फेटण नै लिकड़ आये, जिन नै देखकै पौलुस नै परमेसवर का धन्यवाद करया अर बड़ा उत्साहित होया। 16 जिब हम रोम नगर मह पोहचे, तो पौलुस ताहीं एक सिपाही कै गेल्या जो उसकी रुखाली कैर था, एक्से रहण का हुक्म मिलग्या। 17 तीन दिन कै पाच्छै उसनै यहूदियाँ कै खास माणसां ताहीं बुलाया, अर जिब वे कठ्ठे होए तो उनतै कह्या, “हे भाईयो, मन्नै अपणे माणसां कै या बाप-दाद्या कै बीवारां कै बिरोध मह किमे भी कोनी करया, तोभी कैदी बणाकै यश्लेम नगर तै रोमी सरकार कै हाथ्थां सौंप्या गया। 18 उननै मेरै ताहीं जाँचकै छोड़ देणा चाह्या, क्यूंकि मेरै मौत कै जोग्या कोए कसूर कोनी था। 19 पर जिब यहूदी अगुवे इसके बिरोध मह बोल्लण लाग्ये, तो मन्नै कैसर की दुहाई देणी पड़ी यो न्ही के मन्नै अपणे माणसां पै कोए दोष लाणा था। 20 ज्यांते मन्नै थारे ताहीं बुलाया सै के थारे तै मिलूं अर बतालाँ, क्यूंकि इसाएल की आस कै खात्तर वो मसीह इस बेल तै जकड़े होए सै।” 21 उननै उसतै कह्या, “ना हमनै तेरे बारै मह यहूदिया परदेस तै चिट्ठी पाई, अर ना बिश्वासी भाईयाँ मह तै किसे नै आकै तेरे बारै मह किमे बताया अर ना बुरा कह्या। 22 पर तेरा विचार के सै? वोए हम तेरे तै सुणणा चाहवां सां, क्यूंकि हमनै बेरा सै कै हेरेक जगहां इस पंथ कै बिरोध मह माणस बात कैर सै।” 23 फेर जो यहूदी पौलुस कै गैल थे, उननै उसकै खात्तर एक दिन ठहराया, अर घणे माणस उसकै उरे कठ्ठे होए, अर वो परमेसवर कै राज्य की गवाही देंदा होया, अर मूसा नबी कै नियम-कायदे अर नबियाँ की किताबां तै यीशु कै बारै मह समझा-समझाकै सबैरै तै साँझ ताहीं वर्णन करदा रहया। 24 फेर कुछां नै उन बातां ताहीं मान

लिया, अर कुछां नै बिश्वास कोनी करया। 25 जिब वे आप्स म्ह एक पंथ कोनी होए, तो पौलुस की इस बात कै कहण पै चाल्ले गये “पवित्र आत्मा नै यशायाह नबी कै जरिये थारे बाप-दाद्या तै सही ए कह्या था,” 26 “जाकै इन माणसां तै कह, के सुणदे तो रहोगे, पर ना समझोगे, देखदे तो रहोगे, पर ना बुझोगे! 27 क्यैके ‘इन माणसां का मन मोटा अर उनके कान भारया हो गये सै, अर उननै अपणी आँख मूँद ली सै, इसा ना हो के वे कदे आँखां तै देक्ख्यै अर कान्ना तै सुणै अर मन तै समझै अर पलटै, अर मै उन ताहीं ठीक कहँ।’ 28 “इस कक्कै थम जाणो सो के परमेसवर कै इस उद्धार की कथा गैर यूदियाँ कै थोरै भेज्जी गयी सै, अर वे स्वीकार करैंगे।” 29 जिब उसनै न्यू कह्या तो यहूदी आप्स म्ह घणे बहस करण लागे अर ओडै तै चले गये। 30 वो पूरे दो साल अपणे किराए कै घर म्ह रहया, 31 अर जो उसकै थोरै आवै थे, उन सारया तै मिलदा रहया अर बिना रोक-टोक घणा निडर होकै परमेसवर कै राज्य का प्रचार करदा अर प्रभु यीशु मसीह की बात सिखान्दा रहया।

रोमियों

1 या चिठ्ठी पौलुस की ओड़तै सै, जो यीशु मसीह का दास सै अर परमेसवर के जरिये प्रेरित होण कै खात्तर चुण्या गया अर उसका सुसमाचार सुणाण खात्तर न्यारा करया गया सै। 2 यीशु के इस दुनिया म्ह आण तै भोत पैहले परमेसवर नै वादा करया था, के वो नबियाँ कै जरिये इस सुसमाचार ताहीं जाहिर कै, जिनमें इसके बारें म्ह पवित्र ग्रन्थ म्ह लिख्या सै। 3 यो सुसमाचार परमेसवर के बेटे के बारें म्ह सै, जो म्हारा प्रभु यीशु मसीह सै। वो शारीरिक तौर पै तो राजा दाऊद की पीढ़ी तै पैदा होया, 4 पर पवित्र आत्मा की शक्ति तै मरे होया म्ह तै जिन्दा होण के काण परमेसवर का बेटा कुहाया। 5 मसीह कै जरिये हमनै अनुग्रह अर प्रेरिताई परमेसवर तै मिली, ताके उसके नाम कै कारण गैर यहूदी माणस मसीह म्ह बिश्वास करके उसकी मान्नै, 6 थम गैर यहूदी बिश्वासी जो रोम नगर म्ह सौं, उन माणसों म्ह शामिल सौं, जिन ताहीं परमेसवर नै यीशु मसीह के माणस होण खात्तर बुलाया सै। 7 या चिठ्ठी रोम नगर के उन सारे माणसों के नाम सै, जो परमेसवर के प्यारे सै, अर उसके पवित्र जन होण कै खात्तर बुलाए गये सै। मै प्रार्थना करूँ सूँ, के म्हरै पिता परमेसवर अर प्रभु यीशु मसीह की ओड़तै थारे ताहीं अनुग्रह अर शान्ति मिलदी रहवै। 8 सब तै पैहल्या मै थम सारया कै खात्तर यीशु मसीह कै जरिये अपणे परमेसवर का धन्यवाद करूँ सूँ, क्यूँके यीशु मसीह म्ह थारे बिश्वास का जिक्र साक्षी दुनिया म्ह होरया सै। 9 परमेसवर, जिसकी सेवा मै पूरे मन तै करूँ सूँ, अर उसके बेटे के सुसमाचार कै बारे म्ह माणसों ताहीं बताऊँ सूँ, वोइ मेरा गवाह सै, के मै अपणी प्रार्थना म्ह थमनै किस तरियां सारी हाण याद करूँ सूँ। 10 अर बिनती करूँ सूँ, के जै हो सक्या तो परमेसवर की इच्छा के मुताबिक मै थारे तै मिलण भी आऊँ। 11 क्यूँके मै थारे तै मिलण की लालसा करूँ सूँ, ताके मै थमनै कोए आत्मिक आशीष दियुँ जिसतै थम बिश्वास म्ह मजबूत हो जाओ। 12 मेरे कहण का मतलब यो सै, के जिब मै थारे तै मिलु, तो मै थारे ताहीं अर थम मनै उत्साहित कर सको, थम मेरे बिश्वास नै जाणकै मजबूत हो जाओ, अर मै थारे बिश्वास नै जाणकै मजबूत हो जाऊँ। 13 हे बिश्वासी भाईयो, मै चाहूँ सूँ के थम इस बात नै जाणो, के मनै कई बार थारे धोरै आण की योजना बणाई, के मै थारे बीच म्ह उसीं आत्मिक बढ़ोतरी देख सकूँ, जिसी मनै बाककी गैर यहूदियाँ म्ह देक्खी सै, पर इब तक मेरे आण म्ह रुकावट ए होन्दी रही सै। 14 मै उन संस्कारी माणसों का जो यूनानी भाषा अर सभ्यता नै जाणै सै, अर जो माणस उनकी भाषा अर सभ्यता नै न्ही जाणते, अर अकलमंद अर बेअक्ल माणसों ताहीं वचन सुणाण का मन म्ह बोझा राख्यूँ सूँ। 15 इस करके म्ह मै थमनै भी जो रोम नगर म्ह रहो सो, सुसमाचार सुणाण खात्तर जमा उत्सुक सूँ। 16 क्यूँके मै मसीह के सुसमाचार के बारें म्ह कोनी सरमान्दा, परमेसवर अपणी शक्ति के जरिये सब नै बचावै सै जो सुसमाचार पै बिश्वास कैरै सै, पैहल्या यहूदियाँ ताहीं अर फेर गैर यहूदी ताहीं। 17 क्यूँके सुसमाचार

हमनै बतावै सै, के परमेसवर अपणी नजर म्ह हमनै किस तरियां धर्मी बणावै सै। जो शरु तै लैके अंत तक मसीह पै बिश्वास करण तै हो सै, जिसा पवित्र ग्रन्थ म्ह लिख्या भी सै, के परमेसवर अपणी नजर म्ह धर्मी जन बणावै सै, वो बिश्वास तै जिन्दा रहवैगा। 18 परमेसवर का छो तो उन माणसों की सारी अभगति अर अधर्म के काम्मां के कारण जो माणस करै सै, सुर्ग तै जाहिर हो सै, वो अपणे सब अधर्म के काम्मां तै माणस ताहीं, परमेसवर की सच्चाई के बारें म्ह जाणण तै रोकै सै। 19 वे परमेसवर के बारें म्ह इस करके सही अर आसानी तै जाण सकै सै, क्यूँके परमेसवर नै उन ताहीं इन बात्तां के बारें म्ह बताया सै। 20 सच यो सै के दुनिया की शरुआत तै ए परमेसवर के अनदेक्खे गुण, उसकी अनन्त सामर्थ्य अर उनका परमेसवरत्व, दुनिया म्ह सै, अर दिक्खै भी सै, इस करके माणस कै थोरै कोए बहाना कोनी, के वो परमेसवर नै न्ही जाणता। (audio g126) 21 परमेसवर का ज्ञान होण पै, भी उननै ना तो उस ताहीं परमेसवर होण कै लायक सम्मान दिया, अर ना ए उसका धन्यवाद करया। इसके उल्ट वो उसके बारें म्ह बेकार की बात सोच्याण लागे, अर जिसा उन ताहीं सोचाणा चाहिए था उसा न्ही सोच्या, पर बुरा ए सोच्या। 22 वे अपणे-आप ताहीं अकलमंद मानकै बेअक्ले बणगे, 23 अर अविनाशी परमेसवर की महिमा न्ही करी, बल्के नाशवान माणस, अर पछियाँ, रेण आळे अर चार पैरां आळे जानवरां की मूर्ति की आराधना करण लागे। 24 इस करके परमेसवर नै उन ताहीं उनकै मन की बुरी इच्छा कै मुताबिक गलत काम करण खात्तर छोड़ दिया ताके वे आप्स म्ह अपणे शरीरां तै गन्दे काम करै। 25 क्यूँके उननै परमेसवर के बारें म्ह सच्ची बात्तां ताहीं जाणण की बजाये झूठ पै बिश्वास करया, अर सृष्टि की चिज्जां की आराधना अर सेवा करी, ना के उस सृजनहार परमेसवर की जो सदा खात्तर महिमा के लायक सै! आमीन। (audio g165) 26 ज्यांतै परमेसवर नै उन ताहीं उनकी नीच कामनाओं कै बस म्ह छोड़ दिया, जिस कारण उनकी लुगाईयाँ नै भी प्राकृतिक संभोग की जगहां अप्राकृतिक संभोग अपणालिया। 27 उस्से तरियां ए लुगाईयाँ कै गेल्या प्राकृतिक संभोग नै छोड़कै माणस दुसरे माणस कै खात्तर आप्स म्ह कामुकता म्ह जळण लागे, अर माणस का माणस कै गेल्या बेशर्मी कै काम करणा उनके उपर दण्ड लेकै आये। 28 अर जिब उननै परमेसवर ताहीं जाणणा बेवकूफी लाग्या, तो परमेसवर नै भी उन ताहीं उनकै निकम्मे मन के बस म्ह छोड़ दिया, ताके वे बुरे काम करै। 29 ज्यांतै वे सारे ढाल के अधर्म, दुष्टा, लालच, अर बैर-भाव तै भरगे, अर जळण, हत्या, झगड़े, छल, ईर्ष्या तै भरगे, अर चुगलखोर, 30 बदनाम करण आळे, परमेसवर तै नफरत करण आळे, बुराई करण आळे, दुसरयां की बेजती करण आळे, डिंगमार, घमण्डी, भुंडी-भुंडी बात्तां कै बणाण आळे, माँ-बाप का हुकम ना मानण आळे, 31 बेअक्ले, बिश्वासघाती, प्यार अर दया की कमी अर निर्देशी होये। 32 वे तो परमेसवर की या धार्मिक विधि नै जाणै सै, के इसे-इसे काम

करण आले मौत के दण्ड कै जोग्गे सै, फेरभी ना सिर्फ आप ए इसे काम करै सै, बल्के इसे काम करण आला तै राज्जी भी होवै सै।

2 इस करकै हे मेरे विश्वासी भाईयो, थम जो कोए भी क्यूँ ना हो, थारे धोरै इस बात का कोए जवाब कोनी, के थम जो दुसरयां पै दोष लगाओ सौं, तो उस बात के कारण खुद अपणे-आप पै दण्ड लेकै आओ सौं, क्यूँकै जिस बात के बारें म्ह थम उसनै दोषी बणाओ हो, थम खुद भी वोए काम करो सौं। 2 हमनै यो बेरा सै, के परमेसवर उसका न्याय धार्मिकता कै साथ जसर करैगा, जो इसे बुरे काम करै सै। 3 जिब के थम जो इसे-इसे काम करणीया पै दोष लगाओ सौं, अर खुद वैए काम करो सौं, के न्यू समझों सौं के थम परमेसवर के दण्ड तै बच जाओगे? 4 के थम परमेसवर की भलाई, सहनशीलता, अर धीरजरूपी धन ताहीं तुच्छ जाणो सौं? के थम न्हीं समझते के परमेसवर की भलाई ए थारे ताहीं पाप छोडणा सिखावै सै? 5 पर थम हृथिल्ले सौं, अर पाप करणा न्हीं छोडदे, अर ना ए अपणे-आपनै बदलना चाहदे। इस करकै जिस दिन परमेसवर अपणा छो दिखावैगा, उस दिन धार्मिकता कै साथ उसका न्याय जाहिर होवैगा, अर वो थारे ताहीं भारी दण्ड देवैगा। 6 परमेसवर हरेक नै उसकै काम कै मुताबिक फळ देवैगा। 7 जो माणस भले काम करते रहवै सै, अर परमेसवर की महिमा, आदर अर अनन्त जीवन की खोज म्ह लागे रहवै सै, परमेसवर उन सारया ताहीं अनन्त जीवन देवैगा। (aiōnios g166) 8 पर जो मतलबी सै अर सच नै कोनी मान्दे, बल्के अधर्म नै मान्नै सै, उनपै परमेसवर का छो अर प्रकोप पड़ैगा। 9 कठेश अर संकट हरेक माणस पै आवैगा। परमेसवर सबतै पैहल्या यहूदियाँ कौ अर बाद म्ह उन माणसां का न्याय करैगा जो गैर यहूदी सै। 10 पर महिमा, आदर अर शान्ति हरेक नै मिलैगी, जो भले काम करै सै, पैहल्या यहूदी ताहीं फेर उन माणसां ताहीं जो गैर यहूदी सै। 11 क्यूँकै परमेसवर किसे का पक्षपात कोनी करदा। 12 वे सारे गैर यहूदी माणस जिननै परमेसवर के नियम-कायदे जो मूसा नबी ताहीं मिले थे, उन ताहीं जाणे बिना जिसनै पाप करया सै, वे नियम-कायदा नै बिना जाणे नाश भी होवैंगे, पर जिन नै नियम-कायदे नै जाणकै भी पाप करया सै, उनका न्याय भी नियम-कायदे कै मुताबिक करया जावैगा। 13 क्यूँकै परमेसवर की निगाह म्ह नियम-कायदे कै सुणण आले धर्मी माणस कोनी, पर नियम-कायदे पै चाल्लण आला नै धर्मी बणावैगा। 14 फेर जिब गैर यहूदी लोग जिनकै धोरै मूसा नबी के नियम-कायदे कोनी, कुदरती तौर पैए नियम-कायदे की बातां पै चाल्ले सै, तो नियम-कायदे उनकै धोरै ना होण पै भी, उन ताहीं बेरा सै, के उनकै करणा सै, अर के न्हीं करणा। 15 वे नियम-कायदे की बात अपणे-अपणे दिलां म्ह लिखी होई दिखावै सै अर उनकी अन्तरात्मा भी इसकी गवाही देवैं सै, के ये बात सच सै, क्यूँकै उनके विचार उनपै दोष लगावै सै, या फेर यो बतावै सै के वो ठीक करै सै। 16 यो सब उस दिन स्पष्ट हो जावैगा, जिब परमेसवर मेरै जरिये सुणाये गये सुसमाचार के मुताबिक, माणसां की लुकही होई बातां का न्याय, यीशु मसीह कै जरिये करैगा। 17 थम खुद नै यहूदी कुहावै सौं,

अर मूसा नबी के नियम-कायदे पै भरोस्सा राक्खों सौं, परमेसवर थारे पै दया करै सै, इस कारण थम घमण्ड करण लागेर सौं। 18 अर थमनै परमेसवर की मर्जी का बेरा सै, थम आच्छी-आच्छी बातां नै तो चाहो सौं, क्यूँकै थारे ताहीं ये बात मूसा नबी के नियम-कायदे म्ह तै सिखाई गई रै। 19 अर थमनै इस बात का पूरा भरोस्सा सै, के थम अंधाँ नै राह दिखाण आले अर अन्धकार म्ह भटके होए माणसां खात्तर परमेसवर का चाँदणा सौं। 20 अर बेअक्लां नै सिखाण आले अर बाल्कां के उपदेशक सौं। थमनै बेरा सै के परमेसवर के नियम-कायदे थमनै पूरी तरियां तै ज्ञान अर सच्चाई देवै सै। 21 इस करकै थम जो दुसरयां नै शिक्षा देओ सौं, तो अपणे-आपनै शिक्षा क्यूँ न्हीं देन्दे? थम उपदेश देओ सौं, के “चोरी ना करियो,” के थम खुद चोरी कोनी करते! 22 थम जो कहवै सौं, के “जारी ना करियो,” के खुद जारी कोनी करते? थम जो मूर्तियाँ तै नफरत करो सौं, के खुद ए मन्दरां नै कोनी लूटते? 23 थम जो नियम-कायदे नै जाणण का घमण्ड करो सौं, के नियम-कायदे नै ना मानकै परमेसवर का अनादर कोनी करते? 24 “थम यहूदियाँ के कारण गैर यहूदियाँ म्ह परमेसवर के बारें म्ह बुरा भला कहा जावै सै, जिसा पवित्र ग्रन्थ म्ह लिख्या भी सै।” 25 मै थमनै कुछ बताऊँ सूँ थारा खतना करया जाणा जिब्बे फायदेमन्द सै, जिब थम नियम-कायदा नै मान्नो, जै थम इसा न्हीं करते तो थम उन माणसां की ढाळ सौं जिनका खतना न्हीं होया। 26 जै बिना खतना करे होए माणस नियम-कायदे की विधियाँ तै मान्नै, तो परमेसवर उन ताहीं अपणे माणस क्यूँ न्हीं कहवैगा। 27 बिना खतना होए माणस जो परमेसवर के हुकमां नै मान्नै सै, वे थारी बुराई करैंगे जिनकै धोरै परमेसवर के नियम-कायदे सै जिन ताहीं थम मानते न्हीं। 28 असली यहूदी वो कोनी जो सिर्फ यहूदी माँ-बाप तै पैदा होया सै, अर ना ए वो असली खतना सै, जो दिखाण खात्तर देह म्ह करया गया सै। 29 यहूदी वो सै, जो अपणे मन म्ह यहूदी सै, अर खतना वो सै, जो पवित्र आत्मा के जरिये मन का करया जावै सै, ना के वो जो नियम-कायदा के मुताबिक करया जावै सै, इस ढाळ के माणसां की तारीफ माणसां की ओड़ तै न्हीं, पर परमेसवर की ओड़ तै करी जावै सै।

3 कोए कह सकै सै, के भला यहूदी होण का के फायदा, या खतना कराण का के फायदा? 2 यहूदी होण के भोत फायदे सै, क्यूँकै परमेसवर के वचन यहूदियाँ ताहीं ए सौंपे गये सै। 3 अगर कुछ यहूदी माणस बिश्वासधाती लिकड़े भी तो उसतै के फर्क पड़े सै? परमेसवर अपणे वादे पूरा करण म्ह बिश्वास जोग्गा सै, तो इसका यो मतलब कोनी के परमेसवर भी बिश्वासधाती सै। 4 न्हीं! बिल्कुल न्हीं! बल्के परमेसवर सच्चा सै, अर दुनिया का हरेक माणस झुझा ठैहरै, जिसा पवित्र ग्रन्थ म्ह परमेसवर के बारें म्ह लिख्या सै, “जिसतै तू अपणी बातां म्ह धर्मी साबित हो अर न्याय करदे बखत तू जीत पावै।” 5 इस करकै जै म्हारे बुरे काम परमेसवर की धार्मिकता साबित कर देवै सै, तो हम के कहां? के न्यू कहां के परमेसवर जो छो करै सै, तो के वो

अन्यायी सै? (यो तो मै दुनियावी नजरिये तै कहूँ सू)। 6 न्ही! बिल्कुल न्ही! जै परमेसवर यहूदी माणसां का न्याय सही तरिकें तै न्ही कर सकता, तो वो दुनिया के माणसां का भी न्याय सही तरिकें तै न्ही कर सकता? 7 कोए कह सकै सै, जै मेरा झूठ परमेसवर की सच्चाई नै दिखावै अर उसकी महिमा नै बढ़ावै, तो परमेसवर किस तरियां मनै परख के पापी साबित कर सकै सै? 8 कई माणस यो कह के मेरे पै दोष लगावै सै, के “आओ, हम बुरे काम करा के इसतै ए कुछ भलाई हो जा।” जो मेरे बिल्ड इसी बात कहवै सै वो दण्ड के लायक सै। 9 तो फेर हम के कह सका सां? के हम यहूदी गैर यहूदियाँ तै आच्छे सां? कदे भी न्ही! क्यूँके हम यहूदी अर गैर यहूदी दोनुवां पै यो दोष ला चुके सां के वे सारे के सारे पाप की शक्ति के बस म्ह सै। 10 जिसा के पवित्र ग्रन्थ म्ह लिख्या सै: “कोए भी माणस परमेसवर की नजर म्ह धर्मी कोनी, एक भी कोनी। 11 कोए भी माणस समझदार कोनी, कोए परमेसवर का टोह़ आळा कोनी। 12 सारे माणस परमेसवर की राह तै भटक ग्ये सै, सबके सब परमेसवर की नजर म्ह निकम्मे बणगे सै, कोए भी भलाई करण आळा कोनी, एक भी कोनी। 13 उनका मुँह खुली होई कब्र की ढाल सै, जिस म्ह तै बदबू आवै सै। क्यूँके अपणे मुँह तै वे भुडा बोल्लै सै, अर वे जो भी बोल बोल्लै सै वो साँप के जहर की तरियां जहरीले सै। 14 उनका बोल श्राप अर कङ्वाहत तै भरया सै। 15 वो लहू बहाण खात्तर फुर्तीले सै, 16 वे जित भी किते जावै सै ओड़ै नाश अर कङ्घेश लेकै जावै सै, 17 वे न्ही जाणते के माणसां के गैल खुशी अर शान्ति तै किस तरियां जीणा सै। 18 उन म्ह परमेसवर का डर सै ए कोनी।” 19 हमनै बेरा सै के मूसा नबी के नियम-कायदे जो कुछ कहवै सै, उन्हे तै कहवै सै, जो नियम-कायदे कै अधीन सै, ताके कोए भी माणस भान्ना न्ही बणा सकै, अर दुनिया के सारे माणस परमेसवर के स्याम्ही दोषी ठैहराये जावै। 20 क्यूँके मूसा नबी के नियम-कायदे के पुगाण तै कोए माणस उसकै स्याम्ही धर्मी कोनी बणैगा, क्यूँके नियम-कायदा कै जरिये हमनै बेरा लाग्नै सै के हम पापी सां। 21 पर इब नियम-कायदा नै मान्नै बिना धर्मिकता जो परमेसवर तै मिलै सै, अर जिसके बारें म्ह मूसा नबी के नियम-कायदा अर नवियाँ की किताब्बां म्ह भोत पैहले लिख्या सै, के परमेसवर हमनै धर्मी किस तरियां बणावै सै। 22 मतलब यो के हम प्रभु यीशु मसीह पै बिश्वास करण तै धर्मी बणा सां, जो यीशु मसीह पै बिश्वास करण तै सब माणसां खात्तर सै। क्यूँके परमेसवर की नजर म्ह सब माणस एक समान सै। 23 क्यूँके सारया नै पाप करया सै, अर सब परमेसवर की महिमा तै दूर होगे सै, 24 परमेसवर नै म्हारे पै अनुग्रह करया, के उसनै यीशु मसीह के जरिये म्हारे ताहीं म्हारे पापां के दण्ड तै छुडा लिया, अर म्हारे ताहीं बिना कुछ करे धर्मी बणाया। 25 परमेसवर नै यीशु मसीह ताहीं म्हारे पाप की कीमत चुकाण खात्तर इस दुनिया म्ह भेज्या, यीशु मसीह नै म्हारे खात्तर अपणा लहू बहा के अपणी जान दे दी। ताके हम उसपै बिश्वास करण के जरिये परमेसवर कै धोरै आ सकां, अर उसनै इसा यो दिखाण खात्तर करया, के वो पैहले जमाने म्ह भी

पापी माणसां गैल सबर तै रहण म्ह अर उनके पाप माफ करण म्ह धर्मी था, बल्के इब भी उसकी धार्मिकता जाहिर हो जावै, जिसतै वे खुद धर्मी बणै अर जो प्रभु यीशु म्ह बिश्वास राख्यै सै, वो परमेसवर की नजर म्ह भी धर्मी बण जावै। 27 तो के हम किसे बात पै घमण्ड कर सकां सां? उसकै खात्तर कोए जगहां न्ही! के नियम-कायदा के जरिये या उन्नै मानन तै जरिये सां? न्ही! पर यीशु मसीह पै बिश्वास करण तै घमण्ड करां सां। 28 इस करकै हम इस नतीजै पै पोहचे सा, के परमेसवर म्हारे ताहीं यीशु मसीह पै बिश्वास करण कै जरिये धर्मी बणावै सै, ना के मूसा नबी के नियम-कायदा ताहीं मानन तै। 29 परमेसवर सिर्फ यहूदियाँ ए का परमेसवर कोनी, पर वो गैर यहूदियाँ का भी परमेसवर सै। 30 क्यूँके एक ए परमेसवर सै, जो खतना आळा नै यीशु मसीह पै बिश्वास करण तै अर बिन-खतना आळा ताहीं भी, बिश्वास कै जरिये धर्मी बणावै सै। 31 तो के म्हारा बिश्वास नियम-कायदे नै बेकार बतावै सै? न्ही! बिल्कुल न्ही! बल्के इसके उल्ट जिब हम बिश्वास करा सां तो हम समझ जावै सां, के परमेसवर नै म्हारे ताहीं नियम-कायदा क्यूँ दिये।

4

4 तो हम यहूदी होण के नाते म्हारे पूर्वज अब्राहम के बारें म्ह के कहवा। 2 जै अब्राहम आच्छे काम्मां तै धर्मी बणाया जान्दा, तो वो इसका घमण्ड कर सकै था, पर वो परमेसवर के स्याम्ही आच्छे काम्मां के जरिये घमण्ड न्ही कर सकदा। 3 पवित्र ग्रन्थ के कहवै सै? न्यू के “अब्राहम नै परमेसवर के वादे पै बिश्वास करया, अर परमेसवर नै उसके बिश्वास के कारण उस ताहीं धर्मी बणा दिया।” 4 जो मेहनत करै सै उसकी मजदूरी नै इनाम न्ही कहन्दे, बल्के वो तो उसका हक सै। 5 पर माणस काम्मां के जरिये धर्मी कोनी बणता, पर भगतीहीन माणस जो परमेसवर पै बिश्वास करै सै वे उसके बिश्वास के करण वो धर्मी बणै सै। 6 जिसनै परमेसवर बिना काम्मां कै धर्मी बणावै सै, पवित्र ग्रन्थ म्ह राजा दाऊद भी धन्य उस ताहीं कहवै सै। 7 “धन्य सै, वे जिनके अर्धम माफ होए, अर पाप भूला दिये गये। 8 धन्य सै वो माणस जिसके पापां का हिसाब परमेसवर न्ही राखदा।” 9 के या आशीष जिन माणसां का खतना हो लिया, उनकै ए खात्तर सै, या जिनका खतना न्ही होया उन खात्तर भी सै? हम न्यू कहां सां, “अब्राहम नै परमेसवर पै बिश्वास करया, अर परमेसवर नै उसके बिश्वास के कारण उस ताहीं धर्मी बणा दिया।” 10 तो यो कद होया? खतने की हालत म्ह या बिना खतने की हालत म्ह? खतने की हालत म्ह कोनी पर बिना खतने की हालत म्ह। 11 जिब अब्राहम का खतना न्ही होया था, जिब भी परमेसवर नै उस ताहीं स्वीकार करया, अर उस ताहीं धर्मी बणाया, खतने का निशान अब्राहम ताहीं अपनान की छाप सै, इस करकै अब्राहम उन माणसां का आत्मिक पूर्वज सै, जो बिश्वास करै सै पर जिनका खतना न्ही होया, वो बिश्वास के जरिये धर्मी बणै। 12 अर वो उन खतना करे होए सै, पर उनका बिश्वास उसाए हो जिसा उनके पूर्वज अब्राहम का तब था, जिब उसका खतना न्ही होया था। 13 परमेसवर नै अब्राहम ताहीं अर उसके वंश ताहीं पूरी

दुनिया देण का वादा करया, यो इस करकै कोनी होया के अब्राहम नै नियम-कायदा ताहीं मान्या, क्यूँके उसनै परमेसवर पै बिश्वास करया, इस बजह तै उसनै उस ताहीं धर्मी बणा दिया। 14 अब्राहम अर उसके वंश ताहीं यो वादा इस खात्तर दिया गया, क्यूँके उननै नियम-कायदा ताहीं मान्या, तो बिश्वास बेकार अर वादा झूटा लिकड़या। 15 परमेसवर का छो नियम-कायदा नै ना मानण आळा पै पढ़ै सै, अर जित्त नियम-कायदे कोनी ओड़ै उसका उल्लंघन भी कोनी। 16 इस बजह तै वादा परमेसवर पै बिश्वास करण तै मिलै सै, जो अनुग्रह के मुताबिक से, यो वादा अब्राहम के सारे वंशा ताहीं मिल्या सै, ना कै सिफ उन ताहीं जो माणस मूसा नबी के नियम-कायदा नै मान्नै सै, पर उन माणसां कै खात्तर भी जो अब्राहम की ढाळ परमेसवर पै बिश्वास करै सै, क्यूँके अब्राहम ए म्हारे सारया का पूर्वज सै। 17 जिसा पवित्र ग्रन्थ म्ह लिख्या सै, “मन्ते तेरे ताहीं धर्मीए जात्तां का पूर्वज बणाया सै” परमेसवर की नजर म्ह अब्राहम म्हारा पूर्वज सै। उननै उस परमेसवर पै बिश्वास करया, जो मेरे होया नै जिन्दा करै सै, अर जो बात सै ए न्ही उनका नाम इसा लेवै सै के मान्नो वे सै। 18 परमेसवर नै अब्राहम तै कह्या, तेरे भोत-से वंश होवैंगे। पर अब्राहम नै सौच्या के बुढापै म्ह, मेरे किस तरियां ऊलाद पैदा होगी? क्यूँके वो तकरीबन सौ साल का हो लिया था, अर सारा भी बूढ़ी होण के कारण बच्चे पैदा कोनी कर सकै थी। इन सारी बात्तां तै साफ जाहिर था, के उसके भोत-से वंशज न्ही हो सकदे, तोभी अब्राहम का बिश्वास कमजोर न्ही होया, वो परमेसवर के वादे पै बिश्वास करदा रह्या, अर उसनै आस न्ही तोड़ी। 20 अर ना ए अबिश्वासी होकै परमेसवर कै वादा पै शक करया, पर बिश्वास म्ह पक्का होकै उसकी महिमा करी। 21 अर पक्के तौर पै जाण्या के जिस बात का परमेसवर नै वादा करया सै, वो उसनै पूरा करण म्ह भी सामर्थी सै। 22 अर परमेसवर नै उसके बिश्वास के कारण उस ताहीं धर्मी बणा दिया। 23 अर पवित्र ग्रन्थ के इस वचन नै, “बिश्वास के कारण उस ताहीं धर्मी बणा दिया।”, ना सिफ यो वचन अब्राहम कै खात्तर लिख्या गया, 24 बल्के म्हारै खात्तर भी जिनकै खात्तर लिख्या गया, जो बिश्वास के जरिये धर्मी बण जावैगा, यानिके के म्हारै खात्तर, जो उसपै बिश्वास करा सां, जिसनै म्हारै प्रभु यीशु ताहीं मेरे होया म्ह तै जिन्दा करया। 25 यीशु मसीह म्हारै अपराधा कै खात्तर पकड़वाया अर मारा भी गया, अर म्हारै ताहीं धर्मी बणाण कै खात्तर परमेसवर नै उस ताहीं जिन्दा कर दिया।

5 इस करकै जिब हम मसीह पै बिश्वास करण तै धर्मी बण दिए गये सां, तो परमेसवर तै म्हारा मेल-मिलाप अपणे प्रभु यीशु मसीह कै जरिये हो लिया। 2 बिश्वास कै जरिये मसीह नै म्हारी पोहच पिता के उस अनुग्रह तक कर दी सै। उस अनुग्रह म्ह हम बणे होए सां, अर परमेसवर की महिमा की आस म्ह खुश सां। 3 सिफ योए न्ही, बल्के हम मुसीबतां म्ह भी खुश रहवां, न्यू जाणकै के मुसीबतां तै धीरज, 4 धीरज तै खरयां लिकड़णा, अर खरे लिकड़ण तै आस होवै सै। 5 अर आस तै निरशा न्ही होन्दी, क्यूँके पवित्र आत्मा जो परमेसवर नै म्हारै ताहीं दिया सै,

उसकै जरिये परमेसवर का प्यार म्हारै मन म्ह भरया गया सै। 6 क्यूँके जिब हम कमजोर थे, तो मसीह परमेसवर के बताये गये सही बखत पै बुरे माणसां कै खात्तर मरया। 7 किसे धर्मी माणस कै खात्तर कोए जान देवै यो तो मुश्किल सै, पर शायद कोए भले माणस खात्तर जान देण खात्तर तैयार हो सकै सै। 8 पर परमेसवर म्हारै पै अपणे प्यार की भलाई इस तरियां तै साबित करै सै, के जिब हम पापी ए थे, जिब्बे मसीह यीशु म्हारै खात्तर मरया। 9 जिब के इब यीशु कै लहू बहाण के कारण परमेसवर नै म्हारे ताहीं अपणी नजर म्ह धर्मी बणाया सै, तो उसकै जरिये परमेसवर कै छो तै क्यातै न्ही बचांगें? 10 क्यूँके जिब हम परमेसवर के बैरी थे, तो उसकै बेटे की मौत कै जरिये म्हारा मेल-मिलाप परमेसवर कै गेल्या होया, अर सब तै आच्छी बात या सै, के मेल-मिलाप हो जाण के कारण उसकै बेटे यीशु मसीह कै जरिये दिए गये जीवन कै कारण म्हारा उद्धार पक्का सै। 11 इब तो म्हारे प्रभु यीशु मसीह कै जरिये, परमेसवर म्ह म्हारा मेल-मिलाप होया सै, इस खात्तर हम उस म्ह खुश सां। 12 परमेसवर नै एक माणस आदम बणाया, जिसके कारण दुनिया म्ह पाप आया, अर उस पाप के कारण मौत आई, अर इस तरियां तै मौत सारे माणसां म्ह फैलाई, क्यूँके आदम के वंश होण के कारण सब पापी बणगे। 13 मूसा नबी के नियम-कायदा कै दिए जाण तै पैहले भी, दुनिया म्ह माणस पाप करै थे, पर वो पाप गिण्या कोनी जावै था, क्यूँके ओड़ै नियम-कायदे कोनी थे, जिन ताहीं तोड़या जा सक। 14 तोभी आदम तै लेकै मूसा नबी तक सब नै मौत आई। जिस तरियां आदम नै परमेसवर के हुक्म ताहीं तोड़या उसकी तरियां हमै उसके हुक्म ताहीं न्ही तोड़ा, अर आदम यीशु मसीह का नमूना था जो आण आळा था। 15 पर आदम के अपराध अर परमेसवर के अनुग्रह के वरदान के बीच म्ह एक भोत बड़ा अन्तर सै, क्यूँके जब एक माणस आदम, कै अपराध करण के कारण, भोत-से माणसां की मौत होई, पर दुसरे माणस यीशु मसीह कै जरिये, परमेसवर का अनुग्रह भोत-से माणसां पै होया सै। 16 तो परमेसवर के वरदान का नतिज्जा आदम के पाप तै भोत अलग सै। उसका पाप दण्ड लेकै आवै सै, पर परमेसवर का वरदान म्हारे ताहीं धर्मी बणावै सै, भलाए हम कई पापां के दोषी क्यूँ ना हो। 17 क्यूँके एक माणस कै अपराध कै कारण सब नै मौत आई। पर इसतै ज्यादा परमेसवर का अनुग्रह अर धार्मिकता का वरदान सै, जो उस ताहीं पावै सै, वो पाप अर मौत पै यीशु मसीह कै जरिये जयवन्त होवै सै, अर वे उसके गैल अनन्त जीवन म्ह राज करैंगे। 18 जिस तरियां आदम का अपराध, सारे माणसां कै खात्तर दण्ड लेकै आया, ठीक उससे तरियां ए मसीह यीशु कै धार्मिकता के काम करण तै, सारे माणसां नै जिन्दगी मिली, अर वे परमेसवर की नजर म्ह धर्मी बणै। 19 क्यूँके जिसा एक माणस कै हुक्म ना मानण तै भोत-से माणस पापी बणे, उससे तरियां ए केवल माणस कै हुक्म मानण तै भोत-से माणस धर्मी बणैंगे। 20 मूसा के नियम-कायदे म्हारे ताहीं इस खात्तर दिए गये, ताके माणस देख सकै के वे कितने पापी सै पर जिब माणस पाप पै पाप करै सै, तो

ओड़े परमेस्वर का अनुग्रह उसतै भी घणा होया करै। 21 सारे माणसां नै पाप पै पाप करया, अर वे मरगे, पर म्हारै प्रभु यीशु मसीह कै जरिये परमेस्वर का अनुग्रह हमनै धर्मी बणावै सै, अर म्हारे ताहीं अनन्त जीवन देवै सै। (aiōnios g166)

6 कोए कह सकै सै? के परमेस्वर अपणे अनुग्रह तै म्हारे पाप माफ करै सै, पर इसा मत सोच्यों के पाप करदे रहवां ताके अनुग्रह घणा हो। 2 न्हीं! बिल्कुल न्हीं! हम जिब पाप कै खात्तर मरये तो हमनै आगै तै दुबारा पाप न्हीं करणा चाहिए। 3 हम जाणा सां, के हम सारे जिननै मसीह यीशु के नाम म्ह बपतिस्मा लिया सै, यो इसा सै, के जिसा हम मसीह के गैल मर जाणा। 4 इस करकै जिब हम बपतिस्मा लेवां सां, तो हम उसकै साथ मर जावां सां, अर उसके साथ गाहु जावां सां, ताके जिस तरियां मसीह पिता परमेस्वर की महिमा कै जरिये मरे होया म्ह तै जिन्दा करया गया, उस्से तरियां ए हमनै भी नया जीवन जीणा चाहिए। 5 क्यूँकै जै हम उसकी मौत की समानता म्ह बपतिस्में के जरिये उसके गेल्या एक हो जावां सां, तो पक्के तौर पै उसकै जिन्दा उठण की समानता म्ह भी एक हो जावांगे। 6 इस्से तरियां म्हारा पुराणा पापी सुभाव यीशु मसीह कै गेल्या कूस पै चढ़ाया गया, ताके जो पापी सुभाव म्हारी देह म्ह सै वो नाश हो जावै, अर हम आगै दुबारा पाप की गुलामी म्ह न्हीं रहवां। 7 क्यूँकै जिब हम मसीह के गैल मरा सां, तो हम पाप की शक्ति तै आजाद हो जावां सां। 8 इस करकै जै हम मसीह कै गेल्या मरगे, तो म्हारा विश्वास यो सै के उसकै गेल्या जीवांगे भी। 9 क्यूँकै न्यू बेरा सै, के मसीह मरे होया म्ह तै जिन्दा उठकै दुबारा फेर न्हीं मरैगा, उसपै फेर मौत का राज न्हीं होवैगा। 10 क्यूँकै मसीह पाप कै खात्तर एक ए बार मर गया, पर इब जो जिन्दा सै, तो परमेस्वर की महिमा करण कै खात्तर जिन्दा सै। 11 इस्से तरियां थम भी अपणे-आप ताहीं पाप कै खात्तर तो मरया होइ, पर परमेस्वर की महिमा करण खात्तर मसीह यीशु म्ह जिन्दा समझो। 12 इस करकै पाप की लालसा थारी नाश होण आली देह म्ह राज न्हीं करै, के थम उसकी लालसाओं के कब्जे म्ह ना रहो। 13 अपणे देह के अंगा ताहीं अर्थम कै काम्मा खात्तर इस्तमाल ना करो, पर अपणे-आप ताहीं मरे होया म्ह तै जिन्दे जाणकै अपणी जिन्दगी परमेस्वर ताहीं दे दो, अर अपणे देह के अंगा ताहीं धार्मिक काम्मा खात्तर परमेस्वर नै सौंप दो। 14 फेर थारे पै पाप का राज कोनी होवैगा, क्यूँकै थम नियम-कायदे कै अधीन म्ह न्हीं, बल्के परमेस्वर के अनुग्रह कै अधीन म्ह जीण लागरे सों। 15 तो इसका मतलब कै सै? के हम नियम-कायदे का अधीन म्ह न्हीं, बल्के परमेस्वर के अनुग्रह कै अधीन सां, इस करकै के हम पाप कर सका सां? न्हीं! बिल्कुल न्हीं! 16 थम जाणा सों के जिब थम खुद नै किसे का गुलाम होण खात्तर देओ सों, तो थम वोए करो सों, जो थारा माल्लिक कहवै सै। थम पाप के गुलाम भी बण सकों सों, जो मौत लेकै आवै सै, या फेर थम परमेस्वर के हुक्म नै मानकै धार्मिकता का जीवन जी सको सों। 17 थम पाप के गुलाम थे, पर इब थमनै वे सारी शिक्षा मान्नी सै, जो थारे ताहीं मिली

थी, इस करकै मै परमेस्वर का धन्यवाद करूँ सूं। 18 इब पाप की शक्ति तै छुटाये जाकै परमेस्वर के दास बणो ताके थम धर्म के काम करो। 19 मै थारे ताहीं आसान तरिकै लिखूँ सूं, ताके आम आदमी भी आसानी तै समझ सकै, के जिब थम अपणी पिछली जिन्दी की गुलाम थे, अर थम हरेक ढाळ के अशुद्ध अर भुन्डे काम करो थे। तो इब थम अपणी देह नै धार्मिक जीवन के दास बणा ल्यो, ताके थम पवित्र जीवन जी सको। 20 जिब थम पाप के गुलाम थे, तो थम धार्मिकता के काम न्हीं कर पाओ थे। 21 थम बुरा काम करो थे, अर इब उन दुरे काम्मां के कारण शर्मिन्दा सों, तो थमनै के मिल्या? इन सारी बातां का नतिज्जा मौत सै। 22 पर इब पाप तै आजाद होकै अर परमेस्वर के दास बणकै इब थम वो काम करो सों, जिसतै थम पवित्र बणो सों, अर उसका नतिज्जा अनन्त जीवन सै। (aiōnios g166) 23 क्यूँकै पाप का नतिज्जां तो मौत सै, पर परमेस्वर का वरदान म्हारै प्रभु मसीह यीशु म्ह अनन्त जीवन सै। (aiōnios g166)

7 है विश्वासी भाईयो, थमनै बेरा सै, (मै नियम-कायदे के जाणण आळा तै कहूँ सूं) के जिब ताहीं माणस जिन्दा रहवै सै, तब तक उसनै नियम-कायदे मानने पड़ुंगे। 2 उदाहरण के तौर पै एक ब्याता लुगाई नै मरते दम तक नियम-कायदे कै मुताबिक अपणे धर्णी कै साथ रहणा चाहिये, पर जै धर्णी मर जा, तो वा धर्णी कै नियम-कायदे तै आजाद हो जा सै। 3 ज्यांतै जै धर्णी कै जिन्दे जी वा किसे दुसरे माणस की हो जावै, तो जार कुहावैगी, पर जै धर्णी मर ज्या, तो वा उस नियम-कायदे तै आजाद हो जा सै, उरे ताहीं कै जै किसे दुसरे माणस की हो जावै तोभी जार कोनी ठैहरैगी। 4 उस्से तरियां ए हे मेरे विश्वासी भाईयो, जिब थम मसीह कै साथ मरगे, तो थम नियम-कायदा खात्तर मरेगे, इब थम मसीह के हो, जो मरे होया म्ह तै जिन्दा उठ्या, ताके हम परमेस्वर कै खात्तर धार्मिक जीवन जी सका। 5 क्यूँकै जिब हम अपणे देह की इच्छा कै मुताबिक जिवां सां, तो पाप की लालसा म्हारै अंगा म्ह काम करै सै, अर नियम-कायदे ए उन लालसा नै उजागर करकै मौत नै लेकै आवै सै। 6 हम नियम-कायदा खात्तर मरगे जिसकै बन्धन म्ह हम पैहले थे। इब हम पवित्र आत्मा की मानकै, नये सिरे तै परमेस्वर की सेवा कर सकां सां। 7 तो हम के कहां? के मूसा नबी कै नियम-कायदे पाप सै? न्हीं! बिल्कुल न्हीं! बल्के नियम-कायदे ए सै, जो मेरे ताहीं बतावै सै, के पाप के सै। जै नियम-कायदे न्हीं कहन्दे, के लालच मतना कै तो मै लालच नै जाण ए न्हीं पान्दा। 8 पर पाप नै मौक्का पाकै, हुक्म कै जरिये मेरै म्ह सारी तरियां का लालच पैदा करया, क्यूँकै बिना नियम-कायदे पाप मुर्दा सै। 9 एक बखत था जिब मै मूसा नबी कै नियम-कायदे बिना जीऊँ था, पर जिब मन्नै मूसा नबी कै नियम-कायदा ताहीं जाण्या, तो मेरे म्ह पाप करण की इच्छा होण लाग्यी, अर मै मेरे होया जिसा होग्या। 10 अर वो हुक्म जिसतै मन्नै जिन्दी मिलणी थी वो मेरी आत्मिक मौत का कारण बण्या। 11 क्यूँकै पाप नै मौक्का पाकै हुक्म कै जरिये मेरै ताहीं भक्ताया, अर उस्से कै जरिये मेरी आत्मिक मौत भी हो गई। 12 ज्यांतै हम यो नतिज्जा लिकाडा सां, के नियम-कायदे पवित्र

सै, अर हुकम पवित्र, धर्मी अर खरया सै। 13 तो के मूसा नबी के नियम-कायदे जो खेरे थे, मेरै खात्तर मौत लेकै आये? न्ही! बिलकुल न्ही! यो पाप ए था जिसनै इसा करया। पर नियम-कायदे जो खेरे थे, मेरै खात्तर मौत लेकै आये, ताके पाप की असलियत जाहिर हो जा, अर हुकम दिखावै सै के पाप घणाए बुरा सै। 14 क्यूँके हमनै बेरा सै, के मूसा नबी के नियम-कायदे तो आत्मिक सै, पर मै शारीरिक सूं, अर पाप का गुलाम सूं। 15 अर जो मै करूँ सूं, उस ताहीं कोनी जाएदा, क्यूँके जो मै चाहूँ सूं, वो न्ही करया करदा, पर जिसतै मनै घुणा आवै सै बोए करै सूं। 16 जै जो मै न्ही चाहन्दा बोए बुरे काम करूँ सूं, तो मै मान ल्यूं सूं, के मूसा नबी के नियम-कायदे खेरे सै। 17 तो इसी हालत म्ह जो मेरे म्ह बुरे काम करै सै, वो मै न्ही, बल्के पाप सै, जो मेरै म्ह बस्या होया सै। 18 क्यूँके मनै बेरा सै के मेरे म्ह यानिके मेरे पापी सुभाव म्ह कोए आच्छी चीज वास कोनी कर दी। मेरा जी तो भले काम करण की इच्छा तो करै सै, पर भले काम मेरै तै बणदे कोनी। 19 क्यूँके जिस आच्छे काम करण नै मेरा जी करै सै, वो तो कोनी करदा, पर जो बुरे काम करणा न्ही चाहन्दा, बोए करूँ सूं। 20 इस करकै जै मै बोए करूँ सूं जो न्ही चाहन्दा, तो उसका करण आछा मै कोनी रहया, पर पाप सै जो मेरै भित्तर म्ह बस रहया सै। 21 इस तरियां तै मनै सच का बेरा पटै सै, के जिब मै भलाई करण की इच्छा करूँ सूं, तो बुराई ए करूँ सूं। 22 क्यूँके मै भीतरी माणस-पण तै तो परमेसवर के नियम-कायदे तै घणा खुश रहूँ सूं। 23 पर मेरे भित्तर एक नियम-कायदा की शक्ति काम करण लागरी सै, जो मेरी पापी अन्तरात्मा तै युध्द करै सै। या नियम-कायदा की शक्ति मेरी अन्तरात्मा नै पाप का गुलाम बणावै सै जो इब भी मेरी देह म्ह सै। 24 मै किसा निरभागा माणस सूं! मनै इस पापी सुभाव तै जो मौत लेकै आवै सै, कौण छुड़ावैगा? 25 म्हारै प्रभु यीशु मसीह कै जरिये परमेसवर का धन्यवाद होवै। ज्यांतै मै अपणी समझ तै तो परमेसवर के नियम-कायदे नै मानना चाहूँ सूं, पर पापी सुभाव के कारण मै पाप का गुलाम सूं।

8 इस करकै इब जो मसीह यीशु पै विश्वास करै सै, उनपै ढण्ड का हुकम कोनी। 2 क्यूँके पवित्र आत्मा थमनै वा जिन्दगी देवैगा, जो मसीह यीशु की ओड़ तै आवै सै, अर वो थारे ताहीं पाप अर मौत तै आजाद करै सै। 3 क्यूँके जो काम मूसा नबी के नियम-कायदे पापी सुभाव कै कारण देह म्ह न्ही कर सके, उस ताहीं परमेसवर नै करया, यानिके अपणे ए बेटे ताहीं इन्सान के रूप म्ह पापबलि होण कै खात्तर भेज दिया, परमेसवर नै पाप की शक्ति ताहीं अपणे बेटे की देह के बलिदान के जरिये तोड़ दिया। 4 ज्यांतै के मूसा नबी के नियम-कायदे की विधि म्हारै म्ह पूरी करी जावै, जो पापी सुभाव कै मुताबिक न्ही, बल्के पवित्र आत्मा कै मुताबिक चाल्लै सै, 5 क्यूँके जो अपणे पापी सुभाव के कारण चाल्लै सै, वो बुरी चिज्जां कै बारें म्ह सोच्चै सै, पर जो-जो पवित्र आत्मा के जरिये चाल्लै सै, वो उन चिज्जां कै बारें म्ह सोच्चै सै, जो पवित्र आत्मा ताहीं खुश करै सै। 6 जै थम अपणी पापमय लालसा के मुताबिक चाल्लोंगे तो मरोगे, पर पवित्र आत्मा के कहे

मुताबिक चाल्लोंगे तो जिन्दगी अर शान्ति पाओगे। 7 क्यूँके पापमय लालसा के मुताबिक चालणा तो परमेसवर तै बैर राखणा सै, क्यूँके ना तो वो परमेसवर के नियम-कायदे कै अधीन सै अर ना कदे हो सकै सै। 8 अर जो पापमय लालसा के मुताबिक चाल्लै सै, वे परमेसवर नै खुश न्ही कर सकदे। 9 पर जिब के परमेसवर का पवित्र आत्मा थारे म्ह बरै सै, तो थम पापमय लालसा के मुताबिक न्ही पर पवित्र आत्मा के कहे मुताबिक चाल्लों। जै किसे म्ह मसीह का आत्मा कोनी चाल्दा तो वो परमेसवर का माणस कोनी। 10 जै मसीह थारे म्ह वास करै सै, तो पाप कै कारण देह मरी होई सै, पर धर्मिकता कै कारण थारी आत्मा जिन्दा सै। 11 जै परमेसवर का आत्मा जिसनै मसीह यीशु ताहीं मरे होया म्ह तै जिन्दा करया, थारे म्ह बस्या होया सै, तो जिसनै मसीह ताहीं मरे होया म्ह तै जिन्दा करया, वो थारी नाश होण आज्जी देह नै भी अपणे पवित्र आत्मा कै जरिये जिन्दा करैगा, जो थारे म्ह बस्या होया सै। 12 इस करकै है विश्वासी भाईयो, हम पापी सुभाव के कर्जदार कोनी के हम इसकै मुताबिक बरताव करां। 13 क्यूँके जै थम पापी सुभाव के मुताबिक जीओगे, तो मरोगे जै पवित्र आत्मा तै पापमय लालसा के काम्मां नै मारोगे तो जिन्दे रहोगे। 14 ज्यांतै के जितने माणस परमेसवर के आत्मा के चलाए चाल्लै सै, वैपै परमेसवर की ऊलाद सै। 15 क्यूँके थारे ताहीं गुलामी की आत्मा कोनी दी गई, के थम डरो, पर पवित्र आत्मा हमनै परमेसवर की ऊलाद बणावै सै, जिसतै हम है अब्बा, है पिता कहकै बोल्लां सां। 16 पवित्र आत्मा आप ए म्हारी आत्मा कै गेल्या गवाही देवै सै, के हम परमेसवर की ऊलाद सां, 17 अर जै ऊलाद सां तो वारिस भी, बल्के परमेसवर के वारिस अर मसीह कै संगी वारिस सां, अगर हम मसीह के ढाळ दुख ठावांगे, तो हम उसकी महिमा म्ह भी शामिल हो पावांगे। 18 मनै पक्का यकिन सै, के इस बखत के दुख अर क्लेश उस महिमा के स्याम्ही, उस महिमा के समान जो प्रभु म्हारै ताहीं देवैगा, किमे भी कोनी सै। 19 क्यूँके सृष्टि की सारी चिज्जें घणी उम्मीद भरी निगांह तै परमेसवर की ऊलाद की बाट देखण लागरी सै। 20 परमेसवर की बणाई गई हर एक चीज नै अपणे मकसद ताहीं खो दिया सै, यो इस करकै न्ही के सृष्टि खुद चाहवै थी, पर परमेसवर नै इसा करया, पर फेर भी आस सै। 21 सृष्टि भी खुद उस दिन की बाट देक्खै सै, जिब वो मौत अर विनाश की गुलामी तै छुटकारा पाकै, परमेसवर की महिमा म्ह उसकी ऊलाद कै साथ शामिल होवैंगे। 22 क्यूँके हमनै बेरा सै के सारी सृष्टि इब ताहीं मिलकै कराहती अर दर्दा म्ह पडी, उस जनानी की तरियां सै, जिसा बच्चा होण तै पैहले दर्दा म्ह तड़फै सै। 23 अर सिफै परमेसवर की बणाई सृष्टि ए न्ही, पर हम भी जिस म्ह होण आज्जी महिमा के पैहले तै स्वाद चखण के रूप म्ह पवित्र आत्मा का वास सै, हम खुद भी अपणे-आप म्ह कराहवा सां। यो जिब्बे होगा जिब हम देह तै आजाद होवांगे, अर परमेसवर हमनै अपणी ऊलाद बणाण कै खात्तर अपणावै। 24 आण आज्जी महिमा की आस के जरिये ए थारा उद्धार होया सै, जै थम उन चिज्जां की आस राक्खों सौं जो थारे धोरै पैहले तै सै, तो

थारी आस धरणा बेकार सै, कोए भी उस चीज की आस कोनी राखदा, जो उसके धोरे पैहले तै सै। 25 हम उन चिज्जां की आस करा सां, जो म्हारे धोरे इब ताहीं सै कोनी, तो हम धीरज तै बाट देक्खां सां, जिब तक वो चीज हमनै मिल ना जावै। 26 प्रार्थना करण खात्तर म्हारे धोरे बुद्धि कोनी, पर पवित्र आत्मा म्हारी मटद करै सै, क्यूँके हमनै न्ही बेरा के किन बात्तां कै खात्तर प्रार्थना करणी चाहिये, पर पवित्र आत्मा आपे इसी आह भर-भरकै, जो बयान तै बाहरणै सै, म्हारे खात्तर बिनती करै सै। 27 परमेसवर जो मनां का जाँचण आला सै उसनै बेरा सै, के पवित्र आत्मा का मकसद के सै? क्यूँके वो पवित्र माणसां कै खात्तर परमेसवर की मर्जी कै मुताबिक बिनती करै सै। 28 हमनै बेरा सै कै जो माणस परमेसवर तै प्यार राखै सै, उनकै खात्तर सारी बात मिलकै भलाई ए नै पैदा करै सै, यानिके उनकै खात्तर जो उसकी मर्जी कै मुताबिक चुपे होए सै। 29 क्यूँके जिन ताहीं परमेसवर नै पैहल्या तै चुण्या होया सै, उन ताहीं उसकै बेटे यीशु मसीह जिसे बणण खात्तर ठहराया भी सै, ताके वो घणे भाईयां म्ह पैहल्डा यानी जेटु बणै। 30 फेर जिन माणसां ताहीं उसनै पैहल्या तै ठेहराया, उन ताहीं चुण्या भी, अर जिन ताहीं चुण्या, उन ताहीं धर्मी भी बणाया सै, अर जिन ताहीं धर्मी बणाया, उन ताहीं अपणी महिमा म्ह भागीदारी भी बणाया सै। 31 तो इन बातां तै हम यो नतिज्जां लिकाडा सां, जै परमेसवर म्हारी काही सै, हमनै कौण हरा सकै सै? 32 परमेसवर वो सै जिसनै अपणे खुद कै बेटे ताहीं भी म्हारे खात्तर बलिदान करण म्ह कोए संकोच कोनी करया, तो जो उसनै म्हारे तै वादा करया सै, वो सारा कुछ म्हारे ताहीं क्यूँ न्ही देवैगा? 33 कोए भी हमनै परमेसवर के स्याही दोषी न्ही ठेहरा सकता? परमेसवर ए सै जो म्हारे ताहीं धर्मी बणावै सै। 34 कोए भी हमनै दोषी न्ही ठेहरा सकता? क्यूँके यीशु मसीह ए सै, जो मरया बल्के मुर्दा म्ह तै जिन्दा भी उठाया, अर परमेसवर कै सोळी ओड सै, अर म्हारै खात्तर बिनती भी करै सै। 35 कौण हमनै मसीह कै प्यार तै न्यारा कैरगा? के कळेश, संकट, उपद्रव, अकाळ, नंगाई, जोख्खम, या तलवार? 36 जिसा पवित्र ग्रन्थ म्ह लिख्या सै, “तेरे खात्तर लोग हमनै रोज मारण की धमकी देवै सै, हम मरण आली भेड्हां की तरियां समझे गये सां” 37 पर इन सारी बातां म्ह हम उसकै जरिये जिसनै म्हारै तै प्यार करया सै, जयवन्त तै भी बाध सै। 38 क्यूँके मै जाणु सूँ, के कोए भी चीज मसीह नै म्हारे तै प्यार करण तै न्ही रोक सकदी। इसतै कोए फर्क न्ही पड़ता के चाहे हम जिवां या मरा, सुर्गदृत, प्रधानतार्ह, शक्तियां जो सुर्ग म्ह सै इन म्ह तै कोए भी हमनै मसीह के प्यार तै अलग न्ही कर सकदी, अर इब जो होण लागरया सै, जो भविष्य म्ह होण आला सै, गहराई, ऊँचाई हमनै परमेसवर के प्यार तै, जो म्हारे प्रभु यीशु मसीह म्ह सै अलग न्ही कर सकदी।

9 जै कोए भी चीज हमनै परमेसवर के प्यार तै अलग न्ही कर सकदी,
तो क्यूँ इसाएली, मेरे यहूदी भाई परमेसवर तै दूर सै? मेरा मन उन खात्तर भोत दुखी सै, जै उन माणसां के छुटकारै खात्तर मेरे उपर चाहे दोष भी लगाये जावै या मसीह तै अलग करया जावै, तो भी मै इसकै

खात्तर तैयार सूँ, अर मै मसीह नै गवाह मानते होए सच बोल्लू सूँ, पवित्र आत्मा अर मेरी अन्तरात्मा भी या गवाही देवै सै कै मै झूठ कोनी बोल्दा। 4 वे इसाएल देश के माणस सै, अर वे परमेसवर के गोद लिये होड़ माणस सै, अर महिमा, करार, नियम-कायदे अर परमेसवर की आराधना करण का हक अर वादे उन्हे के सै। 5 अब्राहम, इसहाक, याकूब ये सारे पूर्वज भी उन्हे के सै, अर मसीह भी देह कै भाव तै उन्हे म्ह तै इसाएली सै। जो सारया कै उपर परमेसवर सै, युगानयुग धन्य हो। आमीन। (aiōn g165) 6 पर इसा कोनी के परमेसवर अपणे वादे तै मुकर गया, ज्यांतै के जो इसाएल के वंशज सै, वे सारे सच्चे इसाएली कोनी। 7 अर ना अब्राहम का वंश होण कै कारण सारे उसकी सच्ची ऊलाद होगी, पर पवित्र ग्रन्थ म्ह लिख्या सै, “इसहाक के वंश म्ह जन्म लेण तै ए सारे उसकी सच्ची ऊलाद न्ही हो जान्दी।” 8 यानिके जो दुनियावी तौर पै शारीरिक रूप तै जन्मे होए परमेसवर की ऊलाद कोनी, पर वायदे की ऊलाद सै। 9 क्यूँके वादे का वचन यो सै: “आगले साल मै इस्से बख्त दुबारा आऊँगा, अर तब सारा कै एक बेटा पैदा होवैगा।” 10 अर सिर्फ योए न्ही, पर जिब रिबिका कै गर्भ म्ह एक ए आदमी यानिके म्हारै पूर्वज इसहाक तै जुडवां बाल्क पैदा होए। 11 इब तै पैहले के वो पैदा होते अर कुछ बुरा या भला काम जाणते, परमेसवर नै यो दिक्खाण कै खात्तर कहाया था, वो अपणे मन की इच्छा तै खुद चुनाव करै सै, ना के उनके भले या बुरे कामां तै। 13 जिसा पवित्र ग्रन्थ म्ह लिख्या सै, “मनै एसाव तै बढ़कै याकूब ताहीं धणा प्यार करया।” 14 ज्यांतै हम के कहां? के परमेसवर की अपणी इच्छा तै चुनाव करणा अन्याय सै? न्ही! बिलकुल न्ही! 15 क्यूँके परमेसवर मूसा नबी तै कहवै सै, “मै जिस किसे पै दया करणा चाहूँ, उसपै दया करूँगा, अर जिस किसे पै तरस खाणा चाहूँ उस्से पै तरस खाऊँगा।” 16 इस करकै परमेसवर उस ताहीं चुपै सै, जिसकै उपर वो दया दिखाणा चाहवै सै, उसका चुनाव इस बात पै आधारित कोनी, के लोग के चाहवै सै, अर वे के करण की कोशिश करै सै। 17 क्यूँके पवित्र ग्रन्थ म्ह परमेसवर नै फिरैन (मिस के राजा) तै कहवा, “मनै तेरे ताहीं ज्या ए तै राजा बणाया सै, के तेरे म्ह अपणी सामर्थ दिखाऊँ, अर मेरै नाम का प्रचार सारी धरती पै होवै।” 18 इस करकै वो जिसपै चाहवै सै उसपै दया करै सै, अर जिस ताहीं चाहवै सै उस ताहीं हठील्ला बणा देवै सै। 19 तब धणखरे माणस मेरै तै कहवैं, “जै इसा सै, तो परमेसवर किस तरियां कह सकै सै, के हम गलत सां? क्यूँके परमेसवर जो करणा चाहवै सै उसनै करण तै कौण रोक सकै सै?” 20 हे भले माणस, भला तू कौण सै जो परमेसवर तै वाद-विवाद कै? के बणाई होई चीज बणाण आळे तै कह सकै सै, “तन्नै मेरै ताहीं इसा क्यांतै बणाया सै?” 21 के कुम्हार ताहीं माटी पै हक कोनी के एक ए लोदे म्ह तै एक बासण आदर कै खात्तर, अर दुसरे ताहीं अनाद्र कै खात्तर बणावै? 22 परमेसवर अपणा छो अर अपणी सामर्थ उनकै बिरुद्ध दिखाणा चाहवै सै, जो नाश ए होण लायक सै, पर

वो धीरज धरे सै क्यूँके वो दिखाणा चाहवै सै के वो कितना महान् सै, वो उन माणसां पै दया करै सै, जिन ताहीं उसनै अपणी महिमा म्ह सँझा करण खात्तर चुण्या सै। 24 यानिके म्हरै पै जिन ताहीं उसनै ना सिर्फ यहूदी माणसां म्ह तै, बल्के गैर यहूदियाँ म्ह तै भी चुण्या। 25 जिसा के वो होशे नबी की किताब म्ह भी गैर यहूदियाँ के बारें म्ह कहवै सै, “जो मेरी प्रजा कोनी थी, उन ताहीं मै अपणी प्रजा कहूँगा, अर जिनतै मै प्यार न्ही करूँ था, उन ताहीं प्यार करूँगा। 26 अर जिस जगहां पै परमेसवर नै इसा कह्या था, के थम मेरी प्रजा कोनी सो, उस्से जगहां पै परमेसवर उन ताहीं अपणी ऊलाद कहवैगा।” 27 अर यशायाह नबी इसाएल के माणसां कै बारै म्ह रुक्का मारकै कहवै सै, “चाहे इसाएल की ऊलादां की गिणती समुन्द्र के बालू कै बराबर हो, तोभी उन म्ह तै थोड़े ए बचैंगे। 28 क्यूँके परमेसवर धरती पै वाताला-ए आवैगा, अर एक बार म्ह ए सबका न्याय करैगा।” 29 जिसा यशायाह नबी नै पैहल्या भी कह्या था, “जै सेनाओं का प्रभु म्हरै खात्तर कुछ वंश न्ही छोड़ा, तो म्हरी हाल्लत सदोम अर अमोरा नगर के जिसी हो जान्ही, जिस ताहीं परमेसवर नै मसीह यीशु पै बिश्वास करण कै कारण उन ताहीं धर्मी बणा दिया। 30 ज्यांतै हम के कहां? गैर यहूदियाँ नै अपणे-आप ताहीं धर्मी बणाण की कोशिश न्ही करी, पर परमेसवर नै मसीह यीशु पै बिश्वास करण कै कारण उन ताहीं धर्मी बणा दिया। 31 जो इसाएली मूसा नबी के नियम-कायदा नै मानकै धर्मी बणाणा चाहवै थे वे धर्मी न्ही बण पाये। 32 यो किस तरियां हो सके सै? इस करकै के वे बिश्वास तै न्ही, पर मानो आच्छे कामां तै धर्मी बणाणा चाहवै थे। उननै उस ठोक्कर कै पत्थर पै ठोक्कर खाई, 33 जिसा पवित्र ग्रन्थ यीशु मसीह के बारें कहवै सै, “देक्खो, मै यशलेम नगर म्ह एक ठेस लागण का पत्थर, अर ठोक्कर खाण की चट्टान राक्खूँ सूँ अर जो कोए उसपै बिश्वास करैगा वो शर्मिन्दा कोनी होवैगा।”

10

हे बिश्वासी भाईयो, मेरे मन की इच्छा अर मेरे यहूदी माणसां खात्तर, परमेसवर तै मेरी याए प्रार्थना सै के वे बचाए जावै। 2 क्यूँके मै उनकी गवाही द्यूँ सूँ के उन ताहीं परमेसवर कै खात्तर उत्साह रहवै सै, पर सही समझैके गेल्या न्ही। 3 क्यूँके वा धार्मिकता जो परमेसवर की ओड़ तै आवै सै, उस ताहीं वे समझाण म्ह नाकाम्याब रहे अर अपणे तरिकें तै धर्मी बणण की कोशिश करी, वे परमेसवर की धार्मिकता के अधीन न्ही होए। 4 क्यूँके मसीह नै पैहले तै ए उस मकसद ताहीं पूरा कर लिया सै। जिस खात्तर नियम-कायदे दिए गये थे, उसका नतिज्जां यो होया के जो यीशु मसीह पै बिश्वास करै सै वो धर्मी बणाए जावैंगे। 5 क्यूँके मूसा नबी नै नियम-कायदा तै धर्मी बणण के बारें म्ह पवित्र ग्रन्थ म्ह यो लिख्या सै, के जो माणस उननै मान्है सै, वो इस्से कारण तै जिन्दा रहेगा। 6 पर बिश्वास के जरिये धर्मी बणाये जाण के बारें म्ह पवित्र ग्रन्थ या कहवै सै, के “तू अपणे मन म्ह न्यू ना कहिये, के मसीह ताहीं नीच्ये त्याण खात्तर सुर्ग पै कौण चढ़ैगा?” 7 या “अथोलोक म्ह कौण उतरैगा?” (यानिके मसीह ताहीं मरे होया म्ह तै जिन्दा उपर लाण कै खात्तर!) (Abyssos g12) 8 पर के कहवै सै,

योए के “परमेसवर का वचन तेरे धोरै सै, ताके तू उसनै अपणे मुँह तै अंगीकार कर सकै अर अपणे मन म्ह राक्ख सकै,” यो वो बिश्वास का वचन सै, जो हम प्रचार करा सां। 9 जै तू माणसां के स्याही यीशु नै प्रभु मान ले, अर अपणे मन तै बिश्वास करां सां, तो हम परमेसवर नै उस ताहीं मरे होया म्ह तै जिन्दा करया, तो परमेसवर तन्नै बचावैगा। 10 क्यूँके हम अपणे मन तै बिश्वास करां सां, तो हम परमेसवर के जरिये धर्मी बणाए जावै सै, अर हम मुँह तै अंगीकार करां सां, के हम मसीह पै बिश्वास करां सां, तो इस करकै हम बच जावैंगे। 11 क्यूँके यशायाह नै पवित्र ग्रन्थ म्ह मसीह के बारें म्ह यो लिख्या सै, “जो कोए उसपै बिश्वास करैगा वो शर्मिन्दा कोनी होवैगा।” 12 यहूदियाँ अर यूनानियाँ म्ह किमे फर्क कोनी, ज्यांतै के परमेसवर सारया का प्रभु सै, जो उसका नाम लेवै सै उस ताहीं वो बचावै सै। 13 क्यूँके पवित्र ग्रन्थ म्ह लिख्या सै के “जो कोए प्रभु का नाम लेवैगा, वो बचाया जावैगा।” 14 पर जिन माणसां नै मसीह पै बिश्वास न्ही करया, तो वे उसनै मदद खात्तर किस तरियां पुकारैंगे? अर जिसकै बारें म्ह सुण्या न्ही उसपै किस तरियां बिश्वास करैंगे? अर वे किस तरियां सुणेंगे जिब तक कोए प्रचारक ना जावै। 15 जै प्रचारक भेज्जे ना जावै, तो किस तरियां प्रचार करै? जिसा पवित्र ग्रन्थ म्ह लिख्या सै, “जो आच्छी बात्तां का सुसमाचार लैकै आवै सै, उनके पाँव कितने सुहावने सै।” 16 पर सारया नै उस सुसमाचार पै बिश्वास कोनी करया जिसा यशायाह नबी कहवै सै, “हे प्रभु, किस्से नै भी म्हरै सन्देस पै बिश्वास न्ही करया?” 17 पर मसीह के बारें म्ह वचन सुण्या तै बिश्वास होवै सै। 18 पर मै पूँछु सूँ, के यहूदियाँ नै, मसीह के बारें म्ह न्ही सुण्या? सुण्या तो जरूर सै, क्यूँके पवित्र ग्रन्थ म्ह लिख्या सै, “उनके बोल साब्दी धरती पै, अर उनके वचन दुनिया के कुणे ताहीं पोहोचेगे सै।” 19 फेर मै पूँछु सूँ, के इसाएली लोग मसीह के बारें म्ह सन्देस ताहीं समझै सै? पैहल्या तो प्रभु नै मूसा नबी के जरिये यो कह्या, “मै उन गैर यहूदियाँ के जरिये थारे मन म्ह जळण पैदा कँड़ा, मै थमै यहूदियाँ के जरिये सूर्ख समझाण आळे माणसां तै गुस्सा दिलाऊँगा।” 20 फेर जो बात प्रभु नै कही वा बात यशायाह नबी बड़ी हिम्मत करकै कहवै सै, “जो मन्नै न्ही टोहवै थे, उननै मेरे ताहीं पा लिया, अर जो मन्नै बुझै भी कोनी थे, उनपै मै जाहिर होया।” 21 पर इसाएल देश के माणसां कै बारै म्ह, परमेसवर यशायाह नबी के जरिये न्यू भी कहवै सै, “मै सारा दिन अपणे हाथ, एक हुकम ना मानण आळी अर विवाद करण आळी प्रजा कै कान्ही पसारे रहया।”

11

ज्यांतै मै पूँछु सूँ, के परमेसवर नै अपणी प्रजा ताहीं छोड़ दिया?

न्ही! बिलकुल न्ही! मै भी तो इसाएली सूँ, मै अब्राहम की पांडी अर बिन्यामीन कै गोत्र म्ह तै सूँ। 2 परमेसवर नै अपणी उस प्रजा ताहीं कोनी छोड़ा, जिस ताहीं उसनै पैहल्याए तै चुण्या सै। के थमनै न्ही बेरा के पवित्र ग्रन्थ एलियाह नबी कै बारै म्ह के कहवै सै, वो इसाएल के माणसां कै बिरोध म्ह परमेसवर तै शिकायत करै सै। 3 “हे प्रभु, उननै तेरे नबियाँ ताहीं मार दिया, अर तेरी वेदियाँ ताहीं नाश कर दिया सै, अर

मै ए एकला बचा सूं, जो तेरे पै बिश्वास करूँ सूं अर वे मेरी जान भी लेणा चाहवै सै।” 4 तब परमेस्वर नै एलिय्याह नबी तै कहावा, “मन्नै अपणे खात्तर सात हजार माणसां ताहीं राख राख्या सै, जिन नै बाल देवता की मूर्ति की आराधना करण खात्तर गोडै कोनी टेक्के सै।” 5 ठीक इस्से तरियां तै इस बखत भी, परमेस्वर के अनुग्रह तै अलग करे होए कुछ यहूदी माणस बचरे सै, जिन ताहीं उसनै अपणे खात्तर चुण्या सै। 6 जै उन ताहीं परमेस्वर नै अपणे अनुग्रह तै चुण्या सै, तो यो आच्छे काम्मां तै न्ही होया, न्ही तो अनुग्रह फेर अनुग्रह न्ही रहया। 7 फेर इसका नतिज्जा के लिकड़ाया? हालाकि इसाएली माणस जो परमेस्वर की नजर मृ धर्मी बणणा चाहवै थे, पर वो बण न्ही पाए, पर परमेस्वर नै जिन ताहीं चुण्या वे उसकै गैल धर्मी बण ग्ये, अर बचे होड़ माणस हठीले करे गये अर उननै उसकी सुणण तै इन्कार कर दिया। 8 जिसा पवित्र ग्रन्थ मृ यशायाह नबी नै लिख्या सै, “परमेस्वर नै उन ताहीं आज कै दिन तक सुस्त दिमाग दे राख्या सै, अर इसी आँख दी जो ना देख्यै, अर इसे कान दिये जो ना सुणै।” 9 अर राजा दाऊद कहवै सै, “कै जिसा एक पंछी खाणा खाण खात्तर जाळ मृ फॅस जावै सै अर जानवर खेड़ मृ गिर जावै सै, उसी तरियां ये माणस भी परमेस्वर की ओड़ तै दण्ड पावैंगे। 10 उनकी आँख आँधी हो जावै ताके वो देख न्ही पावै, अर वे सारी हाण मुसीबतां मृ फसे रहवै।” 11 तो मै पूछु सूं के यहूदी लोग ठोक्कर खाण कै कारण सदा कै खात्तर नाश होगे? न्ही! बिलकुल न्ही! पर उनकै अविश्वास कै कारण गैर यहूदियाँ ताहीं उद्धार मिल्या, ताके इसाएल के माणसां कै जलण होवै। 12 ज्यांतै जै उनका अविश्वास दुनिया की गैर यहूदियाँ कै खात्तर भलाई का कारण बणै, तो इसाएल के माणसां का परमेस्वर के धोरै बोहड़ के आणा और भी आच्छा क्यूँ न्ही होगा। 13 मै थम दुसरी जातां तै ये बात कहूँ सूं। जिब के मै गैर यहूदियाँ कै खात्तर प्रेरित सूं, तो मै अपणी सेवा की बड़ाई करूँ सूं, 14 ताके किसे तरियां तै मै अपणे कुण्बे आळे माणसां मृ जलण पैदा करवा कै उन मृ तै एक-आधै का उद्धार कराऊँ। 15 क्यूँके जिब इसाएली माणसां का छोड़ दिया जाणा, गैर यहूदियाँ का परमेस्वर कै साथ मेळ-मिलाप का कारण होया। तो उनका मसीह ताहीं अपणाया जाणा, इसा होगा, जिसा किसे माणस का मुर्दा मृ तै जिन्दा जाणा। 16 मै थमनै एक उदाहरण देऊँ सूं, यो यहूदी माणसां का रिवाज सै, जिब हम चून गुंथा सां, तो उस मृ तै पैहले रोटी का एक पेड़ा परमेस्वर कै खात्तर लिकाड़ा सां, तो पूरा गुन्डा होया चून भी परमेस्वर कै खात्तर सै, उस्से तरियां जिस तरियां जड़ परमेस्वर की सै, तो डाली भी उस्से की सै। 17 इसाएल के माणस जैतून की डाली की तरियां सै अर पिता अब्राहम, इस्हाहक अर याकूब पेड़ की जड़ की तरियां सै, पर जै कुछ डाली तोड़ दी गई, अर तू जंगली जैतून होकै उन मृ कलम करया गया, अर यहूदी माणसां ताहीं मिलण आली आशीष का फायदा थारे ताहीं भी होया, जिसा जैतून के पेड़ की डाली पेड़ की जड़ तै रस हासिल करै सै। 18 तो थम यो घमण्ड ना करियो, के थम उन कटी होई डालियाँ तै बढ़िया सों, यो याद राक्खों के

थम जड़ नै कोनी पर, जड़ थमनै सम्भालै सै। 19 फेर थम बोल सकों सों के “परमेस्वर पेड़ तै टुटी होए डालियाँ की तरियां थमनै छोड़ देगा।” ताके गैर यहूदियाँ ताहीं अपणाले, जो के उन डालियाँ की तरियां सै जो कलम करकै लगाई गई सै। 20 यो सच सै के वे तो अविश्वास कै कारण तोड़ी गई, पर तू बिश्वास तै बण्या रहवै सै ज्यांतै घमण्डी ना होवै, पर भय मान, 21 क्यूँके जिब परमेस्वर नै खुद की डालियाँ पै दया न्ही करी तो वो थारे पै भी दया न्ही करैगा। 22 ज्यांतै परमेस्वर कै दया अर कठोरता नै देख! जो अविश्वासी माणसां खात्तर कठोरता अर थारे खात्तर दया सै, जै थम असलियत मृ उसकी दया की हृद मृ न्ही बणे रहवैंगे, तो थारे ताहीं भी काट के अलग कर दिया जावैगा। 23 यहूदी लोग भी जै बिश्वास करणा शरू करदे, तो दुबारा तै लगा दिए जावैंगे, क्यूँके परमेस्वर उन ताहीं फेर छांग सकै सै। 24 एक जंगली डाली खात्तर एक आच्छे पेड़ का हिस्सा बणणा कुदरती न्ही सै, अर जो यहूदी कोनी जंगली जैतून के पेड़ की डाली की तरियां सै, जो के एक आच्छे जैतून के पेड़ मृ लगाई गई सै, पर यहूदी एक डाली की तरियां सै जौ आच्छे पेड़ तै उगी सै, पक्के तोर पै वे अपणे पेड़ मृ शामिल हो सकै सै। 25 है बिश्वासी भाईयो, मै न्ही चाहन्दा के थम इस भेद तै अनजाण रहों, इसा ना हो के थम अपणे-आप पै घमण्ड करण लाग्मों, जिब तक गैर यहूदी परमेस्वर के धोरै ना आवै सै, तब तक इसाएल के कुछ माणस सख्त बणे रहवैंगे। 26 अर इसके बाद सारे इसाएल के माणस उद्धार पावैंगे। जिसा पवित्र ग्रन्थ मृ लिख्या सै, “छुटाण आळा यस्तश्लेम तै आवैगा, अर अभगति नै याकूब के वंश तै दूर करैगा।” 27 अर उनकै गेल्या मेरा यो करार होगा, जिब मै उनके पापां नै माफ कर दियुँगा।” 28 यहूदी लोग परमेस्वर के दुश्मन बणगे थे, क्यूँके वे उस सुसमाचार पै बिश्वास करणा न्ही चाहन्दे, यो थारे खात्तर फायदेमन्द होया, पर परमेस्वर उनतै प्यार करै सै, क्यूँके उसनै अपणे खात्तर उन ताहीं चुण्या सै, यो ए वो वादा सै जो उसनै म्हरे पूर्वजां तै करया था। 29 क्यूँके परमेस्वर अपणे वरदान्नां तै, अर बुलाहट तै कदे भी पाच्छे कोनी हटदा। 30 एक बखत था जिब थम गैर यहूदियाँ नै परमेस्वर ताहीं ठुकरा दिया था, पर इब इसाएल के माणसां नै परमेस्वर ताहीं ठुकरा दिया, इस कारण थारे पै दया दिखाई गई। 31 थारे पै दया दिखाणा कै कारण उनपै भी दया दिखाई जावैगी। 32 क्यूँके सारे माणसां नै परमेस्वर के हुकम का उलंधण करया सै, योए कारण सै के परमेस्वर उनकै गैल कैदियाँ की डाल बरताव करै सै, वो इस करकै इसा करै सै के सब माणसां पै दया हो सकै। (eleesē g1653) 33 ओह! किसा अपार सै परमेस्वर की बुद्धि अर जान का भण्डार! कितने महान् सै उसके फैसले! अर किसा रहस्यमयी सै उसके काम करण का तरिकां। 34 “भला कौण जाण सकै पै परमेस्वर के मन नै? या कौण उसका सलाहकार होया सै? 35 या किसनै परमेस्वर ताहीं कुछ दिया सै, जिसका बदला उस ताहीं दिया जावै?” इसा कोए कोनी। 36 क्यूँके सब कुछ उस्से कै काही तै आवै

सै, अर उस्से नै सब कुछ बणाया सै अर सब कुछ उस्से का सै। उसकी महिमा युगानुयग होन्दी रहवै आमीन। (aiōn g165)

12 ज्यांतै हे बिश्वासी भाईयो, मैं थारे तै परमेसवर की दया याद परमेसवर ताहीं भान्दा होया बलिदान करकै छढ़ाओ। यो ए परमेसवर की सेवा करण का सही तरिकां सै। 2 इस दुनिया के माणसां बरगे ना बणो, पर परमेसवर थारी सोच नै बदलै, अर थारा चाल-चलण भी बदलता जावै, जिसतै थम परमेसवर की भली, अर आच्छी लागण आळी, अर सिध्द इच्छा अनुभव तै बेरा पाड़ सको। (aiōn g165) 3 क्यूँकै मैं उस अनुग्रह कै कारण जो मेरे ताहीं मिल्या सै, थारे म्ह तै हरेक तै कूँ सूँ कै जिसा समझणा चाहिये, उसतै बढ़कै कोए भी अपणे-आपनै ना समझौ। पर इसकी बजाए सदबुध्दी राखकै, जिसा परमेसवर नै जितना बिश्वास थारे ताहीं दिया सै उसकै मुताबिक अपणे-आपनै समझो। 4 क्यूँकै जिसा म्हारी एक देह म्ह घण-ए अंग सै, अर सारे अंग का एके काम कोनी। 5 इस्से तरियां हम जो मसीह म्ह बिश्वास करा सां, हम उसके देह के कुछ अंग बणें सां, अर हम दुसरे तै जुड़े होए सां। 6 जिब के उस अनुग्रह कै मुताबिक जो परमेसवर नै म्हारै ताहीं दिया सै, हमनै न्यारे-न्यारे वरदान मिले सै। तो जिस ताहीं परमेसवर नै भविष्यवाणी का दान दिया सै, वो उन ए बातां नै बोल्लै जौ उसनै बिश्वास दिलाते हो के ये परमेसवर की ओड़ तै सै। 7 जै दुसरयां की सेवा करण का दान मिल्या हो, तो सेवा म्ह लाग्या रहवै, जै कोए सिखाण आळा हो, तो सिखाण म्ह लाग्या रहवै। 8 जो उत्साहित करण आळा हो, वो उत्साहित करण म्ह लाग्या रहवै, दान देण आळा हो उदारता तै देवै, जो अगुवाई कै, वो जोश तै कै, जो दया कै, वो खुशी तै कै। 9 प्यार करण का दिखावा ना करो, बुराई तै नफरत करो, भलाई म्ह उत्सुक रहो। 10 एक-दुसरे तै इस तरियां प्यार करो, जणु एक ए परिवार के हो, आप्स म्ह एक-दुसरे का बढ़-चढ़कै आदर करो। 11 कड़ी मेहनत करो अर आलसी ना बणो, आत्मिक जोश तै भरे रहो। प्रभु की सेवा पूरे मन तै करदे रहो। 12 आस म्ह खुश रहो, क्लेश म्ह धीरज धरो, प्रार्थना म्ह सारी हाण लागे रहो। 13 पवित्र माणसां ताहीं जो किमे जरूरी हो, उस म्ह उनकी मदद करो, अर अजनबी माणसां की सदा सेवा-पाणी म्ह लागे रहो। 14 अपणे सताण आळा ताहीं आशीष धो, आशीष दो श्राप ना धो। 15 आनन्द करण आळा कै गेल्या आनन्द करो, अर रोण आळा कै गेल्या रोओ। 16 जिस तरियां थम अपणी परवाह करो सों, उस्से तरियां दुसरयां की परवाह करो, खुद पै घमण्ड ना करो, पर दीन-दुखियाँ कै गेल्या संगति राक्खो, अपणी नजर म्ह अकलमंद ना होवो। 17 बुराई कै बदले किसे तै बुराई ना करो, जो बात सारे माणसां कै लोवै आच्छी सै, उनकी फिक्र करणा करो। 18 जित्त ताहीं हो सके, थम पूरे मन तै सारे माणसां कै गेल्या मेल-मिलाप राक्खो। 19 हे प्यारे बिश्वासी भाईयो, बदला ना लियो, पर परमेसवर ताहीं बदला लेण का मौका धो, क्यूँकै पवित्र ग्रन्थ म्ह लिख्या सै, “बदला लेणा मेरा काम सै, प्रभु कहवै सै मै ए

बदला ल्यूँगा।” 20 पर वचन यो भी कहवै “जै तेरा बैरी भूक्खा हो तो उस ताहीं खाणा खुवा, जै तिसाया हो तो उस ताहीं पाणी पिला, क्यूँकै तेरे इसा करण तै वो खुद शर्मिन्दा हो जावैगा।” 21 बुराई तै ना जीत हासिल करो, पर भलाई तै बुराई नै जीत ल्यो।

13 हरेक माणस शासन करण आळे अधिकारियां कै अधीन रहवै,

क्यूँकै सारे अधिकार परमेसवर की ओड़ तै आवै सै, अर जो अधिकार सै, वे परमेसवर नै बणाये सै। 2 ज्यांतै जो कोए भी माणस उन माणसां का पालन करण तै इन्कार कैरै सै, जिनके धोरै शासन करण की शक्ति सै, तो वो परमेसवर की विधि का बिरोध कैरै सै, अर बिरोध करण आळे दण्ड पावैंगें। 3 क्यूँकै हाकिम आच्छे काम के न्हीं, पर भुड़े काम कै खात्तर डर का कारण सै। जै तू हाकिम तै बिना डरे रहणा चाहवै सै, तो आच्छा काम कर, ताके उसकी ओड़ तै तेरी बड़ाई हो। 4 क्यूँकै वो तेरी भलाई कै खात्तर परमेसवर का सेवक सै। परन्तु जै तू बुराई कैरै, तो डर, क्यूँकै उसनै दण्ड देण का हक सै, अर वो परमेसवर का सेवक सै ताके उसकै छो कै मुताबिक भुड़े काम करण आळे ताहीं सजा देवै। 5 ज्यांतै थम उनके अधीन रहों ना सिफै उसकै दण्ड तै बचण खात्तर बल्के साफ अन्तरात्मा राक्खण खात्तर भी। 6 ज्यांतै चुंगी भी धो क्यूँकै शासन करण आळे परमेसवर के सेवक सै अर सारी हाण उस फर्ज नै पूरा करण म्ह लाग्ये रहवैं सै। 7 ज्यांतै हरेक का हक चुकाया करो, जिस ताहीं चुंगी देणी चाहिये, उस ताहीं चुंगी देओ, कर देण आळे ताहीं कर देओ, जिसतै डरणा चाहिये, उसतै डरो, जिसका आदर-मान करणा चाहिये, उसका आदर-मान करो। 8 एक ए चीज सै जिसके थमनै कर्जदार होणा चाहिए, वो सै थारा आप्स म्ह प्यार, क्यूँकै जो एक-दुसरे तै प्यार कैरै सै, उस्से नै परमेसवर के नियम-कायदा ताहीं पूरा करणा सै। 9 क्यूँकै, मूसा नबी कै नियम-कायदा म्ह भोत-से हुक्म सै, “जारी ना करणा, खून ना करणा, चोरी ना करणा, लालच ना करणा,” अर इन्हैं छोड़ और कोए भी हुक्म हो, तो सारया का निचोड़ इस एक हुक्म म्ह पाया जावै सै, “अपणे पड़ोसी तै अपणे जिसा प्यार करो।” 10 प्यार पड़ोसी की कुछ बुराई कोनी करदा, जो प्यार कैरै सै, वो परमेसवर के नियम-कायदा नै पूरा करै सै। 11 आप्स म्ह हरेक नै एक-दुसरे तै प्यार करते रहणा चाहिए, क्यूँकै वो बखत आवै सै, के जिब परमेसवर हमनै इस बुरी दुनिया तै छुड़ावैगा, जिब हमनै पैहली बार मसीह म्ह बिश्वास करणा था, तब तै इब वो बखत धोरै आ लिया सै, तो थारे ताहीं नींद तै जागणा चाहिए अर सावधान रहणा चाहिए। 12 दुनिया म्ह रहण का म्हारा बखत लगभग एक रात की ढाल सै, जो खतम होण आळी सै, अर मसीह के बोहड़ण आळा बखत भोत लैवै सै, ज्यांतै हमनै अन्धकार के काम्मां नै छोड़कै, चाँदणे की ढाल आच्छे काम करणे चाहिए, जो बुराई का बिरोध करण म्ह म्हरे हथियार बणै सके। 13 आओ! हम खुद नै सही तरिकें तै चलाणा शुरु करा, जो उन माणसां की तरियां सै जो चाँदणे म्ह रहवै सै, पर अँधेरे म्ह रहण आळे माणसां की ढाल ना बणो जो भोग-विलास, दारूबाजी, जारी,

लुचपण, रोले अर जळण करण जिसा काम करै सै। 14 बल्के प्रभु यीशु मसीह ताहीं कवच बणा के पैहर ल्यो, अर देह की पापी अभिलाषायां नै पूरा करण का उपाय ना करो।

14 जो माणस विश्वास म्ह कमजोर सै, उस ताहीं अपणी संगति म्ह

ले ल्यो, पर उस ताहीं के करणा चाहिए के न्ही करणा चाहिए इस बारें म्ह बहस ना करो। 2 एक नै विश्वास सै, के सारा कुछ खाणा सही सै, पर जो विश्वास म्ह कमजोर सै वो साग-पात ए खावै सै। 3 अर माँस-मच्छी खाण आळे साग-पात खाण आळे ताहीं तुच्छ ना जाणै, अर ना साग-पात खाणआळा, माँस-मच्छी खाणआळै पै दोष लावै, क्यूँके परमेसवर नै दोनुआ ताहीं अपणाया सै। 4 तू कौण सै जो दुसरे कै नौकर कै दोष लावै सै? पर उसकी कामयाबी या नाकामयाबी उसकै मालिक कै ए हाथ्यां म्ह सै, बल्के वो कामयाब ए कर दिया जावैगा, क्यूँके प्रभु उस ताहीं कामयाब कर सकै सै। 5 इस तरियां कई माणस तो एक दिन नै दुसरे तै बाध मान्नै सै, अर कई माणस सरे दिनां नै एक जिसा जाणै सै, इस तरियां तै हरेक अपणे ए मन म्ह, इस बात नै पक्का कर लवै जो वो सोच्चै सै वोए सही सै। 6 जो कोए किसे दिन नै बाध मान्नै सै, वो प्रभु नै आदर मान देण खात्तर मान्नै सै। जो कोए माँस-मच्छी खावै सै, वो प्रभु नै आदर मान देण खात्तर खावै सै, क्यूँके वो परमेसवर का धन्यवाद करै सै, अर जो साग-पात खावै सै, क्यूँके वो प्रभु नै आदर मान देण खात्तर खावै अर परमेसवर का धन्यवाद करै सै। 7 क्यूँके हम सरे प्रभु के सां। म्हारै म्ह तै ना तो कोए अपणे खात्तर जिन्दा सै, अर ना कोए अपणे खात्तर मरै सै, पर परमेसवर ताहीं खुश करण खात्तर करै सै। 8 जै हम जिवां सां, तो प्रभु कै खात्तर जिवां सां, अर जै मरा सां, तो प्रभु कै खात्तर ए मरा सां, हम जिवां या मरा, हम प्रभु ए के सां। 9 क्यूँके मसीह यीशु इस्ते खात्तर मरा अर मुर्दा म्ह तै जिन्दा भी हो गया के वो मरे होया अर जिन्द्यां का, दोनुआं का प्रभु होवै। 10 तू अपणे विश्वासी भाई ऐ क्यांतै दोष लावै सै? या फेर क्यांतै अपणे विश्वासी भाई नै तुच्छ जाणै सै? परमेसवर हम सारा का न्याय करैगा। 11 क्यूँके पवित्र ग्रन्थ म्ह लिख्या सै, “प्रभु कहवै सै, मेरे जीवन की कसम, के हरेक घुटना मेरे स्याम्ही टिकैगा, अर हरेक कोए अपणी जुबान तै मनै परमेसवर मान लेवैगा।” 12 ज्यांतै म्हारै म्ह तै हरेक नै अपणे-अपणे काम का लेक्खा परमेसवर ताहीं देणा पडैगा। 13 इस खात्तर आगै तै हम एक-दुसरे पै दोष न्ही लावांगे, पर थम या ठान ल्यो के कोए अपणे विश्वासी भाई कै स्याम्ही पाप करण की बजह ना बणै। 14 मनै बेरा सै अर प्रभु यीशु म्ह मनै पक्का यकिन होया सै, के कोए खाण-पीण की चीज अपणे-आप तै अशुद्ध कोनी, पर जो उस ताहीं अशुद्ध समझै सै, उसकै खात्तर अशुद्ध सै। 15 जै तेरा विश्वासी भाई तेरे खाणे कै कारण दुखी होवै सै, तो फेर तू मसीह की प्यार की रीत पै न्ही चाल्दा, जिसकै खात्तर मसीह मरा, तेरे खाणे की बजह तै तेरा विश्वासी भाई मसीह तै पाढ्ये ना हटै। 16 इस करकै जै तू अपणी नजर म्ह बाढ़िया काम करै सै, पर दुसरा उसनै बुरा मान्नै सै तो उसनै ना करै। 17 क्यूँके परमेसवर का

राज्य खाणा-पीण कोनी, पर धार्मिकता अर मेळ-मिलाप म्ह ए खुशी सै, जो पवित्र आत्मा तै मिलै सै। 18 जो कोए इस तरियां तै मसीह की सेवा करै सै, इसतै परमेसवर खुश होवै सै, अर माणसां म्ह भी उसकी तारीफ होवै सै। 19 ज्यांतै हम उन कामां म्ह लागे रहां जिनतै मेळ-मिलाप अर शान्ति होवै, अर एक-दुसरे का विश्वास मजबूत होवै। 20 खाणे कै खात्तर परमेसवर का काम ना बिगाडै। सारी ढाळ का खाणा शुद्ध सै, पर उस माणस कै खात्तर पाप करण की बजह ना बणै, जिस ताहीं उसके खाणे तै ठेस लागै सै। 21 भला तो यो सै के तू ना माँस-मच्छी खा अर ना अंगूर का रस पी, ना और किमे इसा कैरे जिसतै तेरे विश्वासी भाई कै विश्वास नै ठेस लागै। 22 जै तू विश्वास करै के तू सही करै सै, तो इन बातां नै अपणे ए अर परमेसवर के बीच म्ह राख। धन्य सै वो जो उस बात म्ह, जिस ताहीं वो सही समझै सै, अपणे-आपणै कसूरवार न्ही समझादे। 23 पर इब थारे मन म्ह शक सै, के खाणा सै अर के न्ही खाणा अर फेर भी खा ल्यो सो, तो पाप करो सों। क्यूँके थम अपणे विश्वास के मुताबिक न्ही करते अर जै थम इसा काम करो सों, जिसपै थमनै विश्वास सै, वो काम गलत सै, तो वो पाप सै।

15 हो सकै सै के हम जो विश्वास म्ह मजबूत सां, हम जाणा सां के

इन बातां तै कोए फर्क न्ही पडैता, हम इस खात्तर यो काम न्ही करते के हम अपणे-आपनै खुश कर सका, हमनै उन माणसां का डर अर शंका का भी ध्यान करणा सै, के जो यो सोच्चै सै के हम गलत सां। 2 म्हारै म्ह तै हरेक नै अपणे विश्वासी भाई कै साथ भले काम करणे चाहिए, जो उसनै खुश करै अर उस ताहीं विश्वास म्ह मजबूत बणाए राक्खै। 3 क्यूँके मसीह नै अपणे-आप ताहीं खुश कोनी करया, पर जिसा पवित्र ग्रन्थ म्ह लिख्या सै, “तेरी बुराई करण आळा नै मेरी बुराई करी सै।” 4 जितनी बात पैहल्या तै पवित्र ग्रन्थ म्ह लिख्यी गई, वे म्हारी ए सिखाण कै खात्तर लिख्यी गई सै, ताके हम धीरज अर उत्साह जो म्हारे ताहीं पवित्र ग्रन्थ देवै सै, उसके जरिये हमनै आस मिलै। 5 मै प्रार्थना करूँ सूँ के धीरज अर उत्साह का दात्ता परमेसवर, थमनै यीशु मसीह की तरियां जीवन बिताण अर एक-दुसरायां कै साथ शान्ति तै रहण म्ह मदद करै। 6 ताके थम सब कठै होकै म्हारै परमेसवर प्रभु यीशु मसीह कै पिता की महिमा करो। 7 इस करकै एक-दुसरे नै अपणाओ जिसा मसीह नै थारे ताहीं अपणाया सै, यो इस खात्तर करो के माणस परमेसवर की जै-जै कार करै। 8 ज्यांतै मै कहूँ सूँ के जो वादे म्हारे पूर्वजां ताहीं दिए गये थे, उन वादा नै मजबूत करण खात्तर मसीह, परमेसवर की सच्चाई सावित करण खात्तर मसीह, यहूदी माणसां का सेवक बण्या। 9 अर गैर यहूदी भी परमेसवर की दया कै कारण उसकी माहिमा करै, जिसा पवित्र ग्रन्थ म्ह लिख्या सै, “ज्यांतै मै गैर यहूदी माणसां म्ह तेरा धन्यवाद करूँगा, अर तेरे नाम के भजन गाऊँगा।” 10 फेर कह्या सै, “हे गैर यहूदी माणसों, परमेसवर की प्रजा कै गैल आनन्द करो।” 11 अर फेर पवित्र ग्रन्थ कहवै सै, “हे गैर यहूदी माणसों, प्रभु की जय-जयकार करो, अर हे राज्य-राज्य के सारे माणसों, उसकी बड़ाई

करो।” 12 अर यशायाह नबी पवित्र ग्रन्थ म्ह कहवै से, “यिशै के वंश तै एक बेटा पैदा होगा, अर सारी जातां पै राज करैगा, वो गैर यहूदी माणसां नै बचावैगा।” 13 मै प्रार्थना करूँ सूँ के परमेसवर जो आस का दाता सै, थारे ताहीं बिश्वास करण म्ह सारी तरियां के आनन्द अर शान्ति तै भरपूर करै, के पवित्र आत्मा की सामर्थ तै थारी आस बधती जावै। 14 हे मेरे बिश्वासी भाईयो, मै अपणे-आप थारे बारे म्ह पक्का जाणु सूँ के थम भी आप ए भलाई तै थेरे होए सों, अर थमनै बेरा होणा चाहिए के थमनै के करणा चाहिए, अर एक-दुसरे नै सीखा भी सको सों। 15 तो भी मनै कई बातां के बारें म्ह थारे ताहीं जो हिम्मत करकै लिखा। यो उस अनुग्रह कै करण होया जो परमेसवर नै मेरे ताहीं दिया सै, 16 के मै गैर यहूदियाँ कै खात्तर मसीह यीशु का सेवक होकै परमेसवर कै सुसमाचार की सेवा याजक कै ढाळ करूँ, ताके गैर यहूदियाँ ताहीं परमेसवर खात्तर भेट के रूप म्ह दे सकूँ, जिसकै साथ वो खुश होवै सै, जिन ताहीं पवित्र आत्मा नै पवित्र माणस बणा दिया। 17 ज्यातै मै यीशु मसीह कै करण ए परमेसवर की सेवा पै गवर कर सकूँ सूँ। 18 क्यूँकै मै हिम्मत कै गैल सिर्फ उन बातां बारै म्ह जिक्र करणा चाहूँ सूँ जो मसीह नै मेरे ताहीं करण के काबिल बणाया, ताके जो मनै कह्या अर करणा सै उसके जरिये गैर यहूदी माणस परमेसवर का हुकम मानै। 19 पवित्र आत्मा के जरिये दी गई शक्ति तै मै अदभुत चिन्ह-चमत्कार करूँ सूँ, इस कारण जित भी मै यशश्वलेम नगर तै लेकै चौंगरदेकै इल्लुरिकुम परदेस तक गया, ओडै मनै साराया ताहीं यीशु मसीह का सुसमाचार सुणाया। 20 पर मेरै मन की इच्छा या सै के जित-जित मसीह यीशु का नाम नहीं लिया गया, ओडै सुसमाचार सुणाऊँ, अर उस मकान बणाण आळे मिस्त्री की ढाळ ना होऊँ जो दुसरे की नीम पै घर बणावै सै। 21 पर जिसा पवित्र ग्रन्थ म्ह लिखा सै मै उस ताहीं पूरा करणा चाहूँ सूँ “जिनकै धोरे यीशु मसीह का सुसमाचार नहीं पोंहच्या, वैए देखेंगे, अर जिन नै नहीं सुणा वैए समझैंगे।” 22 ज्यातै मै थारे धोरै आण तै बार-बार रुक्या रहया। 23 पर इब यशश्वलेम नगर अर इल्लुरिकुम परदेस म्ह मनै माणसां ताहीं परमेसवर का वचन सुणा दिया सै, जिनै यीशु मसीह कै बारें म्ह सुण्या ए नहीं था, अर इब मै थारे तै आकै मिलूँगा, जिसकी लालसा मनै घणे साललां तै थी। 24 ज्यातै जिब मै स्पेन देश म्ह जाऊँगा, तो थारे धोरै होंदा होया जाऊँगा, क्यूँकै मनै उम्मीद सै के उस सफर म्ह थारे तै भेट होवैगी, अर जिब थारी संगति तै मेरा जी खुश हो जावै, तो थम मेरी स्पेन देश जाण म्ह मदद कर दिओ। 25 पर इब तो मै यशश्वलेम नगर म्ह जाऊँ सूँ ताके ओडै परमेसवर के पवित्र माणसां नै दान दे सकूँ। 26 क्यूँकै मकिन्यिया अर अखाया परदेस के माणसां नै यो आच्छा लाग्या के यशश्वलेम नगर के गरीब माणसां कै खात्तर कुछ दान कट्ठा करै। 27 उननै आच्छा तो लाग्या, पर वे यशश्वलेमवासियो कै कर्जदार भी सै, क्यूँकै यहूदियाँ नै गैर यहूदियाँ कै साथ परमेसवर की आतिक बातां का साँझा करया सै, यो सही सै गैर यहूदियाँ कै दुनियावी चिज्जां नै यहूदियाँ कै गैल साँझा करै। 28 ज्यातै मै यशश्वलेम

नगर म्ह जाण लागरया सूँ ताके वो दान दे सकूँ, जो मनै कठ्ठा करया सै, उसकै बाद थारे तै रोम देश म्ह मिलकै स्पेन देश म्ह जाऊँगा। 29 अर मनै बेरा सै के जिब मै थारे धोरै आऊँगा, तो मै मसीह की आशीष नै थारे साथ साँझा करूँगा। 30 हे बिश्वासी भाईयो, म्हारै प्रभु यीशु मसीह म्ह बिश्वास के कारण अर जो पवित्र आत्मा नै म्हरे ताहीं जो प्यार दिया सै मै थारे तै बिनती करूँ सूँ के मेरै खात्तर अर मेरे साथ मन तै परमेसवर तै प्रार्थना करो 31 ताके मै यहूदिया परदेस के अविश्वासियाँ तै बचा रहूँ, अर जो दान मै यशश्वलेम नगर म्ह लेकै जाण लागरया सूँ जो परमेसवर के पवित्र माणसां खात्तर खुशी का कारण बणै। 32 अर मै परमेसवर की मर्जी तै थारे धोरै आनन्द कै गैल आकै थारे गेल्या आराम पाऊँ। 33 मै प्रार्थना करूँ सूँ शान्ति का दाता परमेसवर थारे सारया कै गेल्या रहवै। आमीन।

16 मै थारे तै फिबे कै खात्तर जो म्हारी बिश्वासी भाण अर किञ्चिया

नगर की कलीसिया की सेविका सै, मै चाहूँ सूँ के थम उसका आदर करो। 2 थम यो जाऊकै उसका इसा स्वागत करो जिसा थम परमेसवर के पवित्र माणसां का करो सों, अर जिस किसे बात म्ह उस ताहीं थारी जरूरत होवै, उसकी मदद करो, क्यूँकै वा भी धणखरयां की बल्के मेरी भी उपकार करण आळी रही सै। 3 प्रिसकिल्ला बिश्वासी भाण अर उसके धणी अकिविला नै जो मसीह यीशु म्ह मेरै गैल काम करणीये सै, उन ताहीं मेरा नमस्कार। 4 उननै मेरै प्राण कै खात्तर अपणा ए जीवन जोख्खम म्ह गेर दिया था, अर सिर्फ मै ए न्हीं, बल्के गैर यहूदियाँ की सारी कलीसिया भी उनका धन्यवाद करै सै। 5 अर उस कलीसिया नै भी नमस्कार जो उनकै घर म्ह कठ्ठा होवै सै। मेरे प्यारे भाई इपैनितुस नै, जिसनै आसिया म्ह सब तै पैहले मसीह पै बिश्वास करया, उस ताहीं भी मेरा नमस्कार। 6 बिश्वासी भाण मरियम ताहीं, जिसनै थारे खात्तर धणी मेहनत करी, नमस्कार। 7 बिश्वासी भाई अन्धनीकुस अर उसकी भाण यूनियास नै जो मेरै यहूदी साथी सै, जो मेरै गेल्या कैद होए थे अर प्रेरितां म्ह बड़ा नामी सै, अर मेरै तै पैहल्या मसीह म्ह आए थे, नमस्कार। 8 बिश्वासी भाई अम्पलियातुस नै, जो प्रभु मसीह म्ह मेरा प्यारा सै, नमस्कार। 9 बिश्वासी भाई उरबानुस नै, जो मसीह म्ह म्हारा गैल काम करणीया सै, अर मेरे प्यारे बिश्वासी भाई इस्तखुस नै नमस्कार। 10 बिश्वासी भाई अपिल्लेस नै जो मसीह म्ह खरयां लिकड्या, नमस्कार। बिश्वासी भाई अरिस्तुबुलुस कै कुण्बे नै नमस्कार। 11 मेरे बिश्वासी साथी हेरोदियोन नै नमस्कार। बिश्वासी भाई नरकीस्सुस का कुण्बे के जो माणस परमेसवर पै बिश्वास करै सै, उन ताहीं नमस्कार। 12 त्रुफेना अर त्रुफोसा बिश्वासी भाणां नै जो प्रभु म्ह मेहनत करै सै, नमस्कार। प्यारी बिश्वासी भाण पिरसिस नै, जिसनै प्रभु म्ह धणी मेहनत करी, नमस्कार। 13 बिश्वासी भाई रुफुस नै जो प्रभु नै अपणा होण खात्तर चुण्या सै, अर उसकी माँ नै, जो मेरी भी माँ के समान सै, दोनुआ नै, नमस्कार। 14 बिश्वासी भाई अंसुक्रितुस,

फिलगोन, हिर्मेस, पत्रुबास, हर्मास अर उनके साथ के सारे विश्वासी भाईयाँ नै, नमस्कार। 15 विश्वासी भाई फिलुलुगुस, यूलिया अर नेर्युस अर उसके बेब्बे, अर विश्वासी भाई उलुम्पास अर उनके साथ के सारे पवित्र माणसां नै नमस्कार। 16 आप्पस म्ह एक-दुसरे ताहीं गळे मिलकै प्यार तै नमस्कार करो। थारे ताहीं मसीह की सारी कलीसियाओं की ओड़ तै नमस्कार। 17 इब हे विश्वासी भाईयो, मै थारे तै बिनती करूँ सूँ के जो माणस उस सच्ची शिक्षा कै उल्ट जो थमनै मिली सै, अर उन माणसां नै जो फूट गेरण अर ठेस लागण का कारण बाँै सै, उननै ताड़ लिया करो अर उनतै दूर रहो। 18 क्यौंके इसे माणस म्हारै प्रभु मसीह के न्ही, पर अपणी ए इच्छा पूरी करै सै, अर चिकणी-चुपड़ी बातां तै सीध्ये-सादे माणसां नै भका देवैं सै। 19 थारा, परमेसवर के हुकम मानण का जिक्र सारे माणसां म्ह फैल गया सै, ज्यांते म्ह थारे बारै म्ह आनन्द करूँ सूँ, पर मै न्यू चाहूँ सूँ के थम भलाई कै खात्तर अकलमंद, पर बुराई कै खात्तर भोले बणे रहो। 20 शान्ति का परमेसवर शैतान की शक्तियाँ नै खत्म करकै, थारे अधीन कर देवैगा। म्हारै प्रभु यीशु मसीह का अनुग्रह थारे पै होंदा रहवै। 21 मेरे गैल काम करणीया विश्वासी भाई तीमुथियुस का, अर मेरे कुण्बे आळे भाई लूकियुस, यासोन अर सोसिपत्रुस का थारे ताहीं नमस्कार। 22 मै तिरतियुस जो पौलुस की चिट्ठी लिखण म्ह मदद करण लागरया सूँ, मेरा प्रभु म्ह थारे ताहीं नमस्कार। 23 विश्वासी भाई गयुस भी थारे ताहीं नमस्कार करै सै मै इब उसके घर म्ह रहण लागरया सूँ, जित कलीसिया कठी हो सै। विश्वासी भाई इरास्तुस जो नगर का भण्डारी सै, अर भाई क्वारतुस का भी थारे ताहीं नमस्कार। 24 मै प्रार्थना करूँ सूँ के म्हारै प्रभु मसीह का अनुग्रह थारे पै होंदा रहवै। 25 इब जो मन्नै थारे ताहीं सुसमाचार सुणाया सै, यानिके यीशु मसीह कै संदेश कै प्रचार कै मुताबिक जो थमनै विश्वास म्ह मजबूत कर सकै सै, उस भेद कै प्रकाशन कै मुताबिक जो पुराणे बखत तै लुहक्या रहया। (aiōnios g166) 26 पर इब जाहिर होकै, सनातन परमेसवर कै हुकम तै, अर नवियाँ की किताबां कै जरिये गैर यहूदियाँ ताहीं बताया गया सै, ताके वे भी विश्वास करकै हुकम मानणआळे हो जावै, (aiōnios g166) 27 यीशु मसीह कै जरिये उस एकमात्र बुद्धिमान परमेसवर की युगानुयुग महिमा होन्दी रहवै। आमीन। (aiōn g165)

1 कुरिन्थियों

1 या चिट्ठी पौलुस की ओड़तै सै, जो परमेसवर की इच्छा तै प्रभु

यीशु मसीह का प्रेरित होण कै खात्तर बुलाया गया अर विश्वासी भाई सोस्थिनेस भी मेरे गैल सै। 2 मै या चिट्ठी परमेसवर की उस कलीसिया के माणसां ताहिं लिखूँ सूँ, जो कुरिन्थुस नगर म्ह सै, अर जिन ताहिं परमेसवर नै मसीह यीशु म्ह अपणे खात्तर अलग तै छाँट कै राक्खे सै, अर उसनै म्हारे ताहिं अपणे पवित्र माणस होण कै खात्तर बुलाया सै, अर उन सारया के नाम भी जो हरेक जगहां म्हारे अर अपणे प्रभु यीशु मसीह की सेवकाई करै सै। 3 हम प्राथना करां सां, के म्हारै पिता परमेसवर अर प्रभु यीशु मसीह की ओड़तै थमपै अनुग्रह अर शान्ति मिल्दी रहवै। 4 मै थारे बारै म्ह अपणे परमेसवर का सारी हाण धन्यवाद करूँ सूँ, क्यूँके मसीह यीशु म्ह परमेसवर का अनुग्रह जो थारे पै होया सै, उसके कारण उसनै थारे ताहिं भोत सी आशीष दी सै। 5 थम मसीह यीशु म्ह सारी ढाळ तै सम्पन्न करे गये सां, उसनै थारे ताहिं हरेक ढाळ के आत्मिक वरदान दिए सै, ताके थम दुसरयां नै वचन का ज्ञान अर सुसमाचार सुणा सको। 6 जो खास कालियत थारे ताहिं मिली सै, वा साबित करै सै, के मसीह यीशु के बारें जो सन्देस सै, वो सच्चा सै। 7 इस कारण जिब थम म्हारै प्रभु यीशु मसीह के बोहडण की बाट देखण लागरे सां, तो पवित्र आत्मा नै थारे ताहिं हरेक ढाळ के आत्मिक वरदान दिये सै। 8 परमेसवर थमनै आखिर ताहिं विश्वास म्ह मजबूत करैगा, ताके थम म्हारै प्रभु यीशु मसीह के बोहडण के दिन म्ह बेक्सूर ठहरो। 9 परमेसवर इसाए करैगा, क्यूँके जो वो कहवै सै, उसनै वो कारण म्ह विश्वास लायक सै, अर उसनै थारे ताहिं अपणे बेटै, अर म्हारै प्रभु यीशु मसीह की संगति म्ह बुलाया सै। 10 हे विश्वासी भाईयो, जो प्रभु यीशु मसीह नै मेरे ताहिं हक दिया सै, उसकै कारण मै थारे तै बिनती करूँ सूँ, के थम सारे एक-दुसरे तै सहमत रहो, थम एकता बणाए राक्खों ताके थारे म्ह फूट ना होवै, अर थम एक मत हो कै आप्स म्ह मिले रहो। 11 क्यूँके हे मेरे विश्वासी भाईयो, खलोए के कुण्डे के माणसां नै मेरे ताहिं थारे बारै म्ह बताया सै, के थारे म्ह झगड़े होवै सै। 12 मेरे कहण का मतलब यो सै के, थारे म्ह तै कोए अपणे-आपनै पौलुस का, कोए अपुल्लोस का, कोए कैफा का, कोए मसीह का चेल्ला कहवै सै। 13 जो थम करो सों वो ठीक कोनी, के मसीह बट ग्या? के मै पौलुस थारे खात्तर कूस पै चढ़ाया गया? के थमनै मेरे नाम तै बपतिस्मा मिल्या? 14 मै परमेसवर का धन्यवाद करूँ सूँ, विश्वासी भाई क्रिस्युस अर गयुस नै छोड़, मनै थारे म्ह तै किसे ताहिं भी बपतिस्मा कोनी दिया। 15 कदे इसा ना हो के कोए थारे म्ह तै कहवै के थमनै मेरै नाम पै बपतिस्मा मिल्या सै। 16 अर हाँ, मनै स्तिफनास के कुण्डे ताहिं भी बपतिस्मा दिया, इनै छोड़ मै न्ही जाणदा के मनै और किसे ताहिं भी बपतिस्मा दिया। 17 क्यूँके मसीह नै मेरे ताहिं बपतिस्मा देण ताहिं न्ही, बल्के सुसमाचार सुणाण ताहिं भेज्या सै, अर मनै माणसां ताहिं सुसमाचार

चतुर विचार के मुताबिक कोनी सुणाया, इसा ना हो के मसीह के कूस पै मरण की कथा बेकार ठहरै। 18 क्यूँके कूस पै मसीह यीशु के मरण की कथा, नाश होण आले माणसां कै खात्तर बेकूफी सै, पर हम उद्धार पाण आला कै खात्तर परमेसवर की सार्थक सै। 19 क्यूँके पवित्र ग्रन्थ म्ह परमेसवर नै कहवा सै, के “जो अपणे-आपनै ज्ञानवान समझै सै, मै उननै दिखा दियुँगा के असलियत म्ह उनका ज्ञान बेकूफी तै भरया सै, अर वे बेकूफ सै।” 20 कित्त रहया ज्ञानी? कित्त रहया शास्त्री? कित्त रहया इस दुनिया का विवाद करण आला? के परमेसवर नै दुनिया के ज्ञान ताहिं बेकूफी न्ही ठहराया? (aiōn g165) 21 क्यूँके परमेसवर नै यो आच्छा लाग्या के दुनिया के माणस अपणे ज्ञान कै मुताबिक परमेसवर ताहिं न्ही जाण सकै, तो उसनै म्हारे जरिये सुसमाचार के प्रचार ताहिं इस्तमाल करया, ताके उन माणसां नै बचा सकै जिननै उसपै विश्वास करया सै, पर कुछ लोगां नै इस ताहिं बेकूफी समझा। 22 यहूदी लोग ए इस ताहिं बेकूफी समझै सै, क्यूँके वे सुर्ग तै चिन्ह-चमत्कार की बातां नै ए सच मान्यै सै, अर यूनानी लोग ज्ञान की टोह म्ह रहवैं सै। 23 पर हम तो उस कूस पै चढ़ाए होड़ मसीह का प्रचार करा सां, जो यहूदी लोगां कै खात्तर ठोककर का कारण अर गैर यहूदियों कै खात्तर बेकूफी सै। 24 पर जिन ताहिं परमेसवर नै बुलाया सै, के यहूदी लोग, के यूनानी लोग, योए मसीह यीशु परमेसवर का सामर्थ अर परमेसवर का ज्ञान सै। 25 क्यूँके जो परमेसवर की बेकूफी लागै सै, वो माणसां के ज्ञान तै ज्ञानवान सै, अर जो परमेसवर की कमजोरी लागै सै, वो माणसां की ताकत तै घणी ताकतवर सै। 26 हे विश्वासी भाईयो, याद करो के थम किसे थे जिब परमेसवर नै थारे ताहिं बुलाया था, ना तो दुनिया के मुताबिक घणे ज्ञानवान, अर ना घणे सामर्थी, अर ना घणे आच्छे खानदान आले थे। 27 बल्के परमेसवर नै दुनिया के बेकूफां ताहिं छाँट लिया सै के ज्ञानवानां ताहिं शर्मिन्दा करै, अर परमेसवर नै दुनिया के कमजोरां ताहिं छाँट लिया सै के ठाड़यां नै शर्मिन्दा करै। 28 अर परमेसवर नै उन माणसां ताहिं चुण्या, जो दुनिया की निंगां म्ह नीच अर तुच्छ सै। इनकै जरिये परमेसवर नै, जो घणे खास समझे जावै सै, उन ताहिं बेकार ठेहरा दिया। 29 परमेसवर नै यो इस करकै करया, ताके कोए प्राणी उसकै स्याम्ही घमण्ड न्ही करण पावै। 30 परमेसवर के जरिये करे गये काम के नितज्जें तै थम मसीह यीशु म्ह सो, जो परमेसवर की ओड़तै म्हारै खात्तर ज्ञान, धार्मिकता, पवित्रता, अर छुटकारा बणगो। 31 ताके जिसा पवित्र ग्रन्थ म्ह लिख्या सै, उसे तरियां ए होवै, “जो घमण्ड करै वो प्रभु नै जो करया उसपै घमण्ड करै।”

2 हे विश्वासी भाईयो, मै थारे धोरै बातां की चतुराई अर ना ए उत्तम

ज्ञान का प्रदर्शन करण आया, बल्के मै थारे धोरै परमेसवर का सन्देस सुणाण आया था। 2 क्यूँके मनै यो ठान लिया था, के मै मसीह यीशु अर उसकी कूस की मृत्यु के अलावा, किसे और चीज के बारें म्ह थारे तै ना सुणु। 3 मै कमजोरी अर डरकै गेल्या, घणा थरथराता होया थारे

गेल्या रहया। 4 अर मेरी शिक्षा, अर प्रचार म्ह ज्ञान की लुभाण आळी बात कोनी, पर पवित्र आत्मा नै सामर्थी रूप तै जाहिर करया सै, के जो सन्देस मनै थारे ताहीं सुणाया सै, वो सच्चा सै। 5 ज्यांते के थारा विश्वास माणसां कै ज्ञान पै न्ही, पर परमेसवर की सामर्थ के आसरै हो। 6 फेर भी मै, जो विश्वास म्ह मजबूत सै उन ताहीं, ज्ञान भरया सन्देस सुणाऊँ सूं, पर यो इस दुनिया का अर इस दुनिया के नाश होण आळे हाकिमां का ज्ञान कोनी। (aiōn g165) 7 पर जो ज्ञान हम सुणावां सां, वो परमेसवर का ज्ञान सै, जो छिप्या होया था, कोए भी उस ताहीं इब ताहीं न्ही समझ पाया था, परमेसवर नै दुनिया बणाण तै पैहले ए यो फैसला कर लिया था, के उसका ज्ञान म्हारे खात्तर महिमा लेकै आवैगा। (aiōn g165) 8 परमेसवर की योजना ताहीं इस दुनिया के हाकिमां म्ह तै कोए न्ही जाण पाया, क्यूँके जै वे जाणदे तो तेजोमय प्रभु ताहीं क्रूस पै कोनी चढान्दे। (aiōn g165) 9 जिसा पवित्र ग्रन्थ म्ह लिख्या सै, “जो कदे आँखां तै देख्या कोनी गया, अर कान तै सुण्या कोन्या गया, अर जो बात माणसां के चित्त म्ह कोनी चढ़ी, वे सारी बात परमेसवर नै उन खात्तर तैयार करी जो उसतै प्यार करै सै।” 10 पर परमेसवर नै उन बात्ता ताहीं अपणे पवित्र आत्मा के जरिये म्हारे पै जाहिर करया, क्यूँके पवित्र आत्मा सारी बात, बल्के परमेसवर की गहरी बात्ता नै भी जाँच्यै सै। 11 माणसां म्ह तै कौण किसे माणस की बात्तां नै जाणै सै, सिर्फ माणस की आत्मा जो उस म्ह सै? उस्से तरियां ए परमेसवर की बात्तां नै भी कोए न्ही जाणदा, सिर्फ परमेसवर की आत्मा। 12 पर परमेसवर नै म्हारे ताहीं अपणा आत्मा दिया सै, अर हम इसा न्ही सोचते जो दुनिया के लोग सोच्यै सै, इस करकै हम उन आशीषां नै पिछ्याण सका सां जो परमेसवर नै म्हारे ताहीं मुफ्त म्ह दी सै। 13 अर हम ये बात थारे ताहीं बतावां सां, हम माणसां के ज्ञान की सिखाई होड़ बात्तां नै न्ही, पर पवित्र आत्मा की सिखाई होड़ बात्तां नै आत्मिक माणसां ताहीं सिखावा सां। 14 पर शारीरिक माणस परमेसवर के आत्मा की बात अपणान्दा कोनी, क्यूँके वे उसकी निगांह म्ह बेकूफी की बात सै, अर ना वो उन ताहीं जाण सकै सै क्यूँके उनकी जाँच आत्मिक तरियां तै होवै सै। 15 आत्मिक माणस सारा किमे जाँच्यै सै, पर वो दुसरां के जरिये जाँच्या न्ही जान्दा। 16 यो सच सै, क्यूँके पवित्र ग्रन्थ म्ह लिख्या सै, के कोए भी न्ही जाणता के प्रभु के मन म्ह के सै? पर हम विश्वासी माणस जाणा सां के मसीह के मन म्ह के सै।

3 हे विश्वासी भाईयो, जिब मै थारे साथ था तो थारे ताहीं आत्मिक बात न्ही सिखा पाया, जिस तरियां मै आत्मिक माणसां नै सिखाऊँ सूं पर मनै थारे तै दुनियावी माणसां की तरियां बात करी, क्यूँके थम मसीह म्ह इब भी बाल्क के समान सों। 2 मनै थारे ताहीं परमेसवर के सुसमाचार की शुआती शिक्षा ए सिखाई, जिस तरियां कोए इन्सान छोटे बाल्क नै दूध पियावै सै, अर मनै थारे ताहीं वचन की गहरी बात न्ही सिखाई जो की रोटी की तरियां सै, क्यूँके थम इब्बे उस ताहीं अपणा न्ही सकदे। 3 क्यूँके इब ताहीं थम दुनियावी माणसां के पापी सुभाव के

मुताबिक जीवन जिओ सों। ज्यांते के इब भी थारे म्ह जळण अर झागडे सै, तो के थम दुनियावी माणसां की तरियां कोनी? थम उन माणसां की तरियां सों जो परमेसवर के कोनी। 4 क्यूँके जिब एक माणस कहवै सै, “मै पौलुस का चेल्ला सूं” अर दुसरा कहवै सै, “मै अपुल्लोस का चेल्ला सूं” तो के थम दुनियावी माणस की तरियां कोनी? 5 अपुल्लोस कौण सै? अर पौलुस कौण सै? सिर्फ सेवक, जिनकै जरिये थमनै मसीह म्ह विश्वास करया। हम सब नै वोए काम करया जो म्हारे ताहीं प्रभु नै दिया। 6 यो उस पौथ की ढाळ सै, जो मनै लगाया, अपुल्लोस नै सींचा, अर परमेसवर नै बढ़ाया। 7 ज्यांते ना तो लानआळा किमे सै अर ना सींच्यण आळा, पर परमेसवर ए सारा किमे सै जो बढ़ाण आळा सै। 8 पौथा लगाण आळा अर उस ताहीं सींच्यण आळा दोनुआ का एकके मकसद सै, पर हरेक माणस अपणी ए मेहनत कै मुताबिक अपणी ए मजदूरी पावैगा। 9 क्यूँके हम परमेसवर कै गैल काम करणीये सां, अर थम परमेसवर की खेती अर उस घर की ढाळ सों जिस ताहीं परमेसवर बणाण लाग रह्या सै। 10 परमेसवर नै जो वरदान मेरे ताहीं दिए सै, तो मनै एक अकलमंद चिणाई आळे मिस्त्री की तरियां घर की नीम धरी, अर दुसरा उसपै रह्या धरै सै। 11 क्यूँके जो नीम धरी सै, वा यीशु मसीह सै, कोए दुसरी नीम कोनी धर सकदा। 12 जै सेवक परमेसवर की सच्ची शिक्षा सिखावै सै, जो परमेसवर नै उस ताहीं दी सै, तो वो उस राज मिस्त्री की ढाळ सै, जो उस नीम पै आच्छे समान तै, जुकर सोन्ना, चाँदी, बेसकिमती पत्थर के जरिये, नीम पै घर बणावै सै, अर जै वो झाड़ी शिक्षा नै सिखावै सै, तो वो उसकी ढाळ सै, जो लाकड़ी, घास-फूस तै नीम पै घर बणावै सै। 13 तो हरेक माणस अपणे काम नै देक्खेगा के उसनै किसा काम करया सै, क्यूँके यीशु मसीह जाहिर कर देवैगा जिब वो बोहड़ के आवैगा, यो उस दिन की तरियां होगा जिब वो समान आग म्ह डाला जावैगा तो वो देक्खेगा के किसनै किसा काम करया सै, फेर वो फैसला करेगा के किसनै आच्छा अर किसनै बुरा काम करया सै। 14 जिस किसे का बणाया गया घर उस नीम पै डट्या रह्यैगा, तो वो उसकी मजदूरी पावैगा। 15 जै मसीह तय करै के जो काम करया सै वो सही कोनी तो मसीह उस काम करण आळे नै मजदूरी न्ही देवैगा, पर वो अनन्त जिन्दी नै न्ही खोवैगा जो परमेसवर नै उस ताहीं दी सै। 16 के थमनै न्ही बेरा के थम परमेसवर के मन्दर सो, अर परमेसवर की आत्मा थारे म्ह वास करै सै? 17 जै कोए परमेसवर कै मन्दर नै नाश करैगा, तो परमेसवर उसनै नाश करैगा, क्यूँके परमेसवर का मन्दर पवित्र सै, अर वो थम सो। 18 धोक्खे म्ह ना रहों, जै थारे म्ह तै कोए यो सोच बेट्ठै के वो दुनियावी बात्तां के मुताबिक अकलमंद सै, तो ठीक तो यो होगा के वो खुद नै बेकूफ बणाले ताके अकलमंद बण जावै। (aiōn g165) 19 क्यूँके इस दुनिया का ज्ञान परमेसवर की नजर म्ह बेकूफी सै, जिसा पवित्र ग्रन्थ म्ह लिख्या सै, “वो ज्ञानियां ताहीं उनकी श्याणपत म्ह फँसा देवै सै।” 20 अर यो भी लिख्या सै, के “प्रभु ज्ञानियां के विचारां नै जाणै सै,

के वो बेकार सै।” 21 ज्यांते माणसां पै कोए घमण्ड ना करै, क्यूँके सारा किमे थारा सै। 22 के पौलुस, के अपुल्लोस, के कैफा, के दुनिया, के जीवन, के मरण, के वर्तमान, के भविष्य, सारा किमे थारा सै, 23 अर थम मसीह के सों, अर मसीह परमेसवर का सै।

4 माणस हमनै मसीह के सेवक अर परमेसवर के भेदां के भण्डारी

समझै, जो माणसां नै परमेसवर का भेद समझावै सै। 2 फेर उरै भण्डारी म्ह या बात देक्खी जावै सै, के वो विश्वास कै जोगा हो। 3 पर मेरी निगांह म्ह या धणी छोट्टी बात सै, के थम या माणसां का कोए न्यायाधीश मन्नै परखै, बल्के मै खुद अपणे-आप ताहीं कोनी परखदा।

4 क्यूँके मेरा मन मेरै ताहीं किसे बात म्ह कसूरवार कोनी ठहरान्दा, इस म्ह मै बेक्सूर कोनी ठहरदा, पर मेरा परखण आळा प्रभु सै। 5 ज्यांते जिब ताहीं प्रभु का आणा ना हो, कोए किसे नै परखै ना, वो माणसां के विचारां नै साफ-साफ जाहिर कर देगा, अर वो माणसां के मनां के मकसद नै दिखावैगा, फेर परमेसवर की ओड तै हरेक की बड़ाई होवैगी।

6 हे विश्वासी भाईयो, मन्नै अपणा अर अपुल्लोस का जिक्र उदाहरण के तौर पै करया सै, यो बताण खात्तर के मै थारे ताहीं के कहणा चाहूँ सूँ जै थम उसपै ध्यान करो, जो पवित्र ग्रन्थ म्ह लिख्या सै, अर उसते आग्ने ना बढो, इसा ना हो के थम एक माणस का पक्ष ल्यो, अर दुसरे का अपमान करो। 7 थारे ताहीं कौण कहवै सै, के थम दुसरायां तै उत्तम हो? हर काबलियत थमनै परमेसवर की ओड तै मिली सै, अर सब कुछ परमेसवर के जरिये दिया गया सै, तो थमनै घमण्ड करण का कोए हक कोनी? 8 थम सोच्यो सों के थारे धोरै पवित्र आत्मा के सारे वरदान सै, जो माणसां ताहीं दिए जावै सै, थम यो सोच्यों सों के म्हरे बिना सहयोग के थम राजा बणगे सो, अर थम साहूकार भी बण लिए सो, पर आच्छा तो यो होंदा के थम असलियत म्ह ए राजा बणे होन्दे, अर हम भी थारे गेल्या राज करदे। 9 परमेसवर नै हम प्रेरितां ताहीं सारया तै आखरी जगहां पै राख्या सै। हम उन माणसां की तरियां सां, जिनकी मौत का हुक्म हो लिया सै, क्यूँके हम सुर्गदूतां अर दुनिया के माणसां कै खात्तर एक तमाशा बणे सां। 10 माणस हमनै बेकूफ समझै सै, क्यूँके हम मसीह का प्रचार करया सां। थम या सोच्यों सों के थम अकलमंद सों, क्यूँके मसीह कै गैल थारा रिश्ता सै। भोत सारे माणस या सोच्यै सै के प्रेरित होण का म्हरे धोरै अधिकार कोनी, पर थम घमण्ड तै कहो सों, के थारे धोरै परमेसवर की शक्ति सै। माणस म्हारा न्ही थारा आदर करै सै। 11 हम आज तक भूक्खे-यासे मार खावां सां, अर पाट्टे-पुराणे लत्यां म्ह रहवां सां, अर ना ए म्हरे घर-बार सै। 12 अर अपणे ए हाथां तै काम करकै मेहनत करा सां। माणस म्हरै ताहीं बुका कहवै सै, हम आशीष देवां सां, वे सतावै सै, हम सहण करा सां। 13 वे बदनाम करै सै, हम प्यार तै बोल्ला सां। आज भी दुनिया के माणस म्हारा आदर कोनी करते, क्यूँके वे न्यू समझै सै के हम बेकार के माणस सां। 14 मै थमनै शर्मिन्दा करण कै खात्तर ये बात कोनी लिखदा, मेरा मकसद यो सै के मै थमनै सुधारु क्यूँके थम मेरे उन प्यारे बाल्कां की ढाल सों, जिनतै मै

प्यार करूँ सूँ। 15 जै मसीह म्ह थारे सिखाण आळे दस हजार भी होन्दे, तोभी थारे पिता धणे कोनी, क्यूँके मसीह यीशु म्ह थारे ताहीं सुसमाचार सुणाण कै कारण मै थारा पिता बणग्या। 16 मै थारे तै बिनती करूँ सूँ के मेरे जिसा जीवन जिझो। 17 इस करकै मन्नै तीमुथियुस ताहीं जो प्रभु म्ह मेरा प्यारा अर विश्वास कै जोगा बेट्टा सै, थारे धोरै भेज्या सै। वो थमनै मसीह यीशु म्ह मेरा चाल-चलण याद करवावैगा, जिस तरियां के हरेक जगहां मै हरेक कलीसिया म्ह उपदेश देऊँ सूँ। 18 थारे म्ह तै धणखेरे तो यो सोच्यै सै, के मै थमनै दुबारा मिलण कोनी आऊँगा, इस करकै वे घमण्डी होगे सै। 19 पर प्रभु नै चाह्या तो मै थारे धोरै तावला-ए आऊँगा, अर देख्यूंगा के ये घमण्डी माणस सिर्फ बणावटी बात करै सै, या इनकै धोरै परमेसवर की सामर्थ सै। 20 क्यूँके परमेसवर का राज्य बातां म्ह न्ही पर परमेसवर की सामर्थ के साथ जीन म्ह सै। 21 थम के चाहो सों, जो मै थारे गैल करूँ? जै थम अपणा बुरा सुभाव न्ही छोटीगे तो मै सखताई तै थारे गैल पेश आऊँ, अर जै बुरा सुभाव छोड़ द्योगे तो मै प्यार अर नरमाई तै थारे धोरै आऊँगा।

5 कई माणसां नै थारे बारें म्ह बताया सै, के कलीसिया म्ह कई माणस

सै जो जारी करै सै, बल्के इसी जारी जो अविश्वासी माणसां म्ह भी कोनी होन्दी, के एक माणस अपणी सौतेल्ली माँ गैल गलत सम्बन्ध राक्खै सै। 2 कलीसिया के माणसां नै इस बात तै दुखी अर उदास होणा चाहिए, जिननै इसा काम करया सै, उननै कलीसिया तै काढ देणा चाहिए, पर थम तो इसी बातां पै घमण्ड करो सों। 3 भलाए मै थारे तै दूर था, पर इसा मान्नो, जणु मै आत्मा म्ह थारे धोरै था, अर इसा पाप करण आळे माणस के बारै म्ह मेरा योए हुक्म सै। 4 थमनै यो करणा चाहिए, के जिब थम विश्वासी भाई कठै होंसों सों, तो यो याद राक्खों के यीशु मसीह का अधिकार थारे धोरै सै, अर इसा मान्नो जणु मै आत्मा म्ह थारे साथ सूँ। जिब परमेसवर का सामर्थ थारे साथ हो, 5 तब वो माणस जो पाप करण लागरया सै, उस ताहीं कलीसिया तै लिकाड द्यो, अर उस ताहीं शैतान के हाथ म्ह सौंप द्यो। ताके वो अपणे पापां खात्तर माफी माँग ले, अर वो आदमी माफी माँग ले सै, तो वो उस दिन बच जावैगा, जिस दिन प्रभु यीशु मसीह बोहड़कै आवैगा। 6 थारा घमण्ड करणा आच्छा कोनी, के थमनै न्ही बेरा के माड़ा-सा खमीर पूरे गुन्दे होए आटे ताहीं खमीर बणा देवै सै। उस्से तरियां जै एक माणस पाप करदा रहवै तो उस ताहीं देख्यै कै और माणस भी पाप करणा शरु कर देंगे। 7 जिस तरियां यहूदी माणस फसह का त्यौहार मनाण तै पैहले, अपणे घर तै खमीर काढ देवै सै, उस्से तरियां थम उस जार माणस नै अपणे टोळ म्ह तै लिकाड द्यो, तो थम वो विश्वासियाँ का टोळ बण जाओगे, जिन म्ह कोए भी जाण-बुझा के पाप करणा आळा न्ही होगा, अर परमेसवर थारे मन नै भित्र तै साफ करैगा, जै थम मसीह पै विश्वास करोगे, क्यूँके मसीह म्हरे खात्तर मरया ताके हमनै पापां तै आजाद करदे, वो उस भेड़ की ढाल सै, जिस ताहीं यहूदी लोग फसह के त्यौहार पै बलिदान करै सै। 8 तो आओ, हम फसह का त्यौहार मनावां, ना तो पुराणे खमीर तै,

ना बुराई अर दुष्टता कै खमीर तै, बल्के खराई अर सच्चाई की अखमीरी रोट्ठी तै। जिसका मतलब यो सै, के जिस तरियां थम बिश्वासी बणण तै पैहले जिओ थे, उस तरियां जीणा छोड़कै मसीह कै पाच्छै चालणा शस कर द्यो, ताके थारे मानं म्ह कोए बुराई ना रह पावै। 9 मनै अपणी पैहले की चिट्ठी म्ह यो लिख्या था, के जारी करणीया की संगति ना करियो। 10 मेरा मतलब यो कोनी, के थम जमाए इस दुनिया के जारी, लालची, अन्धेर या मूर्तिपूजा करण आळे माणसां तै कोए सम्बन्ध ना राखियों, क्यूँकै इस तरियां के माणसां तै बचण खात्तर तो थमनै दुनिया ए छोडीणी पड़ेगी। 11 पर मेरा कहणा यो सै के जै कोए भाई बिश्वासी कुहाकै, जार, लालची, मूर्तिपूजा करणीये, गाळी देण आळा, दारुबाज, या अन्धेर करणीया हो, तो उसकी संगति मतना करियो, बल्के इसे माणस कै गेल्या खाणा भी ना खाईयों। 12 अबिश्वासी माणसां का न्याय भला मै क्यूँ कहूँ? मनै दुसरायां तै के काम? पर या जिम्मेदारी थारी सै के थम उनकी बरीकी तै जाँच करो, जो कलीसिया म्ह सै। 13 जिसा के पवित्र ग्रन्थ कहवै सै, के अबिश्वासी माणसां का न्याय परमेसवर करै सै। ज्यातै उस बुरे काम करणीये ताहीं अपणे बिचाळै तै लिकाड द्यो।

6 जै थारे म्ह किसे का दुसरे बिश्वासी गैल झगडा हो जावै, तो अपणा

फैसला परमेसवर के पवित्र माणसां कै धोरै ले जाओ, ना के उस न्यायाधीश कै धोरै जो के अबिश्वासी सै। 2 के थमनै बेरा कोनी के दुनिया का न्याय पवित्र माणस करैयों? ज्यांतै जिब थमनै दुनिया के माणसां का न्याय करणा सै, तो के थम छोट्या तै छोटे झगड्या का भी फैसला करण जोगे कोनी? 3 के थमनै न्ही बेरा के हम सुर्गदूतां का न्याय करांगे? तो उसकी बराबरी म्ह ये दुनियावी झगडे के सै? 4 जै थारे बीच दुनियावी झगडे सै, तो फैसला करण खात्तर उननै ए बिठाओगे, जो कलीसिया म्ह किसे कोनी समझे जावै सै? 5 मै थमनै शर्मिन्दा करण कै खात्तर न्यू कहूँ सूँ। के साच्चए थारे म्ह एक भी अकलमंद न्ही मिलदा, जो अपणे बिश्वासी भाईयाँ के बीच होए झगडे नै सुलझा सकै? 6 पर याडै तो एक बिश्वासी भाई दुसरे बिश्वासी भाई नै कचेहडी म्ह घसीटै सै, अर वो भी अबिश्वासी माणसां कै स्याही। 7 पर सच म्ह ए थारे म्ह मुकदमे चाल्लण लागे सै, तो थम मसीह के माणस कोनी, इसकी बजाए थम खुद ए अन्याय अर अपणा नुकसान क्यांतै न्ही सहदेद? 8 पर थम तो खुदे अन्याय करो सौं, अर नुकसान पोहोचाओ सौ, अर वो भी दुसरे बिश्वासी भाईयाँ ताहीं। 9 के थमनै न्ही बेरा के जुल्मी माणस परमेसवर के राज्य के वारिस न्ही होवै? धोक्खा ना खाओ, बेश्या कै धोरै जाणीए, मूर्ति पूजायीये, बिगान्नी लुगाई कै धोरै जाणीए, लुच्चे, माणसां कै गेल्या कुकर्म करणीये, 10 चोर, लालची, दारुबाज, गाळी देणीये अर अन्धेर करणीये परमेसवर कै राज्य के वारिस न्ही होवैयों। 11 अर थारे म्ह तै कई इसेए थे, पर प्रभु यीशु मसीह कै नाम तै अर म्हारे परमेसवर के आत्मा तै थारे पाप धोए गये, अर पवित्र अर धर्मी बणे। 12 थम कह सको सौं, के मै कुछ भी करण खात्तर आजाद सूँ, पर मै कहूँ सूँ, के सारी चीज मेरे फायदे की कोनी, जिब के मै सब कुछ कर

सकूँ सूँ, पर मै किसे चीज का गुलाम कोनी। 13 थम कह सको सौं, के “खाणा पेट कै खात्तर, अर पेट खाणे कै खात्तर सै,” यो सच सै, पर परमेसवर पेट अर खाणे नै दोनुआ ताहीं नाश करैगा। उससे तरियां देह जारी कै खात्तर कोनी, बल्के प्रभु की महिमा खात्तर सै, अर प्रभु देह का रुखालिया सै। 14 इसरे तरियां म्हारी देह भी महत्वपूर्ण सै, क्यूँकै जिस तरियां परमेसवर नै अपणी सामर्थ तै प्रभु यीशु ताहीं जिन्दा करया, अर वो म्हारै ताहीं भी जिन्दा करैगा। 15 के थमनै बेरा सै के थारी देह मसीह का अंग सै? तो के मै मसीह के अंग लेकै उन ताहीं बेश्या के संग जोड द्यूँ? कदे भी न्ही। 16 के थमनै न्ही बेरा के जो कोए बेश्या तै संगति करै सै, वो उसकै गेल्या एक तन हो जावै सै, क्यूँकै पवित्र ग्रन्थ म्ह लिख्या सै, “वे दोन्ह एक तन होवैयों” 17 अर जो प्रभु की संगति म्ह रहवै सै, उसकी अर परमेसवर की आत्मा एक हो जावै सै। 18 जारी तै बचे रहो। और दुसरा कोए पाप म्हारे देह पै असर कोनी गेरे जितना के जारी, पर जारी करणीया अपणी ए देह कै खिलाफ पाप करै सै। 19 के थमनै न्ही बेरा के थारी देह पवित्र आत्मा का मन्दर सै, जो थारे म्ह बस्य होया सै, अर थारे ताहीं परमेसवर की ओड तै मिल्या सै, अर थम परमेसवर के सौ। 20 क्यूँकै थम दाम देकै मोल लिये गये सौ, ज्यातै अपणी देह कै जरिये परमेसवर की महिमा करो।

7 उन बातां कै बारै म्ह जो थमनै मेरे ताहीं चिट्ठी म्ह पृच्छी थी, के यो

ठीक सै, के माणस ब्याह ना करै। 2 क्यूँकै भोत सारे माणस जारी करै सै, इस करकै हरेक माणस जारी तै बचण खात्तर ब्याह करले, अर धर्मी-बीर एक-दुसरे के प्रति वफादार हो। 3 पति अपणी पत्नी की शारीरिक इच्छा पूरी करै, अर उस्से तरियां ए पत्नी भी अपणे पति की शारीरिक इच्छा पूरी करै। 4 पत्नी का अपणी देह पै हक कोन्या पर उसकै पति का हक सै, उस्से तरियां ए पति नै भी अपणी देह पै हक कोनी, पर पत्नी का सै। 5 थम एक-दुसरे तै न्यारे ना रहो, पर सिर्फ कुछ बखत खात्तर आपपस म्ह सलाह करकै प्रार्थना कै खात्तर बखत लिकाडे, अर फेर एक साथ रहो, इसा ना हो के थारे असंयम कै कारण शैतान थमनै इम्तिहान म्ह फँसा ले। 6 पर मेरा यो सुझाव सै, ना के आज्ञा। 7 मेरा तो यो सुझाव सै, के जिसा मै अकेल्ला सूँ उस्से तरियां ए सारे माणस भी अकेल्ले रहै। हरेक माणस ताहीं परमेसवर की ओड तै एक तरियां का उपहार मिला सै, किसे ताहीं ब्याह का, अर किसे ताहीं एकला रहण का। 8 अविवाहिता अर बिधवायां कै बारै म्ह मेरी या सलाह सै, के उनके खात्तर एकला रहणा ठीक सै, जिसा मै सूँ। 9 पर जै वे खुद पै काब्बू ना राख सकै, तो ब्याह करै, क्यूँकै ब्याह करणा वासना म्ह जलण तै भला सै। 10 जिनका ब्याह होया सै, उन ताहीं मै न्ही, बल्के प्रभु यीशु हुक्म देवै सै, के पत्नी अपणे पति तै तलाक ना देवै 11 जै तलाक हो भी जावै, तो पत्नी बिना दुसरा ब्याह करे रहवै, या पत्नी अपणे पति तै दुबारा मेल कर लेवै, अर पति अपणी पत्नी नै तलाक ना देवै। 12 दुसरायां तै, प्रभु यीशु मसीह न्ही पर मै ए कहूँ सूँ, जै किसे भाई

की पत्ती विश्वास ना राखदी हो अर उसकै गेल्या रहण म्ह राज्जी हो, तो वो उस ताहीं तलाक ना देवै। 13 जिस बिरबान्नी का धणी विश्वास ना राखदा हो, अर उसकै गेल्या रहण म्ह राज्जी हो, तो वा धणी नै तलाक ना देवै। 14 विश्वासी पत्ती होण के कारण अविश्वासी पति ताहीं भी परमेसवर अपणे ए लोग मान्नै सै, क्यूँके उसकी पत्ती विश्वासी सै, इस्रो तरियां जै विश्वासी पति हो तो उसके कारण अविश्वासी पत्ती ताहीं भी परमेसवर अपणे ए लोग मान्नै सै, क्यूँके उसका पति विश्वासी सै, जै यो सच न्ही होन्दा तो थारा अविश्वासी पति या पत्ती परमेसवर के न्ही कुहान्दे, अर थारे बाळ-बच्चे भी परमेसवर के न्ही कुहान्दे, पर इब वे परमेसवर के कुहावै सै। 15 पर जो माणस विश्वास कोनी राखदा, अर जै वो तलाक देण चाहवै, तो उस ताहीं तलाक देण द्यो, इसी दशा म्ह विश्वासी भाई या भाण ब्याह के बन्धन तै आजाद हो जावै सै। क्यूँके परमेसवर नै म्हारै ताहीं मेळ-मिलाप कै खात्तर बुलाया सै। 16 क्यूँके हे बिरबान्नी, तू के जाणै सै के तू अपणे धणी का उद्धार करा लेवैरी? अर हे भले माणस, तू के जाणै सै के तू अपणी पत्ती का उद्धार करा लेवैरा? 17 परमेसवर नै जिस ताहीं जिस दशा म्ह राख्या सै, अर जिस रूप म्ह मसीह पै विश्वास करण खात्तर बुलाया सै, वो उस्से म्ह बंधा रहवै। मै सारी कलीसियां ताहीं योए सुझाव देऊँ सूँ। 18 जो यहूदी माणस परमेसवर पै विश्वास करै सै, उस ताहीं खतने के निशान नै हटाण की जरूरत कोनी, अर जो गैर यहूदी माणस परमेसवर पै विश्वास करै सै, उस ताहीं खतना करवाण की जरूरत कोनी। 19 इस बात तै कोए फर्क न्ही पडता के किसे माणस का खतना होया सै या कोनी होया, पर सब तै जरूरी बात या सै, के वो परमेसवर के हुकमां नै मान्नै। 20 हरेक माणस मसीह बणण तै पैहले जिस हालत म्ह बुलाया गया हो, उस्से हालत म्ह रहवै। 21 जै तू गुलाम की हालत म्ह बुलाया गया सै, तो फिक्र ना करै, पर जै तू आजाद हो सैके, तो तू आजाद होण की कोशिश कर। 22 क्यूँके जो दास की हालत म्ह मसीह पै विश्वास करण खात्तर बुलाया गया सै, वो मसीह का आजाद करया होया सै। उस्से तरियां ए जो आजादी की हालत म्ह बुलाया गया सै, वो मसीह का दास सै। 23 परमेसवर नै थम दाम देकै मोल लिये हो, इस करकै थम माणसां के दास न्ही, पर परमेसवर के दास बणो। 24 मै दुबारा तै कहूँ सूँ हे विश्वासी भाईयो, मसीह पै विश्वास करण तै पैहले थम जिस हालत म्ह बुलाये गये थे, विवाहित या अविवाहित उस्से हालत म्ह परमेसवर कै गेल्या रहों। 25 अविवाहितां कै बारै म्ह प्रभु का कोए हुकम मन्नै कोनी मिल्या, पर प्रभु नै दया करकै मेरे ताहीं बुद्धि दी सै, जिसपै भरोस्सा करया जा सकै सै, अर मै थमनै सलाह देऊँ सूँ। 26 मेरी समझ म्ह यो ठीक सै के आजकाल के कळेश कै कारण, जै माणस कुवारा सै, तो वो कुवारा ए रहवै। 27 जै तेरी पत्ती सै, तो उसनै तलाक देण की कोशिश ना करै, अर जै तेरे पत्ती कोन्या, तो अपणे खात्तर उसनै टोहवै ना। 28 पर जै तू ब्याह भी करै, तो पाप कोनी, अर जै कोए कुवारी छोरी ब्याह करै सै, तो यो कोए पाप कोनी। हालाकि शादीशुदा माणस इस

दुनिया म्ह भोत सी परेशानियाँ का सामना करैंगे, अर मै चाहूँ सूँ के थम इन परेशानियाँ म्ह ना पडो। 29 हे विश्वासी भाईयो, मेरा मतलब यो सै के मसीह के आण का बखत थोडा ए बाककी रह गया सै, इस करकै आज तै या चिन्ता ना करो के थारी पत्ती सै या न्ही, पर परमेसवर की सेवा म्ह लाग्ये रहों। 30 रोण आळे, अनन्द करण आळे, अर चिज्जां नै मोल लेण आळे इन चिज्जां के बारें म्ह घणा ना सोच्यै, क्यूँके इन सारी बातां की फिक्र थमनै परमेसवर की सेवा तै भटका देवैगी। 31 जो भी इस दुनिया म्ह सै, उननै अपणे खात्तर ज्यादा कीमती ना समझों, क्यूँके दुनिया की सारी चीज नाश हो जावैगी। 32 मेरी इच्छा या सै के थम संसारिक जिन्दगी की अभिलाषा तै मुक्त रहों। कुँवरे माणस प्रभु की सेवा करण की फिक्र म्ह रहवै सै के प्रभु ताहीं किस तरियां खुश करै। 33 पर ब्याहाता माणस दुनिया की चिज्जां की फिक्र म्ह रहवै सै, के अपणी पत्ती नै किस तरियां तै खुश करै। 34 कुँवारी अर ब्याहाता बिरबान्नी म्ह भी फर्क सै, कुँवारी बिरबान्नी प्रभु की सेवा की फिक्र म्ह रहवै सै, अर वा देह अर आत्मा म्ह पवित्र रहण की कोशिश कर दी रहवै सै, पर ब्याहाता बिरबान्नी दो बातां की फिक्र म्ह रहवै सै, के अपणे पति नै किस तरियां खुश राक्खूँ, अर परमेसवर नै किस तरियां खुश राक्खूँ। 35 मै या बात थारी ए भलाई खात्तर कहूँ सूँ ना के थमनै फसाण के मारे, बल्के ज्यातै के जिसा शोभा देवै सै, उसाए करया जावै, के थम एक चित्त होके प्रभु की सेवा म्ह लाग्ये रहो। 36 जै किसे पिता नै यो लाग्यै के मै अपणी कुँवारी बेटी के ब्याह म्ह देर करकै उसकै गैल अन्याय करूँ सूँ, क्यूँके उसकै उग्र ढलण लागरी सै, तो वो वोए करै जो उसनै ठीक लाग्यै सै, वो उसनै ब्याह करण दे, यो कोए पाप कोनी। 37 पर जिस पिता नै मन म्ह यो ठान लिया सै, के वो अपणी छोरी का ब्याह कोनी करै, तो उस ताहीं कोए उसका ब्याह करण खात्तर मजबूर ना करै, यो उसका हक सै जो वो चाहवै वोए करै, अर वो अपणी छोरी नै कुवारी ए राक्ख सकै सै। 38 ज्यातै जो अपणी कुवारी छोरी का ब्याह कर देवै सै, तो वो सही करै सै, अर जो ब्याह न्ही करदा, वो और भी सही करै सै। 39 बिरबान्नी जिब ताहीं धणी कै गैल बंधी रहवै सै, जिब ताहीं के उसका धणी जिन्दा सै, पर जै उसका धणी मर जावै तो जिसतै चाहवै वा ब्याह कर सकै सै, पर वो परमेसवर पै विश्वास करण आळा हो। 40 पर जै वो दुबारा ब्याह ना करै, तो मेरे विचार म्ह और भी ज्यादा सुखी सै, अर मै समझूँ सूँ के परमेसवर का आत्मा मेरी अगुवाई करै सै।

8 थारी चिठ्ठियाँ म्ह मूर्तियाँ के आगै चढाई होड़ चिज्जां कै खाण के बारै म्ह थमनै पूछा था। हम सारया नै इस बात के बारें म्ह कुछ ज्ञान सै। ज्ञान म्हरे म्ह घमण्ड पैदा करै सै, पर प्यार तै बढ़ातरी होवै सै, अर प्यार म्हरे ताहीं दुसरयां की मदद करणा सिखवै सै। 2 जै कोए समझौँ सै के वो सब कुछ जाणै सै, तो वो इब ताहीं यो कोनी जाणता के किस तरियां जाणणा चाहिये। 3 पर जै कोए परमेसवर तै प्यार करै सै, तो परमेसवर भी उस ताहीं जाणै सै। 4 मूर्तियाँ कै स्याम्ही बलि करी होई चिज्जां कै खाण कै बारै म्ह हम जाणा सां, के दुनिया म्ह कोए भी मूर्ति

सच्चा परमेसवर कोनी, क्यूँके एकैए सच्चा परमेसवर सै। 5 फेर भी धरती अर अकास पै भोत सै, जिन ताहीं लोग ईश्वर अर देवता कहवै सै, पर म्हारे खात्तर तो एकैए परमेसवर सै। यानिके पिता जिसकी ओड़तै सारी चीज सै, अर हम उस्से कै खात्तर सां। एकैए प्रभु सै, यानिके पीथू मसीह जिसकै जिरिये सारी चीज बणाई गई, अर हम भी उस्से कै जिरिये जिन्दे सां। 7 पर म्हारे कुछ विश्वासी भाईयाँ नै इब ताहीं बेरा कोनी के मूर्तियाँ म्ह कोए शक्ति कोनी। क्यूँके वे पैहले मूर्तियाँ की पूजा करै थे, जिब वे मूर्तियाँ ताहीं दी गई बलि म्ह तै खावै सै, तो गलती तै इब भी मूर्तियाँ की पूजा करण म्ह शामिल सै, अर गलती तै सोच्चै सै के उननै पाप कर दिया जिब वे मूर्ति के स्याम्ही ढाईदी चीज खा लेवै सै। 8 खाणा हमनै परमेसवर कै लोवै कोनी पोहोचान्दा। खाण तै इन्कार करण तै परमेसवर म्हारे तै खुश न्ही होन्दा, अर ना ए खाणा म्हारे ताहीं परमेसवर की निगांह म्ह आच्छा बणादा। 9 पर सावधान! इसा ना होवै के थारी या आजादी कदे विश्वास म्ह कमजोर लोगां खात्तर ठोक्कर का कारण हो जावै। 10 थम जाणो सों के मूर्त असली देवता कोनी, अर थम मूरतं के मन्दर म्ह खाओ सों, पर जो विश्वास म्ह कमजोर आदमी थारे ताहीं ओड़े खान्दे देक्खै सै तो वो उत्साहित होवैगा, ताके मूर्ति के स्याम्ही बलि करया गया माँस वो खावै, जिब के उस ताहीं बेरा सै कै यो पाप सै, जै वो इसा काम करै सै। 11 इस तरियां तै तेरे ज्ञान कै कारण वो विश्वास म्ह कमजोर भाई जिसकै खात्तर मसीह मरया, मसीह म्ह विश्वास करणा छोड़ देवैगा। 12 इस तरियां तै विश्वासी भाईयाँ कै खिलाफ अपराध करण तै अर उनकी कमजोर अन्तरात्मा ताहीं चोट पोहोचाण तै, थम मसीह कै खिलाफ अपराध करो सो। 13 इस कारण जै मूर्तियाँ ताहीं दिया गया खाणा खाण तै दुसरे विश्वासियाँ खात्तर विश्वास छोड़ण का कारण बणै सै, तो मै उस तरियां का खाणा कदे न्ही खाऊँगा ताके दुसरे विश्वासी भाई विश्वास करणा ना छोड़ दे। (aiōn g165)

9 जो मै चाहूँ सूँ, वो सब कुछ करण खात्तर मै आजाद सूँ, मै प्रेरित सूँ। मन्ने म्हारे प्रभु यीशु ताहीं देख्या सै, थम प्रभु एह मेरी मेहनत का ईनाम सों। 2 जै दुसरे माणस या न्ही मानतो के मै प्रभु यीशु का प्रेरित सूँ, तो भाईयो थमनै विश्वास करणा होगा, क्यूँके मै वो सूँ जो थारे धोरे सुसमाचार लेकै आया। थारा प्रभु यीशु मसीह म्ह विश्वास यो बतावै सै के मै प्रेरित सूँ। 3 जो माणस मेरे प्रेरित होण पै शक करै सै, उनकै खात्तर योए मेरा जवाब सै। 4 बरनबास अर मेरे खात्तर, प्रेरित होण कै कारण म्हारे ताहीं यो हक सै, के हम अपणे काम कै खात्तर थारे तै आर्थिक मदद ले सका सां। 5 के हमनै यो हक कोनी, के किसे मसीह भाण कै गेल्या ब्याह करकै उस ताहीं अपणे गैल सफर म्ह लेकै जावां, जिसा दुसरे प्रेरित अर प्रभु का भाई याकूब, यहूदा अर पतरस करै सै। 6 मेरै अर बरनबास कै धोरै भी यो हक सै, के हम और प्रेरितां के स्याम्ही आर्थिक मदद हासिल करां अर म्हारे ताहीं जीण खात्तर कोए काम करण की जरूरत कोनी। 7 कोण सा फोज्जी अपणे खर्च तै जंग लड़े सै? कौण अंगूर का बाग लगाकै उसका फल न्ही खान्दा? कौण भेड़ुं की

रुखाळी करकै उनका दूध कोनी पीन्दा? 8 मै इन बात्तां नै सिर्फ माणस होण के नाते कोनी कहन्दा। मूसा नबी के नियम-कायदे भी योए कहवै सै, क्यूँके मूसा नबी के नियम-कायदे म्ह लिख्या सै, “नाज लिकाड़ते बखत चाल्दे होए बल्ध का मुँह ना बाँधियो।” के परमेसवर बल्धां की ए फिक्र करै सै? 10 यो खास कैकै म्हारे खात्तर कद्या गया सै, हाँ, म्हारे खात्तर ए लिख्या गया सै, क्यूँके यो ज़स्ती सै, के खेत बाहण आळा अर खिलाहां म्ह, भूसी तै नाज अलग करण आळा फसल का कुछ हिस्सा पाण खात्तर तो आस राक्खै ए गा। 11 हमनै परमेसवर के सुसमाचार का प्रचार थारे बीच म्ह करया। उस माणस की ढळ जो पौधे लगावै सै, हमनै थारे भित्तर परमेसवर के सन्देस ताहीं लगाया सै। इस करकै यो म्हारा हक सै, के म्हारी आर्थिक जरूरतां कै खात्तर हम थारी मदद हासिल करां। 12 थमनै दुसरे माणसां की भी आर्थिक मदद करी, जिननै थारे ताहीं सुसमाचार सुणाया था, बरनबास अर मै उनते भी ज्यादा आर्थिक मदद पाण का हक राक्खां सां, हालाकि, म्हारे म्ह तै किसे नै भी जोर कोनी दिया के थम उन चिज्जां नै द्यो जिनकी हमनै जरूरत सै। बल्के हम सब कुछ सहण खात्तर तैयार सां, ताके हम किसे ताहीं भी मसीह के बारे म्ह सुसमाचार पै विश्वास करण म्ह अड़नन पैदा ना करा। 13 के थमनै न्ही बेरा के जो मन्दर म्ह काम करण आळे सै, वे मन्दर म्ह तै खाणा खावै सै? पर जो वेदी पै बति चढ़ावै सै वे बलिदानां का हिस्सा लेवै सै? 14 इससे तरियां तै प्रभु नै भी ठहराया के जो माणस सुसमाचार सुणावै सै, उनकी जिन्दगी का गुजारा उन माणसां तै होणा चाहिए जो सुसमाचार सुणै सै। 15 पर मन्ने इन म्ह तै किसे भी अधिकार का इस्तमाल कोनी करया, अर ना ए मै इस मकसद तै लिख्यूँ सूँ, के मेरै खात्तर इसा कुछ करया जावै। बजाये इसकै, के कोए मन्नै, मेरी इस बात के गर्व तै अलग करै। इसतै आच्छा मै मर जाणा समझूँगा। 16 जै मै सुसमाचार सुणाऊँ, तो इस म्ह मन्ने गर्व करण का कोए हक कोनी। या तो मेरै ताहीं सौष्ठी गई जिम्मेदारी सै। जै मै सुसमाचार न्ही सुणाऊँ, तो मेरै पै धिक्कार सै! 17 जै मै यो काम करूँ सूँ, जो मन्ने अपणी मर्जी तै चुण्या सै, तो मेरे ताहीं एक ईनाम मिलैगा, अर जै या मेरी अपणी मर्जी कोनी, पर एक जिम्मेदारी सै, जो मेरे ताहीं परमेसवर की ओड़तै मिली सै, तो मै किसे भी ईनाम की उम्मीद न्ही कर सकता। 18 तो मेरी कौनी सी मजदूरी सै? या मेरी खुशी सै, के बिना भुगतान के मै सुसमाचार का प्रचार करण लागरया सूँ, मेरै धोरै खर्चा मांगण का भी हक सै। 19 इसका मतलब यो कोनी के मै माणसां का कहणा मानूँ, भलाए वे लोग मेरी आर्थिक मदद करै सै, पर मै इसकै खात्तर मजबूर कोनी, फेर भी मै होरक किसे का दास बाणग्या सूँ, ताके उन ताहीं मसीह कै धोरै ल्या सकूँ। 20 जिब मै यहूदी नियम-कायदा नै माणन आळा था, तो मै भी उन नियम-कायदा के अधीन था, मै यहूदी माणसां कै खात्तर यहूदी बण्या, ताके यहूदी माणसां नै परमेसवर कै धोरै ले आऊँ। भलाए मेरे ताहीं नियम-कायदे माणन की जरूरत कोनी, फेर भी मन्ने इसा करया, ताके मै उन ताहीं मसीह कै धोरै ल्या सकूँ जो नियम-कायदा के अधीन सै।

21 इस्से तरियां जिब मै गैर यहूदी माणसां कै गैल काम करूँ सूँ, तो मै एक गैर यहूदी की तरियां रहूँ सूँ, जो यहूदी नियम-कायदा नै कोनी मानते, ताके मै उन ताहीं मसीह खात्तर जीत सकूँ। पर मन्ने बेरा था के मै परमेसवर के नियम-कायदा के बिना न्हीं रहूँ था, क्यूँके मै मसीह के नियम-कायदा के अधीन सूँ। 22 जिब मै उन माणसां के गैल सूँ जिनका विश्वास कमजोर सै, तो मै उनकी तरियां बरताव करूँ सूँ, ताके मेरी कोशिश के जरिये कुछ माणसां का उद्धार हो जावै। 23 मै यो सब कुछ सुसमाचार के खात्तर करूँ सूँ ताके उन आशीषां का हिस्सेदार बण सूँ जिनका बादा सुसमाचार मृं करया गया सै। 24 के थमनै न्हीं बेरा के दौड़ मृं तो भाज्जै सारे ए सै, पर ईनाम एक ए ले जावै सै? इस्से तरियां, हम सब नै वो करणा चाहिए जो हम परमेसवर ताहीं खुश करण के खात्तर कर सका सां ताके हम उस ईनाम नै पा सका जो परमेसवर आण आळे बखत मृं देवैगा। 25 हरेक खिलाड़ी जो प्रतियोगिता मृं भाग लैवै सै, कठोर संयम का पालन करै सै। वे तो एक (नाशवान) नाश होण आळे मुकुट नै पाण कै मकसद तै यो सब करै सै, पर हम यो सब कुछ (अविनाशी) नाश ना होण आळे मुकुट नै पाण खात्तर करां सां। 26 इस करकै जिसा दौड़ण आळा अपणे मकसद कै गैल दौड़ै सै, अर जिस तरियां मुक्केबाज अपणे मुक्कयां नै अपणे अधीन राक्खै सै, उस्से तरियां मै भी अपणी मसीह जिन्दगी नै एक मकसद कै गैल जीण लागरया सूँ। 27 मै अपणी देह नै मसीह के अधीन राक्खै सूँ, ताके मै अपणी बुरी इच्छा नै पूरी ना करूँ, मै जो दुसरे माणसां खात्तर सुसमाचार का प्रचार करण लाग रह्या सूँ, अर मै खुद ईनाम कै खात्तर अयोग्य करार हो जाऊँ।

10 हे विश्वासी भाईयो, मै न्हीं चाहन्दा के थम इस बात तै अनजाण रहो के म्हारे सारे पूर्वजां कै गैल जंगल-बियाबान मृं के होया। परमेसवर नै उन सारया की एक बाद्दल कै जरिये अगुवाई करी, जो उनकै आगै-आगै चाल्लै था, अर उन ताहीं लाल समुन्दर कै बिचालै तै इस तरियां तै पार लेया, जिस तरियां सुखी धरती पै ले जाया गया हो। 2 मूसा नबी कै पाढ़ै चाल्लण के कारण, उन सारया नै बाद्दल मृं अर समुन्दर मृं बपतिस्मा ले लिया था। 3 उन सारया नै वो खाणा खाया जो परमेसवर नै सुर्ग तै दिया था। 4 उननै वो पाणी पिया जो पत्थर की चट्टान तै लिकड़ाया था, पत्थर की चट्टान की तुलना हम मसीह कै गैल कर सका सां, जो उनकै गैल चाल्लै था, अर उन ताहीं जीवन देवै था। 5 पर परमेसवर उन मृं तै घणखरयां तै राज्जी कोन्या होया, ज्यांतै वे जंगल-बियाबान मृं ढेर होये। 6 ये बात म्हारै ताहीं चेतावनी के रूप मृं दी सै, ताके हम बुरे कामां की लालसा ना करां। 7 अर ना थम मूर्ति पूजारीये बणो, जिस तरियां के उन मृं तै कितने बणो थे, जिसा पवित्र ग्रन्थ मृं लिख्या सै, “लोग एक दावत मृं खाण-पीण नै बेठे, अर फेर भोगविलास के काम करण खात्तर उठगे।” 8 अर ना हम जारी करा, जिसा उन मृं तै कितन्याँ नै करी, अर एक दिन मृं तेर्ईस हजार मरग्ये। 9 अर ना हम प्रभु नै परखां, जिसा उन मृं कितन्याँ नै करया, अर साँपां

कै जरिये मरगे। 10 अर ना थम कुड़कुड़ाओ, जिस तरियां तै उन मृं कितने कुड़कुड़ाए, अर नाश करण आळे सुर्गदूतां कै जरिये मरे गये। 11 पर ये सरी बात, जो उनपै आण पड़ी, चेतावनी की तरियां थी, वे म्हारी चेतावनी कै खात्तर जो दुनिया के आखरी बखत मृं रहवै सै, लिक्खी गई रो। (aön g165) 12 इस करकै जै कोए इसा माणस सै जो कहन्दा हो, के परमेसवर पै उसका भरोस्सा अटूट सै, तो उसनै सावधान रहणा चाहिए, के वो चाणचक किसे इम्तिहान मृं ना पड़ जावै अर वो पाप ना कर बेट्टै। 13 पाप करण की इच्छा पक्की हम सब कै धोरै आवै सै। पर परमेसवर सच्चा अर विश्वास लायक सै, वो थमनै सार्थतै बाहर इम्तिहान मृं कोनी गेरैगा, जो माणस कै सहण तै बाहरणै सै, बल्के वो थमनै शक्ति देवैगा के थम पाप ना करो। 14 इस कारण, हे मेरे व्यारे दोस्तों, मूर्तिपूजा तै बचे रहो। 15 मै अकलमंद जाणकै थारे तै कहूँ सूँ, जो मै कहूँ सूँ, उसकै बारें मृं सोच्यों के वो सही सै या गलत। 16 जिब हम उसके कटोरे मृं तै (अंगूर का रस) पीवां सां, जिस ताहीं हम प्रभु भोज मृं इस्तमाल करां सां, जिसकै खात्तर हम परमेसवर का धन्यवाद करा सां, हम असलियत मृं मसीह के लहू मृं साझी होण लागरे सां, अर जिब हम रोटी तोड़ा सां अर इस ताहीं खावां सां, तो हम असलियत मृं मसीह के देह मृं साझा करण लागरे सां। 17 जिब के सिर्फ एकैरे रोटी सै, जो मसीह सै, भलाए हम घणे सां, फेर भी हम एक देह बण जावां सां, क्यूँके हम सब एक रोटी मृं तै ए खावां सां। 18 इसाएल के माणसां के बारें मृं सोच्यों, जिब वे सारे माणस खावै सै, जो परमेसवर ताहीं चढ़ाया जावै सै, उसतै वे परमेसवर की आराधना मृं शामिल हो जावै सै, इस्से तरियां जो वो खाणा खावै सै, जो मूर्ति कै आगै चढ़ाया जावै सै, तो वो भी मूर्ति की आराधना मृं शामिल होवै सै, 19 मेरे कहण का मतलब के सै? यो सै के मूर्ति असलियत मृं देवता सै, जिनकै खात्तर बलिदान करे जावै सै अर के इस बलिदान की कोए अहमियत सै? 20 न्हीं, बल्के जो माणस मूर्तियाँ नै बलिदान करै सै, वे परमेसवर कै खात्तर न्हीं पर ओपरी आत्मायाँ कै खात्तर बलिदान करै सै, अर मै न्हीं चाहन्दा के थम ओपरी आत्मायाँ कै गैल-साइक्ली होवो। 21 यो थारे खात्तर ठीक कोनी के, थम वो खाओ अर पीओ सौं, जो ओपरी आत्मायाँ ताहीं चढ़ाया जावै सै, अर वो भी खाओ अर पीओ सौं, जो हमनै प्रभु की मौत की याद दुवावै सै। 22 जै हम इसा करां सां, तो हम परमेसवर नै घणा गुस्सा दुवावां सां, अर हम परमेसवर तै घणे ताकतवर कोनी। 23 हम सब कुछ करण खात्तर आजाद सां, हम कहवां सां, हाँ, पर सब कुछ म्हारे विश्वास नै कोनी बढ़ाते। 24 कोए अपणी ए भलाई नै न्हीं, बल्के औरां की भलाई के बारें मृं सोच्यों। 25 हालाकि जिब थम कस्साइयाँ धोरै माँस लेण खात्तर बजारां मृं जाओ सौं, तो उनतै या ना पूछो, के यो मूर्तियाँ कै आगै चढ़ाया गया सै या न्हीं, अर इसतै थारी अन्तरात्मा भी दुखी न्हीं होगी। 26 थम इस करकै खा सको सौं क्यूँके पवित्र ग्रन्थ कहवै सै, “क्यूँके धरती अर धरती पै जो कुछ भी सै सब कुछ प्रभु का सै।” 27 जै

अविश्वासियाँ मह तै कोए थमनै न्योदा देवै, अर थम खाण खात्तर जाणा चाहो, तो जो किमे थारे स्याही धरया जावै वो खा ल्यो, अर थमनै यो न्ही पूछणा चाहिए, के यो चढ़ावा सै या न्ही, ताके चढ़ावा हो तो थम खुद नै दोषी महसूस कोनी करोगे। 28 पर जै कोए थारे तै कहै, “यो खाणा तो मूर्ति ताहीं बलि करया गया था,” तो इस ताहीं अपणी अन्तरात्मा के कारण न्ही, बल्के थमनै बताण आळे माणस की अन्तरात्मा के कारण इसनै ना खाओ। 29 मै थारी अन्तरात्मा के बारें मह न्ही, पर उस बताण आळे माणस की अन्तरात्मा बारें मह कहूँ सू। जै थम खाण की आजादी पै जोर देओ सों, अर दुसरे माणस नै लाग्नै सै के यो पाप सै, तो उसका के फायदा सै? कुछ भी तो कोनी। 30 जै मै मूर्तियाँ कै आगै चडाई होए चीज ताहीं धन्यवाद करके खाणे मह शामिल होऊँ सूं, तो उसकै खात्तर मेरे पै दोष क्यूँ लगाया जावै सै, जिसके खाणे खात्तर मनै परमेसवर के प्रति धन्यवाद जाहिर करया? 31 सारी बातां का नियोड़ यो सै के थम चाहे खाओ, चाहे पीओ, चाहे जो किमे करो, सारा किमे परमेसवर की महिमा कै खात्तर करो। 32 मै जो कुछ भी करूँ सूं, हरेक ताहीं खुश करण की कोशिश करूँ सूं, अपणे-आप का भला कोनी सोचदा, बल्के सबके भले कै खात्तर सोच्चु सूं, ताके वो बचाए जा सके। उस्से तरिया थम भी इस्से तरियां जिओ, ताके यहूदी, गैर यहूदी अर परमेसवर की कलीसिया के माणसां कै खात्तर उद्घार पाण मह रुकावट ना बणो।

11 जिस तरियां मै मसीह के जिसी चाल चाल्लुँ सूं, थम भी मेरी

सी चाल चाल्लो। 2 हे बिश्वासी भाईयो, मै थारी तारीफ करूँ सूं क्यूँके थम मेरे ताहीं हर बखत याद करो सों, अर जितनी शिक्षा मनै थारे ताहीं दी सै, उनका सावधानी तै पालन करते रहों। 3 पर एक बात सै जो मै चाहूँ सूं के थम उसनै जाण ल्यो, वा या सै के हरेक माणस का सिर मसीह सै, अर बिरबान्नी का सिर उसका धणी सै, अर मसीह का सिर परमेसवर सै। 4 जिब थम कलीसिया मह कहूँ होओ सों, तो जो माणस सिर ढके होए प्रार्थना या भविष्यवाणी करै सै, वो मसीह का अपमान करै सै। 5 पर जो बिरबान्नी उघाड़े सिर प्रार्थना या भविष्यवाणी करै सै, इसका मतलब सै के वा अपणे धणी का अपमान करै सै, क्यूँके वा गन्जी होणे कै बोरब्बर सै। 6 जै बिरबान्नी ओढणी ना ओढ़ै तो बाल भी कटवा लेवै, जै बिरबान्नी कै खात्तर बाल कटवाणा या गन्जी होणा बड़े शर्म की बात सै, तो ओढणी ओढ़ै। 7 हाँ, एक माणस नै सिर ढकण की जसृत कोनी, क्यूँके परमेसवर नै उस ताहीं खुद के समान बणा दिया सै, अर उस ताहीं अपणे जिसा सुभाव अर महिमा दी सै, पर बिरबान्नी मर्द की शोभा सै। 8 क्यूँके पैहला माणस बिरबान्नी तै न्ही होया, पर पैहली बिरबान्नी हव्वा, माणस तै होई। 9 परमेसवर नै पैहले माणस ताहीं बिरबान्नी की मदद करण खात्तर न्ही बणाया था, बल्के उसनै बिरबान्नी ताहीं बणाया ताके माणस की मदद करै। 10 अर इस बजह तै सुर्गदूतां की मौजूदगी कै कारण बिरबान्नी खात्तर जरूरी सै, के अधिकार के रूप मह उसनै अपणे सिर पै कुछ ओढणा चाहिए। 11 फेर भी प्रभु मह ना तो बिरबान्नी माणस तै, अर ना माणस बिना बिरबान्नी तै आजाद सै।

12 भलाए परमेसवर नै पैहले इन्सान तै पैहली जनानी बणाई, अर या जनानी ए सै जो इन्सान नै जन्म देवै सै, पर सारी चीज परमेसवर तै सै। 13 थम आप ए विचार करो, के कलीसिया मह बिरबान्नी नै उघाड़े सिर परमेसवर तै प्रार्थना करण शोभा देवै सै? 14 के सुभाव कै तौर पै भी थमनै न्ही बेरा कै जै माणस लाल्चे बाल राक्खै, तो उसकै खात्तर अपमान सै। 15 पर जै लुगाई लाल्चे बाल राक्खै तो उसकै खात्तर शोभा सै, क्यूँके बाल उसकी ओढणी कै खात्तर दिए गये सै। 16 पर जै कोए मेरे तै सहमत कोनी, तो म्हारे धोरै अर परमेसवर की कलीसिया कै धोरै आराधना करण का इसकै अलावा कोए और रिवाज कोनी। 17 इब जो बात मै थारे ताहीं बताऊँ सूं, उसकै खात्तर मै थारी बडाई कोनी करदा, ज्यांते के थारे कठे होण तै भलाई न्ही, पर नुकसान होवै सै। 18 क्यूँके मेरे सुणण मह आया सै, के जिब थम कलीसिया मह आराधना कै खात्तर कठे होवो सों, तो थारे मह फूट होवै सै, अर मै मान्नु सूं के यो सच सै। 19 पर यकिनन थारे बीच बटवारा होणा चाहिए, ताके जिनकै धोरै परमेसवर की मंजूरी सै, उन ताहीं पिछ्छाणा जावै। 20 आखर मह थम जो एक जगहां मह कठे होवो सों, म्हारे प्रभु यीशु मसीह की मौत नै याद करण कै खात्तर होवो सों, यो प्रभु-भोज खाण कै खात्तर न्ही। 21 क्यूँके खाण कै बखत एक-दुसरे तै पैहल्या अपणा खाण खा लैवै सै, इस ढाल कोए तो भूक्खा रहवै सै अर कोए मतवाला हो जावै सै। 22 के खाण-पीण कै खात्तर थारे घर कोनी? या थम परमेसवर की कलीसिया का तिरस्कार अर गरीबां नै शर्मिन्दा करण पै तुले होए सों? इब मै थारे तै के कहूँ? के इस बात मह थारी बडाई करूँ? ना! बिलकुल न्ही। 23 मनै थारे ताहीं जितनी शिक्षा दी सै वोए शिक्षा सै, जो मनै परमेसवर की ओढ़ै तै मिली थी, के प्रभु यीशु जिस रात पकड़ाया गया, रोटी लेई, 24 अर परमेसवर का धन्यवाद करकै उसनै तोड़ी अर कह्या, “या मेरी देह सै, जो थारे खात्तर सै: मेरी यादगारी खात्तर न्यूए करया करो।” 25 इसे तरिया उसनै खाणे कै बाद अंगूर के रस का कटोरा भी लिया अर कह्या, “यो कटोरा मेरे लहू मह नया करार सै: जिब कदे पीओ, तो मेरी यादगारी कै खात्तर न्यूए करया करो।” 26 क्यूँके जिब कदे थम या रोटी खाओ अर इस कटोरे मह तै पीओ सौ, तो प्रभु की मौत नै जिब ताहीं वो न्ही आवै, प्रचार करदे रहो। 27 ज्यांतै जो कोए इस तरिकें तै प्रभु की रोटी खावै या उसकै कटोरे मह तै पीवै, जिसतै मसीह का आनदर हो, तो वो प्रभु की देह अर लहू के बिरुद्ध पाप करै सै। 28 ज्यांतै माणस अपणे-आप ताहीं जाँच लैवै अर इस्से तरियां तै इस रोटी मह तै खावै, अर इस कटोरे मह तै पीवै। 29 क्यूँके जो खांदे-पिंदे बखत प्रभु की देह के साथ अपणे रिश्ते नै न्ही पिछ्छाणता, वो इस खाणे अर पीणै तै अपणे उपर दण्ड ल्यावै सै। 30 अर दण्ड की शरूआत थारे बीच हो ली सै, इस्से कारण थारे मह तै घणखरे कमजोर अर बीमार सै, अर घणखरे मर भी गये। 31 जै हम अपणे-आपनै जाँचदे तो दण्ड न्ही पादे। 32 पर प्रभु महरै ताहीं दण्ड देकै म्हारी ताड़ना करै सै, ज्यांतै कै हम न्याय के दिन दुसरे माणसां के साथ दिठत ना करे जावां। 33 इस करकै, हे बिश्वासी भाईयो,

जिब थम प्रभु भोज खाण खात्तर कठे होओ सो, तो एक-दुसरे कै खात्तर ठहरे रहे, ताके थम मिलकै प्रभु भोज खा सको। 34 जै कोए भूक्खा हो तो अपणे घर म्ह खा लेवै, ताके जिब थम एक साथ आओगे, तो थम सही तरियां तै बरताव करोगे, अर परमेसवर थारा न्याय कोनी करैगा। दुसरी बातां नै मै जिब्बे सुलझाऊँगा जिब आऊँगा।

12 हे विश्वासी भाईयो, इब पवित्र आत्मा के जरिये दी गई उन खुबियाँ

तै तालुकात राखती उन बातां के बारें म्ह मै न्हीं चाहन्दा के थम अनजाण रहो। 2 थम जाणो सो, के प्रभु म्ह विश्वास करण तै पैहले थम किसे थे, कोए थमनै राह दिखावै था ताके थम मूर्तियाँ की पूजा कर सको जो बोल न्हीं सकदी। 3 ज्यांतै मै थमनै बताणा चाहूँ सूँ, के जो कोए परमेसवर की आत्मा की अगुवाई तै बोल्लै सै, वो न्हीं कहन्दा के यीशु श्रापित सै, अर ना कोए पवित्र आत्मा कै बिना कह सकै सै के यीशु प्रभु सै। 4 अतिमिक वरदान तो कई ढाळ के सै, पर या पवित्र आत्मा ए सै जो इन सबका भण्डार सै। 5 अर काम भी कई ढाळ के सै, जो हम परमेसवर खात्तर करा सां, पर हम सब एकै परमेसवर की सेवा करा सां। 6 परमेसवर म्हारी जिन्दी म्ह कई ढाळ के तरिकां तै काम करै सै, पर यो वोए परमेसवर सै, जो हमनै उसके काम करण की काबलियत देवै सै। 7 एक इसी काबलियत सै जो म्हारे म्ह तै हरेक ताहीं दी जावै सै, जो पवित्र आत्मा की मौजूदगी नै दिखावै सै ताके हम अपणे संगी विश्वासियाँ की मदद कर सका। 8 परमेसवर की आत्मा एक माणस ताहीं बुद्धि तै भरा सन्देस बोल्लण की काबलियत देवै सै। 9 वो एक माणस ताहीं मसीह म्ह मजबुत्ती तै विश्वास करण की काबलियत देवै सै, अर दुसरे माणस ताहीं आत्मा, बीमार लोगां नै ठीक करण की काबलियत देवै सै। 10 किसे ताहीं सामर्थ के काम करण की ताकत, अर किसे ताहीं भविष्यवाणी की, अर किसे ताहीं आत्मायाँ की परख, अर किसे ताहीं धणी ढाळ की भाषा, अर किसे ताहीं भाषायां का मतलब बताणा की काबलियत दी। 11 पर ये परमेसवर की आत्मा सै, जो सारी काबलियत का भण्डार सै, अर वो हर किसे नै बाट देवै सै, जिसा वो चाहवै सै। 12 जिस तरियां देह के भोत सारे अंग होवै सै, पर भोत सारे अंग मिलकै एक देह नै बणावै सै, उससे ढाळ मसीह देह सै, अर सब विश्वासी उसके देह के अंग सै। 13 क्यूँकि हम सब यहूदी, यूनानी, गुलाम अर आजाद, एकए देह की तरियां सां, अर परमेसवर हम सब नै पवित्र आत्मा का बपतिस्मा देवै सै, अर हम सारया नै एके तरियां का पवित्र आत्मा पाया सै। 14 देह म्ह एके अंग न्हीं, पर भोत-से सै। 15 जै पैर कहवै के मै हाथ कोनी, इस करकै देह का अंग कोनी? 16 अर जै कान कहवै, के मै आँख कोनी, इस करकै देह का अंग कोनी, तो के वो इस कारण देह का अंग कोनी? 17 जै साब्बी देह आँख होन्दी तो सुणणा कित्त तै होंदा? जै साब्बी देह कान ए होंदी तो सूधणा कित्त तै होंदा? 18 पर सचमुच परमेसवर नै देह के सारे अंगा ताहीं अपणी मर्जी

कै मुताबिक एक-एक करकै देह म्ह सही जगहां पै राख्या सै। 19 जै सारे अंग एके अंग होन्दे, तो देह कित्त तै होंदी? 20 बल्के अंग तो भोतेरे सै, पर देह एके सै। 21 आँख हाथ तै कोनी कह सकदी, “मन्नै तेरी जरूरत कोनी,” अर ना सिर पैर तै कह सकै सै, के “मन्नै तेरी जरूरत कोनी।” 22 पर देह के कुछ अंग जो दुसरे अंगा तै कमजोर लागै सै, भोत-ए जरूरी सै। 23 अर देह के जिन अंगा नै हम कम आदर देवां सां, वे सै जिन ताहीं हम बड़ी सावधानी तै ढका सां, इस करकै उन अंगा की हम सावधानी तै हिफाजत करा सां, जिन ताहीं देख्या न्हीं जा सकता, जिब के आदर के लायक अंगा नै इस खास देखभाल की जरूरत कोनी। इस करकै परमेसवर नै देह ताहीं एक साथ राख्या सै, ताके उन अंगां ताहीं खास आदर अर देखभाल दी जावै, जिनका महत्व कम सै। 25 ताके देह म्ह फूट ना पड़े पर देह के सारे हिस्से दुसरे अंगा की देखभाल करै। 26 जै देह का कोए अंग दुख पावै सै, तो उसकै गैल देह के सारे अंग दुख पावै सै, अर जै एक अंग की बड़ाई होवै सै, तो उसकै गेल्या सारे अंग आनन्द मनवै सै। 27 इस्से ढाळ थम सारे मिलकै मसीह की देह सो, अर थारे म्ह तै हरेक उसके देह के कुछ हिस्सां के रूप म्ह उसके अंग सौं 28 मसीह की इस देह म्ह जो के कलासिया सै, परमेसवर नै म्हारे ताहीं न्यारे-न्यारे ढाळ के काम करण कै खात्तर दिया, सब तै पैहल्या प्रेरितां, फेर नबी, तीसरे शिक्षक, फेर सामर्थ के काम करण आळे, फेर चंगाई देण आळे, भलाई करण आळे, अर अमुरें, अर अन्य भाषा बोल्लण की काबलियत दी। 29 के सारे प्रेरित सै? न्ही! के सारे नबी सै? न्ही! के सारे उपदेशक सै? न्ही! के सारे सामर्थ के काम करण आळे सै? न्ही! 30 के सारया नै चंगा करण का वरदान मिल्या सै? न्ही! के सारे अन्य भाषा बोल्लै सै? न्ही! 31 के सारे अन्य भाषा का मतलब बताणीये सै? न्ही! थम सबतै उपयोगी वरदानां की धुन म्ह रहो, पर मै थमनै सारया तै बढ़िया राह बताऊँ सूँ।

13 जै मै माणसां अर सुर्गदूतां की बोल्ली बोल्लूँ अर दुसरयां तै प्यार

ना करूँ, तो मै ठनठनादा होया पीत्तल, अर झाङ्जनाती होई झाँझ सूँ। 2 अर जै मै भविष्यवाणी कर सकूँ, अर सारे भेद अर सारी ढाळ के ज्ञान ताहीं समझूँ, अर मन्नै उरै ताहीं इतणा विश्वास हो के मै पहाड़ां ताहीं हटा दियुँ, पर दुसरयां तै प्यार ना करूँ, तो मै कुछ भी कोनी। 3 जै अपणा सारा धन कंगालां नै खुवा दियुँ, या अपणी देह जलाण कै खात्तर दे दियुँ, अर दुसरयां तै प्यार ना करूँ, तो मन्नै किमे भी फायदा कोनी। 4 जो लोग दुसरयां तै प्यार करै सै, वे नफरत न्हीं करते, अर वे खुद की बड़ाई न्हीं करते। 5 वे दुसरयां का अनादर कोनी करते, वे स्वार्थी कोनी अर ना ए तावले नाराज होवै सै, पर आसानी तै उन माणसां ताहीं माफ करदे सै तो वे खुश होवै सै। 6 जिब लोग बुरे काम करै सै तो वे खुश होवै सै। 7 प्यार सारी बातां नै सह लेवै सै, अर हमेशा म्हारे हरेक हालातां म्ह विश्वास करण म्ह, परमेसवर पै भरोस्सा राख्यण म्ह, अर दुख अर मुसीबतां नै

धीरज तै सहण करण म्ह म्हारी मदद करै सै। 8 प्यार सदा तक रहण आळा सै। जडै ताहीं भविष्यवाणीयाँ का सवाल सै, वे थोडे ए बखत खात्तर सै, भाषाएँ बिना शब्द की हो जावेंगी अर ज्ञान मिट जावैगा। 9 क्यूँक म्हारा ज्ञान अर म्हारी भविष्यवाणी का वरदान अधूरा सै। 10 पर जिब हम सिद्धुता तक पोहच जावांगे तो, वो सब, जो अधूरा सै, मिट जावैगा। 11 जिब मै बालक था, तो मै बालकां की ढाळ बोल्लू था, बालकां जिसी मेरी सोच थी, बालकां जिसी समझ थी, पर जिब श्याणा हो गया तो बालकां के जिसी बात छोड़ दी। 12 इब जो हम परमेसवर के बारें म्ह जाणा सां, वो सब शीशे म्ह धृथळा दिखाई देण की ढाळ सै, पर बाद म्ह हम उस ताहीं आम्ही-स्याम्ही देक्खांगे, इब्बे हम सब कुछ न्ही जाणते, पर बाद म्ह हम सब किमे जाण जावांगे जिस तरियां परमेसवर म्हरे ताहीं जाणै सै। 13 ये तीनु चीज सदा खात्तर सै, विश्वास, आस, अर प्यार पर इन म्ह सारया तै बड़ा प्यार सै।

14 एक-दुसरे तै प्यार करण की कोशिश करो, अर आत्मिक वरदानां

की भी धुन म्ह रहो, खास करके यो के भविष्यवाणी करो। 2 क्यूँक जो अन्य भाषा म्ह बात करै सै वो माणसां तै न्ही पर परमेसवर तै बात करै सै, ज्यांतै के उसकी बात कोए न्ही समझादा, क्यूँक वो भेद की बात पवित्र आत्मा की शक्ति तै बोल्लै सै। 3 पर जो भविष्यवाणी करै सै, वो विश्वासियाँ नै मजबूत करण की, उत्साहित करण की, अर शान्ति की बात कहवै सै। 4 जो अन्य भाषा म्ह बात करै सै, वो अपणा ए विश्वास मजबूत करै सै, पर जो भविष्यवाणी करै सै, वो कलीसिया के विश्वासियाँ के विश्वास नै मजबूत करै सै। 5 मै चाहूँ सूके के थारे म्ह तै हरेक नै अन्य भाषायां म्ह बात करण की काबलियत मिलै, पर इसकी बजाए आच्छा तो यो सै के थमनै भविष्यवाणी की काबलियत मिलै, क्यूँक जो भविष्यवाणी करै सै, वो उस अन्य भाषा बोल्लण आळा तै, जो उसका मतलब खोल कै बताए बिना अन्य भाषा म्ह बात करै सै, उसतै आच्छा सै, क्यूँक उसका मतलब खोल कै बताये जाण पैए कलीसिया के विश्वासियाँ के विश्वास की बढोतरी हो सकै सै। 6 ज्यांतै, हे विश्वासी भाईयो, जै मै थारे तै अन्य भाषा म्ह बात करै, तो उसतै थमनै के फायदा होगा, जै इस म्ह थारे खात्तर कोए प्रकाशन, ज्ञान, भविष्यवाणी या शिक्षा की बात ना हो, तो मै इस म्ह थारा के भला करूँगा? 7 इस्से ढाळ बेजान चीज म्ह तै भी आवाज लिकडै सै, चाहे बाँसुरी हो या संगीत के साज, जै उनतै लिकडै सुरां म्ह फर्क ना हो तो यो किस तरियां बेरा लागैगा के यो कौण सा साज बजाया जाण लाग रह्या सै। 8 अर जै तुरही का शब्द साफ ना हो, तो कौण लडाई कै खात्तर त्यारी करैगा? 9 इस्से तरियां जै थम अन्य भाषा म्ह बोल्लों सौं, अर थारे शब्दां नै कोए समझ न्ही पावै, के थम के बोल्लण लागरे सौं? तो यो तो हवा तै बात करण जिसा होगा। 10 भलाए दुनिया म्ह कितनी ए ढाळ की भाषा क्यूँ ना हों, पर हरेक भाषा का मतलब सै। 11 पर जै मै किसे भाषा का मतलब ना समझूँ तो बोल्लण आळे की निगांह म्ह परदेशी ठरऱ्गा, अर बोल्लण आळा भी मेरी निगांह म्ह परदेशी ठहरैगा। 12 ज्यांतै थम भी

जिब आत्मिक वरदानां की खोज म्ह हो, तो इसे वरदानां की लालसा राक्खों, जिसतै कलीसिया के विश्वासी माणसां का विश्वास भी मजबूत हो सकै। 13 इस कारण जो अन्य भाषा बोल्लै, वो प्रार्थना करै के उसका खोल कै मतलब भी बता सकै। 14 ज्यांतै जै मै अन्य भाषा म्ह प्रार्थना करूँ, तो मेरी आत्मा प्रार्थना करै सै, पर मेरी बुद्धि काम न्ही देंदी। 15 इस बजह तै मै आत्मा तै भी प्रार्थना करूँगा, अर बुद्धि तै भी प्रार्थना करूँगा, मै आत्मा तै भी गाऊँगा, अर बुद्धि तै भी गाऊँगा। 16 मान ल्यो के कई आम आदमी थारे गैल परमेसवर की आराधना म्ह शामिल होवै सै, अर जिब थम अपणी आत्मा के साथ परमेसवर की आराधना करण लागे रसों, अर जो थम बोल्लो सौं वो उननै समझ कोनी आन्दा, तो परमेसवर का धन्यवाद करण कै बात, उननै किस तरियां बेरा लागैगा के कद “आमीन” कहणा सै, जो थम कहण लागरे सौं? 17 परमेसवर का धन्यवाद करणा थारे खात्तर अद्भुत हो सकै सै, पर यो दुमरयां ताहीं उनके विश्वास म्ह मजबूत न्ही बणा सकदा। 18 मै अपणे परमेसवर का धन्यवाद करूँ सूके के मै थम सारया तै धणा अन्य भाषायां म्ह बोल्लू सून्। 19 पर कलीसिया म्ह अन्य भाषा म्ह दस हजार बात कहण तै यो मन्नै और भी सही लागै सै, के दुमरयां नै सिखाण कै खात्तर मै बुद्धि तै पाँच ए बात कह सकू। 20 हे विश्वासी भाईयो, इन बातां नै समझाण म्ह बालक ना बणो, बुराई करण म्ह तै बालक बणे रहो, पर इस तरियां के मामलां नै समझाण म्ह श्याणे बणो। 21 पवित्र ग्रन्थ म्ह लिख्या सै, के प्रभु कहवै सै, “के मै अजनवियाँ के जरिये बात करूँगा, जो अन्य भाषा बोल्लैगें, तोभी वे मेरी न्ही सुणोगें!” 22 ज्यांतै अन्य भाषा विश्वासियाँ कै खात्तर न्ही, पर अबिश्वासियाँ कै खात्तर निशान्नी सै, जो ये भाषा न्ही समझाते, पर भविष्यवाणी अविश्वासियाँ कै खात्तर न्ही, पर विश्वासियाँ कै खात्तर निशान्नी सै। 23 इस करकै जै कलीसिया एक जगहां कठूँ हो, अर सारे के सारे अन्य भाषा बोल्लै, जो ये भाषा न्ही समझाते, पर अविश्वासियाँ कै खात्तर निशान्नी सै। 24 पर जै सारे भविष्यवाणी करण लागे, अर कोए अविश्वासी माणस या जो भविष्यवाणी नै न्ही समझाते हो, भीत्तर आ जावै, तो उननै अपणे पापां का अहसास होगा अर जो थम बोल्लण लागरे सौं उसकी बजह तै अपणे-आप ताहीं कसूवार महसूस करैगें। 25 अर परमेसवर का संदेश उस ताहीं उसकी बुराई या उसकी गुप्त सोच का अहसास करैं देवैगा। वो महसूस करैगा के वो पापी सै, अर वो पाप करणा छोड़ देगा अर वो झुककै प्रभु की आराधना करैगा, अर मान लेवैगा के सच म्ह ए परमेसवर थारे बिचालै सै। 26 हे विश्वासी भाईयो, सुणो के ये बात किस तरियां होणी चाहिये? जिब थम आराधना खात्तर कठूँ होवो सौ, तो थारे म्ह तै कोए तो भजन गवै सै, कोए उपदेश देवै सै, कोए प्रभु के जरिये दिए गये प्रकाशन सै, कोए अन्य भाषा म्ह बात करै सै, कोए उसका मतलब बतावै सै। इन सारी बातां का मकसद योए सै, के कलीसिया विश्वास म्ह मजबूत हो सकै। 27 जै अन्य भाषा म्ह बात करै तो ज्यादा तै ज्यादा दो या तीन माणस बारी-बारी तै बोल्लै, अर एक माणस उन बातां

का खोल के मतलब भी बतावै। 28 पर जै खोल के मलतब बताणीया ना हो, तो अन्य भाषा बोल्लण आळा कलीसिया मह शान्त रहवै, अर अपणे मन मह परमेसवर तै बात करै। 29 नवियाँ मह तै दो या तीन बोल्लै, अर बाकी माणस उनकै वचन नै परखै। 30 जै उस बखत ओड़े कोए बेठ्या हो जिस ताहीं ईश्वरीय प्रकाशन मिलै, तो पैहले आळा माणस चुप हो जावै अर दुसरे माणस नै बोल्लण दे। 31 थम सारे एक-एक करकै भविष्यावाणी कर सको हो, ताके सारे सीखै अर सारे उत्साहित भी हो जावै। 32 अर नवियाँ की आत्मा नवियाँ कै बस मह सै, उसकै भित्तर इतनी कावलियत सै, के वो अपणी इच्छा के मुताबिक बोल सकै सै, अर चुप भी रह सकै सै। 33 क्यूँके परमेसवर गड़बड़ी का न्ही, पर शान्ति का परमेसवर सै। यो वो नियम सै जिसका पालन परमेसवर के माणसां के सारी कलीसियाँ अंग मह करया जाणा चाहिए। 34 बिरबान्नी कलीसिया की सभा मह चुपचाप रहवै, क्यूँके उन ताहीं बात करण का हुकम कोनी, पर अधीन रहण का हुकम सै, जिसा नियम-कायदे मह लिख्या भी सै। 35 जै वे किमे सिखणा चाहवै, तो घर मह अपणे-अपणे धणी तै बुझै, क्यूँके बिरबान्नी का कलीसिया मह घणा बोलणा शर्म की बात सै। 36 इसा क्यूँ सै के थारे मह तै कुछ पैहले उपर लिखे होए नियमां का पालन न्ही करणा चाहन्दे? के थमनै लागै सै, के थम परमेसवर का वचन देण आळे पैहले आदमी सौं? 37 जै कोए माणस खुद नै नबी या आत्मिक माणस समझै, तो न्यू जाण ले के जो बात मै थमनै लिखूँ सूँ औ प्रभु के हुकम सै। 38 जै कोए माणस इन बातां पै बिश्वास न्ही करदा, तो थम भी उसकी बातां पै बिश्वास ना करो, जो वो बोल्लण लागरया सै। 39 इस करकै हे बिश्वासी भाईयो, भविष्यावाणी करण की धून मह रहो, अर अन्य भाषा बोल्लण तै मना ना करो। 40 कलीसिया मह जो कुछ भी करो सौं, आळी तरियां अर सही ढंग तै करया जावै।

15

हे बिश्वासी भाईयो, इब मै थमनै वोए सुसमाचार याद दिवाऊँ सूँ, जो पैहल्या सुण्या जा चुक्या सै, जिस सुसमाचार का थमनै बिश्वास भी करया था, अर थम उस बिश्वास मह बणे भी रहो। 2 जै थम सुसमाचार मह बिश्वास करणा जारी राख्यों सौं, जो मन्नै थारे ताहीं सुणाया था तो परमेसवर थमनै सुसमाचार के जरिये बचावैगा, जै थम उस सुसमाचार पै बिश्वास करणा छोड़ द्यो, तो थारा मसीह पै बिश्वास करणा बेकार सै। 3 इस्से कारण मन्नै थारे ताहीं सब तै खास सन्देस बताया सै, जो मेरे ताहीं प्रभु यीशु तै मिल्या सै, वो सन्देस यो सै, के पवित्र ग्रन्थ कै वचन कै मुताबिक यीशु मसीह म्हारै पापां कै खात्तर मारया गया, 4 गाड्या गया, अर पवित्र ग्रन्थ कै मुताबिक तीसरे दिन जिन्दा भी होग्या, 5 अर उसकै बाद वो पतरस ताहीं अर फेर बारहा चेल्यां नै दिख्या। 6 फेर वो पाँच सौ तै ज्यादा चेल्यां नै एक साथ दिख्या, जिन मह तै खण्खरे तो इब ताहीं जिन्दे सै पर कई मर लिये सै। 7 इसकै बाद वो याकूब नै अर फेर सारे प्रेरितां नै भी दिख्या। 8 सब तै आखर मह मन्नै भी दिख्या, मेरे ताहीं प्रभु तै अदभुत तरियकै तै प्रेरित बण्याया। 9 क्यूँके मै प्रेरितां मह सारया तै कम महत्वपूर्ण सूँ, बल्के प्रेरित बण्ण कै

जोग्या भी कोनी था, क्यूँके मन्नै परमेसवर की कलीसिया के बिश्वासियाँ ताहीं सताया था। 10 पर मै जो कुछ भी सूँ, परमेसवर के अनुग्रह तै प्रेरित सूँ। उसका अनुग्रह जो मेरै पै होया, वो बेकार न्ही होया, पर मन्नै उन और प्रेरितां तै बाध मेहनत भी करी, तोभी या मेरी ओड़ तै न्ही होई, पर परमेसवर का अनुग्रह तै होई जो मेरै पै था। 11 ज्यांते चाहे मै हूँ चाहे दुसरे प्रेरित हों, हम सब नै मसीह के बारें मह एक जिसा प्रचार करा, अर इस्से पै थमनै बिश्वास भी करया। 12 मै थारे तै एक बात पूछ्य सूँ, जिब तै हम सारया नै यो प्रचार करया सै, के परमेसवर नै मसीह ताहीं मुर्दा मह तै जिन्दा करया, तो थारे मह तै कई क्यूँ न्ही मानते के बिश्वासी भी मरके जिवैंगे? 13 जै मेरे होया का जी उठाना सै ए कोनी, तो मसीह भी मेरे होया मह तै जिन्दा कोनी होया, 14 अर जै मसीह मेरे होया मह तै न्ही जी उठाया, तो म्हारा प्रचार करणा बेकार सै अर थारा बिश्वास करणा भी बेकार सै। 15 इसतै भी बढ़कै यो सै के हम परमेसवर के झुण्ठे गवाह साबित होण लागरे सां, क्यूँके हमनै उनके बारें मह या गवाही दी सै के उननै मसीह ताहीं मेरे होया मह तै जिन्दा करया सै, पर जै मेरे होए वास्तव मह जिन्दे न्ही करे गये होन्दे तो परमेसवर नै मसीह ताहीं भी जिन्दा न्ही करया। 16 अर जै मेरे होए माणस जिन्दा न्ही होन्दे, तो मसीह भी मेरे होया मह तै जिन्दा कोनी होया। 17 अर जै मसीह मरया होया मह तै जिन्दा कोनी होया, तो थारा बिश्वास करणा बेकार सै, अर थम इब ताहीं अपणे पापां मह जींजा लागरे सो। 18 बल्के जो मसीह पै बिश्वास करण आळे मर लिये सै, वे भी नाश होए। 19 जै हम सिर्फ इस्से जीवन मह मसीह तै आस राक्खां सां, ना के आण आळी दुनिया कै खात्तर, तो हम सारे माणसां तै घणे अभागे सां। 20 पर सच मह-ए परमेसवर नै मसीह ताहीं मुर्दा मह तै जिन्दा करया सै, अर वो पैहला माणस सै, जो मेरे होया मह तै जिन्दा करया गया। 21 क्यूँके जिब एक माणस आदम कै जरिये दुनिया मह मौत आई, तो दुसरा माणस मसीह कै जरिये मरे होया का दोबारा जिन्दा हो जाणा भी होया। 22 अर जिस तरियां आदम के पाप के जरिये सारे माणस मरे सै, उस्से तरियां ए मसीह नै जो करया, उसके जरिये सारे माणस मरे होया मह तै जिन्दा भी करे जिवैंगे। 23 पर हरेक माणस इस तरियां जिन्दा होवैगा, परमेसवर नै पैहल्या मसीह ताहीं मरे होया मह तै जिन्दा करया, फेर मसीह कै आण पै परमेसवर उन लोगां नै भी जिन्दा करैगा जो मसीह के सै। 24 इसकै बाद दुनिया का अन्त होगा। उस बखत मसीह सारी प्रथानता, अर सारा हक अर सामर्थ का अन्त करकै राज्य नै परमेसवर पिता कै हाथ मह सौंप देवैगा। 25 क्यूँके जिब तक परमेसवर अपणे बैरियाँ नै पूरी तरियां तै हरा ना देवै, तब तक मसीह का राज्य करणा ज़रूरी सै। 26 सारया तै आखरी बैरी जो नाश करया जावैगा, वो मौत सै। 27 पवित्र ग्रन्थ मह भजनकार नै लिख्या सै, के परमेसवर सब कुछ मसीह के अधीन कर देवैगा, तो यो तय सै, के परमेसवर शामिल कोनी, क्यूँके वोए सै जिसनै मसीह ताहीं अधिकार दिया सै। 28 जिब सब कुछ मसीह कै अधीन हो जावैगा यानी बेटे के अधीन, तो बेटा आप भी परमेसवर के अधीन हो

जावैगा, जिसने उस ताहीं यो अधिकार दिया था। परमेस्वर ए प्रभु सै, जो सब कुछ अर हर किसे म्ह काम करै सै। 29 जै मरे होया का पुनरुत्थान कोनी, तो उस परम्परा का के मतलब सै, जिस म्ह माणस मरे होया की जगहां पै बपतिस्मा लेण लागेरे सै? जै परमेस्वर मरे होए माणस ताहीं जिन्दा न्ही करदा, तो माणस इस परम्परा नै क्यूँ मानण लागेरे सै? 30 म्हरे खात्तर जै मुर्दा का जी उठणा सै, तो खुद ताहीं खतरां म्ह गेरणा बेकूफी सै। 31 हे बिश्वासी भाईयो, मै हर दिन मौत का सामना करैं सूँ, यो भी सच सै, के प्रभु यीशु मसीह म्ह मन्नै थारे पै गर्व सै। 32 मै इफिसुस नगर म्ह बड़ी तै बड़ी मुसीबतां म्ह तै गुजरा सूँ जो जंगली-जानवरां की तरियां मेरा बिरोध करै सै, तो मन्नै के फायदा होया? जै मुर्दे जिन्दे न्ही करे जावैंगे, तो हम कह सका सां, के “आओ, खावां-पीवां, क्यूँके काल तो मरणा ए सै?” 33 धोक्खा ना खाओ, “भुंडी संगति आच्छे चाल-चलण नै बिगाड़ देवै सै।” 34 अपणे सोच्चण के तरिकके नै ठीक कर ल्यो, अर पाप करणा छोड़ द्यो, क्यूँके कुछ इसे सै जो परमेस्वर नै न्ही जाणदे। मै थमनै शर्मिन्दा करण कै खात्तर न्यू कूहँ सूँ। 35 उदाहरण के तौर पै जै कोए न्यू कहवैगा, “के परमेस्वर मुर्दा नै किस तरिया तै जिवावै सै, अर उनकी देह किसी होवै सै?” 36 हे निरे बेअक्लो! जिब तू बीज नै माटी म्ह बोवै सै, तो वो अंकुरित कोनी होवै सै, अर जिब वो अंकुरित होवै सै तो वो बीज कोनी रहन्दा। 37 जै तू गेहूँ या कोए दुसरा बीज बोवै सै, तो तू शरु म्ह ए पौथा न्ही लगान्दा, बल्के बीज नै ए लगावै सै, जो बाद म्ह पौथा बणै सै। 38 परमेस्वर जिसा चाहवै उसा आकार पैथे नै देवै सै, हरेक ढाळ के बीज का उगण का अपणा अलग ए तरिकां होवै सै। 39 दुनिया के सब प्राणियाँ की देह एक जिसी कोनी होन्दी, माणसां की देह न्यारी सै, डांगरां की न्यारी सै, पछियाँ की देह न्यारी सै, मच्छियाँ की देह न्यारी सै। 40 अर जिस तरियां धरती पै अलग-अलग तरियां की देह सै, उस्से तरियां अकास म्ह भी सूरज, चाँद अर तारे सै। अकास म्ह चिज्जां की एक अलग तरियां की खूबसूरती हो सै, अर धरती पै, की चिज्जां की खूबसूरती अलग ढाळ की हो सै। 41 सूरज का तेज न्यारा सै, चाँद का तेज न्यारा सै, अर तारा के टोल का तेज न्यारा सै, (क्यूँके एक तारे तै दुसरे तारे कै तेज म्ह फर्क सै)। 42 तो यो मरे होए माणसां का जी उठणा भी इसाए होगा। देह जिस ताहीं वे दफणावै सै वो गळ जा सै, पर जिब यो फेर तै जी उठे सै, तो या एक इसी देह होगी जो गळे कोनी। 43 जिब महारी देह दफणाई जावै सै, तो वा बदसूरत अर कमजोर हो सै, पर जिब दुबारातै जीवन मिलै सै, तो वा सुथरी अर मजबूत हो सै। 44 जिस तरियां महारी देह माँस अर लहू तै बणी सै, इस्से तरियां इसी देह भी सै जिस ताहीं जीवन परमेस्वर के आत्मा के जरिये मिलै सै, अर जो महारी देह माँस अर लहू तै बणी सै, उस देह म्ह बदल जावैगा, जिस ताहीं जीवन परमेस्वर की आत्मा तै मिलै सै। 45 पवित्र ग्रन्थ म्ह भी लिख्या सै, के “पैहल्डा माणस, यानिके आदम जिन्दा प्राणी बण्या” अर आखरी आदम जो मसीह सै, वोए सै जो हमनै अनन्त जीवन देवै सै। 46 माँस अर लहू तै बणी देह पैहल्या वजूद

म्ह आई, फेर उस देह ताहीं परमेस्वर की आत्मा के जरिये जीवन मिलै सै। 47 पैहल्डा माणस धरती तै, यानिके माटी तै बण्या होया था, दुमरा माणस जो मसीह था सुर्ग तै आया। 48 धरती पै रहण आळे लोग, धरती के पैहले माणस आदम की ढाळ माटी तै बणे सै, पर सुर्ग म्ह रहण आळे लोग, सुर्ग के माणस मसीह यीशु की तरियां सै। 49 हम सबका रूप आदम की ढाळ सै, जो माटी तै बण्या सै, उस्से तरियां एक दिन हमनै मसीह का रूप भी मिलैगा, जो सुर्गीय सै। 50 हे बिश्वासी भाईयो, मै चाहूँ सूँ के थम जाण ल्यो, के म्हारी देह जो लहू अर माँस तै बणी सै, इस देह कै साथ हम परमेस्वर के सुर्गीय राज्य म्ह न्ही रह सकदे। हम सुर्ग म्ह उस देह कै साथ न्ही रह सकदे जो नाश हो जावै सै, क्यूँके ओड़े कोए मौत कोनी। 51 देक्खो, मै थारे तै एक भेद की बात बताऊँ सूँ, म्हरे म्ह तै कुछ बिश्वासी मरै कोनी, पर उनकी देह बदल जावैगी। 52 अर यो पलभर म्ह, पलक झापकदे ए जिब आखरी तुरही फूककी जावैगी तो मुर्दे सदा रहण खात्तर जिन्दा हो जावैगे, अर जो जिन्दा सै उनकी देह सुर्गीय देह म्ह बदल जावैगी। 53 क्यूँके यो जरूरी सै, ताके म्हारी या नाशवान देह अविनाशी देह म्ह बदल जावै, अर या मरणहार देह कदे ना मरण आळी देह म्ह बदल जावै। 54 जिब इसा होवै सै, तो जो परमेस्वर नै पवित्र ग्रन्थ म्ह लिख्या सै, वो पूरा हो जावैगा, “मौत पूरी तरियां तै हार जावैगी अर वजूद म्ह कोनी रहवैगी। 55 हे मौत, तेरी जीत कित्त रही? हे मौत, तेरा डंक कित्त रहया?” (Hades g86) 56 पाप वो डंक सै जो मौत नै लेकै आवै सै, अर नियम-कायदे पाप नै शक्ति देवै सै। 57 पर परमेस्वर का धन्यवाद हो, जो म्हरै प्रभु यीशु मसीह के जरिये हमनै पाप अर मौत पै जयवन्त करै सै। 58 ज्यांतै हे मेरे प्यारे भाईयो, मजबूत अर पक्के रहो, अर प्रभु कै काम म्ह सारी हाण बढ़ते जाओ, क्यूँके थम जाणो सो के थारी मेहनत प्रभु म्ह बेकार न्ही सै।

16 इब यस्तलेम नगर म्ह परमेस्वर के पवित्र माणसां कै खात्तर कठे करे गये उस चन्दे कै बारे म्ह, जिसा हुकम मन्नै गलातिया परदेस की सरी कलीसियां ताहीं दिया, उसाए थम भी करो। 2 हपतै कै पैहलड़े दिन थारे म्ह तै हरेक, अपणी आमदणी कै मुताबिक कुछ धन अपणे धोरै अलग धरो, ताके मेरै आण पै थमनै चन्दा कठा करणा न्ही पड़ै। 3 अर जिब मै आँड़े होऊँगा, तो उन माणसां ताहीं दान लेण खात्तर यस्तलेम भेज्जूँगा जिन ताहीं थमनै भरोस्सेमंद समझा सै, मै उन बिश्वासियाँ के हाथ एक चिट्ठी भी भेज्जूँगा ताके ओड़े के बिश्वासी भी उन ताहीं जाण सकै। 4 जै मेरा भी जाणा जरूरी होया, तो वे मेरै गेल्या जावैगे। 5 पर मन्नै पैहले मकिदुनिया परदेस जाणा सै, फेर मै मकिदुनिया परदेस तै होकै थारे धोरै आऊँगा। 6 पर हो सकै सै, के थारे धोरै ए लम्बे बखत ताहीं ठेहर जाऊँ, अर पूरा जाड़ा थारे धोरै रहूँ, फेर जिस सफर पै मन्नै जाणा हो उसपै थम मन्नै भेज दियो। 7 जै या परमेस्वर की इच्छा सै, तो मै थारे धोरै बाद म्ह, घणे दिनां खात्तर आऊँगा, बजाए इसके के इब मै थोड़े दिनां खात्तर, थारे धोरै आऊँ। 8 पर मै पिन्तूकुस्त त्यौहार तक इफिसुस नगर म्ह रहूँगा, 9 क्यूँके याड़े भोत सारे लोग सै, जो

परमेस्वर के वचन के बारें मृण सुणाणा चाहवै सै, अर मेरा याढ़े रहणा जरूरी सै, हालाकि याढ़े मसीह के भोत बिरोधी सै। 10 जिब तीमुथियुस कुरिन्थुस नगर मृण आ जावै सै, तो उसकै गैल सम्मानपूर्वक बरताव करियो, क्यूंके वो मेरी तरियां प्रभु का काम करै सै। 11 ज्यांतै कोए उसनै तुछ न्ही जाए, पर जो सफर खात्तर जरूरी चीज सै उसनै दे दिओ, ताके वो मेरै धोरै आ जावै, क्यूंके मै उसकी बाट देक्खूँ सूँ के वो बिश्वासी भाईयाँ कै गैल आवै। 12 बिश्वासी भाई अपुल्लोस तै मनै घणी बिनती करी सै, ताके वो थारे धोरै और दुसरे बिश्वासी भाईयाँ कै गेल्या आ जावै, पर वो इस सफर कै खात्तर तैयार कोनी, पर जिब सही बखत होगा तो वो थारे धोरै आ जावैगा। 13 चौकक्स रहो, बिश्वास मृठ डटे रहो, निढ़ बणे रहों, बिश्वास मृण मजबूत बणो। 14 जो किमे करो सो प्यार तै करो। 15 हे बिश्वासी भाईयो, थम स्तिफनास कै कुण्बे नै जाणो सो के वे अखाया परदेस के पैहले बिश्वासी सै, अर पवित्र माणसां की सेवा कै खात्तर त्यार रहवै सै। 16 ज्यांतै मै थारे तै बिनती करूँ सूँ के इस्यां कै अधीन रहो, बल्के हरेक के जो इस काम मृण कड़ी मेहनती करै सै, अर जो सच्ची भगति के साथ सेवा करै सै। 17 मै स्तिफनास अर फूरूनातुस अर अखइकुस कै आण तै राज्जी सूँ, क्यूंके वो मेरी मदद करण लागरे सै, जो थम न्ही कर पाए। 18 उननै मेरी अर थारी आत्मा ताहीं चैन दिया सै, इस करकै इसे माणसां का आदर करो। 19 आसिया की कलीसियाओं की ओङ तै थारे ताहीं नमस्कार, अकिला अर उसकी घरआळी, प्रिसकिल्ला का अर उनकै घर की कलीसिया का भी, थारे ताहीं प्रभु मृण दिल तै नमस्कार। 20 सरे बिश्वासी भाईयाँ का थारे ताहीं नमस्कार। आप्स मृण एक-दुसरे ताहीं गळे मिलकै प्यार तै नमस्कार करो। 21 मुझ पौलुस का थारे ताहीं अपणे हाथ तै यो नमस्कार लिखूँ सूँ। 22 जै कोए प्रभु तै प्यार न्ही राक्खै तो वो श्रापित होवै। हे म्हारे प्रभु आ! 23 प्रभु यीशु का अनुग्रह थारे पै होन्दा रहवै। 24 मै उन सारया तै प्यार करूँ सूँ, जिनका मसीह यीशु के साथ रिश्ता सै। आमीन।

2 कुरिन्थियों

1 या विट्ठी पौलुस अर म्हारे बिश्वासी भाई तीमुथियुस की ओड़तै सै,

सै, मै पौलुस परमेसवर की इच्छा तै मसीह यीशु का प्रेरित सूं उस कलीसिया कै नाम जो कुरिन्थुस नगर म्ह सै; अर साब्दे अखाया परदेस के सारे पवित्र माणसां के नाम। 2 हम प्रार्थना करा सां, के पिता परमेसवर अर प्रभु यीशु मसीह की ओड़तै थारे ताहीं अनुग्रह अर शान्ति मिल्दी रहवै। 3 म्हारे प्रभु यीशु मसीह के पिता अर परमेसवर का धन्यवाद होवै, जो दया का पिता, अर जो हमेशा तसल्ली देवै सै। 4 परमेसवर म्हारे सारे दुखां म्ह तसल्ली देवै सै, ताके हम उस तसल्ली कै कारण जो परमेसवर म्हारे ताहीं देवै सै, उन ताहीं भी तसल्ली दे सका, जो इस तरियां के दुखां म्ह हो। 5 क्यूंकै जिस तरियां मसीह म्ह हमनै घणे दुख होवै सै, उस्से तरियां ए मसीह कै जरिये हमनै घणी तसल्ली भी होवै सै। 6 जै हम दुख पावां सां, तो या थारी तसल्ली अर उद्धर कै खात्तर, क्यूंकै परमेसवर म्हारे ताहीं तसल्ली देवै सै, तो वो थमनै भी तसल्ली देगा ताके थम धीरज कै गेल्या उन दुखां ताहीं सह लेओ सो, जिन नै हम भी सहवां सां। 7 अर म्हारी आस थारे बारे म्ह पक्की सै, क्यूंकै हमनै बेरा सै, के थम जिस तरियां तै म्हारे दुखां म्ह साइझी सौं, उस्से तरियां तै थम म्हारी तसल्ली म्ह भी साइझी सौं। 8 हे बिश्वासी भाईयो, हम चाहवां सां, के थम म्हारे उन दुखां नै जाणो, जो आसिया परदेस म्ह म्हारे पै पड्या, हम इसे भाराया बोझ तै दबगे थे, वो बोझ म्हारे सहण तै बाहर था, उरै ताहीं के हमनै जिन्दा रहण की आस छोड़ दी थी। 9 बल्कै हमनै अपणे मन म्ह समझ लिया था, के म्हारे ताहीं मार दिया जावैगा, अर हम अपणे-आप पै भरोस्सा ना राक्खां, बल्के परमेसवर पै भरोस्सा राक्खां, जो मरे होया नै जिन्दा करै सै। 10 उस्से नै म्हारे ताहीं इसी बहु मुसीबत तै बचाया, अर बचावैगा, अर उसपै हमनै भरोस्सा सै, अर वो आग्ने भी म्हारे ताहीं बचान्दा रहवैगा। 11 जिस तरियां थम प्रार्थना कै जरिये म्हारी मदद करो सौं, उन आशीषां कै खात्तर जो भोत सारे माणसां की प्रार्थना की बजह तै हमनै मिली सै, उसकै कारण भोत-से माणस म्हारी ओड़तै परमेसवर का धन्यवाद करै सै। 12 क्यूंकै म्हारी अन्तरात्मा शुद्ध होण कै कारण हम घमण्ड करा सां, अर दुनिया म्ह अर खास करकै थारे बिच्चालै, म्हारा चाल-चलण जो परमेसवर की ओड़तै सै, वो पवित्रता अर सच्चाई सुधा था, ना के दुनियावी ज्ञान तै, पर परमेसवर कै अनुग्रह कै साथ था। 13 क्यूंकै मन्नै अपणी चिट्ठियां म्ह हमेशा साफ-साफ लिखा सै, ताके जिब थम उन चिट्ठियाँ नै पढ़ों तो आसानी तै समझ सकों, पर इब भी थम उन ताहीं ठीक तै न्ही समझ पाते, मन्नै आस सै के एक दिन जिब प्रभु यीशु बोहड़ के आवैगा, तो थम इन ताहीं पूरी तरियां समझ ल्योगे। तब हम थारे गर्व का कारण बणागे, अर थम भी म्हारे खात्तर गर्व का कारण बणोगे। 15 मन्नै भरोस्सा सै, के थम मेरी बात्तां नै पूरी तरियां तै समझगे सौं, इस करकै मै पैहल्या थारे धोरै आणा चाहूँ था, ताके मेरे दुबारा आण तै थमनै दुगणी आशीष मिलै।

16 मेरी योजना या थी, के मै थारे धोरै तै होकै मकिदुनिया परदेस म्ह जाऊँ, अर दुबारा मकिदुनिया परदेस तै थारे धोरै आऊँ, अर मै उम्मीद करूँ सूं, के थम मन्नै यहूदिया परदेस के सफर खात्तर जरूरत की चीज देकै मेरी मदद करोगे। 17 थम मेरे तै पूछ सकों सौं, के मन्नै अपणी योजना क्यूँ बदली। थम के सोच्चों सौं, के मन्नै या योजना लापरवाही तै बणाई, या फेर मै दुनिया के माणसां की तरियां सूं? जिनके जुबान पै तो हाँ हो सै, अर मन म्ह ना हो सै। 18 जिसा परमेसवर बिश्वास जोगा सै, उस्से तरियां म्हारी बात भी बिश्वास जोगी सै। 19 क्यूंकै परमेसवर का बेट्टा यीशु मसीह जिसका म्हारे जरिये यानिके म्हारे अर सिलवानुस अर तीमुथियुस कै जरिये थारे बिचालै प्रचार होया, उस मसीह यीशु म्ह “हाँ” अर “ना” दोनु न्ही हो सकदे। पर उस म्ह “हाँ” ए “हाँ” होई। 20 क्यूंकै परमेसवर के सारे वादे मसीह यीशु म्ह पूरे होए सै। ज्यांतै हम आमीन बोल्ला सां यानी “हाँ”, ताके म्हारे जरिये परमेसवर की महिमा होवै। 21 परमेसवर ए सै, जो हमनै थारे गेल्या मसीह म्ह मजबूत करै सै, परमेसवर नै म्हारे पै अपणी मोहर लगाकै ब्यान्ने के रूप म्ह अपणा पवित्र आत्मा म्हारे मन म्ह बसाकै म्हारे ताहीं चुण्या सै। 23 परमेसवर मेरी इस सच्चाई का गवाह सै कै मै दुबारा कुरिन्थुस नगर अर म्ह ज्यांतै कोनी आया, के मै थमनै दुख देणा कोनी चाहूँ था। 24 इसका मतलब यो कोनी के हम बिश्वास कै बारे म्ह थारे पै हक जताणा चाहवां सां; पर थारे आनन्द म्ह साइझी सां, क्यूंकै थम बिश्वास ए तै डटे रहो सो।

2 मनै अपणे मन म्ह न्यू ठान लिया था, के दुबारा थारे धोरै ओड़ै आकै

थमनै दुख ना देऊँ। 2 क्यूंकै जै मै थमनै उदास करूँ, तो थारे अलावा मन्नै आनन्द देण आला कोए कोनी रह्या, सिर्फ थमे सौं, जिस ताहीं मन्नै उदास करया। 3 अर मन्नै याए बात थारे तै ज्यांतै लिख्खी के कदे इसा ना हो के मेरै आण पै, जिनतै मन्नै आनन्द मिलाणा चाहिये, मै उनतै उदास होऊँ; क्यूंकै थम सारया पै मन्नै इस बात का भरोस्सा सै, के जो मेरा आनन्द सै, वो एथम सारया का भी सै। 4 बड़े क्लेश अर दुखी मन तै मनै घणों आँसू बहा-बहाकै थारे ताहीं चिट्ठी लिख्खी, ज्यांतै न्ही के थम उदास होवो पर ज्यांतै के थम उस घणे प्यार नै जाण ल्यो, जो मन्नै थारे तै सै। 5 अर जै किसे नै उदास करया सै, तो मेरे ताहीं ए न्ही बल्के थोड़ा-थोड़ा थारे सारया ताहीं उदास करया सै, अर मै उसकी गलतियाँ के बारें म्ह इसतै ज्यादा कुछ और न्ही कहणा चाहन्दा। 6 इसे माणस कै खात्तर या सजा जो सारे बिश्वासी भाईयों नै उस ताहीं देई सै, वा भतेरी सै। 7 ज्यांतै इसतै भला यो सै, के उसका अपराध माफ करो अर उस ताहीं उत्साहित करो, इसा ना हो के वो माणस घणी उदासी म्ह डूब जावै। 8 इस कारण मै थारे तै बिनती करूँ सूं के उस ताहीं अपणे प्यार का सबूत थ्यो। 9 क्यूंकै मन्नै यो ज्यांतै भी लिख्खा था के थमनै परख ल्यूँ के थम मेरी सारी बात्तां नै मानयन नै त्यार सो के न्ही। 10 जिस ताहीं थम किसे बाबत माफ करो सौं, उस ताहीं मै भी माफ करूँ सूं, क्यूंकै जिस बात के बारें मन्नै उस ताहीं माफ करया सै, जै वो सच म्ह माफी लायक था, तो मन्नै मसीह ताहीं हाजिर जाणकै उस ताहीं थारे

खात्तर माफ करया सै। 11 ताके शैतान का म्हारै पै दाँव ना चाल्लै। क्यूँके हम उसके बुरे इराद्यां तै अनजान कोनी। 12 जिब मै मसीह का सुसमाचार सुणाण नै त्रोआस नगर म्ह आया, अर प्रभु नै मेरे ताहीं वचन सुणाण खात्तर एक राह खोल दिया। 13 अपणे बिश्वासी भाई तीतुस ताहीं ओड़ै ना पाकै, मेरे मन नै चैन कोनी मिल्या, ज्यांतै विश्वासी भाईयाँ तै बिदा होकै मै मकिदुनिया परदेस म्ह बोहड़ म्या। 14 पर परमेसवर का धन्यवाद हो, जो मसीह कै साथ म्हारी संगति होण के कारण हमनै जीत कै उत्सव म्ह लिये फिरै सै, इब परमेसवर म्हारे ताहीं खसबूदार इत्र की ढाळ मसीह का ज्ञान फैलाण खात्तर हरेक जगहां इस्तमाल करै सै। 15 हम परमेसवर कै खात्तर मसीह के जरिये, जलाई गई उस धूप की खस्बू की ढाळ सां, जो उद्धार पाण आळे अर नाश होण आळे दोनुआ कै खात्तर सै, यो परमेसवर का सुसमाचार सै, अर सारे माणसां थोरै फैल्लण लागरया सै। 16 कितन्याँ कै खात्तर तो मरण कै कारण मौत की गन्ध, अर कितन्याँ कै खात्तर जिन्दगी कै कारण जिन्दगी की खस्बू सां। कोए भी माणस इस काम नै न्ही कर सकता। 17 हम उन बरगे कोनी जो परमेसवर के वचन नै पर्झिसा खात्तर प्रचार करै सै; पर यो जाण सा के परमेसवर नै म्हारे ताहीं भेज्या सै अर मन की सच्चाई तै हम उसका वचन आज्ञाकारिता अर मसीह अधिकार तै सुणावां सां, यो जाणकै के परमेसवर म्हारे ताहीं देक्खै सै।

3 के हम दुबारा अपणी बड़ाई करण लागेय? या हमनै और माणसां की ढाळ सिफारिश की चिट्ठियाँ थारे थोरै लायण की या थारे तै लेण की जरूरत सै? 2 थम म्हारे खात्तर एक चिट्ठी की ढाळ सां, जो म्हारे खात्तर सिफारिश करै सै, अर म्हारे दिलां पै लिक्खी होई सै, उस ताहीं सारे माणस पढ़ सकै, अर म्हारे भले काम्मा नै पैच्छाण सकै। 3 यो तो साफ दिक्खै सै के थम मसीह की चिट्ठी के समान सों, जो मसीह की ओड़तै सै, जो म्हारी सेवकाई का फळ सै, अर जो स्याही तै पत्थर की पटियाँ पै न्ही, पर जिन्दे परमेसवर की आत्मा तै दिल की मैसूरूपी पटियाँ पै लिक्खी सै। 4 हम इस करकै कहवां सां, के हम मसीह कै जरिये परमेसवर पै भरोस्सा करा सां। 5 हम यो न्ही कहदे के म्हारी कुछ करण की काबलियत खुद तै सै, पर वो काबलियत परमेसवर की ओड़तै सै। 6 जिसनै म्हारै ताहीं नये करार के सेवक होण कै लायक भी बणाया, मूसा के नियम-कायदा के सेवक न्ही, बल्के पवित्र आत्मा के सेवक सां; क्यूँके मूसा के नियम-कायदे ना मानण तै मौत आवै सै, पर पवित्र आत्मा जिन्दगी देवै सै। 7 मूसा नबी के नियम-कायदे जो पत्थर की पटियाँ पै लिखे गये थे, तब परमेसवर की महिमा ओड़ै जाहिर होई थी, उस कारण भोत बखत ताहीं इसाएल के माणस मूसा नबी का चैहरा भी कोनी देक्खण पाए थे, क्यूँके उसका चैहरा तेजोमय था, उसके चेहरे का तेज ज्यादा बखत ताहीं कोनी रह सका, इस करकै मूसा नबी ताहीं जो नियम-कायदे दिए गये थे, वे मौत नै लेकै आवै थे। तो पवित्र आत्मा का काम जो नये करार के मुताबिक सै, वो और भी तेजोमय होवैगा। 9 क्यूँके जिब माणसां नै कसूरवार बणाण आळा

पुराणा करार तेजोमय था, तो जो माणसां नै धर्मी बणाण आळा नया करार सै और भी तेजोमय होवैगा। 10 अर जो तेज पुराणे करार तै आवै था, उसका तेज जो इब नये करार तै आवै सै, उसकै आगै कुछ भी कोनी। 11 क्यूँके जो तेज मूसा नबी के नियम-कायदा म्ह था, जिब वो जो घटदा जावै था, तो भी वो तेजोमय था, तो उस नये करार का तेज जो स्थिर सै, वो और भी तेजोमय होवैगा। 12 ज्यांतै इसी आस राखकै हम हिम्मत कै गेल्या बोल्लां सां। 13 हम मूसा नबी की ढाळ न्ही, जिसनै अपणे मुँह पै पड़दा गेरया था। ताके इसाएली माणस उस घटणआळे तेज कै अन्त नै ना देख पावै। 14 पर इसाएल के माणसां की अकल खराब होगी, क्यूँके आज ताहीं पुराणा नियम पढ़ते बखत उनके दिलां पै वोए पड़दा पड़ा रहवै सै, पर वो पड़दा मसीह पै बिश्वास करण तै ए उठ जावै सै। 15 आज ताहीं जिब कदे भी मूसा नबी की किताब पढ़ी जावै सै, तो उन ताहीं पूरी तरियां समझ म्ह कोनी आन्दी। 16 पर जिब कदे वो यीशु मसीह पै बिश्वास करैंगे, तो वो पड़दा उठ जावैगा। 17 प्रभु तो आत्मा सै: अर जित्त किते परमेसवर का आत्मा सै, ओड़ै नियम-कायदे तै आजादी सै। 18 हम परमेसवर की महिमा इस तरियां देक्खां सां, जिस तरियां शीशे म्ह अपणा मुँह, उस मुँह के आगै पड़दा कोनी, परमेसवर आत्मा सै। अर वो हमनै अपणे तेजस्वी स्वरूप म्ह थोड़ा-थोड़ा करकै बदलता जावां सै।

4 ज्यांतै जिब म्हारै पै इसी दया होई के हमनै या परमेसवर के वचन प्रचार करण की सेवा मिली, तो हम हिम्मत न्ही हारते। 2 हमनै शर्मनाक अर गुप्त काम्मां ताहीं छोड़ दिया, अर ना चतुराई करते, अर ना परमेसवर कै वचन नै तोड़-मरोड़ के पेश करा सां। पर परमेसवर के वचन की सच्चाई नै माणसां के स्याम्ही जाहिर करां सां, ताके हरेक माणस परमेसवर के स्याम्ही या गवाही दे सकै सै, के यो सच वै। 3 पर जै म्हारै सुसमाचार नै कोए समझ न्ही हावै, तो यो नाश होण आळा ए कै खात्तर गुप्त सै। 4 इस दुनिया के ईश्वर शैतान नै उन अविश्वासियाँ की अकल ताहीं, आँधी कर दिया सै, ताके उस चाँदांगे नै जो मसीह के तेजोमय सुसमाचार तै आवै सै, उस ताहीं देख ना सकै। जो दिखावै सै के परमेसवर किसा सै। (aiong g165) 5 क्यूँके हम खुद नै न्ही, पर मसीह यीशु नै प्रचार करा सां, के मसीह यीशु ए प्रभु सै। अर अपणे बरै म्ह न्यू कहवां सां, के हम यीशु कै कारण थारे सेवक सां। 6 ज्यांतै के परमेसवर नै कह्या, “अन्धकार म्ह तै चाँदणा चमकै,” अर परमेसवर म्हारै दिलां म्ह चाँदणा की तरियां समझ दे, ताके हम परमेसवर की महिमा नै समझ सका, जो यीशु मसीह म्ह सै। 7 हम माटी के बासणा की तरियां सां, जिस म्ह धन भरया सै, या धणी सामर्थ म्हारी न्ही, बल्के परमेसवर की सै। 8 हम चौगरदे तै कळेश तो भोगां सां, पर संकट म्ह न्ही पड़दे, म्हारै थोरै उपाय तो कोनी, पर निराश न्ही होन्दे। 9 सताए तो जावां सां, पर छोड़े न्ही जान्दे; गिराए तो जावां सां, पर नाश न्ही होन्दे। 10 हम हर बखत मौत के खतरे म्ह रहवां सां, जिस तरियां यीशु म्हारे खात्तर मरया गया, ताके हम दुसरे माणसां नै म्हारे उन काम्मां के जरिये दिखा सका

के यीशु म्हारे म्ह बरै सै। 11 क्यूँक हम जिन्दे जी सारी हाण यीशु के कारण मौत खतरे म्ह रहवां सां, ताके मसीह यीशु का जीवन म्हारी मरण आळी देह म्ह जाहिर होवै। 12 इस करकै हम मौत के खतरे म्ह रहवां सां, इसका नितज्जा यो होगा के थमनै अनन्त जीवन मिलेगा। 13 पर हम तो प्रधार करते रहवांगे क्यूँक म्हारा विश्वास उस भजनकार की ढाल सै, जिसनै भजन संहिता म्ह कह्या, “मै परमेसवर पै विश्वास करूँ सूँ” इस खात्तर बोल्लु सूँ। 14 इस करकै हमनै बेरा सै के जिसनै प्रभु यीशु ताहीं मुर्दा म्ह तै जिन्दा करया, वोए परमेसवर हमनै भी यीशु म्ह जिन्दा करैगा, अर थारे गेल्या हमनै भी अपणी मौजूदी म्ह ले जावैगा। 15 क्यूँक सारे दुख हमनै सहे, ताके भोत सारे लोग जाण सकै के परमेसवर कितना करुणामय सै, अर परमेसवर की महिमा के खात्तर ज्यादा तै ज्यादा लोग उसका धन्यवाद करै। 16 ज्यांतै हम हिमत न्ही हारते; हालाके म्हारी देह नाश होन्दी जावै सै, तोभी म्हारी अन्तरात्मा हर रोज नई होन्दी जावै सै। 17 क्यूँक म्हारी मौजूदा परेशानियाँ भोत छोट्टी सै, अर वो लम्बे बखत ताहीं कोनी रहवैगी। क्यूँक ये अनन्त महिमा का कारण बणेगी, जो म्हारे सोचण तै भी बड़ी सै। (aiōnios g166) 18 अर हम तो देखखी होई चिज्जां ताहीं न्ही पर अनदेकखी चिज्जां नै देखदे रहवां सां, क्यूँक देखखी होई चीज माड़े-से दिन की सै, पर अनदेकखी चीज सारी हाण बणी रहवैं सै। (aiōnios g166)

5 क्यूँक हमनै बेरा सै के पलभर का शारीरिक देह सरीखा घर जो हमनै मिल्या सै, जो नाश करया जावैगा, तो हमनै परमेसवर कै कान्ही तै सुर्ग पै एक इसा घर मिलैगा, जो हाथां तै बण्या होया न्ही, पर सारी हाण खात्तर टिकाऊ सै। (aiōnios g166) 2 इस देह म्ह तो हम कराहा अर बड़ी लालसा राक्खां सां, ताके अपणे सुर्गीय देह नै पैहर ल्या 3 क्यूँक सुर्गीय देह पैहरण तै हम उघड़े न्ही पाए जावैगे। 4 अर हम शारीरिक देह सरीखे घर म्ह रहन्दे होए बोझ तै दबे रोन्दे-पिटते रहवां सां, क्यूँके हम इसनै छोड़णा न्ही चाहन्दे, पर हम चाहवां सां के परमेसवर हमनै सुर्गीय देह देवै, ताके शारीरिक देह नाश होण कै बाद हमनै अनन्त राज्य म्ह सुर्गीय देह मिल जावै। 5 जिसनै म्हारै ताहीं जिस सुर्गीय देह कै खात्तर त्यार करया सै, वो परमेसवर सै, जिसनै म्हारै ताहीं ब्याने म्ह पवित्र आत्मा भी दिया सै। 6 आखर म्ह हम सारी हाण होसला राक्खा सां, अर या जाणां सां के जिभ ताहीं हम देह म्ह रहवां सां, तब तक प्रभु के सुर्ग तै न्यारे सां, जो सुर्ग म्ह सै। 7 हम प्रभु यीशु पै विश्वास करण तै जिवां सां, ना के उस ताहीं देक्खण तै। 8 ज्यांतै हम होसला राक्खा सां, अर हम मरण कै बाद, देह तै न्यारे होकै प्रभु कै गेल्या रहणा हम और भी घणा बढ़िया समझां सां। 9 इस कारण म्हारै मन की इच्छा या सै, चाहे हम सुर्ग म्ह परमेसवर कै गैल रहवां, या धरती पै रहवां, पर हम उसनै भान्दे रहवां। 10 क्यूँके जरूरी सै के हम सब मसीह कै न्याय आसन कै स्याम्ही खड़े होवां, ताके हरेक माणस अपणे-अपणे आच्छे-भुड़े कामां का बदला पावै, जो उसनै शारीरिक देह कै जरिये करे सै। 11 ज्यांतै प्रभु का भय मानकै हम माणसां ताहीं न्यू समझावां सां, के वे

इस सच्चाई पै विश्वास करै, अर परमेसवर जाणै सै के हम कौण सां, अर मै उम्हीद करूँ सूँ, के थम भी अपणी अन्तरात्मा म्ह हमनै आच्छी तरियां जाण ल्यो। 12 हम फेर भी अपणी बड़ाई थारे स्याम्ही कोनी करदे, बल्के हम अपणे बारै म्ह थारे ताहीं गर्व करण का मौक्का देवां सां, के थम उननै जावाद दे सको, जो अपणे मन की बजाये बाहरी रूप पै घमण्ड करै सै। 13 जै कोए कहवै के हम पागल सां, तो परमेसवर कै खात्तर, अर जै श्याणे सा तो थारे खात्तर सां। 14 क्यूँक मसीह का प्यार हमनै मजबूर कर देवै सै। ज्यांतै के हम न्यू समझां सां, के जिब एक माणस साराया कै खात्तर मरया तो सारे माणस मरगे। 15 अर मसीह इस कारण सारे माणसां खात्तर मरया ताके जो जिन्दे सै, वे आगै तै अपणे खात्तर न्ही जीवै, पर मसीह कै खात्तर जीवै, जो उनकै खात्तर मरया अर दुबारा जिन्दा होग्या। 16 इस करकै इब हमनै माणसां ताहीं दुनियावी नजरिये तै देखणा छोड़ दिया सै। हालाके एक बखत था, जिब हमनै मसीह ताहीं भी दुनियावी नजरिये तै देख्या था, पर इब न्ही, क्यूँके इब हम उस ताहीं जाणगे सां। 17 जै कोए मसीह म्ह विश्वास करै सै, तो वो नवी जिन्दगी पा लेवै सै। पुराणा सुभाव चल्या जावै सै, अर नया सुभाव आ जावै सै। 18 ये सारी बात परमेसवर की ओड़ तै सै, जिसनै मसीह कै जरिये अपणे गेल्या म्हारा मेल-मिलाप कर लिया सै, अर मेल-मिलाप की सेवकाई का काम म्हारै ताहीं सौंप दिया सै। 19 यानिके परमेसवर नै मसीह म्ह होकै अपणे गेल्या दुनिया का मेल-मिलाप कर लिया, अर माणसां के पापां का दोष उनपै न्ही लाया, अर याए बात मेल-मिलाप का सन्देस सै, जो परमेसवर नै म्हारै ताहीं सौंप दिया सै। 20 ज्यांतै, हम मसीह के राजदूत सां। परमेसवर म्हारै जरिये माणसां तै बिनती करण लाग रहया सै। हम मसीह की ओड़ तै थारे तै बिनती करा सां, के परमेसवर कै गेल्या मेल-मिलाप कर ल्यो। 21 मसीह जो पाप तै अनजान था, उस्से ताहीं परमेसवर नै म्हारै खात्तर पापी ठहराया, ताके हम परमेसवर कै नजर म्ह धर्मी बण जावां, क्यूँके यीशु मसीह नै म्हारे पापां का दण्ड अपणे उप्पर ले लिया।

6 हम जो परमेसवर कै गैल काम करणीये सां, या बिनती करां सां, के उसका अनुग्रह जो थारे पै होया, उसनै बेकारा ना जाण द्यो। 2 क्यूँके पवित्र ग्रन्थ म्ह परमेसवर नै कह्या सै, “सही बखत पै मन्नै तेरी सुण ली, अर उद्धार कै दिन मन्नै तेरी मदद करी।” सुणो, इब्बे वो सही बखत सै; अर आज ए वो उद्धार का दिन सै। 3 हम परमेसवर कै गैल काम करणीया के कारण, हम किसे बात म्ह ठोक्कर खाण का कोए भी मौक्का कोनी देन्दे, ताके म्हारी सेवा पै कोए दोष ना आवै। 4 इस करकै हम सारे हालातां म्ह खुद ताहीं परमेसवर के सच्चे सेवक के समान पेश करां सां, जिसा धीरज तै दुख सहण म्ह, गरीबी म्ह, हर बखत संकट सहण म्ह, 5 अर कोड़े खणा म्ह, कैद होण म्ह, रोक्ले-बद्यां म्ह, मेहनत म्ह, जागदे रहण म्ह, ब्रत करण म्ह, 6 पवित्रता म्ह, ज्ञान म्ह, धीरज म्ह, करुणा तै, पवित्र आत्मा तै, 7 सच्चे प्यार म्ह, सच कै वचन म्ह, परमेसवर कै सामर्थ म्ह, हम धर्मिकता कै हथियारां नै सोळे हाथ तै

लड़ण खात्तर अर ओले नै बचाव खात्तर इस्तमाल करां सां। 8 जिब माणस हमनै आच्छे या बुरे माणस कहवै, जिब वे म्हारी बडाई करै या अर बेजती करै, तो हम भकाण आले जिसे लागा सां, तोभी सच्चे सां। 9 कई माणस हमनै अनजाणा कै बरगे समझै सै, तोभी हम मशहुर सां, मरे होए बरगे दिक्खां सां पर देक्खो जिन्दे सां, मार खाण आला कै बरगे सां पर जी तै कोनी मारे जान्दे। 10 म्हारा पै भी दुख का बखत आवै सै, पर हम सारी हाण आनन्दित रहां सां, हम खुद तो कंगालां की तरियां सां, पर धणखरयां नै अातिक रूप तै साहुकार बणा देवां सां, हम इसे सा जिस ढाळ म्हारै धोरै किमे कोनी, तोभी सारा किमे सै, येए सारी बात हमनै परमेसवर का सच्चा सेवक बणण म्ह मदद करै सै। 11 हे कुरिन्थियो नगर के बिश्वासियों, हमनै खुलकै थारे तै बात करी सै, हम पूरे मन तै थारे तै प्यार करां सां। 12 म्हारै मन म्ह थारे खात्तर प्यार कम न्ही होन्दा, पर थारा प्यार म्हारै खात्तर कम होग्या। 13 पर मै अपणे बाल्क जाणकै थारे तै कहूँ सूँ, के थम भी उसकै बदले पूरे मन तै म्हारे तै प्यार करो। 14 अबिश्वासियों कै गैल साझीदार ना बणो, क्यूँके धर्मिकता अर अर्थर्म का मेलजोल कोनी। या चाँदणे अर अन्धकार की संगति कोनी होन्दी। 15 अर मसीह का शैतान कै गैल कोए रिश्ता कोनी होन्दा, या बिश्वासी कै गेल्या अबिश्वासी का कोए नाता कोनी। 16 अर परमेसवर कै मन्दर म्ह मूर्तियां का काम कोनी। क्यूँके हम तो जिन्दे परमेसवर के मन्दर सां, जिसा परमेसवर नै पवित्र ग्रन्थ म्ह कह्या, “मै अपणे माणसां कै गैल रहूँगा, अर उन म्ह हान्ड्या-फिरया करूँगा, अर मै उनका परमेसवर होऊँगा, अर वे मेरे माणस होवेंगे” 17 ज्यांतै प्रभु अपणे वचनां के जरिये कहवै सै, “उन माणसां के बिकाळै तै लिक्कडो जो परमेसवर ताहीं न्ही मानते, अर न्यारे रहो, अर अशुद्ध चिज्जां तै कोए रिश्ता ना राक्ख्यों, तो मै थमनै अपणाऊँगा। 18 अर मै थारा पिता होऊँगा, अर थम मेरे बेटे अर बेटियाँ होओगे। यो सर्वशक्तिमान प्रभु का वचन सै।”

7 हे प्यारे बिश्वासी भाईयो, जिब हमनै वो बादा मिल्या सै, ताके हम परमेसवर की ऊलाद कुहावां, तो आओ, हम अपणी देह अर आत्मा नै गंदा करण आले सारे बुरे काम छोड़ द्या, अर परमेसवर का भय मानते होए पूरी रीति तै अपणे-आपनै पवित्र करण की कोशिश करां। 2 थम म्हारे तै पूरे मन तै प्यार करो। हमनै ना किसे पै जुन्म करया, ना किसे गैल अन्याय करया, अर ना किसे ताहीं ठाण्या सै। 3 मै थमनै कसूरवार ठहराण कै खात्तर न्यू न्ही कहन्दा। क्यूँके मै पैहल्याए तै कह चुक्क्या सूँ, के हम थारे ताहीं पूरे मन तै प्यार करां सां, अर हम थारे गेल्या जीण-मरण कै खात्तर भी त्यार सां। 4 मै थारे तै घणे बिश्वास कै गेल्या बोल्लण लागरया सूँ, मन्नै थारे पै घणा गर्व सै, मै बड़ा उत्साहित सूँ। अपणे सारे कळेश म्ह, मै आनन्द तै घणा भरपूर रहूँ सूँ। 5 त्रोआस नगर तै जिब हम मकिदुनिया परदेस म्ह आये, फेर भी म्हारी देह नै चैन कोनी मिल्या, पर हम चौगरदे तै कळेश पावां थे, बाहरणै लडाई-झगड़े थे, म्हारे मन म्ह डरावणी बात थी। 6 तोभी दुखियाँ ताहीं तसल्ली देणआले

परमेसवर नै तीतुस कै आण तै म्हारे ताहीं उत्साहित करया। 7 ना सिर्फ उसके आण तै, पर उस उत्साह के जरिये भी, जो तीतुस नै थारे म्ह पाया, उसनै थारी लालसा, थारे दुख, अर मेरै खात्तर थारी धुन की खबर म्हारै ताहीं सुणायी, जिसनै मन्नै और भी खुशी होई। 8 मै परमेसवर कोनी, के मन्नै थारे ताहीं चिट्ठी लिखी, हालाकि मन्नै अपणी चिट्ठी तै थारे ताहीं दुखी करया, मै पैहल्या तौ पछताया, जिब मन्नै देख्या के थम मेरी चिट्ठी तै थोड़े बखत खात्तर तो उदास होए सों। 9 पर इब मै खुश सूँ, ज्यांतै न्ही के मन्नै थारे ताहीं दुख पोहचाया, बल्के ज्यांतै के थमनै उस दुख कै कारण पाप करणा छोड़ दिया, क्यूँके थम दुखी थे, जिसा परमेसवर चाहवै था, के म्हारी ओड़ तै थमनै किसे बात का नुकसान ना पोहोचै। 10 क्यूँके परमेसवर की ओड़ तै मिलण आला दुख, पापां नै छोड़णा का कारण बणी सै, जिसका नतिज्जा छुटकारा सै, उस तरियां के दुख का पछतावा कोनी होन्दा। पर दुनिया तै मिलण आला दुख अनन्त मौत का कारण बणी सै। 11 इस करकै सुणो, परमेसवर की ओड़ तै मिलण आले दुख तै थम कितने गुणवाण बण गये, थारे म्ह कितना उत्साह, जबाबदारी, रिस, भय, लालसा, धुन अर बदला लेण का विचार छोड़णा, थमनै सारी तरियां तै न्यू साबित कर दिया सै, के थमनै इन सारी बातां म्ह कोए कमी कोनी छोड़ी। 12 फेर मन्नै पैहले जो थारे धोरै वो चिट्ठी लिखी थी, वा ना तो उसकै कारण लिखी, जिसनै नाइंसाफी करी, अर ना उसकै कारण जिसके साथ नाइंसाफी करी गई, पर ज्यांतै के थारा जोश जो म्हारै खात्तर सै, वो परमेसवर कै स्याम्ही थारे पै जाहिर हो जावै। 13 ज्यांतै हमनै तसल्ली मिली, म्हारी तसल्ली तो तीतुस की खुशी के कारण सै, म्हारे ताहीं और भी घणी खुशी होई क्यूँके उसका मन थारे कारण और भी ज्यादा खुशमिसाज होग्या सै। 14 क्यूँके जै मन्नै उसकै स्याम्ही थारे बारै म्ह कुछ गर्व दिखाया, तो मै शर्मिन्दा कोनी होया, पर जिसा हमनै थारे तै सारी बात सच-सच कह दी थी, उस्से तरियां ए म्हारा गर्व दिखाणा तीतुस कै स्याम्ही भी सच्चा लिकड्या। 15 जिब तीतुस ताहीं थम सारया के आजाकारी होण की बात याद आवै सै, अर किस ढाळ थम डरदे अर काम्बदे होए उसतै मिले, तो उसका प्यार थारे खात्तर और भी बधता जावै सै। 16 मन्नै घणी खुशी हो सै, क्यूँके मन्नै होरेक बात म्ह थारे पै पूरा भरोसा सै।

8 इब हे बिश्वासी भाईयो, हम थमनै परमेसवर के उस अनुग्रह की खबर देवां सां, जो मकिदुनिया परदेस की कलीसिया के बिश्वासियाँ पै होया सै। 2 उनकी परख बड़ी मुसीबतां म्ह होवै सै, अर घणी गरीब होण पै भी खुशी अर खुल्ले दिल तै दुसरे बिश्वासियाँ कै मदद करी। 3 उनकै बारै म्ह मेरी या गवाही सै, के उननै जितना दे सकै थे दिया, बल्के उसतै भी ज्यादा बढ़कै दिया। 4 उननै भोत ज्यादा बिनती करी के यो दान उन बिश्वासी भाईयों म्ह बाट्या जावै जो यस्तशलेम नगर म्ह सै। 5 उननै म्हारी सोच तै भी बढ़कै करया, उननै पैहल्या काम यो करया, के उननै अपणे-आप ताहीं परमेसवर के खात्तर अर फेर म्हारे खात्तर अपणे-आप ताहीं भी दे दिया, जिसा के परमेसवर चाहवै था के वो इसा करै।

6 ज्यांते हमनै तीतुस तै बिनती करी, के जिस तरियां उसनै पैहल्या इस दान देण के काम की शरुआत करी थी, उस्से तरियां ए वो इस सराहनीय काम ताहीं थारे बिचालै पूरा भी करै ले। 7 ज्यांते जिसा थम हरेक बात म्ह यानिके बिश्वास, वचन प्रचार करण म्ह, ज्ञान अर सारी ढाळ की कोशिश म्ह, अर उस प्यार म्ह जो म्हारै तै करो सो, बढ़दे जाओ सो, उस्से तरियां ए गरीब बिश्वासियाँ खात्तर दान देण म्ह भी बढ़ते जाओ। 8 मै थमनै कोए हुकम कोनी देंदा, मै सिर्फ बाकियाँ के उत्साह तै थारे प्यार की सच्चाई नै परखण लागया सूं। 9 थम म्हारै प्रभु यीशु मसीह कै अनुग्रह नै जाणो सो, के वो धनी होकै भी थारे खात्तर कंगाल बण गया, ताके उसकै कंगाल हो जाण तै थम धनी हो जाओ। 10 पिछली साल थमनै दान दिया बल्के दान देण की इच्छा म्ह आगै भी थे, इस बारें म्ह मै थमनै एक सलाह देणा चाहूँ सूं, के दान देण का सब तै बढ़िया तरिका के सै? 11 जो काम थमनै शुरु करया सै, उस ताहीं पूरा भी करो। इस काम के खतम होण तक, इसे तरियां उत्साहित बणे रहें, जिस तरियां उसकी योजना तैयार करते बखत थे। इस काम नै अपणी पूँजी अर काबलियत कै मुताबिक पूरा भी करो, जो इस बखत थारे धोरै सै। 12 जै किसे की दान देण की इच्छा हो, तो जो कुछ उसकै धोरै सै, उस्से के मुताबिक उसका दान लिया जावैगा, ना के उसकै मुताबिक जो उसकै धोरै कोनी। 13 म्हारा मतलब यो कोनी के दुसरां की भलाई करण तै थम खुद दुख सहो, म्हारा मकसद सिर्फ सब कै साथ एक जिसा बरताव करो। 14 इस बखत तो थारी बढ़ोतरी उनकी जरूरत पूरी करण कै खात्तर भोत सै, कदे यो भी हो सकै सै, के थमनै खुद नै जरूरत पडे अर वे अपणी बढ़ोतरी म्ह तै थारी मदद करै फेर दोनुं पक्ष बरोबर हो जावैंगे। 15 जिसा के पवित्र ग्रन्थ म्ह लिख्या सै, “जिसनै धणा कट्ठा करया उसनै कुछ भी धणा न्ही पाया। अर जिसनै धाट कट्ठा करया उसनै कुछ कमी कोनी होई।” 16 परमेसवर का धन्यवाद होवै, जिसनै थारे खात्तर वाए चिंता तीतुस कै मन म्ह दे दी। 17 जिब हमनै उस ताहीं थारे धोरै आण खात्तर बिनती करी, तो उसनै म्हारी बिनती मान ली, अर धणा उत्साहित होकै वो अपणी मर्जी तै थारे धोरै चल्या गया। 18 हमनै उसकै गेल्या उस बिश्वासी भाई ताहीं भी भेज्या सै, जिसका नाम सुसमाचार फैलाण के बारें म्ह सारी कलीसिया म्ह फैल्या होया सै। 19 अर इतणाए न्ही, पर वो कलीसिया के माणसां कै जरिये ठहराया भी गया, ताके इस दान कै काम कै खात्तर म्हारै गेल्या जावै। हम दान देण की या सेवा यरुशलेम के बिश्वासियाँ ताहीं ज्यांते करा सां के प्रभु की महिमा अर सेवा करण म्ह म्हारै मन की त्यारी जाहिर हो जावै। 20 हम इस बात म्ह चौकक्स रहवां सां के खुल्ले दिल तै दान देण की सेवा के इस काम कै बारे म्ह जो हम करा सां, कोए म्हारै पै दोष ना लाण पावै। 21 क्यूँके जो बात सिर्फ प्रभु ए कै स्याम्ही न्ही, पर माणसां कै स्याम्ही भी भली सै हम उननै आच्छी तरियां तै करां सां। 22 हमनै उसकै गेल्या अपणे एक और बिश्वासी भाई ताहीं भी भेज्जा सै, जिस ताहीं हमनै बार-बार परख कै धणी बात्ता म्ह हौसलै आला पाया सै; पर इब थारे पै उसनै

धणा भरोस्सा सै, इस कारण वो और भी धणा हौसलै आला सै। 23 जै कोए तीतुस के बारे म्ह बुझी, तो वो मेरा मित्तर अर थारे खात्तर मेरै गैल काम करणीया सै, अर जै कोए म्हारै बिश्वासी भाईयाँ कै बारे म्ह बुझी, तो वे कलीसियाओं के भेज्जे होए अर मसीह नै महिमा देण आले सै। 24 इस करके कलीसियाओं के बिश्वासियाँ स्याम्ही अपणे प्यार नै जाहिर करण के जरिये साबित करो, के म्हारा थारे बारें म्ह गर्व करणा साच्चा सै।

9 मनै इब उन पवित्र माणसां नै जो यरुशलेम म्ह रहवै सै, उन ताहीं दान देण की सेवकाई कै बारे म्ह लिखण की जरूरत कोनी। 2 क्यूँके मदद करण की थारी मन की लालसा नै मै पैहले तै ए जांपु सूं, जिसकै कारण मै थारे बारे म्ह मकिनुनिया कलीसिया के बिश्वासी भाईयाँ कै स्याम्ही गर्व करूँ सूं, के थम अखाया परदेस के माणस एक साल पैहल्या तै दान देण खात्तर त्यार थे, अर थारे जोश नै धणखरे मकिनुनिया परदेस के बिश्वासियाँ ताहीं भी दान देण खात्तर उत्साहित करया सै। 3 पर मै थारे धोरै तीतुस अर दो बिश्वासी भाईयाँ नै भेज्जू सूं, के हमनै जो गर्व थारे बारे म्ह दिखाया, वो इस बात म्ह बेकार ना ठहरै; पर जिसा मनै कह्या उसाए थम यरुशलेम के बिश्वासी भाईयाँ नै दान देण खात्तर त्यार रहो। 4 इसा ना हो के जिब मकिनुनिया के कुछ बिश्वासी भाई गैरे गेल्या आवै अर वो थमनै दान देण खात्तर त्यार न्ही पावै, तो हो सकै सै, के हम थारे पै भरोस्से करण के कारण शर्मिन्दा होवां, पर थम म्हरे तै भी ज्यादा शर्मिन्दा होओगे। 5 ज्यांते मनै बिश्वासी भाईयाँ तै या बिनती करणा जरूरी समझाया कै वे पैहल्या तै थारे धोरै जावै, अर जो दान देण का वादा थमनै करया था, उसका इन्तजाम कर ल्यो, जो थमनै कंजूसी तै न्ही पर खुल्ले दिल तै देण खात्तर कह्या। 6 पर बात या सै, जो थोड़ा-सा बोवै सै, वो थोड़ा-सा काटैगा भी, अर जो धणा बोवै सै, वो धणा काटैगा। 7 हरेक माणस जिसा मन म्ह सोच्यै उसाए दान करै, ना कुँद-कुँद कै अर मन म्ह दाब तै, क्यूँके परमेसवर राज्यी होकै देण आले तै प्यार करै सै। 8 परमेसवर इस योग्य सै, के वो थारे ताहीं भोत-ए धणा अनुग्रह दे, ताके सब कुछ थमनै हर बात म्ह हर बखत पर्याप्त मात्रा म्ह मिलता रहवै, अर हरेक भले काम कै खात्तर थारे धोरै भोत धणा होवै। 9 जिसा पवित्र ग्रन्थ म्ह लिख्या सै, “परमेसवर जरूरतमां नै खुल्ले दिल तै देवै सै, उसकी धार्मिकता सारी हाण बणी रहवै सै।” (aiōn g165) 10 परमेसवर ए सै जो किसानों नै बीज अर खाण खात्तर रोटी देवै सै। इस तरिया परमेसवर हमेशा थारे खात्तर धन देवैगा, ताके थम उन माणसां कै मदद कर सकों जिन ताहीं धन की जरूरत सै। 11 थम हरेक तरियां तै आशीष पाओ, ताके थम खुल्ले दिल तै दे सकों, अर जिब थारा दान गरीब माणसां म्ह बाट्या जावै तो वे सारे परमेसवर का धन्यवाद करै। 12 क्यूँके इस दान की सेवकाई तै ना सिर्फ पवित्र माणसां कै जरूरत पूरी होवै सै, पर भोत-से लोग भी दिल तै परमेसवर का धन्यवाद करै सै। 13 क्यूँके इस दान की सेवकाई नै सबूत मानकै, वे परमेसवर की

महिमा करेंगे, क्यूंकि थमनै मसीह के सुसमाचार के हुक्म नै मानकै उस ताहीं अपणाया सै, अर गरीब बिश्वासियाँ की मदद खुल्ले दिल तै करी सै। 14 अर वे थारे खात्तर परमेसवर तै प्रार्थना करै सै। वे थारे तै प्यार करै सै, क्यूंकि वे जाणै सै, के परमेसवर नै थारे पै बड़ा अनुग्रह करया सै। 15 परमेसवर का उसकै उस दान कै खात्तर धन्यवाद हो। जिस ताहीं हम ब्यान न्ही कर सकदे।

10 मै पौलुस, थारे ताहीं मसीह की दयालुता अर नम्रता कै साथ

बिनती करूँ सूँ हालाके मन्नै अहसास सै के थमनै इसा लागै सै, के आनै-साम्नै बात करण म्ह डरपोक सूँ अर सिर्फ चिट्ठी लिखकै शिक्षा देण म्ह ए साहसी सूँ। 2 मै थारे तै या बिनती करूँ सूँ, के जिब मै थारे थोरे आँऊ तो मनै उन माणसां तै कडाई तै बात ना करणी पड़ै, जो ये सोच्चै सै के हम दुनियावी तौर तरिक्कां कै मुताबिक चाल्लण आळे सां। 3 हालाके हम इस दुनिया म्ह रहवां सां, पर हम इस दुनिया के बाकी माणसां की ढाल लड़े-झगड़ते कोनी। 4 हम इन्सानी विचारां अर झूठी बहसबाजी नै नाश करण खात्तर दुनियावी हथियारां का न्ही पर परमेसवर के ताकतवर हथियारां का इस्तमाल करां सां। 5 हम इन्सानी बहस-बाजी की बजह तै आण आळी हरेक रुकावट नै दूर कर देवां सां, जो माणसां नै परमेसवर तै दूर राक्खै सै, हम उनकी बिद्रोही भावना नै कैद करकै मसीह का आज्ञाकारी बणा देवां सां, 6 अर जिब वे पूरी रितै तै मसीह के हुक्म नै मानण आळे बण जावै सै, तो हम मसीह यीशु के हुक्म नै ना मानण आळा ताहीं दण्ड देवां सां। 7 थम बाहरी दिखावट पै ध्यान देओ सों। जै किसे माणस नै खुद पै यो भरोस्सा हो के वो मसीह यीशु का सै, तो वो यो भी जाण ले के जिसा वो मसीह यीशु का सै, उस्से तरियां हम भी मसीह यीशु के सां। 8 क्यूंकै जै मै उस हक कै बारै म्ह और भी गर्व करूँ, जो प्रभु नै थारे बिश्वास ताहीं घटाण खात्तर न्ही पर थारे बिश्वास नै बढाण खात्तर म्हारै ताहीं दिया सै, तो मै शर्मिन्दा न्ही होऊँगा। 9 मै अपणी चिट्ठियाँ कै जरिये थमनै डराण की कोशिश न्ही करदा। 10 क्यूंकै थारे म्ह तै कई माणस कहवै सै, “की मेरी सारी चिट्ठी तो भोत कठोर अर असरदार सै; पर जिब मै आनै-साम्नै मिलु सूँ तो मै कमजोर अर बोल्लण म्ह बेकार लागू सूँ।” 11 जो इसा कहवै सै, वो न्यू समझ लेवै के जिसा पीठ पाछै चिट्ठियाँ म्ह म्हारे सन्देस सै, उस्से तरियां ए थारे स्याम्ही म्हारे काम भी होवैंगे। 12 क्यूंकै म्हारै म्ह या हिम्मत कोनी के हम अपणे-आपनै उन म्ह गिण्या अर मिलावां, जो अपणी बडाई खुद करै सै, अर अपणे-आप ताहीं आप्पस म्ह नाप-तौलकै एक-दुसरे तै बरोबरी करकै बेकूफ ठहरावै सै। 13 हम तो उस काम की हद तै बाहरणी घमण्ड कदे भी न्ही करागें, जो काम परमेसवर नै म्हारे ताहीं दिया सै, पर उस्से हद तक जो परमेसवर नै म्हारै खात्तर ठहरा दी सै, अर उस म्ह थम भी आगे सो, अर उन कामां की हद म्ह ए घमण्ड करागें। 14 जिब हम पैहली बार थारे थोरै पोहचे तो हम घमण्ड करण म्ह उस हद नै न्ही लांघे जित्त परमेसवर नै म्हारे ताहीं काम करण खात्तर ठहराया था। उसनै म्हारे ताहीं थारे इलाके म्ह काम

करण खात्तर ठहराया था, अर हम थारे ताहीं मसीह का सुसमाचार सुणाण आळे पैहले माणस सां। 15 अर हम हद तै बाहरणी दुसरयां की मेहनत पै घमण्ड न्ही करदे; पर हमनै आस सै के ज्यों-ज्यों थारा बिश्वास बधत जावैगा त्यों-त्यों हम अपणी हद कै मुताबिक थारे कारण और भी माणसां ताहीं मसीह का सुसमाचार सुणा पावांगे। 16 ताके हम थारी इलाके की हद तै पैरे दूर-दूर जगहां म्ह भी माणसां ताहीं सुसमाचार सुणावां, अर न्यू न्ही के हम दुसरयां की हद कै भीत्तर बणे बणाए कामां पै घमण्ड करा। 17 पर जिसा के पवित्र ग्रथ म्ह लिखा सै, जै कोए घमण्ड करै, तो वो प्रभु पै घमण्ड करै। 18 क्यूंकै जो अपणी बडाई करै सै वो न्ही, पर जिसकी बडाई प्रभु करै सै, वोए प्रभु की निगांह म्ह सही कुहवै सै।

11 थम उन माणसां की सह ल्यो सों जो अपणी खुद की बडाई करते

रहवै सै, इस करकै मै सोच्चै सूँ के थम मेरी भी सह ल्योगे जै मै थोड़ा सां बेकुपां के जिसा बरताव करूँ, हाँ, मेरी सह भी ल्यो सो। 2 क्यूंकै मै थारे तै प्यार करूँ सूँ अर थारा ख्याल भी राक्खूँ सूँ जिसा परमेसवर राक्खै सै। थम एक पवित्र कुवारी के समान सों, जिसकी सगाई मन्नै सिर्फ मसीह यीशु तै करण की, अर उस्से ताहीं सौंपण का वादा करया सै। 3 पर मै डरूँ सूँ के जिस तरियां तै सौंप नै अपणी श्यानपत तै पैहली बिरबानी हब्बा ताहीं भकाया, उस्से तरियां ए थारे मन उस सीधाई अर पवित्रता तै जो मसीह कै साथ चालण तै आवै सै, उस्तै कदे बहक न्ही जाओ। 4 जै कोए थारे थोरै आकै किसे दुसरे यीशु का प्रचार करै, जिसका प्रचार हमनै न्ही करया; या कोए और आत्मा थमनै मिलै, जो पैहल्या ना मिला था; या और कोए सुसमाचार सुणावै, जिस ताहीं थमनै पैहल्या न्ही मान्या था, तो थम इसनै खुशी तै स्वीकार कर लेते। 5 मै तो समझूँ सूँ के मै किसे बात म्ह बड़े तै बड़े प्रेरितां तै घाट न्ही सूँ। 6 जै मै बोल्लण मै अनाडी सूँ, तो भी मन्नै सुसमाचार अर मसीह का ज्ञान सै। मन्नै थारे ताहीं जो भी ज्ञान सिखाया सै, वो ज्ञान मन्नै थारे ताहीं साबित करकै दिखाया सै। 7 इस करकै मन्नै थारे खात्तर परमेसवर के सुसमाचार का प्रचार मुफ्त म्ह करया, के थारे ताहीं ऊँच्चा करण के मकसद तै मेरा खुद ताहीं नरम बणा लेणा मेरा अपराध था? 8 मन्नै दुसरी कलीसिया तै दान कठुा करया, ताके मै हर कीमत पै थारी मदद कर सकूँ, थम इस ताहीं चोरी करणा ना कहों। 9 अर जिब मै थारे गेल्या था, अर मेरे ताहीं पईसा की कमी होई, तो मन्नै किसे पै बोझ न्ही गेरया, क्यूंकै बिश्वासी भाईदाँ नै मैकिदुनिया परदेस तै आकै मेरी जहरत नै पूरा करया, अर मन्नै हरेक बात म्ह अपणे-आप ताहीं थारे पै बोझ बणण तै रोक्या, अर रोक्के रहूँगा। 10 जै मसीह की सच्चाई मेरै म्ह सै, तो अखाया परदेस म्ह कोए मन्नै इस घमण्ड तै न्ही रोकैगा। 11 मन्नै थारे तै पईसा न्ही लिया, क्यूंकै इस खात्तर न्ही, के मै थारे तै प्यार कोनी करदा? परमेसवर नै न्यू बेरा सै, के मै थारे तै प्यार करूँ सूँ। 12 मै थारे तै अर्थिक मदद कोनी ल्यु, ताके मै उन माणसां नै घमण्ड करण तै रोक सकूँ, जो या कहवै सै के हम भी परमेसवर की सेवा करां सां, जिसी थम

करो सों। 13 क्यूँकि इसे माणस झुट्ठे प्रेरित, अर छल तै काम करण आळे सै, अर मसीह के प्रेरित होण का झुट्ठा दावा करै सै। 14 या किमे अचम्भे की बात कोनी क्यूँकि शैतान खुद भी ज्ञोतिर्मय सुर्गदूत का रूप धारण करै सै। 15 इस करके जै उसकै सेवक भी धर्म के सेवकां का सा रूप धैरै, तो कोए बड़ी बात कोनी, पर उनका अन्त उनकै कामां कै मुताबिक होवैगा। 16 मैं फेर कहूँ सूं के, कोए मन्नै बेकूफ ना समझै, न्हीं तो बेकूफ ए सोचकै मेरी सह ल्यो, ताके माडा-सा मैं भी घमण्ड कर सकूँ। 17 बेथङ्क कहे होडी मेरी बात प्रभु की ओड तै कोनी, ये तो एक बेकूफ की घमण्ड म्ह कहे होडी बात सै। 18 जिब के घणखरे माणस तो अपणे दुनियावी जीवन पै घमण्ड करै सै, तो मैं भी घमण्ड करँगा। 19 थम तो श्याणे होकै खुशी तै बेकूफ की सह लेओ सों। 20 क्यूँकि जिब थमनै कोए गुलाम बणा लेवै सै, या जो भी थारे थोरै सै सब ले लेवै सै, या फँसा लेवै सै, या अपणे-आपने बड़ा बणावै सै, या थारे मँहूँ पै थप्पड मरै सै, तो थम सह लेओ सो। 21 के थम न्यू सोच्चों सों, के मन्नै शर्मिन्दा होणा पड़ैगा क्यूँकि मन्नै यो काम कोनी करया। पर जिस किसे बात म्ह कोए हिम्मत करै सै, मैं बेकूफी तै कहूँ सूं तो मैं भी हिम्मत कहूँ सूं। 22 के वे इङ्गानी सै? मैं भी इङ्गानी सूं। के वे इसाएली सै? मैं भी इसाएली सूं। के वे अब्राहम के वंशज सै? मैं भी अब्राहम का वंशज सूं। 23 के वैए मसीह के सेवक सै--मैं बेकूफ कै तरियां कहूँ सूं-मैं उनतै बाध सूं। मन्नै उनतै धणी मेहनत करी सै, उनतै धणा बार-बार कैदी बण्या सूं, अनगणित बार पिट्ठा गया सूं, कई बार मेरी जान संकट म्ह पड़ी। 24 पाँच बर मन्नै यहूदी अगुवां कै हाथ तै उन्तालीस कोडे खाए। 25 तीन बर मन्नै बैत खाई, एक बर मेरै पै पथर बरसाए गये; तीन बर जहाज, जिसपै मै चढ़ाया था, टूट गए; एक दिन अर एक रात मन्नै समुन्दर म्ह काट्या। 26 बार-बार मन्नै सफर करणा पड़या। कदे नदियाँ के, कदे डाकुआं के, कदे अपणे देशवासियाँ के, कदे नगरां के, जात आळा सै, कदे गैर यहूदियाँ तै, कदे जंगलां के कदे समुन्दरां के, कदे झुट्ठे विश्वासी भाईयाँ कै विचालै जोखां म्ह रहया। 27 मन्नै कई रात जाग के, भूक्खा-तिसाया रहकै, जाड़े म्ह; उयाड़ा रह के, करड़ी मेहनत करी अर भोत सी मुसीबत सहण करी सै। 28 इन सारी मुसीबतां के अलावा रोज मेरे पै सारी कलीसियां की भलाई अर फिक्र का बोझा बण्या रहवै सै। 29 जिब कोए कलीसियां म्ह कमजोर हो सै, तो मैं अपणे-आपने कमजोर महसूस कहूँ सूं, मैं दुखी हो जाऊँ सूं, जिब कोए किसे तै पाप करवावै सै। 30 जै घमण्ड करणा जरुरी सै, तो मैं अपणी कमजोरी की बातां पै घमण्ड करँगा। 31 परमेसवर, जो यीशु का पिता सै, वो सदा धन्य सै, वो जाणे सै के मैं झुठ न्हीं बोल्दा। (aión g165) 32 जिब मैं दमिश्क नगर म्ह था, तो अरितास राजा के राज्यपाल नै मेरे ताहीं कैदी बणाण के मकसद तै नगर म्ह पैहरा बिठा दिया था। 33 अर मैं टोकरे म्ह बैठकै खिड़की म्ह तै होकै भीत पै तै तारया गया, अर उसकै हाथ तै बच लिकड़या।

12 उतो घमण्ड करणा मेरै खात्तर ठीक कोनी तोभी करणा पढ़ै सै; ज्यातै मै प्रभु के दिए होए दर्शनां अर प्रकाशनां का जिक्र करँगा। 2 मैं मसीह म्ह एक माणस नै जाणु सूं; जिसनै चौदहा साल हो लिए, मै न्हीं जाणदा के वो माणस देह म्ह था, या फेर आत्मा म्ह था, सिर्फ परमेसवर ए जाणे सै, इसा माणस सबतै ऊँचे सुर्ग म्ह ठा लिया गया। 3 मैं उस्से बात नै दोहराऊ सूं, मै न्हीं जाणदा, के इसा होया था या फेर यो एक दर्शन था, परमेसवर ए जाणे सै। 4 के वो सुर्गलोक पै ठा लिया गया, अर ओड़े उसनै इसी अदभुत बात सुणी, जिनका जिक्र करणा किसे भी माणस के बस का कोनी, वे बात दुसरे माणसां ताहीं बताणा मना सै। 5 इसे माणस पै तो मैं घमण्ड करँगा, पर अपणे पै अपणी कमजोरियाँ नै छोड़, अपणे बारै म्ह घमण्ड न्हीं करँगा। 6 क्यूँकि जै मै घमण्ड करणा चाहूँ भी तो बेकूफ न्हीं बणुगाँ, क्यूँकि सच बोल्लूँगा; मै अपणी बड़ाई न्हीं करणा चाहन्दा, इसा ना होवै के जिसा कोए मन्नै देक्खै सै या मन्नै सुणे सै, मन्नै उसतै बाध समझै। 7 मेरे ताहीं परमेसवर नै जो अदभुत बात दिखाई सै, उन ताहीं देखकै मै घमण्ड म्ह ना जाऊँ, इस करकै मेरी देह म्ह काण्डा चुभाया, यानिके शैतान का एक दूत मेरै धुसरे मारे ताके मै फूल न्हीं जाऊँ। 8 इसकै बारै म्ह मन्नै प्रभु तै तीन बर बिनती करी के मेरै तै यो दूर हो जावै। 9 पर उसनै मेरै तै कह्या, “मेरा अनुग्रह तेरे खात्तर भोत सै, क्यूँकि मेरी सामर्थ कमजोरी म्ह सिद्ध होवै सै!” ज्यातै मै धणा राजी होकै अपणी कमजोरी पै घमण्ड करँगा के मसीह की सामर्थ मेरै पै छाया कर दी रहवै। 10 इस कारण मैं मसीह कै खात्तर कमजोरियाँ म्ह, अर बुराईयाँ म्ह, गरीबी म्ह, अर रोल्यां म्ह, अर संकटां म्ह राजी सूं; क्यूँकि जिब मै कमजोर होऊँ सूं, तभी मैं मसीह की शक्ति म्ह मजबूत होऊँ सूं। 11 मैं बेकूफ तो बण्या, पर थमनै ए मन्नै न्यू करण कै खात्तर मजबूर करणा। थमनै तो मेरी बड़ाई करणी चाहिये थी, क्यूँकि उतो मै किसे भी कोनी, तोभी उन बड्या तै बड़े प्रेरितां तै किसे बात म्ह घाट कोनी सूं। 12 सच्चे प्रेरित के लक्खण भी थारे बिचालै सारे ढाळ के थीरज सुधा निशान्ना, अर अनोखे कामां, अर सामर्थ के कामां तै दिखाए गये। 13 थम कौण-सी बात म्ह दुसरी कलीसियां तै घाट थे, सिर्फ इस म्ह के मन्नै थारे पै आर्थिक बोझ कोनी गेरया। मेरा यो अपराध माफ करो। 14 देख्यो, मैं तीसरी बर थारे थोरै आण नै त्यार सूं, अर मै थारे तै कोए मदद न्हीं ल्यूँगा, क्यूँकि मै थारी सम्पत्ति न्हीं बल्के थमनै ए चाहूँ सूं। क्यूँकि बाल्कां नै माँ-बाप कै खात्तर धन कछा न्हीं करणा चाहिये। 15 थारी आत्मा के भले खात्तर मै पक्का अपणा सब कुछ खर्च करण खात्तर तैयार सूं, बल्के आप भी खर्च हो जाऊँगा। मै थारे तै प्यार बरूँ सूं, पर थम मेरै तै भोत कम प्यार करो सों। 16 कुछ भी हो, मै थारे पै बोझ कोनी बण्या। फेर भी कोए नै कोए मेरे पै यो दोष जस्तर लगा सकै सै, के मन्नै श्याणपत तै थारे ताहीं थोक्खा देकै फँसा लिया। 17 मन्नै ना ए तो तीतुस अर ना ए किसे और के जरिये अपणे खात्तर थारे तै पर्द्दसे लिये। 18 मन्नै तीतुस ताहीं समझाकै उसकै गेल्या उस भाई

ताहीं भेज्या। के तीतुस नै छळ करके थारे तै किमे लिया? के म्हारा सुभाव एक ए तरियां तै प्रेरित का न्ही था? के हम उनकी ए लीक पै न्ही चाल्ले? 19 थम इब भी योए समझारे सों, के हम थारे स्याम्ही बदले म्ह जवाब देण लागरे सां। हम तो परमेसवर नै हाजर जाणकै मसीह म्ह बोल्ला सां, हे प्यारे बिश्वासी भाईयो, हम ये सारी बात थमनै बिश्वास म्ह मजबूत करण खात्तर कहां सां। 20 क्यौंके मन्नै इस बात का डर सै, कदे इसा ना हो के मै आकै जिसा चाहूँ सूं, उसाए थमनै पाऊँ; अर मन्नै भी जिसा न्ही चाहो सो उसाए पाओ; मन्नै इस बात का डर सै के ओङै झगडा, जळण, छो, उदासी, बिरोध, चुगली, घमण्ड अर बखेडे ना हों; 21 कदे इसा ना हो के जिब मै दुबारा आऊँ, तो मेरा परमेसवर मेरै ताहीं अपमानित करै। अर मन्नै घणखरयां खात्तर फेर दुखी होणा पडै, जिन नै पैहल्या पाप करया था। अर भुन्डे काम अर जारी अर लुचपण के कारण पाप करणा न्ही छोड्या।

13 पवित्र ग्रन्थ म्ह लिख्या सै, के दो या तीन गवाहां के मुँह तै हरेक बात सच साबित हो जावै सै। जिब मै दुसरी बार थारे तै मिलण आया था, तो मन्नै उन माणसां ताहीं चेतावनी देई, जो पैहल्या तै पाप करण लागरे थे। इब मन्नै दुसरी बार चिठ्ठी लिख के थारे ताहीं अर दुसरे बाकी माणसां तै भी चेतावनी देकै कहां के वे पाप ना करै। इब मै तीसरी बार थारे धोरै आण आळा सूं, अर जै इब भी उन माणसां नै पाप करणा न्ही छोड्या सै, तो कोए भी उननै परमेसवर के दण्ड तै बचा न्ही पावैगा। 3 मन्नै थारे तै कहां सै, के उन ताहीं दण्ड मिलैगा पर फेर थम सबूत चाहें सों, के ये बात मै मसीह के जरिये बोल्लू सूं। अर जिब मसीह थारे ताहीं सुथरैगा तो थारे खात्तर कमजोर न्ही पर थारे बीच म्ह सामर्थी होगा। 4 वो कमजोर होते होए कूऱ्स पै चढाया तो गया, तोभी परमेसवर की सामर्थ तै जिन्दा होया। हम भी तो मसीह के समान कमजोर सां, पर थारे खात्तर परमेसवर की सामर्थ तै हम उसकै साथ जीवांगें। 5 अपणे-आप ताहीं परखो, के बिश्वास म्ह सच्चे सां के न्ही। जै थम अपणे-आपनै सच्चा पाओ, तो थम इस बात नै जाण ल्योगे, के यीशु मसीह थारे म्ह वास करै सै। अर जै मसीह थारे म्ह वास न्ही करदा तो थम अपणे परखे जाण म्ह हारगे सों। 6 पर मेरी आस सै के थम या जाण ल्यो, के थम अपणे परखे जाण म्ह न्ही हारे। 7 भलाए थारे म्ह तै कईयाँ नै यो लागै सै के हम सच्चे प्ररित कोनी। फेर भी हम अपणे परमेसवर तै या प्रार्थना करा सां के थम कोए बुराई ना करो, बल्के भलाई करो। 8 जै हम सच्चाई के बिरोध म्ह हम कुछ भी न्ही कर सकदे। हम सच के पक्षधर ए रह सकां सै। 9 जिब हम कमजोर सां अर थम ठाढ़ु सों, तो हम राज्जी होवां सां, अर या प्रार्थना भी करा सां, के थम बिश्वास म्ह सिद्ध हो जाओ। 10 इस करकै मै थारे तै दूर रहकै ये सारी बात लिखूँ सूं, के ओङै आण पै, मन्नै प्रभु के जरिये दिए गये हक तै मन्नै थारे ताहीं दण्ड देणा ना पडै, क्यौंके मै इस हक ताहीं थारे बिश्वास नै कमजोर करण खात्तर इस्तमाल करणा चाहूँ सूं, ना के थारे बिश्वास नै कमजोर करण खात्तर। 11 हे बिश्वासी भाईयो, आखर म्ह मै थारे तै कहणा चाहूँ सूं, के आनन्दित

रहों, सिद्ध बण्दे जाओ, अर एक-दुसरे नै उत्साहित करो, एक ए मन रहों, मिल-जुल के रहों। अर प्यार अर शान्ति का देण आळा परमेसवर थारे गेल्या होवैगा। 12 आप्स म्ह एक-दुसरे तै गळे मिलकै प्यार तै नमस्कार करो। 13 सारे पवित्र माणस थारे ताहीं नमस्कार कहवै सै। 14 प्रभु यीशु मसीह का अनुग्रह अर परमेसवर का प्यार अर पवित्र आत्मा का साइझापण थारे सारया कै गैल होंदा रहवै।

गलातियों

1 या चिट्ठी मुझ पौलुस की ओड़ तै सै, मै प्रेरित होण कै खात्तर बुलाया गया सू। मेरा प्रेरित होणा किसे माणस या माणसां की ओड़ तै नही बल्के यीशु मसीह के जरिये होया सै, जिस ताहीं पिता परमेसवर नै मेरे होए म्ह तै जिवाया। 2 या चिट्ठी गलातिया परदेस की कलीसियाओं कै खात्तर, उन सारे बिश्वासी भाईयाँ की ओड़ तै सै, जो मेरै गेल्या सै। 3 मै प्रार्थना करूं सूं के परमेसवर पिता अर म्हारे प्रभु यीशु मसीह की ओड़ तै थमनै अनुग्रह अर शान्ति मिल्दी रहवै। 4 म्हारे परमेसवर अर पिता की मर्जी के मुताबिक मसीह यीशु नै अपणे-आप ताहीं म्हारे पापां के कारण बलिदान कर दिया ताके हम आज की दुनिया के माणसां के कुं असर तै बचे रहवां। (aiōn g165) 5 परमेसवर का गुणगान अर बड़ाई युगायुग होंदी रहवै। आमीन। (aiōn g165) 6 मन्नै अचम्भा होवै सै के परमेसवर नै थरे ताहीं मसीह के अनुग्रह तै बुलाया उसतै थम इतीनी तावळे भटक कै अलग ए तरियां के सुसमाचार पै बिश्वास करण लाग्ये। 7 सच्चा सुसमाचार एके सै, जो के मसीह का सै, पर बात या सै, के कुछ लोग इसे सै जो मसीह के सुसमाचार नै बदलना चाहवै सै, अर थमनै भरमाणा चाहवै सै। 8 पर जै म्हारे म्ह तै, या सुर्ग तै उतराया होया कोए सुर्गदूत भी उस सुसमाचार नै छोड़ जो हमनै थरे ताहीं सुणाया सै, कोए अलग सुसमाचार थरे ताहीं सुणावै, तो परमेसवर उस ताहीं श्राप देगा। 9 जिसा हमनै पैहल्या कह्या सै, उसाए मै इब फेर कहूं सूं के उस सुसमाचार नै छोड़ जिस ताहीं थमनै मान्या सै, जै कोए अलग सुसमाचार सुणावै सै, तो श्रापित हो। 10 मै माणसां नै खुश करण की कोशिश न्ही करदा, पर परमेसवर नै खुश करण की कोशिश करूं सूं जै मै इब लग माणसां नै खुश करदा रहन्दा तो मसीह का दास न्ही होंदा। 11 हे बिश्वासी भाईयो, मै थमनै बता द्यु सूं के जो सुसमाचार मनै सुणाया सै, वो माणस के जरिये बणाया गया कोन्या। 12 क्यूँके वो मन्नै मेरे पूर्वजां, की ओड़ तै नही पोंहच्या, अर ना माणसां के जरिये सिखाया गया, पर यीशु मसीह नै सुसमाचार समझाण म्ह मेरी मदद करी। 13 थमनै सुणा होगा के यहूदी पंथ म्ह जो मेरा चाल-चलण था वो किसा था, मै परमेसवर की कलीसिया के बिश्वासियाँ ताहीं घणा काल अर उन ताहीं नाश करण की कोशिश करया करूं था। 14 अर मै यहूदी मत म्ह अपणे पूर्वजां की शिक्षा का अध्यन करण अर उन ताहीं मानण म्ह अपणे हम उम्र के यहूदियाँ म्ह भोत उत्सुक था। 15 पर परमेसवर की जिब इच्छा होई के वो मेरे पै अपणे बेटे नै जाहिर करै के मै गैर यहूदियाँ म्ह उसका सुसमाचार सुणाऊँ, उसनै मेरे ताहीं मेरी माँ की कोख्य म्ह ए चुण लिया, अर अपणे अनुग्रह तै मेरे ताहीं बुला लिया था। तो मनै किसे की राय कोनी ली, 17 अर ना यरुशलेम म्ह उनकै धोरै ग्या जो मेरै तै पैहल्या प्रेरित चुणे गये थे, पर जिब्बे अरब देश म्ह चल्या गया अर फेर ओड़ तै दमिश्क नगर म्ह बोहड़ ग्या। 18 फेर तीन साल के पाच्छै मै पतरस जो प्रेरित सै उसतै मिलण खात्तर यरुशलेम ग्या, अर उसकै धोरै

पन्द्रह दिन तैई रह्या। 19 पर मै प्रभु यीशु मसीह के भाई याकूब नै छोड़ और किसे प्रेरित तै न्ही मिल्या। 20 परमेसवर मेरा गवाह सै के मन्नै थरे ताहीं जो लिख्या सै उस म्ह कुछ भी झूठ कोनी। 21 उन प्रेरितां के मिलण के बाद मै सीरिया अर किलिकिया के परदेसां म्ह आया। 22 पर यहूदिया परदेस की कलीसियाँ के बिश्वासी भाईयाँ नै जो मसीह म्ह बिश्वास करै थे, उननै मेरा मुँह कदे न्ही देख्या था, 23 पर न्यू सुण्या करै थे के एक बखत था जो हमनै सताण आळा था, इब वो ए उस बिश्वास का सुसमाचार सुणावै सै जिसनै पैहल्या नाश करै था। 24 अर वे मेरै बारै म्ह परमेसवर की बड़ाई लगातार करै थे।

2 चौदहा साल कै पाच्छै मै बरनबास के गेल्या फेर यरुशलेम नगर म्ह ग्या, अर तीतुस नै भी गेल्या लेग्या। 2 मै इस खात्तर ओड़ गया क्यूँके परमेसवर नै मेरे ताहीं ओड़ जाण खात्तर कह्या था, अर जिब मै ओड़ था तो मै कलीसिया के अगुवां तै एकान्त म्ह मिला, अर उस सुसमाचार के बारें म्ह उन ताहीं बताया, जो मै गैर यहूदियाँ म्ह प्रचार करूं सूं, ताके इसा ना हो के जो मन्नै पैहले अर जो इब भी करण लागरया सूं, उसका कोए नतिज्जा ना लिकडै। 3 पर तीतुस जो मेरा संगी साथी सै अर जो यूनानी सै, उसका कदे खतना कोनी होया पर कलीसिया के अगुवां नै जो यरुशलेम म्ह सै उस ताहीं अपणालिया, अर उननै उस ताहीं खतना करण खात्तर मजबूर कोनी करया। 4 तो या बात एक समस्या बणागी, उन झूठे भाईयाँ के कारण होया जो चोरी तै शुस आये थे, के उस आजादी का जो मसीह यीशु म्ह हमनै मिली सै, भेद लेकै हमनै यहूदी नियम-कायदा के दुबारा तै दास बणा दे। 5 उनकै साथ एक पल भी हमनै सहमत होणा न्ही चाह्या, ताके थम सुसमाचार की सच्चाई के मुताबिक जिन्दगी जिओ। 6 उन कलीसिया के अगुवां ताहीं जो यरुशलेम नगर म्ह थे, उननै मेरे ताहीं मजबूर कोनी करया, के मै अपणे सन्देस नै बदलु, जो मै थमनै सिखाऊँ सूं। इसतै कोए फर्क कोनी पड़ता, के वो अगुवे मेरे खात्तर के सै, क्यूँके परमेसवर बाहरी रूप नै देख्यै क्याय न्ही करदा। 7 पर इसके उल्ट जिब उन अगुवां नै देख्या के परमेसवर नै पतरस ताहीं हक दे राख्या सै, वो के यहूदी माणसां ताहीं सुसमाचार सुणावै, उस्से तरियां गैर यहूदियाँ के खात्तर मेरे ताहीं भी सुसमाचार सुणाणा सौच्या ग्या। 8 (क्यूँके जिसनै पतरस तै यहूदी माणसां म्ह प्रेरिताई का काम बड़े असरदार ढंग तै करवाया, उस्से नै मेरै तै भी गैर यहूदियाँ म्ह असरदार काम करवाया), 9 जो लोग कलीसिया के खाभे समझे जावै थे, यानी याकूब, पतरस, अर यूहन्ना, उननै अनुग्रह का वो वरदान पिच्छाणा जो मेरे ताहीं मिला सै। उननै मेरै ताहीं अर बरनबास ताहीं अपणा साथी समझकै म्हारे ताहीं खास सहभागी बणा लिया। वे इस बात खात्तर सहमत होगे के हम गैर यहूदियाँ कै थोरै जावै, अर वे यहूदियाँ के थोरै जावै। 10 उननै म्हारे तै सिर्फ याए बिनती करी के हम यरुशलेम के गरीब बिश्वासी भाईयाँ की मदद करां, अर इससे काम नै करण की मै खुद भी कोशिश करूं था। 11 एक दिन जिब पतरस अन्ताकिया नगर म्ह आया, तो मन्नै बिश्वासी भाईयाँ के स्याम्ही उस

ताहीं फटकारा, क्यूँकि जो वो काम करै था वो गलत था। 12 वो पैहले गैर यहूदियाँ कै गैल खाया-पिया करै था, जिब कुछ विश्वासी जो याकूब नै यरुशलेम नगर म्ह भेज्जे थे, तो उसनै अपणे-आप ताहीं गैर यहूदियाँ तै अलग कर लिया, अर उनकै गैल खाणा-पीणा छोड़ दिया अर उसनै यहूदी माणसां के डरकै मारे इसा करया, क्यूँकि वे चाहवै थे, के गैर यहूदियाँ का भी खतना हो। 13 पतरस के गेल्या बाकी बचे यहूदी माणस भी उसके कपट म्ह शामिल होगे, अर उन म्ह बरनबास भी शामिल था। 14 पर जिब मन्नै देखा के उनका सुभाव सुसमाचार की सच्चाई के मुताबिक कोनी, तो मन्नै सारे विश्वासी भाईयाँ कै स्याम्ही पतरस तै कहवा, “जिब तू यहूदी होकै गैर यहूदियाँ कै तरियां चाल्लै सै अर यहूदी माणसां की तरियां चालन खातर क्यूँ कहवै सै।” 15 हम तो जन्म तै यहूदी सां, अर पापी गैर यहूदियाँ म्ह तै कोन्या। 16 हम यहूदी विश्वासी यो जाणा सां, के माणस मूसा नबी के नियम-कायदा तै न्हीं, पर यीशु मसीह पै विश्वास करण के जरिये परमेसवर की नजर म्ह धर्मी बणै सै, इस खातर हमनै खुद भी प्रभु यीशु मसीह पै विश्वास करया, ताके हम नियम-कायदा तै न्हीं, पर यीशु मसीह है विश्वास करण तै परमेसवर की नजर म्ह धर्मी बणा, क्यूँके के मूसा नबी के नियम-कायदा तै कोए माणस धर्मी न्हीं बणैगा। 17 हम जो मसीह के जरिये परमेसवर की नजर म्ह धर्मी बणणा चाह्हा सां, बल्के इसकै के हम मूसा नबी के नियम-कायदा नै मानन के जरिये, तो कुछ यहूदी हमनै पापी समझै सै (क्यूँकि इब हम यहूदी नियम-कायदा नै कोनी मानते) तो के इसका मतलब यीशु मसीह नै म्हरे तै पाप करवाया, न्हीं बिलकुल न्हीं। 18 पर मै सचमुच म्ह पाप करूँ सूँ जै मै उन काम्हां नै करूँ सूँ जिन ताहीं मन्नै छोड़ दिया था जिसा के माणस परमेसवर की नजर म्ह धर्मी बणणा चाहवै, मूसा नबी के नियम-कायदा के मानन के जरिये। 19 मै जाणु सूँ के मूसा नबी के नियम-कायदा के मानन तै मै धर्मी न्हीं बण सकता, तो मै सोच्चु सूँ के मै नियम-कायदा कै खातर मर जाऊँ ताके परमेसवर कै खातर मै सदा जिन्दा रहूँ 20 यो इसा सै, के मान्नो जिसा मै मसीह कै गैल क्रूस पै मारया गया, अर इब मै जिन्दा न्हीं रह्हा, पर मसीह मेरै म्ह जीवै सै, अर इब जो मै जीण लागरया सूँ, तो सिफ परमेसवर कै बेटै पै विश्वास करण के जरिये जिसनै मेरै तै इतणा प्यार करया के मेरे खातर अपणी जान दे दी। 21 मै परमेसवर कै अनुग्रह नै बेकार न्हीं बतान्दा, क्यूँके जै नियम-कायदे धार्मिकता का कारण होन्दे तो मसीह का जान देणा बेकार हो जान्दा।

3 हे बिना अकल के गलातिवासियो! किसनै थारे ताहीं बहका दिया सै? मन्नै थारे ताहीं समझाया सै के यीशु मसीह के क्रूस पै जान देण के जरिये उसनै के हासिल करया। 2 मेरे ताहीं एक बात बताओ के थमनै पवित्र आत्मा, मूसा नबी के नियम-कायदा के मानन तै पाया था या विश्वास की खबर तै जो हमनै थारे ताहीं सुणाई थी? 3 के थम इसे बेअकल के सों के थमनै नई जिन्दगी पवित्र आत्मा के जरिये शरु करी पर इब थम अपणी जिन्दगी का अन्त अपणी ताकत तै करण चाहो

सों? 4 जिब थम विश्वासी बणै तो थमनै भोत दुख ठाया, मै उम्मीद करूँ सूँ के थमनै बेकार म्ह ए वो दुख न्हीं ठाया। 5 परमेसवर थमनै पवित्र आत्मा भरपूरी तै कहवै सै, अर जो थारे म्ह सामर्थ के काम करै सै, के वो मूसा नबी के नियम-कायदा के मानन तै या मसीह के सुसमाचार पै विश्वास करण तै इसा करै सै? 6 अब्राहम के बारें म्ह पवित्र ग्रन्थ या कहवै सै, “अब्राहम नै तो परमेसवर पै विश्वास करया अर उसकी बजह तै परमेसवर नै उस ताहीं धर्मी बणा दिया।” 7 तो यो जाण त्यो के जो अब्राहम की तरियां विश्वास करण आठे सै, वेए अब्राहम के वंशज कुहावैगें। 8 अर परमेसवर नै पवित्र ग्रन्थ म्ह पैहल्या तै ए यो कहवा, के वो गैर यहूदियाँ नै विश्वास के जरिये धर्मी बणावैगा, परमेसवर नै भोत पैहले तै ए अब्राहम ताहीं यो सुसमाचार सुणा दिया था, के “तेरे म्ह तै सारी जात आशीष पावैगी।” 9 जितने मसीह पै विश्वास करण आठे सै, वे अपणे विश्वास के कारण वोए आशीष पावैगें जो अब्राहम नै पाई थी। 10 इस करैके जितने माणस मूसा नबी के नियम-कायदा नै मानकै परमेसवर की नजर म्ह धर्मी बणण की सोच्चै सै, वे सारे परमेसवर की ओड़ तै श्रापित सै, क्यूँकि पवित्र ग्रन्थ म्ह लिख्या सै, “वो श्रापित सै, क्यूँके कोए भी माणस हर पल नियम-कायदा की किताब म्ह लिखी होई सारी बातां नै निभा न्हीं सकदा।” 11 पर या बात साफ सै, के मूसा नबी के नियम-कायदा कै मानन के जरिये परमेसवर की नजर म्ह कोए भी धर्मी न्हीं बणदा, क्यूँकि पवित्र ग्रन्थ कहवै सै, के “जो मसीह पै विश्वास करैगा, परमेसवर उसनै ए धर्मी बणावैगा।” 12 पर मूसा नबी के नियम-कायदा नै मानकै जीणा अर परमेसवर पै विश्वास करैके जीणा एक जिसा कोनी, जिसा पवित्र ग्रन्थ म्ह लिख्या सै पर “जो इन सारी बातां नै मानैगा, वो उनकै कारण जिन्दा रह्हैगा।” 13 हम सारे परमेसवर के श्राप के लायक थे, क्यूँकि हम उसके नियम-कायदा नै पूरी तरियां न्हीं मानते, तोभी मसीह म्हरै ताहीं उस श्राप तै छुड़ावै सै, जो नियम-कायदा के जरिये आवै सै। जिब मसीह क्रूस पै मारया गया, तो उसनै अपणे उपर वो श्राप ले लिया, जिसा के पवित्र ग्रन्थ म्ह लिख्या सै, के “श्रापित सै वो जो क्रूस पै लटकाया जावै सै।” 14 मसीह नै यो इस करैके करया, ताके जिसका वादा परमेसवर नै अब्राहम तै करया था, वो आशीष मसीह यीशु पै विश्वास करण तै गैर यहूदियाँ तै पोहच सकै, अर हम मसीह म्ह विश्वास के जरिये उस पवित्र आत्मा नै पा लेवां, जिसका देण का वादा उसनै म्हरे तै करया सै। 15 हे विश्वासी भाईयो, मै रोज की जिन्दगी का उदाहरण देकै थमनै समझाऊँ सूँ, जिब दो आदमी कोए करार करै सै अर उस ताहीं पक्का करै सै, तो ना कोए उसनै घटा सकै सै अर ना उस म्ह किमे बढ़ा सकै सै। 16 इस तरियां परमेसवर नै वादा अब्राहम अर उसकै वंश तै करया था। पवित्र ग्रन्थ न्यू कोनी कहवै, के तेरी “वंशां नै,” जिसका मतलब भोत सारे माणस, पर यो एक माणस के बारें म्ह कहवै सै “तेरे वंश नै” अर वो मसीह सै। 17 मेरे कहण का मतलब यो सै, के परमेसवर नै अब्राहम के गैल करार करण कै चार सौ तीस साल के बाद मूसा नबी के नियम-कायदे दिए,

जो उस करार नै ना तो तोड़ पाए, अर ना उसके वादे नै टाळ पाए। 18 परमेस्वर माणसां नै इस बजह तै आशीष कोनी देवै, के वे मूसा नबी के नियम-कायदा नै मान्नै, बल्के वो इस करकै देवै सै, क्यूँके इसका देण का परमेस्वर नै वादा करया था, अर अब्राहम ताहीं भी ये आशीष इस करकै मिली थी। 19 जिब फेर नियम-कायदे क्यूँ दिये गये? नियम-कायदे इस खात्तर दिए गये ताके लोग जाण सकै के पाप के सै। मूसा नबी के नियम-कायदे तब तक रहणे थे, जिब तक अब्राहम की पीढ़ी म्ह तै जिसका परमेस्वर नै वादा करया था के वो आ ना जावै। मूसा नबी ताहीं नियम-कायदे सुर्गदूतां कै जरिये दिए गये थे अर मूसा नबी लोगों के बीच एक बिचौलिया बण्या। 20 परमेस्वर नै अब्राहम तै वादा करया था इस करकै बिचौलिया की जरूरत कोनी थी। 21 तो के मूसा नबी के नियम-कायदे परमेस्वर के वादे कै बिरोध म्ह सै? न्हीं बिल्कुल न्हीं! क्यूँके जै इसे नियम-कायदे सै, जो परमेस्वर की नजर म्ह हमनै धर्मी बणावै, तो सदा का जीवन मूसा नबी के नियम-कायदा के मानण तै हम पा सकां सां। 22 पर पवित्र ग्रन्थ हमनै बतावै सै के हम सब बापी सां, ताके परमेस्वर उन माणसां नै जो यीशु मसीह पै बिश्वास करै सै वो दे सकै जिसका उसनै उसका वादा करया सै। 23 पर इसतै पैहल्या के लोग प्रभु यीशु मसीह पै बिश्वास करै हम यहूदी कैद म्ह थे, नियम-कायदे म्हारी रुखाली करै थे। हम कैद म्ह जिब ताहीं रहे जिब के मसीह कौण सै अर हम उस म्ह बिश्वास करते रहवां। 24 नियम-कायदे म्हारे ताहीं इस खात्तर दिए गये, ताके मसीह के आण तक वो म्हारी अगुवाई कर सकै अर म्हारे ताहीं सम्भाळ सकै, ताके हम मसीह पै बिश्वास करण के जरिये परमेस्वर की नजर म्ह धर्मी बणा। 25 जिब हमनै मसीह यीशु पै भरोस्सा करया सै तो नियम-कायदा की अगुवाई अर मदद की जरूरत कोनी। 26 थम सारे मसीह यीशु पै बिश्वास करण के कारण परमेस्वर की ऊलाद सौं। 27 अर थारे म्ह तै जितना नै मसीह के नाम म्ह बपतिस्मा लिया सै, उननै नई जिन्दगी पा ली सै। 28 इब मसीह म्ह यहूदी अर गैर यहूदी म्ह कोए फर्क न्हीं रह्या, अर ना नौकर ना आजाद म्ह, ना लोग अर लुगाई म्ह कोए फर्क रह्या, क्यूँके थम सारे मसीह यीशु म्ह एक सौं। 29 अर जै थम मसीह के सौं तो अब्राहम के वंश अर वादे के मुताबिक वारिस भी सौं।

4 मै थमनै एक उदाहरण देकै समझाऊँ सूँ, के बेट्ठा पिता की सम्पत्ति का वारिस होगा, जिब ताहीं वो बाल्क सै, वो एक दास की तरियां सै, इब ताहीं उसका सम्पत्ति पै कोए हक कोनी पर आण आळे बखत म्ह वो पिता की सम्पत्ति का मालिक होवैगा। 2 पर जिब ताहीं बेटे की सही उम्र न्हीं हो अर सारी सम्पत्ति का मालिक ना बण जावै सै, वो रुखवालियाँ अर भण्डारियाँ कै बस म्ह रहवै सै। 3 उस्से तरियां जिब हम मसीह नै नीं जाणा थे, तो दुनिया की रीति-रिवाजां अर नियम-कायदा के गुलाम थे। 4 पर जिब सही बखत आया तो परमेस्वर नै अपणा बेट्ठा इस दुनिया म्ह भेज्या, अर एक बीरबानी नै उस ताहीं जन्म दिया, वो यहूदी माणसां म्ह पैदा होया अर उसनै मूसा के नियम-कायदा

ताहीं मान्या। 5 ताके हमनै छुड़ाले जो हम मूसा नबी के नियम-कायदा के अधीन सां, अर हमनै उसकी ऊलाद होण का हक मिल्या। 6 इब थम उसकी ऊलाद सौं, इस करकै परमेस्वर नै अपणे बेटे की आत्मा नै म्हारे दिलां म्ह भेज्या सै, जो आत्मा परमेस्वर ताहीं “हे अब्बा, हे पिता” कहकै नै बुलावै सै। 7 इस करकै तू इब नौकर कोनी, पर उसकी ऊलाद सै, अर परमेस्वर वो सारी चीज थमनै देवैगा जिसनै उसका वादा थारे ताहीं देण का करया सै। 8 जिब थम परमेस्वर नै न्हीं जाणो थे तो उस बखत थम उसके गुलाम थे, जो असलियत म्ह परमेस्वर सै ए कोनी। 9 इब थारा रिश्ता परमेस्वर कै गैल सै, उसनै म्हारे ताहीं अपणा बेट्ठा होण खात्तर बुलाया सै, तो उन कमजोर अर निकम्मी पुराणी शिक्षाओं के गुलाम बणण खात्तर क्यूँ उसकी ओड जाओ सौं, के थम दुबारा उनके गुलाम होणा चाहो सों? 10 थम गैर यहूदी बिश्वासी लोग दिन, महिन्ना, सही बखत अर सालां नै मानो सौं, जो मूसा नबी के नियम-कायदा के मुताबिक सै। 11 मै थारे बारै म्ह ढँसूँ, जो थम करो सौं, कदे इसा ना हो के जो मेहनत मन्नै थारे खात्तर करी सै वा बेकार हो जावै। 12 हे बिश्वासी भाईंगो, मै थारे तै बिनती कहूँ सूँ के अपणे-आपने मूसा नबी के नियम-कायदा तै आजाद करो, क्यूँके मै भी मूसा नबी के नियम-कायदा तै आजाद होया सूँ, जिस तरियां थम गैर यहूदी होण तै नियम-कायदा तै आजाद हो, थमनै मेरे साथ बुरा बरताव न्हीं करया। 13 थमनै याद होगा के मन्नै पैहलम पहल देह की बीमारी कै कारण थारे ताहीं सुसमाचार सुणाया। 14 मेरी बीमारी थारे खात्तर मुसीबत थी, फेर भी थमनै ना तो मेरे तै नफरत करी, अर ना ए मेरे ताहीं तुछ जाण्या, पर परमेस्वर के सुर्गदूत बल्के खुद मसीह यीशु के समान मेरे ताहीं अपणाया। 15 थम खुश थे, पर इब थारी खुशी कित्त गई? मै थारा गवाह सूँ के थम मेरे खात्तर सब कुछ कुरबान कर सको थे, बल्के अपणी आँख भी लिकाडै के मन्नै दे देन्दे। 16 तो के थारे तै सच बोलण के कारण मै थारा बैरी बणग्या सूँ? 17 वे थमनै अपणे पक्ष म्ह करणा तो चाहवै सै, पर भले मकसद तै न्हीं, बल्के उनका मतलब तो थारे ताहीं मेरे तै न्यारा पाड़ना सै ताके थम उनके ए चेल्लें बण जाओ। 18 सदा ए आच्छे मकसद कै खात्तर उत्साही होणा आच्छा सै अर सिर्फ उस्से बखत न्हीं, जिब मै थारे गेल्या रहूँ सूँ। 19 हे मेरे बाल्कों, जिस तरियां एक औरत बच्चा होण कै बखत जो दर्द सहवै सै उस्से तरियां मै भी थारे खात्तर दर्द सहु सूँ मै जिब ताहीं दर्द म्ह रहूँगा जिब ताहीं थम मसीह म्ह सिद्ध ना हो जाओ। 20 जी तो इसा कैर सै, के इस बखत मै थारे धोरै होन्दा अर प्यार तै थारे ताहीं समझान्दा, क्यूँके मेरी समझ म्ह कोनी आन्दा के मै थमनै के कहूँ। 21 थम जो मूसा नबी के नियम-कायदा कै अधीन होणा चाहवै सौं, मेरी बाल्क थे ध्यान धो, मै बताऊँ सूँ के मूसा नबी के नियम-कायदा की किताब म्ह के लिखा सै? 22 पवित्र ग्रन्थ म्ह यो लिख्या सै, के अब्राहम कै दो छोरे होए, उसका एक छोरा हाजिरा नाम की नौकराणी तै पैदा होया अर दुसरा सारा तै पैदा होया जो उसकी ब्याहता थी। 23 पर जो नौकराणी तै पैदा होया था वो एक

साधारण बच्चा था जो शरीर की इच्छा तै पैदा होया, अर जो उसकी व्याहता बीरबानी तै पैदा होया, वो परमेसवर के वादे कै मुताबिक पैदा होया जो उसनै अब्राहम तै करया था। 24 इन बात्तां तै हमनै या सीख मिलै सै, ये बीरबानी मान्नो दो करार सै। करार जो परमेसवर नै सीनै पहाड़ पै इसाएली माणसां तै जो करया था वो हाजिरा की तरियां सै। 25 अर हाजिरा मान्नो अरब देश का सीनै पहाड़ सै, अर वो आज के यशस्वलेम नगर की तरियां सै जड़ के माणस मूसा के नियम-कायदा के समान सै। 26 पर सुर्गीय यहशलेम अब्राहम की बिरबानी सारा के समान सै, अर उसके बाल्क गुलाम कोनी, यो यहशलेम विश्वासियाँ कै खात्तर माँ की तरियां सै। 27 जिसा यशायाह नै पवित्र ग्रन्थ म्ह लिख्या सै, “हे बाँझ बिरबानी, तू जो बाल्क पैदा न्ही कर सकदी, आनन्दत हो, तू जो प्रसव-पीढ़ी तै अनजाण सै, ऊँच्ची आवाज म्ह जयजयकार कर, क्यूँके छोड़ी होइ की ऊलाद सुहागण की ऊलाद तै भी घणी सै।” 28 हे विश्वासी भाईयो, थम इसहाक की तरियां हो क्यूँके थारा जन्म परमेसवर के वादे कै मुताबिक होया सै जो उसनै अब्राहम तै करया सै। 29 अर जिसा उस बखत शरीर की इच्छा के मुताबिक जन्मा होया बेट्ठ परमेसवर की आत्मा के शक्ति कै मुताबिक जन्मे होए बेट्ठे नै सतावै था, उस्से तरियां हम भी उन माणसां तै सताये जावां सां, जो यो चाहवै सै कै परमेसवर की नजर म्ह धर्मी बणण खात्तर मूसा नबी के नियम-कायदा नै मानना जर्सी सै। 30 पर पवित्र ग्रन्थ कहवै सै, के “नौकराणी अर उसके बेट्ठे नै लिकाड़ दे, क्यूँके वो व्याहता बिरबानी के बेट्ठे कै गैल कदे भी पिता की सम्पत्ति का वारिस न्ही होगा।” 31 इस करकै हे विश्वासी भाईयो, हम नौकराणी की ऊलाद कोनी जो के मूसा नबी के नियम-कायदे सै, बल्के व्याहता बिरबानी की ऊलाद सां जो के विश्वास सै।

5 मसीह नै म्हारे ताहीं मूसा नबी के नियम-कायदा तै आजाद कर दिया

सै, इस करकै अपणी आजादी बणा के राक्खो, अर मूसा के नियम-कायदा नै मानन खात्तर कोए थमनै गुलाम ना बणावै। 2 सुणो! मै, पौलुस, थारे तै कहूँ सूँ कै जै खत्तना करावोगे, तो मसीह तै थमनै किमे फायदा न्ही होगा। 3 फेर भी मै एक खत्तना कराण आळे नै बता द्यु सूँ कै उसनै सारे नियम-कायदे मानने पड़ैंगे। 4 थम जो नियम-कायदा कै जरिये धर्मी बणणा चाह्वो सां, तो फेर थमनै यीशु मसीह तै रिश्ता तोड़ लिया सै, अर थमनै अपणे-आप ताहीं उस दया तै अलग कर लिया सै जिसके जरिये परमेसवर थमनै बचा सके सै। 5 मै यो इस खात्तर कहूँ सूँ क्यूँके हमनै पवित्र आत्मा की ओड़ तै पूरा भरोस्सा सै, कै परमेसवर यीशु मसीह पै विश्वास करण के कारण हमनै धर्मी बणावै। 6 जै थम यीशु मसीह नै मानन आळे सों, तो उसतै कोए फर्क कोनी पड़ता के थारा खत्तना होया सै के न्ही होया, पर जर्सी यो सै, कै हम मसीह पै विश्वास करां, अर परमेसवर अर माणसां प्रति प्यार राक्खा। 7 थम मसीह पै विश्वास करण म्ह बढ़ण लागरे थे, पर इब थमनै सच्चाई मानन तै कोए रोक न्ही ले। 8 इसी सीख परमेसवर की ओड़ तै न्ही आन्दी जो

थमनै अपणी ऊलाद होण खात्तर बुलावै सै। 9 सीख जो सच्ची न्ही सै वो इस कहावत की तरियां सै, थोड़ा-सा खमीर सारे गूँधे होए चून नै खमीर बणा दे सै। 10 पर मै परमेसवर पै भरोस्सा राक्खूँ सूँ कै वो थमनै झाड़ी अर भरमाण आळी सीख तै बाचाये राक्खैगा, पर जो थमनै भरमा दे सै चाहे वो कोए भी क्यूँ ना हो परमेसवर तै दण्ड पावैगा। 11 हे विश्वासी भाईयो, थम जाणो सों कै मै यो प्रचार करूँ सूँ कै खत्तना करवाणा जर्सी कोनी, इस करकै यहूदी माणस मेरे ताहीं सारी हाण सतावै सै, जै मै क्रूस नै छोड़कै खत्तना का प्रचार करूँ तो उसतै यहूदी माणस मेरे ताहीं कोनी सतावैंगे। 12 भला होंदा जो थमनै डामाडोल करै सै, वे अपणे-आपनै नंपुसक बणा लेवै। 13 हे विश्वासी भाईयो, थम आजाद होण कै खात्तर परमेसवर के जरिये बुलाए गये सों, इस खात्तर थमनै मूसा नबी के नियम-कायदा ताहीं मानन की जरूरत कोनी, पर इसा ना होवै के थम इसनै बुरी लालसा पूरी करण का जरिया बणा ल्यो, पर हरेक कै गैल प्यार करो अर सेवा करो। 14 क्यूँके सारे नियम-कायदे इस एक बात म्ह पूरे हो ज्या सै, “तू अपणे पड़ोसी तै अपणे जिसा प्यार कर।” 15 पर जै थम एक-दुसरे नै जानवरां की ढाल पाड़ खाओ सों, तो चौककस रहो, के थम एक-दुसरे नै नाश ना कर दियो। 16 पर मै कहूँ सूँ पवित्र आत्मा नै थारे जीवन म्ह अगुवाई करण द्यो, ताके थम अपणी बुरी आदत्तां नै (लालसा) नै पूरी ना कर सकों। 17 देह की बुरी लालसा पवित्र आत्मा के बिरोध म्ह, अर पवित्र आत्मा देह की बुरी लालसा के बिरोध म्ह लड़दी रहवै सै। इस कारण जो भले काम थम करणा चाहो सों वो न्ही कर पान्दे। 18 जै थम आत्मा की अगुवाई म्ह चाल्लों सों, तो थम मूसा के नियम-कायदा के अधीन न्ही सों। 19 देह के काम तो दिक्खै सै, यानी के जारी, भुजे काम, लुचपण, 20 मूर्तिपूजा, टोणा, बैर, गुस्सा, बिरोध, फूट विधर्म, 21 डाह, मतवालापण, रासलीला अर इनके जिसे और काम सै, इनकै बारे म्ह मै थारे तै पैहल्या कह द्यु सूँ जिसा पैहल्या कह्हा था, के इसे-इसे काम करणीये परमेसवर के राज्य के वारिस न्ही होंगे। 22 पर आत्मा का फळ प्यार, आनन्द, शांति, धीरज, करुणा, भलाई, विश्वास, 23 नप्राता, अर सयंम सै, इसे-इसे कामां के बिरोध म्ह कोए भी नियम-कायदे कोनी। 24 अर जो मसीह यीशु म्ह सै उननै देह की बुरी लालसाओं ताहीं कूस पै चढ़ा दिया सै। 25 क्यूँके पवित्र आत्मा नै म्हारे ताहीं नई जिन्दगी दी सै, इस खात्तर पवित्र आत्मा नै जिन्दगी के हरेक क्षेत्र म्ह अगुवाई करण द्यो। 26 हम घमण्डी होकै ना एक-दुसरे नै छेड़ा, अर ना एक-दुसरे तै जलण करा।

6 हे विश्वासी भाईयो, जै कोए माणस किसे पाप या कसूर म्ह पकड़या भी जावै, तो थम जो पवित्र आत्मा के चलाए चाल्लों सों, उसनै नरमाई के गेल्या धर्म की राह पै उल्टा ल्यावण म्ह उसकी मदद करो, अर अपणा भी ध्यान राक्खों के थम भी इसे इम्तिहान म्ह ना पड़ जाओ। 2 म्हारे म्ह तै जै कोए भी मुसीबत म्ह हो, तो हमनै एक-दुसरे की मदद करणी चाहिए, अर इस तरियां हम मसीह के नियम-कायदा नै मान्ना सां। 3 क्यूँकै जै कोए अपणे-आपनै नै बड़ा समझै सै, तो अपणे-आपनै

धोकखा देण लाग रहया सै। 4 हरेक माणस अपणे काम्मां नै परख ले, उसके काम आच्छे सै तो वो अपणे-आपनै पै घमण्ड कर सकै सै, अर उसनै अपणे काम की बराबरी किसे दुसरे के काम गैल न्ही करणी चाहिए। 5 म्हारे म्ह तै हरेक माणस अपणे सुभाव के खात्तर जिम्मेदार सै। 6 यो जरूरी सै के जौ माणस परमेसवर के वचनां नै सिखावै सै, तो उसकी संसारिक चिज्जां की जरूरत सीखण आळे तै पूरी हो होणी चाहिए। 7 अपणे-आप ताहीं धोकखा ना द्यो, कोए माणस यो ना सोच्चै के वो परमेसवर नै धोकखा दे सकै सै। 8 क्यूँके जौ माणस इसे काम करै सै उसका बुरा सुभाव उसकै खात्तर मौत लेकै आवै सै, पर जो माणस परमेसवर की इच्छा पूरी करै सै, तो उसका आत्मा उसनै अनन्त जीवन देवै सै। (aiōnios g166) 9 हम भले काम करण का होसला ना छोड्हा, क्यूँके जै हम हिम्मत ना छोड्हा तो परमेसवर के बखत पै कटनी काटैगें। 10 इस करकै जडे ताहीं मौक्का मिलै हम सारा के गेल्या भलाई करा, खास करकै बिश्वासी भाईयाँ के गैल। 11 मनै बडे-बडे अक्षरां म्ह थारे तैई अपणे हाथ तै लिख्या सै। 12 इस कारण के यहूदी लोग थमनै अपणावै, अर वे थारा खतना करवाण के खात्तर मजबूर करै सै, ताके लोग उन ताहीं इस बात का प्रचार करण खात्तर सतावै ना, के परमेसवर माणसां ताहीं जिज्बे बचावैगा जिब वे बिश्वास करैगें के मसीह कूस पै मरा। 13 क्यूँके खतना करण आळे खुद तो मूसा नवी के नियम-कायदा पै न्ही चालदे, वो थारा इस खात्तर खतना कराणा चाहवै सै ताके और यहूदियाँ कै स्याम्ही घमण्ड कर सकै, के थारा खतना उनकी बजह तै होया सै। 14 खुद कै खात्तर, मै, किसे बात पै घमण्ड कोनी करणा चाहूँ पर यीशु मसीह के कूस पै जान देण कै कारण, मै घमण्ड करणा चाहूँ सूँ, अर जो उसनै करया उस बजह तै दुनियावी चिज्जां का मेरे उप्पर कोए हक कोनी रह्या, अर इब मेरी दुनियावी चिज्जां म्ह कोए दिलचस्पी कोनी। 15 क्यूँके ना खतना अर ना बिना खतना कुछ सै, जो जरूरी बण चुके सै, जो जरूरी सै वो यो सै के परमेसवर हमनै पवित्र आत्मा के जरिये नया इन्सान बणा दे। 16 परमेसवर अपणी शान्ति अर आशीष उन सारया नै देवैगा, जो उसके हुक्म नै मान्यै सै। वे परमेसवर के माणस सै। 17 आगै तै मनै कोए दुख ना दे, क्यूँके जो मेरे देह पै जख्मां के दाग सै वो ये दिखावै सै के मै यीशु का दास सूँ। 18 हे बिश्वासी भाईयो, म्हारे प्रभु यीशु मसीह का अनुग्रह थारी आत्मा के गेल्या रहवै। आमीन।

इफिसियों

1 या चिट्ठी पौलुस की ओड़ तै सै, जो परमेसवर की इच्छा तै यीशु मसीह का प्रेरित सै, मै या चिट्ठी उन पवित्र अर मसीह यीशु मृष्टि विश्वासी माणसां कै नाम लिखूँ सूँ, जो इफिसुस नगर मृ रहवै सै। 2 मै प्रार्थना करूँ सूँ, के म्हरे पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिल्दी रहवै। 3 म्हारे परमेसवर अर प्रभु यीशु मसीह के पिता का धन्यवाद हो के उसनै म्हारे ताहीं मसीह मृ आत्मिक रूप तै हरेक तरियां तै, उन आशीषां के जरिये आशिषित करया जो सुर्ग तै आवै सै। 4 परमेसवर नै धरती अर अकास बणाण तै पैहले ए उसनै मसीह मृ म्हारे ताहीं चुण लिया, ताके हम इसकी निगांह मृ पवित्र अर बेकसूर होवां। 5 अर प्यार मृ उसनै अपणी भले मकसद मुताबिक म्हरे ताहीं अपणे खात्तर पैहले तै ठहराया के यीशु मसीह के जरिये हम उसकी गोद ली होई ऊलाद हो। 6 तो आओ हम परमेसवर के अद्भुत अनुग्रह की महिमा करा, अर यो इस खात्तर होया सै क्यूँकि म्हारा रिश्ता उसके बेटे कै गैल सै, जिसतै वो प्यार करै सै। 7 यीशु मसीह के लहू बहाए जाण के कारण हम छुड़ाए गये, जिसका मतलब यो सै के म्हरे सारे पाप माफ होए। परमेसवर के भोत अनुग्रह के मुताबिक मसीह मृ उसके लहू के जरिये छुटकारा यानी पापां तै माफि मिलै सै। 8 परमेसवर नै सारी बुद्धि अर ज्ञान तै म्हारै पै भोत-ए घणी दया करी। 9 परमेसवर नै अपणी इच्छा का भेद म्हारै पै भले मकसद के मुताबिक जाहिर करया, जिस ताहीं उसनै खुद मसीह मृ स्थापित करया। 10 अर परमेसवर की योजना कै मुताबिक, तय करे गए बखत पै, जो किमे सुर्ग अर धरती पै सै, वो सारा किमे मसीह के हाथ मृ सौपैगा। 11 परमेसवर नै मसीह मृ हम यहूदी माणसां ताहीं भी अपणे माणस होण खात्तर छाँट लिया सै, क्यूँकि शर तै ए उसकी या योजना थी, उसनै यो सब कुछ अपणी इच्छा अर योजना के मुताबिक करया। 12 यो उसनै इस खात्तर करया जिसतै के हम यहूदियाँ ताहीं जो पैहले माणस सै, जो मसीह पै आस राख्यै सै, अर उसकी महिमा की बड़ाई के कारण बणा। 13 अर योए थारे गैल भी होया के थमनै सच्चाई का बचन सुण्या, अर वो सुसमाचार यो सै, के थमनै वो किस तरियां बचा सकै सै, जिब थम मसीह पै बिश्वास करो सों तो परमेसवर थमनै वादे कै मुताबिक पवित्र आत्मा देवै सै, यो दिखाण खात्तर के थम परमेसवर के माणस सों। 14 क्यूँकि परमेसवर नै म्हारे ताहीं और भी आच्छी चीज देवैगा, जिसका उसनै वादा करया सै, अर यो उस बखत होगा जिब परमेसवर अपणे माणसां नै पूरी तरियां तै छुड़ावैगा, उसके अद्भुत अनुग्रह की बड़ाई होवै। 15 इस कारण, जिब तै मन्नै भी प्रभु यीशु मसीह मृ थारे बिश्वास अर पवित्र माणसां के प्रति थारे प्यार के बारें मृ सुण्या, तो मै परमेसवर का सदा धन्यवाद करूँ सूँ, अर अपणी प्रार्थना मृ थमनै हमेशा याद राख्यूँ सूँ। 17 मै प्रार्थना करूँ सूँ, के महिमामय परमेसवर जो के म्हारे प्रभु यीशु मसीह

का पिता सै, वो थारे ताहीं आत्मिक समझ अर ज्ञान देवै, ताके थम परमेसवर नै पूरी तरियां जाण सकों। 18 मै या भी प्रार्थना करूँ सूँ, के वो सच्चाई जाणण मृ थारी मदद करै के थम जाण सकों के परमेसवर के जरिये बुलाये जाण की आस के सै, अर थम जाण सकों के इतनी बड़ी अर महान् आशीष अपणे पवित्र माणसां खात्तर राख राक्खी सै। 19 मै चाहूँ सूँ के थम उसनै जाण सकों, के उस महान् परमेसवर नै यीशु मसीह पै बिश्वास करण आळे खात्तर जो शक्ति राख राक्खी सै, या वाए बड़ी शक्ति सै। 20 जिसनै मसीह ताहीं मेरे होया मृ तै जिवाया अर सुर्ग मृ अपणी सोळी ओड़ बैठाया। 21 सारी ढाळ की प्रधानता, हक, सामर्थ, प्रभुता के उपर राज करैगा जो इस लोक मृ सै, अर आण आळे लोक मृ भी राज करैगा। (aiōn g165) 22 परमेसवर नै सारा किमे उसके पायां तलै कर दिया, अर उसनै कलीसिया की भलाई खात्तर सब किमे उसके हाथां मृ सौप दिया। 23 कलीसिया मसीह की देह सै, अर उसतै भरपूर सै, वो अपणी मौजूदी तै हरेक चीज अर हरेक जगहां नै भैर भैर सै।

2 पुराणे बखत मृ थारे थोरै नई जिन्दगी कोनी थी, थम अपणे बुरे कामां अर पापां के कारण मरे होए माणसां के समान थे। 2 थम उस बखत दुनिया की रीति-रिवाज के मुताबिक, बुरी आत्मायाँ के सरदार जो अकास मृ सै, उसके मुताबिक चाल्लों थे, जो इब भी उनके मनां मृ काम करै सै, जो परमेसवर का हुकम न्ही मानते। (aiōn g165) 3 इन मृ हम भी सारे के सारे पैहले अपणी देह की लालसाओं मृ दिन बितावा थे, अर देह अर मन की मजियाँ नै पूरी करा थे, अर और माणसां की ढाळ सुभाव तै ए छो की ऊलाद थे। 4 पर परमेसवर नै जो दया का धनी सै, अपणे उस धणे प्यार के कारण जिसतै उसनै म्हारै तै प्यार करया। 5 अपणे पुराणे जीवन मृ पापां के कारण हम मरे होए थे तो परमेसवर नै जिस तरियां यीशु मसीह ताहीं जिन्दा करया, हमनै भी आत्मिक रूप तै जिन्दा करैगा, अर सुर्गीय जगहां मृ मसीह कै गेल्या बिठावैगा, अर परमेसवर के अनुग्रह तै ए थारा उद्धार होया सै। 7 परमेसवर नै यो इस खात्तर करया के अपणी दया तै जो मसीह यीशु मृ म्हारै पै सै, आण आळे दिनां मृ दिखा सकै, के उसका अनुग्रह कितना बड़ा सै, हम जो मसीह मृ सां, उसनै म्हारे पै भी अनुग्रह दिखाया। (aiōn g165) 8 जिब थमनै परमेसवर पै बिश्वास करया तो उसनै अपणे अनुग्रह के जरिये थारा उद्धार करया सै, थारा उद्धार थारी ओड़ तै न्ही, बल्के परमेसवर ओड़ तै दान सै। 9 यो इस करकै न्ही होया के थमनै कोए भला काम करया सै, अर थम उसपै घमण्ड करो। 10 क्यूँकि हम उसके बणाए होए सां, अर मसीह यीशु मृ उन भले कामां के खात्तर रखे गये जिन ताहीं परमेसवर नै पैहले तै म्हारे करण कै खात्तर तैयार करया। 11 इस कारण थम याद राक्खों के थम जन्म तै गैर यहूदी सों, अर यहूदी लोग थारा मजाक उड़ावे सै, के थारा खतना कोनी होया, पर उनका खतना होया सै, इस खात्तर वे परमेसवर के लोग सै। पर उननै खतना अपणी देह का करवाया सै मन का कोनी करवाया। 12 थम उस बखत मसीह ताहीं कोनी जाणो थे, अर थम परमेसवर के चुणे होए इस्साएली माणस कोनी थे, अर वादे कै

करार के भी साइझी कोनी थे, जो उसने अपणे माणसां तै बाँधी थी, अर बिना आस अर दुनिया म्ह बिना ईश्वर के थे। 13 पर पैहले जो थम, परमेसवर तै दूर थे, परमेसवर नै थारे ताहीं मसीह यीशु के लहू बहाण के जरिये थोरे बुला लिये सों। 14 मसीह नै हम यहूदी अर थम गैर यहूदी माणसां म्ह शान्ति बाणाई सै, पुराणे बखत म्ह यो लाग्नी था के यहूदी अर गैर यहूदी माणसां म्ह एक दीवार सै, वो एक-दुसरे तै नफरत करे थे, पर मसीह नै वा दीवार ढा दी सै, अर दोनुं दलां ताहीं एक कर दिया सै। 15 उसनै अपणी मौत के जरिये मूसा के नियम-कायदा ताहीं रद कर दिया, ताके वो यहूदी अर गैर यहूदी माणसां म्ह शान्ति लेके आवै, अर इसके जरिये वो अपणे-आप म्ह यहूदी अर गैर यहूदी की जगहां एक नई जात बणा दे। 16 उसनै कूऱ्स पै अपणी जाण देके यहूदी-अर गैर यहूदी माणसां म्ह बैर का नाश करके एक देह बणाकै परमेसवर तै मिला दिया। 17 मसीह नै आके थम गैर यहूदी जो उसतै दूर थे, अर थम यहूदी माणस जो परमेसवर कै लोवै थे, दोनुआ ताहीं मेळ-मिलाप का सुसमाचार सुणाया। 18 क्यूँके मसीह म्ह ए हम सब उस एक पवित्र आत्मा कै जरिये ए पिता के थोरै पोहच सका सां। 19 इस करकै थम गैर यहूदी इब विदेशी अर मुसाफिर कोनी रहे, पर पवित्र माणसां के साथी देशी अर परमेसवर के कुपेके होगे सों। 20 थम उस घर की तरियां सों जिसकी नीम प्रेरित अर नबी सै, अर जिसकै कोणे का पथर मसीह यीशु आप सै। 21 मसीह ए सै जिसनै घर ताहीं टिकाकै राख्या सै, अर उसतै प्रभु कै खात्तर एक पवित्र मन्दर बणदा जावै सै। 22 क्यूँकि थम मसीह म्ह सों, इस खात्तर थम गैर यहूदी बिश्वासी परमेसवर के माणसां गैल एक होगे, ताके थम वो घर बणदे जाओ जिस म्ह परमेसवर रहवै सै।

3 इस कारण मै पौलुस थारे खात्तर कैद म्ह सूं क्यूँके मै थम गैर यहूदी माणसां नै सुसमाचार सुणाकै मसीह यीशु की सेवा करूँ सूं। 2 पक्का थमनै सुण्या होगा के परमेसवर नै अपणे अनुग्रह तै थारे ताहीं सुसमाचार की खबर सुणाण की जिम्मेदारी मेरे ताहीं दी सै। 3 परमेसवर की गुप्त योजना धणे लम्बे बखत तै छुपी होई थी, पर परमेसवर नै इस ताहीं मेरे उप्पर जाहिर करया, मै इस चिट्ठी के जरिये परमेसवर के उस गुप्त भेद नै थारे ताहीं समझाणा चाहूँ सूं। 4 जिब थम मेरी चिट्ठी नै पढ़ोगे तो थम जाण पाओगे, के मै मसीह के उस भेद के बारें म्ह कितनी आच्छी तरियां जाणु सूं। 5 पुराणे बखत म्ह परमेसवर नै इस भेद ताहीं माणसां के उप्पर जाहिर कोनी करया, पर इब उसनै उस भेद ताहीं पवित्र आत्मा कै जरिये, अपणे पवित्र प्रेरितां अर नवियाँ पै जाहिर करया। 6 अर वो भेद यो सै के मसीह यीशु म्ह सुसमाचार कै जरिये गैर यहूदी वाए विरासत हासिल करै, जो यहूदी माणसां के थोरै सै, अर एकै देह के अंग अर परमेसवर के वादे के साइझी सै। 7 परमेसवर के अनुग्रह अर बड़ी सामर्थ के जरिये मेरे ताहीं सुसमाचार सुणाण का काम मिला सै। 8 मेरै पै जो सारे पवित्र माणसां म्ह तै, छोटे तै भी छोटा सूं यो अनुग्रह होया के मै गैर यहूदियाँ नै मसीह का सुसमाचार सुणाऊँ, अर लोगां नै परमेसवर की योजना ताहीं समझाण म्ह मदद करूँ। 9 अर

हेरेक माणसां ताहीं समझा सकूँ के उसनै उस योजना ताहीं जो उसनै पैहले तै सोच्ची थी, किस तरियां पूरी करी, या योजना पैहले तै जाहिर कोनी होई थी क्यूँके परमेसवर जो सारी चिज्जां नै रचणियाँ सै, उस ताहीं छिपाए राख्या। (aiōn g165) 10 ताके इब कलीसिया कै जरिये, परमेसवर का बेसुमार जान आसमान के उन प्रधानां अर अधिकरियाँ पै जाहिर करया जावै। 11 परमेसवर नै दुनिया बणाण तै पैहले या योजना बणाई थी, जिस ताहीं उसनै म्हरे प्रभु यीशु मसीह के जरिये पूरा करया। (aiōn g165) 12 क्यूँके म्हारा मसीह पै बिश्वास सै, अर उसकै कारण परमेसवर कै मौजूदगी म्ह हिम्मत अर भरोस्से के गेल्या परमेसवर कै लोवै आ सका सां। 13 इस करकै मै बिनती करूँ सूं के जो क्लेश थारे खात्तर मन्नै होवै सै, उनकै कारण हिम्मत ना छोड़ो, क्यूँके हम पिता परमेसवर कै थोरै जा सका सां। 14 मै इस्से कारण उस पिता परमेसवर कै आग्ने घुन्दे टेक कै प्रार्थना करूँ सूं। 15 वोए सै जो सुर्ग अर धरती पै, हेक वंश का पिता सै। 16 मै प्रार्थना करूँ सूं के परमेसवर अपणी महिमा के असीमित धन के मुताबिक थारे पै अनुग्रह करै, ताके थम उसकी पवित्र आत्मा तै अपणे भीतरी माणसपण म्ह सामर्थ पाकै शक्तिशाली होन्दे जाओ। 17 अर बिश्वास कै जरिये मसीह म्हरे मन म्ह बसै, ताके थम प्यार म्ह मजबूत होकै बणे रहों, अर सारे पवित्र माणसां कै गेल्या आच्छी ढाल समझाण की ताकत पाओ, के उसके प्यार की चौडाई, लम्बाई, अर ऊँचाई, अर गहराई कितनी सै। 19 मै प्रार्थना करूँ सूं के थम मसीह के उस प्यार नै जाण सको जो जान तै पैरै सै, ताके थारा सुभाव परमेसवर के सुभाव जिसा हो जावै। 20 परमेसवर ताकतवर सै, अर वो म्हरी बिनती अर समझा तै भी धान काम करै सै। 21 कलीसिया म्ह अर मसीह यीशु म्ह उसकी बड़ाई पीढ़ी तै पीढ़ी तैई युगानुयुग होंदी रहै। आमीन। (aiōn g165)

4 मै प्रभु की सेवा करण कै कारण कैद म्ह सूं, अर थारे तै बिनती करूँ सूं के जिस बुलाहट तै परमेसवर नै थारे ताहीं बुलाया सै, उस्से तरियां जीवन बिताओ। 2 यानी सारी दीनता अर नग्रता गैल, धीरज धरकै प्यार तै एक-दुसरे नै सह ल्यो। 3 इसा करण की भरपूर कोशिश करो, के थम रळ-मिलकै रह सकों, क्यूँके परमेसवर की आत्मा के जरिये थम एक ए होण खात्तर बुलाए गये सों। 4 हम सारे बिश्वासी, देह के अंग की ढाल सां, अर सारया नै एकैए पवित्र आत्मा पाई सै, उस्से ढाल जिब परमेसवर नै थारे ताहीं अपणे माणस होण खात्तर बुलाया था, तो थारे ताहीं एक उम्मीद दी गई थी। 5 सिर्फ एके प्रभु सै, एके बिश्वास सै, हम सारया नै यीशु के नाम म्ह बपतिस्मा पाया सै, 6 सिर्फ एके परमेसवर सै जो सारे माणसां का पिता सै, जो सब कै उप्पर राज करै सै, अर हम सब कै जरिये काम करै सै, अर हम सारया के म्ह रहवै सै। 7 पर मसीह नै हम सारया ताहीं उसके काम करण खात्तर न्यारे-न्यारे ढाल की खास काबलियत देई सै। 8 इस करकै पवित्र-ग्रन्थ मसीह के बारें म्ह कहवै सै, “वो ऊँच्चे पै चढ़ा अर कैदियाँ नै बाँधले ग्या, अर

माणसां ताहीं आत्मिक दान दिए।” 9 उसकै ऊँच्चे पै चढ़ण का, के मतलब हो सके सै, सिवाए इसके के बो अधोलोक म्ह भी उतर गया। 10 अर जो उतर ग्या, यो बोए सै, जो सुर्ग म्ह सारे तै ऊँच्चे पद पै पोहच ग्या, जिसतै के उसका राज सारे ब्रह्माण्ड म्ह फैल जावै। 11 यो मसीह सै जो महर ताहीं खरदान देवै सै, उसनै कईयाँ तै प्रेरित, अर कईयाँ तै नवी, कईयाँ तै सुसमाचार सुणाण आळे, कईयाँ तै सेवक अर शिक्षक नियुक्त करया, इनकी जिम्मेदारी या सै के ये और दुसरे माणसां नै सीखा के परमेसवर का काम करवा सके, अर कलीसिया जो मसीह की देह सै उस ताहीं मजबूत कर सकै। 13 यो तब तक होन्दा रहवैगा जिब तक के हम अपणे विश्वास, अर परमेसवर के बेटे के बारें म्ह अपणी समझ म्ह एक ना हो जावा, फेर हम सिध्द बणागे जिस तरियां मसीह सिध्द सै, अर हम पूरी तरियां तै उसके जिसे बण जावांगे। 14 मसीह म्ह बढ़ण अर सिध्द होण कै कारण, हम बाल्कां के जिसा बरताव ना करां, हम उस किस्ती की ढाल ना बणा, जिसनै झाल आगै-पाच्छै, अर हवा आस्सै-पास्सै उछालै सै। इसका मतलब यो सै, के चलाक, अर ठग माणस अपणी झुटी शिक्षा कै जरिये हमनै थोक्खा न्ही देण पावै। 15 बल्के सच नै प्यार तै बोल्लों, अर सारी बातां म्ह मसीह यीशु की तरियां सिध्द बणो, जो के म्हारा सिर सै। 16 हम सारे जो मसीह म्ह विश्वास करां सां, हम उसकी देह के अंग की तरियां सां, जिस तरियां एक माणस की देह, जोड़ा के जरिये एक साथ जुड़ी हो सै अर जिब देह का हर हिस्सा आच्छी तरियां काम करै सै, तो देह का विकास होकै मजबूत बणे सै, इस्से तरियां म्हरे म्ह तै जै कोए मसीह का काम करै सै, जो मसीह नै म्हरे ताहीं दिया सै, तो हम भी मजबूत अर सिध्द होवां सां, अर हम एक-दुसरे तै ज्यादा प्यार करां सां। 17 इस करकै परमेसवर नै जो अधिकार मेरे ताहीं दिया सै, उसकी बजह तै मै न्यू कहूँ सूँ के जिसा अविश्वासी माणस अपणे मन की बेकार की रीति-रिवाजां म्ह अपणा जीवन जीवै सै, थम आज तै इसा जीवन ना जिओ। 18 क्यूँकै वे समझ न्ही पाण लागरे, के उस अज्ञानता कै कारण, अर उनके मन की कठोरता कै कारण, जो उन म्ह सै, वे परमेसवर के उस जीवन तै न्यारे करे गए सै जो परमेसवर देवै सै। 19 वे बुरे काम की बजह तै अपणी गतली महसूस न्ही करते अर उननै अपणे-आप ताहीं बुरे काम्मां खात्तर सौप दिया सै, वे सारी ढाल के भुन्डे काम लगातार करते जावै सै। 20 पर थमनै मसीह की शिक्षायां म्ह इसे काम करणे न्ही सीखे। 21 बल्के जो थमनै यीशु मसीह के बारें म्ह सुण्या अर जो थारे शिक्षकां नै सिखाया, वो ए उसकी ओड़ तै सच्चा सन्देस सै। 22 अर थारे शिक्षकां नै थारे बुरे काम अर बुरा सुभाव छोड़णा सिखाया सै, थारी बुरी लालसायां नै थारा जीवन नाश कर दिया। 23 थम पवित्र आत्मा नै थारे सुभाव अर सोच्चाण के तरिक्के नै बदलण द्यो। 24 परमेसवर नै थारे ताहीं एक नया सुभाव दिया सै, जो के उसके अपणे सुभाव की तरियां सै, इस करकै इस नये सुभाव के मुताबिक बरताव करो। असलियत म्ह धर्मी अर पवित्र बणो। 25 इस कारण झूठ बोलणा छोड़कै हरेक अपणे पड़ोसी तै सच बोल्लै, क्यूँकै

हम आप्पस म्ह हम एक ही देह के अंग सां। 26 जै थारे ताहीं गुस्सा आ भी जावै तो उस गुस्से म्ह पाप ना करियो, अर सूरज ढलण तै पैहल्या थारा गुस्सा भी न्ही रहणा चाहिए। 27 अर अपणे-आप ताहीं शैतान नै परखण का मौक्का ना द्यो। 28 चोरी करण आळा फेर चोरी ना करै, बल्के मेहनत करकै अपणी कमाई के जरिये दुसरे माणसां की भी मदद कर सकै, जो ज़रूरत मन्द हो। 29 कोए भी गलत बात थारे मुँह तै ना लिकड़ै, पर ज़रूरत कै मुताबिक बोए लिकड़ै जो दुसरयां के बिश्वास की बढ़ोतरी कै खात्तर हो, ताके वा बात जो थारे मुँह तै लिकड़ै सै वा सुण्ण आळा नै उत्साहित कर सकै। 30 परमेसवर के पवित्र आत्मा नै दुखी ना करो, जो उसनै थारे ताहीं दिया सै, जो पक्का छुटकारै कै दिन थमनै बचा सकै सै। 31 इस करकै सारी ढाल की कड़वाहट, प्रकोप, गुस्सा, झगड़ा, अर बुराई, सारे बैरबाव नै अपणी जिन्दगी तै लिकाड़ द्यो। 32 एक-दुसरे पै दयालु अर करुणामय हो, अर जिसा परमेसवर नै मसीह म्ह थारे कसूर माफ करो, उस्से तरियां थम भी एक-दुसरे के कसूर माफ करो।

5 थम परमेसवर के बाल्क सौं, जिनतै वो प्यार करै सै, इस करकै उसकी ढाल बणण की कोशिश करो। 2 दुसरयां तै प्यार करण आळी जिन्दगी जिओ, जिस तरियां मसीह जिया, जिसनै थारे तै प्यार करया अर म्हरे पापां नै मिटाण खात्तर अपणे-आप ताहीं कुरबान कर दिया, अर परमेसवर उसकी कुरबान्नी तै खुश था, क्यूँकै वा कुरबानी परमेसवर कै खात्तर खसबदार भेट कै समान थी। 3 जिसा पवित्र माणसां कै लायक सै, उसाए थारे म्ह जारी अर किसे ढाल के अशुद्ध काम या लोभ का जिक्र तैई ना हो, 4 अर ना बेशर्मी, ना मूर्खता की बातचीत, ना मजाक की, क्यूँकै ये बात शोभा न्ही देंदी, बल्के थारे मुँह तै परमेसवर का ए धन्यवाद सुण्या जावै। 5 क्यूँकै थम यो आच्छी तरियां तै जाणो सौं, के कोए भी जार, दुराचारी, या लोभी माणस जो मूर्तिपूजकां के समान सै, ये मसीह अर परमेसवर के राज्य के भागी न्ही हो सकदे। 6 कोए थमनै थोक्खा ना देवै के परमेसवर पाप करण आळे माणसां नै दण्ड कोनी देवै, क्यूँकै परमेसवर का छो हुकम ना मानण आळे पै भड़के सै। 7 इस करकै थम उनके पापी काम्मां म्ह उनके साझीदार ना होओं। 8 क्यूँकै थम तौ पैहल्या उन माणसां की ढाल थे जो अन्धकार म्ह थे, पर इब थम परमेसवर के लोग बणगे सौं, इस करकै थम इब चाँदणे म्ह सौं, तो इब थमनै उन माणसां की ढाल जीणा चाहिए जो चाँदणे म्ह सै। 9 क्यूँकै जै माणस चाँदणे म्ह सै तो उसका सुभाव आच्छा अर धर्मी सै, अर उसपै विश्वास करया जा सकै सै। 10 अर यो परखो के प्रभु नै के आच्छा लागै सै। 11 थम उनके बुरे काम्मां म्ह उनके साझीदार ना होओं, बल्के लोगां नै बताओ के ये काम बुरे सै। 12 क्यूँकै उनकै गुप्त काम्मां का जिक्र भी शर्म की बात सै। 13 जिब बुरे लोग थारा आच्छा सुभाव देक्खी सै तो उनका बुरा सुभाव जाहिर हो जावै सै, उसकी बजह तै वो अपणा बुरा सुभाव छोड़ दे सै, अर थारे जिसे आच्छे बण जावै सै। 14 इस कारण एक कहावत सै के “हे सोण आळे जाग! अर मुर्दा म्ह तै

जी उठ! ताके मसीह थारे पै अपणा चान्दणा चमकावै।” 15 इस करकै ध्यान तै देक्खों, के किसा जीवन जीण लागे सों। बेअक्ला की तरियां न्हीं पर अकलमंद की तरियां जिओ। 16 मौकैके नै घणा कीमती समझों, क्यूँके दिन बुरे सै। 17 इस कारण बेअक्ल ना होअें, पर ध्यान तै समझों के प्रभु की मर्जी के सै। 18 मदिरा पी कै मतवाले ना बाणो, क्यूँके इस्तै लुचपण होवै सै, पर पवित्र आत्मा तै भरदे जाओ। 19 जिब थम पवित्र आत्मा के कहे म्ह चाल्लोंगे तो ये काम करोगे, जिब थम कठे होओगे तो आप्स म्ह परमेसवर के भजन, उसकी जै-जै कार अर अतिमिक गीत गाया करोगे, अर अपणे-अपणे मन म्ह प्रभु के आगंग गान्दे, अर कीर्तन करदे रहो। 20 अर सदा सारी बातां कै खात्तर म्हरे प्रभु यीशु मसीह कै नाम तै परमेसवर पिता का धन्यवाद करते रहो। 21 मसीह कै प्रति श्रद्धा-भक्ति राक्खण के कारण एक-दुसरे कै अधीन रहो। 22 हे पत्नियों, अपणे-अपणे पति कै इस ढाळ अधीन रहो जिस ढाळ प्रभु के अधीन रहो सों। 23 क्यूँके पति तो पत्नी का सिर सै, जिस ढाळ मसीह कलीसिया का सिर सै, अर कलीसिया मसीह की देह सै अर उद्धारकर्ता भी सै। 24 पर जिस ढाळ कलीसिया मसीह कै अधीन सै, उस्से तरियां पत्नियाँ भी हर बात म्ह अपणे-अपणे पति कै अधीन रहै। 25 हे पत्नियों, अपणी-अपणी पत्नियाँ तै प्यार राक्खो, जिसा मसीह नै भी कलीसिया तै प्यार करकै उसकै खात्तर अपणी जान दे दी। 26 ताके वो कलीसिया (बिश्वासी लोगों) ताहीं वचन तै नाहण के जरिये पापा तै शुद्ध करै, अर पवित्र बणावै। 27 वो अपणी कलीसिया खात्तर मरया ताके वो अपणे माणसां नै सिध्द बणाकै अपणी हुजुरी म्ह ल्या सकै, जिस म्ह ना कलंक, ना झुरी, ना कोए और इसी चीज हो बल्के पवित्र अर बेकसूर हो। 28 इस तरियां सही सै कै पति अपणी-अपणी पत्नी तै अपणी देह कै समान प्यार राक्खै। जो अपणी पत्नी तै प्यार करै सै। वो अपणे-आप तै प्यार करै सै। 29 क्यूँके किसे नै कदे अपणे देह तै बैर न्हीं करया बल्के वो उसका पालन-पोषण करै सै, जिसा मसीह भी कलीसिया कै गैल करै सै। 30 इस करकै के हम मसीह की देह के अंग के समान सां। 31 जिसा के पवित्रग्रन्थ म्ह लिख्या सै, “इस कारण माणस अपणे माँ बाप नै छोड़कै अपणी पत्नी तै मिल्या रहैगा, अर वे दोनु एक देह होंगे।” 32 यो भेद तो बड़ा सै, पर मै याड़ मसीह अर कलीसिया कै बैर म्ह कहूँ सूं। 33 पर थारे म्ह तै हरेक अपणी पत्नी तै अपणे समान प्यार करै, अर पत्नी भी अपणे पति का डर मानै।

6 पवित्र ग्रन्थ कहवै सै, के “अपणे माँ-बाप का आदर कर, तो तेरा भला होगा अर इस धरती पै तेरी उप्र भी लम्बी होवैगी।” अर यो परमेसवर की ओड़ तै दिया गया पैहला हुक्म सै, जिसके गैल वादा भी सै। हे बालकां आळो, यो थारे खात्तर सही सै, के थम जो परमेसवर पै बिश्वास करो सों, तो अपणे माँ-बाप का कहणा मान्नो। 4 हे बालकां आळो, अपणे बालकां नै गुस्सा ना दुवाओं, पर शिक्षा अर चेतावनी देंदे होए उनका पालन-पोषण करो। 5 हे नौकरों, जो माणस इस दुनिया म्ह थारे मालिलक सै, उनका हुक्म डरदे अर कापते होए मान्नो, जिस मन तै

थम मसीह का हुक्म मान्नो सों। 6 माणसां नै खुश करण आळा कै समान दिखावटी सेवा ना करो, पर थम मसीह के दास सों, इस करकै थम पूरे मन तै वो काम करो जो परमेसवर चाहवै सै। 7 अर उस सेवा नै माणसां की न्हीं, पर प्रभु की सेवा जाणकै सच्चे मन तै करो। 8 क्यूँके थम जाणो सों के जो कोए जिसा आच्छा काम करैगा, चाहे दास हो चाहे आजाद माणस, प्रभु तै उसका फळ पावैगा। 9 हे मालिकों, थम भी थमकी देणा छोड़कै नौकरां गैल उसाए व्यवहार करो, क्यूँके थम जाणो सों के उनका अर थारा दोनुआ का मालिलक सुर्मा म्ह सै, अर वो किसे का पक्षपात न्हीं करदा। 10 इस करकै मै कहूँ सूं के थम प्रभु म्ह आत्मिक रूप तै शक्तिशाली बणो। 11 परमेसवर के सारे हथियार बाँध ल्यो ताके थम शैतान की चालां कै स्याही खड़े रह सको। 12 क्यूँके म्हारा यो आत्मिक युध माणसां तै कोनी, पर प्रधानां, अधिकारियां, अर इस संसार के अन्धकार के हाकिमां अर दुष्टा की आत्मिक सेनाओं तै सै, जो अकास म्ह सै। (aiōn g165) 13 इस करकै परमेसवर के सारे हथियार बाँध ल्यो ताके जिब बुरे दिन आवै तो उनका सामना कर सको, अर सब कुछ करण म्ह मजबुती तै डटे रह सको। 14 इस करकै परमेसवर की सच्चाई के मुताबिक जिओ, यो इस तरियां सै, जिसा एक सिपाही का बेल्ट तै अपणी कमर कसणा, अर धार्मिकता की डिलम पैहर ल्यो जो थारे आच्छे सुभाव नै दिखावै सै, जो थमनै शैतान के हमले तै बचावैगा। 15 जिस तरियां एक सिपाही युध लड़ण कै खात्तर पैरैं म्ह जूते पैहरै सै, उस्से तरियां थम भी परमेसवर के साथ शान्ति के सुसमाचार के जरिये, शैतान तै लड़ण खात्तर त्यार हो जाओ। 16 अर इन बातां के होन्दे होए जिस तरियां सिपाही, ढाल तै अपणे-आपनै दुश्मन के तीरां तै बचावै सै, उस्से तरियां मसीह म्ह पक्का बिश्वास करो ताके थम शैतान के हमलां तै खुद नै बचा सको। 17 जिस तरियां सिपाही युध म्ह अपणे सिर नै बचाण खात्तर टोप पैहरै सै, उस्से तरियां परमेसवर की ओड़ तै मिल्या उद्धार भी म्हारा टोप सै, जो थमनै शैतान के हमलां तै बचावैगा, अर जिस तरियां सिपाही युध म्ह तलवार तै अपणे-आपनै बचावै सै, अर थम भी आत्मा की तलवार, जो परमेसवर का वचन सै, ले ल्यो, अर शैतान तै खुद नै बचा ल्यो। 18 हरेक बखत अर हरेक ढाळ तै पवित्र आत्मा की अगुवाई म्ह प्रार्थना अर बिनती करते रहों, इस करकै जागते रहों अर सारे पवित्र माणसां खात्तर लगातार बिनती करते रहों। 19 अर थम मेरै खात्तर भी प्रार्थना करो, ताके मेरे बोल्लण कै बखत इसे शब्द दिये जावै के मै हिम्मत कै गैल सुसमाचार का भेद बता सकूँ। 20 इस्से खात्तर मै बेल्लां तै जैकड़ा होया राजदूत के समान सेवा करण लाग रहया सूं, प्रार्थना करो के जिस तरियां मनै बोलणा चाहिए, उस्से ढाळ बेधड़क होकै सुसमाचार का प्रचार कर सकूँ। 21 तुखिकुस जो प्रभु म्ह मेरा प्यारा भाई अर बिश्वास लायक सेवक सै, वो थारे ताहीं मेरे सारे हालात अर सारी बातां के बारें म्ह बता देवैगा। 22 उस ताहीं मनै थारे थोरै इस्से खात्तर भेज्या सै के थम म्हरी दशा नै जाणो, अर वो थारे मनां नै होसला दे। 23 परमेसवर पिता अर प्रभु यीशु मसीह की ओड़ तै बिश्वासी भाईयाँ

नै शान्ति अर विश्वास गैल प्यार मिलै। 24 उन सारा पै अनुग्रह होंदा रहवै,
जो म्हारै प्रभु यीशु मसीह तै कदे ना खतम होण आळा प्यार करै सै।

फिलिप्पियों

1 या चिट्ठी पौलुस अर तीमुथियुस की ओड़ तै सै, जो यीशु मसीह के दास सै, मै पौलुस कलीसिया के सारे पवित्र माणसां, अगुवां, अर सेवकां के नाम जो प्रभु यीशु मसीह मह होके फिलिप्पी नगर मह रहवै सै। 2 हम प्रार्थना करां सां के म्हरै पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिल्दी रहवै। 3 मै जिब-जिब थमनै याद करूं सूं तब-तब अपणे परमेसवर का धन्यवाद करूं सूं 4 अर खुरी कै गैल अपणी हरेक प्रार्थना मह थारे सारया खात्तर हमेशा परमेसवर तै मदद की बिनती करूं सूं। 5 इस करके के पैहले दिन तै जिब थमनै सुसमाचार पै बिश्वास करया, तब तै आज तक थम यीशु मसीह के प्यार के बारें मह सुसमाचार फैलाण मह म्हारे साथ रह्ये सौं। 6 मनै इस बात का भरोस्सा सै, के परमेसवर जिसनै थारे मह आच्छा काम शरु करया सै, वोए उसनै जिब यीशु मसीह बोहड़ के आवैगा तब तक पूरा करग्या। 7 सही सै ताके मै थारे सारया खात्तर इसाए विचार करूं। क्यूंके थारे खात्तर मेरै मन मह खास जगहां सै, इब मै कैद मह सूं, अर सुसमाचार की सच्चाई नै साबित अर बचाव करण मह लागरया सूं, तो थम सब मेरै गैल परमेसवर के अनुग्रह मह साझीदार सौं। 8 इस मह परमेसवर मेरा गवाह सै, के मै मसीह यीशु की तरियां लगाव करकै, थारे सारया की मिलण की लालसा करूं सूं। 9 मै या प्रार्थना करूं सूं कै थारा प्यार वास्तविक ज्ञान अर अन्तरात्मा मह और भी बढ़ता जावै। 10 ताके थम आच्छी तै आच्छी बात नै चुण सकों, अर मसीह कै बोहड़ण तक हरेक बुराई तै बचे रहों, अर ठोक्कर ना खाओं। 11 अर उस धार्मिकता के काम नै जो यीशु मसीह कै जरिये होवै सै, भरपूर होन्दे जाओं जिसतै परमेसवर की महिमा अर बड़ाई होंदी रहवै। 12 हे बिश्वासी भाईयो, मै चाहूं सूं के थम यो जाण ल्यो, के जो मेरै पै बित्या सै, उसतै भोत सारे माणसां नै सुसमाचार पै बिश्वास करया सै। 13 उरे ताहीं के महाराजा के राजभवन की सारी पलटन अर बाकी सारे माणस यो जाणगे सै, के मै कैद मह सूं, क्यूंके मै मसीह का दास सूं। 14 अर प्रभु मह जो बिश्वासी भाई सै, उन मह तै घणखरे मेरै कैद होण कै कारण, साहस कै गैल परमेसवर का वचन बिना डरे सुणावै सै। 15 कुछ लोग तो जल्ण अर झागडे कै कारण मसीह के सुसमाचार के बारें मह सुणावै सै, अर कई माणस भली इच्छा तै, ताके मेरे वचन फैलाण मह मदद कर सकै। 16 भली इच्छा तै प्रचार करण आळे प्यार तै प्रचार करै सै, क्यूंके वो जाणै सै, के मै सुसमाचार के बचाव कै खात्तर जेळ मह बन्द सूं। 17 कई माणस तो जल्ण अर बिरोध के कारण मसीह का प्रचार करै सै, यो सोचकै के मेरी कैद मह मेरै खात्तर और कँलेश पैदा कर सकै। 18 तो के होया? सिर्फ यो के हर ढाल तै, बुरी इच्छा तै चाहे सच्चाई तै, मसीह के वचन का प्रचार हरेक जगहां करया जाण लागरया सै, अर मै इसतै आनन्दित सूं अर आनन्दित रह्यांगा भी। 19 क्यूंके मै जाण सूं, के थारी बिनती कै जरिये, अर पवित्र आत्मा जो यीशु मसीह की ओड़ तै आया सै, इसका प्रतिफल जो मेरे बिश्वास

म्ह बणे रहण अर कैद तै लिकडण का कारण होगा। 20 मै तो याए मन तै लालसा अर आस राक्खूं सूं, के मै कैसे बात म्ह शर्मिन्दा ना होऊँ, पर साहस कै साथ परमेसवर का वचन सुणा सबूं, जिसा पैहले मनै सुण्या था, चाहे मै जिन्दा रहूं या मर, मसीह की बड़ाई मेरी देह के जरिये होन्दी रहवै। 21 क्यूंके मेरै खात्तर जिन्दा रहणा मसीह रहै, अर मर जाणा और भी आच्छा सै, क्यूंके मै मसीह कै धोरै चला जाऊँगा। 22 पर जै देह तै जिन्दा रहणा ए परमेसवर के काम कै खात्तर फायदेमन्द सै, तो मै न्ही जाणदा के किसनै चुणु। 23 क्यूंके मै उझङ्गन म्ह सूं, कै मै के करूं, जी तो कैरै सै, के मै दुनिया छोड़कै मसीह कै धोरै चला जाऊँ, क्यूंके यो धणाए आच्छा सै, 24 पर देह मह रहणा थारे कारण और भी जरूरी सै, ताके मै थारी मदद कर सकूं। 25 इस करकै के मनै इसका भरोस्सा सै। मै जाण सूं कै मै जिन्दा रह्यांगा, बल्के सारा कै गेल्या रह्यांगा, जिसतै थमनै बिश्वास मह मजबूत कर सकूं, अर उस मह आनन्दित रहों। 26 जिब मै थारे धोरै बोहड़ के आऊँगा तौ यीशु मसीह जो मेरे जरिये काम करण लागरया सै, उसपै थम गर्व कर सकों सौं। 27 सिर्फ इतणा करो, के थारा चाल चलण मसीह कै सुसमाचार कै लायक हो जावै। चाहे मै आके थमनै देक्खूं, चाहे ना भी आऊँ, तो भी थारे बारें मह योए सुणु, कै थारा एक ए मकसद हो, अर एक मन होकै बिश्वास तै जो सुसमाचार तै आवै सै, उसकै खात्तर मेहनत करते रहों। 28 अर किसे बात मह बिरोधियाँ तै भय ना खाओं। उनकै खात्तर विनाश का, अर थारे खात्तर उद्धार का साफ सबूत सै, अर यो परमेसवर की ओड़ तै सै। 29 क्यूंके मसीह कै कारण थारे पै या अनुग्रह होया के ना केवल उसपै बिश्वास करो पर उसकै खात्तर दुख भी ठाओं, 30 अर थमनै उसीए मेहनत परमेसवर कै खात्तर करणी सै, जिसी थमनै मेरै ताहीं पैहले फिलीपी नगर मह करते देख्या सै, अर इब भी सुणो सौं के मै उसाए करूं सूं।

2 थम यीशु मसीह के कारण उत्साहित हो, अर जो उसका प्यार थारे खात्तर सै, वो थमनै शान्ति देवै सै, क्यूंके पवित्र आत्मा कै गैल थारी संगति सै, अर मसीह की करुणा अर दया थारे पै सै। 2 तो मेरा यो आनन्द पूरा करो के एक मन रहों, अर एके प्यार, एके चित्त, अर एके मनसा राक्खों। 3 मतलबीपण या द्वाढ़ी बड़ाई कै खात्तर कुछ ना करो, पर दीनता तै एक-दुसरे नै अपणे तै धणा आदर मान द्यो। 4 हरेक अपणे ए हित की न्ही, बल्के दुसरयां कै हित की भी चिंता करै। 5 जिसा मसीह यीशु का सुभाव था उसाए तेरा भी सुभाव हो। 6 यीशु, परमेसवर कै समान होकै भी होकै भी परमेसवर कै बराबर होण नै अपणे बस मह राक्खण की चीज ना समझा। 7 बल्के अपणा सारा सुर्गीय हक्क छोड़ दिया, अर दास का रूप धारण करते होए माणस की समानता मह होग्या। 8 अर माणस के रूप मह जाहिर होकै अपणे-आपने दीन करया, अर परमेसवर का आजाकारी रह्या अर याड़ तक के अपराधियाँ की तरियां मौत, हाँ क्रूस की मौत भी सह ली। 9 इस कारण परमेसवर नै उस ताहीं ऊँच्ची उपाधि दी, अर उसनै वो नाम दिया जो सारे नाम्मा मह ऊँच्चा सै, 10 के जो सुर्ग मह अर धरती कै नीच्चै सै, वे सारी

यीशु के नाम की बाईंडर्ड करै, 11 अर परमेसवर पिता की महिमा के खात्तर हरेक इन्सान मान ले के यीशु मसीह ए प्रभु सै। 12 इस करकै है मेरै प्यारे विश्वासी भाईयो, जिस ढाल थम सदा तै हुकम मानते आये सों, उसाए इब भी ना सिर्फ मेरै गैल रहंदे होए, पर खास करकै इब मेरै दूर रहण पै, भी परमेसवर तै डर्दे अर कापते होए अपणे उद्धार के काम नै पूरा करो। 13 क्यूँके परमेसवर थारे म्ह काम करण लागरया सै, अर वो ए थमनै अपणी इच्छा अर सामर्थ देवै सै, वो काम करो जो उसनै पसन्द सै। 14 सरे काम बिना कुड़कड़ाए अर बिना विवाद कै करया करो, 15 ताके थम परमेसवर की ऊलाद की तरियां इस दुनिया के बुरे अर मतलबी माणसां के बीच म्ह पवित्र अर बेदाग जीवन जी सकों। दुनिया के माणसां के बीच म्ह थम जीवन का वचन लिये होए, आसमान के तारां के समान घमकों। 16 जिब मसीह बोहँडे तो मन्नै गर्व करण का कारण हो, ताके मेरी कोशिश अर मेरी मेहनत करण बेकार ना होवै। 17 जिब मन्नै थारे ताहीं वचन सुणाया, तो थमनै यीशु मसीह पै विश्वास करया, अर अपणे जीवन भी सेवा खात्तर प्रभु ताहीं बलिदान दिया। इस करकै मै प्रभु खात्तर मर भी जाऊँ, तो भी थारे साथ खुश अर आनन्दित सूँ। 18 उस्से तरियां थम भी आनन्दित होओ, अर मेरै गैल आनन्द करो। 19 मन्नै प्रभु यीशु मसीह म्ह आस सै, के मै तीमुथियुस नै थारे धोरै तावला-ए भेजूगाँ, ताके थारे हाल नै जाणकै, मै उत्साहित होऊँ। 20 क्यूँके मेरै धोरै तीमुथियुस के जिसा सुभाव आळा माणस और कोए न्ही सै जो शुद्ध मन तै थारी चिंता करै। 21 क्यूँके सारे अपणे स्वार्थ की खोज म्ह रहवै सै, परमेसवर के कामां खात्तर न्ही। 22 पर थम जाणे सों, के तीमुथियुस तो विश्वास लायक अर आच्छे सुभाव का सै, जिसा बेटू पिता कै गेल्या रहवै सै, उसाए उसनै सुसमाचार कै फैलाण म्ह मेरै गैल मेहनत करी। 23 इस करकै मन्नै आस सै, कै ज्यो ही मन्नै बेरा लागैगा के मेरा के हाल होगा, त्यों ही मै उसनै तावली सी भेज देऊँगाँ। 24 अर मन्नै प्रभु म्ह भरोस्सा सै, के मै आप भी तावला आऊँगा। 25 मन्नै इपफुटीतुस नै थारे धोरै भेजणा जस्ती समझा, जो मेरा भाई अर सहकर्मी साथी योध्दा, अर जरूरतां म्ह मेरी मदद करण आळा थारी ओड़ तै भेज्जा गया दूत सै। 26 क्यूँके उसका मन थारे सारया म्ह लाग्या रह्या था, अर वो बेचैन रहवै था क्यूँके थमनै उसकी बीमारी का हाल सुण्या था। 27 पक्का वो बीमार तो होगया था, उरै ताहीं वो मरण पै था, पर परमेसवर नै उस ताहीं मरण न्ही दिया, अर सिर्फ उस्से पै न्ही पर मेरै पै भी दया करी, ताके मन्नै दुख पै दुख ना हो। 28 इस करकै मन्नै उस ताहीं भेजण का और भी जल्न करया, के तू उसतै फेर मिलकै आनन्दित हो जा, अर मेरी भी चिन्ता घट जावै। 29 इस करकै तू प्रभु म्ह उसतै घणे आनन्द कै गैल मिलये, अर इसा का आदर करया करिये। 30 क्यूँके वो मसीह कै काम खात्तर अपणी जान जोखिम म्ह गेर कै मौत कै धोरै आ ग्या था। ताके वो मेरी मदद कर सकै जिस काम नै थम कर न्ही पाये, क्यूँके थम दूर थे।

3 इस करकै है मैरै विश्वासी भाईयो, प्रभु म्ह आनन्दित रहों। वेए बात थारे ताहीं बारबार लिखण म्ह मनै तो कोए दिक्कत कोनी होन्दी, पर ये बात थमनै इस्से झुँडे शिक्षाकां तै बचाकै राक्खैगी। 2 उन बुरे माणसां तै चौकक्स रहों जो कुत्याँ कै समान सै, अर जो कहवै सै, के उद्धार पाण खात्तर खतना करणा जस्ती सै। 3 हम्मे परमेसवर के सच्चे लोग सां, जो पवित्र आत्मा की अगुवाई म्ह आराधना करा सां, अर मसीह यीशु पै धमण्ड करा सां, पर अपणे उन कामां के जरिये न्ही जो हम शरीर तै करा सां। 4 पर मै तो शारीरिक कामां पै धमण्ड राक्ख सकू सूँ। जै किसे और का शारीरिक कामां पै धमण्ड राक्खण का विचार हो, तो मै उसतै भी बढ़कै राक्ख सकू सूँ। 5 परमेसवर के हुकम के मुताबिक जन्म के आठवे दिन मेरा खतना होया, मै जन्म तै इसाएली अर बिन्यामीन कै गोत्र का सूँ, मेरे माँ-बाप इब्रानी थे, इस करकै मै भी इब्रानी सूँ, अर (मूसा नबी के) नियम-कायदा नै मानण के कारण मै फरीसी भी था। 6 उत्साह कै बारें म्ह जै कहो तो कलीसिया का सतावण आळा, अर सारे यहूदी नियम-कायदा नै मानण आळा था, इस करकै लोग मन्नै धर्मी मान्नै थे। 7 पर जिन बातां नै मै लाभ की समझू था, उन ताहीं मन्नै मसीह यीशु कै कारण नुकसान समझा लिया सै। 8 बल्के अपणे प्रभु मसीह यीशु नै आच्छी तरियां जाण सकू। 9 अर मै उसका कहलाऊँ, डब मेरी अपणी धार्मिकता वा कोनी जो नियम-कायदा के पुगाण तै आवै सै, बल्के मेरी धार्मिकता वा सै जो सिर्फ परमेसवर की ओड़ तै मसीह पै मेरे विश्वास करण कै कारण आवै सै। 10 मै चाहूँ सूँ, के मसीह नै जाण ल्यु। अर मै उसके पुनरुत्थान के सामर्थ्य नै अनुभव करूँ, अर उसकै गैल दुखां म्ह साझीदार हो कै मसीह की मृत्यु की समानता नै पा सकू। 11 ताके मै भी मेरे होए माणसां म्ह तै जी उठण आळा म्ह शामिल हो जाऊँ। 12 इसका यो मतलब कोनी के मन्नै यो सारा काम करया सै, या मै सिध्द हो लिया सूँ, मै आगै बढ़ण की कोशिश करते जाण लागरया सूँ, ताके मन्नै वो मिल जावै, जिसकै खात्तर मसीह यीशु नै मेरै ताहीं चुण्या सै। 13 हे मेरे विश्वासी भाईयो, मेरे विचार तै मै इस ताहीं इब तक पा न्ही सका सूँ, पर हाँ, मै यो जरूर करण लागरया सूँ, क्यूँके जो बात हो ली सै, मै उननै भूलकै जो आगै होण आळा सै उसकै खात्तर मेहनत करण लागरया सूँ। 14 मै निशान्ते की ओड़ भाज्या चाल्या ज्या सूँ ताके वो ईनाम पाऊँ, अर वो ईनाम यो सै के परमेसवर मन्नै सुर्ग म्ह बुलाण लागरया सै क्यूँके मसीह यीशु मेरे खात्तर मरया। 15 म्हारै म्ह तै जितने आमिक रूप तै सिध्द सै, जो इसा विचार राक्खै सै, अर जै किसे बात म्ह थारा ए विचार न्ही हो, तो परमेसवर उस ताहीं भी थारे पै जाहिर कर देगा। 16 इस करकै हमनै सच के मुताबिक चालणा सै, जो परमेसवर नै म्हारे पै जाहिर करया। 17 हे मेरे विश्वासी भाईयो, थारा सुभाव मेरे जिसा हो, अर उन माणसां ताहीं पिच्छाणो, जिनका सुभाव

मेरे जिसा सै, अर उनकी तरियां जिन्दगी जिओ। 18 क्यूँकि घणेए इसी चाल चालौ सै, जिनका जिक्र मन्नै थारे ताहीं बार-बार करया सै, अर इब भी रो-रोकै कहूँ सूँ के उनका सुभाव यो दिखावै सै, के वे मसीह कै क्रूस पै मरण के सन्देस का बिरोध करै सै। 19 उनका अंत विनाश सै, वो अपणी शारीरिक इच्छा नै ए पूरी करणा चाहवै सै, अर वे अपणी शर्म के काम जो वे करै सै, उनपै घमण्ड करै सै, अर दुनियावी चिज्जां के बारें म्ह सोचते रहवै सै। 20 पर म्हारा देश सुर्ग म्ह सै, अर हम एक उद्धारकर्ता प्रभु यीशु मसीह के ओड़े तै आण की बेसबरी तै बाट देखण लाग रहे सां। 21 वो अपणी शक्ति कै असर कै मुताबिक जिसकै जरिये वो सारी चिज्जां नै अपणे बस म्ह कर सकै सै, म्हारी दीन-हीन देह का रूप बदलकै, अपणी देह कै अनुकूल बणा देगा।

4 हे मेरे बिश्वासी भाईयो, मै थारे ताहीं भोत प्यार करूँ सूँ, मन्नै थारे तै तै बिश्वास करो, अर प्रभु के हुक्म नै मानते रहों। 2 मै यूओदिया नै भी समझाऊँ सूँ, अर सुन्तुखे नै भी, के थम आप्स म्ह एक-दुसरे तै बहस मत करो। 3 हे मेरे सच्चे सहकर्मी, मै तेरे तै भी बिनती करूँ सूँ के तू उन बिरबानियाँ की लड़ाई बन्द करवाण म्ह मदद कर, क्यूँकि उननै मेरे गैल सुसमाचार फैलाण म्ह, क्लेमेंस अर मेरै और सहकर्मियाँ गैल मेहनत करी, जिनके नाम जीवन की किताब म्ह लिखे होए सै। 4 प्रभु म्ह सदा आनन्दित रहों, मै फेर कहूँ सूँ, आनन्दित रहों। 5 थारी कोमलता सारे माणसां पै जाहिर हो। प्रभु का आणा लोवै सै, 6 किसे भी बात की चिंता ना करो, पर हर हालात म्ह थारे निवेदन, प्रार्थना, बिनती अर धन्यवाद कै गैल परमेस्वर कै आगमी पेश करै जावै। 7 फेर परमेस्वर की शान्ति, जो माणस की समझ तै परै सै, थारे मन अर विचारां नै मसीह यीशु म्ह सुरक्षित राखैगी। 8 इस करकै हे बिश्वासी भाईयो, जो बात सच सै, जो बात आदरणीय, जो धर्मी सै, पवित्र सुहावनी अर जो-जो बात बड़ाई लायक सै, यानी जो भी सदूण अर प्रशंसा की बात सै उनपै ए मन लगाया करो। 9 जो बात थमनै मेरै तै सुणी, मेरे म्ह देक्खी, सीखी, अर पाई सै, उनै मान्या करो, फेर शान्ति का परमेस्वर थारे गैल रहैगा। 10 मै प्रभु मै घणा आनन्दित सूँ के जिब इतने दिनां कै पाच्छै थारी चिंता मेरै बारें म्ह फेर जागरी सै, पक्का थारे शरुआत म्ह भी इसका विचार था, पर थमनै मौक्का न्हीं मिला। 11 क्यूँकि मेरे धोरै वो कोनी जो मन्नै चाहिए, पर मनै यो सिख्खा सै के मै जिन हालातां म्ह मै सूँ उस्से म्ह सब करूँ। 12 मनै कंगाली अर भरपूरी म्ह रहणा सीख लिया सै, हरेक हालातां अर हरेक बात म्ह मन्नै तृप्त अर भूक्खा रहणा, बढ़णा अर घटणा सीख लिया सै। 13 मसीह मन्नै सामर्थ देवै सै उस म्ह मै सब कुछ कर सकूँ सूँ। 14 तोभी थमनै भला करया के मेरै क्लेश म्ह मेरे साझीदार होए। 15 हे फिलिप्पी नगर के माणसों, थम आप भी जाणो सों के सुसमाचार कै शरुआत म्ह, जिब मै मकिदुनिया परदेस तै बिदा होया, जब थारे अलावा किसे कलीसिया के बिश्वासी नै लेण देण कै बारें म्ह मेरी मदद न्हीं करी। 16 इसे ढाळ थिस्सलुनीके नगर म्ह मेरी जरूरतां नै

पूरा करण म्ह थमनै दो बार रपिये भेजकै मेरी मदद करी। 17 मै यो न्ही लिखता, के मै दान चाहूँ सूँ पर मै चाहूँ सूँ के थारे दान के बदले थमनै आशीष मिलै। 18 मेरै धोरै सब कुछ सै, बल्के भोत घणाए सै, जो चीज थमनै इपफ्रुदीतुस कै हाथ तै भेजी थी उननै पाकै मै तृप्त होया सूँ, थारे दान तौ मनमोहक सुगन्धित भेट कै तरियां सै, अर उस बलिदान की तरियां सै, जो याजक परमेस्वर नै चढ़ावै सै, अर वे उसनै भावै सै। 19 म्हारा पिता परमेस्वर, अपणे अपार धन के मुताबिक जो महिमा समेत मसीह यीशु म्ह थारी हरेक जरूरत नै पूरी करैगा। 20 म्हारै परमेस्वर अर पिता की बड़ाई युगानुयुग होंदी रहवै। आमीन। (aiōn g165) 21 यीशु मसीह म्ह सभी पवित्र माणसां नै, मेरी ओड़ तै नमस्कार कहो। जो बिश्वासी भाई मेरै गैल सै वे थारे ताहीं नमस्कार कहवै सै। 22 सरे पवित्र माणस, जो मेरे साथ सै, अर खास करकै वे माणस जो कैसर के घराने तै बिश्वासी बणे सै, थारे ताहीं नमस्कार कहवै सै। 23 म्हारै यीशु मसीह का अनुग्रह थारी आत्मा कै गैल रहवै।

कुलुस्सियों

1 या चिट्ठी पौलुस अर म्हारे बिश्वासी भाई तीमुथियुस की ओड़तै सै,

जो परमेसवर की इच्छा तै मसीही यीशु का प्रेरित सै। 2 मसीह म्ह उन पवित्र अर बिश्वासी भाईयैं के नाम जो कुलुस्से नगर म्ह रहवै सै: म्हारा पिता परमेसवर थारे ताहीं अनुग्रह अर शान्ति देंदा रहवै। 3 जिब हम थारे खात्तर बिनती करां सां, तो हम अपणे प्रभु यीशु मसीह के पिता, यानी परमेसवर का धन्यवाद करा सां। 4 क्यूंके हमनै सुण्या सै के यीशु मसीह पै थारा बिश्वास सै, अर सारे पवित्र माणसां तै थम प्यार करो सों। 5 जो बिश्वास अर प्यार इन बिश्वासी भाईयैं के धोरै सै, वो उस आस की बजह तै ए सै, जो थारे खात्तर सुर्ग म्ह धरी सै, जिसका वर्णन थमनै पैहले तै सुण राख्या सै। जिब माणस थारे धोरै आए अर यीशु मसीह का सुसमाचार थारे ताहीं सुण्या, जो के परमेसवर का वचन सै। 6 जो थारे धोरै पोहचा सै, अर जिसा दुनिया म्ह यो नतिज्जा त्याण लागरया सै अर दुनिया म्ह हरेक जगहां फैलण लागरया सै, उस्से तरियां जिस दिन तै थमनै उस ताहीं सुण्या अर या सच्चाई आच्छी तरियां समझी के परमेसवर मुफ्त म्ह उन माणसां का पाप माफ करै सै जो यीशु पै बिश्वास करै सै। थारे म्ह भी इसाए करै सै। 7 उस्से की शिक्षा थमनै म्हारे गैल काम करणीये प्यारे इप्रफ्रास तै पाई, जो म्हारे खात्तर मसीह का बिश्वास लायक दास सै। 8 उस्से नै म्हारे ताहीं पवित्र आत्मा के प्यार के बारें म्ह बताया सै, जो परमेसवर नै म्हारे ताहीं दिया सै। 9 इस करकै जिस दिन तै हमनै यो सुण्या सै, हम भी थारे खात्तर सदा प्रार्थना करां सां। के थम परमेसवर का आत्मा थारे ताहीं आत्मिक ज्ञान अर समझ देवै, ताके थम उसकी इच्छा नै समझ सको। 10 थारा बरताव इसा होपण चाहिए जिसा परमेसवर के माणसां का हो सै, ताके थम परमेसवर नै हरेक काम म्ह खुश कर सको, ताके थम सारी हाण भले काम करते रहें अर थम परमेसवर की पिच्छाण म्ह बढ़ते जाओ। 11 उसकी महिमा की शक्ति कै मुताबिक सारी ढाळ की सामर्थ तै शक्तिशाली होन्दे जाओ, ताके थम खुशी अर धीरज कै गैल दुखां नै सह सको। 12 अर पिता परमेसवर का धन्यवाद करते रहो, जिसनै थारे ताहीं इस लायक बणाया के थम उसके राज्य म्ह साझीदार हो सको, जो उसनै अपणे माणसां खात्तर सुर्ग म्ह तैयार करया सै। 13 उस्से नै म्हारे ताहीं शैतान की सामर्थ तै छुड़ाकै अपणे प्यारे बेट्टे कै राज्य म्ह दाखल कराया, 14 जिसतै अपणे बेट्टे की कुरबानी के जरिये म्हारे ताहीं छुटकारा दिया, यानी पापां की माफी। 15 परमेसवर नै कोए न्हीं देख सकता, पर जिब उसका बेट्टा यीशु मसीह इन्सान की देह धारण करकै इस धरती पै आया तो हम उसनै जाण पाए के परमेसवर किसा सै, वो बिलकुल उसके समान सै। 16 क्यूंके मसीह नै परमेसवर कै साथ मिलकै सारी चिज्जां की सृष्टि करी, सुर्ग की हो या धरती की, देखी या अनदेखी, के सिंहासन, के प्रभुताएँ, के प्रधानताएँ, के हक, सारी चीज उस्से कै जरिये अर उस्से खात्तर बणाई गई। 17 सारी चिज्जां के बणण तै पैहला मसीह था, अर सारी चीज उस्से म्ह

मिलकै काम करै सै। 18 मसीह की देह कलीसिया नै चलावै सै, जिस तरियां सिर पूरे देह नै चलावै सै, यानी मसीह कलीसिया का सिर सै, वोए शरुआत सै, अर मरे होया म्ह तै जी उठण आळा म्ह जेडा सै, ताके सारी बात्तां म्ह वोए प्रथान बणै। 19 क्यूंके पिता परमेसवर की खुशी इस्से म्ह सै के मसीह म्ह परमेसवर की सारी भरपूरी रहवै। 20 अर उसके कूस पै बहे होए लहू कै जरिये मेळ-मिलाप करकै, परमेसवर नै अपणे बेट्टे ताहीं भेज्जा, जिसनै अपणा लहू बहाया अर अपणी जाण दे दी। परमेसवर नै यो इस खात्तर करया ताके उसका अर सारी चिज्जां तै दुबारा मेल हो सकै। इस तरियां तै उसनै अपणे बीच अर सारी चीज जो सुर्ग म्ह सै या अर सारी चीज जो धरती पै सै शान्ति की स्थापना करी। 21 थम जो पैहले पराये थे अर बुरे काम्मा कै कारण मन तै बैरी थे। 22 परमेसवर नै इब अपणे बेट्टे ताहीं इन्सान बणाकै भेज्जा ताके वो कूस पै मारया ज्या, जिसकी बजह तै थारा भी मेल करवाया ताके थमनै अपणे आगै पवित्र अर बिना कलंक अर बेकसूर बणाकै खड़ा करै। 23 जै थम मसीह म्ह बिश्वास करो सों, अर थारा बिश्वास उस घर की तरियां हो जो मजबूत नीम पै खड़ाया सै, अर उस सुसमाचार की आस नै ना छोड़ो, जिस ताहीं थमनै सुण्या सै, जिसका प्रचार दुनिया के माणसां म्ह करया गया सै, उसका मै, पौलुस, वचन का सुणण आळा बण्या। 24 मै उन दुखां कै कारण आनन्दित सूं जो थारे खात्तर ठाऊं सूं अर मसीह के वल्लेश की कमी उसकी देह कै खात्तर, यानी कलीसिया कै खात्तर, अपणे गात म्ह पूरी करूं सूं, 25 इस्से कलीसिया कै खात्तर मै थारे खात्तर परमेसवर के जरिये सौंपी गई सेवा कै मुताबिक दास चुण्या गया कै मै परमेसवर के अदिश नै पूरी तरियां प्रचार करूं। 26 यानी उस राज नै जो बखत अर पीढ़ियाँ तै गुप्त रह्या, पर इब उसके उन पवित्र माणसां पै दिख्या सै। (aiōn g165) 27 परमेसवर चाहवै सै के मसीह के धन अर महिमा नै गैर यूहदियाँ के माणस जाणै सै, अर वो राज यो सै के मसीह थारे म्ह रहवै सै, यो थमनै परमेसवर की महिमा नै सँझा करण की आस देवै सै। 28 इस खात्तर हम दुसरयां नै मसीह के बारें म्ह बतावा सां, अर हरेक आदमी नै चेतावनी देवा सां अर परमेसवर के दिए गए ज्ञान तै हरेक आदमी नै सिखावा सां, हरेक आदमी नै मसीह म्ह सिध्द करकै परमेसवर के स्याही पेश करणा चाहवां सां। 29 इस्से ताहीं पूरा करण खात्तर मै भोत मेहनत अर कष्ट सहुं सूं। उस सामर्थ के जरिये जो मसीह देवै सै अर जो मेरे म्ह काम करण लागरया सै।

2 मै चाहूँ सूं के थम जाण ल्लो के थारे अर उनकै खात्तर जो लौदीकिया

नगर म्ह सै अर उन सारया खात्तर जिनतै मै न्हीं मिला, मै उनकै खात्तर किसी मेहनत करूं सूं। 2 मै इस खात्तर मेहनत करूं सूं ताके मै उनकै बिश्वास नै मजबूत कर सकूँ। थारा एक-दुसरे कै खात्तर प्यार थारे ताहीं आप्स म्ह बाँधकै राक्ष्यै, मै चाहूँ सूं के उननै पूरा भरोस्सा हो क्यूंके उन ताहीं परमेसवर की गुप्त योजना की पूरी समझ सै, जो के मसीह सै ए। 3 परमेसवर ए सै जो बुद्धि अर ज्ञान की समझ देवै सै जो छिपे होए खजाने की ढाळ सै। 4 यो मै इस करकै कहूँ सूं के कोए

आदमी थमनै झूठी शिक्षा तै ना भरमावै। 5 हालाकि मै थारे तै दूर सूं तोभी मै थारे बारे मृ सोचता रहूँ सूं, अर जिसा थमनै जीणा चाहिए उसा जीवन अर थारे मजबूत बिश्वास नै देखकै जो मसीह मृ सै, मै राजजी होऊँ सूं। 6 इस करकै जिस तरियां थमनै मसीह यीशु ताहीं प्रभु करकै मान लिया सै, उस्से तरियां उस ताहीं मानते रहो। 7 थारा मसीह पै बिश्वास उस जमीन मृ लगाये गये पेड़ की तरियां हो, जिसकी जड़ गहरी अर मजबूत होन्दे जाओ, जिस के थारे ताहीं सिखाया गया सै, अर सदा परमेस्वर का धन्यवाद करते रहो। 8 इस कारण हम मानवीय शिक्षा का पालन न्हीं करणा चाहन्दे, ताके कोए थमनै उस बेकार ज्ञान अर धोक्खे कै जरिये अपणे बस मृ ना करले, जो माणसों के रिवाज अर दुनियावी शिक्षा के मुताबिक तो सै, पर मसीह के मुताबिक कोनी। 9 थारे ताहीं ये लोग धोक्खा ना देण पावै, जिब के मसीह नै मानव रूप धारण करया पर वो पूरी तरियां तै परमेस्वर था। 10 अर हरेक शक्ति अर प्रधानता पै उसका अधिकार सै। जै थम मसीह के कहलाओ हो, तो थमनै किसे चीज की कमी कोनी। 11 जिब थम मसीह मृ बिश्वास करो सौं, तो थारा माणसां के जरिये खतना कोनी करया जान्दा, पर मसीह के जरिये करया जावै सै, जो के खुद ताहीं पापमय सुभाव तै दूर करणा सै। 12 जिब थारा बपतिस्मा होया (यो थारा पापमय सुभाव दिखावै सै) तो थम मसीह की तरियां गाड़े गये, अर जिसा मसीह जिवाया गया, अर उस्से तरियां थम भी जिन्दा करे गए (नये सुभाव तै)। यो इस खात्तर होया क्यूँके थम बिश्वास करो सौं, के परमेस्वर नै मसीह ताहीं अपणी शक्ति तै मुर्दा मृ तै जिवाया। 13 थम जो अपणे कसरू अर अपणे पापमय सुभाव तै आजाद न्हीं थे, परमेस्वर नै थारे ताहीं भी मसीह के गैल जिवाया, अर म्हारे सारे कसरू माफ कर दिए। 14 अर इसा लागै सै जिसा परमेस्वर नै म्हारे पापां का वो लेख मिटा दिया, जो म्हारे खिलाफ इल्जाम नै बतावै थे। जिब मसीह ताहीं क्रूस पै कील्लां तै जकड़ा गया तो उसनै उस लेख ताहीं पूरी तरियां हटा दिया। 15 अर उसनै प्रधानता अर अधिकारां ताहीं हरा कै उनका खुल्लमखुल्ला तमाशा बाण्या अर क्रूस के जरिये उनपै जयजयकार की आवाज सुणाई। 16 इस करकै थमनै कोए धोक्खा ना देवै, अर ना कोए थमनै खाण-पीण या त्योहार, नये चाँद अर आराम कै दिन के बारें मृ परखै। 17 क्यूँके ये सारी आण आळी बातां की छाया सै, पर मूल चीज मसीह की सै। 18 कोए आदमी झूठी विनम्रता अर सुर्गदूतां की पूजा करा कै थारे ताहीं दौड़ के ईनाम तै राख ना दे। इसा आदमी देखी होड़ बातां मृ लाग्या रहवै सै अर अपणी शरीरिक समझ पै बेकार फुल्लै सै, 19 उसनै बिश्वास अर मसीह का सच्चा सन्देस सिखाणा छोड़ दिया सै, जो के देह मृ सिर की तरियां सै। जिस तरियां एक सिर देह नै निर्देश देवै सै, उस्से तरियां मसीह अपणे लोगां ताहीं निर्देश देवै के वे एक साथ अर एक जुट रहवै जिस तरियां देह के जोड़ अर नस देह नै पकड़ै सै, अर यो बढ़ै सै, जिस तरियां परमेस्वर उन ताहीं बढाणा चाहवै सै। 20 जिब के थम मसीह के गैल दुनिया की पुराणी शिक्षा की ओड़ तै

मरगे सौं, तो फेर क्यूँ उनकी तरियां जो दुनिया के सै जीवन बिताओ सौं? थम इसी विधियाँ के बस मृ क्यूँ रहों सौं, 21 के ना तो “इसनै छुईये,” ना “उस ताहीं खाकै देखिये,” अर ना उसकै हाथ लगाईये? 22 ये सारी चीज काम मृ लादें-लादें नाश हो जावैगी, क्यूँके ये माणस के हुक्म अर शिक्षा कै मुताबिक सै। 23 ये तीन नियम बुधिमानी का राह दिखावै सै, जो ये सै, खुद ताहीं परमेस्वर के प्रति समर्पित करणा, झूठी विनम्रता अर अपणी देह कै गैल कठोरता तै बरताव करणा। पर माणस इन विधियाँ नै मान्नै सै, तोभी पापमय सुभाव नै न्हीं छोड़ पान्दा।

3 यो इसा सै, के मान्नो जणु परमेस्वर नै थारे ताहीं मुर्दा मृ तै जिवाया, तो सुर्गीय चिज्जां की खोज मृ रहों, जड़े मसीह परमेस्वर कै साथ महिमामय जगहां मृ बेठ्या होया सै। 2 धरती पै की न्हीं पर सुर्गीय चिज्जां पै ध्यान लगाओ, 3 क्यूँके यो इसा सै थम तो मर गये जिब मसीह मारा गया अर थारा जीवन मसीह कै गैल परमेस्वर मृ छिप्या होया सै। 4 जिब मसीह जो म्हारा जीवन सै, बोहड़ के आवैगा, तो थम भी उसकै गैल दिखोगे अर उसकी महिमा मृ शामिल होओगे। 5 इस करकै अपणे उन बुरे काम्मां नै छोड़ द्यो जो थारे पापमय सुभाव का कारण बणै सै, जो धरती पै सै, यानी जारी, अशुद्धता, दुष्कामना, बुरी लालसा अर लालची ना बणो यो मूर्तिपूजा कै बराबर सै। 6 क्यूँके माणस ये बुरे काम करै सै, इस कारण परमेस्वर उन ताहीं बहु दण्ड देवैगा। 7 अर थम भी, जिब इन बुराईयाँ मृ जीवन बिताओ थे, तो इन बुरी लालसा कै मुताबिक जिओ भी थे। 8 पर इब थम भी इन साराया नै, यानी छो रोष, बैरभाव, बुराई अर मुँह तै गाली बकणा ये सारी बात छोड़ द्यो। 9 एक-दुसरे तै झूठ ना बोल्लो, क्यूँके थमनै बुरा सुभाव अर बुरे काम छोड़ दिये सै। 10 अर इब थमनै नये सुभाव ताहीं धारण कर लिया सै, यो नया सुभाव ज्यादा तै ज्यादा म्हारे रचण आळे कै मुताबिक बणण लागरया सै, ताके हम उसनै आळी तरियां जाण पावां। 11 इस नई जिन्दी मृ कोए फर्क कोनी पड़ता चाहे यूनानी हो या यहूदी हो, खतना हो या खतनारहित हो, जंगली हो या असभ्य हो, दास हो या आजाद हो, पर मसीह ए सै, जो सब तै खास सै अर वो हम सब मृ बसै सै। 12 क्यूँके परमेस्वर नै थारे ताहीं पवित्र माणस बणण खात्तर चुण्या सै, अर वो थारे ताहीं प्यार कैरै सै, इस करकै बड़ी करुणा, भलाई, दीनता, नप्रता, अर सहनशीलता नै धारण करो। 13 अर जै किसे नै किसे पै दोष लगाण का कोए कारण हो, तो एक-दुसरे की सह ल्यो अर एक-दुसरे के कसरू माफ करो, जिस तरियां प्रभु नै थारे कसरू माफ करे, उस्से तरियां थम भी करो। 14 इन सारा तै बढ़कै थम जो काम कर सकों सौं, वो यो सै, के थम एक-दुसरे तै प्यार करो, प्यार हो ये जो म्हारे ताहीं एक-दुसरे कै गैल एकता मृ जोड़े राक्खै सै। 15 जो शान्ति मसीह देवै सै, वा थारे दिलां पै राज करैगी, क्यूँके थम सरे एक देह के अंग सौं, इस करकै थारे ताहीं एक-दुसरे के साथ शान्ति तै रहण कै खात्तर बुलाया गया सै, अर थम सदा उसका धन्यवाद करदे रहों। 16 हर बखत मसीह कै वचन कै

उपर ध्यान करते रहवों ताके थारा सोचणा अर काम करणा उसके मुताबिक हो, अर सिद्ध ज्ञानसुधा एक-दुसरे नै सिखाओ अर समझाओ, अर अपणे-अपणे मन म्ह धन्यवाद कै गैल परमेसवर कै खात्तर भजन अर जै-जै कार अर आतिक गीत गाओ। 17 वचन म्ह या काम म्ह जो किमे भी करो, सारा प्रभु यीशु मसीह कै नाम तै करो, अर उसकै जरिये परमेसवर पिता का धन्यवाद करो। 18 हे पत्नियों, जिसा प्रभु म्ह सही सै, उसाए अपणे-अपणे धणी कै अधीन रहो। 19 हे पतियों, अपणी-अपणी धरआणी तै प्यार राक्खो, अर उनकै गैल नसाई तै पेश आओ। 20 हे बालकों, सारी बात्तां म्ह अपणे-अपणे माँ बाप के हुकम नै मान्नो, क्यूँके प्रभु इसतै खुश होवै सै। 21 हे बालकां आलो, अपणे बालकां नै तंग ना करो, इसा ना होके वे परेशान हो जावै। 22 हे सेवको, जो इस दुनिया म्ह थारे मालिलक सै, सारी बात्तां म्ह उनके हुकम का पालन करो, माणसां नै राज्जी करण आला कै समान दिखाण कै खात्तर न्ही, पर मन की सीधाई अर परमेसवर कै डर तै। 23 जो किमे थम करो सों, पूरे मन तै करो, यो समझैके के माणसां कै खात्तर न्ही पर प्रभु कै खात्तर करो सों, 24 याद राक्खों परमेसवर थमनै ईनाम देवैगा, या फेर वो थमनै आशीर म्ह साझीदार करेगा जो उसने अपणे माणसां कै खात्तर राक्खी सै, क्यूँके थम मसीह यीशु की सेवा करो सो। 25 जो बुरा काम करै सै, परमेसवर हरेक ताहीं उसकी बुराई का उसनै दण्ड देवैगा, क्यूँके परमेसवर किसे कै गैल पक्षपात कोनी करदा।

4 हे मालिकों, अपणे-अपणे नौकरां कै गैल न्याय अर एक सा बरताव करो, या समझैके के सुर्ग म्ह थारा भी एक मालिलक सै। 2 प्रार्थना म्ह लागे रहो, अर जिब प्रार्थना करो तो सावधान रहियो अर परमेसवर का धन्यवाद हमेशा करते रहो। 3 अर उसकै गैल ए गैल म्हारे खात्तर भी प्रार्थना करते रहो के परमेसवर म्हारै खात्तर वचन सुणाण का इसा द्वार खोल दे, के हम मसीह कै उस भेद का वर्णन कर सकां जिसकै कारण मै कैद म्ह सूं, 4 प्रार्थना करो के मै स्पष्ट रूप तै अर खुल्ले तौर पै मसीह के भेद नै बता पाऊँ। 5 अविश्वासी कै गैल जिब बात करो तो उस भौकैकै का सही इस्तमाल करो। 6 थारा बोलणा सदा अनुग्रह समेत सलोना हो ताके थमनै हरेक माणस ताहीं बढिया ढाळ तै जवाब देणा आ जावै। 7 प्यारे विश्वासी भाईयो अर विश्वास लायक दास तुखिकुस, जो प्रभु म्ह मेरै गैल दास सै, वो थमनै सारी बात बता देगा। 8 उस ताहीं मनै इस खात्तर थारे धोरै भेज्जा, ताके थमनै म्हारे हाल का बेरा पाट जावै अर वो थमनै उत्साहित करेगा। 9 उसकै गैल मनै उनेसिमुस ताहीं भी भेज्जा सै, जो विश्वास लायक अर प्रिय विश्वासी भाई सै, अर वो भी थारे ए नगर का सै, ये थमनै याडे की सारी बात बता देंगे। 10 मेरै गैल कैदी अरिस्तर्खुस अर मरकुस की ओड तै थमनै नमस्कार, मरकुस जो बरनबास का चचेरा भाई सै, जिसके बारें म्ह थमनै चिढ़ी मिली सै, के जै वो थारे धोरै आवै, तो उसतै आच्छी ढाळ बरताव करियो। 11 अर यीशु यो यूस्तुस कुहावै सै, थारे ताहीं नमस्कार कहवै सै। यहूदी विश्वासियों म्ह तै सिर्फ ये तीन माणस सै, जो परमेसवर कै राज्य कै खात्तर मेरै गैल

काम करणीये अर मेरे उत्साहित होण का कारण सै। 12 इपफ्रास, जो थारे नगर का सै, अर मसीह यीशु का दास सै, थारे तै नमस्कार कहवै सै। वो सदा थारे खात्तर मन लगाकै प्रार्थना करै सै, अर परमेसवर तै सदा बिनती करै सै, के परमेसवर थमनै मजबूत अर सिद्ध बणावै, अर थमनै पूरा भरोस्सा हो के थम परमेसवर की इच्छा का पालन करो सों। 13 मै उसका गवाह सूं, कै वो थारे खात्तर अर लौदीकिया अर हियरपुलिस नगर के माणसां कै खात्तर बड़ी मेहनत करदा रहवै सै। 14 म्हारे प्रिय वैद लूका अर देमास का थारे ताहीं नमस्कार। 15 लौदीकिया नगर के विश्वासी भाईयों नै, अर नुमफास अर उनकै घर की कलीसिया नै नमस्कार कहियो। 16 जिब या चिढ़ी थम पढ़ ल्यो तो इसा करियो के लौदीकिया की कलीसिया म्ह भी या पढ़ी जावै, अर वा चिढ़ी जो लौदीकिया तै आवै उसनै थम भी पढ़ईयो। 17 अर अरखिपुस तै कहिये के जो सेवा प्रभु म्ह तेरे ताहीं सौच्यी ग्यी सै, पक्का इरादा करो के उस सेवकाई नै पूरा कर सको। 18 मै (पौलुस) अपणे हाथ्यां तै थमनै नमस्कार लिखूँ सूं। याद राखियो के मै कैद म्ह सूं, अर मेरे खात्तर प्रार्थना करो। परमेसवर का अनुग्रह थारे पै होंदा रहवै। आमीन।

1 थिस्सलुनीकियों

1 या चिठ्ठी पौलुस अर सिलवानुस अर तीमुथियुस की ओड तै थिस्सलुनीकियों नगर की कलीसिया के उन विश्वासियाँ के नाम लिखी सै, जो परमेसवर पिता अर प्रभु यीशु मसीह मृृ सै। परमेसवर का अनुग्रह अर शान्ति थारे ताहीं मिल्दी रहवै। 2 हम अपणी प्रार्थनायां मृृ थारे ताहीं याद करदे अर सारी हाण थम सारया कै बारै मृृ परमेसवर का धन्यवाद करा सां। 3 अर अपणे परमेसवर अर पिता के स्याही जो काम विश्वास तै करे, अर विश्वासियाँ खात्तर इतने प्यार तै मेहनत करी, अर प्रभु यीशु मसीह के बोहड़ण की आस के कारण बड़ी धीरजता तै दुखां नै सहन्दै होए, सारी हाण थमनै याद करा सां। 4 है विश्वासी भाईयो, अर परमेसवर के प्यारे माणसों हम जाणा सां, के परमेसवर नै थारे ताहीं अपणे माणस होण खात्तर छात्या सै। 5 क्यूँके म्हारा सुसमाचार जो यीशु मसीह के बारें मृृ था, थारे धोरै ना सिर्फ बातां तै ए न्ही बल्के पवित्र आत्मा की सामर्थ अर बड़े पवके सबूत कै गैल पौंहच्या सै; जिसा थमनै बेरा सै, के थारे कल्याण खात्तर थारे मृृ म्हारा बरताव किसा था। 6 थारे उपर बड़े कळेश थे, पर थमनै पवित्र आत्मा के जरिये दिए गये आनन्द कै गेल्या सुसमाचार ताहीं मान लिया, थमनै म्हारी अर प्रभु यीशु की तरियां बरताव कराया। 7 तै ताहीं के मकिदुनिया परदेस अर अखाया परदेस के सारे विश्वासियाँ कै खात्तर थम बढ़िया मिसाल बणै। 8 क्यूँके थारे उरै तै ना सिर्फ मकिदुनिया परदेस अर अखाया परदेस मृृ प्रभु का वचन सुणाया गया, पर थारे विश्वास की जो परमेसवर पै सै, हेरेक जगहां जित्त भी हम गये, तो हमनै माणसां तै थारे विश्वास के बारें मृृ सुण्या, इस करकै हमनै माणसां ताहीं थारे बारें मृृ बताण की जरूरत ए कोनी। 9 क्यूँके वे आप ए म्हारै बारै मृृ बतावै सै, के जिब हम थारे धोरै आये, तो थमनै म्हारा स्वागत किस ढाळ कराया; अर थम किस ढाळ मूर्तियाँ तै दूर होकै, परमेसवर की ओड़ मुड़ गये, ताके जिन्दे अर सच्चे परमेसवर की सेवा करो। 10 अर परमेसवर के बेटे यीशु की सुर्ग तै बोहड़ के आण की बाट देखदे होए, जिस ताहीं परमेसवर नै मरे होयां मृृ तै जिन्दा करया, जो म्हारै ताहीं आण आळे न्याय तै बचावै सै।

2 है विश्वासी भाईयो, थमनै आप्पे बेरा सै, के म्हारा थारे धोरै आणा कितना फायदेमन्द था, 2 बल्के थमनै खुद नै ए बेरा सै, के पैहल्या हमनै फिलिप्पी नगर मृृ दुख ठाया, के म्हारा नगर के माणसां नै सख्त विरोध करया, अर परमेसवर नै म्हारै तै इसी हिम्मत देई, के हम परमेसवर का सुसमाचार घणे विरोध होण के बावजूद भी थमनै सुणावां। 3 क्यूँके म्हारा उपदेश ना भ्रम तै सै, अर ना गलत इरादे तै, अर ना छळ कै गैल सै; 4 पर परमेसवर नै म्हारै ताहीं लायक समझाकै सुसमाचार सौंच्या, इस करकै हम माणसां नै न्ही, पर जो म्हारै मनां नै जांच्यां आळे परमेसवर ताहीं राज्यी करण खात्तर उपदेश देवा सां। 5 थमनै बेरा सै, परमेसवर गवाह सै, के हमनै कदे चापलूसी की बात कोनी करी, अर ना ए लोभ के खात्तर हमनै कोए इसा काम करया, अर ना

कुछ थारे तै छुपाया। 6 तोभी हम माणसां तै आदर कोनी चाहवां थे, अर ना थारे तै, ना और किसे तै, हालाकि हम मसीह के प्रेरित होण कै कारण थारी मदद पाणा म्हारा हक था। 7 पर जिस तरियां मृृ अपणे बाल्कां का पालन-पोषण करै सै, उस्से तरियां ए हमनै भी थारे बिचाळै रहकै नरमाई दिखाई रै; 8 एक मृृ की तरियां ए हम थारी चाहना करदे होए, ना सिफ परमेसवर का सुसमाचार, पर अपणा-अपणा प्राण भी थारे ताहीं देण नै त्यार थे, क्यूँके के हम थारे तै भोत प्यारे करां सां। 9 हे विश्वासी भाईयो, म्हारी कडी मेहनत नै याद राक्खो, हमनै ज्यांतै दिन-रात काम-धन्या करदे होए, परमेसवर का सुसमाचार प्रचार करया, के थारे मृृ तै किसे पै बोझा ना बण जावां। 10 थम अर परमेसवर भी इस बात के गवाह सौं, के सारे विश्वासी भाईयाँ कै गैल म्हारा सुभाव कितना सच्चा, धर्मी अर बेकसूर था। 11 थमनै बेरा सै के जिसा पिता अपणे बाल्कां कै गेल्या बरताव करै सै, उस्से तरियां ए हम भी थारे मृृ तै हरेक ताहीं उपदेश देन्दे, अर शान्ति देन्दे, अर समझावां थे 12 के थम इस जीवन जिओ, जिसा परमेसवर चाहवै सै, जो थमनै अपणे राज्य अर महिमा मृृ बुलावै सै। 13 ज्यांतै हम भी परमेसवर का धन्यवाद सारी हाण करा सां के जिब म्हारै जरिये परमेसवर के सुसमाचार का वचन थमनै सुण्या, तो थमनै उस ताहीं माणसां का न्ही पर परमेसवर का वचन समझाकै अपणाया; अर सच मृृ यो परमेसवर का वचन सै भी, अर यो सुसमाचार थारे मृृ काम करण लागरया सै, जो यीशु पै थम विश्वास करो सो। 14 ज्यांतै थम, हे विश्वासी भाईयो, परमेसवर की उस कलीसियाओं कै स्याही दुख सहण लागे जो यूद्धिया परदेस मृृ सै, अर मसीह यीशु पै विश्वास राक्खै सै, क्यूँके थमनै भी अपणे माणसां तै उसाए दुख पाया, जिसा उननै अपणे यहूदी माणसां तै पाया था। 15 जिन नै प्रभु यीशु ताहीं अर नबियाँ ताहीं मार दिया। अर म्हारै ताहीं भी सताया, अर परमेसवर उनतै राज्जी कोनी, अर वे सारे माणसां का बिरोध करै सै। 16 अर वे दुसरी जातां मृृ उनकै उद्धार कै खात्तर बात करण तै हमनै रोकै सै, अर वे पाप पै पाप करते जावै सै, जिब ताहीं के परमेसवर उननै दण्ड ना दे दे; अर इब परमेसवर उननै बड़ा भरी दण्ड देण आळा सै। 17 हे विश्वासी भाईयो, जिब हम थोड़े बखत खात्तर थारे धोरै न्ही थे, पर हम सदा थारे बारें मृृ ए सोच्या थे, तो हमनै और भी बड़ी लालसा तै थारे ताहीं मिलण की अर देखण की कोशिश करी। 18 ज्यांतै हमनै (यानिके मुझ पौलुस नै) एक बर न्ही बल्के दो या तीन बार आण की कोशिश करी, पर शैतान हमनै रोक्के रहया। 19 भला! म्हारी आस, खुशी या बड़ाई का ताज कौण सै? वो थमे होओगे जिब यीशु बोहड़ के आवैगें? 20 म्हारी बड़ाई अर खुशी थमे सो।

3 आखिर जिब हम थारे तै दूर ना रह पाए, तो मै पौलुस अर सीलास नै यो तय करया के एधेंस नगर मृृ एक्ले रह जावां। 2 अर हमनै तीमुथियुस ताहीं जो मसीह कै सुसमाचार मृृ म्हारा भाई, अर परमेसवर का सेवक सै, इस करकै भेज्या, के वो थारे ताहीं मसीह के विश्वास मृृ मजबूत अर उत्साहित करै। 3 ताके कोए इन कळेशां कै कारण डगमगा

नहीं जावै; क्यूँकि थम जाणो सो, के म्हारे ताहीं परमेसवर नै इसे तरियां सताये जाण खात्तर छाट्या सै। 4 क्यूँके पैहल्या भी, जिब हम थारे साथ थे, तो थारे तै कह्या करा थे, के म्हारे ताहीं सताया जावैगा, अर इसाए होया सै, अर थम जाणो भी सो। 5 इस कारण जिब मेरै तै और नहीं रहया गया, तो थारे विश्वास का हाल जाणण कै खात्तर मनै तीमुथियुस ताहीं भेज्या, मनै डर था, के परखण आळे शैतान नै थारे ताहीं परख्या ना हो, अर म्हारी मेहनत बेकार ना होगी हो। 6 पर इब्बे तीमुथियुस नै जो थारे थोरै तै म्हारै उै आके थारे विश्वास अर प्यार का सुसमाचार सुणाया अर इस बात ताहीं भी सुणाया, के थम सारी हाण प्यार कै गेल्या म्हारे ताहीं याद करो सो, अर म्हारै देखण की चाहना राख्यो सो, जिसा हम भी थमनै देखण की। 7 हे विश्वासी भाईयो, हम अपणी सोरे दुख अर कळेस म्ह उत्साहित सां, क्यूँकि हमनै थारे विश्वास के बारै म्ह सुण्या के थम इब भी यीशु मसीह के विश्वास म्ह मजबूत सों। 8 क्यूँके इब जै थम प्रभु म्ह मजबूत हो तो हम जिन्दे सां। 9 अर थारे बारै म्ह जो खुशी हमनै मिली से, उसकी बजह तै हम परमेसवर का धन्यवाद किस तरियां तै करा? 10 हम दिन-रात घणीए प्रार्थना करदे रहवां सां, के थमनै दुबारा देख्यां, अर थारे मसीह पै मजबूती तै विश्वास करण म्ह मदद करा। 11 हम प्रार्थना करां सां, के म्हारा परमेसवर अर पिता आप ए अर म्हारा प्रभु यीशु, थारे ताहीं पोहचने म्ह म्हारी मदद करै। 12 हम प्रार्थना करां, के जिसा हम थारे तै प्यार करां सां; उस्से तरियां ए थारा प्यार भी आप्स म्ह, अर सारे माणसां कै गेल्या बधै, अर परमेसवर थारे प्यार म्ह बढ़ोतरी करदा जावै। 13 हम प्रार्थना करां सां, के वो थारे मनां नै इसा मजबूत करै, के जिब म्हारा प्रभु यीशु अपणी सोरे पवित्र लोगां कै गैल बोहड के आवै, तो वे म्हारे परमेसवर अर पिता कै स्याम्ही पवित्रता म्ह बेक्सूर ठहरै।

4 हे विश्वासी भाईयो, हम थारे तै बिनती करा सां, अर थारे तै प्रभु यीशु म्ह समझावां सां, के इसे जिओ के, परमेसवर ताहीं हम राज्जी करणा आळे बण सकां, जिसा हमनै थारे तै सिखाया सै, थम इस्से तरियां जीण लागे थे, अर थमनै उत्साहित करां सां कै और भी ज्यादा इसा करते रहों। 2 क्यूँके थमनै बेरा सै के हमनै प्रभु यीशु के हक तै थारे ताहीं कौण-कौण से आदेश दिये सै। 3 परमेसवर की मर्जी या सै के थम पवित्र बणोः अर जारी ना करो, 4 थारे म्ह तै हरेक माणस अपणी देह नै काब्बू करणा जाणो क्यूँके थारी देह पवित्र अर सम्मान जोग्यी रहवै। 5 यो काम अभिलाषा तै न्हीं, ना उन जात्तां कै तरियां, जो परमेसवर नै न्हीं जाणदी, 6 ताके इस बात म्ह कोए अपणे विश्वासी भाई के विस्तृद्ध पाप ना करै, अर ना इसा मौका देक्खै के वो पाप करै, क्यूँके प्रभु यीशु उसने दण्ड देवेगा, जो इसे काम करे से; जिसा के हमनै पैहल्याए थारे तै कह्या अर चिताया भी था। 7 क्यूँके परमेसवर नै म्हारै ताहीं अपवित्र जीवन जीण खात्तर न्हीं, पर पवित्र जीवन जीण खात्तर बुलाया सै। 8 इस करके जो इन हुक्मां नै न्हीं मानता, वो माणस नै न्हीं, पर परमेसवर नै तुच्छ जाणै सै, जो अपणा पवित्र आत्मा थारे ताहीं देवै सै। 9 पर

विश्वासी भाई-चारे के प्यार कै बारै म्ह यो जरूरी न्हीं, के मै थारे थोरै कुछ लिक्खूँ क्यूँके आप्स स्म ध्यार राख्याणा थमनै आप ए परमेसवर तै सिख्या सै; 10 थमनै पैहले ए अपणे विश्वासी भाईयाँ के प्यार ताहीं दिखाया सै, जो हर जगहां सारे मकिदुनिया परदेस म्ह सै। पर हे विश्वासी भाईयो, हम थारे तै बिनती करां सां, के थम और भी बढ़ोते जाओ। 11 अर जिसी हमनै थारे ताहीं हुक्म दिया सै, के शान्ति तै जीवन जिओ अर दुसरे माणसां की बात्तां म्ह दखल ना दो, अर अपणे-अपणे हाथ्यां तै कमाण की कोशिश करो। 12 ताके अविश्वासी माणस देक्खै, के थारा रोज का जीवन किसा सै, अर थारे बरताव नै देखके थारा आदर करै, अर अपणी जरूरत कै खात्तर थम किसे के मोहताज ना रहो। 13 हे विश्वासी भाईयो, हम न्हीं चाहदे के थम उनके बारै म्ह जो मर लिये सै, अनजाण रहो; इसा ना हो के थम दुसरायां की तरियां दुख करो जिन नै आस कोनी, के वो मरकै जिन्दा होवैगा। 14 क्यूँके जै हम विश्वास करा सां के यीशु मरया अर जिन्दा भी उठ्या, तो उस्से तरियां ए परमेसवर उननै भी जो यीशु पै विश्वास करते होए मरै सै, उन ताहीं भी वापिस ले आवैगा। 15 क्यूँके हम प्रभु यीशु कै वचन कै मुताबिक थारे तै न्यू कहां सां के हम जो जिन्दे सां अर प्रभु कै दुबारा आण ताहीं बचे रहवांगें, तो पक्के उनतै पैहले प्रभु तै न्हीं मिलैगे जो मौत की नींद सो ग्ये सै। 16 क्यूँके प्रभु यीशु आप ए सुर्ग तै उतरैगा; अर लोग उस बखत उसकी ललकार सुणैगें, अर प्रधान दूत का बोल नै भी सुणैगें, अर सुर्गदूतां जरिये परमेसवर की तुरही फूँकी जावैगी; अर जो विश्वासी लोग मसीह म्ह मरे सै, वे पैहल्या जी उठैंगें। 17 फेर हम जो जिन्दे अर बचे होडे सां, उनकै गेल्या बादलां पै ठालिए जावांगें, ताके आसमान म्ह प्रभु यीशु तै मिला; अर इस तरियां तै हम हमेसा कै खात्तर प्रभु कै गेल्या रहवांगें। 18 इस तरियां इन बात्तां तै एक-दुसरे ताहीं तसल्ली दिया करो।

5 पर हे विश्वासी भाईयो, इसकी कोए जरूरत कोनी, के हम यीशु के दोबारा आण के बखत अर काललां कै बारै म्ह थारे थोरै कुछ लिखां। 2 क्यूँके थम जाणो सों, के परमेसवर के आण का दिन, उस चोर की तरियां होगा, जो रात नै चोरी करण आवै सै, अर थमनै बेरा भी कोनी लागैगा के चोर कद आवैगा। 3 जिब माणस कहन्दे होंगे, “राज्जी-खुशी सां, अर किमे डर कोनी,” तो उनपै चाणचक विनाश आण पड़ेगा, जिस ढाल गर्भवती बच्या जनन के दुख तै बच न्हीं सकदी, उस्से तरियां वो भी बच न्हीं पावैंगें। 4 पर हे विश्वासी भाईयो, थम तो अन्धकार के काम्मा तै अनजाण न्हीं सो, के प्रभु के आण का दिन थारे पै चोर की ढाल आ पड़े। 5 क्यूँके थम सारे चाँदपै की ऊलाद अर दिन की ऊलाद सो; हम ना रात के सां, ना अन्धकार के सां। 6 ज्यांतै हम अविश्वासी माणसां की तरियां सोन्दे ना रहवां, पर जागदे अर चोकन्ने रहवां। 7 क्यूँके जो सोवै सै, वे रात ए नै सोवैं सै, अर जो मतवाले होवै सै वे रात ए नै मतवाले होवै सै। 8 पर हम जो दिन के सां, विश्वास अर प्यार की झिलम पैहर कै अर उद्धार की आस का टोप पैहर कै होशियार रहवां। 9 क्यूँके परमेसवर नै म्हारै ताहीं छो कै खात्तर न्हीं, पर ज्यांतै ठहराया सै, के हम अपणे प्रभु

यीशु मसीह कै जरिये उद्धार पावां। 10 वो म्हारै खात्तर इस कारण मरया, के हम चाहे जिन्दा हों, चाहे मर लिये हों, सारे मिलकै उस्से कै गेल्या जिवां। 11 इस कारण एक-दुसरे ताहीं तसल्ली द्यो अर एक-दुसरे ताहीं बिश्वास म्ह मजबूत करो, जिसा के थम करो भी सो। 12 हे बिश्वासी भाईयो, हम थारे तै बिनती करा सां, के जो थारे म्ह मेहनत करै सै, अर प्रभु म्ह थारे अगुवे सै, अर थमनै शिक्षा देवैं सै, उनका आदर करो। 13 अर उनकै कामां कै कारण प्यार कै गेल्या उन ताहीं घणाए आदर कै जोगा समझो। आप्स म्ह मेळ-मिलाप तै रहो। 14 हे बिश्वासी भाईयो, हम थारे तै बिनती करां सां के जो आलसी सै, उन ताहीं समझाओ, डरपोकां ताहीं हिम्मत द्यो, कमजोरां ताहीं सम्भालो, सारया की ओड़ सहनशीलता दिखाओ। 15 सावधान रहो! कोए किसे तै बुराई कै बदले बुराई ना करै; पर सारी हाण भलाई करण खात्तर त्यार रहवै, आप्स म्ह एक-दुसरे खात्तर आच्छे काम करो, अर दुसरयां खात्तर भी। 16 सारी हाण राज्जी रहो। 17 लगातार प्रार्थना म्ह लाग्गे रहो। 18 हरेक हालात म्ह धन्यवाद करो; क्यूँके थारे खात्तर मसीह यीशु म्ह परमेसवर की याए मर्जी सै। 19 पवित्र आत्मा ताहीं माणसां के जीवन म्ह काम करण तै ना रोकको। 20 परमेसवर के जरिये जो भविष्यवाणीयाँ माणसां ताहीं बताई गई सै उननै तुच्छ ना जाणो। 21 इन सारी बातां ताहीं परखो; जो आच्छी सै उसनै थाम्बे राक्खो। 22 सारी ढाळ की बुराई तै बचे रहो। 23 शान्ति देण आळा परमेसवर आप ए थमनै पूरी तरियां तै पवित्र करै; अर थारी आत्मा अर प्राण अर देह म्हारै प्रभु यीशु मसीह कै बोहडण ताहीं पूरे-पूरे अर बेकसूर सुरक्षित रहवैं। 24 थारा बुलाण आळा साच्चा सै, अर वो इसाए करैगा। 25 हे बिश्वासी भाईयो, म्हारै खात्तर प्रार्थना करो। 26 आप्स म्ह एक-दुसरे ताहीं गळे मिलकै मसीह के प्यार म्ह नमस्कार करो। 27 मै थारे ताहीं प्रभु की हुक्म देऊँ सूं के या चिट्ठी सारे बिश्वासी भाईयाँ नै पढ़कै सुणाई जावै। 28 म्हारे प्रभु यीशु मसीह का अनुग्रह थारे पै होंदा रहवै।

2 थिस्सलुनीकियों

1 या चिट्ठी हम पौलुस, सिलवानुस अर तीमुथियुस की ओड़ तै थिस्सलुनीकियों नगर की कलीसिया के विश्वासियाँ ताहीं लिखां सां, जो महरै पिता परमेस्वर अर प्रभु यीशु मसीह के सै। 2 महरै पिता परमेस्वर अर प्रभु यीशु मसीह की ओड़ तै थमनै अनुग्रह अर शान्ति मिलदी रहवै। 3 हे विश्वासी भाईयो, थारे बारै म्ह हमनै हरेक बखत परमेस्वर का धन्यवाद करणा चाहिवै, अर यो सही भी सै ज्यांते के थारा विश्वास यीशु मसीह म्ह घणा बढ़दा जावै सै, अर थारा एक-दुसरे कै खात्तर आप्स म्ह प्यार घणाए बढ़ता जावै। 4 इस करकै हम परमेस्वर की कलीसिया के विश्वासियाँ के बारै म्ह गर्व करा सां, के जितने थम इमित्तिहान अर मुसीबतां तै गुजरो सों, थम उननै धीरज तै सहण लागरे सों, अर थम फेर भी यीशु मसीह पै विश्वास राक्खों सों। 5 अर परमेस्वर इन दुखां का इस्तमाल अपणे न्याय ताहीं दिखाण अर थारे ताहीं अपणे राज्य के लायक बणाण खात्तर करैगा, जिस खात्तर थम दुख भी ठाओ सो। 6 क्यूँके परमेस्वर हमेशा सही न्याय करै सै, ताके जो थमनै दुख देवैं सै, उननै बदले म्ह वो दुख देवै। 7 अर थमनै वो इस दुख तै राहत देवैगा, जो थम इब उठाण लागरे सों, अर म्हरे ताहीं भी राहत दे, यो उस बखत होगा जिब प्रभु यीशु अपणे सामर्थी सुर्गदूतां कै गैल, धधकती होई आग म्ह सुर्ग तै आवैगा। 8 अर जो परमेस्वर नै न्ही पिछाणदे, अर जो म्हरे प्रभु यीशु कै बारें म्ह सुसमाचार ताहीं न्ही मानते उनतै वो बदला लेवैगा। 9 वे परमेस्वर तै हमेशा खात्तर अलग हो जावैगे अर उसकी महिमामय शक्ति म्ह शामिल न्ही हो पावैं अर वे अनन्त विनाश का दण्ड पावैंगो। (aiōnios g166) 10 यो उस दिन होवैगा, जिब प्रभु यीशु मसीह बोहड़कै आवैगा, ताके वो उन माणसां तै महिमा पावै जो उसके कहलावै सै, उन माणसां तै सम्मानित करया जावैगा जो उसपै विश्वास करै सै, अर उस दिन थम भी उनकी तारीफ करण आळा म्ह तै एक होओगे, क्यूँके थमनै उसपै विश्वास करा, जो हमनै थारे ताहीं बताया। 11 ज्यांतै हम सारी हाण थारे बारै म्ह प्रार्थना भी करा सां, के म्हारा परमेस्वर थारे ताहीं इसा करण म्ह काबिल बणावैगा, जिसकै खात्तर उसनै म्हरे ताहीं बुलाया सै, अर वो थारी हरेक भली इच्छा नै सामर्थी रूप तै पूरा करै, अर हर उस काम नै पूरा करा जो थम विश्वास तै करो सों। 12 इस तरियां म्हरे प्रभु यीशु मसीह का नाम थारे जरिये महिमा पावैगा, यो सब कुछ म्हरे परमेस्वर अर प्रभु यीशु मसीह के अनुग्रह तै होवैगा।

2 हे विश्वासी भाईयो, इब हम अपणे प्रभु यीशु मसीह कै बोहडण, अर जिब हम कठै होकै उसतै मिलांगे तो उस दिन कै बारें म्ह थारे ताहीं बताणा चाहूँ सूँ। 2 थम किसे भविष्यवाणी या किसे उपदेश या किसे चिट्ठी नै म्हारी ओड़ तै लिखी होई मानकै चाणचक बोक्खाना जाइयो, अर ना ए अपणे-आप म्ह घबराईयो के परमेस्वर का दिन पैहले ए आ लिया सै। 3 किसे ढाळ तै भी किसे कै धोक्खे म्ह ना आइयो, क्यूँके प्रभु यीशु के आण तै पैहले इसा बखत आवैगा, जिब भोत सारे लोग

परमेस्वर के बिरोधी हो जावैगे, अर वो अर्धर्मी माणस यानिके विनाश का बेटा दिखाई देवैगा, जिस ताहीं परमेस्वर सदा खात्तर खत्तम कर देवैगा। 4 वो अर्धर्मी माणस परमेस्वर अर उन दुसरी चिज्जां का बिरोध करैगा। जिनकी लोग भगति करै, वो दावा करैगा के वो उनतै भी घणा बड़ा सै, उरे ताहीं के वो परमेस्वर के मन्दर म्ह बैठकै अपणे-आप ताहीं ईश्वर बतावैगा। 5 के थमनै याद कोनी के जिब मै थारे धारै था, तो थारे तै ये बात कह्या करैं था? 6 वो जो अर्धर्मी माणस इब ताहीं दिखा न्ही सै, क्यूँके इसा कुछ तो सै जिसनै उस ताहीं रोक राख्या सै, पक्का थम जाणो सों, के वो के सै। इस करकै जिब परमेस्वर का बखत आवैगा तो वो अर्धर्मी माणस दिख जावैगा। 7 अर उस अर्धर्मी माणस की शक्ति पैहले तै गुप्त रूप तै इस दुनिया म्ह काम करण लागरी सै, पर वो सै जो उस शक्ति नै रोककण लागरया सै, अर जिब ताहीं वो दूर ना हो जावै तब तक वो इस ताहीं रोकणा जारी राक्खेगा। 8 फेर वो अर्धर्मी माणस दिख जावैगा, पर बाद म्ह जिब प्रभु यीशु आवैगा तो वो अपणे मुँह की फूँक तै अर्धर्मी माणस ताहीं मार देवैगा, अर अपणे आगमन के तेज तै भस्म करैगा। 9 वो अर्धर्मी माणस शैतान की शक्ति गैल आवैगा, वो सारे ढाळ के झूँठे चमत्कार, अर अचम्पे के काम करैगा, जो हमनै यो सोच्चण कै खात्तर मजबूत करैगा के योए परमेस्वर सै जो इननै करण लागरया सै। 10 वो सारी ढाळ के बुरे तरिक्के अपणावैगा उन माणसां खात्तर जो अनन्त विनाश के राह की ओड़ जावै सै, क्यूँके उननै सच्चाई पै विश्वास कोनी करया जिसतै उनका उद्धार हों सकै सै। 11 इस्से कारण परमेस्वर उन माणसां म्ह एक भटकाण आळी शक्ति नै भेज्जै सै, जो उन ताहीं सच्चाई तै रुद ले जावैगी, ताके वे झूँठे पै विश्वास करै। 12 परमेस्वर उन सब का न्याय करैगा जिननै सच्चे सन्देस (यीशु मसीह के बारें म्ह) विश्वास कोनी करया, अर जिननै अर्धर्म के कामां तै प्यार करया। 13 हे विश्वासी भाईयो, उरे थारे खात्तर परमेस्वर कै स्यामी म्हारा हमेशा धन्यवाद देणा सही सै, थम प्रभु के प्यारे सों, क्यूँके परमेस्वर नै थारे ताहीं दुनिया की शरुआत तै ए उद्धार कै खात्तर चुण लिया सै। ताके वो थमनै पवित्र आत्मा के काम के जरिये पवित्र बणावै, अर यीशु मसीह के सच्चे सुसमाचार पै विश्वास करण के जरिये थमनै बचाले। 14 म्हरे सुसमाचार के जरिये उसनै थारे ताहीं बचाण खात्तर बुलाया सै, ताके वथ उसकी महिमा म्ह हिस्सा ले सको, जो परमेस्वर नै म्हरे प्रभु यीशु मसीह ताहीं दी सै। 15 ज्यांतै हे विश्वासी भाईयो, मजबूत रहो, अर जो-जो शिक्षा थमनै चाहे वचन या चिट्ठी कै जरिये म्हारै जरिये सीक्खी सै, उननै थाम्बे राक्खो। 16 हम प्रार्थना करां सां के खुद म्हारा प्रभु यीशु मसीह, अर म्हारा पिता परमेस्वर, जिसनै म्हरै तै प्यार करया अर अनुग्रह तै अनन्त शान्ति अर घणी बढ़िया उम्मीद देई सै, (aiōnios g166) 17 थारे मनां म्ह शान्ति दे अर थमनै हरेक आच्छे काम अर वचन म्ह मजबूत करै।

3 इस करकै, हे विश्वासी भाईयो, म्हरै खात्तर प्रार्थना करया करो के प्रभु के बारें म्ह सन्देस भोत तावळा दुसरी जगहां म्ह भी सुणाया जा

सकै, अर लोग उसपै बिश्वास करैंगे जिसा थम बिश्वास करो सों। 2 या भी प्रार्थना करया करो के परमेसवर हमनै बैरी अर बुरे माणसों के जरिये दिए जाण आळे नुकसान तै भी बचावै, क्यूँके भोत-से लोग सुसमाचार पै बिश्वास कोनी करते। 3 पर प्रभु भरोस्सेमंद सै, वो थमनै अन्दरुनी रूप तै मजबूत करैगा अर उसकी रक्षा करेगा, ताके बुराई, शैतान थमनै नुकसान ना पंहुचा सकै। 4 हमनै प्रभु म्ह थारे उप्पर भरोस्सा सै हमनै जो कुछ थारे ताहिं करण खात्तर कह्या सै थम उसाए करण लागरे सों अर करते भी रहोगे। 5 हम प्रार्थना करा सां के प्रभु यीशु थमनै यो समझाण कै काबिल बणावै के परमेसवर थमनै कितना व्यार करै सै, अर धीरज राखणा सिखावै जिसा मसीह राकखै सै। 6 हे बिश्वासी भाईयो, प्रभु यीशु मसीह नै जो हक म्हरे ताहिं दिया सै, उसके कारण हम थमनै हुक्म देवां सां, के थम हरेक इसे बिश्वासी भाई तै न्यारे रहो जो कोए काम न्ही करदा, अर जो शिक्षा उसनै म्हारै तै पाई उसके मुताबिक न्ही करदा। 7 क्यूँके थम सारे अपणे-आपनै आच्छी तरियां जाणो सों, के थमनै उस्से तरियां जीणा चाहिए जिस तरियां हम जिवां सां, क्यूँके जिब हम थारे बिचालै रहण लागरे थे, तो हम आलसी कोनी थे। 8 अर किसे की रोट्टी मुफ्त म्ह कोनी खाई, मेहनत अर कष्ट तै दिन-रात काम-धन्धा करा थे, ताके हम अपणी जस्तां खात्तर थारे भरोस्से ना रहां। 9 हालाकि थारे तै आर्थिक मदद पाण का म्हारा हक बणै सै, फेर भी हम कडी मेहनत करा सां, पर ज्यातै के अपणे-आप ताहिं थारे खात्तर आच्छा नमूना बणावां ताके थम भी म्हारै जिसा जीवन जिझो। 10 क्यूँके जिब हम थारे धोरै थे, तब भी योए कह्या करा थे, के जै कोए काम करणा ना चाहवै तो उसका खाण का भी हक कोनी। 11 हम सुणां सो के कुछ माणस थारे बिचालै सुस्त सै अर वे कोए काम न्ही करदे, पर दुसरयां कै काम म्ह रुकावट करै सै, अर उन ताहिं भी काम करण तै रोकै सै। 12 प्रभु यीशु मसीह नै म्हरे ताहिं हक दिया सै, अर हम थमनै भी समझावां सां, के चुपचाप काम करके अपणी ए कमाई तै रोट्टी खाया कर। 13 पर हे बिश्वासी भाईयो, थम खुद वो काम करण तै पाच्छै ना हाटियो, जो सही अर भले सै। 14 जै कोए म्हारी इस चिट्ठी म्ह दी गई हिदायत नै कोनी मान्नै तो सब जाण ल्यो के वो कौण सै, अर उसकी संगति ना करो, जिसतै वो शर्मिन्दा होवै। 15 तोभी उस ताहिं दुश्मन मतना समझो, पर बिश्वासी भाई जाणकै समझाओ। 16 मै प्रार्थना करूँ सूं के प्रभु जो शान्ति का चोवा सै आप ए थारे ताहिं सारी हाण अर हरेक तरियां तै शान्ति देवै। प्रभु थम सारया कै साथ रहवै। 17 मै, पौलुस, अपणे हाथ तै नमस्कार लिक्खूँ सूं। इस्से तरियां तै मै अपणी सारी चिट्ठियाँ के अन्त म्ह न्यूए लिक्खूँ सूं ताके थम जाण ल्यो के ये मेरी ओढ तै सै। 18 मै प्रार्थना करूँ सूं, के म्हरे प्रभु यीशु मसीह का अनुग्रह थम सारया पै होंदा रहवै।

1 तीमुथियुस

1 या चिट्ठी पौलुस की ओड तै सै, जो यीशु मसीह का प्रेरित सै,
अर परमेसवर जो म्हारा उद्धारकर्ता सै, अर यीशु मसीह जो म्हारी
आस सै, उसनै मेरे ताहीं प्रेरित होण खात्तर बुलाया सै। 2 मै या चिट्ठी
तीमुथियुस नै लिखूँ सूँ, मसीह पै बिश्वास करण के नाते तू मेरे आत्मिक
बेटे की तरियां सै, मै प्रार्थना करूँ सूँ, के पिता परमेसवर, अर म्हारै प्रभु
मसीह यीशु की ओड तै तन्नै अनुग्रह, दया अर शान्ति मिलटी रहवै। 3
जिसा के तू तीमुथियुस जापै सै, इफिसुस नगर म्ह कई माणस सै जो
झूठी शिक्षा देवै सै, वे माणसां ताहीं लगातार झूठी कहाणियाँ अर पूर्वां
की लाल्ही वंशावलियाँ नै सिखावै सै, जिसा के मन्नै मकिनुनिया जान्दे
बखत तेरे तै कह्या था, के इफिसुस नगर म्ह रहके उन ताहीं कह के इसी
शिक्षा ना देवै, जिब वे इसी शिक्षा देवै सै, तो माणसां म्ह विवाद पैदा होवै
सै, इसका नतिज्जा यो सै के ये शिक्षक परमेसवर का काम न्हीं करते
जो परमेसवर नै उन ताहीं दिया सै, यो तो सिर्फ मसीह पैपै बिश्वास
करण के जरिये करया जा सैकै सै। 5 योए म्हारे हुकम का मकसद सै,
के थम सच्चे मन, शुद्ध अन्तरात्मा अर सच्चे बिश्वास तै एक-दुसरे कै
गेल्या बिना कपट के प्यार करो। 6 झूँसे शिक्षकां नै इन सारी चिज्जां
ताहीं छोड़ दिया सै, अर सिर्फ बेकार की चिज्जां पै बातचीत करै सै।
7 अर वकील तो बणणा चाहवै सै, पर जो बात कहवै अर जिन ताहीं
मजबूती तै बोल्लै सै, उन ताहीं समझादे भी कोनी। 8 हम जाणा सां के
मूसा के नियम-कायदा नै जै सही तरिक्के तै सिखावै तो वो भला सै। 9
हम यो जाणा सां, के मूसा नबी के नियम-कायदे धर्मी माणस के खात्तर
कोनी, पर उन माणसां खात्तर सै जो परमेसवर के नियम-कायदा नै
अणदेखा करै सै, अर उन ताहीं मानते कोनी, अर उन माणसां खात्तर जो
परमेसवर की आराधना कोनी करते, अर जो सारी हाण पाप करते
रहवै सै, जो माणस दुष्ट सै, अर परमेसवर का आदर कोनी करते, अर
जो अपणे माँ-बाप नै, अर दुसरयां नै मार देवै सै। 10 जारी करणीये,
माणसां गैल कुर्कम करणीये, माणस नै बेचण आळे, झूठ बोललण
आळे, झूठी कसम खाण आळे, अर इनकै अलावा खेरे उपदेश के सारे
बिरोधियाँ कै खात्तर बणाई गई सै। 11 या सही शिक्षा उस सुसमाचार पै
आधारित सै, जो के धन्य परमेसवर की महिमा के बारे म्ह सै, जिसकी
मेरे ताहीं प्रचार करण की जिम्मेदारी दी गई सै। 12 मै अपणे प्रभु मसीह
यीशु का जिसनै मेरे ताहीं सामर्थ दी सै, धन्यवाद करूँ सूँ, के उसनै मेरे
ताहीं बिश्वास जोग्गा समझाकै अपणी सेवा कै खात्तर चुण्या। 13 बिश्वास
करण तै पैहले, मै बुराई करण आळा, सताण आळा, अर अन्धेर करण
आळा था, तोभी मेरै पै दया होई, क्यूँकै यीशु मसीह पै बिश्वास करण तै
पैहले मनै अविश्वास अर बिना सोच्ये-समझे ये काम करे थे। 14 अर
परमेसवर का अनुग्रह मेरे पै भोत-ए घणा होया, उसनै मेरे ताहीं बिश्वास
अर प्यार दिया, क्यूँकै मै मसीह यीशु म्ह सूँ। 15 या बात साच्ची अर
हेरेक तरियां तै मानण जोग्गी सै, के मसीह यीशु पापियाँ का उद्धार

करण खात्तर दुनिया म्ह आया, जिन म्ह सारया तै बड़ा पापी मै सूँ। 16
परमेसवर नै अपणी दया मेरे पै दिखाई, उसनै दुसरे माणसां तै ज्यादा बुरे काम करे
सै, मसीह यीशु दिखा सके सै, के वो मेरे खात्तर कितना थीरज राक्खै
सै, या उन माणसां खात्तर एक मिसाल सै जो बाद म्ह उसपै बिश्वास
करैंगे, अर वे अनन्त जीवन पावेंगे। (aiōnios g166) 17 इब राजा जो सदा
खात्तर जिन्दा सै, उस अविनाशी, अनदेक्खे, एकमात्र परमेसवर का
आदर अर उसकी महिमा युगानुयुग होंदी रहवै। आमीन। (aiōn g165)
18 हे बेटे तीमुथियुस, मै यो हुकम सौँपूँ सूँ, जो उन भविष्यवाणीयाँ
कै मुताबिक सै, जो पैहल्या तेरे बारै म्ह करी गई थी, उनकै मुताबिक
एक सिपाही की तरियां आच्छी लडाई नै लड़ता रह। 19 थम मसीह
पै लगातार बिश्वास करते रहो, ताके थारी अन्तरात्मा साफ रहवै, कई
माणसां नै अपणी साफ अन्तरात्मा ताहीं त्याग दिया सै, अर उनकी
मसीह पै बिश्वास करण की काबलियत भी खत्म होगी सै, अर इब वे
बिश्वास भी कोनी करते। 20 उन म्ह हुमिनयुस अर सिकन्दर भी शामिल
सै, जिन ताहीं मन्नै शैतान की बुरी शक्तियाँ कै हाथ सौंप दिया सै, ताके
वे परमेसवर की बुराई करणा छोड़ दे।

2 इब मै सारया तै पैहल्या यो आग्रह करूँ सूँ, के बिनती, प्रार्थना,
निवेदन, अर धन्यवाद सारे माणसां कै खात्तर करे जावै। 2 राजयां
अर सारे ऊँच्ये औद्या आळा कै खात्तर ज्यांतै ताके वो हमनै आराम अर
चैन कै गेल्या सारी भगति अर गम्भीरता तै जीवन बिताण देवै। 3 इसी
प्रार्थना सही सै अर म्हारे परमेसवर उद्धारकर्ता नै आच्छी लागै सै। 4 वो
चाहवै सै के हेरेक इन्सान सच्चाई के ज्ञान नै समझ ले अर वे बच जावै।
5 क्यूँकै परमेसवर एके सै, अर परमेसवर अर माणसां कै बीच म्ह भी
एक ए बिचोल्ला सै, जो मसीह यीशु सै, जो मानव रूप धारण करकै
आया। 6 मसीह नै अपणे-आप ताहीं बलिदान कर दिया, ताके लोगां नै
पाप अर मौत की शक्ति तै आजाद करै। मसीह की मौत के जरिये,
परमेसवर नै यो सबूत दिया के सही बखत पै सब लोग बच जावै। 7 इस
कारण तै परमेसवर नै मेरे ताहीं सुसमाचार का प्रचारक अर प्रेरित चुण्या
सै, उसनै मेरे ताहीं गैर यहूदियाँ ताहीं बिश्वास अर सच्चाई का सन्देस
सुणाण आळा बणाया सै, मै झूठ न्हीं बोल्दा, सच करूँ सूँ। 8 ज्यांतै मै
चाहूँ सूँ, के हेरेक जगहां सभाओं म्ह माणस जो पवित्र जिन्दी जीवै सै,
वे हाथां नै ठाकै बिना छो अर विवाद के परमेसवर तै प्रार्थना करै।
9 इस्से तरियां मै चाहूँ सूँ के मसीह बिरबानियाँ नै भी सही तरियां के
लत्ते पैहरणे चाहिए, जो के सादे हो, ना के भड़कीले। ना के खूबसूरती
तै बाल गूँथणा, ना सोने, मोतियाँ अर घणे महँगे लत्यां तै अपणे-
आपनै सवारणा। 10 पर इसके बजाए वो लोगां की भलाई करै, जो
उननै खूबसूरत बणावै सै, क्यूँकै परमेसवर की भगति करण आळी
बिरबानियाँ कै खात्तर योए सही सै। 11 जिब कोए, बिश्वासियाँ ताहीं
सिखाण लागरया हो तो, बिरबानियाँ नै चुपचाप रहकै पूरी शान्ति तै
सिखणा चाहिये। 12 मै बिरबानियाँ ताहीं मर्दा नै सिखाण या उसपै

हावी होण की इजाजत कोनी देंदा, जिब थम आराधना म्ह मिलो हो, तो बिरबानियाँ नै चुप रहणा चाहिए। 13 मै इस करके कहूँ सूं, क्यूँके पैहल्या आदम, उसकै पाछै हव्वा बाणई गई। 14 आदम सांप के जरिये भकाया न्ही गया, पर बिरबानी भकाई म्ह आकै कसूरावर होई। 15 तोभी बिरबानी बाळक पैदा करण कै जरिये उद्धार पावीं, जै वा मसीह पै बिश्वास करै, दुसरे तै प्यार, अर पवित्र अर सही बरताव करै।

3 या बात सच्ची सै, के जो कलीसिया का अगुवां बणणा चाहवै सै,

तो वो भले काम की चाह करै सै। 2 यो जस्ती सै के अगुवां नै बेकसूर, अर एक ए बिरबानी का धणी, संयमी, सुशील, सभ्य, मेहमान का आदर-सत्कार करणीया, अर सिखाण म्ह सही होणा चाहिए। 3 दारुबाज या मारपीट करण आळा ना हो, बल्के नरम हो, अर ना रोळा करण आळा हो, अर ना धन का लोभ्ही हो। 4 अपणे घर का सही इन्तजाम करण आळा हो, अर उसनै अपणे बाळ-बच्यां ताहीं हरेक काम म्ह आदरपूर्वक उनका कहणा मानना सिखाणा चाहिए। 5 जिब कोए अपणे घर का ए इन्तजाम करणा ना जाण्दा हो, तो परमेसवर की कलीसिया की रुखाळी किस ढाळ करैगा? 6 वो नया बिश्वासी ना हो, इसा ना हो के घमण्ड करके शैतान की तरियां सजा भुगतै। 7 अर कलीसिया के बाहर के माणसां म्ह भी वो सम्मान लायक हो, ताके वो बदनामी अर शैतान कै फंदे म्ह ना फँस जावै। 8 उस्से तरियां ए कलीसिया के सेवकां नै भी गम्भीर होणा चाहिये, दोगली बात करण आळा, दारुबाज अर नीच कमाई का लोभ्ही ना हो। 9 उनकै धोरै साफ अन्तरात्मा हो, क्यूँके वे मानते रहवैंगे, के परमेसवर नै जो शिक्षाएँ जाहिर करी वेस सच सै। 10 अर ये इन सारी बातां म्ह पैहले परखे जावै, फेर जै बेकसूर लिकडै तो सेवक का काम करै। 11 इस्से तरियां तै बिरबानियाँ नै भी गम्भीर होणा चाहिये, दोष लाण आळी ना हों, पर सचेत अर सारी बातां म्ह बिश्वास जोग्गी हों। 12 कलीसिया का सेवक एक ए बिरबानी का धणी हों अर बाळ-बच्यां अर अपणे धरां का आच्छा इन्तजाम करणा जाणदे हों। 13 क्यूँके जो कलीसिया के सेवक का काम आच्छी ढाळ तै कर सकै सै, वो माणसां म्ह सम्मान लायक होगा, पर मसीह यीशु म्ह अपणे बिश्वास के बारें म्ह वो बडी दिलेरी तै बोल्लण आळा हो। 14 मै तेरे धोरै तावळा आण की आस करते होए भी, ये बात तेरे तै ज्ञातै लिक्कुँ सूं, 15 ताके जै मेरै ओडै आण म्ह देर हो भी जावै, तो मै चाहूँ सूं, थम इस बात नै जाण ल्यो, के परमेसवर का परिवार जो के एक कलीसिया सै, उस म्ह हमनै एक-दुसरे तै किसा बरताव करणा चाहिए। जिन्दे परमेसवर की कलीसिया के माणस सच्चाई की शिक्षा की नीम अर खाभे की तरियां सै। 16 हम दावे के साथ कह सका सां, के परमेसवर नै जो शिक्षाएँ जाहिर करी सै, वो पूरी तरियां तै सच सै, यानी, वो जो देह म्ह जाहिर होया, वो पवित्र आत्मा के जरिये परमेसवर का बेट्या सावित होया, अर उस ताहीं सुर्दूतां नै देख्या, दुनिया के माणसां नै उसपै बिश्वास करया, दुसरी जातां म्ह उसका प्रचार होया, अर माहिमा म्ह उपर ठाया गया।

4 पर पवित्र आत्मा साफ तौर पै कहवै सै, के अन्त के दिनां म्ह कुछ लोग मसीह शिक्षा ताहीं मानना छोड़ देवैंगे, वो ओपरी आत्मायाँ ताहीं अपणा लेवैंगे जो उन ताहीं भटका देवैगी, अर वो उस झूठी शिक्षा पै मन लगावैंगे जो ओपरी आत्मा की ओड़ तै सै। 2 वे पाखण्डी झूठे लोग सै जो झूठी शिक्षा सिखावै सै, उनकी अन्तरात्मा, जो सही या गलत के बीच का फैसला करै सै, वा मर चुकी सै, जिस तरियां के एक गरम लोहे नै अन्तरात्मा ताहीं जाला दिया हो। 3 ये झूठे लोग सिखावै सै, के ब्याह करणा अर कई चीज जो खाण-पीण की सै, वे गलत सै, पर परमेसवर नै इन खाण-पीण की चिज्जां ताहीं बिश्वासियाँ खात्तर बणाया सै, जो सच्ची शिक्षा नै जाणै सै के परमेसवर की बाणई हरेक चीज आच्छी सै, कोए भी चीज नकारन की कोनी, जै उस ताहीं धन्यवाद देकै खावै। 5 क्यूँके परमेसवर के वेचन अर प्रार्थना कै जरिये सब कबूल हो जावै सै। 6 जै तू लगातार बिश्वासी भाई-भाणा नै याद दुआन्दा रहवै, के जो मनै निर्देश दिए सै, अर तू जो बिश्वास अर आच्छे शिक्षा के सन्देश के जरिये मजबूत बणाया गया सै, जिसका तन्मै पालन करया सै, तो तू यीशु मसीह का एक आच्छा सेवक सै। 7 सांसारिक अर मनधडन्त कहाँनियाँ तै दूर रहों, अर थम अपणे-आपनै ईश्वरीय जीवन जीन खात्तर अनुशासित कर ल्यो। 8 क्यूँके देह की कसरत तै माडा सा फायदा होवै सै, पर भगति सारी बातां कै खात्तर फैयदेमन्द सै, क्यूँके यो इस रहती पै जिन्दा रहन्दे होए अर मरण कै बाद भी एक इनाम का वादा सै। 9 या बात सच्ची अर हरेक ढाळ तै मानन जोग्गी सै। 10 क्यूँके हम मेहनत अर कोशिश इस्से खात्तर करा सां के म्हारी आस उस जिन्दे परमेसवर पै सै, जो सारे माणसां अर खास करकै अपणे बिश्वासियाँ का उद्धार करणीया सै। 11 बिश्वासियाँ नै ये बात करणा अर उननै मानना सीखा। 12 छोट्यी उप्र के कारण कोए तन्मै तुच्छ ना समझै पर वेचन, अर चाल-चलण, अर प्यार, अर बिश्वास, अर पवित्रता म्ह बिश्वासियाँ कै खात्तर बढ़िया नमूना बण जा। 13 जिब ताहीं मै नहीं जाऊँ, जिब तक बखत लिकाडै पवित्र ग्रन्थ बिश्वासियाँ ताहीं पढ़कै सुणा, अर उन ताहीं उत्साहित अर वेचन सिखाण म्ह लगया रह। 14 उस आत्मिक वरदान कै बारै म्ह, जो तेरे म्ह सै, अर भविष्यवाणी कै जरिये कलीसिया के अगुवां के हाथ धोरै बखत तन्मै मिल्या था, निश्चिन्त मतना रह। 15 इन बातां नै सोचदा रह अर इन्नै म्ह अपणा ध्यान लाये रह, ताके तेरी बढ़ोतरी सारया पै दिख जावै। 16 यो ध्यान राक्खों के थम किस तरियां जिन्दगी जिओ सों, अर के सिखाओ सों। इन बातां पै स्थिर रह, क्यूँके इसा करदा रहवैगा तो तू अपणे अर अपणे सुणण आळा कै खात्तर भी उद्धार का कारण होगा।

5 किसे बूढ़े ताहीं छो म्ह ना धमका, पर उस ताहीं अपणा बाप जाणके समझा दे, अर जवानां नै अपणा भाई जाणकै समझा दे। 2 बूढ़ी बिरबानियाँ नै माँ जाणकै, अर जवान बिरबानियाँ नै पूरी पवित्रता तै भाण मानकै समझा दे। 3 उन बिधवा बिरबानियाँ का, जिनकी देखभाल करणीया कोए कोनी उनका आदर कर। 4 जै किसे बिधवा के बालक

या नाती-पोते हों, तो वे सब तै पैहल्या अपणे ए कुण्डे कै प्रति अपणे फर्ज नै पूरा करकै परमेसवर का भगत बणणा सीखै, अर अपणे माँ-बाप के उपकारां का फल दे, क्यूँकै यो परमेसवर नै भावै सै। 5 जो सच म्ह ए बिधवा सै, अर उसका मदद करण आळा कोए न्ही, वा परमेसवर पै आस राख्यै सै, अर दिन-रात बिनती अर प्रार्थना म्ह लागी रहवै सै। 6 पर जो बिधवा भोगविलास म्ह पड़गी, वा जिन्दे जी मरगी सै। 7 इन बातां का भी हुकम दिया कर ताके कोए उनपै दोष ना लगा सकै। 8 पर जै कोए अपणे शिशेदारां की अर खास करकै अपणे कुण्डे की फिक्र ना करै, तो वो विश्वास तै मुकर गया सै अर अविश्वासी तै भी बुरा बण गया सै। 9 उसे बिधवा का नाम लिखा जावै जो साठ साल तै उपर की हो, अर जो एके धणी की विश्वास लायक रही हों। 10 अर भले काम म्ह आच्छी नामी रही हो, जिसनै बालकां का पालन-पोषण, मेहमानां की सेवा, परमेसवर के माणसां की सेवा, दुखियाँ की मदद करी हो, अर हरेक भले काम म्ह मन लगाया हो। 11 पर जवान बिधवा विरबानियाँ कै नाम ना लिखिए, क्यूँकै जिब उनकी शारीरिक अभिलाषा मसीह की सेवा करण तै बढ़के हो जावै सै, तो वा ब्याह करणा चाहवै सै। 12 दुबारे ब्याह करकै, वे खुद कसूरवार बणौंगी, क्यूँकै उननै अपणे पैहल्डे वादे ताहीं जो के ब्याह ना करण का था, उस ताहीं तोड़ दिया सै। 13 इसके गेल्या ए गेल्या वे घर-घर हाँड कै आलसी होणा सिक्खै सै, अर सिर्फ आलसी न्ही पर बकबक कर दी रहै सै, अर दुसरया कै काम म्ह भी दखल देती रहवै सै, अर चुगली कर दी रहवै सै। 14 ज्यातै मै न्यू चाहूँ सूँ के जवान बिधवां ब्याह करै, अर बालक जामै अर घर-बार सम्भालै, अर किसे बिरोधी नै बदनाम करण का मौक्का ना देवै। 15 मै इस करकै कहूँ सूँ के उन म्ह तै कईइयाँ नै प्रभु का कहणा मानना छोड़ दिया सै, अर शैतान कै पाच्छै चालणा शरु कर दिया सै। 16 जै किसे विश्वासी परिवार म्ह कोए बिधवां हों, तो वैउ उनकी मदद करै के कलीसिया पै बोझा ना हो, ताके कलीसिया उनकी मदद कर सकै जो साच्चाए बिधवां सै। 17 कोए भी कलीसिया का अगुवां जो अपणा काम आच्छी तरियां करै सै उस ताहीं बड़ा सम्मान अर पर्याप्त वेतन पाण के लायक मान्या जाणा चाहिए, खासकर जो लोग परमेसवर के सन्देस नै पढाण अर प्रचार करण म्ह कडी मेहनत करै सै। 18 क्यूँकै पवित्र ग्रन्थ म्ह लिख्या सै, “नाज लिकाडण आळे बल्ध का मँहु ना बांधिये,” क्यूँकै “मजदूर अपणी मजदूरी का हकदार सै।” 19 किसे भी कलीसिया के अगुवै के बिलूध दो या तीन गवाह के बिना कोए भी उसनै दोषी ना मान्नो। 20 पाप करण आळा नै सारया कै स्याम्ही समझा दे, ताके बाककी के विश्वासी भी डरै। 21 परमेसवर, अर मसीह यीशु अर छाँटे होड़ सुर्गदांनै मौजूद जाणकै मै तन्नै हुकम देऊँ सूँ, के बिना भेदभाव के तू इन हुकमां नै पूरा कर, अर सब कै गैल एक जिसा बरताव कर। 22 किसे ताहीं जल्दबाजी म्ह अगुवां ना बणाईयें, अर जै तू इसा करै सै, तो उसका जिम्मेदार भी तू खुद होवैगा, तू यो तय करकै मै कोए पाप न्ही करूँगा। 23 आण आळे बखत म्ह सिर्फ पाणी ए का पीण आळा ना रह,

पर अपणे पेट के अर अपणे बार-बार बीमार होण कै कारण माड़ा-माड़ा अंगूर का रस भी काम म्ह ल्याया कर। 24 मै कहूँ सूँ के किसे ताहीं जल्दबाजी म्ह अगुवां ना बणाईये, क्यूँकै कई लोग सब कै स्याम्ही पाप करै सै, इसतै पैहले के उनका न्याय हो, बिश्वासियाँ कै स्याम्ही वे पापी बण चुके सै, दुसरे माणसां के पाप दिखाई न्ही देन्दे, पर पाच्छै नजर आवै सै। 25 उस्से तरियां तै जिब माणस आच्छे काम करै सै तो दुसरे माणस उसके काम्मां नै देक्खै सै, अर जै इब न्ही दिखदे तो बाद म्ह वे दिख जावै सै।

6 जितने विश्वासी गुलाम सै, वे अपणे-अपणे मालिल्क का आदर करै, ताके दुसरे लोग परमेसवर की अर म्हारी शिक्षा की बुराई ना करै। 2 जिनके मालिल्क विश्वासी सै, वे अपणे मालिल्कां का अपमान ना करै, यो जाणकै के इब तौ वे उनके विश्वासी भाई सै, बल्के वे उनकी सेवा और भी ज्यादा मन तै करै, क्यूँकै वे जो सेवा तै फायदा ठाण लागरे सै, अर उननै वे मसीह म्ह अपणे भाईयाँ की तरियां प्यार करै, इन बातां का उपदेश देंदा रह, अर उन ताहीं मानन खातर भी उत्साहित करदा रह। 3 जै कोए झाड़ी शिक्षा देवै सै अर खरी शिक्षा नै न्ही मानता, यानिके म्हारै प्रभु यीशु मसीह की शिक्षा अर हुकम नै जिसतै परमेसवर नै महिमा मिलै सै। 4 तो वो घमण्डी सै, अर किमे न्ही जाणदा, बल्के इसा माणस फालतू के मुद्दे अर शब्दां के बारै म्ह बहस करणा चाहवै सै, जिसतै जल्ण, अर झाङडे, अर बुराई की बात, भुड़े-भुड़े शक, 5 अर उन माणसां म्ह बेकार गङडे-झाङडे पैदा होवै सै, जिनकी अकल खाराब हो जा सै, अर वे सच तै दूर हो गये सै, जो समझौ सै, के परमेसवर की सेवा करणा कर्माई का साधन सै। 6 पर यो म्हारे खातर भला सै, के हम वो करा जिसतै परमेसवर खुश होवै सै, अर उस्से म्ह सबर करा जो वो म्हारे ताहीं देवै सै। 7 क्यूँकै ना हम दुनिया म्ह किमे ल्याए सां, अर ना किमे लेकै जा सकां सां। 8 जै म्हारै धोरै खाण अर पैहरण नै हो, तो इन्नै म्ह सबर करणा चाहिये। 9 पर जो साहूकार होणा चाहवै सै, वे हर तरियां के पाप करण के जरिये धोक्खे म्ह पड़े सै, वे एक जानवर की तरियां जाळ म्ह फँस जावै सै, वे उन चिज्जां नै करणा चाहवै सै जो उनके खातर बेकूफी अर खतरनाक सै अर येए इच्छा उनके नाश का कारण बण जावै सै। 10 क्यूँकै रपियाँ का लोभ सरे ढाळ की बुराई की जड़ सै, जिसनै पाण की कोशिश करदे होए घणखरां नै मसीह की शिक्षा पै विश्वास करणा बन्द कर दिया सै, क्यूँकै वे भोत पईसा चाहवै थे, अर उननै अपणे-आप ताहीं कई ढाळ के दुखां तै छलनी कर लिया सै। 11 पर हे तीमुथियुस, परमेसवर के जन, तू इन बातां तै भाज, अर धर्म, विश्वास, प्यार, धीरज, अर नप्रता कै पाच्छै चाल। 12 एक आच्छे सिपाही की तरियां जो हार न्ही मानता, परमेसवर पै विश्वास करणा अर उसका कहणा मानना ना छोड़े अर उस अनन्त जीवन नै पा ले, जिसके खातर तू बुलाया गया सै, अर भोत सरे माणसां के स्याम्ही तन्नै मान लिया सै, के तू मसीह पै विश्वास करै सै। (aiōnios g166) 13 मै तेरे ताहीं परमेसवर नै, जो सब नै जीवन दे सै, अर मसीह यीशु नै गवाह मानकै

जिसनै पुनित्युस पिलातुस कै स्याम्ही अपणे बारें म्ह बड़ी हिम्मत तै सच बोल्या, यो निर्देश देऊ सूं 14 के जो परमेसवर नै तेरे ताहीं हुकम दिये सै, उन सब ताहीं दिल तै मान, ताके कोए भी तन्नै प्रभु यीशु मसीह के बोहडण तक गलत काम म्ह दोषी ना बता सकै। 15 परमेसवर जो एकमात्र राजा सै, वोए महिमा कै लायक सै, जो राजयां का राजा, अर प्रभुओ का प्रभु सै, वो मसीह ताहीं सही बखत पै जाहिर करैगा। 16 वोए सै जो सदा खात्तर जिन्दा सै, अर वो उस चमकदार रोशनी म्ह रहवै सै, जिसके थोरै कोए न्हीं आ सकदा, अर ना उस ताहीं किसे माणस नै देख्या अर ना कदे देख सकै सै। उसकी प्रतिष्ठा अर राज्य युगानुयुग रहवैगा। आमीन। (aiōnios g166) 17 इस दुनिया के साहूकारां नै आज्ञा दे, के वे घमण्डी ना हों अर अपणे धन पै भरोस्सा ना राक्खै, जो के थोडे दिन का सै, पर परमेसवर पै भरोस्सा राक्खै, जो उदारता तै सब कुछ देवै सै, जो हमनै चाहिए, ताके हम उसका आनन्द उठा सका। (aiōn g165) 18 वे भलाई करै, अर भले काम्मा म्ह धनी बणै, अर उदार अर मदद करण म्ह त्यार हों। 19 जै वे इसा करै सै, तो इसा लाग्नै सै, के वे सुर्ग म्ह अपणी सम्पत्ति जमा करण लागेर सै, जो असलियत म्ह खू न्हीं सकदी, अर उस ताहीं सच्चा जीवन भी दिया जावैगा, जिसका मतलब सै सदा का जीवन। 20 हे तीमुथियुस, वो सब कुछ करण म्ह सावधान रह, जो परमेसवर नै तेरे ताहीं दिया सै, अर अभगति, बेकूफी भरी बात, अर उस झाड्ही शिक्षा तै जो सच्ची शिक्षा के बिरोध म्ह सै, जिन ताहीं वे ज्ञान की बात कहवै सै, उनतै दूर रह। 21 कई माणसां नै इस झूठे ज्ञान ताहीं अपणालिया सै, अर कहवै सै, के हमनै ज्ञान सै, इसा करण तै वे सच्ची शिक्षा तै दूर होगे सै, मै प्रार्थना करूं सूं के परमेसवर का अनुग्रह उनपै भी अर थारे पै भी होन्दा रहवै।

2 तीमुथियुस

1 या चिट्ठी मुझ पौलुस की ओड़ तै सै, परमेसवर नै मेरे ताहीं मसीह यीशु का प्रेरित होण खात्तर चुण्या सै, ताके मै यो सन्देस प्रचार कर सकू, के परमेसवर नै अनन्त जीवन देणे का वादा करया सै, जो यीशु मसीह पै बिश्वास करण तै मिलै सै। 2 मै तीमुथियुस ताहीं या चिट्ठी लिखूँ सूँ जिसतै मै प्यार करूँ सूँ, अर मै प्रार्थना करूँ सूँ, के पिता परमेसवर अर म्हारै प्रभु मसीह यीशु की ओड़ तै तन्है अनुग्रह, दया अर शान्ति मिलदी रहवै। 3 मै परमेसवर का धन्यवाद करूँ सूँ, जिसकी आराधना मै साफ अन्तरात्मा तै उसे ढाल करूँ सूँ, जिस तरियां मेरे पूर्वज करै थे, मै अपणी प्रार्थनायां म्ह तन्है दिन रात याद करूँ सूँ। 4 मनै याद सै के जिब मनै थारे ताहीं छोड़के जाणा पड़या था, तो थम मेरे खात्तर किस तरियां रोए थे। मै दिन-रात तेरे तै मिलण की लालसा राक्खूँ सूँ, ताके आनंद तै भर जाऊँ। 5 मनै तेरी माँ यूनिके का खरा बिश्वास भी याद सै, अर तेरी नानी लोइस का भी इसाए बिश्वास था, अर मनै पक्का बिश्वास सै के थारा भी बिश्वास उसाए होगा सै। 6 इस्से कारण मै तन्है याद दुवाऊँ सूँ के तू परमेसवर कै उस वरदान नै जो मेरै हाथ धरण कै जरिये तनै मिल्या सै प्रज्ञलित करदे। 7 क्यूँके परमेसवर नै म्हारै ताहीं डरपोक न्हीं बणाया, बल्के उसका आत्मा म्हारै मन मजबूत बणावै सै, जो म्हारे ताहीं दुसरयां तै प्यार करण म्ह मदद करै सै, अर म्हारे ताहीं अपणे-आप पै काबू राखणा सिखावै सै। 8 इस कारण म्हारै प्रभु यीशु मसीह के बांगै म्ह लोगां ताहीं बताण म्ह शर्मिन्दा मत होओ, अर शर्मिन्दा होणा भी न्हीं चाहिए, क्यूँके मै उसकी सेवा करण कै कारण जेळ म्ह सूँ, इसके बजाये थमनै उस शक्ति का इस्तमाल करणा चाहिए जो परमेसवर थमनै देवै सै, अर सुसमाचार कै खात्तर मेरै गेल्या दुख नै सह ल्यो। 9 परमेसवर नै म्हारा उद्धार करया सै, अर म्हारे ताहीं पवित्र जीवन जीण खात्तर बुलाया सै। उसनै म्हारै ताहीं इस कारण कोनी चुण्या के हमनै आच्छे काम करे सै, बल्के अपणी अनुग्रह अर इच्छा के मुताबिक चुण्या सै। उसनै यीशु मसीह ताहीं भेजकै म्हारे उपर अनुग्रह दिखाण की योजना दुनिया बणाण तै पैहले ए बणा ली थी। (aiōnios g166) 10 पर इब म्हारै उद्धारकर्ता मसीह यीशु जाहिर होए, अर अपणी करुणा दिखाई, जिसनै मौत की शक्ति ताहीं हरा दिया अर म्हारे ताहीं सुसमाचार कै जरिये दिखाया के अनन्त जीवन का एक ए रास्ता सै। 11 जिसकै खात्तर परमेसवर नै मेरे ताहीं प्रचारक, प्रेरित, अर उपदेशक भी बणाया। 12 इस कारण मै जेळ म्ह इन दुखां नै भी सहूँ सूँ, पर सरमान्दा कोनी, क्यूँके मै मसीह नै जाणु सूँ, जिसपै मनै बिश्वास करया सै, अर मनै पक्का बिश्वास सै के मसीह मेरी उस धरोहर की रक्षा जिब तक करदा रहवैगा जिब तक के वो आ ना ले, क्यूँके वो भरोसेमंद सै। 13 जो खरी बात तनै मेरै तै सुणी सै, उन ताहीं उस बिश्वास अर प्यार कै गैल, जो मसीह यीशु म्ह सै, अपणा बढ़िया नमूना बणाकै राख। 14 अर उस धरोहर की रक्षा करो जो पवित्र आत्मा कै जरिये थारे ताहीं सौप्या

गया सै, जो म्हारै भित्तर रहवै सै। 15 तनै बेरा सै के आसिया परदेस के भोत-से बिश्वासी भाईयाँ नै मेरे ताहीं छोड़ दिया सै, जिन म्ह फूगिलुस अर हिरमुगिनेस भी शामिल सै। 16 उनेसिफुरुस कै कुबे पै प्रभु दया करै, क्यूँके वो कई बार मेरै धेरै आया अर उसनै मेरे ताहीं उत्साहित करया अर जेळ म्ह भी मेरै तै मिलण खात्तर आण म्ह शर्मिन्दा महसूस कोनी करी। 17 पर जिब वो रोम नगर म्ह आया, तो उसनै मेरे ताहीं हरेक जगहां ढूँढ़ा, अर ढूँढ़ के मेरै तै मिल्या। 18 (प्रभु कै के उस दिन उसपै प्रभु की दया हो)। जिब मै इफिसुस नगर म्ह था, तो उसनै वो सब कुछ मेरे खात्तर करया जिसनै थम भी जाणो सौं।

2 ज्यांतै हे मेरे बेटे तीमुथियुस, तू उस अनुग्रह म्ह जो मसीह यीशु म्ह सै, मजबूत हो जा। 2 थमनै मेरे ताहीं कई माणसां के स्यामी मसीह की शिक्षा के बारें म्ह सन्देस सिखान्दे देखा होगा। इस करकै मै चाहूँ सूँ, के थम उन दुसरे बिश्वासियाँ ताहीं भी वोए सन्देस सिखाओ जिन माणसां पै थम भरोस्सा करो सों, जो दुसरयां नै भी योए सन्देस सीखा सकै। 3 इस्से तरियां एक सैनिक धीरज तै लड़ाई के मैदान म्ह सारे दुख सहवै सै, थमनै भी सारे दुख सहण करणे पड़ेंगे, जिसा हम मसीह यीशु खात्तर सहवां सां। 4 जिब कोए सैनिक लड़ाई पै जावै सै, तो उसका काम अपणे-आपनै दुनियादारी के कामां म्ह फसाणा कोनी बल्के उसका काम अपणे भर्ती करण आले नै खुश करणा सै। 5 जै दौड़ म्ह दौडण आला सही तरीके तै न्हीं दौड़ता तो वो ईनाम न्हीं पा सकदा। 6 जो किसान मेहनत करै सै, फसल के पैहले हिस्से पै हक उसका सै। 7 या सोच्चों के ये उदाहरण हमनै के सिखाणा चाहवै सै, परमेसवर इन सारी बातां नै समझाण म्ह थारी मदद करै। 8 यीशु मसीह नै याद राख, जो दाऊद की पीढ़ी तै पैदा होया अर जिस ताहीं परमेसवर नै मेरे होया म्ह तै जिन्दा करया, अर योए सुसमाचार सै जिसका हम प्रचार करां सां। 9 क्यूँके मै सुसमाचार सुणाऊँ सूँ, जिसकै खात्तर मै भुन्डे काम करणीये की ढाल दुख ठाऊँ सूँ, उरै ताहीं के कैद भी सूँ, पर कोए भी चीज़ परमेसवर का सुसमाचार प्रचार करण तै लोगां नै रोक न्हीं सकदी। 10 इस कारण मै छाँटि होए माणसां कै खात्तर सब कुछ सहूँ सूँ, ताके वे भी यीशु मसीह पै बिश्वास करकै बच सकै अर अनन्त महिमा नै हासिल कर पावै। (aiōnios g166) 11 या बात साच्ची सै, के जै हम मसीह कै गेल्या मरणे सां, तो उसकै गेल्या जीवांगे भी। 12 जै हम उसकै खात्तर दुख सहन्दे रहवांगे, तो उसकै गेल्या राज भी करांगे, जै हम इन्कार करां, के हम उसनै न्हीं जाणते, तो वो भी कह देवैगा, के वो भी हमनै न्हीं जाणता। 13 जै हम बिश्वासाधारी भी हों, तो भी वो भरोसेमन्द बणा रहवै सै, क्यूँके वो हमेशा अपणे सुभाव के मुताबिक काम कर करै सै। 14 बिश्वासियाँ नै ये बात समझा दे, अर प्रभु की मौजूदी म्ह समझा दे, के शब्दां पै बहस-बाजी ना करया करै, जिसतै कुछ फायदा कोनी होन्दा, क्यूँके यो उन माणसां के उस बिश्वास नै नुकसान पुहचा सकै सै जो उननै सुणी सै। 15 अपणे-आपनै परमेसवर का अपनाण जोगा अर इसा काम करण आला बणाण की कोशिश कर, जो शर्मिन्दा न्हीं होण पावै,

अर जो सच कै वचन नै सही ढाल तै समझा सकै। 16 पर दुनियावी अर बेकार की बात्तां म्ह शामिल होवै सै, वे परमेसवर तै और घणे दूर हो जावै सै। 17 उनकी बातें सडे धांव की ढाल फैलदी जावैगी, जो दुसरयां के बिश्वास नै कमजोर कर देंगी जो उन बात्तां नै सुणै सै, अर हुमिनयुस अर फिलेतुस उनकी तरियां ए सै। 18 उननै सच्चाई पै बिश्वास करणा बन्द कर दिया सै, वे कहवै सै के परमेसवर नै पैहले ए मरे होए बिश्वासियाँ ताहीं अनन्त जीवन कै खात्तर जिन्दा करया था, इस करकै वे कुछ बिश्वसियाँ ताहीं कहवै सै, के मसीह पै बिश्वास ना करो। 19 परमेसवर के लोग इसी नीम की ढाल सै जो हालदी कोनी, अर उस नीम पै या छाप लागरी सै: “प्रभु अणे माणसां ताहीं पिच्छाणै सै,” अर “जो कोए प्रभु का नाम लेवै सै, उसनै बुराई करणा छोड़ देणा चाहिए।” 20 एक बडे घर म्ह ना सिर्फ सोन्ने-चाँदी ए के, पर काठ अर माटी के बासण भी होवै सै, कुछ खास मौकके, अर कुछ रोज कै खात्तर इस्तमाल करे जावै सै। 21 इस्से तरियां जै कोए बिश्वासी अणे-आपनै नै इन बुरी चिज्जां तै दूर कर लेवैगा, तो वो मालिक के उस उपयोगी बासण की तरियां होवैगा, जो खास मौकका पै इस्तमाल करया जावै सै, वो पवित्र बण जावैगा, अर वो मालिक कै जरिये हरेक भले काम कै खात्तर इस्तमाल करया जावैगा। 22 जवान्नी की अभिलाषाओं तै दूर भाज्जो, अर उनकी संगति म्ह रहों जो धार्मिकता, बिश्वास, प्यार, अर शान्ति का सुभाव राखखै सै, जो साफ मन तै परमेसवर नै पुकारे सै। 23 पर बेकूफी अर अज्ञानता के बहस तै दूर रह, क्यूँके तन्ने बेरा सै के इनतै झागडे पैदा होवै सै। 24 प्रभु कै दास नै झागडालू न्ही होणा चाहिये, पर वो सब कै गेल्या नरम अर शिक्षा म्ह निपुण अर सहनशील हो। 25 वो बिरोधियाँ नै नम्रता तै समझावै, के बेरा परमेसवर उननै इसा मन देवै कै वे पाप करणा छोड़ दे ताके वे भी सच नै पिच्छाणै। 26 अर ये लोग आच्छी तरियां फेर तै सोच्वण अर शैतान के धोकखे तै बचण के लायक हो जावैगे, अर यो धोकखा एक फंदे के तरियां सै। शैतान नै उन ताहीं इस खात्तर पकड्या सै, ताके जो वो चाहवै सै वो उनतै करवा सकै।

3 मै इब के कहूँ सूँ, उन बात्तां पै ध्यान दे अन्त के दिनां म्ह कष्ट का बखत भी आवैगा। 2 क्यूँके माणस स्वर्थी, लोभी, डिंगमार, अभिमानी, बुराई करण आले, माँ-बाप का हुकम टाळण आले, अहसान-फरमोस, अपवित्र, 3 निर्दयी, माफ ना करण आले, दोष लाण आले, असंयमी, कठोर, भले के बैरी, 4 बिश्वासघाती, ढीठ, घमण्डी, अर परमेसवर के न्ही बलके सुखविलास ए के चाहणआले होंगे। 5 वे भगित का भेष तो धरैगें, पर वे उस शक्ति नै अपणावै कोनी, जो उननै ईश्वरीय बणा सकै सै, इसा तै पैरे रहियो। 6 इन्हे म्ह तै वे माणस सै जो धरां म्ह दबे पाँ बड़ जावै सै, अर उन लुगाईयाँ ताहीं बस म्ह कर लेवैं सै, जो पापां तै दबी अर हरेक ढाल की अभिलाषायां कै बस म्ह हो सै। 7 अर वे हमेशा नई बात सिखदी तो रहवैं सै, पर सच की पिच्छाण तक कदे न्ही

पोहोचदी। 8 जिस तरियां यत्रेस अर यम्ब्रेस नै मूसा नबी का बिरोध करया था, उस्से तरियां ए ये भी सच का बिरोध करै सै, ये इसे माणस सै, जिनकी बुद्धि भ्रष्ट होगी सै अर वे बिश्वास कै बारै म्ह निकम्मे सै। 9 उनकी कामयाबी थेंडे बखत की थी, क्यूँके जिस तरियां माणसां नै मान लिया के यत्रेस अर यम्ब्रेस बेकूफ थे, अर हर कोए यो स्वीकार कर लेगा के वे बेकूफ सै। 10 पर तन्ने उपदेश, चाल-चलण, मनसा, बिश्वास, सहनशीलता, प्यार, धीरज, अर सताए जाण, अर दुख ठाण म्ह मेरा साथ दिया, अर इसे दुखां म्ह भी जो अन्ताकिया नगर अर इकुनियुम अर लुस्त्रा नगरां म्ह मेरे पै आण घडे थे, अर दुसरे दुखां म्ह भी जो मन्ने ठाए सै, पर प्रभु नै मेरे ताहीं उन सारया तै छुटा लिया। 12 पर जितने मसीह यीशु म्ह भगति कै गेल्या जीवन विताणा चाहवैं सै वे सारे सताए जावैगे। 13 पर दुष्ट अर भकाण आले बिंगड़दे चले जावैगे, वे दुसरयां नै धोकखा देवैगें, अर खुट दुसरयां तै धोकखा खावैगे। 14 थमनै बिश्वास करते रहणा चाहिए जो हमनै थारे ताहीं सिखाया सै, क्यूँके थम हमनै जाणो सों, अर म्हारे पै भरोस्सा कर सको सों जिननै थारे ताहीं ये बातें सिखाई सै। 15 जिब थम छोटे बालक थे, जिब तै ए थमनै अपणे पवित्र ग्रन्थां म्ह सिख्या सै, जो थारे ताहीं या समझाण म्ह मदद करै के जिब थम मसीह यीशु म्ह बिश्वास करो सों तो परमेसवर थमनै बचावै सै। 16 साब्दा पवित्र ग्रन्थ परमेसवर की प्रेरणा तै रच्या गया, अर म्हारे ताहीं सिखाण खात्तर उपयोगी सै, के सच के सै, अर म्हारे ताहीं यो महसूस करण खात्तर के म्हारी जिन्दगी म्ह के गलत सै। यो म्हारी गलतियाँ नै सुधारै, जिब हम गलत होवां सां, अर वोए करणा सिखावै सै जो सही सै। 17 ताके परमेसवर का जन हरेक भले काम करण खात्तर त्यार अर सिद्ध बण जावै।

4 जिब मसीह यीशु राजा के रूप म्ह शासन करण खात्तर आवैगा, तो वो उन जिन्दे अर मेरे होए माणसां का न्याय करैगा जो मर चुके सै, तो गवाह के रूप म्ह परमेसवर अर मसीह कै साथ, मै ईमानदारी कै साथ थारे तै आग्रह करूँ सूँ। 2 के तू परमेसवर के वचन का प्रचार कर, परमेसवर के वचन ताहीं सुणाण खात्तर सदा तैयार रह, चाहे लोग इस ताहीं सुणाण चाहवै या ना चाहवै, ताके थम माणसां नै दिखा सको, के जो उननै करणा सै, वो गलत करणा सै, अर उनके पापां खात्तर उन ताहीं डाट सको, पर थम माणसां नै उत्साहित भी करो जिब थम उननै बडे धीरज तै सिखाऊ सों। 3 क्यूँके इसा बखत आवैगा जिब माणस खरयां उपदेश न्ही सह सकैगें, पर अपणी ए इच्छा पूरी करैगें अर वे अपणे खात्तर कई उपदेशक कठे करैगें जो उपदेश वे सुणाणा चाहवै सै उन ताहीं वे बतावैगें। 4 अर वे सच्चाई नै अणदेखा कर देवैगें, अर झाड़ी कथा-कहाँनियाँ पै मन लगावैगें। 5 थमनै हरेक बखत अपणे-आप पै काब्बा राखणा चाहिए, दुख ठा, सुसमाचार प्रचार का काम कर, अर परमेसवर के जरिये दी गई सेवा नै पूरी कर। 6 जै वे मनै मार भी देवैगें, तो मेरी जिन्दगी परमेसवर ताहीं चढ़ाई गई एक भेट की तरियां होगी।

इस दुनिया ताहीं छोड़ण का इब मेरा बखत आ लिया सै। 7 मन्नै मसीह की सेवा करण खात्तर कढ़ी मेहनत करी सै, मन्नै अपणी ढौड़ पूरी कर ली सै, मन्नै आखरी तक उसपै बिश्वास करया। 8 आण आळे बखत म्ह प्रभु मेरै ताहीं मुकुट देवैगा, जो के धार्मिकता का मुकुट सै, वो जो सच्चा न्याय करै सै, अर मन्नै वो ईनाम देवैगा जिब बोहङ्के के आवैगा बल्के मेरे ताहीं ए न्ही उन सब ताहीं भी देवैगा, जो उसके दुबारा आण की बाट बड़ी आस तै देखण लागरे सै। 9 मेरै धोरे तावळा आण की कोशिश कर। 10 क्यूँके देमास नै इस दुनिया की विज्ञां तै प्यार करया सै, अर मेरै ताहीं छोड़ दिया सै, अर वो थिस्सलुनीके नगर म्ह चल्या गया सै। क्रेसकेंस, गलातिया नगर की ओड़ चल्या गया अर तीतुस दलमतिया परदेस कान्ही चल्या गया सै। (aiōn g165) 11 सिर्फ लूका मेरै गैल सै। मरकुस नै लेकै चल्या आ, क्यूँके वो मेरे काम करण म्ह मेरी मदद करगा। 12 तुखिकुस ताहीं मन्नै इफिसुस नगर म्ह भेज्या सै। 13 जो चोल्ला, मै, त्रोआस नगर म्ह करपुस के घर छोड़ आया सूँ, जिब तू आवै तो उस ताहीं अर उस किंताब ताहीं भी लेंदे आईये, खास करकै चर्मपत्रों नै। 14 सिकन्दर ठेठेरे नै मेरा बड़ा नुकसान करया सै, प्रभु उस ताहीं उसकै काम्मां कै मुताबिक बदला देवैगा। 15 तू भी उसतै चौकन्ना रह, क्यूँके उसनै म्हारी शिक्षायां का घणाए बिरोध करया सै। 16 पैहली बार मै खुद नै बचाण खात्तर अदालत गया, कोए भी मेरे गैल न्ही था, पर सब नै मेरे ताहीं छोड़ दिया, परमेसवर इस बात का दण्ड उननै ना देवै, मै प्रार्थना करूँ सूँ, मेरे ताहीं छोड़ण के कारण उन ताहीं परमेसवर माफ करदे। 17 पर मेरे गैल मेरा प्रभु मददगार रहया, मेरे जरिये सन्देस की घोषणा पूरी तरियां सम्पन्न हो जावै अर उरै जितने भी गैर यहूदी लोग मौजूद सै, ये बात सुण ले, के उसनै मेरे ताहीं मौत के मुँह म्ह तै छुड़ाया। 18 अर प्रभु मन्नै हरेक भुन्डे काम तै छुड़ावैगा, अर वो अपणे सुर्गीय राज्य म्ह सही-सलामत ले जावैगा। उस्से की महिमा युगानुया होन्दी रहवै। आवीन। (aiōn g165) 19 प्रिसकिल्ला अर उसका धणी अकिवला अर उनेसिफुरुस कै कुण्बे नै मेरी ओड़ तै नमस्कार। 20 इरास्तुस कुरिन्थुस नगर म्ह रह गया, अर त्रुफिमुस ताहीं मन्नै मीलेतुस नगर म्ह बीमार छोड़या सै। 21 जाहु तै पैहल्या चले आण की कोशिश कर। यूबूलुस, अर पूदेस, अर लीनुस अर क्लौदीया, अर सारे बिश्वासी भाईयाँ की ओड़ तै तन्नै नमस्कार। 22 मै प्रार्थना करूँ सूँ, के प्रभु तेरी आत्मा कै गैल रहवै। थारे पै अनुग्रह होंदा रहवै।

तीतुस

1 या चिट्ठी मुझ पौलुस की ओड़तै सै, जो परमेसवर का दास अर यीशु मसीह का प्रेरित सै, मैं इस करके भेज्जा गया सूं ताके उन माणसों के बिश्वास नै स्थापित कर सकूँ जिन ताहीं परमेसवर नै चुण्या सै, अर उन ताहीं सीखा सकूँ के बो उस सच्चाई नै जाण सकै, जो उन ताहीं दिखा सकै के पवित्र जिन्दगी किस तरियां जीणी सै। 2 वे हमेशा के खात्तर परमेसवर के साथ रहण की आस करै सै, क्यूँके परमेसवर, जो कदे झूठ न्हीं बोल्दा, उसनै दुनिया बणाण तै पैहले वादा करया था के उसके लोग हमेशा खात्तर जिन्दा रहवैंगे। (aiōnios g166) 3 अर ठीक बखत पै परमेसवर नै यो सुसमाचार म्हारे पै जाहिर करया, अर हमनै यो सुसमाचार सारया ताहीं सुणाया। परमेसवर जो म्हारा उद्धारकर्ता सै, उसनै मेरे ताहीं या जिम्मेदारी दी सै, अर अपणा काम करण खात्तर मेरे ताहीं उसनै हुकम दिया सै। 4 मै या चिट्ठी तीतुस नै लिखूँ सूं, मसीह पै बिश्वास करण के नाते तू मेरे आत्मिक बेटे की तरियां सै, मै प्रार्थना करूँ सूं, के पिता परमेसवर, अर म्हारे उद्धारकर्ता प्रभु मसीह यीशु की ओड़तै तै तनै अनुग्रह, दया अर शान्ति मिलदी रहवै। 5 मै इस करके तन्नै क्रेते टापू म्ह छोड़ आया था, ताके तू ओड़े उस काम नै खतम कर सकै जो अधूरा रहग्या था, अर मेरै हुकम कै मुताबिक उस टापू के हरेक नगर म्ह कलीसिया के अगुवां नै तैयार कर सकै, जिसा मन्नै कह्या सै। 6 अगुवां बेकसूर अर एके पत्नी का पति हो, जिनके बालक बिश्वासी हो, अर उन म्ह लुचपण अर निरंकुशता का दोष ना हो। 7 क्यूँके अगुवां, नै परमेसवर का भण्डारी होण कै कारण बेकसूर होणा चाहिए, ना जिद्दी, ना गुसेल, ना पियककड़, ना मारपीट करण आळा, ना नीच कमाई का लोभी हो, 8 पर मेहमान का आदर करण आळा, भलाई का चाढ़ आळा, अपणे-आपे म्ह रहण आळा, न्यायकारी, पवित्र अर अपणे मन नै काबू राक्खण आळा हो। 9 वो यीशु मसीह के सन्देस के बारें म्ह मजबुत्ती तै बिश्वास करदा हो, जो हमनै थारे ताहीं सिखाया सै, अर वो दुसरयां ताहीं उत्साहित कर सकै, ताके वे सही शिक्षा का पालन कर सकै, अर उन ताहीं भी समझा सकै जो सही शिक्षा का बिरोध करै सै। 10 क्यूँके भोत-से माणस सही शिक्षा के बिस्तर खड़े होवैंगे, जो बेकार की बात सिखावै सै अर जो दुसरयां ताहीं धोक्खा देवै सै, उन म्ह तै कुछ लोग यहूदी सै जो बिश्वासी बणगे सै। 11 इन माणसां ताहीं सिखाण का मौक्का न्हीं देणा चाहिए, क्यूँके वे इसी शिक्षा देवै सै जो उन ताहीं देणी न्हीं चाहिए, अर ये पूरे घराने का बिश्वास खतम कर देवै सै, अर वे यो इस खात्तर करै सै ताके उन ताहीं पट्टसे मिल सकै। 12 उन म्ह तै एक जण्यै नै, जो उनका नबी सै, कह्या सै, ‘‘क्रेते नगर का माणस जिस ताहीं वे नबी मान्नै सै उसनै क्रेती के माणस के बारें म्ह कह्या, के ये सदा झूठ बोल्लै सै, ये जंगली-जानवरां की तरियां बरताव करै सै, ये आलसी होवै सै अर ये भोत पेटू सै’’ 13 या बात क्रेती माणसां के बारें म्ह सच सै, इस करके उननै सखताई तै चेतावनी दिया कर, के वे

यीशु मसीह की सच्ची शिक्षा पै बिश्वास करै। 14 अर यहूदिया की कथा कहानियाँ अर माणसों के हुकम पै मन ना लगावै, जो सच तै भटक जावै सै। 15 वे माणस जिनकै मन म्ह कोए पाप कोनी, उनकै खात्तर सारी चीज शुद्ध सै, पर उन माणसां खात्तर जो बुरे सै, अर जो मसीह यीशु पै बिश्वास कोनी करते, उन खात्तर कोए भी चीज शुद्ध कोनी, वे हर बखत बुरे काम करै सै, क्यूँके उनका मन पूरी तरियां अशुद्ध हो लिया सै। 16 ये झूठे शिक्षक कहवै सै, के हम परमेसवर नै जाणा सां, पर उनके काम दिक्खै सै, के बो परमेसवर ताहीं न्हीं जाणते क्यूँके वे धृणित अर हुकम ना मानण आळे सै, अर किसे आळे काम कै लायक कोन्या।

2 पर तीतुस तेरे खात्तर योए सही सै के तू बिश्वासियाँ ताहीं वोए सीखा जो सच्ची शिक्षा कै मुताबिक हो। 2 यानी के बूढ़े माणस शान्त गम्भीर अर संयमी हो, अर उनका बिश्वास, प्यार अर धीरज पक्का हो। 3 इस ढाळ बूढ़ी बिरबानियाँ का बरताव इसा हो के परमेसवर नै महिमा मिलै, वे लाल्छण लगाण आळी अर पियककड़ न्हीं हो, पर आळी बात सिखाण आळी हो। 4 जवान बिरबानियाँ नै तीतुस तै न्हीं बल्के बूढ़ी बिरबानियाँ तै निर्देश पाणा चाहिए, ताके वो उन ताहीं सीखा सकै किस तरियां अपणे धर्णी अर बालकां तै प्यार करै। 5 अर वे मन पै काबू राक्खण आळी, पतिव्रता, घर का कामकाज सम्भालण आळी, भली अर अपणे-अपणे धर्णी कै प्रति बिश्वास लायक हो, ताके कोए परमेसवर के बचन की बुराई ना कर सकै। 6 इसे तरियां जवान माणसां नै भी समझाया कर, के वे खराई तै चाल्लण आळे हो। 7 हरेक काम म्ह तू अपणे आळे बरताव तै दुसरयां खात्तर एक मिसाल बण जा, जिब तू बिश्वासियाँ ताहीं परमेसवर के बारें म्ह सिखावै सै, तो उन ताहीं आळे मकसद तै सीखा, अर इसा सीखा ताके लोग तेरा आदर कर सकै। 8 तेरी शिक्षाओं म्ह हमेशा सच्चाई हो, जिसकी आलोचना ना हो सकै, जिसतै बिरोधी नै म्हारे म्ह कोए दोष लगाण का मौक्का ना मिलै अर वो खुद पै शर्मिन्दा हो जावै। 9 नौकरां नै समझा के अपणे-अपणे मालिलक कै कहो म्ह रहवै, अर सारी बालां म्ह उसनै राजी राक्खै, अर उल्ट कै जवाब ना दे। 10 चोरी चलाकी ना करो, अर हमेशा यो दिक्खै के वो बिश्वास लायक सै, अर थारे आळे सुभाव नै देखकै, वे भी म्हारे उद्धारकर्ता परमेसवर की शिक्षा ताहीं सुणणा चाहवैंगे। 11 परमेसवर नै अपणा अनुग्रह इस बात म्ह जाहिर करया के उसनै मसीह यीशु ताहीं म्हारा उद्धारकर्ता बणाकै भेज दिया, ताके हरेक माणस बचाए जा सकै। 12 अपणी दया के कारण परमेसवर म्हारे ताहीं सिखावै सै, के हम उन तरिक्कां तै बरताव करणा बन्द कर द्या, जो उस ताहीं खुश न्हीं कर सकदे, अर इसी लालसा ना राक्खा जिसी अविश्वासी लोग राक्खै सै, पर बुधिमानी अर धार्मिकता तै बरताव करो, अर इसा बरताव करा जो परमेसवर नै पसन्द हो, जिब तक हम दुनिया म्ह रहवां। (aiōn g165) 13 हम इस तरिक्कें तै बरताव करा, जिसा के हम उस अद्भुत दिन की बात देखदे हो, जिसकी हम आस राक्खां सां, यो वो दिन सै जिब यीशु मसीह जो म्हारा परमेसवर अर उद्धारकर्ता सै बड़ी महिमा म्ह इस दुनिया म्ह

बोहङ्ग के आवैगा। 14 इस मसीह यीशु नै अपणे-आप ताहीं म्हारे पापां खात्तर बलिदान कर दिया, ताके हम सारे पापां तै आजाद हो जावां, अर म्हारे ताहीं शुद्ध करया ताके हम उसके अपणे खास माणस बण जावां, जो भले काम करण की बडी इच्छा राक्खै सै। 15 पूरे अधिकार कै गैल इन सारी बातां की शिक्षा देते होए लोगां नै समझा अर उत्साहित करदा रह, अर कोए तन्नै तुच्छ न्ही जाणण पावै।

3 विश्वासियाँ नै याद दुआ के हाकिमां अर अधिकारियां का आदर कर, अर उनका हुकम मान्नै, अर दुसरां का भला करदे रहो। 2 किसे नै बदनाम ना करै, अर ना झगड़ालू बणै, पर दुसरे माणसां कै खात्तर दया दिखाण आले बणो, अर सारे माणसां कै गैल बडी नरमाई के गैल रहवै। 3 क्यूँके हम भी पैहल्या बेअक्तु, परमेस्वर का हुकम ना मानण आले, भ्रम म्ह पडे होए अर न्यारी-न्यारी ढाळ की बुरी अभिलाषा अर सुखभोगण की गुलामी म्ह, अर बैरभाव अर माणसां के प्रति जळण करण म्ह जीवन बिताण लागरे थे, हम घृणा के लायक माणस थे, अर हर कोए म्हारे तै घृणा करै था, अर हम भी उनतै घृणा करा थे। 4 पर फेरभी परमेस्वर जो म्हारा उद्धारकर्ता सै उसनै अपणी दया अर प्यार हम माणसां पै दिखाया। 5 उसनै म्हारे ताहीं पापां के दण्ड तै बचाया, अर यो धार्मिक काम्मां के जरिये न्ही होया जो हमनै खुद करे, पर उसनै म्हारे पै दया करी। उसनै म्हारे ताहीं पवित्र आत्मा देण कै जरिये बचाया, जो म्हारे पापां नै माफ करै सै, अर हमनै नई जिन्दगी अर नया सुभाव देवै सै। 6 परमेस्वर नै मुफ्त म्ह पवित्र आत्मा दिया ताके वो म्हारे म्ह सामर्थी रूप तै काम करै क्यूँके मसीह यीशु म्हारे पापां खात्तर मरया अर म्हारा उद्धारकर्ता बण गया। 7 ताके हम अनन्त जीवन की आस राक्ख सका, जिसका परमेस्वर नै अपणे माणसां ताहीं देण का वादा करया सै, अर हमनै उसपै पुरा भरोस्सा सै, क्यूँके वो अपणी करुणा के मुताबिक म्हारे ताहीं धर्मी बणावै सै। (aiōnios g166) 8 या बात सच सै, अर मै चाहूँ सूँ, के तू इन बातां के बारें म्ह मजबूती तै बोल्लै इस करकै के जिननै परमेस्वर पै बिश्वास करया सै, वे भले काम करण खात्तर हमेशा ध्यान लगावैगे। ये बात भली अर माणसां के फायदे की सै। 9 पर बेवकूफी के विवादों, पीढियाँ, विरोध अर झगड़ा तै जो मूसा नवी के नियम-कायदा के बारें म्ह हो, इनतै बचा रह, क्यूँके वे फायदेमन्द कोनी बल्के बेकार सै। 10 तू उन माणसां नै एक दो बार समझा जो कलीसिया म्ह फूट गेरै सै, अर उन ताहीं इसा करण तै मना कर, उसकै बाद उनपै और बखत बरबाद ना करै। 11 तन्नै पक्का बेरा सै, के इस ढाळ का माणस भटक ग्या सै, अर अपणे काम्मां के जरिये दोषी ठारया जावैगा। 12 जिब मै तेरे धोरै अरतिमास या तुखिकुस नै भेज्जूँ तो मेरे धोरै निकुपुलिस नगर आण की कोशिश करिये, क्यूँके मन्नै ओड़े जाड्हा लिकाड्हण का मन बणाया सै। 13 जेनास वकील अर अपुल्लोस जै सफर खात्तर आग्गे जावै, तो जो मदद थम उनकी कर सको तो वा जसर करियो। 14 इतणाए न्ही बल्के तू बिश्वासियाँ नै यो सीखा, के वो अपणा ध्यान कडी मेहनत करण म्ह लगावै, ताके उन

माणसां खात्तर जिनकै धोरै सै कोनी उनकी जरूरत पूरी हो सकें, अर वे एक आच्छे मकसद के साथ जिन्दगी जी सकै। 15 मेरै सारे साथियाँ की ओड़ तै तेरे ताहीं नमस्कार। जो विश्वास कै कारण म्हारै तै प्यार करै सै, उननै भी नमस्कार। थारे सारया पै परमेस्वर का अनुग्रह होंदा रहवै।

फिलेमोन

१ या चिट्ठी मुझ पौलुस, की ओड़ तै सै, जो मसीह यीशु का कैदी सै। हे फिलेमोन, मेरी अर विश्वासी भाई तीमुथियुस की ओड़ तै तन्नै नमस्कार। तू म्हारा प्यारा मित्तर अर मसीह के काम करण म्ह म्हारा साझीदार सै। २ मै भाण अफकिया, अर अरखिप्पुस ताहीं जो परमेसवर की सेवा एक सिपाही की तरियां करण लागरया सै, अर उस कलीसिया नै भी लिखूँ सूँ, जो फिलेमोन के घर म्ह कठी हो सै। ३ मै प्रार्थना करूँ सूँ, के म्हारे पिता परमेसवर अर प्रभु यीशु मसीह की ओड़ तै थमनै अनुग्रह अर शान्ति मिलती रहवै। ४ मै जिब भी थारे खात्तर प्रार्थना करूँ सूँ, तो मै सारी हाण थारे खात्तर परमेसवर का धन्यवाद करूँ सूँ। ५ मै प्रभु यीशु मसीह पै थारे विश्वास अर परमेसवर के पवित्र माणसां के प्रति प्यार के बारें म्ह सुणदा रहूँ सूँ। ६ मै प्रार्थना करूँ सूँ, के जो विश्वासियाँ गैल थारी साझेदारी सै, उन भली चिज्जां के जाणण के जरिये जो परमेसवर नै म्हारे ताहीं दी सै, वा और घणी बढ़ती जावै। अर या म्हारे मसीह की महिमा खात्तर हो। ७ क्यूँकि हे विश्वासी भाईयो, मै भोत खुश सूँ, अर मेरे प्रति थारे प्यार तै मै घणा उत्साहित सूँ, अर इस कारण पवित्र माणसां नै घणी खुशी मिली सै। ८ जो हक मेरे ताहीं मसीह नै दिया सै, उसकी बजह तै मै थमनै हुकम दे सकूँ सूँ, के थमनै के कारण की जरूरत सै, पर मै इसा कोनी करूँ, मै पौलुस, बुजुर्ग माणस होण के नाते अर मसीह यीशु का कैदी होण के कारण थारे तै प्यार तै बिनती करूँ सूँ। १० मेरी बिनती या सै के उनेसिमुस जो मेरै बालक की तरियां सै, वो मसीह म्ह मेरा आत्मिक बेटा जिब मै केद म्ह था, थम उसपै दया करियो। ११ वो तो पैहला तेरे किमे काम का ना था, पर इब तेरे अर मेरै दोनुआ कै खात्तर बड़े काम का सै। १२ उसे नै यानी जो मेरै दिल का टुकड़ा सै, मै तेरे थारे भेज्जू सूँ। १३ उसनै मै अपणे ए थोरे राखणा चाहूँ था, ताके वो तेरी जगहां मेरी मदद कर सकै, जिब के मै मसीह का सुसमाचार सुणाण कै खात्तर कैद म्ह सूँ। १४ पर मनै तेरी इच्छा बगैर कुछ भी न्हीं करणा चाह्हा। मै चाहूँ था के तू मेरी मदद मजबूरी म्ह न्हीं पर खुद की इच्छा तै खुशी तै करै। १५ हो सकै सै के परमेसवर नै उनेसिमुस ताहीं, तेरे तै इस करकै थोड़े बखत खात्तर दूर जाण का मौका दिया, ताके वो मसीह पै विश्वास कर सकै, अर उसकी बजह तै तू सदा खात्तर उसनै पा लेवै। (aiōnios g166) १६ पर इब वो तेरा दास ए कोनी बल्के दास तै भी बढ़कै, यानी विश्वासी भाई सै। मै उसतै भोत प्यार करूँ सूँ, पर इब तू मेरे तै भी ज्यादा उसतै प्यार कर, दास की तरियां न्हीं, पर विश्वासी भाई की तरियां। १७ इस करकै जै तू मनै अपणा साझीदार समझौ सै, तो उनेसिमुस जिब थारे थोरे बोहङ्के के आवैगा, तो उसनै प्यार तै अपणा लियो, जिस तरियां थम मनै अपणाओ सौं। १८ जै उसनै तेरा कुछ भी नुकसान करया सै, या उसपै तेरा कुछ कर्ज सै, तो आकै दे दियुँगा। १९ मै पौलुस अपणे हाथ तै लिखूँ सूँ, के उसका कर्जा मै आप दे दियुँगा, तू खुद जाणै सै, जै मै

तेरी मदद न्हीं करदा, तो तन्नै नई जिन्दगी न्हीं मिलती, इस करकै तू जिन्दगी भर मेरा कर्जदार सै। २० हे मेरे प्यारे भाई, मेरे खात्तर योए कर क्यूँके हम विश्वासी भाई सां, अर तेरे इसा करण तै मै मसीह म्ह उत्साहित हो जाऊँगा। २१ मै तेरे पै भरोस्सा करकै तेरे तै लिखूँ सूँ, अर या जाणु सूँ के जो कुछ मै कहूँ सूँ, तू उसतै घणा बढ़कै करैगा। २२ अर या भी कै मेरै खात्तर रुकण की जगहां तैयार राक्खै। मनै उम्मीद सै, के परमेसवर थारी प्रार्थनायां का जवाब देवैगा, अर मै थारे थोरे आकै थमनै देख पाऊँगा। २३ इप्राकास, जो मेरै गैल जेळ म्ह कैद सै, क्यूँके वो यीशु मसीह की सेवा करै सै थारे ताहीं नमस्कार कहवै सै। २४ अर मरकुस, अरिस्तर्खुस, देमास अर लूका जो मेरे गैल परमेसवर का काम करणीये सै, इनका भी तेरे ताहीं नमस्कार। २५ मै प्रार्थना करूँ सूँ, के म्हारे प्रभु यीशु मसीह का अनुग्रह थारे साथ होंदा रहवै। आमीन।

इब्रानियों

१ पैहलड़े युग म्ह परमेसवर नै म्हरे पूर्वजां तै भोत बार अर अलग-अलग ढाळ तै नवियाँ के जरिये बात करी। २ पर इन आखरी के दिनां म्ह म्हारै तै, अपणे बेटे के जरिये बात करी। परमेसवर नै सारी सृष्टि की रचना अपणे बेटे के जरिये करी अर उसनै उस ताहीं सारी चिज्जां का वारिस बणाया। (aiōn g165) ३ बेटा ए परमेसवर की महिमा का चाँदणा सै अर उस म्ह हम देक्खां सां, के वो किसा सै, अर सारी चिज्जां नै अपणे शक्तिशाली हुकम तै सम्भालै सै। वो माणसां के पापां की माफी का कारण बण्या, अर ऊँच्ची जगहां पै महिमामय कै सोधी ओड़ जा बेठ्या, ४ इसा करण तै सुर्गदूतां तै उत्नाए बढ़िया ठैहराया, जितना उसनै बड़े ओद्दे का उसका पद सुर्गदूतां तै ऊँच्चा ठैहराया। ५ क्यूँकि परमेसवर नै कदे किसे सुर्गदूत तै न्ही कह्या, के “तू मेरा बेटा सै, आज मै घोषणा करूँ सूक्ष्म, तू मेरा बेटा सै” अर सुर्गदूतां म्ह तै उसनै कद किसे तै कह्या, के “मै उसका पिता होऊँगा, अर वो मेरा बेटा होवैगा?” ६ अर जिब परमेसवर नै अपणे जेठे बेटे ताहीं इस दुनिया म्ह भेज्या, तो कहवै सै, “परमेसवर के सारे सुर्गदूत उस ताहीं मोथ्ये मुँह पड़के प्रणाम करै!” ७ अर सुर्गदूतां कै बारै म्ह न्यू कहवै सै, “वो अपणे सुर्गदूतां ताहीं हवा, अर अपणे सेवकां नै भड़कदी होई आग बणावै सै।” ८ पर बेटे कै बारै म्ह कहवै सै, “हे परमेसवर, उसका राज युगायुग रहवैगा, तेरे राज्य का राजदण्ड न्याय का राजदण्ड सै।” (aiōn g165) ९ तन्नै धर्म तै प्यार अर अधर्म तै बैर राख्या, इस कारण परमेसवर, तेरे परमेसवर नै, तेरे साथियाँ तै बढ़के हर्षरूपी तेल तै तेरा अभिषेक करया।” १० अर यो के, “हे प्रभु, शरुआत म्ह तन्नै धर्मती अर जो कुछ अकास म्ह सै उन ताहीं बणाया, अर सुर्ग तेरे हाथ्यां की कारीगरी सै। ११ वे तो नाश हो जावैंगे, पर तू सदा खात्तर जिन्दा रहवैगा, अर वे सारे लते की ढाळ पुराणे हो जावैंगे, १२ अर तू उन ताहीं चादर की तरियां लपेटेगा, अर वे लते की ढाळ बदल जावैंगे पर तू कदे न्ही बदलैगा, अर तू सदा खात्तर जिन्दा रहवैगा।” १३ अर सुर्गदूतां म्ह तै उसनै किसैतै कद कह्या, “तू मेरै सोळी ओड़ बैठ, यानी के तू हक की जगहां पै बैठ। जिब ताहीं के मै तेरे बैरियाँ नै पूरी तरियां तै हरा ना द्यूँ?” १४ के वे सारे परमेसवर की सेवा-पाणी करण आखी आत्मा कोनी, जो उद्धार पाण आळा कै खात्तर मदद करण नै भेजी जावै सै?

२ इस करकै म्हरे ताहीं जो कुछ सिखाया गया था उसका पालन करण खात्तर हमनै और सावधान रहणा चाहिए। तब हम सच्चाई तै दूर न्ही जावैंगे। २ क्यूँकि जो वचन सुर्गदूतां कै जरिये कह्या गया था। जिब वो सच साबित होया अर हरेक अपराध अर हुकम ना मानण का परमेसवर नै उन ताहीं दण्ड दिया। ३ तो हम माणस इसे महान् उद्धार नै अणेदेखा करकै किस तरियां बच सकां सां? इस महान् उद्धार की पैहली बार प्रभु यीशु नै घोषणा करी थी, अर जिन चेल्यां नै उस ताहीं सुया, तो चेल्या नै म्हरे ताहीं साबित करकै दिखा दिया के यो सच सै। ४ अर गेल्या ए

परमेसवर भी अपणी मर्जी कै मुताबिक चमत्कार, अर अनोक्खे काम्मां, अर कई ढाळ के सामर्थ के काम्मां, अर पवित्र आत्मा के वरदान्ना के बांडण के जरिये इन बात्तां नै सच साबित करदा रहया। ५ उसनै उस आण आखी दुनिया ताहीं जिसका जिक्र हम करण लागरे सां, सुर्गदूतां कै अधीन न्ही करया, पर अपणे बेटे के अधीन कर दिया। ६ पवित्र ग्रन्थ म्ह किते, किसे नै परमेसवर तै यो कह्या सै, के “माणस के सै के तू उसकी सुधि लेवै सै? या माणस का बेटा के सै, के तू उसकी फिक्र करै सै? ७ तन्नै उस ताहीं सुर्गदूतां तै थोड़ा ए कम महत्वपूर्ण बणाया, तन्नै उस ताहीं राजा की तरियां महिमा अर सम्मान दिया, अर सब किमे उसके अधीन कर दी। ८ तन्नै उस ताहीं सारी चिज्जां पै हक दिया।” इसा लागै सै के परमेसवर नै सारा कुछ उसके अधीन कर दिया सै, उरै ताहीं के कुछ भी न्ही बचा जो उसके अधीन ना हो, पर हम देख सका सां, के सारी चिज्जें उसके अधीन म्ह न्ही। ९ पर हम यो देक्खां सां, के यीशु ताहीं कुछ बखत खात्तर सुर्गदूतां तै कम करया गया था, ताके परमेसवर के अनुग्रह तै वो हरेक किसे खात्तर मर सकै, क्यूँकि उसनै दुख ठाया अर मर ग्या, इस करकै परमेसवर नै उस ताहीं महिमा अर सम्मान दिया। १० परमेसवर नै जो कुछ भी बणाया सै, वो सारा अपणे खात्तर सै, अर उस ताहीं योए आच्छा लाग्या के जिब वो भोत सारे माणसां ताहीं अपणी महिमा म्ह सँझा करै, तो यीशु मसीह जो उनका उद्धरकर्ता सै, उसके दुख ठाण कै जरिये उन ताहीं सिद्ध बणा लेवैगा। ११ क्यूँकि जो माणसां नै उनके पाप तै साफ करै सै, अर जिन माणसां के पाप साफ होण लागरे सै, दोन्हु एक ए पिता परमेसवर की ऊलाद सै, इस्से कारण वो उननै भाई-भाण कहण तै कोनी सरमान्दा। १२ अर वो (मसीह) परमेसवर तै कहवै सै, “मै अपणे भाईयाँ ताहीं बताऊँगा के तन्नै मेरे खात्तर कितने भले काम करे सै, अर जिब आराधना करण खात्तर मण्डली म्ह कठु होंगे तो मै तेरी महिमा करूँगा।” १३ अर वो दुबारा कहवै सै, के मै उन माणसां कै साथ सूँ, “जो परमेसवर नै मेरे ताहीं दिए सै।” १४ ज्यांतै जिब के परमेसवर के बच्ये सै, जो के माँस अर लहू तै बणे सै, अर उसका बेटा (यीशु मसीह) भी इन्सान बण्या, इस करकै वो एक इन्सान के रूप म्ह ए मर सकै था, अर सिर्फ मरण तै ए वो शैतान की शक्ति नै तोड़ सकै था, जिसकै धोरै मौत की शक्ति थी। १५ अर इस तरियां यीशु नै उन सारे माणसां ताहीं मुक्त कर दिया जो हर बखत गुलाम्मां की तरियां जीवै थे, अर वे मरण तै डरै थे। १६ क्यूँकि मसीह यीशु तो सुर्गदूतां ताहीं न्ही बल्के अब्राहम की पीढ़ी नै सम्भालै सै। १७ इस कारण उस ताहीं चाहिये था, के वो हर बात्तां म्ह विश्वासी भाईयाँ की तरियां बणै, ताके वो परमेसवर का महायाजक बण सकै, जो दयालु अर बिश्वास जोग्या सै, अर वो माणसां के पापां की माफी खात्तर खुद नै बलिदान कर सकै। १८ क्यूँकि यीशु का इमित्हान हो लिया अर उसनै खुद दुख ठाया सै, इस करकै वो इमित्हान म्ह पड़े होए माणसां की मदद कर सकै सै।

3 ज्यांतै हे बिश्वासी भाईयो, थम जो परमेसवर के कुहाओ सों, सुर्ग

म्ह साइझी होण खात्तर बुलाये गये सों, यीशु पै ध्यान द्यों, जो म्हरे खात्तर परमेसवर की ओड़ तै भेजा गया प्रेरित अर महायाजक सै, जिसपै हम बिश्वास करा सां। 2 यीशु परमेसवर कै प्रति वफादार था, जिस ताहिं उसनै नियुक्त करया था, जिसा मूसा नबी नै भी वफादारी तै पूरा काम करया जो भी परमेसवर नै उस ताहिं करण खात्तर कह्या था। 3 जिसा के घर बणाण आळे माणस नै घर तै बढ़कै सम्मान मिलै सै। इस्से तरियां यीशु मूसा नबी तै घणा सम्मान जोगा सै। क्यूँकै होके घर का कोए ना कोए बणाण आळा होवै सै, पर जिसनै सारा किमे बणाया वो परमेसवर सै। 5 मूसा नबी तो परमेसवर के घर के माणसां खात्तर सेवक की तरिया बिश्वास जोगा रह्या। के जो मूसा नबी नै करया था, वो दिखावै सै के परमेसवर आण आळा बखत म्ह के करण आळा सै। 6 पर परमेसवर के कुण्बे म्ह मसीह, तो एक बेटे के रूप म्ह बिश्वास लायक सै, अर उस आस म्ह बिश्वास नै बणाए राक्खै सै, तो हमे उसका कुण्बा सां। 7 जिसा परमेसवर अपणे पवित्र आत्मा के जरिये कहवै सै, “जै आज थम परमेसवर की आवाज सुणो, 8 “तो अपणे मन ताहिं कठोर ना करो, जिसा के छो दुवाण के बखत अर इम्तिहान के दिन जंगल म्ह थारे पूर्वजां नै करया था। 9 थारे पूर्वजां नै चाळीस साल तक मेरे महान् काम देक्खण कै बाद भी चुनौती देन्दे होए मेरे ताहिं परख्या था। 10 इस कारण मै उस बखत के माणसां तै गुस्सा रह्या, अर कह्या, ‘उननै मेरे पाच्छै चालणा न्ही चाह्या, अर इसा करण तै इन्कार कर दिया जो मनै उन ताहिं करण का आदेश दिया था।’ 11 फेर मनै छो म्ह आकै कसम खाकै कह्या, के ‘उस आराम की जगहां म्ह थम बड़ण न्ही पाओगे, जित मै उननै आराम देऊँगा।’” 12 हे बिश्वासी भाईयो, चौककस रहो के थारे म्ह इसा बुरा अर अविश्वासी मन ना हो, जिसतै थम जिन्दे परमेसवर तै दूर हो जाओ। 13 जिब भी थम पवित्र ग्रन्थ नै यो कहते सुणो, “आज का दिन” तो एक-दुसरे नै उत्साहित करते रहो, इसा ना हो पाप थारे ताहिं धोक्खा देवै, अर थम परमेसवर कै खिलाफ जिद्दी हो जाओ। 14 क्यूँकै जै हम अन्त तक मजबुत्ती कै साथ अपणे शरुआती बिश्वास नै थाम्मे राक्खां सां, तो हम मसीह के साइझीदार बण जावां सां। 15 जिसा पवित्र ग्रन्थ कहवै सै, “जै आज थम परमेसवर का शब्द सुणो, तो अपणे मनां नै कठोर ना करो, जिसा के छो दुवाण के बखत थारे पूर्वजां नै करया था।” 16 कौण थे वे माणस जिन्नै परमेसवर की आवाज सुणकै भी उस ताहिं छो दुवाया? ये वे माणस थे जिन ताहिं मूसा नबी मिस देश तै बाहर लेकै गया था। 17 चाळीस साल तक परमेसवर ताहिं इन माणसां नै गुस्सा दुवाया, ये इस्साएल के माणस थे, जिन्नै मरुस्थल म्ह पाप करया अर वे मरगे, अर उनकी लाश जंगल म्ह पड़ी रहीं? 18 अर जिब परमेसवर नै कसम खाई के ‘वे उस आराम की जगहां म्ह कदे न्ही बड़ पावेंगे, जित मै उननै आराम देऊँगा।’ वो वास्तव म्ह उन माणसां के बारें म्ह बात कै था जिन्नै उसका बिरोध करया था। 19 इस बात तै हमनै यो बेरा लाग्या सै, के वे अपणे अविश्वास कै कारण बड़ न्ही सके।

4 इस करकै परमेसवर नै म्हरे ताहिं वादा करया सै, के हम आराम की

जगहां पै जावैगे, क्यूँकै आराम की जगहां म्ह बड़ण का वादा इब भी सै, तो हमनै भोत सावधान रहणा चाहिए, इसा ना हो के थारे म्ह तै कोए माणस आराम की जगहां जाण म्ह नाकामयाब हो जा, जिस ताहिं देण का वादा परमेसवर नै म्हरे ताहिं करया सै। 2 जिस तरियां हमनै यीशु मसीह के बारें म्ह सुसमाचार सुण्या, अर उन इस्साएल के माणसां नै भी जिन नै आराम की जगहां म्ह बड़ण के बारें म्ह सुसमाचार सुण्या पर उन्नै उस सुसमाचार पै बिश्वास न्ही करया, इस कारण उनके खात्तर संदेश बेकार ठैरहया। 3 पर म्हरे ताहिं जो परमेसवर नै कह्या सै, हम उसपै भरोस्सा करां सां, अर हम आराम की जगहां म्ह बड़ांगे। जिसा औरां खात्तर परमेसवर नै कह्या सै, “मनै अपणे छो म्ह कसम खाई के वे मेरी आराम की जगहां म्ह बड़ण न्ही पावैंगे।” फेर भी उसके काम दुनिया के बणाण तै पैहल्याए पूरे हो लिए थे। 4 क्यूँकै सातमै दिन कै बारै म्ह परमेसवर नै पवित्र ग्रन्थ म्ह न्यू कह्या सै, “परमेसवर नै सातमै दिन अपणे सरे कामां ताहिं निपटा कै बिश्राम करया।” 5 हमनै यो भी पढ़या के उसनै बाद म्ह कह्या, के “वे मेरे आराम की जगहां म्ह बड़ण न्ही पावैंगे।” 6 इस्साएल के वे माणस जिन ताहिं सुसमाचार सुण्या गया था, वो आराम की जगहां म्ह बड़ण म्ह नाकामयाब रहे, क्यूँकै उननै परमेसवर के हुक्म ताहिं कोनी मान्या था, पर उस आराम की जगहां म्ह जाण का इब भी मौक्का सै। 7 ज्यांतै उसनै आराम की जगहां म्ह बड़ण का एक और मौक्का तय करया, अर वो मौक्का आज सै। म्हरे पूर्वजां के बिद्रोह के कई साल्लां बाद, दाऊद के मुँह तै यो कह्या था, “जै आज थम उसकी आवाज सुणो, तो उस ताहिं सुणकै इन्कार ना करो।” 8 हम यो भी जाणा सां के परमेसवर नै जो आराम की जगहां का वादा करया सै, वो कनान देश कोनी, जिसपै यहोशू नै म्हरे पूर्वजां की अगुवाई करी थी, जै यो कनान देश होन्दा, तो परमेसवर नै बाद म्ह यो न्ही कह्या होगा, के एक और मौक्का सै। 9 यो भी हो सके सै, के परमेसवर के माणसां नै इस तरियां के तरिकें तै आराम करण पड़े, जिस तरियां तै परमेसवर नै दुनिया बणाण के सातवे दिन आराम करया था। 10 क्यूँकै जो उसकै आराम की जगहां म्ह बड़या सै, उसनै भी परमेसवर की ढाल अपणे काम पूरे करकै बिश्राम करया सै। 11 इस करकै हम उस आराम की जगहां म्ह बड़ण की कोशिश बड़ी मेहनत कै साथ करा, ताके कोए भी उन माणसां की तरियां ना बणे जिन्नै परमेसवर के हुक्म ताहिं मानान तै इन्कार कर दिया, फेर हम उसकी आराम की जगहां म्ह बड़ण पावोंगे। 12 क्यूँकै परमेसवर का वचन जिन्दा, अर प्रभावशाली सै, अर वो एक दोधारी तलवार तै भी घणा पैना सै। वो प्राण अर आत्मा ताहिं, अर गाँठ-गाँठ अर गुदे-गुदे ताहिं न्यारा करकै आरम-पार पाड़ दे सै अर मन की भावनायां अर विचारां ताहिं परख ले सै। 13 जिस ताहिं लेखा देणा सै, उसकी नजर तै कोए भी प्राणी लुप्ता कोनी। सारी चीज उसके स्याही साफ अर खुली होड़ सै। 14 ज्यांतै जिब म्हारा इसा बड़ा महायाजक सै, जो सुर्ग म्ह चल्या गया सै, यानिके परमेसवर का बेट्टा

यीशु, तो आओ, हम विश्वास म्ह पक्के बणे रहवां जो हमनै सारे माणसां के आगै स्वीकार करया सै। 15 क्यूँके म्हारा यो महायाजक जो यीशु मसीह सै, म्हारी हरेक कमजोरियाँ नै जाणे सै, बल्के वो सारी बातां म्ह म्हरै तरियां परख्या तो गया, फेर भी निष्पाप लिकड्या। 16 इस करकै आओ, हम परमेस्वर के स्याही बिना डर के जावां जो करुणा तै भरा होया सै, फेर परमेस्वर म्हरै पै दया करैगा, अर जिब हमनै मदद की जरूरत होगी तो वो म्हारी मदद करैगा।

5 परमेस्वर इसाएल के माणसां म्ह तै एक महायाजक ताहीं चुणे सै,

अर वो महायाजक ताहीं नियुक्त करै सै, ताके वो उसकी सेवा भेट चढ़ाकै, अर माणसां के पापां की माफी कै खात्तर बलि चढ़ाकै कर सकै। 2 वो बेअक्ले अर भूले भटक्यां कै गेल्या नर्मी तै बरताव कर सकै सै, ज्यांत वो आप भी कमजोरी तै घिरया सै। 3 उसकै खात्तर एक महायाजक के रूप म्ह अपणे अर माणसां कै पापां नै दूर करण खात्तर बलि चढ़ाणा जरूरी सै। 4 कोए भी इन्सान अपणे-आपनै तै महायाजक होण का पद न्ही ले सकता। एक माणस सिर्फ महायाजक जिब्बे बण सकै सै, जिब परमेस्वर उस ताहीं याजक होण कै खात्तर बुलावै सै, जिस तरियां हारुन ताहीं परमेस्वर नै पैहला महायाजक होण खात्तर बुलाया था। 5 उससे तरियां ए मसीह नै भी खुद ताहीं महायाजक बणाकै खुद का सम्मान करण का फैसला कोनी करया, परमेस्वर नै उस ताहीं यो सम्मान दिया जिब उसनै कह्या, के “तू मेरा बेट्टा सै, आज मनै ए तेरे ताहीं पैदा करया सै।” 6 एक और जगहां परमेस्वर उस ताहीं दुबारा कहवै सै, “तू मलिकिसिदक की रीत पै सारी हाण खात्तर याजक सै।” (aiōn g165) 7 जिब यीशु इस दुनिया म्ह रहवै था, तो ठाड़ू शब्दां तै रुक्का मार-मारकै अर आँसू बहा-बहाकै परमेस्वर तै प्रार्थनाएँ अर बिनती करी, जो उस ताहीं मौत तै बचा सकै था, अर आदरपूर्ण समर्पण कै करण परमेस्वर नै उसकी सुण ली। 8 परमेस्वर का बेट्टा होण पै भी मसीह यीशु नै दुख ठा-ठाकै भी उसका हुक्म मानना सिख्या। 9 फेर सिद्ध हो जाणकै बाद वो खुद उन सब खात्तर, जो उसके हुक्मां नै मानारीयां कै खात्तर अनन्त काल के उद्धार का कारण बणाया। (aiōnios g166) 10 अर उस ताहीं परमेस्वर की ओड़ै तै मलिकिसिदक की रीत पै महायाजक का पद मिल्या। 11 इसकै बारे म्ह हमनै घणीए बात कहणी सै, पर उनके बारे म्ह खुलैके जिक्र करणा मुश्किल सै, क्यूँके थम परमेस्वर के वचन के बारे म्ह जाणण खात्तर आलसी होंगे सों। 12 बखत कै विचार तै तो थमनै शिक्षा देण आळा बण जाणा चाहिए था, पर थमनै तो इब भी इसे माणस की जरूरत सै, जो थारे ताहीं नये सिरे तै परमेस्वर की शिक्षा की शरुआती बात ए सिखावै, थम तो इब्बे भी उन छोट्टे बाल्क की ढाल सों, जिन ताहीं दूध चाहिए, पर भारी खाणा न्ही। 13 याद राक्खों जो माणस इब भी वचन की शरुआती शिक्षा नै सीखण लागे सै, वे न्ही जाणदे, के परमेस्वर धर्मी बणण के बारे म्ह के कहवै सै, वो दूध पीन्दे बाल्क की तरियां सै। 14 पर जिस माणस की तुलना श्याणे

माणस तै करी जा सै, जो ठीक तै खाण चबा-चबा कै खा सकै सै, वो यो माणस सै जिसका विश्वास पक्का सै अर जो खरी शिक्षा नै समझ सकै सै, उसनै आँछे अर बुरे की पिछाण करणा सीखा लिया सै।

6 इस करकै जिब म्हरै ताहीं मसीह के बारे म्ह शरु म्ह सिखाया गया

था, तो आओ हम उन ताहीं छोड़ के खरी शिक्षा पै चर्चा करण खात्तर आगै बढ़दे जावां। शरुआती शिक्षा जिसा पाप तै भरे काम तै जो मौत नै लेकै आवै सै, परमेस्वर पै विश्वास करण नै नीम की तरियां ना धरो,

2 अर बपतिस्मा अर हाथ धरण, अर मरे होया के जिन्दा उठण, अर

आखरी न्याय की शिक्षा रूपी नीम दुबारा ना बणावां। (aiōnios g166) 3

जै परमेस्वर नै चाह्या तो मै थमनै खरी शिक्षा दिँग्गा। 4 क्यूँके जो माणस अपणे विश्वास नै खो दे सै, तो उन ताहीं फेर तै पश्चाताप करण कै खात्तर उलटा न्ही ल्याया जा सकता। एक बार उननै परमेस्वर की सच्चाई नै जाणा अर सुर्ग तै वरदान्नां ताहीं पाया, अर बाकियाँ की तरियां पवित्र आत्मा भी पाया। 5 अर उननै अनुभव करया था के

परमेस्वर का वचन आँछा सै, अर वे परमेस्वर की आण आँली शक्ति

का अनुभव कर चुके थे। (aiōn g165) 6 उननै फेर तै उलटा ल्याण का

कोए तरिक्का कोन्या, क्यूँके वे परमेस्वर के बेटे ताहीं अपणे खात्तर दुबारा कूस पै चढ़ावैं सै, अर सबके स्याही उसपै कलंक लगावै सै। 7

जिन माणसां नै आँछी शिक्षा मिलै सै, वे उस जमीन की तरियां सै, जित्त बारिस होन्दी ए रखवै सै, जै जमीन बढ़िया सै, तो या किसान

खात्तर बढ़िया फसल देवै सै, अर उसपै परमेस्वर की आशीष होवै सै। 8 पर दुसरे माणस उस जमीन की तरियां सै जो काण्डे अर खरपतवार उगावै सै तो या बेकार सै। उस ताहीं परमेस्वर के जरिये श्राप दिये जाण का खतरा सै, अर वो आग तै नाश हो जावैगा। 9 हे प्यारे भाईयों, भलाए हम इस ढाल की बात करण लागे सां, पर हम असलियत म्ह विश्वास न्ही करते के यो थारे खात्तर लागू होवै सै। हमनै विश्वास सै के थम बढ़िया चिज्जां खात्तर बणाये गये सों, जो उद्धार कै साथ आवै सै। 10 जिसा के थमनै आँछे काम कोे सै, अर इब थम परमेस्वर के नाम म्ह विश्वासी भाईयों कै खात्तर प्यार तै, सेवा के काम करण लागे सों, इसकी बजह तै परमेस्वर थारे ताहीं भुलैगा न्ही, क्यूँके वो धर्मी सै। 11 आलसी ना बणो। पर कड़ी मेहनत करण आळा की तरियां थमनै इन प्रेमपूर्वक कामां ताहीं जारी राखणा चाहिए, ताके परमेस्वर के बादे पाण खात्तर थारी आस पक्की हो। 13 जिब परमेस्वर नै अब्राहम तै करार करया, तो तब खुद परमेस्वर तै बड़ड़ा कोए अर न्ही था, जिसकी कसम ली जा सकै, इस करकै अपणी खुद की कसम लेन्दे होए परमेस्वर नै अब्राहम तै कह्या, 14 “मै सचमुच तेरे ताहीं घणा आशीष दियूँगा, अर तेरे वंशां नै अनगिनत बणा दिँग्गा।” 15 अब्राहम नै भोत धीरज धरण कै बाद वादा का ईनाम मिल्या। 16 माणस तो अपणे तै किसे बड़े का नाम लेकै कसम खाया करै सै, अर उन म्ह कसम के जरिये बात का फैसला होवै सै, अर सारा विवाद खतम हो जावै सै। 17 योए कारण था, के परमेस्वर नै भी कसम खाई थी। इस बात तै वो उन

माणसां नै साफ तरियां तै दिखाणा चाहवै था, के वो जो भी वादा करै सै, उस ताहीं वो पूरा करै सै। 18 तो उरै दो बात सै उसका वादा अर उसकी किसम जो कदे बदल न्ही सकदे अर जिनकै बारै म्ह परमेसवर कदे झूठ कोनी बोल सकता। इस करकै हम जो परमेसवर कै थोरै बैचण आये सां अर जो आस उसनै म्हरै ताहीं दी सै उस ताहीं थाम्ये होए घणे उत्साहित सां। 19 जिस तरियां किस्ती ताहीं लंगर तै बाँधया जावै सै, जो किस्ती नै पैकड़कै राकखै सै, इस्से तरियां तै आस म्हरारी जिन्दगी नै मजबूत अर टिकाए राकखै सै, अर म्हरी आस यीशु सै, वो परमेसवर कै थोरै सुर्ग म्ह पवित्र मन्दर म्ह परदे कै पांचै पोहचा सै। 20 जित्त यीशु नै मलिकिसिदक की रीत पै सारे हाण के बखत का महायाजक बणकै, म्हरै खात्तर अगुवा के रूप म्ह दाखल होया सै। (aiōn g165)

7 यो मलिकिसिदक शालेम नगर का राजा अर परमप्रधान परमेसवर का याजक था, उनके नाम का मतलब “राजा” सै जो नियम कै साथ न्याय करै सै, शालेम के राजा का मतलब सै “शान्ति का राजा।” 2 पवित्र ग्रथ म्ह उसके माँ-बाप, उसके पूर्वज, या उसकी मौत या जन्म के बारें म्ह, कुछ भी न्ही लिख्या गया सै। वो हमेशा खात्तर एक याजक सै। इस करकै वो परमेसवर के बेटे की तरियां सै। 3 जिब अब्राहम नै चार राजां की हत्या कर दी थी, तो मलिकिसिदक नै उसतै मुलाकात करी, अर उस ताहीं आशीर्वाद दिया। अब्राहम नै युद्ध म्ह जीत हासिल करी, अर सारी चिज्जां का दसमां हिस्सा भी दिया। 4 इब इसपै ध्यान करो के वो किसा महान् था जिस ताहीं पूर्वज अब्राहम नै दुश्मनों की लूट के बढ़िया तै बढ़िया माल का दसमां हिस्सा दिया। 5 मूसा नबी के नियम-कायदे बतावै सै के लेवी के वंशज जो याजक का पद पावै सै, उननै इस्साएल के माणसां तै दसमां हिस्सा लेणा चाहिए, यानिके उसके खुद के माणस तै, पर वे याजक अर दुसरे बिश्वासी भाईयाँ की तरियां सै, क्यूँके वे सब अब्राहम के वंश के सै। 6 पर इसनै, जो लेवी-दंशी भी न्ही था, अब्राहम तै दसमां हिस्सा लिया, फेर भी अब्राहम वो था जिसकै थोरै परमेसवर का वादा था, फेर भी मलिकिसिदक नै उस ताहीं आशीर्वाद दिया। 7 इस म्ह कोए शक कोनी के जो आशीर्वाद देवै सै, वो उस माणस तै बड़ा हो सै जिस ताहीं आशीर्वाद देवै सै। 8 उतै तो याजक दसमां हिस्सा लेवै सै, भलाए वो सिर्फ एक माणस सै, जो जीवै सै अर फेर मर जावै सै, पर मलिकिसिदक, जिसनै अब्राहम तै दसमां हिस्सा लिया, वो इब भी जिन्दा सै, जिस के पवित्र ग्रथ कहवै सै। 9 के जिब अब्राहम नै मलिकिसिदक ताहीं दसमां हिस्सा दिया, जिब ताहीं लेवी माणसां का जन्म अब्राहम के वंश म्ह न्ही होया था। पर इब भी उसके वंश होण के कारण, यो इस तरियां सै के लेवी नै खुद ही अब्राहम के जरिये मलिकिसिदक ताहीं दसमां हिस्सा दिया। 10 क्यूँके जिस बखत मलिकिसिदक उसकै पिता तै मिल्या, उस बखत वो अपणे पिता की देह म्ह था। 11 माणसां ताहीं जिन याजकां के आधार पै नियम-कायदे दिए गये थे, जो हारुन के परिवार का अर लेवी के गोत्र का था, पर ये याजक सिद्ध न्ही बण सकै। इस करकै यो जरूरी था, के एक और याजक

आवै, जो हारुन जिसा न्ही, पर मलिकिसिदक जिसा हो। 12 क्यूँके इब एकके तरियां का याजक कोनी, तो नियम-कायदे का भी बदलना जरूरी सै। 13 क्यूँके हम मसीह के बारें म्ह ये बात करण लागरे सां, जो एक अलग गोत्र तै थे। उस जनजाति म्ह तै किसे नै भी वेदी पै एक याजक के रूप म्ह सेवा न्ही करी, 14 सब जाणै सै, के म्हारा प्रभु यीशु यहूदा के गोत्र म्ह तै पैदा होया सै, मूसा नबी नै यहूदा के किसी भी वंशज के बारें म्ह न्ही बताया, जो यहूदा के याजक बणगे अर यहूदा का कोए वंशज कदे याजक न्ही बण। 15 इब हम और भी आच्छी तरियां तै समझा सां, जिब मलिकिसिदक कै तरियां एक और याजक पैदा होण आळा था, जो के यीशु मसीह सै। 16 यीशु का याजक बणणा, नियम-कायदा नै पुणगण पै, या लेवी के वंश म्ह तै पैदा होण पै आधारित कोनी। पर वो अपणे अविनाशी जीवन की शक्ति के कारण याजक बणण्या। 17 क्यूँके उसकै बारै म्ह पवित्र ग्रन्थ कहवै सै, “तू मलिकिसिदक की रीत पै युगानुयुग याजक सै।” (aiōn g165) 18 इस करकै, पैहल्डी आज्ञा कमजोर अर बेअसर होण कै कारण बदलगी। 19 (ज्यांतै के नियम-कायदे नै किसे बात ताहीं सिद्ध कोन्या करया), अर उसकी जगहां पै एक बेहतर उम्मीद सै, जो के यीशु मसीह सै, जिसकै जरिये हम परमेसवर कै लोवै जा सकां सां। 20 जिब यीशु मसीह ताहीं परमेसवर नै याजक बणा दिया तो परमेसवर नै कसम खाई। 21 क्यूँके लेवी के वंश तो बिना कसम याजक बणाए गये, पर यीशु मसीह बिना कसम के परमेसवर की ओड़ तै नियुक्त करया गया, जिसनै उसकै बारै म्ह कह्या, “प्रभु नै कसम खाई, अर उसतै फेर ना पछतावैगा के तू युगानुयुग याजक सै।” (aiōn g165) 22 इस करकै यीशु नै म्हरै ताहीं परमेसवर कै गैल सब तै आच्छे करार का वादा करै सै। 23 यीशु के याजक होण का एक और फायदा से, पैहले तो घणी बड़ी गिणती म्ह याजक बणदे आये, क्यूँके हरेक याजक की मौत के साथ उसकी सेवा खत्म हो जावै थी। 24 यीशु युगानुयुग जिन्दा रहवै सै, इस कारण उसके याजक का पद कोए न्ही ले सकता। (aiōn g165) 25 इस्से खात्तर जो यीशु कै जरिये परमेसवर कै थोरै आवै सै, वो उनका पूरा-पूरा उद्धार कर सकै सै, क्यूँके वो उनकै खात्तर बिन्ती करण ताहीं सारी हाण जिन्दा सै। 26 इसाए महायाजक म्हारी जस्तां नै पूरा कर सकै सै, जो पवित्र, अर बेकसूर, शुद्ध, अर पापमुक्त हो, अर सुर्ग तै भी जिस ताहीं ऊँच्या करया होया हो। 27 जो महायाजक हारुन के वंश तै सै, उसनै जस्तां कोनी के हरेक दिन पैहल्या अपणे पापां कै खात्तर बलिदान चढावै, क्यूँके यीशु नै अपणे-आप ताहीं बलिदान चढावै उसनै एक ए बर म्ह पूरा कर दिया। 28 क्यूँके नियम-कायदे तौ कमजोर माणसां ताहीं महायाजक नियुक्त करै सै, पर कसम जो नियम-कायदा के बाद आवै सै, उस बेटे नै नियुक्त करै सै जो युगानुयुग कै खात्तर सिद्ध महायाजक सै। (aiōn g165)

8 इब जो बात हम कहण लागरे सां उन म्ह तै सारया तै बड़ी बात या सै म्हरै थोरै इस तरियां का महायाजक सै, जो सुर्ग पै महामहीम के सिंहासन कै सोळी ओड़ सै, 2 म्हारा महायाजक सब तै घणी पवित्र

जगहां अर उस सच्चे तम्बू (सुर्ग म्ह) काम करै सै, जो के माणसां के जरिये न्ही, परमेसवर के जरिये बणाया गया सै। ३ क्यूँके हरेक महायाजक पापां की माफी कै खात्तर बलिदान अर भेट चढ़ावै सै, इस कारण जरूरी सै के म्हारे महायाजक मसीह यीशु कै धोरै भी चढ़ाण खात्तर किमे हो। ४ जै वो धरती पै होंदा तो कदे भी याजक न्ही होंदा, ज्यांतै के मूसा के नियम-कायदे कै मुताबिक भेट चढ़ाण खात्तर याजक सै। ५ वे सुर्ग म्ह की चिज्जां के नकल अर छाया की सेवा करै सै, जिसा जिब मूसा नबी तम्बू बणाण पै था, तो उस ताहीं या चेतावनी मिली, “लखा, जो नमूना तेरे ताहीं पहाड़ पै दिखाया गया था, उसकै मुताबिक सारा किमे बणाणा।” ६ पर जो काम यीशु ताहीं दिया गया सै, वो दुसरे याजकां तै दिए गये काम तै ज्यादा बाध सै, क्यूँके वो जिस करार का बिचौलिया सै, वो पुराणे करार तै बढ़िया सै, अर बढ़िया चिज्जां की कसमां पै आधारित सै। ७ क्यूँके जै वो पैहलड़ा करार बेकसूर होन्दा, तो दुसरे करार कै खात्तर मौकाका ना टोहया जान्दा। ८ पर प्रभु उनपै दोष लाकै कहवै सै, “प्रभु कहवै सै, लखाओ, वे दिन आवै सै के मै इसाएल के माणसां कै गेल्या, अर यहूदा के माणसां कै गेल्या नया करार करूँगा। ९ यो उस करार की तरियां न्ही होवैगा, जिसा मनै उनकै पूर्वजां कै गेल्या उस बखत कराया था, जिब मनै उनका हाथ मिस देश तै लिकाड़ ल्याण खात्तर पकड़ा था, क्यूँके प्रभु कहवै सै, के वे मेरे करार कै बिशासी न्ही रहे, ज्यांतै मनै उनतै मुँह फेर लिया। १० फेर प्रभु कहवै सै, के जो करार मै आण आळे दिनां म्ह इसाएल कै माणसां कै गेल्या करूँगा, वो यो सै के मै अपणे नियमां नै उनके मनां म्ह गेझूँगा, मै उन ताहीं अपणे नियमां कै बारें म्ह उनतै याद दुआँगा, अर मै उनका परमेसवर ठहँगा अर वे मेरे माणस ठहँरैंगे। ११ अर हरेक अपणे यहूदी भाई ताहीं अर अपणे सगो-सम्बन्धी ताहीं या शिक्षा न्ही देवैगा, के तू प्रभु ताहीं पिछ्छाण, क्यूँके छोटे माणसां तै लैके बडे माणसां ताहीं सारे मनै जाण लेवैंगे। १२ मै उनकी दुष्टा की ओड़ दया करूँगा, अर उनकै पापां नै दुबारा याद कोनी करूँगा।” १३ परमेसवर नै इस ताहीं नया करार कह्या, इस करकै उसनै पैहलड़े करार ताहीं पुराणा ठहरा दिया, जो चीज पुराणी अर घिसी होई सै उसका मिट जाणा जरूरी सै।

९ इब, उस पैहलड़े करार म्ह भी सेवा के नियम थे, अर इसी पवित्र जगहां थी, जो इस दुनिया की थी। १ यानी के एक तम्बू बणाया गया जिस म्ह दो कमरे थे, पैहले कमरे म्ह दीवट, मेज अर मेज कै उपर भेट की चढ़ाई होई रोटियाँ थीं, अर वा पवित्र जगहां कुहावै सै। ३ ओड़े एक परदा था उस परदे कै पाच्छे दुसरा कमरा था, जो परमपवित्र जगहां कुहावै सै। ४ उस दुसरे कमरे म्ह सोने की धूपदानी, अर चौगरदेकै सोने तै मन्द्या होया करार का सन्दूक था, अर उस म्ह मन्ना तै भरया होया सोने का मर्तबान भी था, अर हासन की छड़ी जिस म्ह फूल फळ आ गये थे, अर करार की पथर की पटियाँ भी थीं। ५ इसकै अलावा सन्दूक कै उपर दोन्हु ओड़ तेजोमय करू थे, जो प्रायश्चित के ढक्कण जिस ताहीं प्रायश्चित के दिन पापबलि के लहू तै छिड़क दिया जावै था।

इनका एक-एक करकै जिक्र करण का इब्बै बखत न्ही सै। ६ ये चीज इस तरियां तै धरी गई थी। उस पैहलड़े कमरे म्ह परमेसवर की आराधना करण कै खात्तर याजक हरेक दिन पैहले कमरे म्ह जाया करै था। ७ पर दुसरे कमरे म्ह यानी घणी पवित्र जगहां म्ह, सिंफ महायाजक साल भर म्ह एक ए बर जावै सै, अर बलिदान के जानवर का लहू लिये जाया करै था, जिस ताहीं वो अपणे खात्तर अर माणसां की भूल-चूक म्ह करया पापां खात्तर भेट चढ़ावै सै। ८ इसतै पवित्र आत्मा योए दिखावै सै, के पुराणे करार कै मुताबिक दुसरा कमरा यानी घणी पवित्र जगहां जो सुर्ग म्ह सै, जित्त परमेसवर रहवै था, ओड़ तक पुहचण का रास्ता बन्द था। ९ यो तम्बू आज कै दिन का एक उदाहरण सै, जिस म्ह याजक भेट अर बलिदान चढ़ावै सै, जिब माणस बलिदान की भेट लेकै आवै थे, तो उनकी अन्तरात्मा समझ न्ही पावै थी, के इब उसके पाप माफ होए सै या न्ही। १० क्यूँके ये उपहार अर बलिदान सिंफ खाण-पीण की चिज्जां, अर कई ढाळ की शुद्ध करण की शारीरिक विधियाँ, तब तक थी, जिब तक परमेसवर कोए नई विधि न्ही देता। ११ पर जिब मसीह म्हारा महायाजक बणकै आया, तो अपणे साथ बढ़िया-बढ़िया चीज लेकै आया जो इब भी मौजूदूर सै, जिब वो दिख्या तो वो परमेसवर की मौजूदगी म्ह चला गया, यो तम्बू हाथ का बणाया होया कोनी यानिके इस सृष्टि का कोनी। १२ जिब मसीह तम्बू म्ह चला गया तो वो सब खात्तर सब तै पवित्र जगहां म्ह दाखल होया, उसनै बलिदान के रूप म्ह बकरयां अर बाछड़याँ का लहू न्ही लिया, बल्के उसनै अपणा लहू लिया, ताके हम अनन्त छुटकारा पा सकै। (aiōnios g166) १३ क्यूँके जै मूसा नबी के नियम-कायदा के मुताबिक जिब बकरयां अर बळधां का लहू अर बाछड़े की राख का अपवित्र माणसां पै छिड़के जाण की विधि के मुताबिक, अशुद्धता दूर हो जावै सै। १४ तो मसीह का बेकसूर लहू जो म्हारी अन्तरात्मा नै, म्हारे पाप, जो म्हारी मौत की बजह बणै सै, उनतै शुद्ध करै सै, ताके हम जिन्दे परमेसवर की आराधना कर सका। पवित्र आत्मा की शक्ति के जरिये मसीह नै म्हारे ताहीं अपणे पापां खात्तर एक सम्पूर्ण बलिदान के रूप म्ह परमेसवर ताहीं अपणे-आप ताहीं दे दिया। (aiōnios g166) १५ इस कारण मसीह परमेसवर अर माणसां के बीच म्ह नये करार का बिचोल्ला सै, ताके जो माणस परमेसवर के जरिये बुलाये गये सै, वो सनातन आशीषें पा सकै, जिसका परमेसवर नै वादा करया सै, क्यूँके पैहलड़े करार के अधीन रहन्दे होए जितने माणसां नै पाप कराया, उन ताहीं छुडाण खात्तर यीशु नै अपणी जान दे दी। (aiōnios g166) १६ करार एक वसियत के समान हो सै। एक वसियत के नियम नै लागू करण खात्तर यो साबित करणा जस्ती होवै सै, के जिसनै वा वसियत बणाई हो, वो मर चुक्या हो। १७ क्यूँके एक वसियत जिब्बे लागू हो सकै सै, जिब उसके बणाण आळा की मौत होगी हो। वो जिब तक लागू न्ही होन्दी जिब ताहीं उसका बणाण आळा जिन्दा हो। १८ इस कारण पैहलड़ा करार का नियम जानवरां के लहू ताहीं बहाए जाण पै लागू होवै था। १९ क्यूँके जिब मूसा नबी सारे माणसां नै नियम-

कायदे का हरेक हुक्म सुणा चुक्या तो उसनै बकरयां अर बाछड़याँ का लहू लेकै, पाणी म्ह मिला लिया अर लाल ऊन अर जूफा (झाड़ी) की छड़ी कै गेल्या, उस नियम-कायदे की किताब अर सारे माणसां पै छिड़क दिया 20 अर कह्या, “के यो लहू परमेसवर के साथ करे गये करार नै पक्का करै सै, जिसका हुक्म परमेसवर नै थारे खात्तर दिया सै।” 21 अर इस्से तरियां तै उसनै तम्बू अर सेवा के सारे समान पै लहू छिड़क्या, जित सारे माणस आराधना करण लागरे थे। 22 सच तो यो सै के नियम-कायदे कै मुताबिक आमतौर पै सारी चीज लहू कै जरिये शुद्ध करी जावै सै, मसीह नै जो लहू बहाया उसके बगैर पापां की माफी कोन्या। 23 यो जरूरी सै कै तम्बू अर उसकी सारी चीज, जो सुर्ग की चिज्जां का हुबू है, इन जानवरां का लहू सै, जो शुद्ध करया जा, पर सुर्ग की चीज नै शुद्ध करण कै खात्तर बढ़िया बलिदानां की जरूरत थी। 24 क्यूंके मसीह जिस पवित्र जगहां म्ह दाखल होया, वो माणसां के हाथ की बणाई होई न्ही थी, वो असली तम्बू की सिर्फ एक नकल सै, बल्के वो सीधा सुर्ग गया अर इब म्हारी मदद करण खात्तर परमेसवर कै साथ सै। 25 वो सुर्ग म्ह इस करके दाखल होया के माणसां के पापां के कारण बारबार अपणे-आपनै बलिदान करै, जिस तरियां महायाजक हरेक साल दुसरे का लहू लिए पवित्र जगहां म्ह दाखल होया करै था, 26 जै इसा करणा जरूरी था तो दुनिया की शरुआत तै लेकै इब तक उसनै बार-बार दुख ठाणा पड़दा, पर इब युग कै आखरी म्ह वो एक ए बर जाहिर होया सै, ताके अपणे कूस पै बलिदान कै जरिये पाप ताहीं दूर कर देवै। (aiōn g165) 27 अर जिस तरियां माणसां कै खात्तर एक बर मरणा अर उसके पाढ्ये न्याय का होणा तय सै, 28 उस्से तरियां ए मसीह भी माणसां के पापां की माफी खात्तर एक बर धरती पै आया अर सूली पै अपणी जान दे दी, अर जो माणस उसकी बोहङ्ग की बाट देक्खै सै, उनकै उद्धार कै खात्तर दुसरी बर बिना पाप उठाए होए दिखैगा।

10 मूसा नबी के नियम-कायदे, आण आळी असली चिज्जां की छाया सै, पर ये वो आळी असली चीज कोनी, ज्यांतै नियम-कायदा की विधि के मुताबिक बलिदानां कै जरिये जो हरेक साल हर बार चढ़ाए जावै सै, बलिदान चढ़ाण आळा, कदे भी माणसां नै पूरी तरिया तै शुद्ध न्ही कर सकदा। 2 जै बलिदानां कै जरिये माणस पूरी तरियां शुद्ध हो जावै, तो उनका चढ़ाणा बन्द क्यांतै न्ही हो जान्दा? बलिदान करण आळा, आराधना करण आळा अर सेवा करण आळे एक ए बर शुद्ध हो जान्दे, तो उनका बलिदान चढ़ाण पै भी उनका मन उन ताहीं क्यूंकूहवै सै, के वे पापी सै। 3 उनके जरिये चढ़ाया गया बलिदान उन ताहीं हर साल यो याद दुआवै सै, के उननै पाप करया सै। 4 क्यूंके या अनहोणी बात सै, के बल्धां अर बकरयां का लहू माणसां के पापां नै माफ करै। 5 इस्से कारण जिब मसीह इस दुनिया म्ह आया तो उसनै परमेसवर तै कह्या, “बलिदान अर भेंट तनै कोनी चाही, पर मेरै खात्तर एक देह त्यार करी सै। 6 बलिदान के रूप म्ह चढ़ाये गये जानवरां की

भेट अर पाप के खात्तर चढ़ाये गये बलिदान तै तू खुश कोनी होया। 7 फेर मसीह नै कह्या, ‘लखा, परमेसवर मै तेरी इच्छा पूरी करण खात्तर आ ग्या सूं, जिसा पवित्र ग्रन्थ मेरै बारै म्ह कहवै सै।’ 8 पैहले तो मसीह कहवै सै, “बलिदान के रूप म्ह चढ़ाये गये जानवरां की भेट अर पाप कै खात्तर चढ़ाया गया बलिदान कोनी मांग्या, अर ना ए उन भेटां तै तू खुश होया।” हालाकि ये बलिदान तो नियम-कायदे कै मुताबिक चढ़ाए जावै सै। 9 फेर मसीह यो भी कहवै सै, “लखा, मै तेरी इच्छा पूरी करण आ ग्या सूं” इस करके पापां की माफी के पैहले तरिकें ताहीं, जो नियम-कायदा के मुताबिक थे, उननै हटा के नये तरिकें तै जो मेरे लहू के जरिये माफ होवै सै, उन ताहीं लागू करूँ। 10 परमेसवर याए चाहवै था, के हम मसीह यीशु की देह के एके बार बलिदान चढ़ाए जाणकै जरिये पवित्र करे जावां। 11 पैहले करार के मुताबिक हरेक याजक वेदी के स्याम्ही खडे होकै रोज सेवा करै सै, अर एक ए ढाळ के बलिदान नै, जो पापां नै कदे भी दूर न्ही कर सकदे, बार-बार चढ़ावै सै। 12 पर मसीह जो म्हारा बडा याजक सै, उसनै माणसां के पापां कै खात्तर एक ए बलिदान के रूप म्ह, परमेसवर के स्याम्ही ओड महिमामय जगहां म्ह पै जा बेठ्या, 13 अर उस्से बखत तै मसीह इस बात की बाट देखण लागरया सै, के कद परमेसवर उसके बैरियाँ नै पूरी तरिया तै हरावैगा। 14 क्यूंके कूस पै बलिदान के जरिये, परमेसवर नै जिन माणसां ताहीं पवित्र करया, उन ताहीं सदा खात्तर सिध्ध कर दिया सै। 15 अर पवित्र आत्मा भी हमनै यीशु के बलिदान के बारें म्ह याए गवाही देवै सै, के यो सच सै, अर म्हारे ताहीं यो बतावै सै के परमेसवर नै इस बलिदान के बारें म्ह के कह्या सै। 16 “प्रभु कहवै सै, के जो नया करार, मै आण आळे दिनां म्ह, उनतै करूँगा, वो यो सै, के मै अपणे नियम उन ताहीं याद दुआँऊँ, अर नियमां नै मानण म्ह उनकी मदद करूँगा।” 17 फेर यो भी कहवै सै, “मै उनकै पापां नै अर उनकै अर्धम के काम्मां नै दुबारा याद कोनी करूँगा।” 18 अर जिब पापां की माफी होगी तो पापां खात्तर बलिदान चढ़ाण की कोए जरूरत कोनी। 19 ज्यांतै है बिश्वासी भाईयो, यीशु कै सलीब पै लहू बहाण कै जरिये हम पिता कै थोरै बिना डरे घणी पवित्र जगहां म्ह जा सका सां। 20 इस करकै है बिश्वासी भाईयो, परमेसवर के परिवार म्ह म्हारे खात्तर एक सबतै उत्तम याजक निर्धारित सै, यीशु कै सलीब पै लहू बहाण कै जरिये म्हारे खात्तर एक नया अर जिन्दी देण आळा राह खोल दिया सै। जिस ताहीं उसनै उस पड़वे, यानिके अपणी देह के बलिदान के जरिये म्हारे ताहीं घणी पवित्र जगहां म्ह जाण का साहस होया सै। 22 तो आओ, हम सचे मन अर पूरे बिश्वास कै गेल्या, अर अपणी अन्तरात्मा ताहीं पापां तै मुक्त करण खात्तर अर सच्ये मन तै, देह ताहीं शुद्ध पापी तै थोकै, परमेसवर कै लोवै जांवा। 23 अर इब हम बिना किसे शक के अपणी उस आस म्ह मजबूत रहवां, जिस ताहीं हमनै मान्या सै, क्यूंके जिसनै वादा करया सै, वो बिश्वास जोग्या सै। 24 अर हम यो भी खास ध्यान रक्खां के हम आपस म्ह प्यार, अर भले काम्मा-

म्ह उक्साण के खात्तर हम एक-दुसरे की फिक्र करते रहवां। 25 अर हम आराधना सभायां म्ह लगातार कठु होण म्ह सुस्त ना हो जावां, जिसा के भोत-से तो सुस्त हो भी लिये सै, पर एक-दुसरे नै उत्साहित करते रहें, जिसा के थम जाणो सौं, के यीशु का आण का बखत लोवै सै। 26 क्यूँके मसीह नै जाणण कै बाद जै हम जाण-बुझकै पाप करदे रहवां, तो पापां की माफी खात्तर फेर कोए बलिदान बाकी न्ही बचा। 27 तो हाँ, परमेसवर के न्याय का दिन आवैगा, अर वो अपणे बिरोधियां नै नाश कर देवैगा, अर ये सारी बात होण आळी सै। 28 जो माणस मूसा नबी के नियम-कायदा के मुताबिक दो या तीन माणसां की गवाही पै, बिना दया कै मार दिया जावै सै, 29 तो सोच ल्यो के वो माणस और भी भारया दण्ड कै जोगगा ठहरैगा, जिसनै परमेसवर के बेटे की कदर न्ही जाणी अर मसीह के लहू ताहीं अपवित्र जाण्या, जो उस ताहीं शुद्ध करै सै, अर उस पवित्र आत्मा का अपमान करै सै, जो हमनै अनुग्रह देवै सै। 30 क्यूँके हम उसनै जाणा सा, जिसनै कहा नै, “बदला लेणा मेरा काम सै, मै ए बदला दियुँगा।” अर फेर यो भी कह्या के “प्रभु अपणे माणसां का न्याय करैगा।” 31 जिन्दे परमेसवर कै हाथ्थां म्ह पडणा भयानक (डरावणी) बात सै। 32 पर उन पाच्छले दिना नै याद करो, जिब थमनै पैहली बार मसीह पै बिश्वास करया अर परमेसवर कै खात्तर दुख ठाण म्ह पाच्छे न्ही हटे। 33 कदे-कदे तो माणसां नै सब कै स्याही थारी बुराई करी अर थारे ताहीं मारा पिट्या भी, अर थमनै उन माणसां कै गैल भी दुख सहया जो इसे दुख ठावै सै। 34 क्यूँके जो लोग कैद म्ह थे, उनकै दुख म्ह भी थम दुखी होए, अर अविश्वासी नै थारी सम्पत्ति ताहीं भी लूट ली, तो थम लुटण खात्तर भी तैयार होणे, न्यू जाणकै के थारे गेल्या एक और भी सारया तै बढिया अर सारी हाण ठहरण आळी सम्पत्ति सै। 35 ज्यांतै अपणे दुख म्ह भी बिश्वास म्ह बणे रहों क्यूँके उसका इनाम बड़ा सै। 36 क्यूँके थारा धीरज धरणा जरूरी सै, ताके थम परमेसवर की इच्छा नै पूरी करकै वो पा सको जो परमेसवर नै थारे तै वादा करया सै। 37 “क्यूँके पवित्र ग्रन्थ म्ह लिख्या सै, घणाए थोडा बखत रहया सै, जिब के आण आळा आवैगा अर वार न्ही करैगा। 38 पर मेरे धर्मी माणस बिश्वास तै जिन्दा रहवैंगे, जै वो बिश्वास तै पाच्छे हट जावै तो मेरा मन उसतै राज्जी कोनी होवैगा।” 39 पर हम बिश्वास तै हटण आळे कोनी के नाश हो जावै पर परमेसवर पै बिश्वास करण आळे सां ताके हम अनन्त मौत तै बचाएँ जावां।

11 जो माणस परमेसवर म्ह बिश्वास करै सै, वो ये बात आळी तरिया जाणी सै, के परमेसवर वे चीज उन ताहीं जरूर देवैगा, जिसकी आस वे राक्खै सै। उननै पूरा बिश्वास सै, के जो चीज उननै इब्बे न्ही देक्खी, वो असलियत म्ह सै। 2 म्हारे पूर्वजां नै परमेसवर म्ह इस तरिया बिश्वास करया था, इस करकै परमेसवर उनतै खुश थे। 3 बिश्वास तै ए हम जाणा सां, के सृष्टि परमेसवर के वचन तै बणी सै। हम या भी जाणा सां, के जो चीज हम देख सका सां, वे अनदेक्खी चिज्जां म्ह तै बणी सै। (aiōn g165) 4 बिश्वास तै ए आदम के बेटे हाबिल नै, अपणे बडे भाई

कैन तै घणा बढिया बलिदान परमेसवर कै खात्तर चढाया, अर उस बलिदान के जरिये परमेसवर नै गवाही दी, के हाबिल एक धर्मी जन सै, क्यूँके परमेसवर उसकी भेट तै खुश था, इब हाबिल मर लिया सै, अर हमनै उसके जरिये परमेसवर पै बिश्वास करणा सिखा सै। 5 हनोके बिश्वास के जरिये परमेसवर नै उस ताहीं जिन्दा ए सुर्ग पै उठा लिया, इस बजह तै इब ताहीं किसे नै उसकी लाश न्ही मिली, सुर्ग म्ह जाण तै पैहले उसनै परमेसवर ताहीं खुश करया था, जिसा के परमेसवर का पवित्र ग्रन्थ बतावै सै। 6 माणस परमेसवर नै खुश कर सके सै, जै वे उसपै बिश्वास करै तो। क्यूँके परमेसवर कै धोरे आणआळे माणस नै बिश्वास करणा चाहिये के वो परमेसवर सै, अर वो पूरी सच्चाई तै अपणे टोह आळे नै ईनाम देवै सै। 7 बिश्वास ए तै नूह नै परमेसवर के जरिये बाढ की चेतावनी पाकै, जिस ताहीं उसनै देख्या भी कोनी था। परमेसवर का डर मानते होए, अपणे कुण्बे नै बचाण कै खात्तर उसनै जहाज बण्या, नूह के बिश्वास के कारण उसनै उस बखत के माणसां ताहीं जिननै बिश्वास न्ही करया था, उन ताहीं दोषी ठैहराया, अर वो डूबके मरगे। नूह नै परमेसवर पै बिश्वास करया था, इस करकै परमेसवर नै उस ताहीं धर्मी ठैहराया था। 8 जिब परमेसवर नै अब्राहम ताहीं किते जाण खात्तर बुलाया था, तो उसनै बिश्वास तै ए परमेसवर के हुक्म ताहीं मानकै, एक इसी जगहां लिकड गया, जो जगहां परमेसवर अब्राहम ताहीं उसकी जायदाद के तौर पै देण आळा था, पर वो या कोनी जाणी था के वो कित्त जावै सै, अर वो फेर भी चला गया। 9 बिश्वास ए तै जिस देश ताहीं परमेसवर नै देण का वादा करया था, ओड़ अब्राहम नै एक परदेशी की तरियां रहकै अपणे बेटे इसहाक अर अपणे पोते याकूब सुधा तम्बुआ म्ह बसेरा करया, जो उसकै गेल्या उस्से वादे के वारिस थे। 10 क्यूँके वो उस नगर की जो सुर्ग म्ह सै, अर जिसकी नीम पक्की सै, उसकी बाट देक्खै था, जिसका रचन आळा अर बणाण आळा परमेसवर सै। 11 यो सिर्फ बिश्वास ए सै, जिसके जरिये अब्राहम बाप बण सका, हालाकि अब्राहम भोत बूढा था, अर उसकी पत्नी सारा भी बालक न्ही पैदा कर सकै थी, परमेसवर वो जरूर करै सै, जो उन ताहीं वादा करया था। 12 जिब अब्राहम इतणा बूढा होग्या था, के मरण आळा ए था, तो अकास म्ह सुर्ग के तारां अर समुन्द्र के किनारे की बालू की तरियां उसके अनगिनत वंश पैदा होए। 13 ये सारे माणस जिननै परमेसवर पै बिश्वास करया था, वे उन चिज्जां नै पाए बिना मरगे, जिसका परमेसवर नै उन खात्तर वादा करया था। वादा करी होई चीज न्ही पाई, पर उननै अपणे मन म्ह देखकै राज्जी होए अर मान लिया के हम धरती पै परदेशी अर बाहर के सां। 14 ये उन माणसां के बारें म्ह सै, जो कहवै सै के वे इस दुनिया म्ह अजनबी सै, वे दिखावै सै के अपणे देश की टोह म्ह सै। 15 अर जिस देश तै वे लिकड आये थे, जै उसके बारें म्ह सोचते तो वे उल्टा जा सकै था। 16 पर वे एक घणा बढिया यानिके सुर्गीय देश के चाहण आळे सै, इस्से खात्तर परमेसवर उनका परमेसवर कुहाण म्ह खुशी महसूस करै सै, क्यूँके उसनै उनकै खात्तर

एक नगर त्यार करया सै। 17 विश्वास ए तै अब्राहम नै, परखे जाणकै बखत म्ह, अपणे बेटे इसहाक ताहीं बलिदान चढाया, उससे नै परमेसवर के वादा ताहीं पाया, क्यूँकि वो अपणे इकलौते बेटे की बलि देण खात्तर भी तैयार होया था। 18 अर जिसतै न्यू कह्या गया था, “इसहाक तै तेरा वंश कुहावैगा,” वोए अपणे एकलौते बेटे ताहीं बलिदान चढाण लाग्या। 19 क्यूँकि उसनै मान लिया, के परमेसवर सामर्थी सै के इसहाक ताहीं मरे होया म्ह तै जिन्दा कर सकै सै। यो इसाए था के उननै इसहाक ताहीं मौत के मुँह तै उल्टा पा लिया हो, उदाहरण की रीत पै वो उस ताहीं फेर मिल्या। 20 विश्वास ए तै इसहाक नै अपणे दो बेटे याकूब अर एसाव ताहीं आण आळी बात्तां कै बारै म्ह आशीर्वाद दिया। 21 विश्वास ए तै याकूब नै मरदे बखत यूसुफ के दोन्हु बेट्याँ म्ह तै एक-एक ताहीं आशीर्वाद दिया, अर अपणी लाट्ठी का सहारा लेकै प्रभु की आराधना करी। 22 विश्वास ए तै यूसुफ नै, जिब वो मरण पै था, तो आत्मविश्वास तै कह्या, के इसाएल के माणस मिस्य देश छोड़ देंगे, हुकम देकै जिब वो मिस्य देश छोड़ के जान्दे, तो उसकी हाड्हियाँ ले जान्दे। 23 तब मिस्य के राजा नै यो हुकम दिया था के सरे इसाएली छोरे पैदा होया पै मारे जावैंगे, तो विश्वास के कारण ए तै मूसा नबी कै माँ-बाप नै उस ताहीं, पैदा होए पाढ्ये तीन महिने ताहीं ल्हकोए राख्या, क्यूँकि उननै देख्या के बाल्क भोत सुथरा सै, अर वे राजा कै हुकम मानण तै डरे कोनी थे। 24 मिस्य देश के फिरैन की बेटी नै मूसा ताहीं अपणालिया था, जिब मूसा बड़ा होया, विश्वास तै वो न्हीं चाहवै था, के माणस उस ताहीं राजकुमारी के बेटे कै रूप म्ह बुलावै। 25 ज्यांतै के उस ताहीं पाप म्ह माडे-से दिन के सुख भोगण तै परमेसवर के माणसां कै गेल्या दुख भोगाण घणा बढ़िया लाग्या। 26 उसनै मसीह कै कारण बदनाम होण ताहीं मिस्य देश कै भण्डार तै बड़ा धन समझाया, क्यूँकि वो जो करण लागरया था, उस ताहीं वो जाणे था, के सुर्ग म्ह उसका ईनाम मिलैगा। 27 विश्वास ए तै राजा कै छो तै ना डरकै उसनै मिस्य देश ताहीं छोड़ दिया, क्यूँकि वो समझ गया था, के उसनै इसा लाग्या, के मान्नो उसनै परमेसवर ताहीं देख लिया हो, जो अदृश्य सै। 28 विश्वास ए तै मूसा नबी नै फसह अर लहू छिड़कण का तरीका मान्या, जिसतै के जेट्टा का विनाशक दूत इसाएलियाँ के जेठे बेटा पै हाथ न्हीं गेरै। 29 विश्वास ए तै इसाएल के माणस लाल समुन्दर कै पार इसे उतरगे, जिस तरियां सूक्खी धरती पर तै, अर जिब मिस्य देश नै उस्से तरियां ए करणा चाह्या तो समुन्दर उल्टा अपणी जगहां पै आ ग्या अर बाढ़ आ गयी अर सब ढूब मरे। 30 क्यूँकि इसाएल के माणस परमेसवर पै विश्वास करै थे, इस करकै वे यरीहो नगर की चारदीवारी के च्यारु ओड़ सात दिनां तक लगातार चालते रहे, तो चारदीवारी पड़गी। 31 विश्वास ए तै राहाब बेश्या परमेसवर का हुकम ना मानण आळा कै गेल्या नाश न्हीं होई, उसनै इसाएली जासूसां का स्वागत करया जो यरीहो नगर नै छुप के देखण आये थे। 32 इब और के कहूँ? क्यूँकि बखत कोनी रहया के गिदोन का, अर बाराक का अर शिमशोन का, अर यिफतह जिसा माणसां के बारें म्ह, अर दाऊद अर

शमूएल का, अर नवियाँ का जिक्र करूँ। 33 इसे विश्वास कै जरिये राज्य जीते, धर्म के काम करे, वादा करी होई चीज पाई, शेर उन ताहीं खा न्ही सका। 34 आग की ज्वाला ताहीं शीळा करया, तलवार की धार तै बच लिकडे, एक बार कमजोर होण पै फेर तै ठाड़े बणा दिया, वे लडाई म्ह वीर लिकडे, उननै अपणे दुश्मनां की पलटन ताहीं खदेड़ दिया। 35 लुगाईयाँ नै अपणे मरे होया ताहीं दुबारा जिन्दा पाया, किंतने तो मार खांदे-खांदे मरो अर वे अपणा विश्वास न्हीं छोड़णा चाहवै थे, ताके वे जेल तै रिहा करे जा सकै, ज्यांतै के घणे मरण के बाद फेर तै जिन्दा हो जावै, अर वे एक बढ़िया जिन्दी पा सकै। 36 घणखरयां नै मखौल म्ह उड़ाया गया, अर कई नै कोडे खाणे पड़े, बल्के कई नै बेलां तै जुड़कै, जेल म्ह गेरया गया। 37 कईयाँ पै पथर बरसाए गए, और तै चीरे गये, कईयाँ ताहीं तलवार तै मौत के घाट उतार दिया गया, वे गरीब थे, उन ताहीं यातनाए भी दी गई, अर उनकै गैल बुरा व्यवहार करया गया, वे भेड़ां अर बकरियाँ की खाल ओड़ कै आस्सै-पास्सै भटकदे रहे। 38 अर जंगलां, अर पहाड़ां, अर गुफायां म्ह, अर धरती की दरारां म्ह भटकदे हाँडि। या बुरी दुनिया इन विश्वासियाँ जोग्यी कोनी थी। 39 विश्वास ए कै जरिये इन सारया कै बारै म्ह परमेसवर नै उनके तारीफ करी सै, तोभी वादा करी होई उस चीज नै वो पा न्हीं सकै जो परमेसवर नै उन ताहीं वादा करया था। 40 क्यूँकि परमेसवर कै धोरै सिर्फ उनकै खात्तर न्हीं, बल्के म्हारै खात्तर भी एक धणी बढ़िया तरकीब सै, परमेसवर उन ताहीं सिध्द बणाणा चाहवै सै, पर सिर्फ म्हारै साथ मिलैकै।

12 इस बजह तै जिब घणखरे माणसां के विश्वास की गवाही जो

उनकी जिन्दी म्ह सै, म्हारे बारें म्ह बड़े बादल की तरियां घेरे होए सै, तो आओ, होरें रोकण आळी चीज अर उलझाणा आळे पाप ताहीं दूर करकै, अर राह पै हमनै चालणा सै, धीरज तै चाल्ला। 2 अर विश्वास के कर्ता अर सिध्द करण आळे यीशु की ओड़ लखान्दे रहवां, उस आनन्द कै खात्तर जो विश्वास म्ह मिलण आळा था, शर्म की कुछ परवाह न्हीं करकै कूस का दुख सहया, अर परमेसवर कै सिंहासन कै सोळी ओड़ महिमामय जगहां जा बेठ्या। 3 यीशु के उदाहरण कै बारें म्ह सोच्यो, जिसनै अपणे बिरोध म्ह पापियाँ का इतणा बिरोध सह लिया ताके थम निराश होकै हिम्मत ना छोड़ द्यो। 4 पाप के बिरुद्ध अपणे संघर्ष म्ह थमनै उसतै इसी मुठभेड़ न्हीं करी के थारा लहू बह्या हो, 5 अर थम उस उपदेश ताहीं, जो थारे ताहीं बेटा की तरियां दिया जावै सै, भूल गये सोः “हे मेरे बेटे, प्रभु की ताड़ना नै हल्की बात ना जाण, अर जिब वो तन्नै घुड़कै तो हिम्मत ना छोड़ै। 6 क्यूँकि प्रभु जिसतै ध्यार करै सै, उसकी ताड़ना भी करै सै, अर जिस ताहीं बेटा बणा लेवै सै, उसकै कोडे भी मारै सै, ताके अपणे बाल्कां नै सुधार सकै।” 7 थम दुख नै पिता की ताड़ना समझकै सह ल्यो, परमेसवर थारे ताहीं बेटा जाणकै थारे गेल्या सलूक करै सै वो कोण सा बेटा सै, जिसकी ताड़ना पिता न्हीं करदा? 8 जै वा ताड़ना जिसकै सब भागी होवै सै, अर थारी कोनी होई, तो थम परमेसवर कै ऊलाद कोनी। 9 फेर जिब के म्हारा शारीरिक पिता भी

म्हारी ताड़ना करया करै था अर हमनै उसका आदर-मान करया, तो यो और भी जरूरी सै के अपणी आत्मायाँ के पिता के ओड़ तै अनुशासन स्वीकार करा सां, ताके म्हारे धोरै अनन्त जीवन हो। 10 म्हारे धन्यवादी पिता तो, अपणी समझकै मुताबिक थोड़े-से बखत कै खात्तर म्हारी ताड़ना करै सै, पर वो तो म्हारे फैयदे कै खात्तर करै सै, के हम भी उसके समान पवित्र बण जावां। 11 इस बखत ताड़ना दी जावै सै, उस बखत ताड़ना आच्छी कोनी लागै, बल्के वा दुख की बात दिखाई देवै सै। तोभी जो उस ताहीं सहन्दे-सहन्दे पवक्के होगे सै, बाद म्ह उननै वैन कै गेल्या धर्म का ईनाम मिलै सै। 12 इन सारी बातां के कारण सब मजबूत बणो अर उत्साहित होओ, 13 अर अपणे पायां कै खात्तर सीधी राही बणाओ के लंगड़ा भटक ना जावै पर भला-चंगा हो जावै। 14 सारया तै मेळ-मिलाप राक्खो, अर पवित्र होण खात्तर हरेक ढाल की कोशिश म्ह रहों, जिसकै बिना कोए प्रभु ताहीं कदे भी न्हीं देक्खैगा। 15 सावधान रहो, इसा ना हो के कोए परमेसवर कै अनुग्रह तै दूर रह जावै या कोए कड़वी जड़ फूटकै दर्द देवै, अर उसकै जरिये घणखरे माणस परमेसवर के सच्चे रास्ते तै भटक जावै सै। 16 इसा ना हो के कोए माणस जार, या अब्राहम के पोते एसाव की तरियां उस म्ह कोए बुराई ना होवै, क्यूँके वो जेट्टा बेटा था, उसनै खास उत्तराधिकारी होण का हक था, पर उसनै अपणे जन्म सिध होण के पद का सम्मान न्हीं करया, इस करके उसनै अपणे छोटे भाई याकूब ताहीं एक बर के खाणे कै बदले म्ह अपणा जन्म सिध होण का पद बेच दिया। 17 थमनै बेरा सै कै बाद म्ह जिब उसनै आशीष पाणी चाही तो उस ताहीं मना कर दिया गया, अर आँसू बहा-बहाकै आशीष के मांगण पै भी वो पैहले जो कुछ भी करया था, उस ताहीं बदलण खात्तर कुछ भी न्हीं कर सका। 18 थम आग की लपटे, अन्धेरे, काळी घटा जिसा असली पहाड़ पै न्हीं आये सों, जिसा के इसाएल के माणस सीनै पहाड़ पै आये थे, जिब परमेसवर नै उन ताहीं अपणे नियम दिए थे। 19 थम तुरही की आवाज कै धोरै कोनी सों, अर बोल्लण आळे के इसे शब्द कै धोरै न्हीं आए, जिसकै सुनणाओ तै बिनती करी के इब म्हारै तै और बात ना करी जावै। 20 उननै इस उसकै कहां, क्यूँके वे इस हुकम नै बर्दाशत न्हीं कर सकै, के परमेसवर नै उननै कहां था, “जै कोए पशु भी पहाड़ ताहीं छुड़ै तो उसपै पत्थर बरसाये जावै।” 21 अर वो दर्शन इसा डरावणा था के मूसा नबी नै भी कहां, “मैं घणा डँग अर कापू सूं।” 22 पर थम सिय्योन कै पहाड़ पै आये सों, जित सुर्यो यरुशलेम सै, जो जिन्दे परमेसवर का नगर सै, उसकै धोरै अर लाखों सुर्गदूत खुशी उत्सव मनावै सै। 23 थम उन परमेसवर के खास बालकां की सभा अर कलीसिया म्ह आये सों, जिनकै नाम सुर्ग म्ह लिक्खे होए सै, परमेसवर कै धोरै जो सब का न्यायी सै, सुर्ग म्ह धर्मी माणसां की आत्मायाँ खात्तर जो इब सिध करे गये सै। 24 थम यीशू कै धोरै आए सों, जो परमेसवर अर माणसां के बीच म्ह करार बणाया, अर छिड़काव का लहू जो माफी के बारें म्ह बोल्लै सै, ना के न्याय के बारें म्ह, जो हाबिल कै लहू तै घणी बढ़िया

बात कहवै सै। 25 सावधान रहो, परमेसवर के हुकम मान्नो, जो थारे तै बात करण लागरया सै, क्यूँके इसाएल के माणस जिब धरती पै मूसा नबी की चेतावनी पाकै बच पाए, क्यूँके उननै मूसा नबी की बात कोनी मान्नी थी, तो हम सुर्ग पै तै चेतावनी देण आळे परमेसवर तै मुँह मोड़कै उसके छो तै किस तरियां बच सकांगे? 26 जिब परमेसवर सीनै पहाड़ पै तै बोल्या, तो उसकै शब्द नै धरती ताहीं भी हला दिया, पर इब उसनै यो वादा करा सै, “एक बर फेर मै ना सिर्फ धरती ताहीं बल्के अकास ताहीं भी हला देङ्गा।” 27 अर यो बोल “एक बर फेर” इस बात ताहीं दिखावै सै के बणाई होई चीज हलाई, अर हटा दी जावैगी, ताके जो चीज हलाई न्हीं जान्दी, वे पवक्की तरियां बणी रहवैं। 28 हमनै जो राज्य मिला सै वो न्हीं हिलाया जा सकता, इस कारण हमनै उसका धन्यवादी होणा चाहिए, जिसकै जरिये हम भगति, अर भय सुधा परमेसवर की इसी आराधना कर सकां सां जिसतै वो राज्जी होवै सै, 29 क्यूँके म्हारा परमेसवर राख करण आळी आग सै।

13 एक-दुसरे तै भाण-भाई की तरियां प्यार करो। 2 अजनबी की भी सेवा पाणी करो, क्यूँके इसके जरिये कई माणसां नै अनजाए म्ह सुर्गदूतां का आदर-मान करया सै। 3 कैदियाँ का इस ढाल बेरा लेजो के मान्नो उनकै गैल थम भी कैद सो, अर जिन ताहीं पीडित करया जावै सै, जिसा के थम अपणी देह म्ह दर्द महसूस करो सों। 4 ब्याह सारया म्ह आदर की बात समझी जावै, अर ब्याह होण के बाद एक-दुसरे के प्रति वफादार रहों, क्यूँके परमेसवर जार, अर बिगान्नी लुगाई कै धोरै जाणीयां का न्याय करैगा। 5 अपणी जिन्दी नै धन के लालच तै मुक्त राक्खों, अर जो थारे धोरै सै उसे पै सन्तोष करो, क्यूँके उसनै आप्पे ए कहां सै, “मै तनै कदे भी न्हीं छोड़ूँगा, अर ना कदे भी त्यागूँगा।” 6 ज्यांतै हम बिना डेर कहां सां, “प्रभु मेरा मददगार सै, मै न्हीं डरूँगा, माणस मेरा के करै सकै सै।” 7 जो थारे अगुवें थे, अर जिन नै थारे ताहीं परमेसवर का वचन सुणाया सै, उननै याद राक्खो, अर गौर करो के किस तरियां जीणा अर मरणा सै, परमेसवर म्ह एके तरियां का विश्वास दिखाओ जो उननै दिखाया। 8 यीशु मसीह काल अर आज अर युगानुयुग एक सा सै, वो कदे न्हीं बदलता। (aiōn g165) 9 क्यूँके यीशु मसीह कदे न्हीं बदलता, इस करकै थम नई अर अलग शिक्षा ना अपणाओ। क्यूँके थारे मनां खात्तर आच्छा सै, के वे अनुग्रह के जरिये, उन माणसां नै कोए फायदा न्हीं होन्दा जो इसे काम करै सै। 10 म्हारै धोरै एक वेदी सै जिस म्ह तै तम्बू के याजक नै खाण का कोए हक कोनी, जो तम्बू की सेवा करै सै। 11 क्यूँके पैहले करार के मुताबिक हर साल जिन जानवरां का लहू महायाजक पापबति के खात्तर घणी पवित्र जगहां म्ह पापां की माफी खात्तर ले जावै सै, उनकी देह छावणी कै बाहरणै जलाई जावै सै। 12 इस्से कै कारण, यीशु नै भी माणसां ताहीं अपणे ए लहू कै जरिये पवित्र करण कै खात्तर यरुशलेम नगर के बाहरणै दुख सहया अर मारा गया। 13 आओ हम यहूदी नियम-कायदा नै छोड़कै यीशु म्ह विश्वास

करां, अर उसके साथ दुख ठावां। 14 क्यूंकि इस दुनिया म्ह म्हारा कोए स्थाई घर कोनी, बल्के हम एक आण आळे नगर की टोह म्ह सां। 15 इस करकै हम प्रभु यीशु कै जरिये हम अपणे होड्हां तै परमेसवर की स्तुति करणा जारी राक्खां, वो म्हारा बलिदान सै, यानिके उन होंठा का फळ जो उसकै नाम का अंगीकार करै सै, परमेसवर ताहीं सारी हाण चढ़ाया करै। 16 भलाई करणा अर उदारता दिखाणा ना भूलो, क्यूंकि परमेसवर इसे बलिदानां तै राज्जी होवै सै। 17 अपणे अगुवां का हुकम मान्नो अर उनकै अधीन रहो, क्यूंकि वे थमनै देक्खण लागेर सै, ताके थम भटक ना जाओ, अर उन ताहीं अपणी सेवा के बारें म्ह परमेसवर ताहीं लेखा देणा सै, वे यो काम राज्जी होकै करै, यो काम उदास्ती कै साथ कोनी करणा, क्यूंकि इस हालत म्ह थमनै किमे फायदा कोनी। 18 म्हारै खात्तर प्रार्थना करदे रहो, क्यूंकि हमनै भरोस्सा सै के म्हारी अन्तरात्मा शुद्ध सै: हम हर बखत भले काम करणा चाहवां सां। 19 प्रार्थना करण कै खात्तर मै थमनै और भी समझाऊँ सूं के मै तावळा थारे धोरै दुबारा आ सकूँ। 20 अर इब शान्तिदाता परमेसवर, जिसनै म्हारै प्रभु यीशु ताहीं मुर्दा म्ह तै जिन्दा करया, वो थारे ताहीं सब कुछ दे, जो उसकी इच्छा पूरी करण खात्तर चाहिये सै, परमेसवर यीशु मसीह की शक्ति के जरिये वो सब थारे म्ह पूरा करै, जो उस ताहीं खुशी दे सकै सै, यीशु मसीह भेड्हां का महान् रुखाळा सै, उसनै अपणे लहू कै जरिये सदा के करार नै स्थापित करया सै, (aiōnios g166) 21 उस ताहीं सदा महिमा मिलती रहवै। आमीन। (aiōn g165) 22 हे बिश्वासी भाईयो, मै थारे तै बिनती करूँ सूं के उत्साहित करण आळे इन सन्देसां ताहीं धीरज तै सह ल्यो, क्यूंकि मनै थारे ताहीं थेडे-से शब्दां म्ह लिखा सै। 23 थमनै यो बेरा लाग्या हो के तीमुथियुस, म्हारा भाई जेळ की कैद तै कुटग्या सै, अर जै वो तावळा आ ग्या तो मै उसकै गेल्या थारे तै भेट करूँगा। 24 अपणे सारे अगुवां अर सारे पवित्र माणसां ताहीं नमस्कार कहो। इटली देश के बिश्वासी थमनै नमस्कार कहवै सै। 25 थम सारया पै परमेसवर का अनुग्रह होंदा रहवैं। आमीन।

याकूब

1 मैं याकूब, परमेस्वर अर प्रभु यीशु मसीह का दास सूं मेरी ओड़

तै थम सारया नै मेरा नमस्कार। मैं या चिट्ठी इसाएल के उन यहूदी मसीह बिश्वासियों नै लिखूँ सूं, जिनके बाराह गोरे सारी दुनिया म्ह तितर-बितर होके रहण लागे सै। 2 हे मेरे बिश्वासी भाईयो, जिब थम कई ढाल की मुसीबतां का समान करो सो, तो इसनै पूरे आनन्द की बात समझो, 3 क्यूँके थम जाणो सों, के थारे बिश्वास कै परखे जाण तै धीरज बढ़े सै। 4 हरेक बात म्ह धीरज धरणा सीखों, ताके थम आत्मिकता म्ह पूरे सिद्ध हो जाओ, अर थारे म्ह किसे बात की कमी ना रहवै। 5 पर थारे म्ह तै जै किसे नै तुद्धि की कमी सै, तो परमेस्वर तै माँगै, जो बिना उल्हाणा दिये, सारया नै बड़ी उदारता तै देवै सै, अर उस ताहीं दी जावैगी। 6 पर वो बिना शंका के बिश्वास तै माँगै, अर कुछ शक ना करै, क्यूँके शक करण आठा माणस टिक्या न्ही रहन्दा जो समुन्दर की उस लैहर की तरियां सै जो हवा के चाल्लण तै उच्छलै सै। 7 शक करण आठा माणस या बात बिल्कुल ना सोच्य, कै उसनै प्रभु तै कुछ मिलैगा, 8 वो माणस दोगला सै अर अपणी किसे बात म्ह टिकता कोनी। 9 जो बिश्वासी भाई गरीब सै, उनै खुश होणा चाहिए, क्यूँके परमेस्वर उनकी इज्जत करै सै, 10 अर धनवान अपणे ऊँच्ये पद पै घमण्ड ना करै, क्यूँके वो धास कै फूल की ढाल सूख जावैगा। 11 सूरज लिकड़दे ए धणा धाम पड़े सै, अर धास नै सुखा देवै सै, अर उसका फूल झङ्ग जावै सै, अर उसकी खुबसूरती जान्दी रहै सै। इस ढाल धनवान भी अपणे काम करदे-करदे माटी म्ह मिल ज्या जावैगा। 12 धन्य सै वो माणस जो परखे जाण पै खरे उतरै सै, क्यूँके परखे जाणकै बाद ए जीवन का वो मुकुट पावैंगे, जिसका वादा परमेस्वर नै उन माणसां तै करया सै, जो परमेस्वर तै प्यार करै सै। 13 जिब किसे की परख हो सै, तो वो या ना कहवै के परमेस्वर मन्नै परखण लागरया सै, क्यूँके परमेस्वर बुरी बातां की परख म्ह कोनी पड़ता, अर ना वो किसे की परख आप करै सै। 14 पर हरेक माणस अपणी ए लालसा म्ह पड़कै अर फँसकै परखा ज्या सै। 15 जिब बुरी इच्छा भोत धणी बढ़ ज्या सै, तो पाप नै जन्म देवै सै, अर पाप जिब भोत धणा बढ़ जावै सै, तो अनन्त मौत नै जन्म देवै सै। 16 हे मेरे प्यारे बिश्वासी भाईयो, धोक्खे म्ह ना रहों। 17 क्यूँके हरेक आच्छा वरदान अर हरेक उत्तम दान परमेस्वर की ओड़तै ए सै, जो सिद्ध सै, जिसनै आसमान की ज्योतिर्यां बाणाई सै, अर वो इनकी छाया की तरियां कदे बदलता कोनी। 18 उसनै अपणी ए इच्छा तै, म्हरै ताहीं सच के वचन कै जरिये जन्म दिया, ताके हम उसकी बाणाई होइ रचना म्ह सब तै खास हो, जिस तरियां किसान खात्तर फसल का पैहला हिस्सा नाज होवै सै। 19 हे मेरे प्यारे बिश्वासी भाईयो, या बात थम जाण ल्यो, हरेक माणस सुणण कै खात्तर तैयार अर बोल्लण म्ह उतावला ना हो, अर अपणे छो नै काब्ब म्ह करण आठा हो। 20 क्यूँके माणस जिब छो म्ह हो सै तो वो धर्मिकता के काम न्ही कर सकता, जो परमेस्वर

उसतै करवाणा चाहवै सै। 21 इस करकै सारे मन की गंदगी अर नफरत नै दूर करकै, परमेस्वर के उस वचन नै नम्रता तै मान ल्यो, जो मन म्ह बोया गया सै, अर जो थारे प्राणा का उद्धार कर सकै सै। 22 पर परमेस्वर के वचन पै चाल्लण आळे बणो, अर सिर्फ सुणण आळे ए न्ही, जो अपणे-आपनै धोक्खा देवै सै। 23 क्यूँके जो कोए परमेस्वर के वचन का सुणण आठा हो, अर उसपै चाल्लण आठा ना हो, तो वो उस माणस कै समान सै, जो अपणा मुँह शीशे म्ह देक्खै सै। 24 इस करकै के वो अपणे-आपनै देखके चाल्या जावै सै, पर जिब्बे भूल जावै सै, के मै किसा था। 25 पर जो माणस ध्यान तै परमेस्वर के सिद्ध नियम-कायदा नै पढ़ता रहवै सै, जो हरेक माणसां नै पापां तै आजादी देवै सै, परमेस्वर उसनै आशीर्वाद देवैगा, क्यूँके वो सुणके भूलता कोनी, पर उसाए करै सै। 26 जै कोए अपणे-आपनै परमेस्वर का भगत समझौ, अर अपणी जीध ऐ लगाम ना लगावै, पर अपणे मन नै धोक्खा दे, तो उसकी भगति बेकार सै। 27 म्हरे पिता परमेस्वर की नजर म्ह सच्ची अर शुद्ध भगति या सै, के अनाथां अर विधवाया के कळेश म्ह उसकी सुधि ले, अर अपणे-आपनै दुनिया तै बेदाग राक्खै।

2 हे मेरे बिश्वासी भाईयो, थम म्हरे महिमामय प्रभु यीशु मसीह के चेल्लें सों, इस करकै थारे म्ह भेद-भाव की भावना ना हो। 2 जै एक माणस सोन्ने के छल्ले अर सुथरे लते पहरे होए थारी मण्डली म्ह आवै, अर एक कंगाल भी मैल्ले कुचेले लते पहरे होए आवै, 3 अर थम उस सुथरे लते आळे नै इज्जत देकै कहो, “तू ओड़ खास जगहां बैठ,” अर उस कंगाल तै कहो, “तू ओड़ खड्हा रहै,” या “मेरै पापां धोए बैठ!” 4 तो के थमनै भेद-भाव कोनी करया, अर बुरे विचार तै न्याय करण आळे न्ही बणो? 5 हे मेरे प्यारे बिश्वासी भाईयो, सुणो। के परमेस्वर नै इस दुनिया के कंगालां ताहीं न्ही छाट्या, के बिश्वास म्ह धनी हो जाओ, अर उस राज्य के अधिकारी हो जाओ, जिसका वादा उसनै उनतै करया सै, जो उसतै प्यार करै सै? 6 पर थमनै उस कंगाल की बेजती करी सै। के धनी माणस ए थारे पै जुल्म न्ही करदे, अर के वे थमनै कोट-कचेहड़ी म्ह न्ही घसीट-घसीट कै ले जान्दे? 7 ये वे धनी माणस ए सै, जो प्रभु यीशु के महिमामय नाम की, जिसके थम कहवाओ सों, बेजती करै सै। 8 तो भी जै थम पवित्र ग्रन्थ के इस वचन कै मुताबिक के “तू अपणे पड़ोसी तै अपणे समान प्यार कर” साच्ये उस राजसी नियम नै पूरा करो सों, तो आच्छा ए करो सों। 9 पर जै थम भेद-भाव करो सों तो पाप करो सों, अर मूसा के नियम-कायदे थमनै कसूरवार बतावै सै। 10 क्यूँके जो कोए मूसा के सारे नियम-कायदे नै पुगावै सै, पर एके बात म्ह चूक जावै, तो वो सारी बातां म्ह कसूरवार बण लिया सै। 11 इस करकै के जिसनै यो कह्या, “तू जारी ना करिये” उससे नै यो भी कह्या, “तू हत्या ना करिये,” इस करकै जै तन्नै जारी तो कोनी करी, पर हत्या करी सै, तो भी तू नियम-कायदा का तोड़ण आठा बणग्या। 12 इस करकै थारी कथनी अर करणी उनके समान हो, जिनका न्याय उस नियम-कायदा कै मुताबिक करया जावैगा, जो म्हरे ताहीं आजादी देवै सै। 13 क्यूँके

जिसनै दया न्हीं करी, उसका न्याय बिना दया के होगा: जै थम दुसरयां पै दया न्हीं करते, तो न्याय के दिन परमेसवर भी थारे पै दया कोनी करैगा। 14 हे मेरे विश्वासी भाईयो, जै कोए कहवै के मै प्रभु यीशु मसीह पै विश्वास करूँ सूँ, पर वो उसकै मुताबिक आच्छे काम न्हीं करदा हो, तो इस्तै के फायदा? कै इसा विश्वास उसका उद्धार कर सकै सै? 15 जै कोए विश्वासी भाईया या भाण जिनकै थोरै पैहरण खात्तर भी लत्ते ना हो, अर उननै रोज खाण नै भी ना मिलता हो, 16 मान ल्यो थारे म्ह तै कोए उनतै कहवै, “ठीक-ठाक जाओ, थम गरम लत्ते पैरो अर छिके रहों,” पर जो चीज देह खात्तर जरुरी सै, वा उनतै ना देवै, तो के फायदा? 17 उस्से तरियां विश्वास भी, जै आच्छे कर्म सुधा ना हो, तो अपणे सुभाव म्ह मरया होया सै। 18 बल्के कोए या कह सकै सै, “तनै विश्वास सै, अर मै कर्म करूँ सूँ।” तू अपणा विश्वास मनै आच्छे कर्म बिना तो दिखाऊ, अर मै अपणा विश्वास तनै अपणे कर्मां कै जरिये दिखाऊँगा। 19 तनै विश्वास सै, के एके परमेसवर सै, तू आच्छा करै सै। ओररी आत्मा भी विश्वास करै सै, अर डर तै थरथर काप्यै सै। 20 पर हे बिना अकल के माणस, के तू यो भी न्हीं जाण्दा के बिना आच्छे कर्म विश्वास बेकार सै? 21 म्हरे पूर्वज अब्राहम नै अपणे बेटे इस्हाक ताहीं (बलि खात्तर) वेदी पै चढ़ाया, तो वो आच्छे कर्मा तै धर्मी ठहरया गया। 22 थमनै देख लिया के उसके काम कै गैल विश्वास नै मिलकै असर करया, अर आच्छे काम के कारण उसका विश्वास सिद्ध होया। 23 अर पवित्र ग्रन्थ का यो वचन पूरा होया: “के अब्राहम नै परमेसवर का विश्वास करया,” अर इस खात्तर धर्मी बण गया, अर वो परमेसवर का साथी कुहाया। 24 इस ढाळ थमनै देख लिया, के माणस सिर्फ विश्वास तै ए न्हीं, पर भले कर्मा तै भी धर्मी मान्ना जावै सै। 25 उस्से तरियां राहाब बेश्या भी, जिब उसनै जासूसां ताहीं अपणे घर म्ह शरण दी अर दुसरे राह तै बिदा करया, तो आच्छे कर्मा तै वा धर्मी बणी। 26 जिस तरियां देह आत्मा बिना मरी होई सै, उस्से तरियां विश्वास भी आच्छे कर्म बिना मरया होया सै।

3 हे मेरे विश्वासी भाईयो, थारे म्ह तै कलीसिया म्ह घणे उपदेशक ना बणै, क्यूँके थम जाणो सौं के हम जो उपदेशक सां, म्हारा न्याय दुसरयां तै भी धणा सख्ताई तै करया जावैगा। 2 हम सब धणीए बार चूँक जावां सा, पर जो कोए मूँह तै गलत बात न्हीं बोलता, वोए तो सिद्ध माणस सै, अर वोए सारी देह पै भी लगाम लगा सकै सै। 3 जिब हम बस म्ह करण खात्तर घोड़या कै मुँह पै लगाम लगावा सां, तो हम उस घोड़े नै भी काल्बू कर सकां सां। 4 चाहे हवा कितनी भी तेज क्यूँ ना हो, एक छोट्टी सी पतवार तै, एक माँझी एक बड़े जहाज नै भी मोड़ सकै सै। 5 उस्से तरियां जीभ भी एक छोट्टा सा अंग सै, अर वा बड़ी-बड़ी बात करण की ढींग मारै सै। देक्खों, छोट्टी सी चिंगारी तै कितने बड़े बण म्ह आग लाग ज्या सै। 6 हाँ, जीभ एक आग के समान सै, या म्हारे देह का एक इसा खतरनाक हिस्सा सै, जो माणस तै अधर्म के काम करवा देवै सै, अर उसकी पूरी जिन्दगी नै बरबाद कर देवै सै, या म्हारे जीवन नै नरक की आग के समान खतम कर सकै सै। (Geenna g1067) 7 हेरेक

ढाळ के जंगली पशु, पंछी, रेंगण आळे जन्तु, अर पाणी के जीव, तो माणस कै बस म्ह हो सकै सै, अर बस म्ह हो भी गये। 8 पर जीभ नै कोए भी बस म्ह न्हीं कर सकता, या एक इसी खतरनाक बला सै, जो कदे रुकती कोन्या, जो साँप के समान, जहर तै भरी होई सै। 9 जीभ तै ए हम पिटा परमेसवर अर प्रभु की बड़ाई करा सां, अर इसरे तै जो परमेसवर कै रूप म्ह बणाये गये माणसां नै श्राप देवां सां। 10 एके मुँह तै आशीष अर आप दोनु लिकड़े सै। हे मेरे विश्वासी भाईयो, इसा न्हीं होणा चाहिए। 11 धरती के एके चोवै तै मिठा अर खार पाणी दोनु न्हीं लिकड़ सकदे। 12 हे मेरे विश्वासी भाईयो, के अंजीर कै पेड़ म्ह जैतून, या अंगर की ढाली म्ह अंजीर लाग सकै सै? उस्से तरियां खाए चोवै तै मिठा पाणी न्हीं लिकड़ सकता। 13 जै थम समझदार अर परमेसवर की बात्ता नै समझाण आळे माणस सौं, तो इस बात नै नरमाई अर समझदारी तै एक आच्छा जीवन जी के, साबित करो। 14 पर जै थारे मन म्ह धणी जलण अर मतलबीपण सै, तो अपणे ज्ञान का ज्यादा दिखावा ना करो, क्यूँके इसा करण तै थम सच नै छुपाओ सौं। 15 इसा ज्ञान परमेसवर की ओड़ तै न्हीं, बल्के वो ज्ञान दुनियावी, शारीरिक अर शैतान की ओड़ तै सै। 16 क्यूँके जड़े जलण अर मतलबीपण होवै सै, औड़े बखेड़ा अर होरेक ढाळ के बुरे काम भी होवै सै। 17 पर जो ज्ञान परमेसवर देवै सै, वो पैहला तो पवित्र होवै सै, फेर शांतिप्रिय, सहनशील, विनग्र, खियास राक्खण आळा, भले काम अर दया तै भरया होया परोपकारी अर बिना भेद-भाव का, अर बिना कपट का होवै सै। 18 मेल-मिलाप करण आळा, किसान की तरियां सै, जो शान्ति का बीज बोवै सै, अर धार्मिकता की फसल काटै सै।

4 थारे म्ह लड़ाई झागड़े का कारण के सै? के थारे भित्तर उन बुरी लालसा तै न्हीं, जो थारे म्ह लड़े-भीड़े सै? 2 थम लालसा राक्खो सौं, पर थमनै मिलता कोनी, ज्यातै थम हत्या करण का भी इरादा राक्खों सौं। थम जलण करो सौं, अर कुछ पान्दे कोनी, इस करकै थम लड़ो अर झागड़ो सौं। थमनै इस करकै न्हीं मिलदा क्यूँके थम परमेसवर तै माँगते कोनी। 3 हालाकि थम माँगो सौं, फेर भी थमनै मिलता कोनी, क्यूँके भुंडी इच्छा तै माँगो सौं, ताके अपणे ऐसो-आराम म्ह उडा द्यो। 4 हे वेईमान माणसों, के थम न्हीं जाणते, दुनिया की चिज्जां तै प्यार करणा, परमेसवर तै बैर करणा सै। इस करकै जो कोए संसार का साथी बणणा चाहवै सै, वो अपणे-आपनै परमेसवर का बैरी बणावै सै। 5 के थम पवित्र ग्रन्थ म्ह लिखी होई इस बात नै बेकार समझों सौं, जिस म्ह लिख्या सै, “जिस पवित्र आत्मा ताहीं परमेसवर नै म्हारै भित्तर बसाया सै, वो बड़ी लालसा करै सै, के हम परमेसवर तै प्यार करां।” 6 पर परमेसवर तो और भी अनुग्रह करै सै, ताके हम परमेसवर तै लड़ सकां, इस कारण पवित्र शास्त्र म्ह यो लिख्या सै, “परमेसवर धमण्ड करण आळा का बिरोध करै सै, पर दीन माणसां पै अनुग्रह करै सै।” 7 इस करकै परमेसवर कै अधीन हो जाओ, अर शैतान का बिरोध करो, तो वो थारे धोरै तै भाग ज्यागा। 8 परमेसवर कै धोरै आओ तो वो भी थारे धोरै

आवैगा। हे पापियों, अपणे जीवन तै पाप दूर करो, अर हे दोगले माणसों अपणे मन नै पवित्र करो। 9 अपणे पापां के कारण दुखी होओ, अर शोक करो, रोओ। थारी हाँसी शोक म्ह अर थारा आनन्द उदासी म्ह बदल जावै। 10 प्रभु कै स्याम्ही नरम बणो तो वो थमनै आदर मान देवैगा। 11 हे बिश्वासी भाईयो, एक-दुसरे की बदनामी ना करया करो। जो अपणे बिश्वासी भाई की बदनामी करै सै या उसपै दोष लगावै सै, वो मूसा के नियम-कायदा का बिरोध करै सै, अर जै तू मूसा के नियम-कायदा का बिरोध करै सै, तो तू नियम-कायदा पै चाल्लण आळा कोनी, पर उसपै न्याय करण आळा बणाया। 12 मूसा के नियम-कायदे देण आळा अर न्याय करण आळा एके सै, जो परमेसवर सै, जो बचाण अर नाश करण म्ह दोनुआ का हक राक्खै सै, पर तन्नै किसे पै इल्जाम लगाण का कोए हक कोनी। 13 थम जो या कहो सौं, “आज या तड़कै हम किसे और नगर म्ह जाकै ओड़ै एक साल बितावांगे, अर व्यापार करकै फायदा कमावांगे।” 14 पर थम यो न्ही जाण्डे के कल के हैवैगा? सुण तो ल्यो, थारा जीवन सै ए के? थम तो धुंध की तरियां सौं, जो थोड़ी देर दिक्खै सै फेर खू ज्या सै। 15 इसकी बजाए थमनै या कहणा चाहिए, “जै प्रभु चाहवै तो हम जिन्दा रहवांगे, अर यो काम भी करांगे।” 16 पर इव थम अपणे-आप पै घमण्ड करो सौं, यो घमण्ड पाप सै। 17 इस करकै जो कोए भलाई करणा जाणै सै, अर कोनी करदा, उसकै खात्तर यो पाप सै।

5 हे साहूकारों, सुण तो ल्यो, थम अपणे आण आळे दुखां पै किल्की मारकै रोओ। 2 थारा धन खराब होग्या अर थारे लत्ता नै कीड़े खाँगै सै। 3 थारे सोने चाँदी की कोए किम्मत कोनी रही, जिस सोना चाँदी ताहीं थमनै कठु करया सै, वाए थारी गवाही देंगे, अर थारी देह नै राख कर देगी। थमनै अन्त के युग म्ह धन कठु करया सै। 4 देक्खों जिन मजदूरां नै थारे खेत काटै, उनकी वा मजदूरी जो थमनै थोक्खा देकै राखली सै। वे मजदूर चिल्लावै सै, अर उनकी दुहाई सेनाओं के प्रभु कै कान्ना तक पुँहूच ग्यी सै। 5 थम धरती पै ऐसो-आराम म्ह लागे रहै, अर बड़ा ए सुख भोग्या, अर इसा करते-करते थम जानवरां की तरियां बणगे सों, जिन ताहीं काटृण तै पैहले मोट्टा ताजा करया जावै सै, उस्से तरियां थम न्ही जाणते के थम भी अपणे-आप ताहीं परमेसवर की सजा खात्तर तैयार करण लागेर सौं। 6 जो धर्मी जन थारा सामना न्ही कर सकै थे, थमनै उन ताहीं कसूरवार बणाकै मार दिया। 7 इस करकै हे बिश्वासी भाईयो, प्रभु कै आण तक धीरज धरो। जिस तरियां जमीदार धरती की कीमती फसल की आस धरकै पैहली अर आखरी बारिस होण तक धीरज धरै सै। 8 थम भी धीरज धरो, अर अपणी आस नै ना खोओ, क्यूँकै प्रभु का आणा लोवै सै। 9 हे बिश्वासी भाईयो, एक-दुसरे पै कुड़कुड़ाओ ना, न्ही तो परमेसवर भी थमनै दण्ड देवैगा, क्यूँकै लखाओं, न्याय करण आळा आण खात्तर घणा लोवै सै। 10 हे बिश्वासी भाईयो, जिन नवियाँ नै प्रभु के नाम तै बात करी, उननै दुख उठाण अर धीरज धरण का एक आदर्श समझां। 11 हम धीरज धरण आळे नै धन्य

कहां सां। थमनै अर्यूब नामक माणस कै धीरज कै बारें म्ह तो सुण्या ए सै, अर किस तरियां प्रभु नै उस ताहीं प्रतिफल दिया, जिसतै थमनै प्रभु ताहीं जाण भी लिया के किस तरियां प्रभु करुणा अर दया करै सै। 12 पर हे मेरे बिश्वासी भाईयो, सारा तै बड़ी बात या सै कै कसम ना खाईयों, ना सुर्ग की, ना धरती की, ना किसे और चीज की, पर थारी बात हाँ की हाँ ना की ना हो, ताके परमेसवर थमनै दण्ड ना देवै। 13 जै थारे म्ह तै कोए दुखी सै, तो वो प्रार्थना करै। जै आनन्दित सै, तो परमेसवर की बडाई के भजन गावै। 14 जै थारे म्ह तै कोए रोगी सै, तो कलीसिया के अगुवां नै बुलावै, अर वे प्रभु कै नाम तै उसपै तेल मल कै उसकै खात्तर प्रार्थना करै, 15 अर बिश्वास की प्रार्थना कै जरिये रोगी बच ज्यागा अर प्रभु उस ताहीं ठीक करैगा, अर उसनै जै पाप भी करे हो, तो उनकी भी माफी हो ज्यागी। 16 इस करकै थम एक-दुसरे कै बिरुद्ध किये गये, अपणे-अपणे पापां नै मान ल्यो, अर एक-दुसरे खात्तर प्रार्थना करो, जिसतै ठीक हो जाओ: धर्मी जन की प्रार्थना कै असर तै सब कुछ हो सकै सै। 17 इलियाह नवी भी तो म्हारै समान दुख-सुख भोगी माणस था, अर उसनै मन लगाकै प्रार्थना करी, के मिह ना बरसै, अर साढ़े तीन साल तक धरती पै मिह कोनी बरसा। 18 फेर उसनै प्रार्थना करी, तो अकास तै बरसा होई, अर धरती पै फसल भी होई। 19 हे मेरे बिश्वासी भाईयो, जै थारे म्ह तै कोए सच की राह तै भटक जावै अर दुसरा कोए उसनै बोहङ्ग के उस राह पै ले आवै सै, 20 तो वो यो सच जाण लेवै के जो कोए भटके होए पापी नै पाप छोड़ण म्ह उसकी मदद करैगा, पाप छोड़ण आळे के अनेक पाप माफ हो जावैगे अर उसकी जिन्दगी अनन्त मृत्यु तै बचावैगा।

1 पतरस

1 या चिट्ठी पतरस की ओड़ तै सै, जो यीशु मसीह का प्रेरित सै, मै या

चिट्ठी परमेसवर के चुपे होए माणसां कै खात्तर लिखण लागरया सूं
जो परदेसी होकै पुन्तुस, गलातिया, कप्पदूकिया, आसिया अर बिथुनिया
परदेसां म्ह तित्तर-बितर होकै रहवै सै। 2 परमेसवर पिता नै थरे ताहीं
अपणे माणस बणाण खात्तर, भोत पैहले चुण लिया था, ताके थमनै
पवित्र आत्मा के काम के जरिये पवित्र बणावै, यो उसनै इस खात्तर
करया ताके थम यीशु मसीह का कहणा मान्नो, अर उसके लहू तै शुद्ध
हो जाओ। हम प्रार्थना करा सां के परमेसवर थमनै अनुग्रह अर शान्ति
भोत-ए घणी दे। 3 म्हारे मसीह यीशु के पिता अर परमेसवर का धन्यवाद
हो, जिसनै म्हारे पै बड़ी दया करकै म्हारे ताहीं नई जिन्दगी दी सै, क्यूँकि
परमेसवर नै यीशु मसीह ताहीं मुर्दा म्ह तै जिन्दा करया, उसनै म्हारे ताहीं
बड़े बिश्वास कै साथ जीण कै लायक बणाया, ताके हम उन चिज्जां की
आस राक्खां जिसका देण का उसनै वादा करया सै। 4 हम उस वसियत
नै जो परमेसवर नै म्हारे खात्तर तैयार करी सै, उस ताहीं लेण की हम
बाट देक्खां सां, उसनै म्हारे खात्तर उस ताहीं सुर्ग म्ह राख्या सै, जित वा
कदे गळ न्ही सकरी, खराब न्ही हो सकदी, अर नाश न्ही हो सकदी। 5
परमेसवर नै अपणी महान शक्ति तै थरे ताहीं सम्भाल कै राख्या सै,
क्यूँकि थम मसीह पै बिश्वास करो सौं, जिस दिन मसीह बोहङ्कै आवैगा,
उस दिन तक मसीह थमनै सम्भाल कै राख्यैगा, फेर थम जाणोगे के
परमेसवर नै थरे ताहीं पाप अर मौत तै बचा के राख्या सै। 6 थमनै इन
सारी बातां तै खुश होणा चाहिए भलाए थम कुछ बखत खात्तर कई ढाळ
की मुसीबतां के कारण दुखी सो। 7 ये मुसीबत इस्से खात्तर आवै सै,
ताके देख्या जा सकै, के परमेसवर पै थारा पक्का बिश्वास सै के न्ही।
थारा मसीह यीशु पै बिश्वास करणा सोन्ना आग म्ह परख्या अर शुद्ध करया जावै सै,
उससे तरियां जै थारा बिश्वास घणी मुसीबतां म्ह भी बण्या रहवै सै, तो जिव
प्रभु यीशु मसीह बोहङ्कै के आवैं तो थरे ताहीं बड़ाइ महिमा अर आदर
मिलैगा। 8 थमनै मसीह ताहीं कदे न्ही देख्या, उसतै थम बिन देक्खे प्यार
करो सो, अर इब तो उसपै बिन देक्खे भी बिश्वास करकै इसे राजी अर
मग्न होवो सो, जिस ताहीं बताण खात्तर म्हारे धोरै शब्द कोनी। 9 थम
इस खात्तर खुश सौं, क्यूँकि परमेसवर नै थरे ताहीं पाप की सजा तै बचा
लिया सै, अर योए मसीह पै बिश्वास करण का ईनाम सै। 10 इस्से उद्धार
कै बारै म्ह उन नवियाँ नै घणी खोज अर जाँच-पड़ताल करी, जिननै उस
अनुग्रह कै बारै म्ह, जो थरे पै होण आला था, भविष्यवाणी करी थी।
11 मसीह का आत्मा जो उन म्ह था अर उन ताहीं बताण लागरया था, के
मसीह किसा दुख ठावैगा अर उसकै पाच्छै उस बारै म्ह उस ताहीं महिमा
मिलैगी, इस कारण उननै यो बेरा पाड़ण खात्तर उसकी खोज करी,
मसीह कौण होवैगा, अर यो कद होवैगा। 12 पर परमेसवर नै इन नवियाँ
ताहीं बताया था, के यो सन्देस उन खात्तर न्ही बल्के थरे खात्तर सै,

यो सन्देस मसीह यीशु के बारें म्ह खुशखबरी सै, जिसके बारें म्ह थम
इब सुणो सौं। परमेसवर नै सुर्ग तै पवित्र आत्मा ताहीं भेज्या ताके वो
माणसां नै सुसमाचार सुणाण म्ह मदद कर सकै, यो इतणा अदभुत सै,
के सुर्पदूत भी इन चिज्जां नै होन्दे होए देखणा चाहवै सै। 13 इस खात्तर
गौर तै सोच्यों के थम के करण आळे सौं, अर अपणे-आप पै काल्बू
राक्खों अर परमेसवर तै उद्धार पाण का भरोस्सा राक्खों जो अनुग्रह तै
मिलै सै, अर वो थमनै जिब देवैगा जिब मसीह यीशु सुर्ग तै बोहङ्कै
आवैगा। 14 परमेसवर के आजाकारी बणो जिस तरियां आळे बाल्क
अपणे पिता का हुक्म मानै सै, अर पुराणी जिन्दगी के मुताबिक मत
जिओ, जिब थम बुरी लालसा नै पूरी करो थे। 15 पर जिसा थारा बुलाण
आठा पवित्र सै, उससे तरियां ए थम भी अपणे सारे चाल-चलण म्ह
पवित्र बणो। 16 क्यूँके पवित्र ग्रन्थ म्ह लिख्या सै, “पवित्र बणो, क्यूँके
मै पवित्र सूं।” 17 अर जिब के थम है पिता कहकै परमेसवर तै प्रार्थना
करो सो, जो बिन पक्षपात, हरेक कै काम कै मुताबिक न्याय करै सै, तो
इब जो थम, जिब इस धरती पै परदेशियाँ कै तरियां जीण लागे सों, तो
थम उसके प्रति बड़े आदर रखते होए अपणी जिन्दगी जीणी चाहिए। 18
क्यूँकि थमनै बेरा सै, के थारा निकम्मा चाल-चलण जो बाप-दाद्यां तै
चल्या आवै सै, उस बेकार जिन्दगी तै थम बचोगे सौं, अर थारा छुटकारा
चाँदी-सोन्ने यानिके नाश होण आळी चिज्जां कै जरिये न्ही होया। 19 पर
बेकसूर अर बेदाग मेम्ने, यानिके मसीह के कीमती लहू कै जरिये होया।
20 दुनिया बणाण तै पैहल्याए परमेसवर नै मसीह यीशु ताहीं उद्धारकर्ता
करकै चुण लिया था, पर इब वो इन आखीरी दिनां म्ह इस खात्तर आया
के थारी मदद कर सकै। 21 जो मसीह नै करया उसकी बजह तै थम
परमेसवर पै बिश्वास करो सो, अर अपणी आस अर बिश्वास परमेसवर
पै राक्खो सो, क्यूँके उसनै मसीह ताहीं मुर्दा म्ह तै जिन्दा करया, अर
उस ताहीं बड़ी महिमा दी। 22 क्यूँके थम सच मानण के जरिये शुद्ध करे
गये सौं, इस खात्तर थमनै बिश्वासी भाईयाँ तै सच्चे दिल तै प्यार करणा
चाहिए, अर तन-मन लाकै एक-दुसरे तै प्यार करो। 23 थम एक-दुसरे तै
इस खात्तर प्यार करो, क्यूँके थमनै परमेसवर तै नई जिन्दगी पाई सै जो
सदा कै खात्तर सै। या नई जिन्दगी हमनै परमेसवर के वचन तै मिली सै,
जो जीवित अर सदा रहण आला सै। (aiōn g165) 24 क्यूँके पवित्र ग्रन्थ
यो कहवै सै, “हरेक जीव घास कै बरगा सै, अर उनकी शोभा जंगली
फूल्ला कै समान सै। घास सूख जावै सै, अर फूल झड़ जावै सै। 25 पर
प्रभु का वचन युगनुयुग स्थिर रहवैगा।” यो वोए सुसमाचार का वचन सै
जो थरे ताहीं सुणाया गया था। (aiōn g165)

2 इस करकै सारी ढाळ का बैरभाव अर छळ अर कपट अर जळण
अर बुराई नै दूर करकै, 2 नये जन्मे बच्चे की तरियां जो हमेशा माँ के
निर्मल दूध की लालसा करै सै, उससे तरियां थम भी परमेसवर के वचन
ताहीं सुणण की लालसा करो, ताके थारा परमेसवर पै बिश्वास मजबूत
हो सकै, अर थारा उद्धार हो जावै। 3 क्यूँके पवित्र ग्रन्थ कहवै सै, के

थमनै चख के जाण लिया सै के प्रभु कितना भला सै। 4 थम प्रभु यीशु मसीह के धोरै आए हो, वो उस खास पत्थर की ढाल सै जो नीम म्ह लगाया जावै सै, पर वो जिन्दा पत्थर सै। भोत सारे माणसां नै उस ताहीं त्याग दिया, पर परमेसवर नै उस ताहीं चुण्या, अर उस ताहीं कीमती बणाया, अर थम जो विश्वासी लोग प्रभु यीशु के धोरै आए हो, ताके थम भी उसके जरिये जिन्दे पत्थरां की ढाल हो जाओ, जो परमेसवर की आत्मिक आराधना का घर बण्ण म्ह काम आ सकै। 5 उसनै थारे ताहीं भी पवित्र याजक बणाया, जिस तरियां याजक परमेसवर ताहीं भेट चढ़ावै सै, उस्से तरियां थम भी अपणे दिल नै भेट के रूप म्ह चढ़ा धो, अर याए भेट परमेसवर नै आच्छी लागै सै, क्यूँके थम यीशु मसीह के कहताओ सौं। 6 यो उस्से तरियां सै, जिसा परमेसवर पवित्र ग्रथ म्ह कहवै सै: “देखों, मन्नै किसे ताहीं यरुशलेम नगर म्ह कोणे के पत्थर की तरियां राख्या सै, वो उस पत्थर की तरियां सै, जो नीम पै धरया जावै सै, अर जो कोए उसपै विश्वास करैगा, वो किसे तरियां तै शर्मिन्दा कोनी होवैगा।” 7 यो पत्थर थारे खात्तर कीमती सै, जो मसीह यीशु पै विश्वास करो सौं, पर पवित्र ग्रन्थ उन माणसां के बारें म्ह जो विश्वास न्हीं करदे कहवै सै, “जिस पत्थर ताहीं राजमिस्त्रियाँ नै निकम्मा ठहराया था, वोए कोणे का पत्थर हो गया।”, 8 पवित्र ग्रन्थ यो भी कहवै सै, के “इस पत्थर तै लोगां कै ठोक्कर लागैगी, या वा चट्टान सै जिसतै लोग ठोक्कर खाँके गिर जावैंगे,” वे इस खात्तर गिरै सौं, क्यूँके उननै परमेसवर के वचन पै विश्वास कोनी करया, परमेसवर नै उन खात्तर याए योजना बणाई सै। 9 पर थारे म्ह इसा ना हो, क्यूँके थम परमेसवर के चुणे होए माणस सो, थम परमेसवर के याजक सों, जो के राजा सै, थम परमेसवर के समर्पित माणस सों, अर थम जो परमेसवर के कुहावै सों, उसनै थारे ताहीं अन्धकार म्ह तै रोशनी म्ह बुलाया सै, ताके थम परमेसवर के उन अनोक्खे काम्मां के बारें म्ह माणसां ताहीं बता सको। 10 पैहले थम परमेसवर के माणस न्हीं थे, पर इब परमेसवर के माणस सो, पैहले थम परमेसवर की दया नै कोनी जाणो थे, पर इब जाणो सों, क्यूँके उसनै अपणी दया पैहल्या तै थारे ताहीं दिखाई सै। 11 हे प्यारे विश्वासी भाईयो, मैं थारे तै बिनती करूँ सूँ, के थम अपणे-आपनै दुनिया म्ह परदेशी अर मुसाफर जाणकै उन दुनियावी अभिलाषायां तै जो आत्मा तै युध्द करै सै, बचे रहो। 12 वे लोग जो परमेसवर पै विश्वास न्हीं करदे, वे भी थारे आस्सै-पास्सै ए रहवै सै, अर वे भी कह सकै सै, के थम बुरा काम करण लागेर हो। थमनै इसी आच्छी जिन्दगी जीणी चाहिए, ताके वो थारे भले काम्मां नै देखकै परमेसवर की महिमा उस दिन कर सकै जिब मसीह बोहड़ के आवैगा। 13 प्रभु नै महिमा देण खात्तर थम उन सारे माणसां का हुकम मान्नो जो इस दुनिया के शासक सै, जिस तरियां राजा, जो के सब पै प्रधान शासक सै। 14 अर राज्यपालों के भी अधीन रहों, क्यूँके राजा उन बुरे काम करणीया नै दण्ड देण अर आच्छे काम करणीया नै सम्मानित करण खात्तर इस्तमाल करै सै। 15 परमेसवर चाहवै सै के थम भले काम करो ताके थम उन बेकूफ माणसां नै जो

परमेसवर नै न्हीं जाणदे, अर थारे पै झूँठे दोष लगावै सै, उन ताहीं रोक सको। 16 थारे खात्तर भी इसा कोए कोनी जो थारे ताहीं रोक सकै, जो थम करणा चाहवो सों, क्यूँके यीशु मसीह के जरिये थम आजाद करे गये सों, पर इस बात नै थम बुरे काम करण का बहाना ना बणाओ, पर अपणे काम्मां के जरिये दिखाओ के थम परमेसवर के सच्चे दास सों। 17 सब का आदर करो, विश्वासी भाईयाँ तै प्यार करो, परमेसवर तै डरो, राजा का आदर करो 18 हे सेवको थम जो घर म्ह काम करो सों, अर विश्वासी भी सों, अपणे मालिकां का कहणा मान्नो अर सदा उनका आदर करो, हरेक ढाल के मालिक के साथ इसाए बरताव करो, चाहे वो भले हो, नम्र हो, या फेर चाहे वे बुरे हो। 19 क्यूँके जै हम दुख ठान्दे, फेर भी जिब म्हारी कोए गलती भी ना हो, तो भी हम इस खात्तर सह लेवां सां, क्यूँके हमनै बेरा सै, के परमेसवर सब कुछ जाणै सै, परमेसवर इसतै ए खुश होवै सै। 20 क्यूँके जै थमनै अपराध करके धूँसै खाए, अर धीरज राख्या, तो इस म्ह के बड़ाई की बात सै? पर जै भला काम करके दुख ठाया हो अर धीरज राख्या हो, तो यो परमेसवर नै भावै सै। 21 अर थम इस्से कै खात्तर बुलाए भी गये सों, क्यूँके मसीह भी थारे खात्तर दुख ठाकै थारे ताहीं एक बढ़िया नमूना दे ग्या सै, ताके थम भी उसके नक्शे-कदम पै चाल्लों। 22 पवित्र ग्रन्थ म्ह मसीह के बारें म्ह न्यू लिख्या सै, के “ना तो उसनै पाप करया अर ना उसकै मुँह तै छळ-कपट की कोए बात लिकड़ी।” 23 वो गाली सुणकै गाली कोनी देवै था, अर दुख ठाकै किसे ताहीं भी धमकी कोनी देवै था, पर अपणे-आप ताहीं परमेसवर के हाथ म्ह सौंप दिया, जो धार्मिकता तै न्याय करै सै। 24 वो आप ए म्हारै पापां नै अपणी देह पै लिये होए क्रूस पै चढ ग्या, जिसतै हम पापा कै खात्तर मरकै धार्मिकता कै खात्तर जीवन बितावां, उस्से कै मार खाण तै थम चंगे होए। 25 क्यूँके थम पैहल्या भट्टकी होड़ भेड़ां कै बरो थे, पर इब अपणे जीवन के रुखाले अर पाली कै धोरै बोहड़ आए सों।

3 हे बिरबानियों, थम भी अपणे धर्णी कै अधीन रहो, अर जै थारे पिता परमेसवर के वचन पै विश्वास करण तै मना करै सै, तो जिस तरियां थम उनतै बरताव करो सों, उसकी बजह तै थारे बिना कहे वे विश्वास करैंगे, वो मसीह पै जिब विश्वास करैंगे, जिब वो धारा शुद्ध अर भक्तिमय जीवन नै देखैंगे। 3 बाहरती की खूबसूरती के बारें म्ह चिन्ता ना करै, जिस तरियां खूबसूरती तै बाल गूँथाणा, महँगी गहणे, या सुधरे लत्तें पैहरणा। 4 पर धारा भीतरी माणसपण, नम्रता अर दीनता जिसे अविनाशी गुणा तै सजा हो, क्यूँके परमेसवर की निगांह म्ह इसका मोल बड़ा सै। 5 पैहल्ले बखत म्ह पवित्र बिरबानी भी, जो परमेसवर पै विश्वास अर आस राक्खै थी, वे अपणे-आपनै नै इस्से तरियां तै सिंगारै थी, अर अपणे-अपणे धर्णी का हुकम मानै थी। 6 जिस तरियां सारा अब्राहम कै हुकम म्ह रहवै थी, अर उसनै स्वामी कह्या करै थी। इस्से ढाल थम भी जै दुसरयां की भलाई करो, अर थमनै किसे बात का डर ना हो, तो थम सारा कै बेटियाँ कै तरियां होओगी। 7 इस्से तरियां ए हे पतियों, थम अपणी पत्नियाँ कै साथ मेळ-मिलाप कै साथ रहों, अर

सोच्चों के उनकी मदद किस तरियां करी जा सकै सै, थमनै यो बेरा होणा चाहिए के बिरबान्नी थारे तै कमजोर सै, इस करकै थमनै उनका आदर करणा चाहिए, क्यूँके थम दोनु उस वरदान के साझेदार सों, जिसा के परमेसवर नै थारे ताहीं दिया सै, जो के अनन्त जीवन सै, यो इस खातर करो ताके जिब थम परमेसवर तै प्रार्थना करो तो वो थारी सूणो। 8 आखरी म्ह मै कहणा चाहूँ सूँ के थम एक मन हो जाओ, एक-दुसरे तै भाई-भाण की तरियां प्यार करो, एक-दुसरे के बाबत दयालु रहो, अर नरम बणो। 9 बुराई के बदले बुराई ना करो अर ना गाळी के बदले गाळी धो, पर इसके उल्ट आशीष ए धो, क्यूँके परमेसवर नै थारे ताहीं इस खातर बण्या सै, के थम दुसरयां के खातर आशीष बण सको, जै थम इसा करोगे, तो परमेसवर थारे ताहीं भी आशीष देवैगा। 10 क्यूँके पवित्र ग्रन्थ कहवै सै, के “जै कोए इन्सान जिन्दी का आनन्द ठाणा चाहवै सै, अर आच्छे दिन देखणा चाहवै सै, तो वो ध्यान राख्ये के बुरी बातें अर जो बात सच न्ही उन ताहीं ना बोल्लो। 11 जो बुरे काम सै, उन ताहीं करणा छोड दे, इसकी बजाए वो भले काम करै, अर एक-दुसरे के साथ शान्ति तै रहण का पूरा जतन करै। 12 क्यूँके प्रभु की आँख धर्मियाँ पै लागी रहवै सै, अर उसके कान उनकी बिनती की ओड़ लागो रहवै सै, पर प्रभु बुराई करण आले तै दूर रहवै सै।” 13 जै थम सदा भले काम करो तो कोए थमनै नुकसान न्ही पुहुचा सकदा। 14 जै थम धार्मिकता कै कारण दुख भी ठाओ, तो थम धन्य सो, पर माणसां के डराण तै ना डरो, अर ना घबराओ, 15 पर अपणे-अपणे मन म्ह मसीह के प्रति आदर राख्यों, अर उस ताहीं अपणा प्रभु जाणो। जो कोए थारे तै थारी आस कै बारे म्ह बुझौ, जो हम बिश्वासियाँ की सै, तो उस ताहीं जवाब देण कै खातर सारी हाण त्यार रहो, पर नम्रता अर आदर कै गैल उस ताहीं जवाब धो। जो सही सै वोए करो, जै माणस थारे बारें म्ह बुरा बोल्लै सै, तो वो खुद शर्मिन्दा होवैगे, जिब वो थारे आच्छे चाल-चलण नै देक्खौंगे, क्यूँके मसीह कै गैल थारा गहरा रिश्ता सै। 17 कई बार परमेसवर म्हरे ताहीं दुख अर मुसीबतां तै गुजारै सै, भलाए हम भला काम करदे हो, पर यो म्हरे खातर आच्छा सै, बजाए इसकै के हम बुरे कामां के कारण दुख अर मुसीबत ठावां। 18 मसीह नै भी म्हरे पापां खातर एके बार अपणी जान दे दी, यानी के एक धर्मी नै सारे अधर्मियाँ खातर दुख ठाया, ताके वो थमनै परमेसवर तक ले जावै, उसकी शारीरिक मौत तो होई पर परमेसवर की आत्मा के जरिये वो जिन्दा करया गया। 19 तब उसकी आत्मा नै उन आत्मायाँ ताहीं सुसमाचार सुणाया, अर प्रचार करया जो उस जगहां पै परमेसवर के जरिये कैद करी गई थी, जित्त मरे होए लोगां की आत्मा रहवै सै। 20 ये वो आत्मा सै, जिन्नै परमेसवर का भोत पैहले कहणा न्ही मान्या। जिब नूह जहाज बणाण लागरया था, तो परमेसवर धीरज तै देखण लागरया था, के ये लोग माफी माँगै सै के न्ही, पर पाणी नै पूरी दुनिया ताहीं नाश करया सिर्फ आठ माणस जो जहाज म्ह बचे थे। 21 उस्से पाणी का उदाहरण भी, यानिके बपतिस्मा, यीशु मसीह कै जी उठण कै जरिये, इब थमनै बचावै सै, इसतै देह का

मैल दूर करण का मतलब न्ही सै, पर शुद्ध अन्तरात्मा तै परमेसवर कै पाच्छै हो जाणा सै। 22 वो सुर्ग पै जाकै परमेसवर कै सोळी ओड़ बैठ गया, अर सुर्गदूत अर अधिकारी अर सामर्थी उसके अधीन करे गये सै।

4 इस करकै मसीह नै दुख ठाया जिब उसनै देह रूप धारण करया,

थारा भी रविया उस्से तरियां दुख उठाण का होणा चाहिए, जिसा उसका था, क्यूँके जै थमनै मसीह खातर दुख ठाण की सोच ली सै, तो थमनै पाप ना करण की भी सोच ली सै, ताके आगौ तै कदे थम पाप ना करो। 2 उस कारण वो इन्सान अपणी बाकी की जिन्दी, इस दुनिया म्ह पापमय अभिलाषायां नै पूरी करण कै खातर न्ही इस्तमाल करदा, पर वो, वो करै सै जो परमेसवर उस ताहीं करण कै खातर कहवै सै। 3 पैहले थमनै भोत सारा बखत वो काम करण म्ह बेकार कर दिया जिस म्ह गैर बिश्वासी खुशी मनावै सै, जिस तरियां लुचपण की बुरी अभिलाषाओ, मतवालापण, लीलाक्रीड़ा, दाळ-बाजी, जारी अर घृणित मूर्तिपूजा जिसे कामां तै परमेसवर नफरत करै सै। 4 इस कारण थारे पुराणे मित्र अचम्भा करै सै, के थम इसे अंथाधुंध लुचपण म्ह उनका साथ न्ही देंदे, अर वे इब थमनै गाळी देवै सै। 5 पर वे उसनै जो जिन्द्यां अर मरे होए माणसां का न्याय करण नै त्यार सै, लेक्खा देवैंगे। 6 योए कारण सै के सुसमाचार उन माणसां ताहीं सुणाया गया, जो इब मर चुके सै, हालाकि वे सब माणसां की तरियां मरण कै जोग्गे ए थे, इब वे आत्मा म्ह परमेसवर के साथ हमेशा कै खातर रहवै सै। 7 सारी बातां का अन्त तावळा होणाल्ला सै, इस करकै सावधान रह अर शान्त मन राख ताके तू प्रार्थना कर सकै। 8 साराया म्ह बढिया बात या सै के एक-दुसरे तै धणा प्यार करो, क्यूँके जै थम माणसां तै प्यार करोगे तो थम उन ताहीं माफ करण खातर तैयार रहोगे, जो थारा बुरा करै सै। 9 बिना कुड़कुड़ाए एक-दुसरे की मेहमान-नवाजी करो। 10 हरेक इन्सान ताहीं परमेसवर के जरिये काबलियत मिली सै अर वो उस काबलियत नै दुसरे लोगां की मदद करण खातर इस्तमाल करै, वो परमेसवर के आच्छे सेवक की तरियां उसके अनुग्रह के जरिये दिए गए वरदानां का बढिया इस्तमाल करै। 11 जै थारे धोरै प्रचार करण का वरदान सै, तो थमनै परमेसवर के वेचन का प्रचार करणा चाहिए, जै थारे धोरै दुसरयां की मदद करण का वरदान सै, तो उस शक्ति तै करो जो परमेसवर नै थारे ताहीं दी सै, फेर जो भी काम करोगे, यीशु मसीह के जरिये परमेसवर नै महिमा मिलौंगी, सारी महिमा अर सामर्थ युगानुयुग उस्से का सै। आमीन। (aiōn g165) 12 हे प्यारे बिश्वासी भाईयो, उन दुखां कै खातर अचम्भा ना करो जो थम सहण लागरे सों, क्यूँके थम मसीह के कुहाओ सों, ये चीज इस खातर होण लागरी सै, क्यूँके सचमुच थम यीशु पै बिश्वास करो सों, तो इसा ना समझो के अनोक्खी बात थारे ए गैल होण लागरी सै। 13 इस बात खातर खुश होओ, के थम मसीह के दुख म्ह साझेदारी हो सके, उस बजह तै जिब मसीह बोहड़ के आवैगा, अपणी महिमा लोगां नै दिखाण खातर, तो थम खुशी तै भर जाओगो। 14 फेर जै मसीह कै नाम कै खातर थारी बुराई करी जावै सै तो थम धन्य सो,

क्यूंकि परमेसवर की महिमामय आत्मा से जो थारे म्ह रहवै सै। 15 जै दुख ठाओ सों, तो यो दुख खून्नी, चोर, किसे बुरे काम, या किसे और के काम म्ह दखलंदाजी करण के कारण न्ही होणा चाहिए। 16 पर जै मसीह होण कै कारण दुख पावै, तो शर्मिन्दा ना होइयो, पर इस बात कै खात्तर परमेसवर की महिमा करो, क्यूंकि थम उसके कुहाओ सों। 17 क्यूंकि वो बखत आण पोंहच्या सै, के पैहल्या परमेसवर के माणसां का न्याय करया जावैगा, अर जिब के न्याय की शरूआत म्हरै ए तै होणी, तो उनका के अन्त होणा जो परमेसवर के सुसमाचार नै न्ही मानते? 18 जिसा पवित्र ग्रन्थ कहवै सै, के “जै धर्मी माणस ए मुश्किल तै उद्धार पावैगा, तो भगतिहीन अर पापी का के ठिकाणा?” 19 ज्यांतै जो परमेसवर की मर्जी कै मुताबिक दुख ठावै सै, उनै परमेसवर पै सदा विश्वास करते रहणा चाहिए, जिसनै उन ताहीं बणाया सै। परमेसवर नै जो भी वादा करया सै, उस ताहीं वो हमेशा पूरा करै सै, इस खात्तर हमनै हमेशा भलाई करदे रहणा चाहिए।

5 थारे म्ह जो कलीसिया के अगुवें सै, मै थारे ताहीं कुछ बताणा चाहूँ सुं, क्यूंकि मै थारी तरियां बुजुर्ग सुं, मन्नै खुद वे दुख देक्खे सै, जो मसीह नै भोत पैहले सहे सै, जिब वो बोहड के आवैगा तो मै भी उसकी महिमा म्ह शामिल होऊँगा। 2 जिस तरियां एक पाळी भेड्या की रुखाळी करै सै, उससे तरियां थमनै भी उन लोगां की रुखाळी करणी चाहिए, जिन ताहीं परमेसवर नै थारे ताहीं सौप्या सै, अर यो मजबूरी म्ह न्ही पर खुद की इच्छा तै राज्जी होकै करो, क्यूंकि परमेसवर यो चाहवै सै के थम इसाए करो, पर इसा काम पर्दिसा कै खात्तर न्ही पर परमेसवर अर माणसां की सेवा करण खात्तर करो। 3 उन माणसां पै हक ना जमाओ, जो थारे ताहीं सौंपै गये सै, पर उनकै खात्तर बढिया मिसाल बणो। 4 जिब प्रभु यीशु मसीह जो के पाळीयाँ का प्रधान बोहड के आवैगा, तो थारे ताहीं वो महिमा का मुकुट दिया जावैगा जिसकी चमक कदे न्ही जावैगी। 5 इस्से ढाळ हेजवान्नों, थम भी कलीसिया के अगुवां का कहणा मानो, बल्के थम सरे के सरे दीनता तै एक-दुसरे की सेवा करते रहो, क्यूंकि हम पवित्र ग्रन्थ म्ह पढा सां, के “परमेसवर घमण्डियाँ का बिरोध करै सै, पर दीन पै अनुग्रह करै सै।” 6 इस करकै परमेसवर के स्यामी दीन बणो, जो थमनै बचा सकै, ताके वो थमनै सही बखत आण पै बढा सकै। 7 अपणी सारी चिन्ता परमेसवर ताहीं दे द्यो, क्यूंकि उसनै थारा ध्यान सै। 8 सावधान रहो, अर जागदे रहो, क्यूंकि थारा बिरोधी शैतान गरजनाळे शेर की ढाळ इस टाह म्ह रहवै सै, के किसनै पाड खावै, ताके थम परमेसवर की राह ना चाल सको। 9 विश्वास म्ह मजबूत होकै, अर न्यू जाणकै उसका सामना करो, के थारे भोत-से विश्वासी भाई जो दुनिया म्ह इसेए दुख सहण लागरे सै। 10 इब परमेसवर जो सरे अनुग्रह का दाता सै, जिसनै थारे ताहीं मसीह म्ह अपणी अनन्त महिमा कै खात्तर बुलाया, थारे कुछ बखत तक दुख ठाण कै पाच्छे आप ए थमनै सिद्ध अर स्थिर अर मजबूत करैगा। (aiōnios g166) 11 उससे का साम्राज्य युगानुयुग रहवै। आमीन। (aiōn g165) 12 मन्नै या छोटी चिट्ठी

लिखकै सिलवानुस के हाथ थारे थोरै भेजी सै, जिस ताहीं मै मसीह म्ह विश्वास जोग्गा भाई समझूँ सुं, मेरे लिखण का यो मकसद सै के मै थारे ताहीं उत्साहित कर सकूँ, अर थारे ताहीं विश्वास दिला सकूँ, के जो थम अनुभव करण लागरे सों, वो असलियत म्ह परमेसवर की करुणा का हिस्सा सै, थम उस कृपा म्ह बणे रहें। 13 जो विश्वासी बेबीलोन नगर म्ह सै, उन ताहीं भी परमेसवर नै चुण्या सै, जिस तरियां थारे ताहीं चुण्या, उनका अर मरकुस जो मेरे बेटे की तरियां सै, उसका थारे ताहीं नमस्कार। 14 आप्स म्ह एक-दुसरे ताहीं गठे मिलकै प्यार तै नमस्कार करो। थम सारया ताहीं, जो मसीह म्ह हो, थमनै शान्ति मिलदी रहवै।

2 पतरस

1 या विट्ठी शमौन पतरस की ओड़ तै सै, जो यीशु मसीह का दास अर प्रेरित सै, उन माणसां के नाम सै, जिन नै म्हारै परमेसवर अर उद्धारकर्ता यीशु मसीह की धार्मिकता के जरिये म्हारी तरियां बेस्किमती बिश्वास पाया सै। 2 मै प्रार्थना करूँ सूँ के परमेसवर थारे ताहिं ज्यादा तै ज्यादा अनुग्रह अर शान्ति दे, जिस तरियां थम परमेसवर के ज्ञान अर म्हारै प्रभु यीशु मसीह स्ह बढण लागरे सौं। 3 परमेसवर जिसनै अपणी शक्ति के जरिये म्हारे ताहिं वो सब दिया सै, जो हमनै भगतिमय जिन्दगी जीण खात्तर चाहिए, यो इस खात्तर मुमकिन सै, क्यूँके हम परमेसवर नै जाणा सां, अर उसनै अपणी महिमा अर सद्गुणा के मुताबिक अपणे माणस होण खात्तर बुलाया सै। 4 अर उसकी महिमा अर भलाई के कारण उसनै म्हारै ताहिं बडे महान अर कीमती वादे करे सै, ताके इनकै जरिये थम इस दुनिया की बुरी लालसा तै बच जाओ, जिन ताहिं वे लोग करण चाहवै सै, जो मसीह पै बिश्वास न्ही करदे, पर थम ईश्वरीय सुभाव के गैल-साइझी हो जाओ। 5 इस कारण थम सिर्फ मसीह पैपै बिश्वास करण आळे न्ही, पर हमेशा दुसरायां की भलाई करण म्ह लागै रहों, अर सिर्फ भलाई ए न्ही बल्के बुधिमानी तै बरताव करण आळे भी बणो। 6 थम सिर्फ बुधिमानी तै ए बरताव करण आळे न्ही बल्के अपणे-आप पै काब्बू राक्खण आळे भी बणो, अर अपणे-आप पै काब्बू राक्खण आळे ए न्ही बल्के दुखां नै धीरज तै सहण आळे भी बणो, अर दुखां नै धीरज तै सहण आळे ए न्ही बल्के भगति म्ह जिन्दगी बिताण आळे भी बणो। 7 ना सिर्फ थम परमेसवर नै भावण आळी जिन्दगी जिओ, बल्के बिश्वासियाँ तै भी अपणे परिवार के माणस की तरियां प्यार करो, एक-दुसरे ताहिं अपणे परिवार के माणस की तरियां प्यार करण आळे ए न्ही बल्के सब नै प्यार करण आळे भी बणो। 8 जै थारे म्ह ये गुण मौजूद सै अर जै थारे म्ह इनकी बढोतरी होण लागरी सै तो इनकै कारण थम म्हारे प्रभु यीशु मसीह के सम्पूर्ण ज्ञान म्ह ना तो निकम्मे अर ना बिना फल के होओगे। 9 जै कोए इन्सान इसी जिन्दगी न्ही बितान्दा, तो वो उस इन्सान की तरियां सै, जो सही तै न्ही देख पान्दा, अर वो आन्धा से। वो भूल जावै सै के परमेसवर नै उसके पाप माफ कर दिये, जो उसनै मसीह पै बिश्वास करण तै पैहले करे सै। 10 इस कारण हे बिश्वासी भाईयो, आच्छा करण की कोशिश करदे रहों, ताके थम अपणे-आपनै अर दुसरे माणसां नै दिखा सको, के परमेसवर नै थारे ताहिं चुण्या सै, अर बुलाया सै। जै थम इसाए करदे रहों, तो थम कदे भी परमेसवर तै अलग न्ही होओगे। 11 बल्के इस तरियां तै थम म्हारै प्रभु अर उद्धारकर्ता यीशु मसीह के अनन्त राज्य म्ह बडे आदर कै गैल बडण पाओगे। (aiōnios g166) 12 ज्यांतै हालाकि थम ये बात जाणो सो, अर जो सच्चा वचन थारे ताहिं मिल्या सै उस म्ह बणे रहो सो, तोभी मै थारे ताहिं ये बात याद दुवाण खात्तर सारी हाण त्यार रहूँगा। 13 मै यो जाणु सूँ के जिब तक मै जिन्दा सूँ यो सही सै, के मै उन बातां के बारें म्ह थारे तै बात करदा रहूँ, ताके थम इन बातां नै कदे भूल ना जाओ। 14 क्यूँके मै जांणु सूँ के मै तावळा मरण आळा सूँ, अर प्रभु यीशु मसीह नै मेरे ताहिं इस बारें म्ह बता दिया सै। 15 ज्यांतै मै इसी कोशिश करूँगा, के मेरे इस दुनिया तै जाये पाछै, थम इन सारी बातां नै सारी हाण याद कर सको। 16 क्यूँके जिब हमनै थारे ताहिं, अपणे प्रभु यीशु मसीह की सामर्थ अर बोहडण की खबर दी थी, तो हमनै श्याणपत तै गढ़ी होई कहाँनियाँ का सहारा कोनी लिया, बल्के हमनै आप ए उसकै प्रताप ताहिं देखा था। 17 क्यूँके जिब उसनै परमेसवर पिता तै आदर अर महिमा पाई जो के प्रतापमय महिमा सै, हमनै उस ताहिं यो कहन्दे सुणा, “यो मेरा प्यारा बेटा सै, जिसतै मै राज्जी सूँ।” फेर हम उसकै गेल्या पवित्र पहाड़ पैथे, अर सुर्या तै योए बोल आन्दे सुण्या। 19 हम जाणा सां के जो वचन नवियाँ नै मसीह के बारें म्ह लिख्या सै, वो सच सै, थम इन वचनां नै गौर तै सुणो, जिस तरियां अन्धकार म्ह दीवै का चाँदणा, माणसां नै राह दिखावै सै, उससे तरियां ये वचन भी सच्चाई नै जाणण म्ह थारी मदद करैंगे, थम इन वचनां नै ध्यान तै सुणते रहो, जिब तक के यीशु मसीह बोहडकै ना आ जावै। उसका आणा एक नये दिन की सुबह की तरियां सै, जो उजाला लेकै आवै सै, अर वो सुबह के तारे की तरियां होगा। उस बखत उसका चाँदणा थारे मन म्ह चमकैगा, अर परमेसवर नै साप तौर पै थारे पै जाहिर करैगा। 20 पर सबतै पैहले यो जाण ल्यो के पवित्र ग्रन्थ की कोए भी भविष्यवाणी, खुद नवियाँ का अपणा विचार कोनी 21 क्यूँके कोए भी भविष्यवाणी माणस की मर्जी तै कदे न्ही होई, पर भगतजन पवित्र आत्मा के जरिये उभारे जाकै परमेसवर की ओड़ तै बोल्लै थे।

2 जिस तरियां इसाएली माणसां म्ह झूठे नबी थे, उससे ढाळ थारे ताहिं भी झूठे शिक्षक होंगे, वे थारे ताहिं चुपके तै झूठी शिक्षा सिखावैंगे, जिसकी बजह तै लोग मसीह पै बिश्वास न्ही करैंगे, वे झूठे शिक्षक मसीह ताहिं अपणा प्रभु न्ही मानैंगे, जिसनै उन ताहिं मोल लिया सै, अर पाप की शक्ति तै आजाद करया सै, इस तरियां वे चाणचक अपणे-आप ताहिं नाश कर लेवैंगे। 2 घणखेर जो कहवैंगे के हम बिश्वासी सां, वे उनकी ढाळ लुचपण के सुभाव नै अपणावैंगे, अर उनके कारण जो लोग बिश्वासी कोनी सच के राह की बुराई करैंगे। 3 ये शिक्षक लालची होंगे, अर थारे तै धन पाण के खात्तर मनघडन्त कहाँनी सुणाकै थारे ताहिं धोक्खा देवैंगे, परमेसवर नै भोत पैहले फैसला ले लिया था, के वो उन ताहिं दण्ड देवैंगे, अर वो यो करण आळा सै, वो सच म्ह उन ताहिं नाश करण आळा सै। 4 क्यूँके जिब परमेसवर नै उन सुर्दृढां ताहिं जिन्नै पाप करया था, उन ताहिं माफ न्ही करया, पर उन ताहिं नरक म्ह भेजकै अँधेरे कुण्डां म्ह गेर दिया ताके न्याय कै दिन ताहिं कैदी रहवै। (Tartaroō g5020) 5 थम यो भी जाणो सौं, के जो लोग भोत पैहले फैसला ले लिया था, उन म्ह परमेसवर का भय न्ही था, परमेसवर नै उनकी बुराईयाँ ताहिं नजरअंदाज कोनी करया, जो उननै करी थी, पर उन ताहिं बाढ़ के जरिये नाश कर दिया, उन म्ह तै परमेसवर नै आठ माणसां ताहिं बचाया जिस म्ह नूह भी था, जिसनै धार्मिकता का प्रचार करया। 6 थम यो भी जाणो

सों, के जो लोग भोत पैहल्या सदोम अर अमोरा के नगर म्ह रहवै थे, परमेसवर नै उन ताहीं भी दण्ड दिया, क्यूँके उननै भोत बुरे काम करे थे, अर उन ताहीं आग म्ह भस्म करकै राख बणा दिया। इसा करण के जरिये उसनै दिखा दिया, के उन माणसां का के होगा जो उसका कहणा नही मानते। 7 सदोम नगर का नाश करण तै पैहले उसनै, लूत जो के एक धर्मी माणस था, उस ताहीं उस नगर तै लिकाङ्कै उस ताहीं बचा लिया। लूत दुखी था क्यूँके सदोम नगर के लोग परमेसवर का कोए भी हुकम कोनी मान्नै थे, अर वे भोत बुरे काम करै थे। 8 वो उन बुरे माणसां के बीच म्ह रहवै था, अर हरेक दिन उनके बुरे काम्मां नै देक्खै था जो वे करै थे, अर बुरी बातां नै सुणै था जो वे बोल्लै थे, अर ये सारी बात उस ताहीं दुखी करै थी, क्यूँके वो धर्मी माणस था। 9 वे सारी बात जो परमेसवर नै पुराणे बखत म्ह करी सै, वे ये दिखावै सै, के परमेसवर पवित्र माणसां नै मुसीबतां तै किस तरियां बचावै सै, अर न्याय होण के दिन तक बुरे माणसां नै लगातार दण्ड दिया जावै। 10 परमेसवर बुरे माणसां नै दण्ड देवैगा, खास करकै उन झूठे शिक्षकां नै जो अशुद्ध अभिलाषायां कै पाछै देह कै मुताबिक चाल्दे, अर प्रभुता नै तुच्छ जाणै सै। वे ढीठ, अर जिद्दी सै, अर सुर्गीय चिज्जां के बारें म्ह आच्छा-भुडा कहण तै न्ही डरदे। 11 तोभी सुर्गदूत जो झूठे शिक्षकां तै अर सामर्थ म्ह उनतै बड़े सै, प्रभु कै स्याम्ही जिब उन झूठे शिक्षकां पै दोष लगावै सै तो वे अपमानजनक बात कहकै उनकी बुराई न्ही करदे। 12 पर ये झूठे शिक्षक जंगली-जानवरां की तरियां सै, ये जानवर नही जाणते के किस तरियां सोचणा सै, अर उनका मकसद पकड़े जाणा अर मरणा सै। ये लोग भी वोए काम करै सै जो इनकै मन म्ह आवै सै, अर उन चिज्जां के बारें म्ह बुराई करै सै, जिसके बारें म्ह वे न्ही समझते, वे नाश हो जावैंगे। 13 दुसरयां का बुरा करण कै बदले उन्हे का बुरा होवैगा। उननै दिन-दोफारी म्ह भोग-विलास करणा आच्छा लाग्नै सै। ये थारे पै कलंक अर दोष सै, जिब वे थारे गेल्या प्रीति भोज म्ह शामिल होवै सै, तो अपणे छलावे का आनन्द ले सै। 14 वो हरेक जनानी नै देखकै उसके साथ जारी करणा चाहवै सै, अर याप करण का मौका टोहवै सै, ये उन माणसां ताहीं धोक्खा देवै सै जो परमेसवर पै पक्का बिश्वास कोनी राखदे, अर उन ताहीं याप करण खात्तर उकसावै सै, उनकी सदा बढ़दी रहण आळी लालसा के कारण परमेसवर उन ताहीं दण्ड देवैगा। 15 उननै वो करणा छोड़ दिया सै, जो सही सै, अर उननै बओर के बेट्टे बिलाम की तरियां बुरे काम करणे शरु कर दिए, जो उसनै भोत पैहले करे थे, क्यूँके उसनै बुरे काम्मां तै पईसा कमाणा चाह्या। 16 पर परमेसवर नै बिलाम नबी की गधी के जरिये उस ताहीं डांटा-फटकारा जो बुरे काम वो करण जावै था, हालाकि गधी जो बोल न्ही सकै थी, उसनै बिलाम नबी तै इन्सान की वाणी म्ह बात करी, जिब वो राजा तै मिलण जाण लागरया था, तो गधी नै बिलाम नबी ताहीं उसकै बावलेपण तै रोक्या। 17 ये झूठे शिक्षक उस बेकार पाणी के चोवै की तरियां सै जो सूख लिया सै, अर ये उस बाह्ल की तरियां भी सै जिस ताहीं बारिस तै पैहले हवा उड़ा ले जावै सै, परमेसवर नै उन खात्तर,

अनन्त अन्धकार म्ह जगहां राक्खी सै। (questioned) 18 जिब वे माणसां नै सिखावै सै तो वो बेकार के अर घमण्डी शब्दां नै इस्तमाल करै सै, वे माणसां नै समझावै सै के वो बुरे काम कर सकै सै जो उनकी देह करणा चाहवै सै, अर उन माणसां तै भी दुबारा धोक्खे तै पाप करवाणा चाहवै सै, जो बुरी जिन्दगी तै बाल्न-बाल्न बचे सै। 19 ये झूठे शिक्षक माणसां ताहीं कहवै सै के थम सारे काम करण खात्तर आजाद सों, जो थम करणा चाहों सौं, पर वो खुद गुलाम की तरियां सै, क्यूँके उनका पापी सुभाव उन ताहीं बुरे काम करवावै सै, थम हर उस चीज के गुलाम सौं जो थमनै काबू करै सै। 20 माणस इस दुनिया की बुराईयाँ तै भाज्जै सै, जिब वो मसीह यीशु नै अपणा उद्धारकर्ता मान लेवै सै, पर वे फेर तै बुरे काम करण लागै सै, अर वे बुरी चीज उन ताहीं काबू म्ह राक्खै सै, इब उनकी दशा जो के मसीह नै छोड़ देण तै सै, वो पैहलड़ी दशा तै भी भुट्ठी सै, जिब उननै मसीह पै बिश्वास करया था। 21 मेरे कहण के मतलब यो सै, के परमेसवर उन माणसां ताहीं धणा दण्ड देवैगा जो मसीह ताहीं छोड़ देवै सै, उन माणसां तै ज्यादा जो उस ताहीं कदे न्ही अपणादे, उन खात्तर यो ठीक होन्दा के वो कदे न्ही जाणते के धर्मिकता का जीवन किस तरियां जीणा सै, उन ताहीं बेरा सै के सही के सै, पर वो परमेसवर के हुकम नै कोनी मानते जो हम प्रेतियां नै उन ताहीं सिखाये सै। 22 उनपै ये दो कहावत सही बेट्टे सै, के कुत्ता अपणी उलटी नै चाहै सै, अर नुहाई होई सुरी कीघड़ म्ह लोटूण के खात्तर फेर चली जावै सै।

3 हे प्यारे बिश्वासी भाईयो, इब मै थारे ताहीं दुसरी चिट्ठी लिकखूँ सूँ

अर मै दोनु चिट्ठियाँ म्ह थारे ताहीं कुछ चीज याद दुआ के थमनै सही ढंग तै सोच्यण खात्तर उत्साहित करण की कोशिश करण लागरया सूँ, जो थमनै पैहले तै सीख ली सै। 2 मै यो इस करकै करण लागरया सूँ, क्यूँके मै थमनै उन नवियाँ के शब्द याद दुवाणा चाहूँ सूँ, जो उननै भोत पैहले कहे अर प्रभु यीशु मसीह जो म्हारा उद्धारकर्ता सै, उसकी शिक्षा जो थमनै उन प्रेतियां तै सीखी जो थारे धोरै आए थे। 3 यो जाण ल्लो के आखीरी के दिनां म्ह मसीह के आण तै पैहल्या भोत-से इसे माणस होवैंगे जो थारा मजाक उड़ावैंगे, क्यूँके थम बिश्वास करो सौं के मसीह बोहड़ के आवैगा, अर वे बुरे तै बुरा काम करैंगे जो उन ताहीं खुश करै सै। 4 अर कहवैंगे, “उसकै आण का वादा कित्त गया? क्यूँके जिब तै उनके पूर्वज सो ग्ये सै, सारा किमे उससे तरियां ए सै जिस तरियां सृष्टि की शरुआत तै था?” 5 वो इस करकै कहवैंगे क्यूँके वो भूलणा चाहवै सै, के परमेसवर के वचन कै जरिये अकास पुराणे बखत तै विद्यमान सै। उसनै धरती ताहीं भी पाणी म्ह तै बणाया अर पाणी तै न्यारा करया। 6 यो उनके मजाक का ए नतिज्जा था, के बाद म्ह उसनै एक बड़ी बाढ़ के जरिये इस दुनिया ताहीं पाणी म्ह डूबो कै नाश कर दिया। 7 पर परमेसवर नै इब के बखत का अकास अर धरती उस्से वचन कै जरिये ज्यांतै राख राक्खे सै, के जलाए जावै, अर ये भगतीहीन माणसां के न्याय अर नाश होण कै दिन ताहीं इसेए धरैं रहवैंगे। 8 हे प्यारे बिश्वासी भाईयो, या बात थारे तै लुक्ही ना रहवै के प्रभु कै उरै एक दिन हजार

साल के बराबर सै, अर हजार साल एक दिन के बराबर सै, उसके खात्तर दोनुं एकके सै। 9 प्रभु अपणे वादे के बारै म्ह वार न्ही करदा, जिसी देव कुछ माणस समझै सै, पर थारे बारै म्ह धीरज धरै सै, अर न्ही चाहन्दा के कोए नाश हो, बल्के यो, के सारया ताहीं मन पलटन का मौका मिलै।

10 पर मसीह जरुर बोहुड के आवैगा, उस दिन अकास म्ह बड़ा गरजण होगा अर अकास गायब हो जावैगा, जो कुछ अकास म्ह सै जिस तरियां सूरज, चाँद अर तारे ये सब आग म्ह पूरी तरियां जल जावैगे, उस दिन परमेस्वर सब जाहिर करैगा, अर इस दुनिया म्ह होण लागरे सारे काम्मा का भी न्याय करैगा। 11 जिब के ये सारी चीज इस तरियां तै पिंघळ के खतम होण आळी सै, तो थारे ताहीं पवित्र चाल-चलण अर भगति म्ह किस ढाल का माणस होणा चाहिये, 12 जिब थम उस दिन की बाट देक्खो सों जिब परमेस्वर इस दुनिया का न्याय करण आवैगा, तो उस दिन ताहीं तावळा ल्याण खात्तर पूरी कोशिश करो, उस दिन आग अकास ताहीं जला कै भस्म कर देवैगी अर जो कुछ अकास म्ह सै उस ताहीं गर्मी पिंघळा देवैगी। 13 पर उसके वादे कै मुताबिक हम एक नये अकास अर नयी धरती की आस देक्खां सां, जिस म्ह परमेस्वर की धार्मिकता वास करैगी। 14 जिब के थम इन बातां नै पूरा होण की बाट देक्खो सों तो थम इसी जिन्दगी जिओ जो परमेस्वर नै पसन्द सै यानी थम एक-दुसरे के साथ शान्ति तै उसके स्याम्ही बेदाग अर बेकसूर रहो।

15 यो जाण ल्यो के, क्यूँ म्हारा प्रभु धीरजवान सै? क्यूँके वो माणसां नै कुछ और बखत देणा चाहवै सै, ताके वो पाप करणा छोड़ दे, अर वो उन ताहीं बचा सकै, जिब म्हारा संगी बिश्वासी भाई पौलुस जिसतै हम प्यार करां सां, उसनै परमेस्वर के ज्ञान के जरिये थारे ताहीं लिख्या सै, उसनै भी थारे ताहीं येए बात बताई सै, जो मनै थारे ताहीं बताई सै। 16 उस्से तरियां ए उसनै अपणी सारी चिट्ठियाँ म्ह भी जो बिश्वासियाँ ताहीं लिखी सै इन बातां का जिक्र करया सै, जिन म्ह कुछ बात इसी सै जिनका समझणा ओक्खा सै, अर अनपढ अर चंचल माणस उनके मतलबां नै गलत तरिकें तै बतावै सै जिसा वो पवित्र ग्रन्थ की दुसरे वचनां का गलत मतलब लिकाडै सै, इसा करकै वो परमेस्वर नै मजबूर करै ताके वो उन ताहीं नाश करदे। 17 ज्यातै हे प्यारे बिश्वासी भाईयो, थम जाणो सों, के ये सारी बात होवैगी, तो ध्यान राक्खों के जो लोग परमेस्वर का हुक्म ताहीं न्ही मानते वो झूठ के जरिये थारे ताहीं बहका ना दे, अर उन बातां के बारें म्ह शक करण लागरे सों, जिनपै पैहले बिश्वास करो थे।

18 पर म्हारे प्रभु अर उद्घारकर्ता यीशु मसीह के अनुग्रह अर ज्ञान की पहचान म्ह बढ़दे जाओ। उस्से की महिमा इब भी हो, अर युगानुयुग होन्दी रहवै। आमीन। (aiōn g165)

1 यूहन्ना

1 हम उस जीवन देण आळे वचन कै बारें म्ह लिखण लागरे सां, जो शुरु तै था, जिस ताहीं हमनै सुण्या, अर जिस ताहीं हमनै अपणी आँखां तै देख्या, बल्के जिस ताहीं हमनै ध्यान तै देख्या अर हाथां तै छुआ। 2 (यो जीवन दुनिया म्ह आया अर हमनै इस ताहीं देख्या, अर हम उसके गवाह सां, अर थमनै उस अनन्त जीवन की खबर देवां सां, जो पिता कै गैल था अर म्हारै पै जाहिर होया)। (aiōnios g166) 3 जो किमे हमनै यीशु मसीह के बारें म्ह देख्या अर सुण्या सै उसकी खबर थमनै भी देवा सां, इस करकै के थम भी म्हारै गैल संगति करो; अर म्हारी या संगति पिता अर उसकै बेटै यीशु मसीह कै गैल सै। 4 अर ये बात हम इस करकै लिखा सां ताके थम खुशी तै भर जाओ। 5 जो खबर हमनै यीशु मसीह तै सुणी अर थमनै सुणावा सां, वो या सै के परमेसवर चाँदणे के समान पवित्र सै, अर उस म्ह कुछ भी अन्धकार के समान कोए बुराई कोनी। 6 जै हम कहवां, के परमेसवर कै गैल म्हारी संगति सै पर फेर भी अन्धकार म्ह चाल्लां, तो हम झूठे सां अर सच की राह पै कोनी चाल्दे, 7 पर जिसा परमेसवर चाँदणे के समान सै, उसेए हम भी चान्दणा म्ह चाल्लां, तो एक-दुसरे तै संगति राक्खा सां, अर उसकै बेटै यीशु मसीह का लहू हमनै सारे पाप तै शुद्ध करै सै। 8 जै हम कहवां के म्हारै म्ह कोए भी पाप कोनी, तो अपणे-आपनै धोक्खा देवा सां, अर म्हारै म्ह सच्चाई कोनी। 9 जै हम अपणे पाप नै परमेसवर के स्याही मान ल्या, तो वो म्हारे पाप नै माफ करण म्ह भरोसेमन्द अर धर्मी सै, अर वो हमनै सारे अर्धमै ते शुद्ध करै सै। 10 जै हम कहवां के हमनै पाप न्ही करया, तो परमेसवर नै झूऱ्हा बणावा सां, अर हम उसके वचन के मुताबिक जीवन कोनी जिन्दे।

2 हे मेरे प्यारे बाल्कों, मै ये बात थारे ताहीं इस करकै लिखूँ सूं के थम पाप ना करो; अर जै कोए पाप करै, तो परमेसवर पिता कै थोरै म्हारा एक मददगार सै, यीशु मसीह जो धर्मी सै, जो म्हारे पापां की माफी खात्तर पिता तै बिनती करै सै। 2 यीशु मसीह ए म्हारै पापां कै खात्तर प्रायशिचित बलि सै, अर सिर्फ म्हारे ए न्ही बल्के सारी दुनिया के माणसां के पापां खात्तर भी। 3 जै हम परमेसवर के हुक्म का पालन करांगे, उस्से तै हमनै बेरा लागैगा के हम उस ताहीं जाणागे सां। 4 जो कोए या कहवै सै, “मै उसनै जाण ग्या सूं,” अर उसकै हुक्म नै न्ही मानता, यो वो माणस झूऱ्हा सै, उस म्ह सच कोन्या; 5 पर जो कोए परमेसवर कै वचन नै मान्ये सै, उस म्ह सचमुच परमेसवर का प्यार सिद्ध होया सै, परमेसवर म्ह म्हारे बणे रहण का सबूत योए सै, इस्से तै हम जाणा सां के हम उस म्ह सां। 6 जो कोए या कहवै सै के मै मसीह यीशु म्ह बण्या रहूँ सूं, तो उसके खात्तर जरूरी सै, के जिसा मसीह यीशु जिया उसाए वो भी जीवै। 7 हे प्यारे बिश्वासी भाईयो, मै थमनै कोए नया हुक्म न्ही, पर वोए पुराणा हुक्म लिखूँ सूं, जो शुरु तै था, यो वाए हुक्म सै, जिस ताहीं थमनै मसीह म्ह बिश्वास करते बखत सुण्या था। 8

फेर भी मै थमनै नया हुक्म लिखूँ सूं, उस हुक्म की सच्चाई मसीह म्ह थी, अर वाए थारे म्ह भी सै; क्यूँके अन्धकार मिटाता जावै सै, अर सच का चान्दणा इब चमकण लाग्या सै। 9 जो कोए या कहवै सै, के मै चाँदणे म्ह रहूँ सूं पर अपणे बिश्वासी भाई तै बैर राक्खै सै, तो वो इब ताहीं अन्धकार म्ह ए रहण लागरया सै। 10 जो कोए अपणे बिश्वासी भाई तै प्यार करै सै, वो चान्दणा म्ह रहवै सै, अर उस म्ह इसा कुछ कोनी के दुसरयां नै पाप करवावै। 11 पर जो कोए अपणे बिश्वासी भाई तै बैर राक्खै सै, वो अन्धकार म्ह रहवै सै अर अधेरे म्ह बालै सै, अर न्ही जाणदा के कित्त जावै सै, क्यूँके अन्धकार नै उसकी आँख अँधी कर दी सै। 12 हे बाल्कों, मै थमनै इस करकै लिखूँ सूं के यीशु कै नाम तै थारे पाप माफ होए सै। 13 हे बुजुर्गों, मै थमनै इस करकै लिखूँ सूं के जो शुरु तै सै, थम उसनै जाणो सौं। हे गबरूओं, मै थमनै इस करकै लिखूँ सूं के थमनै उस शैतान पै जीत पाई सै। हे लड़कों, मन्नै थारे ताहीं इस करकै लिख्या सै के थम पिता परमेसवर नै जाणगे सौं। 14 हे बुजुर्गों, मन्नै थारे ताहीं इस करकै लिख्या सै, के जो शुरु तै सै, थम पिता परमेसवर नै जाणगे सौं। हे गबरूओं, मन्नै थारे ताहीं इस करकै लिख्या सै, के थम ताकतवर बणों, अर परमेसवर का वचन थारे म्ह बणा रहवै सै, अर थमनै उस शैतान पै जीत पाई सै। 15 थम ना तो दुनिया तै अर ना दुनियावी चिज्जां तै प्यार राक्खो। जै कोए दुनिया तै प्यार राक्खै सै, तो उस म्ह पिता परमेसवर का प्यार कोन्या। 16 क्यूँके जो किमे दुनिया म्ह सै, यानी देह की अभिलाषा, आँखां की अभिलाषा अर रोजी रोटी का घमण्ड, वो पिता परमेसवर की ओड़ तै कोनी पर दुनिया की ए ओड़ तै सै। 17 दुनिया अर उसकी अभिलाषा दोनु मिटेत ज्या सै, पर जो परमेसवर की मर्जी पै चालै सै वो सदा बण्या रहवैगा। (aiōn g165) 18 हे बाल्कों, यो मसीह के आण का आखरी बखत सै; अर जिसा थमनै सुण्या सै, के मसीह का बिरोधी भी आण आला सै, उसके मुताबिक इब भी घणेए मसीह बिरोधी उठ खड़े होए सै; इसतै हम जाणगे सां, के यो आखरी बखत सै। 19 मसीह बिरोधी लिकडै तो म्हारी कलीसिया म्ह ए तै सै, पर वे म्हारै थे ए कोनी; जै वे म्हारै होन्दे, तो हमनै छोड़ के ना जान्दे; उनका म्हारे ताहीं छोड़ के जाणा ए यो साबित करै सै, के उन म्ह तै कोए भी म्हारा कोनी था। 20 पर थारे ताहीं तो पवित्र आत्मा मसीह के जरिये मिला सै, इस करकै थम सारी सच्चाई नै जाणो सौं। 21 मन्नै थारे ताहीं इस करकै न्ही लिख्या, के थम सच्चाई नै न्ही जाणदे, पर इस करकै कै थम उस ताहीं जाणो सौं, क्यूँके कोए भी झूऱ्ह, सच की ओड़ तै कोनी लिकडृता। 22 झूऱ्हा कौण सै? सिर्फ वो जो यीशु नै मसीह होण तै नाटै सै; अर मसीह का बिरोधी वोए सै, जो पिता परमेसवर का अर बेटै का इन्कार करै सै। 23 जो कोए बेटै नै (मानण) तै नाटै सै उसकै थोरै पिता परमेसवर भी कोनी जो बेटै नै मान ले सै, उसकै थोरै पिता परमेसवर भी सै। 24 जो संदेश थमनै शुरु तै सुण्या सै, जिब थमनै मसीह पै बिश्वास करया, जै वो थारे म्ह बण्या रहवै, तो थम भी बेटै म्ह अर पिता परमेसवर म्ह बणे रहोगे। 25 परमेसवर नै म्हारे तै वादा करया

सै, के वो हमने अनन्त जीवन देवैगा। (aiōnios g166) 26 मैं थारे ताहीं उन माणसां के बारें मृथ चतावनी देऊ सूँ, जो थमने झूँठी शिक्षा तै भरमावै सै; 27 अर थारे मृथ पवित्र आत्मा जो मसीह की ओड़ तै मिला सै, वो थारे मृथ रहवै सै; इस करकै यो जसरी कोनी, के कोए थमनै उस सच्चाई के बारें मृथ सिखावै, बल्के पवित्र आत्मा थारे ताहीं उन बातां की सारी सच्चाई बतावै सै, अर पवित्र आत्मा जो थारे ताहीं सिखावैगा, वो बिल्कुल सच सै, अर थारे तै झूँठ कोनी बोल्लैगा, इस करकै मसीह मृथ बणे रहो, जिसा थारे ताहीं पवित्र आत्मा नै सिखाया सै। 28 हे बाल्कों, मसीह मृथ बणे रहो, के जिब वो दुबारा आवैगा, तो म्हारी हिम्मत बणी रहवै, ताके मसीह कै आण पै उसके स्याम्ही शर्मिन्दा ना होआ। 29 जै थम जाणो सौं, के मसीह धर्मी सै, अर जो कोए धर्म का काम करै सै, वो परमेस्वर की ऊलाद सै।

3 सोच्चों तो सही के पिता परमेस्वर नै म्हारै तै किसा प्यार करया,

कै हम पिता परमेस्वर की ऊलाद कुहवाए; अर हम सां भी। पर इस कारण दुनिया के माणस हमनै कोनी जाणते, के हम परमेस्वर की ऊलाद सां, क्यूँकै वे पिता परमेस्वर नै भी कोनी जाणते। 2 हे मेरे प्यारे बिश्वासी भाईयो, इब हम परमेस्वर की ऊलाद सां अर इब ताहीं यो तय न्हीं होया, के आण आळे बखत मृथ के बणागें! इतणा जाणा सां के जिब यीशु मसीह आवैगा तो हम उसके समान होवांगे, क्यूँकै हम मसीह नै उसेए दिक्खांगें जिसा वो सै। 3 अर जो कोए मसीह पै या आस राक्खै सै, वो अपणे-आपनै उसाए पवित्र करै सै, जिसा वो पवित्र सै। 4 जो कोए बार-बार पाप करै सै, वो नियम-कायदा का बिरोध करै सै। अर हुकम ना मानना ए पाप सै। 5 थम जाणो सौं के मसीह इस खात्तर आया, ताके पाप नै दूर करै; अर उसके मृथ कोए भी पाप कोनी। 6 जो कोए उस मृथ बण्या रहै सै, वो बार-बार पाप न्हीं करदा; जो कोए बार-बार पाप करै सै, वे कोनी जाणते के मसीह कौण सै, अर ना ए उसके गैल कोए उनका रिश्ता सै। 7 हे बाल्कों, किसै के बहकावै मृहा ना आङ्यो। जो धर्म के काम करै सै, वोए मसीह कै समान धर्मी सै। 8 जो कोए पाप करदा रहवै सै, वो शैतान की ओड़ तै सै, क्यूँकै शैतान शरु तै ए पाप करदा आया सै। परमेस्वर का बेटा इस खात्तर आया के शैतान कै काम्मा का नाश करै। 9 जो परमेस्वर की ऊलाद सै, वो बार-बार पाप न्हीं करदा; क्यूँकै मसीह का सुभाव उस मृथ बण्या रहवै सै, अर वो पाप कर ए न्हीं सकता, क्यूँकै वो परमेस्वर की ऊलाद सै। 10 परमेस्वर की अर शैतान की ऊलाद की पिछाण इस्से तै हो ज्या सै: कोए भी माणस, जिसका जीवन धर्मिकता का कोनी, वो परमेस्वर की ओड़ तै कोनी, अर ना ए वो, जिसनै अपणे भाई तै प्यार न्हीं करया। 11 जो खबर थमनै शरु तै सुणी, वो या सै के हम एक-दुसरे तै प्यार करं; 12 अर आदम के बेटे कैन की ढाळ ना बणो, जो उस शैतान की ओड़ तै था, अर जिसनै अपणे भाई ताहीं मार दिया। अर उस ताहीं क्यूँ मारया? क्यूँकै उसके खुद के काम बुरे थे, अर उसके भाई के काम धर्म

के थे। 13 हे बिश्वासी भाईयो, जै दुनिया के माणस थारे तै बैर करै सै तो अचम्भा ना करो। 14 हम जाणा सां, के हम मौत के मुँह तै लिकड़कै जीवन मृथ दाखल होवा सां; क्यूँकै हम बिश्वासी भाईयॉ तै प्यार राक्खा सां। जो प्यार न्हीं राखदा वो मृत्यु के सिकन्जे मृथ रहवै सै। 15 जो कोए अपणे बिश्वासी भाई तै बैर राक्खै सै, वो हत्यारा सै; अर थम जाणो सौं के हत्यारे मृथ अनन्त जीवन न्हीं रहन्दा। (aiōnios g166) 16 प्यार के सै? इस्से तै हमनै जाण लिया के यीशु मसीह नै म्हारै खात्तर अपणी जान दे दी; इस करकै हमनै भी अपणे बिश्वासी भाईयॉ कै खात्तर जान देणी चाहिए। 17 पर जिस किसे कै धोरै दुनिया की दौलत हो अर वो अपणे बिश्वासी भाई नै कंगाल देखकै उसपै तरस ना खावै, तो उस मृथ परमेस्वर का प्यार किस तरियां बण्या रहै सके सै? 18 हे प्यारे बाल्कों, म्हारे बोल्लान तै ए न्हीं, पर काम अर सच्चाई मृथ भी म्हारा प्यार दिखाना चाहिए। 19 जिब हम दुमरयां तै प्यार करां सां, तो हम जाण लेवां सां, के हम सच के सां; अर जिस बात मृथ म्हारा मन हमनै दोष देवै सै, उसके बारें मृथ हम परमेस्वर कै आगै अपणे-अपणे मन नै होसला दे सकां सां; 20 जै बुरे काम की बजह तै म्हारा मन हमनै दोषी बणावै तोभी हम परमेस्वर के स्याम्ही जा सकां सां, क्यूँकै परमेस्वर म्हारे मन तै बड़ा अर सब कुछ जाणया आळा सै। 21 हे प्यारे बिश्वासी भाईयो, जै म्हारा मन हमनै दोष ना दे, तो हमनै परमेस्वर कै आगै जाण मृहोसला मिलै सै। 22 अर जो कुछ हम परमेस्वर तै माँगा सां, वो हमनै उसतै मिलै सै, क्यूँकै हम उसके हुकम नै मान्ना सां अर जो उसनै आच्छा लागै सै, वोए हम करा सां। 23 उसका हुकम यो सै के हम उसके बेटे यीशु मसीह पै बिश्वास करा, अर जिसा उसनै म्हारै ताहीं हुकम दिया सै उस्से कै मुताबिक हम आपस मृह प्यार करां। 24 जो परमेस्वर के हुकम नै मान्नी सै, वो परमेस्वर मृह वास करै सै, अर वो उन मृह वास करे सै: अर इस्से तै, हम जाणा सां, के वो म्हारै मृह रहवै सै उस पवित्र आत्मा के जरिये जो उसनै म्हारै ताहीं दिया सै।

4 हे प्यारे बिश्वासी भाईयो, हरेक आत्मा का बिश्वास ना करो, बल्के आत्मायाँ नै परखो के वो परमेस्वर की ओड़ तै सै के न्हीं; क्यूँकै घणखरे झूँठे नबी दुनिया मृह उठ खड़े होए सै। 2 परमेस्वर की आत्मा थम इस रिति तै पिछाण सको सौं: जो आत्मा मान ले सै के यीशु मसीह देह धारण करकै आया सै, वो परमेस्वर की ओड़ तै न्हीं सै। 3 अर जो आत्मा यीशु नै न्हीं मानती, वो परमेस्वर की ओड़ तै न्हीं सै; अर वोए तो मसीह कै बिरोधी की आत्मा सै, जिसका जिक्र थमनै सुण्या सै के वो आण आळा सै, अर इब भी दुनिया मृह सै। 4 हे प्यारे बाल्कों, थम परमेस्वर के लोग सौं, अर थमनै झूँठे नबियॉं पै जीत पाई सै; क्यूँकै पवित्र आत्मा जो थारे मृह बसै सै, वो शैतान तै बड़ा सै, जो इस दुनिया मृह सै। 5 झूँठे नबी दुनिया के लोग सै, इस कारण वे दुनिया की बात बोल्लै सै, अर लोग उनकी सुणी सै। 6 हम परमेस्वर के लोग सां। जो परमेस्वर नै जाण सै, वो म्हारी सुणी सै; जो परमेस्वर नै न्हीं जाणता वो म्हारी न्हीं सुणदा। इस ढाळ हम सच की आत्मा अर भ्रम की आत्मा नै

पिच्छाण लेवां सां। 7 हे प्यारे बिश्वासी भाईयो, हम आपस म्ह प्यार करं; क्यूँके प्यार परमेसवर की ओड तै सै, जो कोए प्यार करै सै, वो परमेसवर की ऊलाद सै, अर वो परमेसवर नै जाणै सै। 8 जो दुसरायां तै प्यार न्ही करते, वो परमेसवर नै न्ही जाण्डा, क्यूँके परमेसवर प्यार सै। 9 जो प्यार परमेसवर म्हारै तै करै सै, वो इस्तै जाहिर होया के परमेसवर नै अपणे इकलौते बेटै ताहीं दुनिया म्ह भेज्जा सै, ताके हम उसकै जरिये सच्चे जीवन नै पावां। 10 प्यार वो न्ही जो हमनै परमेसवर तै करया सै, बल्के प्यार वो सै जो उसनै म्हारै तै करया, के म्हारै पापां के प्राप्यशिवित कै खात्तर अपणे बेटै ताहीं भेज्जा। 11 हे प्यारे बिश्वासी भाईयो, जिब परमेसवर नै म्हारै ताहीं इसा प्यार करया, तो हमनै भी आपस म्ह प्यार करणा चाहिए। 12 परमेसवर ताहीं भी किसे नै न्ही देख्या; जै हम आपस म्ह प्यार करां, तो परमेसवर म्हारै म्ह बसा रहवै सै अर उसका प्यार म्हारै म्ह सिध्द होया। 13 इस्से तै हम जाणा सां के हम उस म्ह बणे रहा सां, अर वो म्हारै म्ह; क्यूँके उसनै अपणे पवित्र आत्मा म्ह तै म्हारै ताहीं दिया सै। 14 हमनै देख खी लिया अर गवाही देवा सां के पिता परमेसवर नै बेटै ताहीं दुनिया का उद्घारकर्ता बणाकै भेज्जा सै। 15 जो कोए या मान ले सै के यीशु परमेसवर का बेटा सै, परमेसवर उस माणस म्ह वास करै सै, अर वो परमेसवर म्ह। 16 हम जाणगे सां, अर हमनै बिश्वास सै के परमेसवर म्हारै तै प्यार करै सै। परमेसवर प्यार सै, अर जो प्यार म्ह बण्या रहवै सै, वो परमेसवर म्ह वास करै सै, अर परमेसवर उस म्ह वास करै सै। 17 इस्से तै प्यार म्हारै म्ह सिध्द होया, के न्याय कै दिन हमनै यो होसला मिलै, के परमेसवर हमनै दण्ड न्ही देगा। जिसा मसीह दुनिया म्ह रहन्दे होए परमेसवर म्ह वास करै था, उसाए हम भी परमेसवर म्ह वास करां सां। 18 प्यार म्ह डर न्ही होंदा, बल्के सिध्द प्यार डर नै दूर करदे सै; क्यूँके डर का सम्बन्ध दण्ड तै होवै सै, अर जो डरै सै वो प्यार म्ह सिध्द न्ही होया। 19 हम इस करकै प्यार करा सां, के पैहले उसनै म्हारै तै प्यार करया। 20 जै कोए कहवै, “मै परमेसवर तै प्यार करूँ सूँ” पर अपणे बिश्वासी भाई तै बैर राक्खै तो वो झूँठा सै; क्यूँके जो अपणे बिश्वासी भाई तै जिस ताहीं उसनै देख्या सै प्यार न्ही कर सकता, तो वो परमेसवर तै भी जिस ताहीं उसनै न्ही देख्या प्यार न्ही कर सकता। 21 परमेसवर तै हमनै यो दुकम मिल्या सै, कै जो कोए परमेसवर तै प्यार राक्खै सै वो अपणे भाई तै भी प्यार राक्खै।

5 जिसका यो बिश्वास सै, के यीशु ही मसीह सै, वो परमेसवर पिता की ऊलाद सै; अर जो कोए परमेसवर तै प्यार करै सै, वो उसके माणसां तै भी प्यार करैगा। 2 जिब हम परमेसवर तै प्यार करां सां अर उसकै हुकम नै मान्ना सां, तो इस्से तै हम जाणा सां, के हम परमेसवर अर उसके माणसां तै प्यार करां सां। 3 परमेसवर तै प्यार करण का मतलब यो सै के हम उसकै हुकमा नै मान्नै; अर उसके हुकम मुश्किल कोन्या। 4 क्यूँके जो परमेसवर पिता की ऊलाद सै, उसनै दुनिया पै जीत हासिल करी सै; अर वा जीत दुनिया ताहीं हरा देवै सै, वो म्हारा बिश्वास ए सै। 5 दुनिया पै जीत पावैन आळा कौण सै? सिर्फ वो जिसका यो बिश्वास सै

के यीशु ए परमेसवर का बेटा सै। 6 मसीह यीशु ए सै, जिसनै बपतिस्मा लिया अर म्हारे खात्तर सूक्ष्मी पै अपणा लहू भी बहाया। 7 गवाही देण आळे तीन सै। 8 आत्मा, पाणी अर लहू; ये तीनु एके बात पै सहमत सै। 9 जिब हम माणसां की गवाही मान ल्यां सां, तो परमेसवर की गवाही तो उसतै बढ़कै सै; अर परमेसवर की गवाही या सै के उसनै अपणे बेटै कै बारें म्ह गवाही दी सै। 10 जो परमेसवर कै बेटै पै बिश्वास करै सै, वो अपणे मन म्ह ए बिश्वास राक्खै सै। जिसनै परमेसवर पै बिश्वास न्ही करया उसनै परमेसवर ताहीं झूँठा बताया, क्यूँके उसनै उस गवाही पै बिश्वास न्ही करया जो परमेसवर नै अपणे बेटै कै बारें म्ह दी सै। 11 अर वा गवाही या सै के परमेसवर के बेटै कै जरिये हमनै अनन्त जीवन पाया सै, अर यो जीवन उसकै बेटै म्ह सै। (aiōnios g166) 12 उसके बेटै तै म्हारा गहरा रिश्ता सै, उसकै धोरै अनन्त जीवन सै; अर जिसका परमेसवर के बेटै तै रिश्ता कोनी, उसकै धोरै अनन्त जीवन भी कोनी। 13 मै या चिट्ठी थारे ताहीं लिखूँ सूँ, जो परमेसवर कै बेटै कै नाम पै बिश्वास करो सौं, ताके थम जाणो के अनन्त जीवन थारा सै। (aiōnios g166) 14 हमनै परमेसवर कै स्याम्ही यो होसला मिलै सै, वो होसला यो सै, के जो हम उसकी इच्छा के मुताबिक माँगा सां, तो वो म्हारी सुणै सै। 15 जिब हम जाणा सां, के जो कुछ परमेसवर तै मांग्या सै, वो म्हारी सुणै सै, तो यो भी जाणा सां, के जो कुछ हमनै परमेसवर तै मांग्या, वो पाया सै। 16 जै कोए अपणे बिश्वासी भाई नै इसा पाप करते देक्खै, जिसका नतिज्जा मौत ना हो, तो बिनती करै, अर परमेसवर उस ताहीं उन खात्तर, जिन नै इसा पाप करया सै, जिसका कारण मौत ना हो, जीवन देगा। जिस पाप का नतिज्जा मृत्यु सै; मै इसके बारें म्ह बिनती करण खात्तर न्ही कहन्दा 17 सारी ढाळ के बुरे काम तो पाप सै, पर इसा पाप भी सै जिसका नतिज्जा मृत्यु कोनी। 18 हम जाणा सां, के जो कोए परमेसवर ऊलाद सै, वो बार-बार पाप न्ही करते; क्यूँके परमेसवर का बेटा यीशु मसीह उसनै पाप तै बचाई राक्खैगा, अर शैतान उसनै छू भी न्ही पांदा। 19 हम जाणा सां, के हम परमेसवर तै सां, अर सारी दुनिया उस शैतान कै बस म्ह पड़ी सै। 20 हम यो भी जाणा सां, के परमेसवर का बेटा यीशु मसीह आ ग्या सै, उसनै म्हारे ताहीं उस सच्चे परमेसवर नै पिच्छाणण की समझ दी सै; के म्हारा परमेसवर का करीबी रिश्ता सै, क्यूँके म्हारा उसके बेटै कै गेल्या करीबी रिश्ता सै। सच्चे परमेसवर अर अनन्त जीवन योए सै। (aiōnios g166) 21 हे बालकों हरेक उस चीज तै दूर रहों जो थमनै परमेसवर तै दूर करै सै।

2 यूहन्ना

1 या चिट्ठी मुझ यूहन्ना की ओड़ तै सै, जो कलीसिया का अगुवां सै,
मै उस परमेसवर के जरिये चुणी गई विरबान्नी अर उसके बालकां के
नाम या चिट्ठी लिखण लागरया सूं जिनतै मै सच्चा प्यार करूं सूं अर
सिर्फ मै ए न्ही बल्के वे सारे भी प्यार करै सै, जो सच्चाई नै जाणै सै। 2
हम थारे तै प्यार करा सां, क्यूंके सच्ची शिक्षा म्हारे म्ह रहवै सै, अर
म्हारे साथ सदा रहवैगी। (aiōn g165) 3 परमेसवर पिता, अर उसके
बेटे यीशु मसीह की ओड़ तै अनुग्रह, दया, शान्ति, ये सब उनकै साथ
रहवैंगी, जो इस सच्चाई नै मानै सै, अर एक-दुसरे तै प्यार करै सै।
4 मै घणा राज्जी होया के मनै तेरे कई बालकां ताहीं उस हुकम कै
मुताबिक, जो म्हारे पिता की ओड़ तै मिल्या था, सच पै चाल्दे होए
पाया। 5 इब हे नारी, मै तेरे तै बिनती करूं सूं के हमनै एक-दुसरे तै
प्यार करणा चाहिए, यो कोए नया हुकम कोनी, बल्के यो वो हुकम सै
जिसनै हम उस बखत तै जाणा सां, जिब हमनै मसीह कै पाच्छै चालणा
शरु करया था। 6 अर सच्चा प्यार यो सै, के हम परमेसवर के हुकमां कै
मुताबिक चाल्लां, जिस दिन तै थमनै मसीह कै पाच्छै चालणा शरु
करया था, उस दिन तै थम जाणो सों, के परमेसवर नै म्हारे ताहीं हुकम
दिया सै, के हम सदा एक-दुसरे तै प्यार करा। 7 मै ज्यांतै कहूं सूं क्यूंके
भोत-से लोग झूठी शिक्षा तै दुसरयां नै धोक्खा देण आळे, इस दुनिया
म्ह अलग-अलग जगहां तै लिकड़ आए सै, वे कहवै सै, के मसीह इस
दुनिया म्ह इन्सान का रूप धारण करकै न्ही आया, जै कोए माणस ये
बात कहवै से तो वो माणस यीशु मसीह का बिरोधी से, वो दुसरयां ताहीं
भरमाण आळा सै। 8 थमनै चौकक्स रहणा चाहिए, के ये लोग थमनै
धोक्खा न्ही देण पावै, ताके परमेसवर की सेवा करण म्ह जो मेहनत
थमनै करी सै, वा बेकार ना जावै, पर परमेसवर थारी उस मेहनत का
थमनै ईनाम देवैगा। 9 जै कोए माणस, मसीह नै जो शिक्षाएँ दी सै
उसका पालन न्ही करदा, अर अपाणी ओड़ तै उन शिक्षा म्ह कुछ और
जोडै सै, तो उसकी परमेसवर कै गैल साझेदारी कोनी, पर जो कोए
उसकी दी गई शिक्षा का पालन करदा रह सै, उसकी पिता परमेसवर
अर उसके बेटे यीशु मसीह कै गैल साझेदारी सै। 10 जै कोए थारे धोरै
आवै अर वा शिक्षा दे जो मसीह की शिक्षा तै न्यारी सै, तो उस ताहीं थम
ना तो घर म्ह आण द्यो अर ना नमस्कार करो। 11 क्यूंके जो कोए इसे
माणस नै नमस्कार करै सै, वो उसके भुज्डे काम्मां म्ह साइझी होवै सै।
12 मनै घणीए बात थारे ताहीं बताणी सै, पर मै उन बातां नै इस चिट्ठी
म्ह लिखणा कोनी चाहन्दा, अर उम्मीद सै के मै थारे धोरै आऊँगा, अर
आम्ही-स्याम्ही थारे तै बात करूँगा, अर फेर हम आच्छी ढाळ खुशी
मनावंगे। 13 परमेसवर के जरिये चुणी गई बेब्बे के बालकां का, थारे
ताहीं नमस्कार।

3 यूहन्ना

1 या चिट्ठी मुझ यूहन्ना की ओड़तै, जो कलीसिया का अगुवां सै, प्यारे मित्र, मेरी या प्रार्थना सै, के जिसतै मै सच्चा प्यार करूँ सू। 2 हे प्यारे मित्र, मेरी या आत्मिक बढ़ोतरी करण लाग रहा सै, उस्से तरियां तू सारी बातां म्ह बढ़ोतरी करै अर भला चंगा रहवै। 3 क्यूँके जिब कुछ बिश्वासी भाईयाँ नै आणकै मेरे ताहीं बताया के तू ईमानदारी तै परमेसवर की सच्ची राह पै चाल्लण लागरया सै, तो मै भोत-ए राज्जी होया। 4 मन्नै इसतै बढ़कै किसे और बात की खुशी कोनी के जिब मै सुण सूँ के वे लोग जो मेरे बाल्कां की तरियां सै, वे परमेसवर की सच्ची राह पै चाल्लण लागरे सै। 5 हे प्यारे मित्र, तू म्हरे बिश्वासी भाईयाँ की मदद कै खात्तर ईमानदारी तै भोत कुछ करण लागरया सै, तन्नै उनकी भी मदद करी जिन ताहीं तू न्ही जाणदा। 6 जिनकी तनै मदद करी थी, उन म्ह तै कई माणसां नै, उनै की कलीसिया के बिश्वासी भाईयाँ ताहीं बताया, के तू अपणे बिश्वासी भाईयाँ तै कितना प्यार करै सै, इब मै थमनै कहूँ सूँ के तू इसे माणसां की हमेशा मदद करदा रहै, जिब वे दुसरी जगहां सफर खातर जावै सै, क्यूँके योए परमेसवर नै आच्छा लागै सै। 7 क्यूँके ये लोग हरेक जगहां सफर करै सै, ताके मसीह का वचन सुणा सकै, अर गैर यहूदियाँ तै कुछ मदद न्ही लेंदे। 8 इस करकै हमनै अपणे घर म्ह, इसे माणसां का स्वागत करकै उनकी सेवा-पाणी करणी चाहिए, अर उनकी हरेक जरूरत पूरी करणी चाहिए, ताके हम माणसां म्ह सच्चा सन्देस फैलाण म्ह उनके साइझीदार हो सका। 9 मन्नै पेहले थारी कलीसिया के बिश्वासियाँ ताहीं एक चिट्ठी लिखी थी, पर दियुत्रिफेस नै मेरी हिदायत मानण तै इन्कार कर दिया क्यूँके वो खुद हमेशा कलीसिया का अगुवां बणणा चाहवै था। 10 इस करकै जिब मै आँऱ्गा तो, थारे स्याही उसके जरिये करे गये सारी बातां नै स्पष्ट कर देऊँगा, यानी सारे बुरे-बुरे शब्दां का इस्तमाल करदे होए जो उसनै म्हरे पै दोष लगाए, इतणाए न्ही बल्के वो ना ए तो किसे शिक्षक ताहीं स्वीकार करै सै, अर ना ए कलीसिया के किसे बिश्वासी ताहीं इसा करण देवै सै, जो स्वीकार करणा चाहवै सै, उन ताहीं वो कलीसिया तै बाहर कर देवै सै। 11 हे प्यारे मित्र, बुराई करण आळे न्ही, पर भलाई करण आळे बणो। जो भलाई करै सै, वो परमेसवर की ओड़तै सै, पर जो बुराई करै सै, वो परमेसवर ताहीं कोनी जाणदा। 12 कलीसिया म्ह हार कोए कहवै सै, के देमेत्रियुस एक आच्छा माणस सै, क्यूँके उसका बरताव परमेसवर के सच्चे सन्देस के मुताबिक सै, अर तू भी जाणै सै के जो हम कहवा सां वो सच सै। 13 मन्नै तेरे ताहीं भोत कुछ बताणा तो था, पर मै उन बातां नै इस चिट्ठी म्ह लिखणा कोनी चाहन्दा। 14 पर मन्नै उम्मीद सै, के तेरे तै तावळा-ए मिलूँगा, फेर हम आम्ही-स्याही बात करांगे। मै प्रार्थना करूँ सूँ के परमेसवर थमनै शान्ति देवै। ओड़े के मित्रां तै नाम ले-लेकै म्हरी ओड़तै नमस्कार कह दिये।

यहूदा

1 या चिट्ठी मुझ यहूदा की ओड़ तै सै, मै, मसीह यीशु का दास अर याकूब का छोटू भाई सूं। मै या चिट्ठी उन माणसां ताहीं लिखण लागरया सूं, जिन ताहीं परमेसवर नै अपणे पै बिश्वास करण खात्तर बुलाया सै। पिता परमेसवर थारे तै प्यार करै सै, अर मसीह यीशु म्ह थारे ताहीं सुरक्षित राख्यै सै। 2 मै प्रार्थना करूं सूं, के परमेसवर थारे ताहीं दया, शान्ति अर प्यार भोत-ए धणा देवै। 3 हे प्यारे बिश्वासी भाईयो, जिब मै उस नई जिन्दगी के बारें म्ह लिखण म्ह धणी मेहनत करण लागरया था, जो म्हरे ताहीं मसीह यीशु के जरिये परमेसवर तै मिलै सै, अर जिस म्ह हग सब साझीदार साँ। तो मन्नै महसूस होया के मै इस चिट्ठी के जरिये थमनै उत्साहित करूं, ताके थम अपणे बिश्वास की बढ़ोतरी खात्तर और भी मेहनत करो, परमेसवर नै यो बिश्वास सरे माणसां ताहीं सदा खात्तर एके बार दे दिया सै, अर यो बदल्या न्ही जा सकदा। 4 क्यूँके परमेसवर का कहणा ना मानण आळे भोत-से झट्टी शिक्षा देणे आळे लोग चुपचाप म्हरे बिना जाणे म्हरै म्ह आ मिलै सै, ये वो लोग सै जिनकै बारें म्ह परमेसवर नै सदियाँ पैहले पवित्र ग्रन्थ म्ह कह्या था, के उन ताहीं परमेसवर दण्ड देवैगा। वे परमेसवर के अनुग्रह के सन्देस नै बिगाड़ के उस ताहीं भोग-विलास म्ह बदल देवै सै। यीशु मसीह जो म्हारा एकमात्र माल्लिक अर प्रभु सै, वे उसका इन्कार करै सै। 5 हालाकि थमनै सारी बात्तां का बेरा सै, फेर भी मै थमनै वे बात याद दुवाणा चाहूँ सूं, जिब प्रभु नै इसाएली माणसां ताहीं मिस देश की गुलामी ते छुड़ाया था, तो उसके बाद उन म्ह बिश्वास ना करणीया का प्रभु नै जंगल-बियाबान म्ह नाश कर दिया। 6 यो भी याद राख्यों के परमेसवर नै उन सुर्गदूत्तां ताहीं भी दण्ड दिया, जिननै अपणी प्रभुता बणाए न्ही राख्यी, बल्के अपणी खुद की रहण की जगहां जो के सुर्ग थी छोड़ दी, परमेसवर नै उन ताहीं भी भीषण दिन कै न्याय खात्तर अन्धेरे म्ह, जो सदा काल कै खात्तर सै, बेल्लां तै बाँधकै राख्या सै, जिन ताहीं कोए तोड़ न्ही सकदा। (aidios g126) 7 उस्से तरियां उन माणसां के बारें म्ह जो सदोम अर अमोरा नगर अर उसकै लोवे-धोवे के नगर के माणसां कै गैल के बणी थी। वे माणस जार होगे थे, अर अप्राकृतिक यौन-सम्बन्धां कै पाच्छै लागेथे, तो परमेसवर नै उन ताहीं आग तै भस्म कर दिया, जो उनकै गैल होया वा दुसरयां खात्तर चेतावनी सै, क्यूँके वे भी अनन्त आग के जरिये दण्ड पावैंगे। (aiōnios g166) 8 इन बात्तां के बारें म्ह बेरा होन्दे होए, परमेसवर का कहणा ना मानण आळे लोग इस्से तरियां तै पाप करै सै, उनका कहणा सै, के वे दर्शन देक्खै सै, वे अपणी-अपणी देह नै अशुद्ध करै सै, अर वे परमेसवर की प्रभुता नै अस्वीकार करै सै, अर सुर्गदूतां की बुराई करै सै। 9 पर परमेसवर के प्रधान सुर्गदूत मीकाईल नै, जिब शैतान तै मूसा नबी की लाश कै बारें म्ह वाद-विवाद करया, तो मीकाईल सुर्गदूत नै भी उसतै आच्छा-भुंडा कहकै खोट लाण की हिम्मत कोनी करी, पर सिर्फ इतणाए कह्या, के

“प्रभु तन्नै फटकारै।” 10 पर परमेसवर का कहणा ना मानण आळे ये लोग उन बात्तां की आलोचना बुरे शब्दां तै करै सै, जिन ताहीं वे जाणदे ए कोनी, अर जिन बात्तां नै वे जाणै सै, उन ताहीं वे बिना सोच्चे-समझे जंगली-जानवरां की तरियां करै सै, इसे कामां खात्तर परमेसवर उन ताहीं दण्ड देवैगा। 11 धिक्करा सै उनपै। जो कैन की तरियां बुरी जिन्दगी जीवै सै, जिसनै अपणे भाई का खून इस करकै करया था, क्यूँके परमेसवर नै उसकी भेट स्वीकार कोनी करी, अर उसके भाई की कर ली थी, अर वो उस बिलाम की तरियां सै, जिसनै परमेसवर के माणसां ताहीं पाप करण खात्तर उकसाया, ताके वो धन ले सके जिसकी पेशकश उस ताहीं करी गई थी, अर जो कोरह की ढाळ मूसा नबी के अधिकार का बिरोध करण के कारण नाश होगे। 12 जिब थम परमेसवर के प्यार नै, याद करण कै खात्तर प्रीति भोज म्ह कठ्ठे होइओ सों, तो वे भी थारे म्ह शामिल हो जावै सै, तब वे उस समुन्दर म्ह लुकही होए पत्थर की चट्टान की तरियां सै, जो थारे ताहीं डूबो सकै सै। वे उस पाली की तरियां सै जो सिर्फ अपणा पेट भरै सै, अर वे बिना पाणी के बादल सै, जिन ताहीं हवा उड़ा ले जावै सै, वे पतझड़ के इसे दरखत सै, जिन म्ह कदे फळ कोनी लाग्दे, अर ये जड़ तै उखड़गे सै। 13 ये समुन्दर की तेज झाल के हिलेरे सै, जो अपणी गंदीगी का झाग उछालै सै, ये लोग शर्मनाक काम करै सै, ये उन राह तै भटके होए तारां की ढाळ सै, जो किसे नै सही राह न्ही दिखा सकदे, जिनकै खात्तर परमेसवर नै सदा खात्तर घोर अन्धकार की जगहां तय कर राख्यी सै, जड़ वो सदा खात्तर रहवैगे। (aiōn g165) 14 होनोक नै भी जो आदम की सातवीं पीढ़ी म्ह था, इन माणसां कै बाबत या भविष्यवाणी करी थी, “देक्ख्यो, प्रभु अपणे लाखां पवित्र सुर्गदूतां कै गेल्या आवैगा, 15 तो उन सब माणसां का न्याय करैगा, अर बुरे माणसां नै उनके बुरे कामां का अर दुष माणसां नै जिननै परमेसवर के बिरोध म्ह कड़वे शब्द इस्तमाल करे थे, उन ताहीं कसूरवार ठहरावैगा।” 16 ये तो बेसबरे, बड़बडाण आळे, अर अपणी मजिया कै मुताबिक लगातार बुरे काम करै सै, अर अपणे मुँह तै घमण्ड की बात बोल्लै सै, वे अपणे फायदे कै खात्तर चापलूस्सी की बात करै सै। 17 पर हे प्यारे भाईयो, थम इन बात्तां नै याद राख्यो, जो म्हरे प्रभु यीशु मसीह के प्रेरित भोत पैहल्याए कहोगे सै। 18 ये थमनै कह्या करै थे, “के प्रभु यीशु मसीह के बोहड़ण तै पैहले इसे माणस भी होवैंगे जो प्रभु का मजाक उड़ावैंगे, वे इसे माणस सै, जो अपणी बुरी अभिलाषायां कै मुताबिक जिन्दगी जिवैंगे।” 19 ये वे माणस सै, जो थारे म्ह फूट गेरै सै, अर जिन म्ह पवित्र आत्मा न्ही सै उनकी बुरी अभिलाषा, उन ताहीं अपणे बस म्ह राख्यै सै। 20 हे प्यारे बिश्वासी भाईयो, थम लगातार एक-दुसरे की बढ़ोतरी करे जाओ, अर आप्स म्ह एक-दुसरे नै सच्ची शिक्षा जिसपै थम बिश्वास करो सों, उसतै उत्साहित करदे रहों, अर जिस तरियां पवित्र आत्मा थारे ताहीं अगुवाई करै सै थम प्रार्थना करदे रहों। 21 थमनै यो जाणकै जीवन जीवा चाहिए, के परमेसवर थारे तै प्यार करै सै, अर थम उस दिन की बाट देखदे रहो जिस दिन म्हारा

प्रभु यीशु मसीह बोहड़के आवैगा ताके थमनै अनन्त जीवन मिलै, क्यूंकि उसनै म्हारे पै दया करी सै। (aiōnios g166) 22 उन माणसां पै दया करो जिनका विश्वास डामाडोल होरया सै। 23 घणखरे माणसां नै न्याय की आग तै झापट्टा मारके लिकाङो, अर दुसरे माणसां के प्रति दयालु रहों, पर इसकै साथ चौकक्स भी रहों, उस लत्ते तै भी नफरत करो जो पाप तै भरे कामां तै कलंकित हो गया सै। 24 वो एकमात्र सच्चा परमेसवर सै, जो थमनै ठोक्कर खाण तै बचा सकै सै, अर वो थमनै बेकसूर अर मग्न करके अपणे महिमा म्ह, अपणे स्याम्ही खड्या करैगा। जो प्रभु यीशु मसीह नै म्हारे खात्तर करया, उसकै जरिये परमेसवर नै म्हारे ताहीं बचाया सै। 25 म्हारा प्रभु यीशु मसीह माणसां म्ह, परमेसवर की तारीफ करण का कारण बणा, ताके वो पिच्छाण सकै, के शरुआत तै, इब अर सदा कै खात्तर शक्ति अर अधिकार उस्से का सै। आमीन। (aiōn g165)

प्रकाशित वाक्य

1 परमेसवर नै यीशु मसीह ताहीं वो गुप्त बातें दिखाई जो भोत तावठी

होण आळी सै, ताके वो अपणे दास्सां पै इन बात्तां नै जाहिर करै, उसके बाद मसीह नै सुर्गदूत भेज्या, ताके अपणे दास यूहन्ना ताहीं ये बात दिखावै। 2 यूहन्ना नै वो सब कुछ लिख लिया, जो उस ताहीं दिखाया गया था, यानी वो वचन जो परमेसवर की ओड़ तै आया था, अर जो कुछ भी मसीह यीशु नै कह्या था। 3 धन्य सै वे जो इस भविष्यवाणी के वचन नै पढ़ै सै, अर वे जो सुणै सै अर इस म्ह लिक्खी होई बात्तां नै मानै सै, क्यूँके ये बात तावठी होण आळी सै। 4 ये चिट्ठियाँ यूहन्ना की ओड़ तै असिया परदेस की सात कलीसियाओं के नाम सै। परमेसवर पिता की ओड़ तै थमनै अनुग्रह अर शान्ति मिलै, जो सै, अर जो था, अर जो आण आळा सै, अर इन सात आत्मायां की ओड़ तै जौ उसकै सिंहासन के स्थामी सै। 5 अर यीशु मसीह जो बिश्वास जोगा गवाह अर मरे होया म्ह तै जी उठण आळा म्ह तै जेटु अर धरती के राज्यां का हाकिम सै, उसकी की ओड़ तै थारे ताहीं अनुग्रह अर शान्ति मिल्दी रहवै। वो म्हारै तै प्यार करै सै, अर उसनै अपणे लहू कै जरिये म्हारै ताहीं पाप तै छुटाया सै। 6 उसनै म्हारे ताहीं वे माणस बण दिये सै, जिनका परमेसवर राजा सै, अर उसनै म्हारे ताहीं परमेसवर जो उसका पिता सै, उसका याजक बणा दिया सै, उस्से की महिमा अर पराक्रम युगानुयग रहवै। आमीन। (aiōn g165) 7 लखाओ, वो बादलां कै गेल्या आण आळा सै, अर हरेक आँख उसनै देखिएगी, बल्के जिननै उस ताहीं बेधा था, वे भी उस ताहीं देखेंगे, अर धरती के सारे कुल उसके कारण छात्ती पीटेंगे, जिब उस ताहीं देक्खेंगे। हाँ। आमीन। 8 प्रभु परमेसवर यो कहवै सै, के वो जो सै, अर जो था, अर जो आण आळा सै, जो सब तै शक्तिशाली सै, “मै अल्फा अर ओमेगा सूं।” 9 मै यूहन्ना, जो थारा बिश्वासी भाई अर मसीह कै खात्तर दुख सहण म्ह अर परमेसवर के राज्य म्ह, अर धीरज तै दुख सहण म्ह साइझी सूं, जो दुख उन माणसां पै आया सै, जिनका उसके साथ रिश्ता सै, मै पतमुस नाम कै टापू पै भेज दिया गया, क्यूँके मन्नै परमेसवर के वचन का प्रचार करया था, अर मसीह यीशु के सच्चे सन्देस ताहीं सुणाया था। 10 प्रभु के दिन, पवित्र आत्मा मेरे पै आ ग्या, अर मन्नै अपणे पाच्छै तुरी बरगा बड़ा शब्द सुण्या। 11 उसनै उसतै कह्या, के “जो कुछ तू देक्खै सै, उसनै किताब म्ह लिखकै सातु कलीसियाओं कै धोरै भेजदे, जो इन नगरां म्ह सै, यानिके इफिसुसु, स्मुरना, पिरगमुन, थुआतीरा, सरदीस, फिलदिलफिया, अर लौदीकिया ताहीं।” 12 फेर मन्नै उस ताहीं, जो मेरै तै बोल्लण लागरया था, देक्खण कै खात्तर अपणा मुँह फेरया, अर पाच्छै घूमकै मन्नै सोन्ने की सात दीवट देक्खी, 13 अर उन दीवटां कै बिचाळै माणस के डेटै कै बरगा एक आदमी देख्या, जो पायां ताहीं के लत्ते पहरे, अर छात्ती पै सोन्ने का पटुका बैंधे होड़ था। 14 उसके सिर के बाल धोळी ऊन बल्के बर्फ की ढाल जमा धोळे थे, अर उसकी आँख आग की तरियां धथकण लागरी

थी। 15 अर उसके पैर भट्टी म्ह तपा कै चमकाए होए पीताल के जिसे थे, अर उसका बोल घणे पाणी के गरजण जिसा था। 16 वो अपणे सोन्ने हाथ म्ह सात तारे लिए होड़ था, अर उसके मुँह म्ह तै पैनी दोधारी तलवार लिकड़ै थी। उसका मुँह इस ढाल बढ़े था, जिस ढाल सूरज करड़ी धूप के बखत चमकै सै। 17 जिब मन्नै उस ताहीं देख्या, तो उसके पायां पै मुर्दा की ढाल पड़ग्रया। उसनै मेरै पै अपणा सोळा हाथ, धरकै कह्या, “मतना डरै, मै पैहल्डा अर आखरी अर जिन्दा सूं।” 18 मै मरग्या था, अर इब देख मै युगानुयग जीऊँ सूं, अर मौत अर पाताळ लोक की ताळी मेरै धोरै सै। (aiōn g165, Hadēs g86) 19 इस करकै जो बात तन्नै देक्खी सै अर जो बात होण लागरी सै अर जो बात इसकै पाच्छै होण आळी सै, उन सारियां नै लिख ले। 20 इब मै उन सात तारां का भेद जिन ताहीं तन्नै मेरै सोळे हाथ म्ह देख्या था अर उन सोन्ने की दीवटां का भेद तन्नै बताऊँ सूं वे सात तारे सातु कलीसियाओं के धोरै भेज्जे गये सुर्गदूत सै, अर वे सात दीवट, सात कलीसिया सै।

2 उसनै मेरे ताहीं यो भी कह्या के इफिसुस नगर की कलीसिया के सुर्गदूत नै न्यू लिखि के, “जो सातु तारे अपणे सोळे हाथ म्ह लिए होड़ सै, अर सोन्ने की सातु दीवटां कै बिचाळै हाँडै सै, वो न्यू कह्है सै” 2 के मै तेरे काम, अर मेहनत, अर तेरा धीरज जाणु सूं, अर मै जाणु सूं, के तू बुरे माणसां की शिक्षा नै सह न्ही सकदा, अर जो अपणे-आपनै प्रेरित कहवै सै, अर सै न्ही, उन ताहीं तन्नै परख कै झूँठा पाया। 3 अर तू धीरज धरै सै, अर मेरै नाम कै खात्तर दुख ठा-ठाकी भी तन्नै मेरी सेवा कराणा न्ही छोड़ा। 4 पर मन्नै तेरे खिलाफ म्ह न्यू कहणा सै, के तेरे म्ह वो प्यार न्ही रह्या जो तू पैहले मेरै तै कै करै था। 5 यो याद कर के तन्नै शरु म्ह मेरै तै किसा प्यार करया था, अर इब उसा प्यार न्ही करदा, तू पाप करणा छोड़ दे, अर जिसा तन्नै शरु म्ह मेरै तै प्यार करया था उसाए प्यार कर, अर जै तू पाप करणा न्ही छोड़ैगा, तो मै तेरे धोरै आकै तेरी दीवट नै उस जगहां तै हटा दियुँगा। 6 पर हाँ, तेरे म्ह या बात तो सै, के तू नीकुलइयों के कामां तै नफरत करै सै, जिननै मै भी नफरत करै सूं। 7 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै: वे लोग जो बुराई की ताकत पै जीत पावै सै, मै जीवन कै दरखत म्ह तै जो जीवन देवै सै, जो सुर्गलोक म्ह सै, उस ताहीं उस फल म्ह तै खाण नै दियुँगा। 8 अर उसनै मेरे ताहीं स्मुरना नगर की कलीसिया के सुर्गदूत ताहीं यो लिखण खात्तर कह्या, के, जो पैहल्डा अर आखरी सै, जो मर लिया था अर इब जिन्दा होण्या सै, वो न्यू कह्है सै के, 9 मै तेरे क्लेश अर गरीबी नै जाणु सूं, (पर तू साहूकार सै), अर जो माणस अपणे-आप ताहीं यहूदी कहवै सै, अर सै न्ही, पर वो शैतान के झुण्ड म्ह तै सै, मै उनकी बुराई नै भी जाणु सूं। 10 यो दुख तन्नै झोलणे होंगे, उनतै मत घबरा, क्यूँके देक्खो, शैतान अपणे माणसां के जरिये थारे म्ह तै कितन्यां ताहीं जेळखान्ने म्ह गेरैगा, ताके थम परखे जाओ, अर थारे ताहीं दस दिन तक क्लेश ठाणा पड़ैगा। जान देण तक बिश्वासी रह, तो मै थारी जीत के कारण ईनाम के तौर पै थमनै अनन्त

जिन्दगी देंड़गा। 11 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै, वे लोग जो बुराई की ताकत पै जीत पावै सै, उसनै दुसरी मौत तै नुकसान कोनी होवैगा। 12 अर उसनै मेरे ताहीं पिरगमन नगर की कलीसिया के सुर्गदूत ताहीं यो लिखण खात्तर कह्या, के, “जिसकै धोरै दोधारी अर पैन्नी तलवार सै, वो न्यू कहवै सै” 13 के मन्नै न्यू तो बेरा सै, तू ओड़े रहवै सै जित्त शैतान का राज सै, अर मेरै नाम पै स्थिर रहवै सै, अर मेरै पै बिश्वास करण तै उन दिनां म्ह भी पाच्छे न्ही हट्या जिन म्ह मेरा बिश्वास जोगा गवाह अन्तिपास, तेरे नगर म्ह उस जगहां पै मारया गया जित्त शैतान रहवै सै। 14 पर मन्नै तेरे खिलाफ म्ह न्यू कहणा सै, थम उन माणसां का बिरोध कोनी करदे, जो पुराणे जमानै के नबी बिलाम की तरियां झूँझी शिक्षा सिखावै सै, बिलाम नै राजा बालाक ताहीं यो सिखाया, के इसाएल के माणसां तै पाप करवाण के खात्तर के करणा चाहिए, के वे इम्तिहान म्ह पङ्डे, अर पाप कर बैठै। उसनै उन ताहीं मूर्तियाँ के आगै चढ़ाई होड़ चिज्जां ताहीं खाणा अर अनैतिक जिन्दगी जीणा सिखाया। 15 उस्से तरियां-ए तेरे उरै कितने तो इसे सै, जो नीकुलइयों की शिक्षा नै मानै सै। 16 इस करकै पाप करणा छोड़ दे, न्हीं तो मै तेरे धोरै तावला-ए आऊँगा, अर झूँझी शिक्षा देण आळे उन माणसां के खिलाफ अपणे मुँह तै लिकडण आळी उस तलवार तै लड़ूँगा, जो के मेरा वचन सै। 17 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै, वे लोग जो बुराई की ताकतां पै जीत पावै सै, उस ताहीं मै गुप्त मन्ना म्ह तै दियुँगा, अर उस ताहीं एक धोळा पत्थर भी दियुँगा, अर उस पत्थर पै एक नाम लिखा होया होगा, जिस ताहीं उसकै पाण आळे कै सिवाए और कोए न्हीं जाएगा। 18 अर उसनै मेरे ताहीं थुआतीरा नगर की कलीसिया के सुर्गदूत ताहीं यो लिखण खात्तर कह्या, के, मै परमेसवर का बेटा, जिसकी आँख आग की ज्वाला की तरियां, अर जिसके पैर बढ़िया पीतळ कै जिसे सै, न्यू कहूँ सूँ, के 19 मै तेरे काम, तेरे प्यार, बिश्वास, सेवा, अर धीरज नै जाणु सूँ अर न्यू भी जाणु सूँ, के तेरे पाच्छले काम पैहलड़ा तै बढ़कै सै, जिब तन्नै मेरे पै बिश्वास करया था। 20 पर मन्नै तेरे खिलाफ न्यू कहणा सै, के तू उस जनानी इजेबेल नै रहण देवै सै, जो अपणे-आपनै नी की कहवै सै, अर मेरै दास्सां नै जारी करण, अर मूर्तियाँ के आगै चढ़ाई होड़ चीज नै खाणा सिखाकै भकावै सै। 21 मन्नै उस ताहीं पाप छोड़ण का मौका दिया, पर वा अपणे जारीपणे के पाप नै छोड़णा कोनी चाहन्दी। 22 मै उस ताहीं बीमार कर दियुँगा। अर जो उसकै गेल्या जारी करै सै, जै वे भी उसकै बरगे कामां नै जो वा करै सै करणा न्हीं छोड़ेंगे, तो उन्नै मै भारया दण्ड दियुँगा। 23 अर मै उसके चेल्यां नै मार दियुँगा, अर फेर सारी कलीसिया नै बेरा पाट जावैगा, के हृदय अर मन जाँचण आळा मै ए सूँ अर मै थारे म्ह तै हेरेक नै उसकै कामां कै मुताबिक बदला देंड़गा। 24 पर थम जो थुआतीरा के बाकी लोग जिननै इस झूँझी शिक्षा ताहीं न्हीं मान्या, अर उन बातां नै जिन नै शैतान की गहरी बात कहवै सै,

उन म्ह भाग न्हीं लेते, मै न्यू कहूँ सूँ, के मै थारे ताहीं और हुकम कोनी दियुँगा, पर मै जिब तक ना आ जाऊँ मेरे पै मजबुत्ती तै बिश्वास करते रहों। 25 पर हाँ, जो थारे धोरै सै उसनै मेरै आण तक थाम्बे रहो। 26 वे लोग जो बुराई की ताकतां पै जीत पावै सै, अर मेरे कामां कै मुताबिक आखरी ताहीं करदा रहवै, मै उसनै देश-देश के माणसां पै राज करण का हक देंड़गा। 27 मै उसनै भी राज करण का वोए हक देंड़गा जो मेरे पिता नै मेरे ताहीं दिया सै, वो उनपै बिना दिया के राज करैगा, अर वो उन ताहीं चकणाचूर कर देवैगा, जिस ढाळ कुम्हार के माट्टी के बासण चकणाचूर हो जावै सै। अर मन्नै भी इसाए हक अपणे पिता तै मिल्या सै। 28 अर मै उसनै भोर का तारा देंड़गा। 29 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै।

3 उसनै मेरे ताहीं यो भी कह्या के सरदीस नगर की कलीसिया के सुर्गदूत नै लिख, के “जिसकै धोरै परमेसवर की सात आत्मा अर सात तारे सै, वो न्यू कहवै सै”, के मै तेरे कामां नै जाणु सूँ, के तू मेरा बिश्वास लायक बिश्वासी तो कुहावै सै, पर असल म्ह तन्नै मेरा कहणा मानाना छोड़ दिया सै। 2 इस करकै सावधान हो जा, अर अपणे बिश्वास नै जो मेरे पै सै उसनै मजबूत कर, क्यूँके तेरे म्ह थोड़ा-सा ए बिश्वास बाककी सै, ताके तेरा बचा होड़ बिश्वास भी ना जान्दा रहवै, मै जाणु सूँ के तेरे काम अथेरै सै, पर तेरे कामां तै, जो तू करण लागरया सै परमेसवर खुश कीनी। 3 इस करकै याद कर, के तन्नै किस तरियां तै शिक्षा पाई अर सुणी थी, अर उस म्ह बण्या रह, अर पाप करणा छोड़ दे। जै तु जागदा न्हीं रहवैगा, तो मै चोर की ढाळ आ जाऊँगा अर तन्नै कदे भी न्हीं बेरा पाट्टैगा, के मै किस बखत तेरे पै आण पट्टैगा। 4 पर हाँ, तेरे धोरै सरदीस म्ह कुछ लोग सै, जो पाप के जरिये अशुद्ध कोनी होए, वे धोळे लत्ते पहरे होड़ मेरै गैल हाँडैंगे क्यूँके वे इस लायक सै। 5 वे लोग जो बुराई की ताकत पै जीत पावै सै, उस ताहीं इस्से ढाळ धोळे लते पिहराए जावैंगे, अर मै उसका नाम जीवन की किताब म्ह तै किसे तरियां तै भी न्हीं काढ़ाँग, पर उसका नाम अपणे पिता अर उसके सुर्गदूतां कै स्याम्ही मान ल्यूँगा के ये मेरे लोग सै। 6 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै। 7 अर उसनै मेरे ताहीं यो भी कह्या सै, के फिलदिलफिया नगर की कलीसिया के सुर्गदूत नै न्यू लिख के जो कहवै सै, मै पवित्र अर सच्चा सूँ, अर मेरे धोरै वा ताकी सै, जो राजा दाऊद की सै, जिब मै ताकी लेकै दरबाजा खोल्लू सूँ, तो उसनै कोए बन्द न्हीं कर सकता, जिब मै ताकी लेकै दरबाजा बन्द करूँ सूँ, तो उसनै कोए खोल न्हीं सकता, वो तेरे तै कुहावै सै के, 8 मन्नै तेरे कामां का बेरा सै, देख, मै जाणु सूँ के तेरे म्ह भोत कम काबलियत सै, पर तन्नै वा बात मान्नी सै जिसके बारें म्ह मन्नै तेरे ताहीं कह्या था, अर तन्नै इस बात का इन्कार न्हीं करया के तू मेरे पै बिश्वास करै सै, इस करकै मन्नै एक दरबाजा खोल्या सै, जिसनै कोए बन्द न्हीं कर सकदा। 9 देख, जो शैतान के झुण्ड म्ह तै सै, अर खुद नै यहूदी कहवै सै, पर सै न्हीं, बल्के झूठ बोल्लै सै, देख,

मै इसा करुँगा, के वे आके तेरे पायां म्ह मोथ्थे पड़ैंगे, अर न्यू जाण लेवैंगे, के मनै तेरे तै प्यार करया सै। 10 क्यूँके जिब तेरे ताहीं सताया जाण लागरया था, तो तनै मेरे वचन तहीं धीरज तै पुगया सै, उसकी बजह तै मै भी तनै इम्तिहान कै उस बखत म्ह बचा के राक्खुँगा, जो धरती पै रहण आळे माणसां नै परखण कै खात्तर साब्दी दुनिया पै आण आळा सै। 11 मै तावठा-ए आण आळा सूँ, अपणे बिश्वास म्ह मजबूत बणो, ताके कोए थमनै थारा इनाम लेण तै रोक ना पावै। 12 वे लोग जो बुरई की ताकत पै जीत पावै सै, उन ताहीं मै अपणे परमेसवर कै मन्दर म्ह खम्बा बणाऊँगा, वो फेर कदे बाहरणै न्ही लिकड़ैंगे, अर मै अपणे परमेसवर का नाम, अर अपणे परमेसवर के नगर, यानिके नये यशस्वलेम का नाम, जो मेरै परमेसवर की ओड़ तै सुर्ग पै तै उतरण आळा सै, अर अपणा नया नाम उसपै लिखूँगा। 13 जिसके कान हाँ, ध्यान तै सुण ले के परमेसवर का आत्मा कलीसिया तै के कहवै सै। 14 अर उसनै मेरे ताहीं यो भी कह्या सै, के “लौदीकिया नगर की कलीसिया के सुर्गदूत नै न्यू लिख” के, जो आमीन, अर बिश्वास जोगा, अर सच्चा गवाह सै, अर परमेसवर की सृष्टि का खास कारण सै, वो न्यू कहवै सै। 15 के मै तेरे काम्मा नै जाणु सूँ के तू उस पाणी की ढाळ सै, जो ना तो शीळा सै अर ना तात्ता, आच्छा था के तू इन म्ह तै एक होन्डा 16 क्यूँके तू गुणगुणा सै, अर ना शीळा अर ना तात्ता, मै तनै अपणे मुँह म्ह तै उगळण पै सूँ। 17 तू जो कहवै सै, के मै धनी सूँ, अर धनवान होण्या सूँ, अर मनै किसे चीज का घाडा न्ही, अर न्यू न्ही जाप्दा, के तू निरभाग, नीच, कंगाल, आन्था, अर उधाडा सै। 18 इस करकै मै तनै राय दियुँ सूँ, के आग म्ह त्याया होड़ सोन्ना मेरै तै मोल ले, के तू साहूकार हो जावै, अर धोळा लत्ता लै-ल्ते के पहर कै तनै अपणे उघाडेपण पै शर्म न्ही आवै, अर अपणी आँखां म्ह लाण कै खात्तर सुरमा ले, के तू देक्खण लागै। 19 मै जिस-जिसतै प्यार राक्खूँ सूँ, उन सारया ताहीं उल्हाणा अर ताड़ा दियुँ सूँ, इस करकै हिम्मत राख, अर पाप करणा छोड़ दे। 20 देख, मै दरबाजे पै खड्डा होया खटखटाऊँ सूँ, जै कोए मेरा बोल सुणकै दरबाजा खोल्लैगा, तो मै उसकै धोरै भित्तर आके उसकै गेल्या खाऊँगा, अर वो मेरै गेल्या। 21 जो जीत पावै, मै उस ताहीं अपणे गेल्या अपणे सिंहासन पै बिठाऊँगा, जिसा मै भी जीत पाकै, अपणे पिता कै गेल्या उसकै सिंहासन पै बैठ गया। 22 जिसके कान हाँ, वो ध्यान तै सुण लेवै के परमेसवर का आत्मा कलीसिया तै के कहवै सै।

4 इन बात्तां कै पाच्छै जो मनै निगाह करी, तो के देक्खूँ सूँ के सुर्ग म्ह एक दरबाजा खुल्या होया सै, अर ओड़ कोए था जो मेरै तै बात करण लागरया था, अर जो बात करण लागरया था, वो वो था जिसनै मेरै तै पैहले बात करी थी, अर जिसकी आवाज तुरही के शब्द की तरियां थी, अर उसनै मेरै तै कह्या, के “उरै ऊपरान आ ज्या, अर मै वे बात तनै दिखाऊँगा, जिनका इन बात्तां कै पाच्छै पूरा होणा जसरी सै।” 2 अर जिबे पवित्र आत्मा मेरै पै आ ग्या, अर मै के देक्खूँ सूँ के एक सिंहासन सुर्ग म्ह सै, अर उस सिंहासन पै कोए बेठ्या सै। 3 अर जो उसपै बेठ्या

सै, उसकी चमक सूर्यकान्त मणि अर माणिक्य पत्थर के समान थी, अर उस सिंहासन कै चौगरदेकै मेघ-धनुष था, उसकी चमक पन्ने के समान की थी। 4 अर उस सिंहासन कै चौगरदेकै चौबीस सिंहासन सै, अर इन सिंहासनां पै चौबीस बुजुर्ग थोळे लत्ते पहरे होड़ बेटै सै, अर उनके सिरां पै सोने के ताज सै। 5 अर उस सिंहासन म्ह तै बिजली चमकण की अर गरजण की आवाज आण लागरी थी, अर सिंहासन कै स्याम्ही आग के सात दिवें जलण लागरे सै, जो के परमेसवर की सात आत्मा सै। 6 अर उस सिंहासन कै स्याम्ही पारस था जो के समुंदर जिसा चौडा था, अर शीशे जिसा साफ था, सिंहासन कै बिचाळै अर सिंहासन कै चौगरदेकै चार प्राणी सै, जिनकै आगै-पाच्छै आँखे-आँख सै। 7 पैहला प्राणी शेर कै बरगा सै, अर दुसरा प्राणी का मुँह बल्ध कै बरगा सै, तीसरे प्राणी का मुँह माणस कै बरगा सै, अर चौथा प्राणी उड़दे होड़ उकाब कै बरगा सै। 8 अर च्यारु प्राणियां कै छः, छः: पंख सै, उनकै उपर अर हरेक जगहां ए आँख थी, बल्के पंखां के तळे थी, अर वे दिन-रात बिना आराम करे न्यू कहवै सै, के पवित्र, पवित्र, पवित्र प्रभु परमेसवर, जो सब तै शक्तिशाली था, अर जो था, जो सै, अर जो आण आळा सै। 9 अर जिब वे प्राणी उसकी जो सिंहासन पै बेठ्या सै, अर जो युगानुयुग जीवै सै, महिमा अर आदर अर धन्यवाद करैंगे, (aiōn g165) 10 फेर सब चौबीस बुजुर्ग सिंहासन पै बैठण आळे कै स्याम्ही पड़ जावैंगे, अर उस ताहीं जो युगानुयुग जीवै सै प्रणाम करैंगे, अर अपणे-अपणे ताज सिंहासन कै स्याम्ही न्यू कहन्दे होए धर देवैंगे। (aiōn g165) 11 “हे महरे प्रभु अर परमेसवर, तू-ए महिमा, अर आदर, अर सामर्थ कै जोगा सै, क्यूँके तनै ए सारी चिज्जां ताहीं बाण्या अर वे तेरी-ए मर्जी तै थी अर रची गई।”

5 अर जो सिंहासन पै बेठ्या था, मनै उसकै सोळे हाथ म्ह एक किताब देक्खी, जो भीत्तर अर बाहरणै लिक्खी होड़ अर वा सात मोंहर लाकै बन्द करी गई थी। 2 फेर मनै एक शक्तिशाली सुर्गदूत ताहीं देख्या, जो जोर तै बोलण लागरया था, के इस किताब कै खोल्लण अर उसकी मोंहर तोडण कै जोगा कौण सै? 3 पर ना सुर्ग म्ह, ना धरती पै, ना धरती कै तळे कोए उस किताब नै खोल्लण या उस ताहीं पढण लायक कोए न्ही मिल्या। 4 अर मै फूट-फूटकै रोण लाग्या, क्यूँके उस किताब ताहीं खोल्लण, या उस ताहीं पढण लायक कोए न्ही मिल्या। 5 फेर उन बुजुर्गा म्ह तै एक नै मेरै तै कह्या, मतना रोवै, लखा, यहूदा कै गोत्र का वो शेर, जो दाऊद का मूल सै, उस किताब नै खोल्लण अर उसकी सातु मोंहर तोडण कै खात्तर जयवन्त होया सै। 6 फेर मनै उस सिंहासन अर च्यारु प्राणियां अर उन बुजुर्गा कै बिच्छाळै, मान्नो एक मारया होड़ मेमां खड्डा देख्या जो पैहले रम ग्या था, पर इव वो जिन्दा होण्या सै, उसकै सात सींग अर सात आँख थी, ये परमेसवर की सातु आत्मा सै, जो साब्दी धरती पै भेज्जी गई सै। 7 उसनै आकै उसकै सोळे हाथ तै जो सिंहासन पै बेठ्या था, वा किताब ले ली, 8 अर जिब उसनै किताब ले ली, तो वे च्यारु प्राणी अर सब चौबीस बुजुर्ग उस मेम्ने कै स्याम्ही झुकगे, अर हरेक हाथ म्ह वीणा अर धूप तै भरे

होड़ सौने के कटोरे थे, ये तो पवित्र माणसां की प्रार्थना सै। 9 अर वे यो नया गीत गाण लागे, के तू इस किताब कै लेण, अर उसकी मोहरां नै खोल्लण जोगमा सै, क्यूँके तनै मरकै अपणे लहू तै हरेक कुल, अर भाषा, अर माणस, अर जात म्ह तै परमेसवर कै खात्तर माणसां ताहीं मोल लिया सै। 10 अर उन ताहीं म्हारे परमेसवर कै खात्तर एक राज्य अर याजक बणाया, ताके वो परमेसवर की सेवा करै, अर वे धरती पै राज्य करै सै। 11 अर जिब मन्नै देख्या, तो उस सिंहासन अर उन प्राणियाँ अर उन बुजुर्गा कै वौगरदेकै अगणित सुर्गदूतां का बोल सुण्या, जिनकी गिणती लाक्खां अर करोड़ां की थी। 12 अर वे ऊँच्ची आवाज म्ह गाण लागरे थे, के मारया होया मेम्ना ए सामर्थ, धन, ज्ञान, ताकत, आदर, महिमा, अर धन्यवाद कै लायक सै। 13 फेर मन्नै सुर्ग म्ह, धरती पै, अर धरती कै तलै, अर समुद्र की सारी बणाई होड़ चिज्जां नै, अर सारा किमे, जो उन म्ह सै, उन ताहीं न्यू कहन्दे सुण्या, के “जो सिंहासन पै बेठ्या सै, उसका, अर मेम्ने का धन्यवाद हो, मेम्ना ए सामर्थ, धन, ज्ञान, ताकत, आदर, महिमा के लायक सै, अर उसका राज्य, युगानुयुग रहवै।” (aiōn g165) 14 अर च्यारु प्राणियाँ नै आपीन कह्या, अर बुजुर्गा नै झुककै प्रणाम कर्यावा।

6 फेर मन्नै देख्या, के मेम्ने नै उन सातु मोहरां म्ह तै एक ताहीं खोल्या, अर उन च्यारु प्राणियाँ म्ह तै एक का गरजण जिसा शब्द सुण्या, के आ जाओ। 2 अर मन्नै निगांह करी, अर देक्खो, मन्नै एक धोळा घोड़ा देख्या, अर उसका सवार धनुष लिए होड़ सै, अर उस ताहीं एक ताज पिहराया गया, अर वो सुर्ग तै चाल्या अर धरती पै लिकडा, जो पैहले तै ए जीत चुका सै, अर फेर तै वो जीत जावैगा। 3 अर जिब मेम्ने नै दुसरी मोंहर खोल्ली, तो मन्नै दुसरे प्राणी ताहीं न्यू कहन्दे सुण्या, के आ। 4 फेर एकदम तै एक और घोड़ा लिकड्या, जो लाल रंग का था, उसकै सवार ताहीं यो हक दिया गया, के धरती पै तै मेळ-मिलाप ठा ले, ताके माणस एक-दुसरे नै मारै, अर उस ताहीं एक बड़ी तलवार दी गई थी। 5 अर जिब उसनै तीसरी मोंहर खोल्ली, तो मन्नै तीसरे प्राणी ताहीं न्यू कहन्दे सुण्या, के “आ” अर मन्नै निगांह करी, अर देक्खो, मन्नै एक काले घोड़े ताहीं लिकड्दे देख्या, अर उसकै सवार कै हाथ म्ह एक ताखड़ी सै। 6 अर मन्नै उन च्यारु प्राणियाँ कै विचालै तै एक शब्द न्यू कहन्दे सुण्या, के एक दीनार एक दिन की मजदूरी भोत सै, एक किलो गेहूँ, या तीन किलो जौ लेण खात्तर, पर तेल अर अंगूर के रस की किम्मत ना बदलिये। 7 अर जिब मेम्ने नै चौथी मोंहर खोल्ली, तो मन्नै चौथे प्राणी का बोल न्यू कहन्दे सुण्या, के आ। 8 अर मन्नै निगांह करी, अर देक्खो, एक पीढ़ा-सा घोड़ा सै, अर उसकै सवार का नाम मौत सै: अर अधोलोक उसकै पाछ्है-पाछ्है आण लागराया था, अर उन ताहीं धरती पै रहण आळे चार माणस (या एक चौथाई माणसां) म्ह तै एक-एक ताहीं माणर का हक मिल्या, उननै तलवार, भूख, बीमारी, अर धरती के जंगली-जानवरां कै जरिये माणसां ताहीं मार दिया। (Hades g86) 9 अर जिब मेम्ने नै पाँचवी मोंहर खोल्ली, तो मन्नै वेदी कै तलै

उनके प्राणां ताहीं देख्या, जो परमेसवर कै वचन कै कारण, अर उसपै विश्वास करण कै कारण मारे गये थे। 10 अर उसनै जोर तै रुक्का मारकै परमेसवर तै कह्या, हे माल्लिक, हे पवित्र, अर सच्चे प्रभु, तू इतनी बाट क्यूँ देख्य लागरया सै, उन बुरे माणसां ताहीं दण्ड देण खात्तर, जो इस धरती पै रहण लागरे सै? हम तेरे तै बिनती करां सां, के तू उन माणसां तै बदला ले, जिननै म्हारे ताहीं जान तै मार दिया सै। 11 अर उन म्ह तै हरेक ताहीं थोळे लत्ते देकै, परमेसवर नै उनतै कह्या, के और थोड़ी-देर ताहीं आराम करो, जिब ताहीं के थारे संगी दास, अर विश्वासी भाई, जो थारी तरियां मरण आळे सै, उनकी भी गिणती पूरी ना हो लेवै। 12 जिब मेम्ने नै छठी मोंहर खोल्ली, तो मन्नै देख्या, के एक बड़ा हाल्लण होया, अर सूरज का रंग मोट्टे काले काम्बल की ढाळ काठा पड़ग्या, अर पूरा चाँद लहू जिसा लाल होग्या। 13 अर अकास के तारे धरती पै इस ढाळ पड़गे जिस तरियां आँधी तै हालकै अंजीर कै दरखत म्ह तै काच्चे फल झाँड़ैं सै। 14 आसमान पाटग्या अर एक किताब की ढाळ सुकड़ ग्या था, अर हरेक पहाड़, अर टापू अपणी-अपणी जगहां तै हटेग। 15 अर इसका नितिज्जां यो होया कै, धरती के राजा, प्रधान, सरदार, साहूकार, अर सामर्थी माणस, हरेक गुलाम, अर हरेक आजाद माणस, पहाड़ों की खोड़ म्ह, अर चट्टानां म्ह जा लुह्के। 16 अर पहाड़ों, अर चट्टानां तै कहण लागे, के “म्हारे ताहीं लटको ल्यो, अर म्हारै ताहीं उसकै मुँह तै यो जिंहासन पै बेठ्या सै, अर मेम्ने कै प्रकोप तै लटको ल्यो। 17 क्यूँके उनकै प्रकोप के भयानक दिन जिब परमेसवर अर मेम्ना उन साराया का न्याय करैगा तो कोए भी उननै दण्ड तै बचा न्ही पावैगा।”

7 उसकै पाच्छै मन्नै दुनिया कै च्यारु कुण्यां पै चार सुर्गदूत खड़े देक्ख्ये, उन सुर्गदूतां नै परमेसवर तै यो हक मिल्या था, के वे दुनिया के माणसां ताहीं मरी तै मारै, चाहे वे धरती पै हो या समुन्दर पै हो, उननै हवा ताहीं धरती के च्यारु कुण्यां पै तै रोक राख्या था, ताके हवा धरती, समुन्दर, या किसी भी जंगल तै ना गुजरे, 2 अर मन्नै एक और सुर्गदूत ताहीं पूरब दिशा की ओड़ आन्दे देख्या, उसके हाथ म्ह परमेसवर की ओड़ तै एक मोंहर थी, जो युगानुयुग जिन्दा सै, उस सुर्गदूत नै ऊँच्ची आवाज म्ह दुसरे चार सुर्गदूतां तै यो कह्या। 3 जिब ताहीं हम अपणे परमेसवर के दास्सां कै माथै पै मोंहर न्ही ला देवां, जद ताहीं धरती अर समुन्दर अर दरखां ताहीं नुकसान ना पोहोर्वाईयो। 4 अर जिब सुर्गदूतां नै मोंहर लगा ली, तो किसे नै मेरे ताहीं बताया के एक लाख चवालीस हजार पै मोंहर लगा दी गई सै, ये सारे लोग इसाएल के बारहां गोत्र म्ह तै सै। 5 यहूदा के गोत्र म्ह तै बारहा हजार पै मोंहर दी गई, रुबेन के गोत्र म्ह तै बारहा हजार पै, गाद के गोत्र म्ह तै बारहा हजार पै, नप्ताली के गोत्र म्ह तै बारहा हजार पै, मनशिश्व के गोत्र म्ह तै बारहा हजार पै। 7 शमैन के गोत्र म्ह तै बारहा हजार पै, लेवी के गोत्र म्ह तै बारहा हजार पै, इस्साकार के गोत्र म्ह तै बारहा हजार पै। 8 जबूलून के गोत्र म्ह तै बारहा हजार पै, यूसुफ के गोत्र

म्ह तै बारहा हजार पै अर बिन्यामीन के गोत्र म्ह तै बारहा हजार पै मोंहर दी गई। 9 इसकै पांचौ मन्त्रे निगांह करी, अर देक्खो, हरेक जात, अर कुल, अर माणस अर भाषा म्ह तै एक इसी बड़ी भीड़, जिस ताहीं कोए गिण न्ही सकै था थोले लते पैहेरे, अर अपणे हाथां म्ह खजूर की डाढ़ी लिए होए सिंहासन कै स्याम्ही अर मेम्ने कै स्याम्ही खड़ी सै। 10 अर जोर तै रुक्का मारकै कहवै सै, के उद्धार म्हारे परमेसवर जो सिंहासन पै विराजमान सै, अर मेम्ने की ओड़ तै आवै सै। 11 अर सारे सुर्गदूत, उस सिंहासन, बुजुर्गा अर च्यारु प्राणियाँ कै चौगरदेके खड़े सै, फेर वे सिंहासन कै स्याम्ही मुँह कै बल पड़गे, अर परमेसवर ताहीं प्रणाम करकै कह्वा, म्हारै परमेसवर की बड़ाई, 12 महिमा, ज्ञान, धन्यवाद, आदर, सामर्थ, अर ताकत युगानुयग बणी रहवै। आर्मीन। (aion g165)

13 इसपै बुजुर्गा म्ह तै एक नै मैरै तै कह्वा, के तू जाणै सै, के या थोळी पोशाक पैहेरे होए कौण सै? अर कित तै आये सै? 14 मन्त्रे उसतै कह्वा, “हे मालिक, तन्नै ए बेरा सै!” उसनै मैरै तै कह्वा, “ये वे सै, जो उस बड़े कळेश म्ह तै लिकड़े कै आये सै, इन्है अपणे-अपणे लते मेम्ने कै लहू म्ह थोकै थोले करे सै!” 15 इस्से कारण वे परमेसवर कै सिंहासन कै स्याम्ही खड़े सै, अर परमेसवर कै घर म्ह दिन-रात उसकी सेवा करै सै, अर जो सिंहासन पै बेठा सै, वो उन म्ह रहवैगा अर उन ताहीं बचावैगा। 16 वे इब ना तो कदे भूक्खे होवैंगे अर ना तिसाए, अर ना तो सूरज की गर्मी उन ताहीं द्युलासवैगी अर ना कोए दुसरी गर्मी। 17 क्यूँकै जो मेम्ना सिंहासन कै बिचालै सै वो उनकी रुखाली करैगा, अर उन ताहीं जीवन रुपी पाणी के चोवै कै धोरै ले जाया करैगा, अर परमेसवर उनकी आँखाँ तै सारे आँसू पुंज देवैगा।

8 अर जिब मेम्ने नै सातमी मोंहर खोल्ली, तो सुर्ग म्ह आध्ये घटे ताहीं सन्नाटा छा गया। 2 अर मन्त्रे उन सात्तु सुर्गदूतां ताहीं जो परमेसवर कै स्याम्ही खड़े रहवैं सै, देख्या, अर उन ताहीं सात तुरही दी गई। 3 फेर एक और सुर्गदूत सोन्ने का धूपदान लिए होड़ आया, अर वेदी कै लोवै खड़ा होया, अर उस ताहीं भोत सारी धूप दी गई, ताके वो उस ताहीं सारे पवित्र माणसां कै प्रार्थना कै साथ उस सोन्ने की वेदी पै भेट चढ़ावै जो सिंहासन कै स्याम्ही सै। 4 अर सुर्गदूतां कै हाथ म्ह लिये होए उस धूपदान का थुमा, पवित्र माणसां की प्रार्थना कै साथ परमेसवर कै धोरै उप्पर पोहच ग्या। 5 अर सुर्गदूत नै धूपदान लेकै उस म्ह वेदी की आग भरी, अर उस ताहीं धरती पै गेर दी, अर गरजण गड़ग़ाहट, बिज़ली चमकी अर हाल्लण होण लाग्या। 6 फेर वे सात्तु सुर्गदूत जिनकै धोरै सात तुरही थी, उन ताहीं फुक्कण खात्तर त्यार होए। 7 पैहले सुर्गदूत नै तुरही फूक्की, अर लहू तै मिले होड़ ओले अर आग पैदा होई, अर धरती पै गेरी गई, अर धरती का एक तिहाई हिस्सा ज़ल्ग्या, अर दरखां का तीसरा हिस्सा ज़ल्ग्या, अर सारी हरी धास भी ज़ल्गी। 8 जिब दुसरे सुर्गदूत नै तुरही फूक्की, तो मान्नो आग जिसा ज़ल्दा होया एक बड़ा पहाड़ समुन्दर म्ह गेरया ग्या, अर समुन्दर का एक तिहाई हिस्सा लहू म्ह होया। 9 अर समुन्दर की एक तिहाई बणाई होड़ चीज जो जिन्दी

थी मरगी, अर जहाज के तीसरे हिस्से का नाश होया। 10 अर तीसरे सुर्गदूत नै तुरही फूक्की, अर एक बड़ा तारा जो मशल की ढाल ज़लै था, सुर्ग तै टूट्या, अर नदियाँ कै तीसरे हिस्से पै, अर पाणी के चोवां पै आण पड़या। 11 उस तारे का नाम नागदौना सै, अर एक तिहाई हिस्से का पाणी नागदौना बरगा कड़वा होया, अर घणखरे माणस उस पाणी कै कड़वे हो जाण तै मरये। 12 अर चौथे सुर्गदूत नै तुरही फूक्की, अर सूरज का एक तिहाई हिस्सा, अर चाँद का एक तिहाई हिस्सा अर तारा कै एक तिहाई हिस्से पै आफक्त आई, ताके उनका एक तिहाई हिस्सा अन्धेरे म्ह ढूब जावै, अर दिन कै एक तिहाई हिस्से म्ह चाँदणा न्ही रहया, अर उसे तरियां एक तिहाई रात भी बिना चाँदणे की हो गई। 13 जिब मन्त्रे फेर देख्या, तो अकास कै बिचालै एक उकाब ताहीं उड़दे अर ऊँच्ये शब्द तै न्यू कहदे सुण्या, “उन तीन सुर्गदूतां की तुरही के शब्दां कै कारण, जिनका फूक्कण इब्बे बाक्की सै, धरती के बासिन्द्यां पै धिक्कार सै, धिक्कार, धिक्कार”

9 जिब पाँचमै सुर्गदूत नै तुरही फूक्की, तो मन्त्रे सुर्ग तै धरती पै एक ताली दी गई। (Abyssos g12) 2 अर उसनै घणे अथाह कुण्ड की खोल्या, अर कुण्ड म्ह तै बड़ी भट्टी जिसा धुम्मा उठ्या, अर कुण्ड कै धुम्मै तै सूरज अर आसमान म्ह अन्धेरा छाय्या। (Abyssos g12) 3 अर उस धुम्मै म्ह भोत सारी टिड्डी लिकड़ी अर वे सारी धरती पै फैलगी, अर उन ताहीं बिच्छुआ की तरियां माणसां कै लड़ण की शक्ति दी गई। 4 अर उनतै कह्वा गया, के ना धरती की धास ताहीं, ना किसे हरियाली ताहीं, ना किसे दरखत ताहीं नुकसान पोहोचाओ, सिर्फ उन माणसां ताहीं नुकसान पोहोचाओ, जिनकै माथ्यै पै परमेसवर की मोंहर कोनी। 5 अर उनकी जान लेण का तो न्ही, पर पाँच महिन्ना तक माणसां ताहीं दर्द देण का हक दिया गया, अर उनका दर्द इसा था, जिसा बिच्छु कै डंक मारण तै माणस का होवै सै। 6 उन पाँच महिन्ना म्ह माणस मरण के तरिकें टोहवैंगे, वे मरणा तो चाहवैंगे, पर वे मर न्ही पावैंगे। 7 अर उन टिड्डियाँ के आकार लड़ाई कै खात्तर त्यार करे होए घोड़ा कै जिसे थे, अर उनके सिरां पै मान्नो सोने के ताज थे, अर उनके मुँह माणसां बरगे थे। 8 अर उनके बाल लुगाईयाँ कै जिसे, अर दाँत शेरां कै जिसे थे। 9 अर उनका शरीर मान्नो लोहे के कवच तै ढक्या होया था, अर उनके पंखां का शब्द इसा था जिसा रथां अर भोत-से घोड़ा का जो लड़ाई म्ह भाज्जै सै। 10 अर उनकी पूछ अर डंक बिच्छुआ के समान थी, अर उन ताहीं पाँच महिन्ना तक माणसां नै दुख पोहोचाण की जो सामर्थ थी, वा उनकी पुन्झङ्गां म्ह थी। 11 घणे अथाह कुण्ड का दूत उनपै राजा था, उसका नाम इब्रानी म्ह अबद्धान, अर यूनानी म्ह अपुल्लयोन से। (Abyssos g12) 12 पाँच महिन्ना बाद वा बिप्दा खत्तम हो जावैगी, लखाओ इब इनके पाच्छै दो बिप्दा और आण आली सै। 13 अर जिब छट्मै सुर्गदूत नै तुरही फूक्की तो जो सोन्ने की वेदी परमेसवर कै स्याम्ही सै उसके सीनां म्ह तै मन्त्रे इसा शब्द सुण्या। 14 मान्नो कोए छट्मै सुर्गदूत तै जिसकै धोरै

तुरही थी कहण लागरया सै, के “उन चार सुर्गदूतां नै जो बड़ी नदी फरात कै धोरै बन्धे होड़ सै, खोल दे!” 15 अर वे च्यारु सुर्गदूत जो उस घड़ी, दिन, महिने, या साल कै खात्तर एक तिहाई माणसां नै मारण खात्तर छोड़ दिए गये थे। 16 उननै भोत बड़े घुड़सवारां की पलटन ताहीं कठु करया जिनकी शिणती बीस करोड़ रसै। 17 अर मन्नै अपणे दर्शन म्ह घोड़े अर उसके इसे सवार दिक्खें, उनकै धोरै कवच था जो लाल, गहरा नीला अर गन्धक कै तिरियां पीछा था, अर उन घोड़या के सिर शेर कै सिर बरगे थे, अर उनके मुँह तै आग, अर धुमा, अर गन्धक लिकड़ै थी। 18 इन तीनु महामारियाँ तै, यानिके आग, अर धुमा, अर गन्धक तै जो उसके मुँह तै लिकड़ै थी, एक तिहाई माणस मारे गये। 19 क्यूँके उन घोड़या की ताकत उनके मुँह, अर उनकी पुन्ड्रां म्ह थी, ज्यांतै के उनकी पुन्ड्रां साँपां जिसी थी, अर उन पुन्ड्रां के सिर भी थे, अर इन्हे तै वे दर्द दिवें थे। 20 अर बाकी माणस जो उन महामारियाँ तै नहीं मरे थे, उननै अपणे बुरे काम करणे नहीं छोड़े, जो के ये थे भुंडी ओपरी आत्मायाँ की, अर सोने, चान्दी, पीतल, पत्थर, अर काठ की मूर्तियाँ की पूजा करणा, जो ना देख, ना सुण, ना चाल सके सै। 21 अर ना ए उननै खून करणा, जादू-टोणा, जारी, अर चोरी करणा छोड़या।

10 फेर मन्नै एक और शक्तिशाली सुर्गदूत ताहीं सुर्ग तै उतरदे देख्या, जिसनै बाढ़ां ताहीं लत्यां के समान धारण करया होया था, उसके सिर पै मेध-धनुष था, अर उसका मुँह सूरज जिसा अर उसके पाँ आग कै खम्भे बरगे थे। 2 उसनै अपणा सोळा पाँ समुन्दर पै, अर ओळा पाँ धरती पै धर्या, अर उसके हाथ म्ह एक छोट्टी सी खुली होड़ किताब थी। 3 अर इतनी जोर तै चिल्लाया, जिस ढाळ शेर गरजै सै, अर जिब वो चिल्लावै था तो गरजण के सात शब्द सुणाई दिए, जिननै मै समझ नहीं पाया। 4 अर जिब सातु गरजण के शब्द सुणाई दे लिए, तो मै लिखण पै था, अर मन्नै सुर्ग तै यो शब्द सुण्या, के जो बात गरजण के उन सात शब्दां तै सुणी सै, उननै लक्ष्यो राख, अर लिखै ना। 5 अर जिस सुर्गदूत ताहीं मन्नै समुन्दर अर धरती पै खड़े होड़ देख्या था, उसनै अपणा सोळा हाथ कसम खाण खात्तर सुर्ग कै कान्ही ठाया। 6 अर जो युगानुयुग जिन्दा रहवैगा, अर जिसनै सुर्ग अर उस म्ह बसी होई चिज्जां ताहीं, अर धरती अर उस म्ह बसी होई चिज्जां ताहीं, अर समुन्दर उस म्ह बसी होई चिज्जां ताहीं बणाया सै, उस्से की कसम खाकै बोल्या, “इब तो और वार नहीं होगी!” (aiōn g165) 7 जिब सातमै सुर्गदूत का तुरही फूंकण का बखत होगा, तो परमेसवर की योजना पूरी हो जावैगी, जिस ताहीं उसनै अपणे नवियाँ ताहीं बताया, जो उसकी सेवा करै सै, पर वो योजना दुसरे माणसां पै जाहिर कोनी करी थी। 8 अर जिस शब्द करण आळे ताहीं मन्नै सुर्ग तै बोलदे सुण्या था, वो फेर मैरे गेत्या बात करण लाग्या, के जा, जो सुर्गदूत समुन्दर अर धरती पै खड्या सै, उसके हाथ म्ह की खुली होड़ किताब ले ले। 9 अर मन्नै सुर्गदूत कै धोरै जाकै कह्या, “या छोट्टी किताब मन्नै दे, अर उसनै मेरै तै कह्या, ‘ले इसनै खा ले,’ या तेरे मुँह म्ह शहद जिसी मिठी लागैगी, पर या तेरा पेट कड़वा

कर देगी।” 10 ज्यांतै मै वा छोट्टी किताब उस सुर्गदूत कै हाथ म्ह तै लेकै खाग्या, वा मेरै मुँह म्ह शहद जिसी मिठी तो लाग्यी, पर जिब मै उसनै खाग्या, तो मेरा पेट कड़वा होग्या। 11 फेर मेरै तै न्यू कह्या गया, “तन्नै खणेए माणसां, जातां, भाषा अर राजयां के बारें म्ह फेर तै भविष्यवाणी करणी होगी।”

11 फेर मेरै ताहीं नापण कै खात्तर एक सरकण्डा दिया, जो नापण के यन्त्र जिसा था, अर किसे नै मेरे तै कह्या, “उठ, परमेसवर के मन्दर अर वेदी ताहीं नाप ले, अर उस म्ह आराधना करण आळा की गिणती करले। 2 अर मन्दर कै बाहर का आँगण छोड़दे, उसनै मतना नाप, क्यूँके वो गैर यहूदियाँ ताहीं दिया गया सै, अर वे पवित्र नगर नै बियाळीस महिने ताहीं रोदैगी। 3 अर मै अपणे दो गवाहां ताहीं यो हक देऊँगा, के टाट ओढ़ होए एक हजार दो सौ साठ दिन ताहीं भविष्यवाणी करै।” 4 ये वैए जैतून के दो दरखत अर दो दीवट की तिरियां सै, जो धरती कै प्रभु कै स्यामी खड़े रहवैं सै। 5 अर जै कोए उननै नुकसान पोहचावै सै, तो उनकै मुँह तै आग लिकड़कै उनके बैरियाँ ताहीं भस्म करै सै, अर जै कोए उन ताहीं नुकसान पोहचावाणा चाहवैगा, तो जरुर इस्से ढाळ मारया जावैगा। 6 परमेसवर नै उन ताहीं हक दिया सै, के उनकी भविष्यवाणी के दिनां म्ह अकास तै मिह न्ही बरसै, अर उननै यो भी हक सै, के जिब-जिब वे चाहवैं जद-जद वे पाणी नै लहू म्ह बदल दे, अर धरती पै हरेक ढाळ की बिप्दा ल्यावै। 7 अर जिब वे अपणी गवाही दे लेवैंगे, तो वो पशु जो घणे अथाह कुण्ड म्ह तै लिकड़गा, उनतै लड़कै उन ताहीं जित्तांग अर मार देवैगा। (Abyssos g12) 8 अर उनकी लाश उस बड़े नगर कै चौक म्ह पड़ी रहवैंगी, जित उनका प्रभु भी कूस पै चढ़ाया गया था, जो आत्मिक तौर तै सदोम अर मिस देश कुहावै सै। 9 अर सारे माणस, सारे कुल, सारी भाषा, अर सारी जातां के लोग उनकी लाश साढ़े तीन दिन ताहीं देखदे रहवैंगे, अर उनकी लाश कब्र म्ह धरण नहीं देवैंगे। 10 अर धरती कै बासिन्दे, उनके मरण तै राजी अर मग्न होवैंगे, अर एक-दुसरे कै धोरै तोपेक भेज्जैंगे, क्यूँके इन दोनु नवियाँ नै धरती कै बासिन्द्यां ताहीं भोत सताया था 11 अर साढ़े तीन दिन कै पाच्छै परमेसवर कै कान्ही तै जीवन का साँस उन म्ह आ ग्या, अर वे अपणे पायां कै बल खड़े होग्ये, अर उनके देखण आळे डरगे। 12 अर उननै सुर्ग तै एक बड़डा बोल सुणाई दिया, के उरै ऊपरान आओ, न्यू सुण वे बाढ़ां पै सवार होकै अपणे बैरियाँ कै देखदे-देखदे सुर्ग पै चढ़गे। 13 फेर उस्से बखत एक बड़डा भूकम्प यरुशलेम नगर म्ह होया, अर नगर का दसमां हिस्सा पड़ग्या, अर उस भूकम्प तै सात हजार माणस मरणे अर बाकी बचे होड़ माणस डरगे, अर सुर्ग कै परमेसवर कै महिमा करी। 14 दुसरी बिप्दा बीत ली, देक्खो, तीसरी बिप्दा तावली आण आळी सै। 15 अर जिब सातमै सुर्गदूत नै तुरही फूक्की, तो सुर्ग म्ह इस बारै म्ह बड़े-बड़े शब्द होण लागे, के “दुनिया का राज्य म्हारै प्रभु का, अर उसके मसीह का होग्या सै, अर वो युगानुयुग राज्य करैगा।” (aiōn g165) 16 अर सब चौबीस बुजुर्ग जो परमेसवर कै स्यामी अपणे-अपणे

सिंहासन पै बेठे थे, मुँह के बल मोध्ये पड़कै परमेसवर की आराधना करैंगे। 17 न्यू कहण लागे, “के हे सर्वशक्तिमान प्रभु परमेसवर, जो सै, अर जो था, हम तेरा धन्यवाद करा सां, के तन्नै अपणी बड़ी सामर्थ के काम तै धरती पै राज करणा शरू करया। 18 अर दुसरी जातां कै छो उठ्या, अर तेरा प्रक्रोप आण पड़ा अर वो बखत आण पोंहच्या सै, के मरे होया का न्याय करया जावै, अर तेरे दास नबियाँ अर पवित्र माणसां ताहीं अर उन छोटे-बड़ा ताहीं जो तेरे नाम तै डरै सै, वो तेरी महिमा करै, अर धरती पै जो माणस दुसरे माणसां नै बिंगाडै सै, उन ताहीं नाश करा जावै।” 19 फेर परमेसवर का जो मन्दर सुर्ग म्ह सै वो खोल्या गया, अर उसकै मन्दर म्ह उसका करार का सन्दूक दिख्या, बिजलियाँ, शब्द, गरजण अर भूकम्प होए अर बडे ओळे पडे।

12 फेर इन बातां कै बाद सुर्ग पै एक बड़ा निशान दिख्या, यानिके

एक जनानी जो सूरज नै ओढे होड़ थी, अर चाँद उसकै पायां कै तळै था, अर उसकै सिर पै बारहा तारां का ताज था। 2 अर वा गर्भवती थी, अर किलकी मारै थी, क्यूँके जापै का दर्द उसकै होण लाग्या था, अर वा बालक जाम्मण कै दर्द म्ह थी। 3 अर एक और निशान सुर्ग पै दिख्या, अर देक्ख्यो, एक भोत बड़ा लाल अजगर था जिसकै सात सिर अर दस सींग थे, अर उसकै सिरां पै सात राजमुकुट थे। 4 अर उसकी पुन्ड्रधूनै नै अकास के एक तिहाई हिस्से के तरे खिंचेकै धरती पै गेर दिए, अर वो अजगर उस जनानी के स्याम्ही जो जच्या थी, खड़ा होया, के जिब वा बालक जणौ तो उसकै बालक नै निगळ जावै। 5 अर उसकै छोरा होया जो लोहे का राजदंड लिए होड, सारी जातां पै राज करण पै था, अर उसका बालक चाणचक परमेसवर कै धोरै, अर उसकै सिंहासन कै धोरै ठा कै पोहोचा दिया गया। 6 अर वा जनानी उस बण म्ह भाजगी, जित्त परमेसवर की ओड़ तै उसकै खात्तर एक जगहां त्यार करी गई थी, ताके ओड़ै एक हजार दो सौ साठ दिन ताहीं उसकी देखभाल अर उसका पालन-पोषण करया जावै। 7 फेर सुर्ग पै लाई होई, मीकाईल अर उसके सुर्गदूत अजगर तै लड़ानै लिकडे, अर अजगर अर उसके दूत उसतै लडे। 8 पर अजगर हार ग्या अर सुर्ग तै लिकाड़ दिया गया, अर सुर्ग म्ह उनके खात्तर फेर जगहां कोनी रही। 9 अर वो बडा अजगर यानिके वोए पुराणा साँप, जो इल्लीस अर शैतान कुहावै सै, अर साब्दी दुनिया नै भकाण आळा सै, धरती पै गेर दिया गया, अर उसके दूत उसकै गैल गेर दिए गए। 10 फेर मन्नै सुर्ग पै तै यो बड़ा शब्द आन्दे होड सुण्या, के इब म्हारा परमेसवर माणसां ताहीं बचा लेवैगा, अर वो अपणी शक्ति का इस्तमाल करैगा, अर राजा की तरियां राज करैगा, इब उसका मसीह दुनिया पै अपणा हक जतावैगा, क्यूँके शैतान परमेसवर की हजुरी म्ह खड़ा होकै, जो दिन रात उसके दास्सां पै दोष लाया करै था, वो सुर्ग तै गिरा दिया गया सै। 11 म्हारे बिश्वसियाँ नै शैतान ताहीं हराया सै, अर वे मेम्नै कै लहू कै कारण, अर अपणी गवाही कै वचन कै कारण, उसपै जीते, अर उननै अपणे जी ताहीं प्यारा न्ही जाण्या, उरै ताहीं के मौत भी सहण कर ली। 12 ज्यातै, हे सुर्ग, अर उस म्ह रहण

आळो आनन्दित होओ, अर हे धरती, अर समुन्दर म्ह रहण आळो, थारे पै धिक्कारा सै। क्यूँके शैतान घणे छो कै गेल्या थारे धोरै उतर आया सै, क्यूँके वो जाणै सै, के उसका थोड़ा-ए बखत और बच रया सै। 13 अर जिब अजगर नै देख्या, कै मै धरती पै गेर दिया गया सूं, तो उस जनानी ताहीं जिन नै बेट्या पैदा करया था, उसका पिंछा करया। 14 अर उस जनानी ताहीं बडे उकाब के दो पंख दिए गये, के अजगर कै स्याम्ही तै उड़ कै बण म्ह उस जगहां पोहच जावै, जित्त उसकी एक बखत, अर समयों, अर आध्ये बखत ताहीं देख-रेख करी जावै। 15 अर अजगर नै उस जनानी कै पाच्छै अपणे मुँह तै नदी की तरियां पाणी बहाया, के उसनै नदी तै बहा दे। 16 पर धरती नै उस जनानी की मदद करी, अर अपणा मुँह खोल कै उस नदी ताहीं जो अजगर नै अपणे मुँह तै बहाई थी, पी लिया। 17 फेर अजगर नै जनानी पै गुस्सा करया, अर उसके वंशजां ताहीं, जो परमेसवर के हुकम नै मान्नै सै, अर यीशु की गवाही देण पै अटल सै, उनतै लड़ण नै गया।

13 अर वो समुन्दर कै बालू पै जा खड़ा होया। अर मन्नै एक

पशु ताहीं समुन्दर म्ह तै लिकडदे होड देख्या, जिसके दस सींग अर सात सिर थे, उसके सीनां पै दस राजमुकुट अर उसके सिरां पै परमेसवर की बुराई के नाम लिक्खे होड थे। 2 अर जो पशु मन्नै देख्या, वो चित्तै बराया था, अर उसके पां प्लालू जिसे, अर मुँह शेर कै बराया था, अर उस अजगर नै अपणी सामर्थ, अर अपणा सिंहासन, अर बड़ा हक, उस ताहीं दे दिया। 3 अर मन्नै उसके सिरां म्ह तै एक पै इसा जानलेवा धाव लाग्या होड देख्या, मान्नो वो मरण पै सै, फेर उसका जानलेवा धाव ठीक होग्या, अर साब्दी धरती के माणस हैरान होगे अर उस पशु के भगत बण जावैंगे। 4 अर उननै अजगर की पूजा करी, क्यूँके उसनै पशु ताहीं अपणा हक दे दिया था, अर न्यू कहकै पशु की भी पूजा करी, के इस पशु कै बराया कौण सै? कौण उसतै लड़ सकै सै? 5 उस ताहीं ढींग मारण अर परमेसवर की बुराई करण का हक अर वियालीस महिने ताहीं राज करण की इजाजत दी गई। 6 पशु नै, परमेसवर अर उसकै नाम, उसके रहण की जगहां यानी सुर्ग अर उन सब की, जो सुर्ग म्ह रहवै सै, उनकी बुराई करण शरू कर दिया। 7 अर उस ताहीं न्यू हक दिया गया, के पवित्र माणसां तै लड़ै, अर उनपै जीत पावै, अर उस ताहीं हरेक कुल, अर माणस, अर भाषा, अर जात पै हक दिया गया। 8 अर धरती पै रहण आळे वे सारे उस पशु की पूजा करैंगे। मतलब जिनका दुनिया की शरुआत के बाद के वे सारे माणस जिनके नाम उस मेम्नै की जीवन की किताब म्ह लिक्खे नहीं गये सै। मेम्ना वोए सै जो मारया गया सै। 9 जिसके कान हों वो ध्यान तै सुणी। 10 जिस ताहीं कैद म्ह पड़णा सै, वो कैद म्ह पड़णा, जो तलवार तै मारेगा, जस्ती सै के वो तलवार तै मारया जावैगा। पवित्र माणसां का धीरज दुख ठाण अर उसपै बिश्वास करण म्ह सै। 11 फेर मन्नै एक और पशु ताहीं धरती म्ह तै लिकडदे देख्या, उसके मेम्नै की ढाल दो सींग थे, अर वो अजगर की ढाल बोल्लै था। 12 अर यो उस पैहल्डे पशु का सारा हक उसकै स्याम्ही काम

मह ल्यावै था, अर धरती अर उसके बासिन्दयां तै उस पैहलड़े पशु की जिसका जानलेवा घाव ठीक होग्या था, पूजा करै था। 13 अर वो बड़े-बड़े निशान दिखावै था, उरे ताहीं के माणसां कै देखते-देखते सुर्ग तै धरती पै आग बरसा देवै था। 14 अर उन चमत्कारां कै कारण जिन ताहीं उस पशु कै स्याम्ही दिखावै का हक उस ताहीं दिया था, वो धरती के बासिन्दयां ताहीं इस तरियां भकावै था, के धरती के बासिन्दयां तै कहवै था, के जिस पशु कै तलवार लागरी थी, वो जिन्दा होग्या सै, उसकी मूर्ति बणाओ। 15 अर उस ताहीं उस पशु की मूर्ति म्ह जी घाल्लण का हक दिया गया, के पशु की मूर्ति बोल्लण लागै, अर जितने माणस उस पशु की मूर्ति की पूजा न्ही करै, उन ताहीं मरवा देवै। 16 अर उसने छोटे, बड़े, साढ़कार, कंगाल, आजाद, गुलाम सारया कै सोळे हाथ या उनकै माथी पै छाप लगावण खात्तर उन ताहीं मजबूर कर दिया। 17 के उस ताहीं छोड़ जिसपै छाप यानिके उस पशु का नाम, या उसकै नाम का अंक हो, अर कोए लेण-देण न्ही कर सकै। 18 ज्ञान इस्से म्ह सै: जिस म्ह अकल हो वो इस पशु का अंक जोड़ ले, क्यूँके वो माणस का अंक सै, अर उसका अंक छः सौ छियासठ सै।

14 पर उसकै बाद मनै कुछ और भी देख्या, वो मेम्ना सिय्योन पहाड़

पै खड़ा सै, अर उसकै गेल्या एक लाख चवालीस हजार माणस सै, जिनकै माथी पै उसका अर उसकै पिता का नाम लिख्या होड़ सै। 2 अर सुर्ग तै मनै एक इसा शब्द सुणाई दिया, जो पाणी की घणी धारा अर बड़े गरजण जिसा शब्द था, अर जो शब्द मनै सुण्या, वो इसा था, मान्नो वीणा बजाण आळे वीणा बजान्दे हों। 3 अर वे सिंहासन कै स्याम्ही अर च्यारु प्राणियाँ अर बुजुर्गा कै स्याम्ही मान्नो, एक नया गीत गाण लागरे थे, अर उन एक लाख चवालीस हजार माणसां ताहीं छोड़ जो धरती पै तै छुड़ाए गये थे, कोए वो गीत न्ही सीख सकै था। 4 ये वे सै, जो जनानियाँ कै गेल्या अशुद्ध न्ही होए, पर कुवरे सै। ये वैए सै, के जित किते मेम्ना जावै सै, वे उसकै पाच्छै हो लेवैं सै। जिस तरियां लोग अपणो फसल म्ह तै पैहला फल परमेसवर ताहीं चढ़ावै सै, उससे तरियां वो भी परमेसवर अर मेम्ने खात्तर पैहले फल के रूप म्ह चढ़ाए गए सै। 5 अर उनके मुँह तै झूठ न्ही लिकड़ा था, वे बेकसूर सै। 6 फेर मनै एक और सुर्गदूत ताहीं अकास कै बिचाठे उड़दे होड़ देख्या जिसकै धोरै धरती पै के बासिन्दयां की हरेक जात, अर कुल, अर भाषा, अर माणसां ताहीं सुणाण कै खात्तर धणा सनातन सुसमाचार था। (aiōnios g166) 7 अर उसने ऊँच्ची आवाज म्ह कह्या, “परमेसवर तै डरो, अर उसकी महिमा करो, क्यूँके उसकै न्याय करण का बखत आण पोंहच्या सै, अर उसकी आराधना करो, जिसनै सुर्ग अर धरती अर समुन्दर अर पाणी के सोते बणाए।” 8 फेर इसकै पाच्छै एक और दुसरा सुर्गदूत न्यू कहन्दा होड़ आया, के पड़ग्या, वो बड़ा बेकीलोन नगर पड़ग्या जिसनै अपणी जारी की कोपमय मदिरा सारी जातां ताहीं पिलाई सै। 9 फेर इनकै पाच्छै एक और सुर्गदूत जोर तै न्यू कहन्दा होड़ आया, के जो कोए उस पशु अर उसकी मूर्ति की पूजा करै, अर अपणे माथी या अपणे हाथ पै

उसकी छाप ले। 10 तो वो परमेसवर के प्रकोप की निरी मदिरा जो उसकै खुन्दक कै कटोरे म्ह घाल्ली गई सै, पीवैगा अर पवित्र सुर्गदूतां कै स्याम्ही, अर मेम्ने कै स्याम्ही आग अर गन्धक की पीड़ा म्ह पड़ैगा। 11 अर उनकी पीड़ा का थुम्मा सुगानयुगा उठदा रहवैगा, अर जो उस पशु अर उसकी मूर्ति की पूजा करै सै, अर जो उसकै नाम की छाप लेवैं सै, उन ताहीं दिन-रात चैन न्ही मिलैगा। (aiōn g165) 12 पवित्र माणसां का धीरज इस्से म्ह सै, के धीरज तै दुख सहदे रहवै अर अन्त ताहीं मजबूत बणकै परमेसवर के हुकमां नै मानै, अर पीशु पै बिश्वास राक्खैं। 13 फेर मनै सुर्ग तै यो शब्द सुण्या, के लिख, जो मुर्दे प्रभु मरै सै, वे इब तै धन्य सै, आत्मा कहवै सै, हाँ, क्यूँके वे अपणी मैनहनतां तै आराम पावैंगे, अर उनकै काम उनकै गेल्या हो लेवैंगे। 14 अर मनै निगांह करी, अर देख्यो, एक थोळा बादल सै, अर उस बादल पै बाणस कै बेट्टे बरगा कोए बेठ्या सै, जिसकै सिर पै सोन्ने का ताज अर हाथ म्ह तेज दराती सै। 15 फेर एक और सुर्गदूत नै मन्दर म्ह तै लिकड़कै, उसतै जो बादल पै बेठ्या था, जोर तै रुक्का मारकै कह्या, “के अपणी दराती ल्याकै लामणी कर, क्यूँके लामणी का बखत आण पोंहच्या सै, ज्यातै के धरती की खेती पक ली सै।” 16 इस करकै जो बादल पै बेठ्या था, उसनै धरती पै अपणी दराती लाई, अर धरती की लामणी करी गई। 17 फेर एक और सुर्गदूत उस मन्दर म्ह तै लिकड़या, जो सुर्ग म्ह सै, अर उसकै धोरै भी तेज दराती थी। 18 फेर एक और सुर्गदूत जिस ताहीं आग पै हक था, वेठी म्ह तै लिकड़या, अर जिसकै धोरै तेज दराती थी, उसतै जोर तै बोल्या, “अपणी तेज दराती ल्याकै धरती की दाखलता के गुच्छे काट ले, क्यूँके उसकी दाख पक ली सै।” 19 अर उस सुर्गदूत नै धरती पै अपणी दराती लाई, अर धरती की दाखलता का फळ काटकै, अपणे परमेसवर के प्रकोप के बड़े रस के कुण्ड म्ह घाल दिया। 20 अर नगर कै बाहरणै उस रसकुण्ड म्ह अंगूर रौदै गये, अर रसकुण्ड म्ह तै इत्तण लहू लिकड़या के वो नदी म्ह तबदील होग्या, जो के तीन सौ किलो मीटर लम्बी अर इतनी गहरी थी, के उस म्ह घोड़े भी समा जावै।

15 फेर इसकै बाद मनै सुर्ग म्ह एक और बड़ा अर अद्भुत निशान

देख्या, यानिके सात सुर्गदूत जिनकै धोरै सात आखरी बिप्दा थी, क्यूँके उनके खत्तम हो जाण पै परमेसवर के प्रकोप का अंत सै। 2 फेर मनै इसा लाग्या जाणु मान्नो मै एक काँच के समुन्दर नै देखण लागरया सूँ, जिस म्ह आग मिली होई थी, मनै इस समुन्दर के किनारे पै उन माणस ताहीं खड़े देख्या, जिननै उस बड़े पशु ताहीं हराया था, क्यूँके उननै उसकी मूर्ति की आराधना करण तै अर उसकै नाम की मोहर लगाण तै भी मना कर दिया था, उन माणसां कै हाथ म्ह परमेसवर के जरिये दी गई वीणा थी। 3 वे परमेसवर के दास मूसा नबी का गीत, अर मेम्ने का गीत गा-गाकै कहवै थे, “हे सर्वशक्तिमान प्रभु परमेसवर, तेरे काम महान्, अर अनोक्खे सै, हे युग-युग के राजा, तेरी चाल सही अर सच्ची सै।” 4 “हे प्रभु, कौन तेरे तै न्ही डैरा अर तेरे नाम की महिमा न्ही करेगा? क्यूँके सिर्फ तू ए पवित्र सै। सारी जात आकै तेरे स्याम्ही

मोथ्ये पड़के प्रणाम करैरी, क्यूँके तेरे न्याय के काम दिखगे सै।” 5 जिब माणसां नै गाणा बन्द कर दिया, तो मन्नै सुर्ग म्ह मन्दर ताहीं खुल्या होया देख्या, जो के परमेसवर के तम्बू की तरियां था। 6 अर वे सातु सुर्गदूत जिनकै धोरै सातु बिप्दा थी, शुद्ध अर चमकदी होई मलमल के लते पहरे होइ, छाती पै सुनहरे परणे बैधे होइ मन्दर तै लिकडे। 7 अर उन च्यार प्राणियाँ म्ह तै एक नै उन सातु सुर्गदूतां ताहीं परमेसवर के, जो युगानुयुग जीवै सै, प्रकोप तै भेरे होइ सात सोन्ने के कटोरे दिए। (aion g165) 8 अर परमेसवर की महिमा अर उसकी सार्थकै के कारण मन्दर धुमै तै भर गया, अर जिब तक उन सातु सुर्गदूतां की सातु बिप्दा खतम न्ही होई तब तक कोए मन्दर म्ह न्ही जा सक्या।

16 फेर मन्नै मन्दर म्ह किसे ताहीं जोर तै उन सातु सुर्गदूतां तै न्यू कहन्दे सुण्या के जाओ, परमेसवर के प्रकोप के सातु कटोरया ताहीं धरती पै उंडेल धों। 2 इस करकै पैहल्ले सुर्गदूत नै जाकै अपणा कटोरा धरती पै उंडेल दिया, अर उन माणसां का जिनपै पशु की छाप थी, अर जो उसकी मूर्ति की पूजा करै थे, उनकै एक तरियां तै बुरा अर दुख देण आला फोडा लिकड्या। 3 अर दुसरे सुर्गदूत नै अपणा कटोरा समुन्दर पै उंडेल दिया, अर वो मरे होए माणसां के लहू जिसा होग्या, अर समुन्दर म्ह रहण आला हरेक प्राणी मर ग्या। 4 अर तीसरे सुर्गदूत नै अपणा कटोरा नदियाँ, अर पाणी के चोवां पै उंडेल दिया, अर वो लहू बण्ग्या। 5 फेर मन्नै पाणी के अधिकारी सुर्गदूत ताहीं न्यू कहन्दे सुण्या, के हे पवित्र, जो सै, अर जो था, तू न्यायी सै, अर तन्नै यो न्याय करया। 6 क्यूँके उन्हे पवित्र माणसां, अर नबियों का लहू बहाया था, इस करकै तन्नै उनते लहू पियाया, क्यूँके वे इस्से जोग्ये सै। 7 दुबारा मन्नै वेदी तै यो शब्द सुण्या, के हाँ! हे सर्वशक्तिमान प्रभु परमेसवर, तेरे फैसले सही अर सच्चे सै। 8 अर चौथे सुर्गदूत नै अपणा कटोरा सूरज पै उंडेल दिया, तो सूरज ताहीं यो हक दिया गया के वो माणसां नै अपणी गर्मी तै झुलसा दे। 9 अर माणस घणी तपण तै झुळसेंगे, अर वे परमेसवर कै नाम की, जिन ताहीं इन मुसीबतां पै हक सै, उस ताहीं श्राप देण लाग्ये, अर ना ए पाप करणा छोड्या, ना उसकी महिमा करी। 10 अर पाँचमै सुर्गदूत नै अपणा कटोरा उस पशु कै सिंहासन पै उंडेल दिया अर उसके राज्य पै अथेरा छाग्या, अर माणस दर्द के मरे अपणी-अपणी जीभ चबाण लाग्ये। 11 अर अपणे दर्दी अर फोड्यां कै कारण सुर्ग कै परमेसवर की बुराई करी, अर अपणे-अपणे बुरे कामां ताहीं करणा न्ही छोड्या। 12 अर छठमै सुर्गदूत नै अपणा कटोरा बहु नदी फरात पै उंडेल दिया, अर उसका पाणी सूख गया, ताके पूरब दिशा के राजयां के खात्तर राह त्यार हो जावै। 13 अर मन्नै उस अजगर कै मुँह म्ह तै, अर उस पशु कै मुँह म्ह तै, अर उस झुँझे नबी कै मुँह म्ह तै तीन भुंडी ओपरी आत्मायाँ ताहीं मेंढकां के रूप म्ह लिकड़दे देख्या। 14 ये चमत्कार दिखाण आली भोत सी भुंडी ओपरी आत्मा सै, जो साब्दी दुनिया के राजयां के धोरै तै लिकड़कै ज्यातै जावै सै, के उन ताहीं सर्वशक्तिमान परमेसवर के उस बडे दिन की लड़ाई कै खात्तर कछे करै। 15 अर देक्खों, मेरा आणा

एक चोर की ढाळ होगा जो चुपके तै आवै सै, धन्य वो सै, जो जागदा रहवै सै, अर अपणे लत्यां की चौकसी करै सै, के उघाडा कोनी हाँडे, अर माणस उसका उघाडापण ना देख पावै। 16 अर उन भुंडी ओपरी आत्मायाँ नै सारे राजा ताहीं उस जगहां कछु करया, जो इत्तीनी म्ह हर-मगिदोन कुहावै सै। 17 अर सातमै सुर्गदूत नै अपणा कटोरा हवा पै उंडेल दिया, अर मन्दर के सिंहासन तै यो बड़डा शब्द होया, के, हो चुक्या। 18 फेर बिजिलियाँ, अर शब्द, अर गरजण होए, अर एक इसा बड़डा हाल्लण होया, के जिब तै माणस धरती पै बणाया गया, जद तै इसा बड़डा हाल्लण कदे न्ही होया था। 19 अर उस बडे नगर के तीन टुकडे होगे, अर देश-देश के नगर पड़गे, क्यूँके परमेसवर नै बेबीलोन नगर के माणसां ताहीं दण्ड देण का अपणा वादा पूरा करया, अर यो इसा होगा जिसा मान्नो के वो अपणे छो की जळण की मदिरा उननै प्याणा। 20 अर हरेक टापू अपणी जगहां तै ठळ ग्या, अर पहाड़ां का बेरा न्ही पाट्या। 21 अकास तै माणसां पै मण-मण के बडे ओळे पडे, अर इस करकै के या बिप्दा घणीए भारया थी, लोगां नै ओळयां की बिप्दा कै कारण परमेसवर की बुराई करी।

17 अर जिन सात सुर्गदूतां के धोरै वे सात कटोरे थे, उन म्ह तै एक नै आकै मेरै तै न्यू कह्या, के उरे आ, मै तन्नै उस बेश्या का दण्ड दिखाऊँ, जो घणेए पाणी पै बेट्टी सै। 2 जिसकै गेल्या धरती के राजयां नै जारी करी, अर धरती के बासिन्दे उसकी जारी की मदिरा तै मतवाले होगे थे। 3 फेर सुर्गदूत मेरी आत्मा नै एक जंगल-बियाबान म्ह लेग्या, ओडै मन्नै एक जनानी ताहीं लाल रंग के एक पशु पै बेट्टे देख्या, वो पशु परमेसवर की बुराई करण आळे शब्दां तै ढक्या होइ था, अर इसकै सात सिर अर दस सींग थे। 4 या जनानी बैंजनी, अर लाल रंग के लते पैहर-री थी, अर सोन्ने अर घणी कीमती मणियाँ अर मोतियाँ के गहणा तै सजी होइ थी, अर उसके हाथ्यां म्ह एक सोन्ने का कटोरा था जो अश्लीलता की घृणित चिज्जां तै अर उसकी जारी की भुंडी विज्जां तै भरया होइ था। 5 अर उसकै माश्ये पै एक रहस्यमय नाम लिख्या था, “बड़डा बेबीलोन धरती की बेश्यायाँ अर घृणित चिज्जां की माँ, अर सारी अश्लीलता नै जन्म देण आली।” 6 अर मन्नै उस जनानी ताहीं पवित्र माणसां कै लहू अर यीशु के गवाहां कै लहू पीण म्ह मतवाली देख्या अर उस ताहीं देखकै मै हैरान होग्या। 7 उस सुर्गदूत नै मेरै तै कह्या, “तू क्यांतै हैरान होया?” मै इस जनानी, अर उस पशु का, जिसपै वा चढ़ी सै, अर जिसके सात सिर अर दस सींग सै, उसका तेरे ताहीं भेद बताऊँ सूं। 8 जो पशु तन्नै देख्या सै, यो पैहल्या तो था, पर इब न्ही सै, अर घणे अथाह कुण्ड तै लिकड़कै विनाश म्ह पड़ेगा, अर धरती के बासिन्दे जिनके नाम दुनिया कै बणण कै बखत तै जीवन की किताब म्ह लिक्ख्ये न्ही गये सै, इस पशु की या हाल्लत देखकै अचम्भा करैगै, के पैहल्या था, अर इब कोनी, पर यो दुबारा आवैगा। (Abyssos g12) 9 यो समझाण कै खात्तर के एक ज्ञानी मन जरूरी सै: वे सातु सिर सात पहाड़ सै, जिनपै वा जनानी बेट्टी सै। 10 अर वे सात राजा भी सै, पाँच तो मर

लिये सै, अर एक बाककी सै, अर एक इब ताहीं आया कोनी, अर जिब आवैगा, तो कुछ बखत ताहीं उसका रहणा भी जरूरी सै। 11 अर जो पशु पैहल्या था, अर इब नहीं, वो खुद आठमां राजा सै, अर उन सातुआ म्ह तै सै, जिसका विनाश तय सै। 12 अर जो दस सींग तन्नै देक्खे सै, वे दस राज्जे सै, जिननै इब ताहीं राज्य नहीं मिल्या, पर उस पशु कै गेल्या थोड़े-से बखत खात्तर राज्यां बरगा हक दिया जावैगा। 13 ये सारे एक मन होवैंगे, वे अपणी-अपणी सामर्थ अर हक उस पशु ताहीं देवैंगे। 14 ये मेम्मे गैल लड़ैंगे, अर मेमा उनतै जीत जावैगा, क्यूंकि वो प्रभुओं का प्रभु, अर राज्यां का राजा सै: अर जो बुलाए होड़, चुणे होड़, अर विश्वासी उसकै गैल सै, वे भी जीत पावैंगे। 15 फेर उसनै मेरै तै कह्या, के जो पाणी तन्नै देख्या, जिनपै बेश्या बेट्ठी सै, वो देश, माणस, जाति, अर भाषा सै। 16 अर जो दस सींग तन्नै देक्खे, वे अर पशु उस बेश्या तै बैर राक्खैंगे, अर उस ताहीं लाचार अर उघाड़ी कर देवैंगे, अर उसका माँस खा जावैंगे, अर उस ताहीं आग म्ह जळा देवैंगे। 17 वा जननी, जिसनै तू देक्खै सै, वो बड़ा नगर सै, जो धरती के राज्यां पै राज करै सै। ये सब बात उसकै गैल होवैंगी, क्यूंकि यो परमेसवर ही सै, जो अपणे मकसद नै पूरा करण खात्तर उनके मन नै उकसावैगा, ताके वे उसकी मनसा पूरी करै, योए कारण सै के वो अपणा हक पशु ताहीं राज करण खात्तर दे देंगे, जिब तक के परमेसवर नै जो कह्या सै वो पूरा ना हो ले।

18 इसकै बाद मन्नै एक और सुर्गदूत ताहीं सुर्ग तै उतरदे देख्या, जिसकै थोरै बड़ा अधिकार था, अर धरती उसकै तेज तै चमक ग्यी। 2 उसनै जोर तै रुक्का मारकै कह्या, पड़ग्या, बड़ा बेबीलोन नगर पड़ग्या सै, अर भुंडी ओपरी आत्मायाँ का घर, हरेक भुंडी आत्मा का बसेरा, एक अशुद्ध अर धृणित पंछी का बसेरा होग्या। 3 यो इस कारण होग्या क्यूंकि बेबीलोन नगर उस विरवानी की तरियां सै, जिसकी जारी की डरावणी मदिरा कै कारण सारी जात पड़गी सै, अर धरती के राज्यां नै उसकै गेल्या जारी करी सै, अर धरती के व्यापारी उसकै भोग-विलास के धन कै कारण साहूकार होए सै। 4 फेर मन्नै सुर्ग तै किसे और का बोल सुण्या, के हे मेरे माणसों, उस म्ह तै लिकड़ आओ, के थम उसके पापां म्ह साइझी नहीं होओं, अर उसकी मुसीबतां म्ह तै कोए मुसीबत थोरे पै ना आण पड़। 5 क्यूंकि उसके पाप सुर्ग ताहीं पोंहोचगे सै, अर उसके अर्धम परमेसवर नै याद आये सै। 6 जिसा उसनै थारे ताहीं दिया सै, उससे तरियां ए उस ताहीं भी भर द्यो, अर उसके काम्मां कै मुताबिक उस ताहीं दो गुणा बदला द्यो, जिस कटोरे म्ह उसनै भर दिया था उससे म्ह उसकै खात्तर दो गुणा भर द्यो। 7 जितनी उसनै अपणी बड़ाई करी अर सुख-विलास करया, थम भी उसनै उतनाए दुख अर दर्द द्यो, क्यूंकि वा अपणे मन म्ह कहवै सै, मै राणी के सामान बण बेट्ठी सूं मै बिधवा कोनी, अर ना ए कदे बिलाप करँगी। 8 इस करकै एक ए दिन उसके अंहकार के कारण उसपै बिप्दा आण पड़ेंगी, यानिके मौत, दुख, अकाळ, अर वा आग म्ह भस्म कर दी जावैगी, क्यूंकि उसका न्याय करण आळा प्रभु परमेसवर शक्तिशाली सै। 9 अर धरती के राजा जिननै

उसकै गेल्या जारी, अर भोगविलास करया, जिब उसकै जळण का धुम्मा देख्यैं, तो उसकै खात्तर रोवैंगे, अर छाती पीटैंगे। 10 अर उसकै दर्द कै डर नै याद करकै दूर खड़े होकै कहवैंगे, हाय! हाय! हे बड़े नगर, बेबीलोन, हे शक्तिशाली नगर, थोड़ी-ए देर म्ह तेरे पै दण्ड आ लैवैगा। 11 अर धरती के व्यापारी उसकै खात्तर रोवैंगे अर कळैंगे, क्यूंकि इब कोए उनकी ये चीज मोल लेण आळा कोन्या रह्या। 12 उन थोरै भोत सारी चीज थी यानिके सोन्ना, चान्नी, रत्न, मोती, अर मलमल, बैंजनी, रेशमी, लाल रंग लत्ते, अर होक ढाळ की खसबूदार लाकड़ी, अर हाथी दाँत की हरेक ढाळ की चीज, घणी कीमती लाकड़ी, पीतळ, लोहा, अर संगमरमर के सारे ढाळ के बरतन। 13 अर दालचीनी, मसाले, धूप, गन्धरस, लोबान, अंगूर का रस, तेल, मैदा, गेहूँ, गँड़, बलध, भेड़, बकरियाँ, घोड़े, रथ, गुलाम, अर माणसां के प्राण का कोए खरीदार कोनी रह्या। 14 व्यापारी उस ताहीं कहवैंगे, के जिन चिज्जां की तन्नै इच्छा करी थी, इब वा कोनी रही, अर एशो-आराम अर शोहरत की चीज तेरे तै दूर होई सै, अर वे कदे भी नहीं मिलैगी। 15 इन चिज्जां के व्यापारी जो उसकै जरिये साहूकार होगे थे, उसकै दर्द कै डर नै याद करकै दूर खड़े होकै रोन्दे अर कळपदे होए कहवैंगे, 16 “हाय! हाय! यो बड़ा नगर जो मलमल, अर बैंजनी, अर लाल रंग के लत्ते पहरे था, अर सोन्ने, अर रत्नां, अर मोतियाँ तै सज्या था, 17 थोड़ी-ए देर म्ह उसका इसा सारा धन नाश होग्या, अर हरेक माँझी, अर पाणी म्ह सफर करणीया, किस्ती चलाणीए, अर जितने समुन्दर तै कमावै सै, सारे दूर खड़े होकै!” 18 अर उस नगर के जळण का धुम्मा देखदे होए रुक्का मारकै कहवैंगे, “कौण सा नगर इस बड़े नगर कै जिसा सै?” 19 अर अपणे-अपणे सिरां पै धूल गैरेंगे, अर रोन्दे होए अर कळपदे होए किल्की मार-मारकै कहवैंगे, के, हाय! हाय! यो बड़ा नगर जिसकी सम्पत्ति कै जरिये समुन्दर के सारे जहाज आळे साहूकार होगे थे, इब थोड़ी-ए देर म्ह तू उजङ्ग ग्या। 20 हे थम जो सुर्ग म्ह रहण आळे, अर हे पवित्र माणसों, प्रेरितों, अर नवियों, जो उसकै गैल होया सै, इस कारण थम खुशी मनाओ, क्यूंकि परमेसवर नै बेबीलोन नगर ताहीं दण्ड देकै उसतै थारा बदला लिया सै। 21 फेर एक ताकतवर सुर्गदूत नै बहुती चाक्की के पाट जिसा पथर ठाया, अर न्यू कहकै समुन्दर म्ह बगा दिया, के, “बड़ा नगर बेबीलोन इस्से ढाळ घणी ताकत तै गिराया जावैगा, अर फेर कदे भी उसका बेरा नहीं पाईगा। 22 अर बेबीलोन नगर म्ह गायक, वीणा बजाण आळे, बाँसुरी बजाण आळे, अर तुरही फूंकण आळा का शब्द फेर कदे भी तन्नै सुणाई नहीं देवैगा, अर किसे काम का भी कोए कारीगर तन्नै कदे नहीं मिलैगा, अर चाक्की कै चाल्लण का शब्द फेर कदे भी तन्नै न्हीं सुणैगा। 23 अर दीवै का चाँदणा फेर कदे भी तेरे म्ह नहीं चमकैगा, अर बन्दड़ा-बन्दड़ी का शब्द फेर कदे भी तन्नै सुणाई नहीं देवैगा, क्यूंकि तेरे व्यापारी धरती के प्रधान थे, अर तेरे जादू-टूपै तै सारी जात भकाई गई थी। 24 परमेसवर बेबीलोन नगर ताहीं इस कारण सजा

देवैगा, क्यूँकि नवियाँ, पवित्र माणसां, अर धरती पै सारे घात करे होया का लहू उस्से म्ह पाया गया सै।”

19 इसकै बाद मन्नै सुर्ग म्ह मान्नो भीड़ ताहीं जोर तै न्यू कहन्दे सुण्या,

के, हालेलूय्याह! उद्धार, महिमा, अर सामर्थ, म्हारै परमेसवर ए की सै। 2 क्यूँकि उसका न्याय सच्चा अर सही सै, ज्यांतै के उसनै उस बड़ी बेश्या का जो अपणी जारी तै धरती के माणसां तै पाप करवाण लागरी थी, परमेसवर नै उस ताहीं दण्ड देकै अपणे दास्सां कै लहू का बदला लिया सै। 3 फेर दुसरी बर उनै कह्या, हालेलूय्याह! अर बेबीलोन नगर कै जल्ह का धुम्मा युगानुयुग उठदा रहवैगा। (aiōn g165) 4 सब चौबीस बुजुर्ग अर च्याह प्रणियाँ नै झुकैकै परमेसवर ताहीं प्रणाम करया, जो सिंहासन पै बेठ्या था, अर कह्या, “आमीन! हालेलूय्याह!”

5 अर सिंहासन म्ह तै मन्नै एक आवाज सुणाई दी, के, हे म्हारे परमेसवर तै सारे डरण आळे दासों, के छोड़े, के बड़े, थम सारे उसकी जै-जै कार करो। 6 फेर मन्नै बड़ी भीड़ का शोर सुणाई दिया, यो भोत घणे पाणी अर जबरदस्त गड़ग़ड़ाहट बरगा शब्द था, हालेलूय्याह! प्रभु म्हारा परमेसवर, सर्वशक्तिमान राज्य कैरे सै। 7 आओ, हम खुश अर मग्न होवां, अर उसकी जै-जै कार करा, क्यूँके मेम्ने का व्याह आण पोहोचा, अर उसकी बन्दड़ी नै अपणे-आप ताहीं त्यार कर लिया सै। 8 अर उस ताहीं शुद्ध अर चमकदार सुथरे मलमल नै पैहरण का हक दिया गया, क्यूँकि उस सुथरे मलमल का मतलब पवित्र माणसां के धर्म के काम सै।

9 अर सुर्गदूत नै मेरै तै कह्या, न्यू लिखि, के, धन्य वे सै, यो मेम्ने के व्याह के भोज म्ह न्यौदि गये सै, फेर उसनै मेरै तै कह्या, ये परमेसवर की कही गई सच्ची बात सै। 10 अर मै उसनै पूज्जण कै खात्तर उसके पायां के म्ह पड़ग्या, उसनै मेरै तै कह्या, “देख, इसा मतना कैरे, मै तेरे अर तेरे भाईयाँ की तरियां ए दास सूँ, जो यीशु की गवाही देण पै अटल सै, परमेसवर नै ए पूज, क्यूँके यीशु की गवाही भविष्यवाणी की आत्मा सै।” 11 फेर मन्नै सुर्ग ताहीं खुल्हा होड़ देख्या, अर के देक्खूँ सूँ के एक धोला घोड़ा सै, अर उसपै एक सवार सै, जो बिश्वास जोगा, अर सच्चा कुहावै सै, अर वो धर्म कै साथ न्याय अर लड़ाई कैरे सै। 12 उसकी आँख आग की लपट की तरियां थी, अर उसके सिर पै भोत-से मुकुट थे, अर उसके माथ्यै पै एक नाम लिख्या था, जिस ताहीं उसनै छोड़ और कोए न्ही जाओ था। 13 अर उसनै लहू म्ह ड्योया होड़ बाणा पैहरे राख्या था, अर उसका नाम परमेसवर का वचन था। 14 अर सुर्ग की पलटन धोले घोड़या पै चढ़कै अर धोला अर शुद्ध मलमल के लत्ते पैहरे होड़ उसकै पाछ्ये-पाछ्ये चाललण लागरी थी। 15 अर हरेक देश के माणसां ताहीं मारण कै खात्तर, उसके मुँह तै एक पैन्ही तलवार लिकड़ी थी, अर वो लोहवै का राजदण्ड लिए होड़ उनपै राज करेगा, अर वो सर्वशक्तिमान परमेसवर के छो की जलन की मदिरा के कुण्ड म्ह अंगूरां नै रौदेगा। 16 अर उसके लत्ते अर जाँध पै यो नाम लिख्या था, राजयां का राजा अर प्रभुओं का प्रभु। 17 फेर मन्नै एक सुर्गदूत ताहीं सूरज पै खड़या देख्या,

अर उसनै जोर तै रुक्का मारकै अकास म्ह उड़ण आळे सारे पंछियाँ तै

कह्या, “आओ, परमेसवर के बड़े भोज कै खात्तर कठे हो जाओ। 18 ताके थम राजा, प्रधान, ताकतवर माणसां का, घोड़या का, उनके सवारां का, अर सारे ढाल के आजाद, गुलाम, छोटे, बड़े, सारे माणसां का माँस खा सको।” 19 फेर मन्नै उस पशु जो समुन्दर म्ह तै लिकड़या था, धरती के राजयां अर उनकी पलटन ताहीं उस धोले घोड़े के सवार, अर उसकी पलटन तै लड़ण कै खात्तर कठे देख्या। 20 अर वो पशु अर उसके गेल्या वो झूटा नबी पकड़या गया, जिसनै उसकै स्याही इसे चमत्कार दिखाए थे, जिनकै जरिये उसनै उन ताहीं भकाया, जिन नै उस पशु की छाप ली थी, अर जो उसकी मूर्ति की पूजा कैरे थे, ये दोन्हु जिन्दे जी उस आग की झील म्ह जो गन्धक तै जळै सै, गेरे गये। (Limne Pyr g3041 g4442)

21 बाक्की लोग उस घोड़े की तलवार तै, जो उसके मुँह तै लिकड़ी थी, मार दिए गये, अर सारे पंछी उनके माँस तै छिकगे।

20 फेर मन्नै एक सुर्गदूत ताहीं सुर्ग तै उतरदे देख्या, जिसके हाथ म्ह

अथाह कुण्ड की ताळी, अर एक बड़ी बेल थी। (Abyssos g12) 2

अर उसनै उस जंगर, यानिके पुराणे साँप ताहीं, जो इल्लीस अर शैतान सै, पकड़कै हजार साल कै खात्तर बाँध दिया। 3 अर उस ताहीं अथाह कुण्ड म्ह गेर कै मूंद दिया, अर उसपै मोंहर ला दी, ताके वो हजार साल के पूरे होण तक देश-देश के माणसां ताहीं दुबारा न्ही भका सकै, यो सब होण कै बाद यो जरुरी सै, के थोड़ी देर खात्तर वो दुबारा खोल्या जावैगा। (Abyssos g12) 4 फेर मन्नै सिंहासनां पै कई माणसां ताहीं बेटे देख्या, अर उन ताहीं न्याय करण का हक दिया गया, अर फेर मन्नै उन माणसां की आत्मा ताहीं भी देख्या, जिनके सिर यीशु की गवाही देण अर परमेसवर के वचन कै कारण धड़ तै अलग करे गये थे। उननै उस पशु अर उसकी मूर्ति की पूजा कोनी करी थी, अर ना उसकी छाप अपणे माथ्यै अर हाथां पै ली थी, वे जिन्दा होकै मसीह कै गेल्या हजार साल ताहीं राज करदे रहे। 5 जिब तक ये हजार साल पूरे न्ही होए तब तक बाकी मेरे होए जिन्दा न्ही होए, यो तो पैहला पुनरुत्थान सै। 6 धन्य अर पवित्र सै वो माणस, जो इस पैहल्डे पुनरुत्थान म्ह शामिल होवैगा, इस्यां पै दुसरी मौत का किमे भी हक कोन्या, पर वे परमेसवर अर मसीह के याजक होंगे, अर उसकै गैल हजार साल ताहीं राज्य करेंगे। 7 अर जिब हजार साल पूरे हो लेंगे, तो शैतान कैद तै छोड़ दिया जावैगा। 8 अर उन जातां ताहीं जो धरती कै चौगदेकै होंगी, यानिके गोग अर मगोग जिनकी गिणती समुन्दर की बालू कै बराबर होंगी, उन ताहीं भकाकै, कठे करके लड़ाई करण खात्तर लिकड़ेगा। 9 वे सब्ती धरती पै फैल जावैंगी, अर पवित्र माणसां की छावणी अर प्यारे नगर नै घेर लेवैंगी, पर सुर्ग म्ह परमेसवर की आग उतरकै उसकी सारी पलटन ताहीं भस्म कर देवैगी। 10 अर उनका भकाण आळा शैतान आग अर गन्धक की उस झील म्ह गेर दिया, जिस म्ह वो पशु अर झूटा नबी भी होगा, अर वे दिन-रात युगानुयुग दर्द तै तड़पदे रहवैंगे। (aiōn g165, Limne Pyr g3041 g4442) 11 फेर मन्नै एक बड़ा धोला सिंहासन अर उसपै

बेठे होए परमेस्वर ताहीं देखा, जिसके स्याम्ही तै धरती अर अकास भाजगे, अर उसकै बाद वे दिखाई न्ही दिए। 12 फेर मन्नै छोटे-बडे सरे मरे होया ताहीं परमेस्वर के सिंहासन कै स्याम्ही खडे होए देखा, अर किताबें खोल्ली गई, अर फेर एक और किताब खोल्ली गई, यानिके जीवन की किताब। मरे होया का न्याय उनके कामां कै मुताबिक करया गया, जिनका बयान इन किताबां म्ह लिख्या होड़ था। 13 अर समुन्द्र नै उन मरे होए माणसां ताहीं उगळ दिया, जो उस म्ह थे, अर मौत अर अधोलोक नै भी उन मरे होए माणसां ताहीं उगळ दिया, जो उस म्ह थे, अर हरेक का न्याय उनके कामां कै मुताबिक करया गया। (Hadēs g86) 14 मौत अर अधोलोक भी आग की झील म्ह गेर गये, या आग की झील ए दुसरी मौत सै। (Hadēs g86, Limnē Pyr g3041 g4442) 15 अर जिस किसे का नाम जीवन की किताब म्ह लिख्या होया न्ही मिल्या, वो आग की झील म्ह गेर दिया गया। (Limnē Pyr g3041 g4442)

21 फेर मन्नै नये अकास अर नयी धरती ताहीं देखा, क्यूँके पैहला


अकास अर पैहली धरती खतम हो ली थी, अर समुन्द्र भी न्ही रहया। 2 फेर मन्नै पवित्र नगर नये यस्तश्लेम ताहीं सुर्ग पै तै, परमेस्वर कै धोरै तै उतरदे देखा, अर वो नगर उस बन्दडी की तरियां था, जो अपणे बन्डे खात्तर सिंगार करकै सिंगरी हो सै। 3 फेर मन्नै सिंहासन म्ह तै किसे ताहीं जोर तै न्यू कूहन्दे सुण्या, के, देख, आज तै ए परमेस्वर का डेरा माणसां कै बिचाळे होवैगा, वो उनकै गेल्या वास करैगा, अर वे उसके माणस होंगे, अर परमेस्वर खुद उनकै गेल्या रहवैगा, अर वो उनका परमेस्वर होगा। 4 अर वो उनकी आँखां तै सरे आँसू पुंज देवैगा, अर इसकै बाद ना मौत, ना दुख, ना बिलाप, अर ना दर्द रहवैगा, क्यूँके पुराणी बात बीत ली सै। 5 अर जो सिंहासन पै बेठ्या था, उसनै कहां, के देख, इब मै नई सुषिं की रचना करण लागरया सूं, फेर उसनै कहां, के लिख ले, क्यूँके जो कुछ कहां जाण लागरया सै, जो मै कहण लागरया सूं, तू उसपै विश्वास कर सकै सै, क्यूँके यो पक्का होवैगा। 6 फेर उसनै मेरै तै कहां, “सब कुछ पूरा होग्या सै, मै अल्फा अर ओमेगा, आदि अर अन्त सूं। जो तिसाए सै मै उन ताहीं उस पाणी के चोरै म्ह तै जौ अनन्त जिन्दगी देवै सै उस ताहीं मुफ्त म्ह प्याँँगा। 7 जो बुराई की ताकतां पै जीत पावै, वोए ये सारी आशीष मेरे तै पावैगा, अर मै उसका परमेस्वर होऊँगा, अर वो मेरा बेट्टा होगा। 8 पर डरपोक, अविश्वासी, घिनौणे, हत्यारे, जार, जादू-टूणे करणीये, मूर्ति पूजणीये, अर सरो झूँठे माणसां का भाग उस झील म्ह मिलैगा, जो आग अर गन्धक तै जळदी रहवै सै, या दुसरी मौत सै।” (Limnē Pyr g3041 g4442) 9 फेर जिन सात सुर्गदूत कै धोरै आखरी सात मुसीबतां तै भरे होड़ कटोरे थे, उन म्ह तै एक मेरै धोरै आया, अर मेरै गेल्या बात करकै कहां, “उरै आ मै तन्नै बन्दडी यानिके मेर्ने की घरआळी दिखाऊँगा।” 10 अर वो मन्नै आत्मा म्ह, एक बडे अर ऊँच्ये पहाड़ पै लेग्या, अर पवित्र नगर यस्तश्लेम ताहीं सुर्ग पै तै परमेस्वर कै धोरै उतरदे दिखाया। 11 परमेस्वर की महिमा उस म्ह थी, अर उसकी चमक बेस्किमती पत्थर पारस कै समान अर पन्ने की ढाळ

सुथरी थी। 12 अर उसकी चारदीवारी धणी ऊँच्यी थी, अर उसके बारहा फाटक अर फाटकां पै बारहा सुर्गदूत थे, अर उनपै इस्माएलियां के बारहा गोत्रां के नाम लिक्खे थे। 13 पूरब कान्ही तीन फाटक, उत्तर कान्ही तीन फाटक, दक्खिन कान्ही तीन फाटक, अर पश्चिम कान्ही तीन फाटक थे। 14 अर नगर की चारदीवारी की बारहा नीम थी, अर उनपै मेर्ने के बारहा प्रेरितां के बारहा नाम लिक्खे होड़ थे। 15 अर जो सुर्गदूत मेरै गेल्या बात करण लागरया था, उसकै धोरै नगर, उसके फाटकां अर उसकी चारदीवारी ताहीं नाप्यण कै खात्तर एक सोने का सरकण्डा दिया गया था। 16 अर वो नगर चकोर बस्या होड़ था, अर उसकी लम्बाई अर चौडाई एक सी थी, अर उसनै उस सरकण्डे तै नगर ताहीं नाप्या, तो साढे सात सौ कोस का लिकड्या, उसकी लम्बाई, चौडाई, अर ऊँचाई एक सी थी। 17 अर उसनै उसकी चारदीवारी ताहीं माणस के, यानिके सुर्गदूत के नाप तै नाप्या, तो छियासठ मीटर लिकड़ी। 18 अर उसकी चारदीवारी म्ह पन्ने जड़े थे, अर नगर इसे शुद्ध सोने का था, जो कठी शीशे बरगा साफ था। 19 अर उस नगर की नीम हरेक ढाळ के घणे महँगी पत्थरां तै सजाई होड़ थी, पैहलडी नीम पन्ने की थी, दुसरी नीलमणि की, तीसरी लालडी की, चौथी मरकत की। 20 पांचमी गोमेदक की, छठी माणिक्य की, सातमी पीतमणि की, आठमी पेरोज की, नौमी पुखराज की, दसमी लहसनिए की, ग्यारमी धूम्रकान्त की, बाहरमी याकूत की। 21 अर बारहों फाटक, बारहा मोतियाँ के थे, एक-एक फाटक, एक-एक मोत्ती का बण्या होड़ था, अर नगर की सडक साफ-सुधरे काँच कै जिसे शुद्ध सोने की थी। 22 अर मन्नै उस म्ह कोए मन्दर न्ही देखा, क्यूँके सर्वशक्तिमान प्रभु परमेस्वर, अर मेर्ना उसका मन्दर सै। 23 अर उस नगर म्ह सूरज अर चाँद के चाँदणे की जस्तत कोनी, क्यूँके परमेस्वर कै तेज तै उस म्ह चाँदणा होरया सै, अर मेर्ना उसका दीवा सै। 24 अर हरेक देश के माणस उसके चाँदणे म्ह चाल्लै-फिरेंगे, अर धरती के राजा अपणी शानों-शोकत उस म्ह ल्यावैंगे। 25 अर उसके फाटक दिन म्ह कदे भी न्ही मूरे जावैंगे, अर ओड़े रात न्ही होगी। 26 अर हरेक देश के माणस अपणी शानों-शोकत उस म्ह ल्यावैंगे। 27 पर उस नगर म्ह कोए अशुद्ध चीज, या धृणित काम करण आला, या झूठ का गढ़नआला किसे भी तरियां तै उस म्ह दाखल न्ही हो पावैगा, पर सिफे वे लोग दाखल होवैंगे जिनके नाम मेर्ने की जीवन की किताब म्ह लिक्खे सै।

22 फेर सुर्गदूत नै मेरै ताहीं पाणी दिखाया जो जीवन देण आला

पाणी कहलावै सै, अर वो पाणी शीशे की तरियां साफ था, अर उसका चोवां परमेस्वर का सिंहासन सै, जो के मेर्ने का भी सिंहासन सै। 2 वो नदी नगर के बीचों बीच सडक कै बिचाळै बहवै थी। अर नदी कै इस पार, अर उस पार, उसके दोन्नु किनारां पै जीवन का दरखत था, जो जीवन देवै सै, उस म्ह बारहा ढाळ के फल लाग्य थे, अर वो हरेक महिन्ने फल ल्यावै था, अर उस दरखत कै पत्थां तै हरेक देश के माणस चंगे होवै थे। 3 अर फेर कोए श्राप न्ही होगा। परमेस्वर अर मेर्ने का सिंहासन उस नगर म्ह होगा, अर उसके दास उसकी सेवा

करैंगें। 4 अर वे परमेस्वर ताहीं आम्ही-स्याम्ही देखैंगें, अर परमेस्वर का नाम उनके माथ्यां पै लिख्या होया होगा। 5 अर फेर कदे रात न्ही होगी, अर ना ए उन ताहीं दीवै अर सूरज के चाँदणे की जस्तरत होगी, क्यूँके प्रभु परमेस्वर उन ताहीं चाँदणा देवैगा, अर वे युगानुयुग राज करैंगे। (अंग g165) 6 फेर सुर्गदूत नै मेरै तै कह्या, “जो मै कहण लागरया सूं तू उसपै बिश्वास कर सकै सै, क्यूँके यो पक्का होवैगा, अर प्रभु जो नवियाँ की आत्मायाँ का परमेस्वर सै, अपणे सुर्गदूत ताहीं ज्यांतै भेज्या, के अपणे दास्सां ताहीं वे बात जिनका तावठा पूरा होणा जरूरी सै दिखावै।” 7 देख, मै तावळा आण आळा सूं धन्य सै वो, जो इस किताब की भविष्यवाणी की बातां नै मान्यै सै। 8 मै वोए यूहन्ना सूं जो ये बात सुणी, अर देक्खै था, अर जिब मनै सुण्या, अर देख्या, तो जो सुर्गदूत मन्यै ये बात दिखावै था, मै उसके पायां म्ह प्रणाम करण कै खात्तर मोथ्या पडग्या। 9 अर उसनै मेरै तै कह्या, “देख, इस ढाळ मतना करै, क्यूँके मै तेरा अर तेरे भाई नवियाँ का अर इस भविष्यवाणी की अर इस किताब की बातां कै मानण आळा का जोडीदार दास सूं परमेस्वर नै ए पूजा।” 10 फेर उसनै मेरै तै कह्या, “इस किताब की भविष्यवाणी की बातां ताहीं बन्द मतना करै, क्यूँके बखत आ लिया सै। 11 जो जुल्म करै सै, वो जुल्म ए करदा रहवै, अर जो बुरा सै, वो बुरा बण्या रहवै, अर जो धर्मी सै, वो धर्मी बण्या रहवै, अर जो पवित्र सै, वो पवित्र बण्या रहवै।” 12 लखा, मै तावळा-ए आण आळा सूं, अर हरेक के काम कै मुताबिक बदला देण कै खात्तर प्रतिफल मेरै धोरै सै। 13 मै अल्फा अर ओमेगा, पैहला अर आखरी, आदि अर अन्त सूं। 14 धन्य वे सै, जो अपणे लते धो लेवै सै, क्यूँके उन ताहीं जीवन के दरखत कै लोवै आण का हक मिलैगा, अर वे फाटकां तै हो कै नगर म्ह दाखल होवैंगे। 15 पर कुत्ते, अर जादू-टूणा करणीये, जार, हत्यारे, मूर्ति पूजणीया, हरेक झूठ का चाहण आळा, अर झूठ गढण आळा बाहरणै रहवैगा। 16 मुझ यीशु नै अपणे सुर्गदूत ताहीं ज्यांतै भेज्या सै, ताके थारे आगी कलीसियाओं कै बारै म्ह इन बातां की गवाही दिंयु, मै दाऊद का मूल, अर वंश, अर भोर का चमकदा होड तारा सूं। 17 अर आत्मा, अर बन्दडी दोनु कहवै सै, “आ!” अर सुणण आळा भी कहवै, के “आ!” अर जो तिसाया हो, वो आवै अर जो कोए चाहवै वो जीवन का पाणी मुफ्त म्ह ले। 18 मै हरेक ताहीं जो इस किताब की भविष्यवाणी की बात सुणै सै, गवाही दियुं सूं, के जै कोए माणस इन बातां म्ह किमे बधावै, तो परमेस्वर उन मुसीबतां ताहीं जो इस किताब म्ह लिक्खी सै, उसपै बढावैगा। 19 अर जै कोए इस भविष्यवाणी की किताब की बातां म्ह तै किमे लिकाडै, तो परमेस्वर उस जीवन के दरखत अर पवित्र नगर म्ह तै जिसका जिक्र इस किताब म्ह सै, उसका हिस्सा लिकाडै देवैगा। 20 जो इन बातां की गवाही देवै सै, वो न्यू कहवै सै, “हाँ, मै तावळा आण आळा सूं, आमीन। हे प्रभु यीशु आ!” 21 प्रभु यीशु का अनुग्रह पवित्र लोगां कै गैल रहवै। आमीन।



फेर मन्नै पवित्र नगर नये यरुशलेम ताहीं सुर्पा पै तै, परमेस्वर कै धोरै तै उतरदे देख्या, अर वो नगर उस बन्दडी की तरियां था,
जो अपणे बन्दडे खात्तर सिंगार करकै सिंगरी हो सै। फेर मन्नै सिंहासन म्ह तै किसे ताहीं जोर तै न्यू कहन्दे सुण्या, के, देख
आज तै ए परमेस्वर का डेरा माणसां कै बिचालै होवैगा, वो उनकै गेल्या वास करैगा, अर वे उसके माणस होंगे,
अर परमेस्वर खुद उनके गेल्या रहवैगा, अर वो उनका परमेस्वर होगा।

प्रकाशित वाक्य 21:2-3

Reader's Guide

हरियाणवी at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, “*As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him.*” Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, “*And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned.*” So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, “*Do your best to present yourself approved by God, a worker who does not need to be ashamed, properly handling the word of truth.*” 2 Timothy 2:15. “*God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,*” 2 Peter 1:4-8.

Glossary

हरियाणवी at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aïdios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonomous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Haryanvi---Haryanvi-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

लूका 8:31
रेमियों 10:7
प्रकाशित वाक्य 9:1
प्रकाशित वाक्य 9:2
प्रकाशित वाक्य 9:11
प्रकाशित वाक्य 11:7
प्रकाशित वाक्य 17:8
प्रकाशित वाक्य 20:1
प्रकाशित वाक्य 20:3

aïdios

रेमियों 1:20
यहूदा 1:6

aiōn

मत्ती 12:32
मत्ती 13:22
मत्ती 13:39
मत्ती 13:40
मत्ती 13:49
मत्ती 21:19
मत्ती 24:3
मत्ती 28:20
मरकुस 3:29
मरकुस 4:19
मरकुस 10:30
मरकुस 11:14

लूका 1:33
लूका 1:55
लूका 1:70
लूका 16:8
लूका 18:30
लूका 20:34
लूका 20:35
यूहन्ना 4:14
यूहन्ना 6:51
यूहन्ना 6:58
यूहन्ना 8:35
यूहन्ना 8:51
यूहन्ना 8:52
यूहन्ना 9:32
यूहन्ना 10:28
यूहन्ना 11:26
यूहन्ना 12:34
यूहन्ना 13:8
यूहन्ना 14:16

प्रेरितों के काम 3:21
प्रेरितों के काम 15:18
रेमियों 1:25
रेमियों 9:5
रेमियों 11:36
रेमियों 12:2
रेमियों 16:27
1 कुरिन्थियों 1:20
1 कुरिन्थियों 2:6
1 कुरिन्थियों 2:7
1 कुरिन्थियों 2:8
1 कुरिन्थियों 3:18
1 कुरिन्थियों 8:13
1 कुरिन्थियों 10:11
2 कुरिन्थियों 4:4
2 कुरिन्थियों 9:9
2 कुरिन्थियों 11:31
गलातियों 1:4
गलातियों 1:5
इफिसियों 1:21
इफिसियों 2:2
इफिसियों 2:7
इफिसियों 3:9
इफिसियों 3:11
इफिसियों 3:21
इफिसियों 6:12
फिलिप्पियों 4:20
कुलुस्सियों 1:26
1 तीमुथियुस 1:17
1 तीमुथियुस 6:17
2 तीमुथियुस 4:10
2 तीमुथियुस 4:18
तीतुस 2:12
इब्रानियों 1:2
इब्रानियों 1:8
इब्रानियों 5:6
इब्रानियों 6:5
इब्रानियों 6:20
इब्रानियों 7:17
इब्रानियों 7:21
इब्रानियों 7:24
इब्रानियों 7:28
इब्रानियों 9:26
इब्रानियों 11:3
इब्रानियों 13:8
इब्रानियों 13:21
1 पतरस 1:23

1 पतरस 1:25
1 पतरस 4:11
1 पतरस 5:11
2 पतरस 3:18
1 यूहन्ना 2:17
2 यूहन्ना 1:2
यहूदा 1:13
यहूदा 1:25
प्रकाशित वाक्य 1:6
प्रकाशित वाक्य 1:18
प्रकाशित वाक्य 4:9
प्रकाशित वाक्य 4:10
प्रकाशित वाक्य 5:13
प्रकाशित वाक्य 7:12
प्रकाशित वाक्य 10:6
प्रकाशित वाक्य 11:15
प्रकाशित वाक्य 14:11
प्रकाशित वाक्य 15:7
प्रकाशित वाक्य 19:3
प्रकाशित वाक्य 20:10
प्रकाशित वाक्य 22:5

aiōnios

मत्ती 18:8
मत्ती 19:16
मत्ती 19:29
मत्ती 25:41
मत्ती 25:46
मरकुस 3:29
मरकुस 10:17
मरकुस 10:30
लूका 10:25
लूका 16:9
लूका 18:18
लूका 18:30
यूहन्ना 3:15
यूहन्ना 3:16
यूहन्ना 3:36
यूहन्ना 4:14
यूहन्ना 4:36
यूहन्ना 5:24
यूहन्ना 5:39
यूहन्ना 6:27
यूहन्ना 6:40
यूहन्ना 6:47
यूहन्ना 6:54
यूहन्ना 6:68

यूहन्ना 10:28
यूहन्ना 12:25
यूहन्ना 12:50
यूहन्ना 17:2
यूहन्ना 17:3
प्रेरितों के काम 13:46
प्रेरितों के काम 13:48
रोमियो 2:7
रोमियो 5:21
रोमियो 6:22
रोमियो 6:23
रोमियो 16:25
रोमियो 16:26
2 कुरिन्थियों 4:17
2 कुरिन्थियों 4:18
2 कुरिन्थियों 5:1
गलातियों 6:8
2 थिस्सलुनीकियों 1:9
2 थिस्सलुनीकियों 2:16
1 तीमुथियुस 1:16
1 तीमुथियुस 6:12
1 तीमुथियुस 6:16
2 तीमुथियुस 1:9
2 तीमुथियुस 2:10
तीतुस 1:2
तीतुस 3:7
फिलेमोन 1:15
इङ्ग्रानियों 5:9
इङ्ग्रानियों 6:2
इङ्ग्रानियों 9:12
इङ्ग्रानियों 9:14
इङ्ग्रानियों 9:15
इङ्ग्रानियों 13:20
1 पतरस 5:10
2 पतरस 1:11
1 यूहन्ना 1:2
1 यूहन्ना 2:25
1 यूहन्ना 3:15
1 यूहन्ना 5:11
1 यूहन्ना 5:13
1 यूहन्ना 5:20
यहूदा 1:7
यहूदा 1:21
प्रकाशित वाक्य 14:6

eleēsē

रोमियो 11:32

Geenna
मत्ती 5:22
मत्ती 5:29
मत्ती 5:30
मत्ती 10:28
मत्ती 18:9
मत्ती 23:15
मत्ती 23:33
मरकुस 9:43

मरकुस 9:45
मरकुस 9:47
लूका 12:5
याकूब 3:6
Hadēs
मत्ती 11:23
मत्ती 16:18
लूका 10:15
लूका 16:23
प्रेरितों के काम 2:27
प्रेरितों के काम 2:31
1 कुरिन्थियों 15:55
प्रकाशित वाक्य 1:18
प्रकाशित वाक्य 6:8
प्रकाशित वाक्य 20:13
प्रकाशित वाक्य 20:14

Limnē Pyr
प्रकाशित वाक्य 19:20
प्रकाशित वाक्य 20:10
प्रकाशित वाक्य 20:14
प्रकाशित वाक्य 20:15
प्रकाशित वाक्य 21:8

Sheol
उत्पत्ति 37:35
उत्पत्ति 42:38
उत्पत्ति 44:29
उत्पत्ति 44:31
गिनती 16:30
गिनती 16:33
व्यवस्था विवरण 32:22
1 शमूएल 2:6
2 शमूएल 22:6
1 राजा 2:6
1 राजा 2:9
अय्यूब 7:9
अय्यूब 11:8
अय्यूब 14:13
अय्यूब 17:13
अय्यूब 17:16
अय्यूब 21:13
अय्यूब 24:19
अय्यूब 26:6

भजन संहिता 6:5
भजन संहिता 9:17
भजन संहिता 16:10
भजन संहिता 18:5
भजन संहिता 30:3
भजन संहिता 31:17
भजन संहिता 49:14
भजन संहिता 49:15
भजन संहिता 55:15
भजन संहिता 86:13
भजन संहिता 88:3
भजन संहिता 89:48


भजन संहिता 116:3
भजन संहिता 139:8
भजन संहिता 141:7
नीतिवचन 1:12
नीतिवचन 5:5
नीतिवचन 7:27
नीतिवचन 9:18
नीतिवचन 15:11
नीतिवचन 15:24
नीतिवचन 23:14
नीतिवचन 27:20
नीतिवचन 30:16
सभोपदेशक 9:10
श्रेष्ठीत 8:6
यशायाह 5:14
यशायाह 7:11
यशायाह 14:9
यशायाह 14:11
यशायाह 14:15
यशायाह 28:15
यशायाह 28:18
यशायाह 38:10
यशायाह 38:18
यशायाह 57:9
यहेजकेल 31:15
यहेजकेल 31:16
यहेजकेल 31:17
यहेजकेल 32:21
यहेजकेल 32:27
होशे 13:14
आमोस 9:2
योना 2:2
हबवकूक 2:5

Tartaroō

2 पतरस 2:4

Questioned


मत्ती 3:7
2 पतरस 2:17




जिब परमेस्वर नै अब्राहम ताहीं किते जाण खात्तर बुलाया था, तो उसनै बिश्वास तै ए परमेस्वर के हुकम ताहीं मानकै, एक इसी जगहां लिकड़ गया, जो जगहां परमेस्वर अब्राहम ताहीं उसकी जायदाद के तौर पै देण आळा था,
पर वो या कोनी जाँगे था के वो कित्त जावै सै, अर वो फेर भी चला गया। - इव्रानियों 11:8

Israel's Exodus

N



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



कथें में माणस का बेटा ज्याहे कोनी आया के अपणी सेवा-पाणी करवाऊँ, पर ज्याहे आया के खुद सेवा-पाणी करौँ, अर घणख्यां के छुट्कारे के खातर अपणी जान देऊँ। - मर्कुस 10:45

Jesus' Journeys



या चिट्ठी पौलुस की ओड़तै सै, जो यीशु मसीह का दास सै अर परमेस्वर के जरिये प्रेरित होण कै खात्तर चुण्या गया अर उसका सुसमाचार सुणाण खात्तर न्यारा करया गया सै। - रोमियों 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophesies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Usher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyred in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyred in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we? ►			Genesis 1:26 - 2:3 Mankind is created in God's image, male and female He created us					
How are we sinful? ►			Romans 5:12-19 Sin entered the world through Adam and then death through sin					
When are we? ▼								
Where are we?			Innocence		Fallen			Glory
			Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age
								New Heavens and Earth
Who are we? ►	God	Father	John 10:30 God's perfect fellowship	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light			Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City
		Son			John 8:58 Pre-incarnate	John 1:14 Incarnate	Luke 23:43 Paradise	
		Holy Spirit			Psalm 139:7 Everywhere	John 14:17 Living in believers		
	Mankind	Living	Ephesians 2:1-5 Serving the Savior or Satan on Earth Luke 16:22 Blessed in Paradise Luke 16:23, Revelation 20:5,13 Punished in Hades until the final judgment Hebrews 1:14 Serving mankind at God's command	Genesis 1:1 No Creation No people	Ephesians 2:1-5 Serving the Savior or Satan on Earth			Matthew 25:41 Revelation 20:10 Lake of Fire prepared for the Devil and his Angels
		Deceased believing			Luke 16:22 Blessed in Paradise			
		Deceased unbelieving			Luke 16:23, Revelation 20:5,13 Punished in Hades until the final judgment			
	Angels	Holy			Hebrews 1:14 Serving mankind at God's command			
		Imprisoned	2 Peter 2:4, Jude 6 Imprisoned in Tartarus Genesis 1:31 No Fall No unholy Angels	Genesis 1:31 No Fall No unholy Angels	2 Peter 2:4, Jude 6 Imprisoned in Tartarus	Revelation 20:13 Thalaasa Revelation 19:20 Lake of Fire Revelation 20:2 Abyss		
		Fugitive			1 Peter 5:8, Revelation 12:10 Rebelling against Christ Accusing mankind			
		First Beast						
		False Prophet						
		Satan						
Why are we? ►			Romans 11:25-36, Ephesian 2:7 For God has bound all over to disobedience in order to show mercy to all					

Destiny

हरियाणवी at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament Sheol and New Testament *Hadēs*, 2) Geenna, 3) Tartaroō, 4) Abyssos, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'*" Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, "*You did not choose me, but I chose you,*" John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



World Nations

इस करके थम जाओ, सारी जातां के माणसां ताहीं चेल्ला बणाओ; अर उननै पिता, पुत्र अर पवित्र आत्मा कै नाम तै बपतिस्मा धो, - मत्ती 28:19